


Diiz kuu ndyaadno
yalnaban



New Testament in Zapotec, Ozolotepec (MX:zao:Zapotec,
Ozolotepec)

Diiz kuu ndyaadno yalnaban

New Testament in Zapotec, Ozolotepec (MX:zao:Zapotec, Ozolotepec)

copyright © 2007 Wycliffe Bible Translators, Inc.

Language: Zapotec, Ozolotepec

Translation by: Wycliffe Bible Translators, Inc.

Zapoteco, Ozolotepec [zao], Mexico

Copyright Information

© 2007, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Ozolotepec

© 2007, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

cea57c17-4410-5b80-9d6c-b85ae95d5104

Contents

Mateo	1
Marcos	37
Lucas	59
Juan	97
Hechos	124
Romanos	157
1 ^a de Corintios	172
2 ^a de Corintios	186
Gálatas	195
Efesios	200
Filipenses	205
Colosenses	209
1 ^a de Tesalonicenses	213
2 ^a de Tesalonicenses	216
1 ^a de Timoteo	218
2 ^a de Timoteo	223
Tito	226
Filemón	228
Hebreos	229
Santiago	240
1 ^a de Pedro	244
2 ^a de Pedro	248
1 ^a de Juan	251
2 ^a de Juan	255
3 ^a de Juan	256
Judas	257
Apocalipsis	259

Diiz Chul chaan Jesucrist kuu mkee Mateo

*Raz chaan re tey Jesucrist
(Lc. 3:23-38)*

¹ Jesucrist ngol lo raz chaan rey David, ne lo raz chaan Abraham kuu ngok tey re zha Israel ndala.

² Abraham ngok xut Isaac, Isaac ngok xut Kob, ne Kob ngok xut Judá ne re wets Judá.

³ Judá ngok xut Fares ne xut Zara, ne xnaa rop zha'a ngok Tamar,

Fares ngok xut Esrom, Esrom ngok xut Aram.

⁴ Aram ngok xut Aminadab, Aminadab ngok xut Naasón,

ne Naasón ngok xut Salmón.

⁵ Salmón ngok xut Booz ne Rahab ngok xnaa Booz,

Booz ngok xut Obed ne Rut ngok xnaa Obed, ne Obed ngok xut Isaí.

⁶ Isaí ngok xut rey David, ne lee rey David ngok xut Salomón,

ne lee xnaa Salomón ngok ngot kuu ngok tsaal Uriás.

⁷ Salomón ngok xut Roboam, Roboam ngok xut Abías,

ne Abías ngok xut Asa.

⁸ Asa ngok xut Josafat, Josafat ngok xut Joram,

ne Joram ngok xut Uzías.

⁹ Uzías ngok xut Jotam, Jotam ngok xut Acaz, ne Acaz ngok xut Ezequías.

¹⁰ Ezequías ngok xut Manasés, Manasés ngok xut Amón,

ne Amón ngok xut Josías.

¹¹ Josías ngok xut Jeconías ne re wets Jeconias, ne re zha'a naban leettsa mnedenre zha Babilonia re zha Israel par Babilonia.

¹² Ne leettsa mtelaa re zha Babilonia re zha Israel;

lee Jeconías ngok xut Salatiel, ne lee Salatiel ngok xut Zorobabel.

¹³ Zorobabel ngok xut Abiud, Abiud ngok xut Eliaquim,

ne Eliaquim ngok xut Azor.

¹⁴ Azor ngok xut Sadoc, Sadoc ngok xut Aquim,

ne Aquim ngok xut Eliud.

¹⁵ Eliud ngok xut Eleazar, Eleazar ngok xut Matán,

Matán ngok xut Kob;

¹⁶ ne lee Kob ngok xut Che tsaal Mari xnaa Jesús,

Zha Kuu Mtaal Diox Nabee.

¹⁷ Ne tsiiida raz ngoo desde Abraham asta rey David, ne tedib tsiday desde rey David asta leettsa mnedenre zha Babilonia re zha Israel par Babilonia, ne tedib tsiday ngoo desde leettsa mtelaa re zha Babilonia re zha Israel, asta leettsa mzin Zha Kuu Mtaal Diox Nabee.

*Leettsa ngol Jesúus
(Lc. 2:1-7)*

¹⁸ Tenzhee ngok leettsa ngol Jesúus: Leettsa lee Mari xnaa Jesúus naka diiz tseyá kon Che, per bee ter yo rop zha, ne lee Mari ngoo zhiinn por yalney chaan Mbi Nayon chaan Diox. ¹⁹ Tsa lee Che mtsow xgab laa Mari, tak thib mbyi wen nak zha, mtsow zha xgab laa zha Mari xgaatsta, tak nlaazt zha roo yalnathoy Mari lo re men. ²⁰ Ne leettsa ngetsov Che xgab laa Che Mari, lee thib mandad chaan Diox cha ngwani lo Che lo mkaal, ne nzhab lo Che:

—Che, lu nak thib zha raz rey David, yat leettsoo'a kaa'a Mari, tak lee Mari ngoo zhiinn por yalney chaan Mbi Nayon, ²¹ ne gap Mari thib mbet ne tob le'a mbet Jesúus. Tbaa role mbet tak lee mbet tuyf falt chaan re tawlawz mbet.

²² Ne lee le Jesúus nak: Lee Zha Nabee nteela. Reta koree mriid tsa ngok kuu nzhab Zha Nabee, por roo profet kuu ngoo ndala, or nzhab profet:

²³ Lee thib nzaa kuu ter gak rop thib mbyi, yo zhiinn ne gap thib mbet; ne tob le zha mbet Emanuel, (diiz ree nak: "Diox ndo kon lee"). [Is. 7:14]

²⁴ Ne leettsa mroo mkaal lo Che, tsa mtsow Che kuu nzhab mandad chaan Diox lo Che, ne mkayaa Che Mari ngok Mari tsaal Che. ²⁵ Per ngogt rop zha, asta leettsa ngol xgann Mari kuu ner; ne mtob le Che mbet Jesúus.

2

*Re zha kuu nteed kwent chaan re mbet
kuu nzib lobee ngwatwiil lo mbet*

¹ Leettsa ngol Jesúus yez Belén chaan yezyli Judea, re wiz kuu mban rey Herodes, tsya lee chop tson zha kuu nteed kwent chaan re mbet kuu nzib lobee, mroo lad ta nlen wiz, ne mzin re zha Jerusalén. ² Ne mnaabdiz re zha, nzhab zha:

—¿Ma mbet kuu gak rey chaan re zha Israel, kuu ngola? Tak asta ta nlen wiz mwii nee mbet chaan mbet, kona ndyaad nee gol nee lo mbet.

³ Per leettsa mbin rey Herodes ne re zha yez Jerusalén koree, kwathoz nda leettsoo Herodes ne noga re zha Jerusalén. ⁴ Tsa mkaaltaa Herodes re ngwleyy kuu nabee lo re ngwleyy, ne re maestr chaan ley, tsa mnaabdiz Herodes lo re zha, naa plo nzhab

re profet kuu ngoo ndala ndoblo gal Zha Kuu Taal Diox Nabee.⁵ Tsa lee re zha nzhab:

—Yez Belén, kuu nzi yezlyu Judea; tak tabaa nkey lo xkeets Diox kuu mkee profet, or kuu nzhab profet:

⁶ Goo zha yez Belén kuu nzi yezlyu chaan Judá,

tegalaz goo nak thib yez kuu nataagt xid re yez kuu nzi yezlyu'a,

per lo goo roo thib zha kuu nabee ne kenap re zha yez da, zha Israel. [Mi. 5:2]

⁷ Tsa xgaatsta mrez rey Herodes re zha kuu nteed kwent chaan re mbel kuu nzib lobee, ne mnaabdiz rey naa pol mloo mbel lo re zha. ⁸ Tsa mtaal Herodes re zha yez Belén, ne nzhab rey lo re zha:

—Gwa goo, gwakwaan goo mbet, ne leettsa yetsal mbet lo goo, ko goo diuze lon, tsa no na ya gol lo mbet.

⁹ Leettsa ngwalo mbin re zha kuu nzhab rey, tsa ngoo re zha net nda zha, ne lee mbel kuu mwii zha ner, mroo mndener lo re zha, ne mlet mbel asta ta nax mbet. ¹⁰ Ne or mwii re zha lee mbel mlet, kwathoz naley ngoo leettsa mndaab re zha leen yuu, mwii zha lo mbet kon Mari xnaa mbet, tsa mtobxub re zha ne mbil zha lo mbet; ne mloo re zha re kwaan ndano zha mndelaazha lo mbet, mndaa zha or, straak ne mirra. ¹² Ne lo mkaal mni Diox lo re zha, tsa retabt raa zha lo rey Herodes, tata mod tedib net mretab re zha laz zha.

Che rop Mari mzhonn kon mbet yez Egipto

¹³ Leettsa lee re zha kuu nteed kwent chaan mbel mroo ndya, lee thib mandad chaan Diox ngwani lo Che lo mkaal ne nzhab lo Che:

—Gwache, ne teno mbet kon xnaa mbet, tree goo par yezlyu Egipto, ne kwet goo tya asta or nin lo goo roo goo tya, tak lee rey Herodes nkwaan mbet par kuth mbet.

¹⁴ Tsa ngwache Che, leeka yaala ndano Che mbet ne xnaa mbet, ne ndya re zha par Egipto, ¹⁵ ne tya ngoo zha asta nguth Herodes; tsa mrolo kuu nzhab Zha Nabee, por roo profet kuu ngoo ndala leettsa nzhab profet: “Asta yez Egipto mrez'n xgann na”. [Os. 11:1]

Lee rey Herodes mnabee kuth zha re mbet

¹⁶ Per leettsa bee ter gath rey Herodes, myeen rey lee re zha kuu nteed kwent chaan mbel kuu nzib lobee, mkedzha rey, tsa kwathoz mkezhyan rey, kona lee rey mnabee ne mtaal soldad yez Belén ne re yez kuu nzi gaxta Belén, tsa kuth zha re mbet bzhizh kuu nap asta chop liin, kuu ngol tyemp kuu nzhab re zha kuu nteed kwent chaan mbel lo rey Herodes. ¹⁷ Tbaa mrolo kuu nzhab profet Jeremí, or nzhab profet:

¹⁸ Desde yez Ramá mbin na thib bos, ta mbin na nzhonon ne ndi leettsa re ngot kuu nak raz Raquel, por re zhiinn re ngot nzhonon ngot, tak nguth re zhiinn ngot, ne nlaazt re ngot tetsey zha leettsa ngot. [Jer. 31:15]

¹⁹ Per leettsa ngutha rey Herodes, lee thib mandad chaan Zha Nabee ngwani lo Che lo mkaal yez Egipto, ne nzhab lo Che:

²⁰ —Gwache, teno mbet ne xnaa mbet ne bretab yezlyu Israel tedib welt, tak ngutha re zha kuu nlaazt kuth mbet.

²¹ Tsa ngwache Che ne mndeno Che mbet ne xnaa mbet, ne mretab re zha yezlyu Israel tedib welt. ²² Per leettsa mbin Che lee Arquelao xgann rey Herodes nabee Judea, tsa mzeb Che retab Che tya; per lee Diox mni lo Che lo mkaal; kona ndya Che par yezlyu Galilea. ²³ Ne mzin Che ngoo Che yez kuu le Nazaret. Tsa mrolo kuu nzhab re profet, leettsa nzhab re zha: “Nazaren tob le re men Jesús”.

3

Juan kuu mtsowleyy re men mni thib ta yubiz

(Mr. 1:1-8; Lc. 3:1-9, 15-17; Jn. 1:19-28)

¹ Ne lee re wiza lee Juan kuu mtsowleyy re men, mzin yubiz chaan yezlyu Judea. ² Ne nzhab Juan:

—jBtsee goo mod went kuu nak goo, tak lee wiz kuu lee Diox nabee lo goo mzin gaxa!

³ Ne Juan ree mteth profet Isaí, leettsa nzhab profet:

Lee thib zha kuu ndo yubiz, dib gan zha kwez zha:

“Thib nali bloo goo leettsa goo, par kayaa goo Zha Nabee, ne nali gok goo lo re kuu ntsow goo”. [Is. 40:3]

⁴ Ne lee xab Juan natekwaa kon yits lad kamey, ne nalib thib sinch yid leeyy Juan; ne kuu nzhow Juan nak ngebeez ne kuu nzhuu Juan nak mzin wan. ⁵ Reta men yez Jerusalén, re men yezlyu chaan Judea, ne re men re yez kuu nzi dita roo yoo Jordán ngwa lo Juan. ⁶ Or ngwalo mbin re zha lee Juan nzhab, ndoblo xoobdol zha re kuu went kuu mtsow zha. Tsa mxoobdol re zha re kuu went kuu mtsow zha, ne lee Juan mtsowleyy zha leen yoo Jordán.

⁷ Per or mwii Juan kwathoz re zha fariseo ne re zha saduceo ndyaad gakleyy lo Juan, tsa nzhab Juan lo re zha:

—jGoo nak zha kuu nakap nak taxal mbeel! ¿Cho ne lo goo tak laa goo lo yalnayii chaan Diox, kuu yaad leettsa lux yezlyu?

⁸ Ner ban goo thib mod nali, ne bloo goo mtsee goo mod went kuu nak goo, tsaraa yaad goo tsa tsow leyy'n goo, ⁹ ne rubt goo

gab goo: "Zhiinn Abraham nak nee". Kona tegal ndaa nee falt tekayaa Diox nee, tak wlipaa na nin lo goo, lee Diox tak tsow lo re ke ree roo zhiinn Abraham, kona ndechet Diox goo.¹⁰ Tak lista ndo Diox par teti Diox goo, os tseet goo mod went kuu nak goo, ne leey nak, taxal yeba kuu ndoba xann re ya kuu ndaat xle wen, tsa ga zhay ne ko zhay lo ki.¹¹ Tak wlipaa lee na ntswoley y goo kon nit, tsa tsee goo mod went kuu nak goo; per lee men kuu ndyaadke dits'n, tsowley y goo kon Mbi Nayon ne kon ki, tak masraa nataak zha nake na, kona neeka dits labiyid zha ndoblot'n xak'n.¹² Lee zha nak taxal thib zha kuu lista ndo nzo ya yaa, par koo paj lo nzob xtil, ne kotsow zha nzob xtil leen loo, lee paj teyy zha lo ki kuu thitanax nyuyyt.

*Jesús ngokleyy
(Mr. 1:9-11; Lc. 3:21-22)*

¹³ Tsa ngwa Jesús roo yoo Jordán kuu nzi yezlyu Galilea ta ndo Juan, tsa tsowley y Juan Jesús.¹⁴ Ner mzhyalt Juan, tsa nzhab Juan lo Jesús:

—Lu ndoblo tsowleyy'n. ¿Chebee leel lu ndyaad gakleyy lon?

¹⁵ Lee Jesús mkab, ne nzhab:

—Bloo kona yeka nal, tak ropaa ndoblo tsow kuu nlaaz Diox.

Tsaraa mzhyal Juan mtsowley y Juan Jesús.¹⁶ Ne or ngwalo ngokley y Jesús ne mroo Jesús leen nit, oraaka lee yibaa mzhaar, ne lee Mbi Nayon chaan Diox ndela taxal thib palom mla dits Jesús.¹⁷ Tsa mbín re men thib bos kuu mroo yibaa kuu nzhab:

—Zha ree nak xgann na kuu kwathoz nke leettsoon, ne kwathoz wen nzo leettsoon nen zha.

4

*Lee Maxuuy ngwalaaz gakedi Jesús
(Mr. 1:12-13; Lc. 4:1-13)*

¹ Tsa lee Mbi Nayon ndano Jesús thib ta yubiz, ne leettsa mndo Jesús ty, lee Maxuuy ngwalaaz gatsow Jesús kuu went.² Ne chop gal wiz ne chop gal yaal mndo Jesús ty, ne yent kwaan ndow Jesús, tsaraa mlann Jesús.³ Tsa lee Maxuuy mbig lo Jesús, tsa naa chu tetsow Jesús kuu gab Maxuuy, tsa nzhab Maxuuy lo Jesús:

—Os lee'a wlipaa Xgann Diox naka, bloo lee'a nak Xgann Diox, guz tsa lee re ke ree royal pan.

⁴ Per lee Jesús mkab, ne nzhab:

—Lo xkeets Diox nzhab: "Nabant men kon beeta pan, sinke lee men nabán por re diiz kuu ndroo roo Diox". [Dt. 8:3]

⁵ Tsa mndeno Maxuuy Jesús yez Jerusalén, yez nayon, ne mndeno Maxuuy Jesús yek gwodoo ta mas ya ndab,⁶ ne nzhab Maxuuy lo Jesús:

—Os lee'a wlipaa Xgann Diox naka, bloo lee'a nak Xgann Diox, brethin par yath, yent kwan taka, tak lee lo libr chaan Salm nzhab: "Lee Diox taal mandad chaan Diox, tsa ten mandad lu kon yaa mandad, tsa gabta lo ke". [Sal. 91:11-12]

⁷ Tsa lee Jesús nzhab:

—Noga nzhab lo xkeets Diox: "Kithnota Diox kuu nak Zha Nabee lo'a". [Dt. 6:16]

⁸ Ne bluz mndeno Maxuuy Jesús yek thib yii kuu kwathoz naro, tsa mloo Maxuuy reta yez kuu nzi lo yezlyu lo Jesús, re yalnabee chaan re yeza, naa xomod chul na re yeza.
⁹ Tsa nzhab Maxuuy lo Jesús:

—Reta koree tan lo'a, os lee'a tobxuba lon ne gola lon.

¹⁰ Tsa nzhab Jesús lo Maxuuy:

—Beche lon golt'n lo'a, tak lo xkeets Diox nzhab: "Bil lo Diox kuu nak Zha Nabee lo'a, ne beeta lo Diox ndoblo gona diz". [Dt. 6:13]

¹¹ Tsaraa mlaa Maxuuy Jesús, tsa lee chop tson mandad chaan Diox mlortsin lo Jesús.

*Jesús mndelo rtsin Jesús yezlyu Galilea
(Mr. 1:14-15; Lc. 4:14-15)*

¹² Leettsa mbín Jesús lee Juan nzo tsib, tsa ngwa Jesús yezlyu Galilea, ne leettsa ndo Jesús yezlyu Galilea, tsa ngwa Jesús yez Nazaret.¹³ Per myaant Jesús yez Nazaret, sinke lee Jesús ndya ngoo yez Capernaúm, yez kuu nzi gax roo nitdoo, yezlyu kuu ngok chaan Zabulón rop Neftalí, tsa loo Jesús lo re men tyá.¹⁴ Koree ngok tsa mrolo kuu mkee profet Isaí, o kuu nzhab profet:

¹⁵ Yezlyu chaan Zabulón rop Neftalí, kuu nzi roo nitdoo tedib lad roo yoo Jordán, yezlyu Galilea ta nzo re zha kuu nagt zha Israel.

¹⁶ Lee re zha yeza mndaa falt, kona nabil nzo leettsoo zha,
nak zha taxal thib yez kuu nzi lo yalkow,
ne mndelo re zha yeza myen xkiiz Diox,
kona nak taxal mwii zha thib xni thoz,
ne lee re zha kuu nzi thib ta nathoz ta nzo
ryez gath zha,
mndelo zha myen zha xkiiz Diox, ne nake
taxal mla thib xni lo re zha. [Is. 9:1-2]

¹⁷ Desde tsya mndelo Jesús mndaa kwent xkiiz Diox, ne nzhab Jesús:

—Btsee goo mod went kuu nak goo, tak lee wiz kuu lee Diox nabee lo goo mzin gaxa.

*Jesús mrez thap zha kuu niit mbel
(Mr. 1:16-20; Lc. 5:1-11)*

¹⁸ Ne leettsa ndiy Jesús roo nitdoo chaan Galilea, tsa mwii Jesús Simún kuu nogá le Pey ne wets Pey kuu le Ndres, rop zha ree ngeniit mbel leen nitdoo, tak zha niit mbel nak zha.¹⁹ Tsa nzhab Jesús lo rop zha:

—Bteke goo dits'n, tsa tsow'n gak goo zha kuu niit men par Diox.

²⁰ Ne oraaka mlaa zha yex zha ne mnndeke zha dits Jesús.

²¹ Ne ndaka Jesús, tsa mwii Jesús Santiag ne Juan, rop zha ree nak xgann Zebedeo, lee re xut zha nzo leen thib kano ngeyib zha yex zha, tsa mrez Jesús rop zha. ²² Ne oraaka mlaa rop zha xut zha leen kano ne mnndeke zha dits Jesús.

*Jesús mloo lo kwathoz men
(Lc. 6:17-19)*

²³ Ne mndiy Jesús dita yezlyu Galilea, ne nlloo Jesús lo re men ta nkaltaa re men nteed xkiiz Diox. Ne ndaa Jesús kwent Diiz Chul chaan ta nabee Diox, ne mtegwe Jesús relota yiz ne relota yalne kuu ndak re men. ²⁴ Ne dita yezlyu Siria myath re kuu ntsow Jesús; ne lee re mena ndyaadno re zha kuu ne ndak, re zha kuu ndak tedib net re yiz, re zha kuu nzo mbi fyer leettsou, re zha kuu ndak yizguthye ne re zha mthans, tsa mtegwe Jesús re zha. ²⁵ Kwaro re men yezlyu Galilea, re men re tsii yez kuu nak Decápolis, re men Jerusalén, re men yezlyu Judea ne re men kuu nzo tedib lad roo yoo Jordán ndyaad lo Jesús.

5

*Jesús mloo lo re men yek thib yii
(Lc. 6:20-23)*

¹ Or mwii Jesús kwathoz men, tsa mkindab Jesús yek yii ne mndob Jesús, ne myaad re zha kuu ngeted lo Jesús lo Jesús, ² ne mndelo Jesús mloo lo re zha, ne nzhab Jesús:

³ —Wen nzo leettsou Diox ne Diox re goo kuu nyeen leettsou ndeche Diox, tak Diox taa diiz tab goo ta nabee Diox.

⁴ 'Wen nzo leettsou Diox ne Diox re goo kuu nzhon, tak mndaa goo falt, tak lee goo tetsey leettsou goo.

⁵ 'Wen nzo leettsou Diox ne Diox re goo kuu nadoo nak, tak lee goo kayaa yezlyu kuu taa Diox.

⁶ 'Wen nzo leettsou Diox ne Diox re goo kuu nlaaz tsow re kuu nali, tak goo nak taxal zha kuu nlann ne nzheek leettsou, ne lee goo tse leettsou.

⁷ 'Wen nzo leettsou Diox ne Diox re goo kuu nlat leettsou ne taben, tak talat leettsou Diox ne Diox goo.

⁸ 'Wen nzo leettsou Diox ne Diox re goo kuu nambi leettsou, tak lee goo wii lo Diox.

⁹ 'Wen nzo leettsou Diox ne Diox re goo kuu ntsow wen kwin re men, tak lee goo role zhiinn Diox.

¹⁰ 'Wen nzo leettsou Diox ne Diox re goo kuu ndreke re men dits, tak ntsow goo kuu wen, tak chaan goo nak ta nabee Diox.

¹¹ 'Wen nzo leettsou Diox ne Diox re goo, leettsa ntsalzhoo zha goo ne ndreke zha dits goo, ne nkedi zha ni zha ndota kuu went lo

goo, tak tataka mreke zha dits re profet kuu ngoo ndala. ¹² Ndroblo wen ne naley bloo goo leettsou goo, tak naroob re kwaayaa goo yibaa.

*Re'aa nak taxal ted ne taxal xni lo re men yezlyu ree
(Mr. 9:50; Lc. 14:34-35)*

¹³ 'Goo nak taxal ted lo yezlyu ree, per os lee ted natsigt ted, ¿xomod gak natsig ted tedib welt? Lortsint raay, sinke kobi zhay, tsa lo re men ditse.

¹⁴ 'Goo nak taxal xni lo yezlyu, Leeka tata, gagt gaats thib yez kuu nzi yek yii. ¹⁵ Ne neeka nkeet zha thib kandil, ne ngo zhay xann thib zhibey; sinke ntob zhay ta mas ya ndab, tsa teniy lo re men kuu nzo leen yuu.

¹⁶ Ndroblo goo tsow goo re kuu wen, tsa wii re men re kuu wen kuu ntsow goo. Goo nak taxal xni kuu nteni, tsa wii re men re kwaayaa. Btsow gooy, tsa leettsa wii zha re kuu wen kuu tsow goo, taa zha texkix lo Xutaa Diox kuu ndob yibaa.

Jesús mndaa kwent chaan ley

¹⁷ 'Tsowt goo xgab leen ndyal luux ley kuu mkee Moisé, ne re kuu nzhab ne re kuu mkee re profet kuu ngoo ndala, sinke leen ndyal tsow kuu nzhab ley ne kuu nzhab re profet. ¹⁸ Tak wlipaap na nin lo goo, leettsa lee yezlyu ree ne lee lobee bee nzika, gagt yib neeka thib lan re diiz kuu nke lo ley, sinke reta ndroblo gak. ¹⁹ Kona loka cho zha kuu gont diiz thib re kuu nabee lo ley, tegal kuu mas nataagte, ne tataga loo zhay lo tedib net zha, leeka tata lee zha'a gak zha kuu mas nataagt ta nabee Diox. Per lee zha kuu nhzon diize ne tataka loo zhay lo tedib net zha, zha'a gak zha kuu mas nataak ta nabee Diox. ²⁰ Kona nin lo goo, os lee goo gagt goo masraa wen lo re kuu ntsow goo, nake re maestr chaan ley ne nake re fariseo, tsowt goo gan tab goo ta nabee Diox.

*Jesús mloo xomod nak yalnayii
(Lc. 12:57-59)*

²¹ 'Ne mbin goo kwan nzhab Moisé lo re teyaa zha ndala, leettsa nzhab Moisé: "Kuththa tabena, ne loka cho kuth taben, lee Diox naab kwent lo zha'a ne laat zha". ²² Per lee na ni lo goo, loka cho kuu gak nayii lo taben, tenaab Diox kwent lo zha'a, ne loka cho gab lo taben "zha nad", tenaab jwez kwent lo zha'a ne laat zha'a, ne loka cho gab "bxen" lo taben, zha'a nak thib zha kuu ndo'a net ndya gabil.

²³ 'Kona os lee'a ndyaadno'a gona lo bkoog chaan Diox, ne ora telaaza mndaa'a thib falt lo wetsa, ²⁴ blaa gona leeka tya, ne bkwaan mod yaana wen kon wetsa. Tsaraa bretaba lo bkoog chaan Diox ne btaa gona.

²⁵ 'Os lee thib zha kuu nayii ne'a, teno zha lu lo zha kuu nak tsiin par keki zha lu,

kwaan mod tsa wen yaana kon lee zha, or bee ter kwez zha lu lo zha kuu nak tsii, tak os lee'a yaanta wen kon zha kuu nayii ne'a, cha yataa zha lu lo zha kuu naab kwent lo'a, ne lee zha kuu naab kwent lo lu taa zha lu lo zha kuu nkenap roo tsib, tsa ko zha lu tsib.²⁶ Wlipaa na nin roota tya, asta yelo kizha ultim rehal kuu ndoblo'a kizha.

Jesús mloo xomod nak zha kuu nzhak rop kon zha kuu nagt tsaal

²⁷ Ne mbina goo nzhab Moisés: "Gagt rop goo kon thib zha kuu nagt tsaal goo".²⁸ Per leen ni lo goo, loka cho thib mbyi kuu ngwii lo thib ngot, ne ntsow zha xgab gak rop zha kon ngota, mndaa'a zha falt.²⁹ Kona os lee ngutlo'a ntsow ntsowa kuu went, btsow kuu taxal mloo'a ngutlo'a ne mlobi luy tith, mas wen luuzha thib ngutlo'a ne ndya'a yibaa, nake diba ndya gabil.³⁰ Ne os lee yaa bana ntsow ntsowa kuu went, btsow kuu taxal mga luy cho'a; tak mas wen luuzha thibka yaa'a ne ndya'a yibaa, nake diba ndya gabil.

*Jesús mloo ndoblot laa zha tsaal zha
(Mt. 19:9; Mr. 10:11-12; Lc. 16:18)*

³¹ Ne noga nzhab Moisés: "Loka cho mbyi kuu laa tsaal, ndoblo faa zha thib yeets kuu mroo yuulow, kuu nzhab lee zha mtsos rop tsaal".³² Per leen ni lo goo, os lee thib mbyi laa tsaal, ne nagte tak ngok rop ngot zha kon tedib mbyi, mbyi'a ntsow taa ngot falt, leettsa kaa ngot tedib mbyi, ne noga mbyi kuu kaa ngota taa falt.

Jesús mloo ndoblot tselo zha

³³ Noga mbin goo nzhab Moisés lo re teyaa zha ndala: "Lortsinta le Diox par tselo'a, sinke btsow kuu nzhaba tsowa lo Zha Nabee".³⁴ Per leen ni lo goo, tselot goo por neeka thib re kwwaa, neeka por re zha kuu nzo yibaa, tak tya nak ta ndob Diox,³⁵ neeka por re mbi kuu nzo lo yezlyu, tak tya nak ta ndo nii Diox; neeka por yez Jerusalén, tak tya nak yez chaan rey, zha kuu kwathoz nataak.³⁶ Neeka tselot goo gab goo tan na gath'n os tsowt'n kuu nin. Ndoblot tselo goo, tak Diox ntsow nzhak re kwwaa ne nagte goo, tak neeka thib goo gagnat tsow naguz goo o tsow goo nagat goo thib yitsek goo.³⁷ Sinke nali ndoblo tediz goo gab goo "wliy" o "wlide". Tak os lee goo tsowt goo tabaa, went kuu ntsow goo.

*Jesús mloo naa xomod ndoblo tsow men
lo zha kuu nayii ne men
(Lc. 6:29-30)*

³⁸ Noga mbin goo nzhab Moisés: "Os lee thib zha koo ngutlo' tedib zha, tataka ndoblo tsow zha lo zha'a, ne os lee thib zha koo keley tedib zha, tataka ndoblo tsow zha lo zha'a".³⁹ Per leen ni lo goo: Tsowt goo kuu went lo zha kuu nlaaz tsow thib kuu went lo goo; sinke loka cho kuu nlaaz keey kwat

goo lad ban, noga btaa goo tedib lad kwat goo kee zhay.⁴⁰ Ne loka cho zha kuu nlaaz teno goo lo zha kuu nak tsii, tsa kib zha kamis goo, noga btaa goo xabits goo lo zha.⁴¹ Ne loka cho kuu nabee lo goo gwe goo thib kwaah thib mil metr, be gooy chop lala.⁴² Ne loka cho naab kwaah lo goo, btaa gooy lo zha, ne loka cho zha kinn kwaah lo goo, btseche gooy lo zha.

*Ndoblo kelaaza re zha kuu nayii ne'a
(Lc. 6:27-28, 32-36)*

⁴³ Tak noga mbin goo nzhab Moisés: "Bke leettsoo'a tabena, ne byii ne zha kuu nayii ne'a".⁴⁴ Per leen ni lo goo, bke leettsoo goo re zha kuu nayii ne goo, ne bnaab goo lo Diox por re zha kuu ndreke dits goo.⁴⁵ Tsa gak goo taxal ndoblo gak re zhiinn Xutaa Diox kuu ndob yibaa; tak lo reta men ntsow Diox kuu wen, ndaa Diox xni wiz lo re men wen ne lo re men went, ne ntela Diox yi lo re men kuu nali nak ne lo re men kuu nalit nak.⁴⁶ Os lee goo nke leettsoo goo beeta re zha kuu nkelaaz goo, ¿kwan tsow goo gan? Tak tataga ntsow re zha kuu ndab falt, kuu ntsow kobral temi chaan yezlyu kuu nzhax lo zha Roma.⁴⁷ Ne os lee goo ni goo "diox", beeta lo re zha kuu nak raz chaan goo. ¿Kwan kuu wen ntsow goo tsa? Noga re zha kuu nagt zha Israel tata ntsow, ne yent kwan kayaa zha lo Diox.⁴⁸ Nali gok goo, taxal nali nak Xutaa Diox kuu ndob yibaa.

6

*Jesús mloo xomod ndoblo tsow zha kuu
wen*

¹ Kenap goo goo, tsowt goo kuu wen beeta par wii re men lo goo; os lee goo tata ntsow goo, neeka thib kwwaa kayaat goo lo Xutaa Diox kuu ndob yibaa.

² Kona leettsa taa goo karida lo thib zha kuu ndechey, tetht gooy lo re men ne gab goo: "Nlaz'n ne goo leen mtsow ayud zha kuu ndechey", taxal ntsow re zha kuu nkedi, re zha kuu zhaa kuu mbezz ne zhaa kuu ntsow. Tak tabaa ntsow re zha'a, ta nkaltaa re'a nteedaa xkiiz Diox, noga ntsow zhay net, tsa wen ni re men zha. Wlipaa na nin, beeta kona nak kuu tsow zha gan.³ Per lee goo, leettsa taa goo thib kwwaa lo thib zha kuu ndechey, btsow goo tsa yent cho ney, ne neeka amig goo kuu mas nzaal leettsoo goo ndoblot ney.⁴ Xgaatsa btsow gooy, tsa lee Xutaa kuu ne re kuu xgaatsta, taa kuu tsow goo gan lo goo.

*Jesús mloo xomod ndoblo tediz men lo
Diox*

(Lc. 11:2-4)

⁵ Kona nin lo goo, leettsa tediz goo lo Diox, tsowt goo taxal ntsow re zha kuu nkedi, re zha kuu zhaa kuu mbezz ne zhaa

kuu ntsow zha. Re zha'a nyow leettsoo zha tediz zha lo Diox, ta nkaltaa re'aa nteedaa xkiiz Diox ne re net, tsa wii re men lo zha lee zha ngetediz lo Diox. Wlipaa na nin, beeta kuu tsow zha gan nak, wen ni re men lo zha, per lo Diox yent kwan tsow zha gan.⁶ Per lee re goo, leettsa tediz goo lo Diox, btaab goo leen liz goo, btow goo roo pwert, ne btediz goo lo Xutaa Diox kuu nloot, tsa lee Xutaa kuu ne re kuu xgaats, taa kuu tsow goo gan lo goo.

⁷ 'Ne leettsa tediz goo lo Diox, gabt goo thibka lan diiz tyen welt, taxal ntsow re zha kuu nagt zha Israel. Tak lee re zha'a ntsow zha xgab ton Diox xkiiz zha, ne taa Diox re kuu naab zha, tak nol ndediz zha lo Diox.⁸ Tsowt goo taxal ntsow re zha'a; tak lee Xutaa ne'a naa kwan ndeche goo, leettsa terka naab gooy lo Xutaa.⁹ Kona, tenzhee ndoblo tediz goo lo Xutaa Diox:

Xut'n, kuu ndob yibaa,
nlaz'n tsow nataak re mena tak nayon naka.¹⁰

Taxal ntsow re zha kuu nzo yibaa kuu nlaaza,
leeka tata nlaz'n tsow re men yezlyu ree
kuu nlaaza.

Nlaz'n yaada nabee'a lo yezlyu ree,
taxal nabee'a yibaa.

¹¹ Taa kuu wun naltserree.

¹² Ne btuyy re faltaa kuu mtsow'n lo'a,
taxal mlo'a na yek'n re falt kuu mtsow re
taben da lon.

¹³ Btsow tsa tsowt'n kuu went,
leettsa nkiil tedib zha na,
ne bkenap'n lo kuu went kuu nlaaz Maxuuy
tsow lon,

tak chaana nak ta nabee'a, yalney ne
ta nla xni chul chaana thitanax.
Tata gake.

¹⁴ 'Ne os lee goo, koo goo yek goo reta falt
kuu mtsow re taben goo lo goo, noga Xutaa
kuu ndob yibaa tetuyy re falt chaan goo.
¹⁵ Per os lee goo koot goo yek goo re kuu
mtswod tedib net zha lo goo, noga Xutaa kuu
ndob yibaa, tuyyt re falt chaan goo.

Jesús mloo naa xomod tsow men ayun

¹⁶ 'Kona nin lo goo, leettsa tsow goo
ayun, tak ntsow goo xgab tata mas wen nzo
leettsoo Diox ne Diox goo, leettsa nzhout
goo neeka thib kwaas, tsowt goo taxal thib
zha nalatt, taxal ntsow re zha kuu nkedi,
re zha kuu zhaa kuu mbezz ne zhaa kuu
ntsow. Kwathoz nabil ntsow zha, tsa reta
men ne lee zha ngetsow ayun. Per wlipaa
na nin lo goo, napa zha kuu tsow zha gan.¹⁷ Per lee na ni lo goo, leettsa tsow goo ayun,
bteech goo lo goo ne wen btee goo bow yek
goo,¹⁸ tsa net re men lee goo ngetsow ayun.
Sinke beeta Xutaa kuu ne re kuu xgaats
ndoblo ney, ne lee Xutaa taa lo goo, kuu
tsow goo gan.

Bkno goo kwaayibaa (Lc. 12:33-34)

¹⁹ 'Kalataat goo kwathoz kwaas lo yezlyu
ree, tak lo yezlyu ree nke mbete ne nke yi-
toy, ne ndaab wann nlowann wann.²⁰ Mas
wen kaltaat goo kwaas leen yibaa, ta neeka
thib kwaas luxt ne neeka ket mbete, ne
neeka ket yitoy, ta tabt wann lowann wann.²¹ Mas
wen btsow goo kuu wen, tak os lee
goo tsow gooy, masraa yo leettsoo goo tsow
goo kuu wen.

Ngutlo men nak xni dib men (Lc. 11:34-36)

²² 'Os lee'a ndablaazta re kuu yezlyu ree
kuu ngwii'a, kona nak nagwe ngutlo'a ne
wen nyeni ngutlo'a, tak wii'a re kwaas ne
tablaazta luy.²³ Per os lee'a ndablaaza re
kwaas yezlyu ree, kuu ngwii'a, kona nak
taxal nagwet ngutlo'a ne yent kwan nyeni
lo'a. Os lee'a tata naka, reta kuu ntsowa
nloo lee'a nak thib zha ndaa falt.

Nkenap Diox re zhiinn Diox (Lc. 16:13; Lc. 12:22-31)

²⁴ 'Neeka thib zha gagt ke tsiiin lo chop
zha, tak teyii zha ne thib zha, ne lee tedib
zha kelaaz zha, lo thib zha gon zha diiz, lee
lo tedib zha gont zha diiz. Gagt lortsin goo
lo Diox ne lo re kwaas yezlyu ree.

²⁵ 'Kona nin lo goo: Yat leettsoo goo por
re kuu wu goo ne kuu gu goo, tsa ban
goo, neeka tsowt goo xgab re lar kuu gok
goo. jChu nagt masraa nataak yalnaban
goo, nake kuu nzhout goo, kuu nzhuu goo
ne kuu nzhok goo?²⁶ Wii goo lo re min kuu
nlazbi, nzhant maa, neeka nthopt maa
yalgonn, neeka ngotsowt maa yalgonn leen
loo, per lee Xutaa kuu ndob yibaa ndaa
loww maa. jChu nagt masraa nataak goo
nake re min!²⁷ Tsowt goo xgab re kona, tak
jcho thib goo kuu kwathoz nlaaz ban telut,
per tegal nlaaz gooy, gagt tsow goo ban goo
neeka telut?

²⁸ 'Ne chebee kwathoz ntsow goo xgab,
naa xomod tsanaa goo lar kuu gok goo? Mas
wen wii goo lo re yee kuu ndab wan; nketa
yee tsiiin ne neeka ndexkwaat yee lar.²⁹ Per
lee na ni neeka rey Salomón, kon dita yalrik
chaan Salomón mdogt xab Salomón taxal
thib re yee kuu ndab wan.³⁰ Ne os lee Diox
ntsow chul nyaal re yizh kuu ndab wan
naltserree, ne lee tedib wiz nzheekie, jChu
nagt tataga taa Diox reta kuu ndeche goo lo
goo, men kuu lutta nyelaaz Diox?³¹ Ne yat
leettsoo goo gab goo: "jKwan dowaa o kwan
gu'aa ne kwan gokaa?"³² Tak reta zha kuu
nagt zha Israel, kwathoz ntsow zha xgab re
koree. Per lee Xutaa kuu ndob yibaa ne'a
naa kwan ndeche goo.³³ Taa goo diiz nabee
Diox lo goo lo reta kwaas, ne bkwaan goo
thibka nali ban goo taxal nlaaz Diox, tsa lee
Diox taa reta koree lo goo.³⁴ Kona nin, tsowt

goo xgab re kuu nzo yek goo tsow goo yee o wiz, tak kadta wiz nzo kwan tsow goo xgab.

7

*Naabt goo kwent lo tedib zha
(Lc. 6:37-38, 41-42)*

¹'Naabt goo kwent lo tedib zha, tsa naabt Diox kwent lo goo. ²Tak leeka taxal naab goo kwent lo tedib zha, leeka tata naab Diox kwent lo goo, ne taxal nchiix goo kuu ndaa goo lo tedib net zha, leeka tata chiix Diox kuu taa Diox lo goo. ³¿Chebee nye leettsoo'a ngwi'a lo paj kuu nzo ngutlo'edib zha, ne ngwiita lo ya kuu nzo ngutlo'a? ⁴Ne os lee'a nyeenta nzo ya ngutlo'a, ¿xomod nye leettsoo'a mbeza lo tedib zha: "Laa gon paj kuu nzo ngutlo'a"? ⁵¡Zha nkedi, zhaa kuu mbeza ne zhaa kuu ntsowa! Ner bloo ya kuu nzo ngutlo'a, tsa tak wii'a wen, tsa tak koo'a paj kuu nzo ngutlo'edib zha.

⁶'Taat goo re kuu nayon lo re mbak, tak cha yii maa lo goo ne wuley maa goo. Ne neeka taat goo re ke kuu nhzhol kuu kwathoz nataak lo re nguch, tak nataagte lo maa, cha lo maa ditse ne luux maay.

*Bnaab goo, kwaang goo, bteez goo rooyuu
(Lc. 11:9-13; 6:31)*

⁷'Kona nin lo goo, kon dib ndroo leettsoo goo bnaab gooy lo Zha Nabee, ne lee Zha Nabee taay; ne nake taxal nkwaan goo thib kuu ne tatsale lo goo; noga nake taxal nteez goo roo yuu, tsa xaal zha roo yuu lo goo. ⁸Tak reta zha kuu naabe nkayaa zhay; ne reta zha kuu nkwaane teyetsale lo zha; ne reta zha kuu nteez roo yuu taxal zha roo yuu lo zha.

⁹'Os lee zhiinn goo naab tsa pan lo goo, ¿chu tataa goo thib ke lo zhiinn goo? Wlipaa taat gooy. ¹⁰Ne os lee zhiinn goo naab thib mbel lo goo, ¿chu tataa goo thib mbel lo zhiinn goo? Wlipaa tsowt goo tata. ¹¹Ne leeka tata tegal zha kuu kwathoz went nak goo, per nzhaak goo ndaa goo kuu wen lo zhiinn goo, ¡xomod lee Xutaa kuu ndob yibaa, taat kuu wen lo reta zha kuu naabe lo Xutaa!

¹²'Kona, leeka taxal nlaaz goo tsow tedib net re men lo goo, tataga btsow goo lo zha; tak tata nhzhab lo ley kuu mkee Moisés, ne tataka nhzhab re kuu mkee re profet kuu ngoo ndala.

*Pwert kuu naya
(Lc. 13:24)*

¹³'Btaab goo roo pwert kuu naya. Tak lee net naxen ne roo pwert kuu naxen, ndano zha ta lux zha thitanax. Ne kwathoz zha nden neta. ¹⁴Per lee pwert ne net kuu ndano men lo yalnaban, naya nak, ne lut zha nden neta.

*Kadta ya nabee ya por xle kuu ndaa ya
(Lc. 6:43-44)*

¹⁵'Bkenap goo goo, yelaazt goo kuu ne re zha kuu nkedi lo goo nal tyemp ree: "Tak ne zha na nak profet". Ne nadoo nhzhak zha taxal mbak zhiil, ne lee leettsoo zha nayii nzo taxal mbeez kuu nayii. ¹⁶Tak lebee goo re zha'a por re kuu ntsow zha; leeka taxal reta ya nabee ya por xle kuu ndaa ya, tak nthopt men ub lo ya yits, ne neeka nthopt men ig lo yitsti. ¹⁷Ne tataga reta ya kuu wen ndaay xle wen, per lee ya kuu went ndaay xle went. ¹⁸Kona lee ya xle, kuu ndaa xle kuu nhzhow men, gagt taay xle kuu nhzhow men, ne tataga lee ya xle kuu ndaa xle kuu nhzhow men, gagt taay xle kuu wu men. ¹⁹Reta ya kuu ndaat xle kuu nhzhow men, taga zhay ne ko zhay lo ki. ²⁰Tenzhee tak lebee goo reta zha, por re kuu ntsow zha.

*Ret men tab yibaa ta nabee Diox
(Lc. 13:25-27)*

²¹'Ret men kuu ni lon: "Zha Nabee, Zha Nabee", tab ta nabee Diox, sinke beeta re zha kuu ntsow kuu nlaaz Xut'n kuu ndob yibaa, tab ta nabee Diox. ²²Ne lee wiza kwathoz zha tablaaz, taa Diox diiz to zha kon Diox, tsa ne zha lon: "Zha Nabee, re nee ngok profet kuu mndaa kwent xkiiza, ne kon yalnabee chaana mloo nee mbi fyer, ne kon yalnabee chaana mtsow nee naroob kwa". ²³Per tsa kab'n ne nin: "¡Thitanax mlebeet'n goo, beche goo lon, men kuu ntsow kuu went!"

*Rop simyent
(Lc. 6:47-49; Mr. 1:22)*

²⁴'Kona, loka zha kuu ngeyon kuu ngenin lo goo, ne ntsow zha kuu nin, zha'a nak taxal thib mbyi list kuu mta liz dits ke. ²⁵Tegal mla yi thoz, ne mroo nit ne mroo mbi thoz, ne mdiinne yuu'a; per mbixt yuu tak lo ke ndob yuu. ²⁶Per lee zha kuu ngeyon xkiz'n ne ntsowt zha kuu nin, zha'a nak taxal thib mbyi bxen kuu mta liz lo gux. ²⁷Per leetsa mla yi thoz, ne mroo nit ne mroo mbi thoz, mdiinne yuu'a, tsa mbix yuu'a ne mlux yuu'a thitanax.

²⁸Leetsa ngwalo nhzhab Jesús re koree, kwathoz mzegey leettso re men re kuu mloo Jesús lo re men; ²⁹tak kon yalnabee mloo Jesús lo re men, ne mloot Jesús taxal nloo re maestr chaan ley.

8

*Jesús mtegwe thib zha kuu ndeye kwerp
(Mr. 1:40-45; Lc. 5:12-16)*

¹Leetsa mretab Jesús ngwa Jesús yek yii, kwathoz men mndeke dits Jesús. ²Ne xid re mena mroo thib mbyi kuu ndeye kwerp, mbig lo Jesús ne mtobxub, ne nhzhab zha:

—Zha Nabee, os lee'a nlaaza, tak tegwe'a na lo yiz ree.

³ Tsa mxoob Jesús yaa Jesús dits zha, ne nzhab Jesús lo zha:

—Nlaz'n, we'a.

Ne oraaka mgwe zha. ⁴Tsa nzhab Jesús lo zha:

—Wii, yent cho lo gaba koree. Sinke gwa lo ngwleyy ne btaa gona taxal nabee ley chaan Moisés, gon kuu ndaa re zha kuu mgwe lo yiz kuu mzaaka, tsa ne ngwleyye lee'a mgwe'a ne gab ngwleyye lo re men.

Jesús mtegwe mos thib soldad kuu nabee lo thib gayoo soldad
(Lc. 7:1-10)

⁵ Ne or mndaab Jesús yez Capernaúm, lee thib soldad kuu nabee lo thib gayoo soldad, ngwa mnaab thib yalwen lo Jesús, ⁶ne nzhab:

—Zha Nabee, lee mos da kwathoz ne ndak, gagt gwin zha ne kwathoz ndakti zha.

⁷ Tsa nzhab Jesús lo soldad:

—Nal yan tsa tegwen zha.

⁸ Tsa lee soldad kuu nabee lo thib gayoo soldad nzhab:

—Zha Nabee, ndblobt'n taba leen liz'n, anta nabee ne lee mos da gwe. ⁹Tak noga na nap'n zha kuu nabee lon, ne noga na nap'n soldad kuu nabeen lo. Os leen gap'n lo thib zha: "Gwa", ne nya zha; ne or gap'n lo tedib zha "De", ne nyaad zha; ne leettsa mbez'n lo mos da "Tsow koree", tsow zhay.

¹⁰ Kwathoz mzegey leettsoo Jesús mbin Jesús kona, tsa nzhab Jesús lo re zha kuu ndeke dits Jesús:

—Wlipaa na nin lo goo, jneeka thib re tawlaza zha Israel nyelaazt Diox taxal mbyi ree! ¹¹ Wlipaa na nin lo goo, kwathoz tyen re zha kuu nagt zha Israel, kuu nzo dib naxta lo yezlyu, tob zha wu zha kon Abraham, kon Isaac ne kon Kob ta nabee Diox, ¹²per lee re zha Israel kuu nak diiz tob ta nabee Diox, ndya gabil ta nakow na, ne ty a gonn zha ne tub zha keley zha.

¹³ Tsa nzhab Jesús lo mbyi kuu nabee lo thib gayoo soldad:

—Tyee liza, tak ngwalaaza lee Diox tak tegwe, kona mgwe mosa.

Leeka ora lee mos soldad mgwe.

Jesús mtegwe kwathoz mbyiz
(Mr. 1:29-34; Lc. 4:38-41)

¹⁴ Tsa lee Jesús kon chop tson zha kuu ngeteed lo Jesús ngwa liz Pey, ne mwii Jesús lee xnaatsaap Pey ne ndak, nax lo luun ndak xlee. ¹⁵ Ne mzhen Jesús yaa zha, ne oraaka lee xlee mroo zha. Ne ngwache zha ne mndaa zha kuu ndow re zha.

¹⁶ Leettsa mkow yezlyu lee re men kuu nzo yezlyu'a, myaadno kwathoz re zha lo Jesús, re zha kuu nzo mbi fyer leettsoo ne re zha kuu ndak choraa yiz, ne kon thibka lan diiz mloo Jesús re mbi fyer, ne noga mtegwe Jesús reta mbyiz. ¹⁷ Koree ngok,

tsa mrolo kuu mkee profet Isaí zha ndala, leettsa nzhab profet: "Lee zha mbe reta yiz chaanaa ne re yalne chaanaa". [Is. 53:4]

Re zha kuu nlaaz teke dits Jesús
(Lc. 9:57-62)

¹⁸ Or mwii Jesús kwathoz men mrin dita lo Jesús, tsa mnabee Jesús lo re tsuibchop zha kuu ngeteed lo Jesús, tsa rid re zha tedib lad roo nitdoo, tsa roxkwani re zha. ¹⁹ Ne ora lee thib maestr kuu nloo xkiiz Diox mbig lo Jesús, ne nzhab:

—Maestr, nlaz'n teken ditsa loka pa ta ya'a.

²⁰ Ora mkab Jesús lo maestr, ne nzhab Jesús:

—Lee re mbeet nap maa kelyoo ta nyoo maa, ne lee re min nap maa lyaat maa; per lee na Kuu Mzin Ngok Men, neeka ta xoob'n yek'n roxkwani na napt'n.

²¹ Tsa lee tedib zha kuu ngeteed lo Jesús nzhab lo Jesús:

—Zha Nabee, nlaz'n teken ditsa, per laa anta yelo kaats'n xut'n.

²² Tsa nzhab Jesús lo zha:

—Bteke dits'n, laa kaats re zha kuu nyelaazt Diox re zha nguth.

Mbi ne nitdoo nzhon diiz lo Jesús
(Mr. 4:35-41; Lc. 8:22-25)

²³ Tsa mke Jesús leen thib kano, ne noga re zha kuu teed lo Jesús nda kon Jesús, par rid re zha tedib lad roo nitdoo. ²⁴ Per leettsa nda re zha lo nitdoo, tsa mroo thib mbi thoz, ne asta ndaab nit leen kano. Per lee Jesús ngoth ne mzhen mkaal Jesús. ²⁵ Tsa lee re zha kuu ngeteed lo Jesús, mloo zha mkaal lo Jesús, ne nzhab re zha lo Jesús:

—Zha Nabee, laata luzhaa, tak ngelowg-waa leen nitdoo.

²⁶ Jesús mkab ne nzhab:

—¿Chebee kwathoz nzeb goo? ¿Chebee lutta nyelaazt goo Diox?

Tsa ngwateli Jesús ne mkox mbi ne nitdoo lo Jesús, ne zheta ngok mbi ne nitdoo.

²⁷ Reta zha kuu ngeteed lo Jesús kwathoz mzegey leettsoo zha, ne mbez zha lo altaa zha:

—¿Cho nak mbyi ree? ¿Chebee asta mbi ne nitdoo nzhon diiz lo zha?

Chop zha yez Gadara kuu nzo mbi fyer leettsoo
(Mr. 5:1-20; Lc. 8:26-39)

²⁸ Leettsa mzxin Jesús kon re zha kuu ngeteed lo Jesús tedib lad roo nitdoo, yezlyu chaan re zha Gadara, ne ty a lee chop zha kuu nzo mbi fyer leettsoo, mroo leen re kelyoo ta nkaats zha re zha nguth, ty a mtsow zha liz zha rop zha, ne mbig rop zha lo Jesús, ne kwathoz nakap nzhab zha, kona yent cho tak rid neta. ²⁹ Ne mretsyath zha ne nzhab zha:

—¿Chaka ndyaad lo nee, Jesús Xgann Diox? ¿Chu ndyaada tet'i nee, leettsa terka tsin wiz kuu tet'i nee?

³⁰ Gax tya nzi kwathoz nguch ngeyow.
³¹ Tsa lee re mbi fyer mnaab lo Jesús, ne nzhab:

—Os lee'a koo'a nee, taa diiz tab nee leettsoo re nguch baa.

³² Tsa nzhab Jesús:

—¡Gwa goo!

Ne lee re mbi fyer mroo leettsoo rop zha'a ne mndaab leettsoo re nguch. Ne oraaka mrozhonn re nguch ne mbix maa yek kedoo ngob maa leen nitdoo, ngwaap re maa nit ne thitanax nguth maa.

³³ Oraaka lee re zha kuu nkenap re nguch mzhonn ndya, ne or mzin re zha yez, mn-delo zha mndaa zha kwent re kuu ngok, kon rop zha kuu ngoo mbi fyer leettsoo. ³⁴ Tsa reta zha yez mroo ngwa ta ndo Jesús. Ne or mwii re zha Jesús; mnaab zha lo Jesús, tsa roo Jesús yezlyu zha.

9

*Jesús mtegwe thib zha mthans
(Mr. 2:1-12; Lc. 5:17-26)*

¹ Tsa mndaab Jesús leen thib kano, ne mriid Jesús tedib lad roo nitdoo, ne mzin Jesús ta nak laz Jesús. ² Tya mbe zha thib zha mthans kuu nzoob lo luun lo Jesús. Ne myeen Jesús lee re zha kuu ndyaadno mthansa, nyelaaz lee Jesús tak tegwe mthans, tsa nzhab Jesús lo mthans:

—Wen bloo leettsoo'a; tak reta falta myuyya.

³ Tsa lee chop tson maestr kuu nloo xkiiz Diox mtsow xgab: "Went ni zha ree Diox, tak mbez zha lee zha tak tuyy re falt men".

⁴ Per lee Jesús ne'a naa kwan ntsow re zha xgab, tsa mnaabdiz Jesús lo re zha:

—¿Chebee kwathoz went ntsow goo xgab?
⁵ ¿Kwan ntsow goo xgab? ¿Kwan mas nagant gap na lo mbyiz ree: "Lee re falta myuyya", per nagan tegwe men zha ne gab men lo zha, "Gwache ne bte"? ⁶ Tsow'n koree lo goo, tsa ne goo lee na, Kuu Mzin Ngok Men, nap'n yalnabee tuy'n re falt goo.

Tsa nzhab Jesús lo mthans:

—Gwache bzhen luuna, ne tyee liza.

⁷ Tsa lee mthans ngwache mzen luun ne ndya lize. ⁸ Leettsa mwii re men kona, kwathoz mzeb re men ne mbil men lo Diox, tak lee Diox mndaa yalnabee lo thib men, tsa tegwe men tedib men.

*Jesús mrez Mateo
(Mr. 2:13-17; Lc. 5:27-32)*

⁹ Leettsa mroo Jesús tya mwii Jesús na kuu le Mateo, ndob'n ngetsov'n kobral temi chaan yezlyu kuu nzhab lo zha Roma, tsa ne Jesús lon:

—Bteke dits'n.

Tsa ngwatelin ne mndekeen dits Jesús.
¹⁰ Ne leettsa ngeyow Jesús liz'n, noga mzin tedib net re zha kuu ntsow kobral temi chaan yezlyu kuu nzhab lo zha Roma, ne tedib net re zha kuu ntsow kuu went, ne mndob re zha roo mes kon Jesús, ne kon re zha kuu ngeteed lo Jesús. ¹¹ Ne or mwii re fariseo koree, tsa nzhab zha lo re zha kuu ngeteed lo Jesús:

—¿Chebee nzhow maestr goo, kon re zha kuu ntsow kobral temi chaan yezlyu kuu nzhab lo zha Roma, ne kon re zha kuu ntsow kuu went?

¹² Jesús mbin kona, tsa nzhab Jesús lo re zha:

—Lee re zha kuu net ndak, ndechet zha doctor, per lee re mbyiz, zha'a ndeche doctor. ¹³ Tyaa goo, ne bteed goo naa kwan nak re diiz ree: "Kuu nlaz'n nak, blat leettsoo goo ne goo taben goo, nlazt'n beeta kuth goo maa taa goo lon". [Os. 6:6] Tak ndyal't'n ndyaadchez'n re zha wen, sinke lee na ndyal ndyaadchez re zha kuu ndab falt, tsa tsee zha mod went kuu nak zha.

*Yalnabdziz chaan ayun
(Mr. 2:18-22; Lc. 5:33-39)*

¹⁴ Tsa mbig re zha kuu mndeke dits Juan kuu mtsowleyy, ne mnaabdiz zha lo Jesús, nzhab zha:

—¿Chebee re nee, ne re fariseo kwaro ntsow nee ayun, ne lee re zha kuu ngeteed lo'a ntsowt zhay?

¹⁵ Jesús mkab, ne nzhab:

—¿Chu tak tsow re zha kuu nzi lo fandan ayun, leettsa lee mbyi kuu mtsey'a ndoka lo re zha? Per tetsin wiz kib re zha mal mbyi kuu mtsey'a lo re zha; tsasi lee re zha tsow ayun.

¹⁶ Noga nzhab Jesús:

—Neeka thib zha ngibt thib le lar kub cho lar gox, tak lee lar kub mbich, leettsa nteech zhay ne masraa nchatte lar gox ne gagt raa lortsin zhay. ¹⁷ Ne neeka ngot zha xit ub kuu kubleen gom yid gox, tak lee xit ub kuu kub yezhoob, ne chatte gom gox. Tsa lee xit ub zho, ne noga gom lux. Kona lee xit ub kuu kub ndoblo yo leen gom yid kub tsa neeka thibe luxt.

*Jesús mtegwe thib ngot ne mteroban rt-saap Jairo
(Mr. 5:21-43; Lc. 8:40-56)*

¹⁸ Leettsa bee ngenika Jesús lee thib mbyi mzin lo Jesús, mbyi'a nak thib zha kuu nabee ta nkaltaa re zha Israel nteed xkiiz Diox, ne mtobxub zha lo Jesús ne nzhab zha:

—Ngulota nguth rtsaap'n; per os lee'a yaada ne xooba yaa'a yek nzaa teroban nzaa.

¹⁹ Tsa lee Jesús kon re zha kuu ngeteed lo Jesús mnndeli ne mndeke dits mbyi'a. ²⁰ Ne ora lee thib ngot kuu nda'a tsuibchop liin

nlath ren leettsoo, mbig dits Jesús ne mdi-inn ngot xab Jesús.²¹ Tak mtsow ngot xgab: "Os anta diinn na xab Jesús tegwen".²² Per lee Jesús mre ne mwii lo ngot, ne nzhab:

—Rtsaap'n. Wen bloo leettsoo'a, tak ng-walaaza lee Diox tak tegwe'a, kona mgwe'a.

Ne leeka ora lee ngot mgwe.

²³ Ne leettsa mzin Jesús kon chop tson zha kuu ngeteed lo Jesús liz zha kuu nabee'a, tsa mwii Jesús lee re musk nzi ngeyol, ne lee re men nzi nhonn ne mbetsyath tak nguth nzaa.²⁴ Tsa nzhab Jesús lo re zha:

—Broo goo nzhee, tak nguth nzaa, beeta nazat nzaa.

Tsa lee re men mzhizno Jesús, tak tata nzhab Jesús.²⁵ Per or ngwalo mroo re men leen yuu, tsa mndaab Jesús ne mzhen Jesús yaa nzaa, ne lee nzaa mroban ne mndeli.²⁶ Ne reta men yezlyu'a mbin kuu mtsow Jesús.

Jesús mtegwe chop zha syeg

²⁷ Leettsa mroo Jesús tyo, lee chop zha syeg mndeke dits Jesús, dib gan zha mrez zha ne nzhab zha lo Jesús:

—jLu kuu nak thib zha raz rey David, blat leettsoo'a ne' a nee!

²⁸ Per or mndaab Jesús leen yuu, lee rop syeg mbig gax lo Jesús, tsa mnaabdiz Jesús lo rop zha:

—¿Chu nyelaaz goo tak tegwen goo?

—Zha Nabee, tak tsow luy — mkab rop zha.

²⁹ Tsa lee Jesús mdiinn ngutlo zha, ne nzhab lo rop zha:

—Tak ngwalaaz goo tak tegwen goo, kona mgwe goo.

³⁰ Ne oraaka mzaal lo rop zha, tsa nzhab Jesús lo rop zha:

—Yent cho lo gab gooy.

³¹ Per or mroo rop zha, mndelo zha mnda zha kwent kuu mtsow Jesús lo rop zha, lo reta men dita yezlyu'a.

Jesús mtegwe thib zha mud

³² Leeka or kuu mroo rop zha kuu ngok syeg, lee tedib net zha ndyaadno thib zha mud kuu nzo mbi fyer leettsoo lo Jesús, tsa tegwe Jesús zha.³³ Ne or mloo Jesús mbi fyer leettsoo mbyi'a, mndelo mbyi'a mndediz. Tsa mzegey leettsoo re men, ne nzhab re men:

—jNeeka mas ter wii'aa thib kuu tenzhee lazaa!

³⁴ Per lee re fariseo nzhab:

—Maxuuy kuu nabee lo reta mbi fyer, mndaab diiz lo zha par ngoo zha re mbi fyer.

Mlat leettsoo Jesús ne re men

³⁵ Tsa mriid Jesús re yez ne re ranch ne reta ta mloo Jesús lo re men, ne mndaab Jesús kwent Diiz Chul chaan ta nabee Diox ne mtegwe Jesús relota yiz ne relota yalne.

³⁶ Or mwii Jesús lo re men mlat leettsoo Jesús ne Jesús re men, tak kwathoz nalatt nzhab re men, taxal mbak zhiil kuu napt bzhaan.³⁷ Tsa nzhab Jesús lo re zha kuu ngeteed lo Jesús:

—Wlipaa na nin lo goo, kwathoz naroob rtsin Zha Nabee nzo, per lutta zha kuu ntsow rtsin zha nzo.³⁸ Kona bnaab goo lo Zha Nabee, tsa taal zha masraa zha ke tsiin thop yalgonn chaan Zha Nabee.

10

Jesús mli tsuibchop zha lo re zha kuu ngeteed lo Jesús par gak zha apóstl
(Mr. 3:13-19; Lc. 6:12-16)

¹ Tsa mrez Jesús re tsuibchop nee kuu ngeteed lo Jesús ne mndaa Jesús yalnabee lo nee, par koo nee re mbi fyer kuu nzo leettsoo re men, ne tegwe nee relota yiz ne relota yalne.

²⁻⁴ Tenzhee le re tsuibchop nee kuu mteed lo Jesús kuu noga le apóstl:

Simún (kuu noga le Pey),

Ndres (wets Pey),

Santiag,

Juan (wets Santiag, rop zha ree nak xgann Zebedeo),

Lip,

Bartolomé,

Mach,

Mateo (kuu nak na, kuu mthop temi kuu nzhab lo zha Roma),

Santiag (xgann Alfeo),

Lebeo (kuu noga ni zha lo Tadeo),

Simún (kuu ngoo xid partid zha Canaán) ne Judas Iscariote (kuu mndaa Jesús lo re zha par mbeth zha Jesús).

Jesús mtaal re tsuibchop zha tsa ya zha loo zha lo re men

(Mr. 6:7-13; Lc. 9:1-6)

⁵ Tsa mtaal Jesús re tsuibchop nee ne tenzhee ne Jesús lo re nee:

—Yat goo laz re zha kuu nagt tawlazaa, neeka re yez chaan re zha Samaria.⁶ Gwa goo lo re tawlazaa zha Israel, zha kuu mndab xnet Diox, zha kuu nak taxal re mbak zhiil kuu mndab lo bzhaan.⁷ Gwa goo ne gab goo, lee wiz kuu nabee Diox mzin gaxa.⁸ Btegwe goo re mbyiz, teroban goo re zha nguth, btegwe goo re zha kuu ndeye kwerp, ne bloo goo mbi fyer leettsoo re men kuu nzo mbi fyer leettsoo. Por yalwen chaan Diox mkayaa goo yalnabee ree; kona ndoblot tsow goo kobral por tsow goo re koree.

⁹ Gwet goo temi.¹⁰ Neeka gwet goo bols kuu yo re chaan goo, neeka tedib net lar kuu gok goo, neeka tedib net labyid kuu ke nii goo, neeka aga gwet goo, tak lee zha kuu nke tsiin ndoblo zha gax lo zha.

11 'Leettsa tsin goo thib yez o thib ranch, kwaan goo liz thib zha kuu ndoblo zha kwet goo liz zha, ne ty a kwet goo asta or kuu roo goo yeza. ¹² Or kuu tsin goo thib yuu bni goo "diox" lo zha ne guz goo lo zha, lee Diox tsow wen kwin goo liz goo ne bzenhen goo yaa re zha kuu nzo yuu'a. ¹³ Ne os lee re zha kuu nzo yuu'a, ndoblo zha lee Diox tsow wen kwin zha liz zha, tsa lee kuu gab goo lo zha, take lo zha; per os lee zha ndoblot zha tsow Diox wen kwin zha liz zha, gagte lo zha. ¹⁴ Ne os lee zha kayaat zha goo ne tyalt zha gon zha kuu gab goo, broo goo yuu'a o yeza ne btsib goo yuyaaz kuu mke nii goo. ¹⁵ Wlipaa na nin lo goo, leettsa naab Diox kwent lo re men, lee yalti kuu rid re zha yeza, gak masraa nati nake yalti kuu rid re men rop yez kuu ngoo ndala kuu le Sodoma ne Gomorra, rop yez kuu mluux Diox kon ki.

Yalti kuu rid goo kwent chaan da

¹⁶ 'Wii goo! Na taal goo yataa goo kwent chaan Diiz Chul, taxal mbak zhiil xid re mbeez kuu nayii, kona list gok goo taxal mbeel ne nadoo gok goo taxal palom. ¹⁷ Bkenap goo goo lo re men, tak teno zha goo lo re zha kuu nataak lo re Israel, ne kin zha goo ta nkaltaa re'aa nteedaa xkiiz Diox. ¹⁸ Neteno zha goo lo re zha kuu nak gobyern ne lo re rey kwent chaan da, tata tak taa goo kwent chaan da lo re zha gobyern ne lo re zha kuu nagt zha Israel. ¹⁹ Per leettsa taa zha goo lo re zha nak tsin, tsowt goo xgab naa kwan kab goo lo zha ne xomod gab gooy, tak ora lee Mbi Nayon taa diiz kuu kab goo lo zha, ²⁰ tak nagt goo kuu ni ora, sinke lee Mbi Nayon chaan Xutaa kuu nzo leettsoo goo ni ora.

²¹ 'Ne leeka wets zha kuu nyelaazt Diox, taa zha lo re zha nak tsin tsa kuth zha zha, ne tataka tsow xut zha kon xgann zha. Lee re zhiinn zha yii ne xut ne xnaa, ne taa zhiinn zha zha lo re zha kuu nlaz kuth zha. ²² Reta men yii ne goo tak nak goo zha da. Per lee zha kuu xek rid re koree asta bluz, zha'a tsow gan yalnaban kuu thitanax. ²³ Per leettsa reke zha dits goo thib yeza, bzhonh goo ne tyaa goo tedib yeza ne noga tya taa goo kwent chaan da. Tak wlipaa na nin, tsowt goo gan yataa goo kwent chaan da, reta yeza kuu nak chaan re'aa zha Israel, leettsa lee na Kuu Mzin Ngok Men bretab.

²⁴ 'Neeka thib zha kuu ngeteed nataagt zha masraa nake maestr zha, ne tataka neeka thib zha kuu nke tsin, nataagt zha masraa nake patron zha. ²⁵ Kona lee zha kuu ngeteed, ndoblo wen yo leettsoo zha, tsow re men lo zha taxal ntsow re men lo maestr zha, ne leeka tata lee mos, ndoblo wen yo leettsoo mos, tsow re men lo mos taxal ntsow re men lo patron mos. Ne os lo na kuu nak taxal mndan thib yuu ni zha lo

Beelzebú kuu nabee lo re mbi fyer. jKwanpaa gabt zha lo re goo kuu nak goo taxal zhiinn mndan yuu!

*Cho lo ndoblo tseb men
(Lc. 12:2-9)*

²⁶ Ne tsebt goo ne goo re men kuu ndreke dits goo, tak ndaa goo kwent xkiz'n. "Tak neeka thib kuu ntsow zha xlaanta gagt loote, ne tataka neeka thib kuu ntsow zha xgaatsta gagt loote". ²⁷ Kona loka kuu mnin lo goo xgaatsta, taxal re kuu ndediz xlaan zha ta nakow, tse guz gooy lo reta men; ne lee re kuu mnin lo thita goo, kendab goo yek yuu ne nex guz gooy lo reta men. ²⁸ Tsebt goo ne goo re zha kuu nzhuth kwerp, tak gagt kuth zha xbi goo. Btseb goo ne goo Diox, tak Diox tak kib yalnaban goo ne ko xbi goo ne kwerp goo kuu kub gabil.

²⁹ 'Wii goo, zchu nthot zha chop min bzhizh por thap rehal? Per leen ni lo goo, neeka thib min lat lo yezlyu ree os lee Xutaa Diox kuu ndob yibaa taat diize. ³⁰ Diox nlebee reta goo, asta re yitsek goo nak kwent lo Diox. ³¹ Kona tsebt goo ne goo re zha kuu mbez kuth goo, tak masraa nataak goo nake naroob min bzhizh.

³² 'Os lee thib zha gab zha lo re men lee zha nak zha da, noga na gap'n lo Xut'n kuu ndob yibaa lee zha nak zha da. ³³ Per lee zha kuu gabt lo re men lee zha nak zha da, noga na gap'n lo Xut'n kuu ndob yibaa lee zha nagt zha zha da.

*Myaadt Jesùs tsa wen kwin re men
(Lc. 12:51-53; 14:26-27; Mr. 9:41)*

³⁴ Tsowt goo xgab leen ndyal, tsa wen kwin re men lo yezlyu ree; sinke chak'n ndyal kona lee re zha kuu nyelaazt na kuth re zha kuu nyelaazt na. ³⁵ Tak por kuu nloon tsow yo re zha kuu nyelaazt na, kon re zha liz zha kuu nyelaazt na, lee re mbyi yo kon xut, ne tataka lee re nzaa yo kon xnaa, ne lee zhiinh zha yo kon xnaatsaap zha. ³⁶ Leeka re zha liz zha yii ne zha.

³⁷ 'Ne loka zha kuu mas nke leettsoo xut ne xnaa nake na, ndoblot zha'a gak zha zha da, ne loka zha kuu mas nke leettsoo xgann o rtsaap nake na, ndoblot zha'a gak zha zha da, ³⁸ ne loka zha kuu kot leettsoo thib gath, tak ndeke zha dits'n, ndoblot zha gak zha zha da. ³⁹ Zha kuu nzeb gath tak nyelaaz zha na lo yezlyu ree, tath zha ne tsowt zha gan yalnaban kuu thitanax, per lee zha kuu nzebt gath lo yezlyu ree, tak nyelaaz zha na, zha'a tsow gan yalnaban kuu thitanax.

⁴⁰ 'Zha kuu nkayaa goo noga na nkayaa zha. Ne lee zha kuu nkayaa na, noga nkayaa zha, zha kuu mtaal'n. ⁴¹ Loka zha kuu nkayaa thib profet, tak ne zha nak zha zha Diox, zha'a kayaa lo Diox leeka kuu kayaa profet lo Diox; ne loka zha kuu kayaa thib

zha kuu nali nak, tak ne zha nali nak zha, zha'a kayaa lo Diox leeka kuu kayaa zha kuu nali naka lo Diox. ⁴² Ne loka cho zha kuu taa thib kuu ndeche goo, tegal beeta thib bas nit kuu gu goo, tak nak goo zha da, wlipaa na nin, noga lo zha'a tataa Diox kuu tsow zha gan.

11

¹ Leettsa ngwalo mteni Jesús re tsuibchop zha kuu ngeteed lo Jesús, tsa mroo Jesús tyá ne nda Jesús nda loo Jesús ne mndaa Jesús kwent xkiiz Diox lo tedib net re zha kuu nzo re yez kuu nzi yezlyu'a.

*Re zha kuu mtaal Juan lo Jesús
(Lc. 7:18-35)*

² Ne lee Juan kuu mtsowleyy re men nzo tsib, ne leettsa mbin Juan re kuu ngetswon Jesús, tsa mtaal Juan chop tson zha kuu ngeteed lo Juan, ³ tsa yanaabdz zha lo Jesús, naa chu wli lee Jesús nak Crist Kuu Mtaal Diox Nabee o chu tebet zha tedib zha.

⁴ Jesús mkab ne nzhab:

—Tyee goo, ne guz goo lo Juan re kuu mwii goo ne re kuu mbin goo ntsow'n. ⁵ Guz goo lo Juan: “Lee ngutlo re zha syeg nyeni, lee re zha mthans ndiy, lee re zha kuu ndeye kwerp ngwe, lee re zha kuu nakwee mzaahal nza; lee re zha nguth ndroban; ne lee re zha kuu nyeen ndeche zha Diox nzhon zha Diiz Chul chaan Diox. ⁶ ¡Wen nzo leettsoo Diox ne Diox re zha kuu nzhagt chop xgab, tak nyelaaz zha na!”

⁷ Leettsa ndya re zha kuu mtaal Juan, lee Jesús mndelo mndaa kwent chaan Juan lo re men, ne nzhab Jesús:

—¿Kwan ngwatwii goo ngwa goo yubiz? ¿Chu lo thib nith kuu nkwin mbi ngwatwii goo? ⁸ Ne os leey nagte tata, ¿kwan ngwa goo ngwatwii goo tsa? ¿Chu lo thib zha kuu nok lar wen ngwa goo ngwatwii goo? Tak reta goo ne lee re zha kuu nzhok lar wen, nak re zha kuu nzo liz rey. ⁹ Per ne goo lon: ¿Cho lo ngwatwii goo tsa? Wlipaa na nin lo goo, lee goo ngwatwii lo thib profet. Ne Juan nak thib profet kuu mas nataak nake re profet kuu ngoo ndala. ¹⁰ Juan nak zha kuu nteth xkeets Diox ta nzhab:

Na taal thib mos da kuu tener lo'a.

Tsa to list zha leettsoo re men par kayaa zha lu. [Mal. 3:1]

¹¹ Wlipaa na nin lo goo, xid reta men kuu nzhal yent raa tedib zha kuu mas nataak nake Juan kuu mtsowleyy. Ne tegal tatay, lee zha kuu mas nataagt xith re zha kuu nabee Diox leettsoo, zha'a nak zha kuu mas nataak nake Juan.

¹² Desde leettsa mndaa Juan kwent xkiiz Diox ne asta nal, lee re zha kuu nabee Diox leettsoo ndriid yalti lo re zha kuu nakap nak, re zha kuu nlaaz nabee lo re zha kuu

nabee Diox leettsoo. ¹³ Reta profet ne ley kuu mkee Moisés mndaa kwent lee Crist yaad, ne asta leettsa myaad Juan, asta tyatha mndaa zha kwente. ¹⁴ Ne os lee goo nlaaz goo yelaaz goo koree, Juan nap xbi profet Li, ne Juan nak Lí kuu nzhab re profet yaad. ¹⁵ ¡Os lee goo ndob nza goo ndoblo yen goo koree!

¹⁶ *Ne nal nin lo goo naa xa nzhab re men tyemp ree. Lee re men nzhab taxal re ndyeen bzhizh, kuu nzi nke byith lo xbi, kuu mbezz lo altaa: ¹⁷ “Naley mbil nee flaut per mkanit goo ne mbilga nee nabil per mbinnt goo”. ¹⁸ Koree nin, tak leettsa mzin Juan kuu mtsowleyy re men, zha kuu nzhownt pan neeka nzhuit xit ub, tsa mbezz goo mbi fyer nzo leettsoo Juan. ¹⁹ Per lee nal ndyal na, Kuu Mzin Ngok Men, nzhown' ne nzhun, tsa mbezz goo leen nak thib zha kuu nzhoucha ne nzhuchucho xit ub, ne nak'n amig re zha kuu ntsow kobral temi chaan yezlyu kuu nzhax lo zha Roma, ne amig re zha kuu ntsow re kuu went. “Per lee zha kuu nap yalnzaak chaan Diox, por re kuu ntsow zha nabee lee zha nap yalnzaak”.

*Re yez kuu nzhont diiz
(Lc. 10:13-15)*

²⁰ Tsa lee re zha yez ta mtsow Jesús re kuu thoz mkox lo Jesús, tak lee re zha re yeza, mlaat zha mod went kuu nak zha, tsa nzhab Jesús:

²¹ —¡Aka nati rid re goo zha yez Corazín! ¡Aka nati rid re goo zha yez Betsaida! Os lo re men rop yez kuu nak Tiro ne Sidón gagak re kuu thoz kuu ngok lo re goo, chu nal galaa zha re kuu went kuu mtsow zha ne gayelaaz zha Diox, gagok zha lar kuu nambaat ne gatob zha lo di, tsa galoo zha kwathoz nalatt nzo leettsoo zha por re falt zha. ²² Kona nin, lee wiz kuu naab Diox kwent lo re men, lee yalti kuu rid re goo gak masraa nati nake yalti kuu rid re zha rop yez kuu nak Tiro ne Sidón. ²³ Ne lee re goo zha yez Capernaúm, ¿chu ntsow goo xgab lee Diox teno goo yibaa? Nagte tata, lee goo ya asta ta mas naats. Tak os lo re zha yez Sodoma gagak re kuu thoz kuu ngok lo re goo, bee nzika yezza asta nal. ²⁴ Per wlipaa na nin, lee wiz kuu naab Diox kwent lo re men, lee yalti kuu rid re goo gak masraa nati nake yalti kuu rid re zha yez Sodoma.

*De goo lon tsa roxkwan goo
(Lc. 10:21-22)*

²⁵ Ne lee tsya nzhab Jesús:

—Nzhool' in lo'a Xut'n, Zha Nabee yibaa ne yezlyu, tak mkaatsa re koree lo re zha nzaak ne lo re zha kuu nyen re kwaas, ne mloo luy lo re zha kuu nlaaz teed. ²⁶ Xut'n, tabaa mtsow luy tak tabaa nlaaza.

²⁷ Tsa nzhab Jesús lo re men:

—Reta kwaa mndaa Xut'n lon. Ne yent cho ne cho nak'n, sinke beeta Xut'n ne cho nak'n. Ne yent cho ne cho nak Xut'n, sinke beeta na ne cho nak Xut'n, ne beeta lo re zha kuu nlaz'n gap'n naa cho nak Xut'n.²⁸ De re goo lon, reta goo kuu ngwatsay ne nee kuu ne, na tsow roxkwon goo.²⁹ Bkayaa goo yug kuu tan lo goo, ne bteed goo lon, tak nadoo ne wen nak'n. Ne tata tak neyy goo.³⁰ Tak lee yug ne kuu tan gwe goo naxax nake.

12

Re zha kuu ngeteed lo Jesús mthop ton nzob xtil wiz sabd

(Mr. 2:23-28; Lc. 6:1-5)

¹ Ne re wiza thib wiz sabd, nda Jesús kon re zha kuu ngeteed lo Jesús, mriid re zha thib ta ndab xtil. Tsa lee re zha kuu ngeteed lo Jesús mlann, ne mndelo re zha mthop zha ton nzobxtil, mtembi zhay ne ndow zhay.
² Ne lee re fariseo mwii kona, tsa nzhab zha lo Jesús:

—Wii lee re zha kuu ngeteed lo'a, nget-sow thib kuu ndoblotaa tsowaa wiz kuu ndrookwanaa.

³ Tsa lee Jesús mkab ne nzhab:

—¿Chu ter lab goo xkeets Diox naa kwan mtsow rey David, leettsa mlann David kon re zha kuu nda kon David?⁴ Mndaab David leen gwodoo chaan Diox, ne ndow David re pan nayon kuu ndoblot David wu David, ne noga mndaa Davide ndow re zha kuu nda kon David, pan kuu beeta re ngwleyy ndoblo wu.⁵ Ne, ¿chu ter lab goo ley chaan Moisés ta nzhab, lee re ngwleyy mbint ngwleyy diiz kuu nabee ley, tak mke ngwleyy tsiiin leen gwodoo chaan Diox wiz sabd, ne mndaa ngwleyy falt?⁶ Per lee na ni lo goo, nzhee ndo thib zha kuu mas nataak nake gwodoo chaan Diox.⁷ Nyent goo kuu nzhab lo xkeets Diox ta nzhab: “Kuu nlaz'n nak, lat leettsou goo ne goo taben goo, ne nlazt'n kuth goo beeta maa par taa goo gon lon”. [Os. 6:6] Ne os gayen gooy, gakekit goo zha kuu ntsow kuu wen.⁸ Ngenin re koree lo goo, tak na nak xgann mbyi, Kuu Mzin Ngok Men, ne nap'yn yalnabee nabbeen lo wiz sabd.

Jesús mtegwe thib mbyi kuu mbiz yaa

(Mr. 3:1-6; Lc. 6:6-11)

⁹ Tsa mroo Jesús ty, ne ngwa Jesús ta nkaltaa re zha Israel nteed xkiiz Diox.¹⁰ Ne ty, ndo thib mbyi kuu mbiz yaa. Ne kom nkwaan re zha mod keki zha Jesús, tsa nzhab zha lo Jesús:

—¿Chu ndoblo tegwe men thib zha wiz kuu ndrookwanaa?

¹¹ Ne lee Jesús nzhab:

—Os lee thib goo nap thib mbak zhiil ne la maa leen pos wiz sabd, ¿chu koot goo maa?

¹² Per lee na ni lo goo mas nataak thib men

nake thib mbak zhiil. Kona wen tsow men kuu wen lo thib men wiz sabd.

¹³ Tsa nzhab Jesús lo mbyi kuu mbiz yaa:

—Bteli yaa'a.

Tsa mteli mbyi yaa mbyi, ne mgwe yaa mbyi taxal tedibe.¹⁴ Tsa oraaka mroo re fariseo ne myaan re zha diiz kuth zha Jesús, tak myet roo zha lo Jesús.

Jesús mtegwe naroob men

¹⁵ Per lee Jesús myeen naa kwan mtsow re zha xgab tsow zha. Tsa mroo Jesús ty a ne naroob men mndeke dits Jesús, ne mtegwe Jesús reta mbyiz kuu nzo xid re mena.¹⁶ Ne nzhab Jesús lo re zha'a, tsa yent cho lo gab zha naa cho nak Jesús.¹⁷ Koree ngok, tsa mrolo kuu nzhab profet Isaí, leettsa nzhab profet kuu nzhab Diox kwent chaan Crist:¹⁸ Zha ree nak mos da, kuu mlin, kwathoz nke leettsou zha, ne kwathoz wen nzo leettsou nen zha.

Taal'n Mbi Nayon chaan da lo zha, ne taa zha kwent re kuu nali ne kuu wen lo re zha kuu nagt zha Israel.

¹⁹ Neeka kab root zha, neeka kwez gutht zha,

ne yent cho gon kuu ni zha re net.

²⁰ Ne neeka gat zha nith kuu ngots, ne neeka tuyyt zha doo zer kuu penta mke, asta yelo tsow zha, tsow kuu wen gan lo kuu went.

²¹ Ne reta zha kuu nagt zha Israel ngebet yelaaz zha, zha kuu telaa zha. [Is. 42:1-4]

Nkeki zha Jesús lee Jesús nap yalnabee chaan Maxuuy

(Mr. 3:20-30; Lc. 11:14-23; 12:10)

²² Tsa ngwano zha thib mbyi kuu nzo mbi fyer leettsou lo Jesús, syeg zha ne mud zha. Ne mtegwe Jesús zha, tsa mwii zha ne mndediz zha.²³ Reta men mzegey leettsou, ne nzhab:

—¿Chu nagt zha ree, zha raz chaan rey David?

²⁴ Per leettsa mbin re fariseo kona, tsa nzhab re zha:

—Beelzebú kuu nak Maxuuy kuu nabee lo re mbi fyer, mndaa yalnabee lo zha, tsa nabee zha lo re mbi fyer.

²⁵ Per lee Jesús ne'a naa kwan ntsow re zha xgab, tsa nzhab Jesús:

—Reta yez naro ne re yez bzhizh, ne asta thib yuu kuu nzhab rol zha, gaxta ndo luzhe.²⁶ Ne tataka, os leeka Maxuuy koo Maxuuy, tsa leeka Maxuuy yo kon leeka Maxuuy, xegt yalnabee chaan Maxuuy naroob, os tatay.²⁷ Re goo ni lee na ngo mbi fyer kon yalnabee chaan Beelzebú, os leey tata nake, noga re zha kuu ngeteed lo goo ngoo mbi fyer kon yalnabee chaan Beelzebú. Kona leeka re zha'a nloo ngobeet goo kuu ni goo.²⁸ Per os leen ngor mbi fyer

por yalnabee chaan Mbi Nayon chaan Diox, koree nloo lee wiz kuu nabee Diox lo goo mzin gaxa.

²⁹ 'Gagt tab thib zha liz tedib zha kuu kwathoz ney par kib zha chaan zha'a, os ter lib zha zha. Tak os lee zha tsowt zhay gagt kib zha chaan zha'a. ³⁰ Re zha kuu nyelaazt lee na ngo mbi fyer kon yalnabee chaan Mbi Nayon, nzot zha'a fabor da ne zha'a nayii nen; ne re zha kuu nket tsin kon na re zha'a nluux rtsin na.

³¹ 'Tak nyelaazt goo lee Mbi Nayon chaan Diox ntsow ngon re mbi fyer, kona nin lo goo tetuyy Diox fala falt kuu ntsow men, leettsa ngode men re zha, per tuyyt Diox falt kuu ngode men lo Mbi Nayon. ³² Ne tetuyy Diox re fala kuu ngode men na, Kuu Mzin Ngok Men, per lee men kuu ngode lo Mbi Nayon, tuyyt Diox fala zha'a, neeka lo yezlyu ree ne neeka lo tedib yezlyu kuu yo.

Lee ya nabee ya por xle kuu ndaa ya

(Lc. 6:43-45)

³³ 'Ne ndoblo ne goo, lee ya wen ndaa xle wen, ne lee ya went ndaa xle went, tak reta ya nabee ya por xle kuu ndaa ya. ³⁴ ;Goo nak zha raz mbeel! Went nak goo, kona gagt ni goo kuu wen; tak kuu nzo leettsoo men ndroo roo men. ³⁵ Tak lee zha wen kuu wen ni zha, tak kuu wen nzo leettsoo zha, per lee zha kuu went kuu went ni zha, tak kuu went nzo leettsoo zha. ³⁶ Kona nin lo goo, leettsa tsin wiz kuu naab Diox kwent lo reta men, asta re diiz kuu lega'a ni goo, taa goo kwent lo Diox ora. ³⁷ Tak por re diiz kuu ni goo naab Diox kwent lo goo, tsa ne Diox naa chu ndab goo falt o ndabt gooy.

Lee re men mnaab thib seny thoz lo Jesús
(Mr. 8:12; Lc. 11:29-32)

³⁸ Tsa lee chop tson fariseo ne chop tson maestr kuu nloo xkiiz Diox, nzhab lo Jesús:

—Nlaaz nee wii nee tsowa thib seny thoz kuu gagt tsow re men yezlyu ree.

³⁹ Jesús mkab ne nzhab:

—Lee re men tyemp ree kuu thitanax went nak ne mlaa Diox, nlaaz zha thib seny thoz, per neeka thib seny loot lo re zha, beeta seny chaan profet Jonás zha ndala loo lo re zha. ⁴⁰ Tak leeka taxal ngoo Jonás leettsoo thib mbel, kuu kwathoz naro, tson wiz ne tson yaal, tataka lee na Kuu Mzin Ngok Men, yoon tson wiz ne tson yaalleen yezlyu. ⁴¹ Leettsa naab Diox kwent lo re men wiz bluz, tsya teti Diox re goo, tak mlaat goo re kuu went kuu ntsow goo, ne telaa Diox re zha kuu ngoo yez Nínive, tak mbin re zha'a diiz xkiiz Jonás ne mlaa zha re kuu went kuu mtsow zha. Ne ndoblo ne goo, nzhee ndon ne na nak thib zha kuu mas nataak nake Jonás. ⁴² Ne lee wiz kuu naab Diox kwent lo re men, tsya teti Diox re goo, tak mlaat goo re kuu went kuu ntsow goo,

ne telaa Diox ngot kuu mnabee re yez kuu nzi lad Sur, tak kwathoz tit mroo zha ne ngwa zha lo Salomón, tak nlaaz zha gon zha yalnzaak chaan Salomón. Ne nogaa ndoblo ne goo nzhee ndon ne na nak thib zha kuu masraa nataak nake Salomón.

Mbi fyer kuu ndretab

(Lc. 11:24-26)

⁴³ 'Leettsa lee thib mbi fyer ndroo leettsoo thib zha, tsa nda mbi ndiy mbi thib ta yubiz, nkwaan mbi thib ta roxkwani mbi, ne mzalt ta roxkwani mbi, tsa ntsow mbi xgab: ⁴⁴ "Bretab'n leeka ta mroon". Ne leettsa mzin mbi ta mroon mbi, ne mzal mbi mbyi'a, taxal thib yuu kuu nalath kuu wen nalob ne nambi na. ⁴⁵ Tsa nda mbi'a ndaxii tedib gaz mbi kuu masraa went nake mbi'a, ne ndretab mbi ta ngoo mbi ner. Tsa lee zha'a masraa nakap nzhak nake taxal ngok zha ner. Leeka tata gak kon re zha tyemp ree, zha kuu kwathoz nakap nak.

Xnaa Jesús ne re wets Jesús

(Mr. 3:31-35; Lc. 8:19-21)

⁴⁶ Leettsa bee ngenika Jesús lo re men, lee xnaa Jesús ne re wets Jesús mzin tyu, tak nlaaz re zha tediz zha kon Jesús. Ne mlet re zha lee. ⁴⁷ Tsa lee thib zha nzhab lo Jesús:

—Lee xnaa'a kon re wetsa nzi lee, ne nlaaz zha tediz zha lo'a.

⁴⁸ Per lee Jesús nzhab lo zha'a:

—¿Cho nak xnaan ne re wets'n?

⁴⁹ Tsa mwii Jesús lo re zha kuu ngeteed lo Jesús, ne nzhab Jesús:

—Re zha ree nak taxal xnaan ne re wets'n ne re btan na. ⁵⁰ Tak re zha kuu ntsow kuu nlaaz Xut'n kuu ndob yibaa, zha'a nak taxal wets'n btan na ne xnaan.

13

Kwent nanzee chaan zha kuu nzhann

(Mr. 4:1-9; Lc. 8:4-8)

¹ Thib wiz mroo Jesús leen yuu ta mbet Jesús kon re zha kuu ngeteed lo Jesús, ne ngwa Jesús mndob Jesús roo nitdoo Galilea. ² Ne kwathoz men mkaltaa lo Jesús, tsa mke Jesús leen thib kano ne mndob Jesús leen kano lo nitdoo. Ne lee re men mrin roo nitdoo. ³ Tsa mloo Jesús kwaro kwa lo re men por kwent nanzee.

Ne nzhab Jesús:

—Nal tan thib kwent lo goo, lee thib zha kuu nzhann mroo ndalo bin lo yu. ⁴ Ne leettsa ngego zha bin lo yu, thib nete mla roo net, ne myaad re min ndowe. ⁵ Tedib nete mla xid ke, ta yent naroob yu; ne kwathoz lijer mlene, tak lut yu nzo ta may. ⁶ Ne leettsa mla be mgole, tak yent naroob yu lozhe kona mbize. ⁷ Tedib nete mla xid yits, ne mzhien re yits tsa mluux yitse ne mndaate xle. ⁸ Per lee tedib nete mla lo yu naal, kwathoz wen mzhene ne kwathoz

ngoke. Thib bin mndaa gayoo nzob, lee tedib nete mndaa tson gale ne lee tedib nete mndaa galbtsiiy. ⁹ jōs lee goo ndob nza goo ndoblo yen goo koree!

*Chebee mloo Jesús por kwent nanzee
(Mr. 4:10-12; Lc. 8:9-10)*

¹⁰Tsa lee re zha kuu ngeteed lo Jesús mbig lo Jesús, ne nzhab zha:
—¿Chebee pur kon kwent nanzee ni'a lo re men?

¹¹Jesús mkab ne nzhab:

—Diox mndaa yalnzhaak lo goo, tsa yen goo re kuu nagaats chaan ta nabee Diox; per lo tedib net zha mndaat Diox diiz yen zhay. ¹²Tak lee zha kuu nyen kuu wli chaan Diox, Diox tsow tsa yen zhay masraa; per lee re zha kuu nyente, asta lut kuu nyen zha teyiibe lo zha. ¹³Kona pur kon diiz nanzee nin lo re zha, tsa tegal wii zhay yent zha kuu ngwii zha, ne tegal gon zhay yent zhay. ¹⁴Lo re zha'a mrolo kuu nzhab profet Isaí zha ndala, leettsa nzhab profet lo re zha ndala: Tegal gon gooy ne yent gooy, tegal wii gooy ne yent goo kuu ngwii goo.

¹⁵Tak mkow yek re zha yez ree, taxal re zha kuu now nza nak zha,
ne taxal re zha kuu now ngutlo nak zha,
tsa gagt wii zhay ne gagt gon zhay
ne tsa gagt yen zhay kuu nzhon zha.
Koree ntsow tsa bretabt zha lon, tsa tegwen zha. [Is. 6:9-10]

¹⁶Per wen nda re goo zha kuu nyen kuu ngwii ne nyen kuu nzhon. ¹⁷Tak wlipaa na nin lo goo, tyen re profet kuu ngoo ndala, ne re zha kuu nali mndo lo Diox, ngwalaaz zha gawii zha re kuu ngewii goo nal, per mwiih zhay; noga ngwalaaz zha gagon zha re kuuneyon goo, per mbint zhay.

*Jesús mndaa kwent xomod nak kwent nanzee chaan zha kuu nzhan
(Mr. 4:13-20; Lc. 8:11-15)*

¹⁸Kenza goo tsa yen goo naa xomod nak kwent nanzee chaan zha kuu ndalo bin lo yu. ¹⁹Lee re zha kuu nzhon re diiz, kuu ndaa kwent naa xomod nlaaz Diox nabee Diox leettsoo re men, ne nyent zhay, zha'a nak taxal bin kuu mla roo net. Nyaad Maxuuy nkib xkiiz Diox leettsoo zha. ²⁰Ne lee bin kuu mla xid ka te yent naroob yu, bina nak taxal re zha kuu nzhon xkiiz Diox, ne kwathoz laz zha nkayaa zhay. ²¹Per lee zha'a nak taxal bin kuu nzot lozh naats, kona neyt ndo zha lo xkiiz Diox. Ne leettsa nzin thib yaiti lo zha o ndreke men dits zha, tak nyelaaz zha Diox, tsa nlaa zha Diox. ²²Lee bin kuu mla xid yits, bina nak taxal re zha kuu nzhon xkiiz Diox, per kwathoz ntsow zha xgab re kuu yezlyu ree, ne ndablaaz zha keno zha naroob temi. Re kona ntsow nyaant xkiiz Diox leettsoo zha, ne ndaate diiz taa zha xle. ²³Per lee bin kuu

mla lo yu naal, bina nak zha kuu nzhon xkiiz Diox ne nyen zhay. Zha'a nak taxal bin kuu ndaa kwathoz xle. Taxal bin kuu mndaa gayoo nzob, lee tedib net zha nak taxal bin kuu mndaa tsongal nzob, ne lee tedib net zha nak taxal bin kuu mndaa galbtsii nzob.

Kwent nanzee chaan nzob xtil ne yizh goob

²⁴Jesús mndaa tedib kwent nanzee lo re zha, ne nzhab Jesús:

—Lee nal tan tedib kwent nanzee lo goo. Tsa ne goo xomod nak leettsa nabee Diox leettsoo re men. Leey nak taxal thib zha kuu nzhan nzob xtil wen lo yu. ²⁵Per leettsa mdat reta zha, tsa lee thib zha kuu nayii ne zha, mndaab ne mloo yizh goob xid nzob xtil zha. Ne leettsa ngwalo mloo zhay, tsa ndya zha. ²⁶Ne leettsa lee nzob xtil mlen, mzhene ne mla tone, no yizh goob ndab xid nzob xtil. ²⁷Tsa lee re zha kuu nke tsin lo zha kuu nak chaan yu, nzhab lo zha: “Zha Nabee, jat nzob xtil wen mlo'aa lo yu! ¿Xomod mlen yizh goob xide?” ²⁸Tsa lee zha kuu nak chaan nzob xtil nzhab: “Thib zha kuu nayii nen mtsow kona”. Tsa lee re zha kuu nke tsin lo zha mnaabdz ne nzhab: “¿Chu nlaaza ya nee ne kib nee yizh goob?” ²⁹Per lee zha nzhab: “Aha, kibt gooy. Tak os lee goo kib goo yizh goob, cha noga nzob xtil kib goo. ³⁰Mas wen blaa goo thibka zhenet, asta leettsa dop yalgonn. Leettsa taal'n re zha kuu thop yalgonn, tsa ner re yizh goob thop zha ne liib zhay par yeeke thitanax. Ne lee nzob xtil thop zha ne kotsow zha leen loota nzotsow xoob'n.”

*Kwent nanzee chaan mbiz mostaz
(Mr. 4:30-34; Lc. 13:18-21)*

³¹Jesús mndaa tedib kwent nanzee lo re zha, ne nzhab Jesús:

—Leettsa lee Diox nabee leettsoo re men, leey nak taxal thib mbiz mostaz kuu mloo thib mbyi lo yu. ³²Leey nak thib mbiz kuu mas lut lo reta mbiz, per leettsa nlene masraa nzhene nake re ya kuu nzhan zha leen wert. Ne nzhake thib ya naro ne lee re min ndyaad ndexkwaa lyaat lo re zhite.

³³Noga nzhab Jesús:

—Leettsa lee Diox nabee leettsoo thib men, leey nak taxal lebadur kuu mloo thib ngot xid tson medid arin tsa yezhoobe.

³⁴Reta koree nzhab Jesús lo re men kon diiz nanzee, ne os leey nagte kon diiz nanzee nit zhay lo re men. ³⁵Koree ngok, tsa mrolo kuu nzhab profet kuu ngoo ndala, leettsa nzhab profet:

Kon diiz nanzee nin re kuu nagaats chaan Diox,
kuu nzogaats desde leettsa mdexkwaa yezlyu. [Sal. 78:2]

Jesús nzhab xomod nak kwent nanzee chaan nzob xtil ne yizh goob

³⁶ Leettsa ngwalo mchaats Jesús re men, tsa mndaab Jesús leen yuu, ne lee re zha kuu ngeteed lo Jesús mbig ne nzhab lo Jesús:

—¿Xomod nak kwent nanzee chaan nzob xtil kon yizh goob?

³⁷ Jesús mkaab ne nzhab:

—Lee zha kuu nzhan nzob xtil wen, nak na Kuu Mzin Ngok Men. ³⁸ Ne lee yezlyu nak taxal yu, ne lee re zhiinn Diox kuu nabee Diox leettsoo, nak taxal nzob xtil, ne lee re zha kuu nzhon diiz lo Maxuuy, zha'a nak taxal yizh goob. ³⁹ Lee zha kuu nayii nen mloo yizh goob, zha'a nak Maxuuy. Wiz bluz leettsa naab'n kwent lo reta men, leey nak taxal wiz kuu thop zha yalgonn, ne lee re mandad chaan Diox, nak taxal re zha kuu thop yalgonn. ⁴⁰ Leeka taxal nthop re mos yizh goob ne nteyy zhay lo ki, leeka tata gak wiz bluz leettsa naab'n kwent lo re men. ⁴¹ Lee na Kuu Mzin Ngok Men, taal'n re mandad da thop re zha kuu ntsow, ntsow re zha da kuu went, ne reta zha kuu ntsow kuu went. ⁴² Ne ko re mandad da zha gabil. Tya gonn zha ne tub zha keley. ⁴³ Tsa lee re zha kuu nali nak lo Diox la xni zha ta nabee Xut'n, taxal nla xni wiz la xni zha. ¡Os lee goo ndob nza goo ndoblo yen goo koreei!

Kwent nanzee chaan or chaan perla ne chaan yex

⁴⁴ 'Leettsa nabee Diox leettsoo men, leey nak taxal kwathoz or kuu nzogaats lo thib lo yu. Ne lee thib zha mzaal ora, tsa mkaatska zhay tya. Ne kwathoz laz zha ndya zha ne mtho zha reta kuu nap zha, ne mzhi zha yu'a, par gak ora chaan zha.

⁴⁵ 'Leettsa nabee Diox leettsoo re men, leey nak taxal thib zha kuu ndiy nkwaan tyen ke kuu le perla kuu kwathoz nap. ⁴⁶ Ne leettsa nyetsal zha thib kuu kwathoz chul na, tsa ndya zha ne mtho zha reta kwaa nap zha, ne mzhi zha ke'a.

⁴⁷ 'Leeka tata, leettsa nabee Diox lo re men, leey nak taxal yex kuu ngobi zha leen nitdoo, tsa niit zha relota mbel. ⁴⁸ Leettsa ngwalo mze yex zha, tsa ngoo zhay asta roo nitdoo, ne ndob re zha roo nitdoo mbi zha re mbel. Ne ngo zha re mbel wen leen chekwit ne lee re mbel kuu nzhowt men ngobi zha. ⁴⁹ Leeka tata kozhaa re mandad chaan Diox re zha went xid re zha kuu nali nak. ⁵⁰ Tsa ko zha re zha went leen orn ki, tya gonn zha ne tub zha keley zha.

⁵¹ Tsa mnaabdiz Jesús lo re zha, ne nzhab Jesús:

—¿Chu myen goo re kwent nanzee ree?

Lee re zha mkab ne nzhab:

—Myen neey.

⁵² Tsa nzhab Jesús kwent nanzee ree lo re zha ne nzhab Jesús:

—Leettsa lee thib maestr, kuu nloo xkiiz Diox, wlipaap nyen xomod nak leettsa nabee Diox leettsoo men, nzhab zha taxal thib mndan yuu, kuu nzaak ngoo re kuu kub ne re kuu gox xid re kuu nap zha.

Jesús mzin yez Nazaret

(Mr. 6:1-6; Lc. 4:16-30)

⁵³ Or ngwalo mni Jesús re kwent nanzee ree, tsa mroo Jesús kon re zha kuu ngeteed lo Jesús tya, ⁵⁴ ne mzin re zha laz Jesús. Ne wiz sabd mndelo Jesús mloo lo re men ta nkaltaa re zha Israel nteed xkiiz Diox. Tsa mzegey leettsoo re men mbin kuu mloo Jesús, ne mbez zha lo re altaa zha:

—¿Xomod mteed zha ree yalnzaak ree?

{Chebee nzaak ntsow zha re milagr thoz?

⁵⁵ ¡Lee zha ree nak thib zha tbaata, ne nak zha xgann Che kuu nak karpinter ne xnaa zha nak Mari, ne re wets zha nak: Santiago, Che, Simún ne Judas! ⁵⁶ Ne leeka lo'aa nzhee nzi re btan zha. ¿Xomod mteed zha re kuu nzaak zha?

⁵⁷ Kona ngwalaazt re men Jesús.

Per lee Jesús nzhab:

—Neeka thib profet nkayaat re tawiaz zha zha wen ne neeka re zha liz zha.

⁵⁸ Kona mtsowt Jesús tyen re kuu thoz tya, tak ngwalaazt re men Jesús.

14

Yalguth chaan Juan

(Mr. 6:14-29; Lc. 9:7-9)

¹ Re wiza lee Herodes kuu mnabee dita yezlyu Galilea, mbin re kuu mtsow Jesús.

² Tsa nzhab rey Herodes lo re zha kuu nke tsii lo rey:

—Juan kuu mtsowleyy re men nak zha'a; mroban zha xid re zha nguth; kona nap zha yalnabee ntsow zha re kuu thoz.

³ Tata nzhab Herodes, tak lee Herodes mnabee mzhien zha Juan ne mloo zha Juan tsib, kwent chaan Herodías tsaal Lip kuu nak wets Herodes. ⁴ Tak lee Juan nzhab lo rey Herodes:

—Went keno'a tsaal wetsa.

⁵ Ne ngwalaaz Herodes aguth Juan, per nzeb rey ne re men yez, tak reta men nye-laaz lee Juan nak profet.

⁶ Ne leettsa mzaal rey liin, tsa mtsow rey thib ani, ne lee rtsaap Herodías mkani lo re zha kuu nzi tya, ne kwathoz myow leettsoo rey xa mkani nzaa, ⁷ tsa mtselo rey kruz lo nzaa ne nzhab rey:

—Naab loka kuu nlaaza lon, na taay.

⁸ Tsa mnaabdiz nzaa lo xnaa nzaa, tsa naa kwan ndoblo naab nzaa, tsaraa nzhab nzaa lo rey:

—Taa yek Juan kuu ntsowleyy lon, leen thib yann.

⁹ Tsa kwathoz nabil ngoo leettsoo rey; per tak kwathoz men nzi or mtselo rey kruz, ne

reta zha'a mbin kuu nzhab rey, kona nzhab rey lo thib soldad, tsa taa zha yek Juan lo nzaa. ¹⁰ Tsa mtaal rey soldad mchuug yek Juan leen tsib. ¹¹ Ne mbe soldad yek Juan leen thib yann, ne mndaa soldade lo nzaa, ne lee nzaa mndaay lo xnaa nzaa. ¹² Tsa mzin re zha kuu ngeteed lo Juan, ne mbe zha kwerp Juan mkaats zha. Bluz tsaraa nzhab zhay lo Jesús.

*Jesús mndaay kuu ndow gaay mil men
(Mr. 6:30-44; Lc. 9:10-17; Jn. 6:1-14)*

¹³ Leettsa mbin Jesús lee Juan nguth, tsa ngoo Jesús leen thib kano ne mroo Jesús ty, nda Jesús thib ta yubiz. Ne mbin re men lee Jesús nda, tsa mroo re men yez ne nda nii re men, mnndeke re men dits Jesús. ¹⁴ Ne leettsa mla Jesús leen kano, mwii Jesús kwathoz men ndeke dits Jesús. Tsa mlat leettsoo Jesús mne re men, ne mtegwe Jesús re mbyiz kuu ndyaadno re men. ¹⁵ Ne leettsa mzi'a yezlyu, tsa lee re zha kuu ngeteed lo Jesús mzin lo Jesús, mbig zha ne nzhab zha lo Jesús:

—Mzi'a yezlyu, ne yent men gax nzhee. Bchaats re men tsa ya zha re ranch kuu nzi gaxta nzhee, tsa tii zha lut kuu wu zha.

¹⁶ Tsa mkaah Jesús lo re zha:

—Ndoblot bi re zha. Taa goo kuu wu zha.

¹⁷ Per lee re zha nzhab lo Jesús:

—Napt nee kuu taa nee wu re zha, beeta gaay pán ne chopka mbel nap nee.

¹⁸ Tsa nzhab Jesús lo re zha:

—Deno gooy nzhee.

¹⁹ Tsa mnabee Jesús tob re men lo yizhwan. Ne mzhén Jesús re gaay pan ne rop mbel, tsa mwii Jesús lobee ne mndaa Jesús texkix lo Diox, ne mtsow rol Jesús re pan ne rop mbel ne mndaa Jesús lo re zha kuu ngeteed lo Jesús, tsa kiid zhay lo re men. ²⁰ Reta men ndow asta plotha mze leettsoo re men. Ne tsuibchop chekwit pan byu myaan or ngwalo ndow reta men. ²¹ Ne thib gaay mil mbyi nak kuu ndow, ne mtsowt zha kwent re ngot ne re ndyeen bzhizh.

*Jesús mnde lo nitdoo
(Mr. 6:45-52; Jn. 6:16-21)*

²² Bluz leettsa ngwalo mriiid koree, tsa mtaal Jesús re zha kuu ngeteed lo Jesús, tsa kendab zha leen kano, par rid zha tedib lad nitdoo. Per lee Jesús myaanka chaats re men. ²³ Or ngwalo mchaats Jesús re men, tsa mkendab thita Jesús yek yii par tediz Jesús lo Diox. Ne or mkow yezlyu thita Jesús ndo ty. ²⁴ Ne lee kano kuu nzo re zha kuu ngeteed lo Jesús nda'a tith lo nitdoo. Ne lee nitdoo kwathoz nkwin kano, tak par ta nda re zha ndyaad mbi. ²⁵ Tsa lee Jesús zhaaraa ndyaad lo nitdoo mbig lo re zha. ²⁶ Per or mwii re zha lee Jesús ndyaad lo nitdoo, tsa dib gan mrez re zha, tak kwathoz mzeb re zha, ne nzhab zha:

—iKuu fyera!

²⁷ Per lee Jesús nzhab lo re zha:

—Tsebt goo, bloney goo leettsoo goo nay.

²⁸ Tsa lee Pey nzhab lo Jesús:

—Zha Nabee, os luy, btsow tsa no na te lo nitdoo, tsa tsin na ta ndo'a.

²⁹ Tsa nzhab Jesús lo Pey:

—De nzhee.

Tsa lee Pey mla leen kano ne mnde lo nitdoo nda lo Jesús. ³⁰ Per or myeen Pey kwathoz nax mbi, tsa mzeb Pey, ne lee Pey ndalowgwa leen nit, tsa mretsyath Pey, ne nzhab Pey:

—Zha Nabee, laata low'n.

³¹ Oraaka mzhén Jesús yaa Pey, ne nzhab Jesús lo Pey:

—¿Chebee lutta nyelaaza na? ¿Chebee ngok chop xgaba?

³² Leeka or kuu mke rop zha leen kano, lee mbi mlet. ³³ Tsa lee re zha kuu nzo leen kano mtobxbu lo Jesús, ne mbil zha lo Jesús nzhab zha:

—Wlipaa lee lu nak Xgann Diox.

*Jesús mtegwe re mbyiz zhayez Genesaret
(Mr. 6:53-56)*

³⁴ Tsa mriiid re zha tedib lad roo nitdoo, ne mzin zha thib yez kuu le Genesaret. ³⁵ Or mlebee re men yeza Jesús, dita lo yezlyu'a mchaats zha diize, tsa myaadno re zha re mbyiz ta ndo Jesús. ³⁶ Ne mnaab re zha lo Jesús tsa taa Jesús diiz diinn re mbyiz xab Jesús; ne reta zha kuu ndiinn xab Jesús ngwe zha.

15

*Kuu ntsow nambit men lo Diox
(Mr. 7:1-23)*

¹ Tsa mbig chop tsonta fariseo ne chop tsonta maestr kuu nllo xkiiz Diox, re zha'a nak zha Jerusalén, tsa mnaabdiz zha lo Jesús, nzhab zha:

² —¿Chebee lee re zha kuu ngeteed lo'a ntsowt zha kuu mloo re teyaa zha ndala? ¿Chebee nat zha or nzhou zha, taxal nzhab re teyaa?

³ Tsa mnaabdiz Jesús lo re zha, nzhab Jesús:

—¿Chebee noga goo nzhort goo diiz kuu nabee Diox lo goo tsow goo, leel re kuu mloo teyaa zha ndala ntsow goo? ⁴ Tak lee Diox nzhab: “Bke leettsoo'a xuta ne xnaa'a”. [Ex. 20:12] “Ne loka zha kuu ngode xut ne xnaa, ndoblo gath zha”. [Lv. 20:9] ⁵ Per lee goo mbez tak gab zha lo xut zha ne lo xnaa zha: “Gagt raa tsow'n ayud goo, tak reta kuu gatan lo goo mnda'a nay gon lo Diox”. ⁶ Ne ni goo loka cho kuu tenzhee gab, ndoblot raa tsow zha ayud xut zha ne xnaa zha. Tbaa nak goo, mláa goo re diiz nataak kuu nabee Diox tsow goo, leel re kuu mloo re teyaa zha ndala nyelaaz goo. ⁷ ¡Zha nkedi

nak goo, zhaa kuu mbez ne zhaa kuu ntsow goo! Wen wen mndaa profet Isái kwent chaan goo, leetsaa nzhab profet:

⁸ Re men yez ree beeta kon roo zha nzholo
zha lon,

per lee leetsoo zha titi ndo lon.

⁹ Nataagt nzholo re zha ree lon,
tak purta ley kuu nloo re men nloo zha. [Is.
29:13]

¹⁰ Tsa mrez Jesús re men, ne nzhab Jesús:

—Bkenza goo koree, tsa yen gooy. ¹¹ Nagt
kuu nzhaw zha ntsow nambit zha lo Diox,
tak re kuu went kuu ndroo roo zha kuu
ntsins leetsoo zha, kona ntsow nzhak nam-
bit zha lo Diox.

¹² Tsa mbig re zha kuu ngeteed lo Jesús, ne
nzhab zha lo Jesús:

—¿Chu myeenta mkezhyan re fariseo
mbin kuu nzhaba?

¹³ Tsa mkab Jesús, ne nzhab Jesús:

—Reta zha kuu nloo re ley kuu nagt ley
chaan Xut'n kuu ndob yibaa, teluux Xut'n re
zha'a, koree nak taxal zha kuu nkib dib lozh
thib ya kuu mtot zha. ¹⁴ Laa goo zha baa, tak
syeg zha. Ne os lee thib syeg teno tedib syeg,
leen thibka yeeryu la ropta zha.

¹⁵ Per lee Pey nzhab lo Jesús:

—Taa kwent lo nee naa xomod nak diiz
nanzee ree.

¹⁶ Tsa mkab Jesús ne nzhab Jesús:

—¿Chu no goo nyente? ¹⁷ ¿Chu nyent goo,
reta kuu nzhaw zha ndya leetsoo zha, ne
tsaraa ndrooy? ¹⁸ Per lee kuu ndroo roo
zha, leen leetsoo zha ntsin kona, ne ntsowe
nzhak nambit zha lo Diox. ¹⁹ Tak leen
leetsoo zha:
ntsins re xgab kuu went,
kuth zha taben zha,
gak rop zha kon thib zha kuu nagt tsaal zha,
gak rop zha kon ndota zha,
lowann zha,
nkeki zha re zha kuu nkedi zha,
ne re kuu nge zha taben zha.

²⁰ Re koree ntsow nzhak nambit zha lo Diox;
per lee kuu wu men ne nat men, ntsowt
kona par gak nambit men lo Diox.

Thib ngot titi ngwalaaz Jesús
(Mr. 7:24-30)

²¹ Tsa mroo Jesús tya ne nda Jesús yezlyu
Tiro ne yezlyu Sidón. ²² Tya lee thib ngot zha
Canaán, kuu nzo tya mbig lo Jesús, ne dib
gan zha mrez zha ne nzhab zha lo Jesús:

—jha Nabee, xgann rey David, blat
leetsoo'a né'a na! Tak kwathoz ndakti
rtsaap'n, tak nzo thib mbi fyer leetsoo
nzaa.

²³ Per neeka thib lan diiz mkaabt Jesús lo
ngot. Tsa lee re zha kuu ngeteed lo Jesús
mbig, ne nzhab lo Jesús:

—Btaal ngot baa liz ngot, tak kwathoz
nkee ngot bi ndeke ngot ditsaa.

²⁴ Tsa lee Jesús nzhab:

—Beeta lo re tawlazaa kuu nak taxal
mbak zhiil kuu mndab, mtaal Diox'n.

²⁵ Per lee ngota mbig lo Jesús mtobxub ne
nzhab:

—Zha Nabee, btsow ayud'n.

²⁶ Tsa mkab Jesús, ne nzhab Jesús:

—Went kib zha pan lo ndyeen bzhizh ne
taa zhay lo re mbak.

²⁷ Tsa nzhab ngot lo Jesús:

—Tata naake, Zha Nabee. Per noga mbak
nzhaw mbak re kuu byu kuu nzhab xann
mes bzhaan mbak, leetsaa nzhaw zha.

²⁸ Tsa nzhab Jesús lo ngot:

—jNgot, tak kwathoz nyelaaza Diox! Kona
gak kuu nlaza.

Ne leeka ora mgwe rtsaap ngot.

Jesús mtegwe kwathoz men

²⁹ Tsa mroo Jesús tya ne nda Jesús mzin
Jesús roo nitdo chaan Galilea, ne mkendab
Jesús yek yii tya ne mndob Jesús. ³⁰ Tsa
kwathoz men mkaltaa lo Jesús ta ndob
Jesús. Ne myaadno re men re zha renk, re
zha syeg, re zha tank, ne re zha mud ne
tedib net re mbyiz. Tsa mtegwe Jesús re zha.
³¹ Ne lee re zha kuu nzi tya kwathoz mzegey
leetsoo zha, or mwii zha, lee re zha mud
nzaak ndediz, lee re zha tank ngwe, ne lee
re zha renk ngwe ne lee re zha syeg nyeni
lo.

Tsa mndelo re zha mbil zha lo Diox
chaanaa, zha Israel.

Jesús mndaa kuu ndow thap mil men
(Mr. 8:1-10)

³² Tsa mrez Jesús re zha kuu ngeteed lo
Jesús, ne nzhab Jesús lo re zha:

—Nlat leetsoonen re men ree, tak nda'a
tson wiz nzi zha kon re'aa nzhee, ne yent
kwan nap zha wu zha. Nlazt'n taal'n re zha
liz zha ne wut zha, tak cha layaal zha net.

³³ Tsa lee re zha kuu ngeteed lo Jesús
nzhab:

—¿Per pa yaxii'aa kuu wu thib labaa raa
men, thib ta yent men?

³⁴ Jesús mnaabdiz, ne nzhab:

—¿Plal pan nap goo?

Tsa nzhab re zha:

—Gaz pan ne chop tsonta mbel.

³⁵ Tsa mnabee Jesús lo re men tob re men
lo yu. ³⁶ Ne mzhenn Jesús re gaz pan ne re
mbel ne mndaa Jesús texkiz lo Diox. Tsa
mtsow rol Jesús pan ne mndaa Jesús pan
lo re zha kuu ngeteed lo Jesús. Ne lee re
zha mdide lo re men kuu nzi tya. ³⁷ Reta
men ndow asta plotha rmze leetsoo men. Ne
mtse zha gaz chekwit ngoo re kuu byu kuu
mrozhoo. ³⁸ Thap mil mbyi ndow tya, ne
ngoot kwent re ngot kon re ndyeen bzhizh.

³⁹ Bluz tsaraa mchaats Jesús re men ndya,
ne lee Jesús mke leen thib kano ne nda Jesús
par yezlyu Magadán.

16

Re fariseo ne re saduceo mnaab thib seny lo Jesús

(Mr. 8:11-13; Lc. 12:54-56)

1 Tsa lee re fariseo ne re saduceo ngwa lo Jesús; ne mnaab zha thib seny yibaa lo Jesús, tsa tak keki zha Jesús ne ten zha Jesús. ² Per lee Jesús mkab lo re zha ne nzhab:

—Leettsa nane na xkow lobee or ndetsi yezyu; tsa mbez goo: “Wen la bee”. ³ Ne leettsa nane na xkow lobee ne nakal na nzhal til, tsa mbez goo: “Naltserree tela yi ne tax mbi thoz”. ¡Zha nkedi nak goo, zhaa kuu mbez goo ne zhaa kuu ntsow goo! Nlebee goo re seny kuu nyoo lobee, ¡per nlebeet goo re seny nal tyemp ree! ⁴ Goo kuu ngwii re milagr thoz kuu ntsow’i, went nak goo ne thitanax mlaa goo Diox. Naab goo thib seny thoz, per neeka thib seny loot lo goo, sinke beeta seny chaan profet Jonás zha ndala loo lo goo.

Ngwalo nzhab Jesús kona, tsa mlaa Jesús re zha’ a ne nda Jesús.

Kuu nloo re fariseo ne re saduceo nak taxal lebadur

(Mr. 8:14-21)

5 Leettsa ngwalo mriiid Jesús kon re zha kuu ngeteed lo Jesús tedib lad roo nitdoo, tsa mtelaa re zha kuu ngeteed lo Jesús mbet zha pan. ⁶ Tsa nzhab Jesús lo re zha:

—List gok goo, kayaat goo lebadur chaan re fariseo ne lebadur chaan re saduceo.

⁷ Tsa nzhab re zha lo altaa zha:

—Ndyaadnotaa; pan kona tabaa ne zha.

⁸ Per myeen Jesús kona, tsa nzhab Jesús lo re zha:

—¿Chebee ni goo nkenot goo pan? ¡Men kuu lutta nyelaaz Diox! ⁹ ¿Chebee terka yen goo lee na, tak ntsow’i re kuu thoz? ¿Chu ntelaazt goo re gaay pan kuu mndan ndow gaay mil mbyi? Ne, ¡plal chekwit kuu byu mrozhoo? ¹⁰ ¿Chu neeka gaz pan kuu mndan ndow thap mil mbyi, ntelaazt goo plal chekwite mrozhoo? ¹¹ ¿Chebee nyeent goo ngenit’i kwent lebadur chaan pan? Sinke leen ni lo goo list gok goo, kayaat goo lebadur chaan re fariseo ne chaan re zha saduceo.

¹² Tsaraa myeen re zha, lee Jesús ngetaat kwent chaan lebadur kuu nyoo pan, sinke list ndoblo gak zha lo re kuu nloo re fariseo ne re saduceo, kuu nak taxal lebadur.

Pey nzhab lee Jesús nak Crist Kuu Mtaal Diox Nabee

(Mr. 8:27-30; Lc. 9:18-21)

¹³ Leettsa mzin Jesús yezyu ta nak Cesarea-Filipo, tsa mnaabdiz Jesús lo re zha kuu ngeteed lo Jesús, ne nzhab Jesús:

—¿Cho nak na Kuu Mzin Ngok Men, ni re men?

¹⁴ Tsa lee re zha nzhab:

—Thib net zha mbez lee’ a nak Juan kuu mntsowleyy, lee tedib net zha mbez lee’ a nak profet Lí, lee tedib net zha mbez lee’ a nak profet Jeremí, ne lee tedib net zha mbez lee’ a nak tedib re profet.

¹⁵ Tsa nzhab Jesús lo re zha:

—Ne lee re goo, ¿cho nak’i ndak goo?

¹⁶ Tsa lee Simún Pey mkab, ne nzhab:

—Lu nak Xgann Diox kuu nabán, Kuu Mtaal Diox Nabee.

¹⁷ Tsa lee Jesús mkab lo Pey, ne nzhab:

—Wen nda’ a Simún xgann Jonás. Tak neeka thib men mloot koree lo’ a, sinke Xut’n kuu ndob yibaa mlooy lo’ a. ¹⁸ Ne na ni lee lu nak Pey, ne lee le’ a nak “ke”, ne dits ke ree tan gwodoo da, kuu nak re zha kuu nyelaaz’i. Ne lee yalney chaan yalguth tsowt gan loy. ¹⁹ Ne lo’ a tan yab chaan ta nabee Diox. Tsa reta kuu liiba lo yezyu ree, naliibe yibaa, ne reta kuu xaka lo yezyu ree, nazhake yibaa.

²⁰ Tsa lee Jesús mnabee lo re zha kuu ngeteed lo Jesús, tsa yent cho lo gab re zha, lee Jesús nak Crist Kuu Mtaal Diox Nabee.

Jesús nzhab naa xomod gath Jesús

(Mr. 8:31-9:1; Lc. 9:22-27)

²¹ Desde tsya mndelo Jesús nzhab Jesús lo re zha kuu ngeteed lo Jesús, lee Jesús ndoblo ya Jerusalén, ne tyá kwathoz rid Jesús yalti lo re zha gol, ne lo re ngwleyy kuu nabee lo re ngwleyy ne lo re maestr chaan ley. Ne kuth zha Jesús, per leettsa tsaal tson wiz lee Jesús roban. ²² Tsa lee Pey mloo Jesús thib lad, ne mndelo Jesús mkox Jesús lo Pey, ne nzhab Pey lo Jesús:

—Diox, Zha Nabee, lat leettsoo ne’ a. ¡Ridta kona!

²³ Per lee Jesús mtsere lo, ne nzhab lo Pey:

—¡Btow roo’ a Maxuuy! Lu ngetow lon. Tak ntsowta xgab kuu ntsow Diox xgab; sinke lee’ a ntsow xgab taxal ntsow re men xgab.

²⁴ Tsa lee Jesús nzhab lo re zha kuu ngeteed lo Jesús:

—Os cho goo nlaaz teke dits’i, bnithlaaz goo reta kuu nap goo, ne reta kuu nzo yek goo tsow goo, ne thib bloo goo leettsoo goo gath goo, tak nyelaaz goo na. ²⁵ Tak lee zha kuu kot thib leettsoo gath, tak nyelaaz zha na, tath zha’ a ne tsowt zha gan yalnaban kuu thitanax; per lee zha kuu thib ko leettsoo gath tak nyelaaz na, tetsow zha’ a gan yalnaban kuu thitanax. ²⁶ ¿Kwan tsow men gan keno zha reta kuu nzo yezyu ree, ne kenot zha yalnaban kuu thitanax? Gagt taa men neeka thib kwaa lo Diox par taa Diox yalnaban kuu thitanax lo men. ²⁷ Koree nin lo goo, tak lee na Kuu Mzin Ngok Men, yaal’ n kon xni thoz chaan Xut’n ne kon re mandad Xut’n, ne tsa taa

na lo kadta thib thib zha kuu ndoblo zha.
 28 Wlipaa na kuu ngenin lo goo, nzo chop tson goo kuu nzi nzhee, gatht goo, asta wii goo naa xa nabee Diox kon yalnabee chaan Diox.

17

Mzee mod na Jesús (Mr. 9:2-13; Lc. 9:28-36)

¹ Xoop wiz bluz lee Jesús zhaata mndeno Pey, Santiag ne Juan wets Santiag, ne ngwa re zha yek thib yii naro. ² Ne tyo mzee mod na Jesús lo re yon zha. Ne lee lo Jesús mla xni taxal xni wiz, ne dita xab Jesús naguz na taxal xni wiz. ³ Ne tyo mloo Moisés ne Lí ngetediz kon Jesús. ⁴ Tsa nzhab Pey lo Jesús:

—Zha Nabee, jwen thozi nzi nee nzhee nal! Os lee'a nlaaza, taa nee tson ramad, thibe gak chaana, tedibe gak chaan Moisés ne lee tedibe gak chaan Lí.

⁵ Or lee Pey bee ngenika, lee thib xkow kuu anta xni na mtow re zha, ne xid xkowa mroo thib bos kuu mbín re zha, kuu nzhab:

—Zha reek nak xgann na kuu kwathoz nke leettsoon, ne kwathoz wen nzo leettsoon nen zha. Bin goo diiz lo zha.

⁶ Or mbín re zha kuu ngeteed lo Jesús kona, reta zha mkiits zha yek zha lo yu, ne kwathoz mzebz zha. ⁷ Tsa mbig Jesús lo re yon zha, ne mdiinn Jesús zha, ne nzhab Jesús lo re zha:

—Gwateli goo; tsebt goo.

⁸ Ne leettsa mwii re zha yenta cho nak, sinke beeta Jesús ndo tyo.

⁹ Or ndyaadla re zha yek yii'a, lee Jesús mnabee lo re zha ne nzhab:

—Neeka thib lo zha gabt goo kuu mwii goo, asta leettsa lee na Kuu Mzin Ngok Men, roban xid re zha nguth.

¹⁰ Tsa lee re zha kuu ngeteed lo Jesús mnaabdiz lo Jesús, ne nzhab:

—Os leey tata nake, ¿chebee lee re maestr kuu nloo xkiiz Diox nzhab, ner Lí yaad?

¹¹ Tsa lee Jesús mkab ne nzhab:

—Wli ner Lí yaad, tsa texnet Lí reta kwwa.

¹² Per leen ni lo goo, myaada Lí per mkayaat re men Lí, sinke mtsowno re men Lí kuu nlaaz men. Ne leeka tata lee na Kuu Mzin Ngok Men, kwathoz rid'n yalti lo re mena.

¹³ Tsa lee re yon zha kuu ngeteed lo Jesús, myeen lee Jesús ngetaa kwent chaan Juan kuu mtsowleyy re men.

Jesús mtegwe thib zha mndyeen kuu mzhaakyizguthye
(Mr. 9:14-29; Lc. 9:37-43)

¹⁴ Leettsa lee Jesús kon re yon zha kuu ngeteed lo Jesús mretab ngwa yek yii, tsa mzin re zha ta nzi re men. Tsa mbig thib zha ne mtobxub zha lo Jesús, ne nzhab zha:

¹⁵ —Zha Nabee, blat leettsoo'a ne'a xgann na, tak ndak nyo yizguthye. Ne kwathoz

ndakti nyo lo yiz; ne kwathoz tyen welt nzhab nyo lo ki ne leen nit. ¹⁶ Myaadnon nyo lo re zha kuu ngeteed lo'a, per mtsowt zha gan gategwe zha nyo.

¹⁷ Jesús mkab ne nzhab lo re zha kuu nzi tya:

—Zha went, kuu nyelaazt Diox nak goo. ¿Asta pol ton lo goo? ¿Asta pol xek leettsoon nen goo? Deno xganna nzhee.

¹⁸ Tsa lee mbi fyer mkox lo Jesús ne mroo leettsoo nyo, ne oraaka lee nyo mgwe.

¹⁹ Tsa lee re zha kuu ngeteed lo Jesús, ngwa mnaabdiz lo Jesús zhaata ne nzhab re zha lo Jesús:

—¿Xomod lee nee, ngogt gagoo nee mbi fyer baa?

²⁰ Tsa lee Jesús nzhab:

—Ngogt gagoo goo mbi fyer baa, tak lutta nyelaaz goo Diox. Wlipaa na nin lo goo, os lee goo nyelaaz goo Diox mase lut taxal na thib mbiz mostaz, kuu thib ndezhen, neeka thib kuu gagt nagan lo goo. Tak gab goo lo yii ree: “Beche nzhee ne tyee tedib lad”, ne teyiib yii. ²¹ Reta mbi kuu tenzhee nak, tak rooy os lee men naab mene lo Diox ne tsow men ayun.

Jesús mndaa kwent tedib welt naa xomod gath Jesús
(Mr. 9:30-32; Lc. 9:43-45)

²² Thib wiz leettsa nzi re zha yezlyu Galilea, tsa lee Jesús nzhab lo re zha kuu ngeteed lo Jesús:

—Lee na Kuu Mzin Ngok Men, taa zha na lo re men, ²³ ne kuth zha na, per leettsa tsaal tson wiz lee na roban.

Leettsa mbín re zha koree, kwathoz nabil ngo leettsoo re zha.

Temi kuu nzhab lo gwodoo

²⁴ Leettsa mzin Jesús kon re zha kuu ngeteed lo Jesús yez Capernaúm, tsa lee re zha kuu ntsow kobral temi chaan gwodoo, ngwa mnaabdiz lo Pey ne nzhab:

—¿At ngixt maestr goo temi kuu nzhab lo gwodoo?

²⁵ Lee Pey mkab ne nzhab:

—Ngixz zhay.

Ne leettsa lee Pey mndaa leen yuu, lee Jesús mni lo Pey ne nzhab:

—¿Simún, kwan ntsowa xgab? ¿Cho lo ntsow re zha kuu nabee lo yezlyu ree kobral temi chaan yezlyu? ¿Chu lo re tawlaz zhay o chu lo re zha tedib yeze?

²⁶ Pey mkab ne nzhab:

—Lo zha tedib yeze.

Tsa lee Jesús nzhab:

—Kona lee re tawlaz zha ndoblot kix neeka thib rehal. ²⁷ Per ndoblot tsowaa, tak leettsoo neeka thib zha. Kona nin lo'a, gwa roo nitdoo, ne blebi answel kuu niita mbel. Ne roo mbel kuu ner niita yetsla thib

temi kuu tegaa kizha chaanaa. Bzhene ne gwathix lo re zha.

18

¿Cho nak zha kuu mas nataak?
(Mr. 9:33-37; Lc. 9:46-48)

¹Thib welt lee re zha kuu ngeteed lo Jesús, mbig lo Jesús ne nzhab:

—¿Cho nak zha kuu mas nataak lo re zha kuu nabee Diox lo?

²Tsa mrez Jesús thib nyo lut, ne mto Jesús nyo ndrol lo re zha. ³Ne nzhab Jesús:

—Wlipaa na nin lo goo, os lee goo gagt goo taxal ndyeen bzhizh, gagt tab goo ta nabee Diox. ⁴Kona lee zha kuu nadoo nak taxal nyo lut ree, zha'a nak zha kuu mas nataak ta nabee Diox. ⁵Loka zha kuu nkayaa thib re ndyeen bzhizh, tak nyelaa zha na, leey nak taxal na nkayaa zha'a.

Thitanax went ntsow thib zha lee tedib zha tsow kuu went

(Mr. 9:42-48; Lc. 17:1-2)

⁶'Loka cho kuu tsow lee thib re ndyeen bzhizh kuu nyelaa na, tsow kuu went; mas wen kee zha thib ke naro yen zha'a, ne kobi zha zha'a leen nitdo. ⁷¡Aka! Kwathoz nalatt rid re men yezlyu ree wiz bluz, ne lo yezlyu ree wli too re zha kuu ntsow par laa zha da na. Aka nalat rid re men kuu nzo lo yezlyu ree, kuu tsow laa re zha da na.

⁸'Kona os lee yaa'a o nii'a ntsow ntsowa kuu went, mas wen lortsint raa luy, ne btsow taxal mga luy ne mlobi luy tith, tak mas wen taba kayaa'a yalnaban kuu thitanax tunka, nake nkeno'a rop yaa'a ne rop nii'a ne ndya'a lo bel kuu thitanax nyuyyt. ⁹Ne os lee ngutlo'a ntsow tsowa kuu went, mas wen lortsint raa luy, tak mas wen taba kayaa'a yalnaban kon thibka ngutlo'a, nake napa rop ngutlo'a ne ndya'a gabil ta nyuyyt bel thitanax.

Kwent nanzee chaan mbak zhiil kuu mndab

(Lc. 15:3-7)

¹⁰'Wii goo ndoblot tsow nataagt goo, neeka thib re ndyeen bzhizh ree, tak kwathoz nataak ndyeen lo Xut'n Diox, ne lee re mandad chaan re ndyeen ree thibka nzi lo Xut'n kuu ndob yibaa. ¹¹Tak lee na Kuu Mzin Ngok Men, ndyaad kwaan re zha kuu mndab ne telaa re zha lo yalguth.

¹²¿Kwan ntsow goo xgab, kwan tsow thib zha, os lee thib zha tak koree? Os lee thib zha nap thib gayoo mbak zhiil ne tab zha thib maa, wlipaa telaa zha tedib re thap galbtsiyyee maa wan, ne yakwaan zha maa kuu mndaba, asta tsal maa lo zha. ¹³Ne or tsal maa lo zha, wlipaa na nin lo goo, mas naley yo leettsou zha ne zha maa kuu mndaba, nake re thap galbtsiyyee maa kuu mndabt. ¹⁴Leeka tata lee Xutaa kuu ndob

yibaa, nlaazt zha roo neeka thib re ndyeen bzhizh ree xid re zha kuu nyelaaz na.

Xomod ndoblo la leettsou'aa ne'aa re tabenaa

(Lc. 17:3)

¹⁵'Os lee wetsa ntsow thib kuu went lo'a, bni lo zha or thita zha, ne btsow yen zha went kuu mtsow zha, tsa tsee zha mod nak zha. Os lee zha gon zha xkiiza, mtsowa lu gan yaan wetsa xith re zha kuu nabee Diox leettsou. ¹⁶Ne os lee zha gont zha xkiiza, tsa brez thib zha o chop zha da, gwa goo lo zha ne ndoblo tsow goo taxal nke lo xkeets Diox ta nzhab: "Ndeche chop zha o tson zha kuu gab thibka kwaan, ne kuu gab re zha'a kona gak, tsa tyatha yaan kwent". [Dt. 19:15]

¹⁷'Os lee zha'a gont xkiiz goo, guz goo lo re zha da kuu nyelaaz Diox. Tsa kox zha'a lo re zha da, ne os lee zha'a nlaaztga zha gon zha xkiiz re zha kuu nyelaaz Diox, tsa ndoblo wii goo zha, taxal thib zha kuu nagt zha yez chaan Diox, ne taxal thib zha kuu ntsow kobral temi chaan yezlyu kuu nzhab lo zha Roma.

¹⁸'Wlipaa na nin lo re goo, reta kuu liib goo lo yezlyu ree, naliibe yibaa; ne reta kuu nxak goo lo yezlyu ree, nazhake yibaa.

¹⁹'Ne noga nin lo goo: Os beeta chop goo myaan goo diiz lo yezlyu ree, naab goo thib kuu nlaaz goo lo Xut'n kuu ndob yibaa, tataa Xut nay. ²⁰Tak ta nzi chop zha o tson zha kuu nak zha da, tya ndon ndrol lo re zha ne gon na kuu gab zha.

²¹Tsa lee Pey mbig lo Jesús ne nzhab:

—Zha Nabee, ¿plal welt ndoblo la leettsou lo re kuu went kuu ntsow wets'n lon? ¿Chu wen asta gaz welt?

²²Jesús mkab ne nzhab:

—Nit'n gazka welte, sinke leen ni: Thap gayoo thap galbtsii welt, ndoblo la leettsou'a ne'a wetsa.

Kwent nanzee chaan chop zha kuu ndab

²³'Ne tak tabaa nake, kona nin kwent nanzee ree lo goo. Leettsa nabee Diox, leey nak taxal thib rey, kuu ngwalaaz gatsow kwent naa plo ndab re mos rey lo rey.

²⁴Leettsa mndelo rey mtsow kwent, tsa ner mtaal rey zha ngwachez thib zha kuu ndab kwathoz miyon temi lo rey. ²⁵Ne lee zha'a gagt kix lo rey, tsa lee rey mnabee: "Tho zha zha, kon tsaal zha ne kon re zhiinn zha ne kon reta kuu nap zha, tsa tata mod gax kuu ndab zha". ²⁶Tsa mtobxub mos ne mnaab mos lo rey ne nzhab mos: "Zha nabee bxek leettsou'a ne'a na; xlaaz yizh'n retay lo'a". ²⁷Tsa mlat leettsou rey ne mla leettsou rey mne zha'a, tsa mlaa rey zha taxal thib zha kuu ndabt neeka thib pes.

²⁸'Per leettsa mroo zha lo rey, tsa nda zha ne mzaal zha thib zha kuu ndab lut temi lo zha. Tsa mzhen zha yen zha'a ne mde

zha yen zha'a, ne nhhab zha lo zha'a: "jBdix kuu ndaba lon!" ²⁹ Tsa lee zha kuu ndab lo zha, mtobxbub lo zha ne nhhab: "Bxek leettsoo'a ne'a na; xlaaz yizh'n retay lo'a". ³⁰ Per lee zha mzhylt zha, leel ndano zha zha ne mloo zha zha tsib, asta kix zha reta kuu ndab zha. ³¹ Leettsa mwii tedib net re mos rey kona, kwathoz nabil ngoo leettsoo re zha, tsa ngwa re zha ne nhhab zha kuu ngok lo rey. ³² Tsa lee rey mrez zha kuu tata mtsowa, ne nhhab rey lo zha: "jZha nakap! Mla leettsoon mnen lu por reta kuu ndaba lon, tak mnaab luy lon. ³³ Noga lu ndoblo galat leettsoo'a gane'a altaa'a, taxal mlat leettsoon mnen lu." ³⁴ Tsa kwathoz mnayii rey, ne mnabee rey mteti zha zha, asta kix zha reta kuu ndab zha.

³⁵ Tsa nhhab Jesús:

—Tabaaka tsow Xut'n Diox kuu ndob yiba lo re goo, os lee goo latta leettsoo goo lo re kuu went kuu ntsow taben goo lo goo.

19

*Jesús mloo ndoblot laa zha tsaal zha
(Mr. 10:1-12; Lc. 16:18)*

¹ Leettsa ngwalo nhhab Jesús re diiz ree, tsa mroo Jesús yezlyu Galilea, ne nda Jesús par yezlyu Judea kuu nzi tedib lad roo yoo Jordán, kon re zha kuu ngeteed lo Jesús. ² Ne kwaro men mndeke dits Jesús, ne mtegwe Jesús re zha kuu ne ndak, kuu nzo xid re mena. ³ Tsa lee chop tson zha fariseo mbig lo Jesús, ne mnaabdiz tha thib kuu nhhab lo ley, tsa naa chu takab Jesús thib kuu ndoblot, tak nlaaz zha kwaan zha naa xomod keki zha Jesús, tsa nhhab zha lo Jesús: —¿Chu tak laa thib mbyi tsaal mbyi por ndota kwa?

⁴ Tsa lee Jesús mkab ne nhhab:

—¿Chu ter lab goo lo xkeets Diox, leettsa mdexkwaa Diox yezlyu, thibka mbyi ne thibka ngot mtsaal Diox? ⁵ Ne noga nhhab Diox: "Kona lee mbyi ndoblo roo zhaa lo xut ne lo xnaa, tsa tseyaa mbyi kon ngot mbyi, ne lee rop zha gak taxal thibka zha". [Gn. 2:24] ⁶ Kona nagt raa zha chop zha, sinke taxal thibka zha nak zha rop zha. Kona ndoblot laa zha tsaal zha, tak Diox mtsaal rop zha.

⁷ Tsa mnaabdiz re zha lo Jesús ne nhhab zha:

—¿Xomod lee Moisés nhhab tak laa mbyi tsaal mbyi, beeta ndoblo taa mbyi thib yeets kuu mroo yuulow kuu nhhab, lee mbyi mtsor tsaal?

⁸ Tsa lee Jesús nhhab:

—Tbaa mne Moisés lo goo, tak kwathoz nad leettsoo goo, per ner ngogte tata. ⁹ Per lee na ni, loka cho mbyi kuu laa tsaal, ne nagte tak ngok rop ngot kon tedib mbyi, ne kaa mbyi tedib ngot, ndaa mbyi thib falt ro lo Diox, tak nhzhak rop mbyi kon tedib ngot.

¹⁰ Tsa lee re zha kuu ngeteed lo Jesús nhhab:

—Os tata nak kwent chaan mbyi kon tsaal mbyi, mas wen kat mbyi ngot.

¹¹ Jesús mkab ne nhhab:

—Ret men nxek ntseyat, beeta re men kuu mndaa Diox diiz lo tak tsowe. ¹² Nzo zha nyowt leettsoo kaa ngot, tak tata nak zha ngol zha, ne nzo zha nkaat ngot, tak men mtsow nyoot yek zha kaa zha ngot, ne nzo zha nkaat ngot, tak nlaaz zha ke zha tsiiin taa zha kwent chaan ta nabee Diox. Zha kuu tak tsow koree, wen ntsow zha.

*Jesús mkayaa re ndyeen bzhizh
(Mr. 10:13-16; Lc. 18:15-17)*

¹³ Tsa ngwano zha chop tson ndyeen bzhizh lo Jesús, tsa xoob Jesús yaa Jesús yek re ndyeen, tsa naab Jesús lo Diox por re ndyeen. Per lee re zha kuu ngwano ndyeen mndelo mkok lo re zha kuu ngeteed lo Jesús. ¹⁴ Per lee Jesús nhhab:

—Laa goo yaad re ndyeen bzhizh lon, ne towt goo lo re ndyeen, tak lee ta nabee Diox, nak chaan re zha kuu nadoo nak taxal re ndyeen bzhizh.

¹⁵ Ne mxoob Jesús yaa Jesús yek re ndyeen, par tsow Diox kuu wen lo re ndyeen.

Tsaraa mbi Jesús tya.

*Thib zha mndyeen kuu rik mndediz kon Jesús
(Mr. 10:17-31; Lc. 18:18-30)*

¹⁶ Lee thib zha mndyeen ngwa mnaabdiz lo Jesús ne nhhab:

—Maestr wen, jkwan kuu wen tsow'n tsa tsow'n gan yalnaban kuu thitanax?

¹⁷ Jesús mkab lo zha ne nhhab:

—¿Chebee zha wen ni'a lon? Tak neeka thib zha wen yent, beeta Diox wen nak. Per os lee'a nlaaza keno'a yalnaban kuu thitanax, bin diiz re diiz kuu nataak kuu nabee Diox.

¹⁸ Tsa lee zha mndyeen nhhab:

—¿Pa kuu tsa?

Tsa lee Jesús nhhab:

—Kuththa tabena, gagt ropa kon ngot kuu nagt tsala, lowannta, kekita tabena kon thib kuu wlit,

¹⁹ bke leettsoo'a xuta ne xnaa'a, ne bke leettsoo'a tabena taxal nke leettsoo'a leeka lu.

²⁰ Lee zha mdyeeena nhhab:

—Reta koree nhzhona na diiz. jKwan raa ndoblon tsow'n?

²¹ Tsa nhhab Jesús lo zha:

—Os lee'a nlaaza gaka thib zha nali, tyee ne btho reta kwaan napa ne btaay lo re zha prob, tsa keno'a naroob kwaan yibaa; tsaraa yaada ne teke'a dits'n.

²² Leettsa mbin zha mndyeen kona, kwathoz nabil ngoo leettsoo zha ndya zha, tak naroob kwaa nap zha.

²³ Tsa lee Jesús mne lo re nee kuu ngeteed lo Jesús:

—Wlipaa na nin, kwathoz nagan laa thib zha rik nabee Diox leettsoo zha. ²⁴ Tedib welt nin lo goo, mas nagant rid thib kamey yeer kuu le ngutlo abuj, nake tab thib zha rik yibaa ta nabee Diox.

²⁵ Leettsa lee re zha kuu ngeteed lo Jesús mbin kona, tsa kwathoz mzegey leettsoo zha ne mbez zha lo altaa zha:

—¿Cho tak tsow gan yalnaban, os tata nake?

²⁶ Tsa mwii Jesús lo re zha ne nzhab Jesús:

—Lo re men yezlyu ree gagte, per lee lo Diox reta kuu tak.

²⁷ Tsa lee Pey nzhab lo Jesús:

—Wii lee re nee. Mlaa nee reta kuu nap nee ne mnedeke nee ditsa. ¿Kwan tsow nee gan tsaa?

28 Lee Jesús mkab ne nzhab:

—Wlipaa na nin lo goo, leettsa tsin wiz kuu lee reta kwaagak kuu kub, tsa lee na Kuu Mzin Ngon Men, tob'n lo asi chaan yalnabee, ta kwathoz nzhol na ne nabeen, noga re goo kuu ndeke dits'n, tob lo thib asi chaan yalnabee, tsa naab goo kwent lo re tsuibchop net raz kuu nak zha Israel. ²⁹ Ne loka cho mlaa liz, wets, btan, xut, xnaa, tsaal, zhiinn, yu, par tsow rtsin na, kwaro kuu wen kayaa zha lo Diox ne kayaa zha yalnaban kuu thitanax. ³⁰ Kwaro re zha kuu nataak nal, re zha'a gak zha kuu nataagt, ne lee re zha kuu nataagt nal, re zha'a gak zha nataak.

20

Kwent nanzee chaan zha kuu ngonn luts ub

¹ Lee nal leen ta thib kwent lo goo, tsa ne goo xomod nabee Diox. Leey nak taxal thib mbyi kuu nap thib fink. Til mroo zha ngwa zha lo xbi ngwakwaan zha mos ke rtsin zha, par thop ub. ² Ne myaan zha diiz kon re mos zha, kix zha lo kadta mos loka kuu nzhab nkaa thib zha thib wiz. Tsa mtaal zha re mos nda tsini lo yu zha. ³ Ne or nda'a or lee zha kuu nak chaan fink mroo ngwakwaan tedib net mos, ne mwii zha lee chop tson zha nalath nzi lo xbi. ⁴ Tsa nzhab zha lo re zha'a: “Gwa goo ke goo tsini fink da, ne yizh'n kuu nzhab nkaa thib zha thib wiz lo goo”. Tsa nda re zha. ⁵ Ne lee zha kuu nak chaan fink, mroo ngwa lo xbi tedib welt teeka ndrol wiz, ne noga mroo zha, or ndetho'a wiz ngwakwaan zha mas mos, ne nzhab zha kix zha kuu nzhab nkaa thib zha thib wiz. ⁶ Ne telutta ndob wiz mre zha ngwa zha lo xbi tedib welt ne mzal zha tedib net zha, ne nzhab zha lo re zha'a: “¿Chebee tbaata nzi

goo tree dita wiz ne nketa goo tsii?” ⁷ Tsa lee re zha mkab ne nzhab: “Nketa nee tsii, tak yent cho zha ne lo nee ke nee rtsin zha”. Tsa lee zha kuu nak chaan fink nzhab lo re zha: “Gwa goo ke goo tsii fink da, ne yizh'n kuu nzhab nkaa thib zha thib wiz lo goo, ne nda re zha”.

⁸ Leettsa mziy yezlyu, lee zha kuu nak chaan finka, nzhab lo zha kuu nabee lo re zha kuu nke tsii: “Brez re zha kuu nke tsii ne bdix lo zha. Btelo kon re zha kuu mzin bluz, tsaraa kon re zha kuu mzin ner.” ⁹ Tsa mbig re zha kuu mndelo mke tsii or mziy yezlyu, ne lo kadta thib zha ngozh kuu ntsow thib zha gan thib wiz.

¹⁰ Tsaraa mndelo zha mdix zha lo re zha kuu mndaab ner, ne mnda leettsoo re zha kuu mndaab ner, masraa gax kaa zha nake re zha kuu mndaab nda or; per noga zha mkaa kuu nzhab nkaa thib zha thib wiz.

¹¹ Leettsa ngwalo mdix zha lo re zha, tsa mndelo re zha kuu mndaab ner mbyodiz kon zha kuu nak chaan fink. ¹² Ne nzhab re zha: “Re zha kuu mzin bluz, thibka or mke zha tsii; ne lee re nee mke tsii dita wiz, ne kwathoz mzhakti nee lo bee ne yewalka mdizha mkaa re nee”. ¹³ Per lee zha kuu nak chaan fink nzhab lo re zha: “Amig, neeka thib kuu want netgetswot'n lo goo. ¿Chu myaantaan diiz yizh'n kaa goo kuu nzhab nkaa thib zha thib wiz? ¹⁴ Kona wen bloo goo leettsoo goo kon kuu ngox lo goo ne tyee goo, tak os leen nlaz'n yizh'n yewalka lo goo kon re zha kuu mndaab nda or, ¹⁵ ¿chu ndoblot'n tsow'n kuu nlaz'n kon temi da? ¿O chu nayii goo ne goo na, tak wen na'k'n?” ¹⁶ Kona lee re zha kuu bluz gak zha ner, ne lee re zha ner gak zha bluz.

Myon welt mndaa Jesús kwent naa xomod gath Jesús

(Mr. 10:32-34; Lc. 18:31-34)

¹⁷ Bluz lee Jesús ndo'a net ndya yez Jerusalén, tsa zhaata ndano Jesús re tsuibchop zha kuu ngeteed lo Jesús, ne nzhab Jesús lo re zha:

¹⁸—Lee nal ne'a goo, lee'aa nda Jerusalén ta taa zha na, Kuu Mzin Ngok Men, lo re ngwleyy kuu nabee lo re ngwleyy ne lo re maestr kuu nloo xkiiz Diox, ne naab re zha kwent lon ne gab re zha ndoblo gath'n. ¹⁹ Tsa taa zha na lo re zha kuu nagt zha Israel, zhizno zha na ne yelo'a kin zha na, tsa kee zha na lo kruz. Per leettsa tsaal tson wiz lee na roban.

Kuu mnaab xnaa Santiag ne Juan lo Jesús
(Mr. 10:35-45)

²⁰ Tsa mbig tsaal Zebedeo lo Jesús, kon rop xganne kuu nak Santiag ne Juan, mtobxbub ngot, ne mnaab ngot thib yalwen lo Jesús.

²¹ Tsa lee Jesús mnaabdiz lo ngot ne nzhab:

—¿Kwan nlaaza?

Tsa lee ngot nzhab:

—Leettsa nabee'a, nlaz'n lee thib xgann na tob lad ban lo'a lee tedib zha tob lad beg lo'a, ta kwathoz nataak.

²² Lee Jesús mkab ne nzhab lo re zha:

—Neeka net goo naa kwan naab goo. ¿Chu texek goo rid goo yalti kuu riid'n?

Lee rop zha nzhab:

—Texek nee.

²³ Lee Jesús nzhab:

—Wli, lee goo rid yalti taxal rid nay; per gagt tsow'n tob'n goo lad ban ne lad beg lon, tak nagt na kuu taa kona. Sinke Xut'n taa kona lo re zha kuu naka diiz kayaay.

²⁴ Leettsa mbin tedib tsii zha kuu ngeteed lo Jesús kona, tsa mnayii zha mne Juan rop Santiaq. ²⁵ Kona mrez Jesús re zha, ne nzhab Jesús lo re zha:

—Wen ne goo lee re zha kuu nabee lo yezlyu ree, kwathoz nabee zha lo re zha kuu nzi lo zha, ne tataka ntsow re zha kuu nataak, kwathoz nabee zha lo re zha zha. ²⁶ Lee lo re goo gagte tata, zhaa gake. Loka cho zha kuu nlaaz gak zha kuu mas nataak lo goo, zha'a ndoblo lortsin lo goo. ²⁷ Ne loka cho nlaaz nabee lo re goo, ndoblo gak mos kuu tsow tsii lo re goo. ²⁸ Leeka tata lee na, Kuu Mzin Ngok Men, ndyalt'n tsa lortsin re men lon, sinkeleen ndyal lortsin lo re men, ne gath'n, tsa telaan naroob men lo yalguth kuu thitanax.

*Jesús mtegwe chop syeg
(Mr. 10:46-52; Lc. 18:35-43)*

²⁹ Leettsa lee Jesús kon re zha kuu ngeteed lo Jesús ndaroo roo yez Jericó, kwathoz men mndeke dits re zha. ³⁰ Ne tya lee chop syeg ndob roo net; ne leettsa mbin rop syeg lee Jesús nderid, tsa dib gan rop syeg, nzhab rop syeg:

—Zha Nabee, Xgann rey David, blat leettsoo'a ne'a nee ne btegwe nee.

³¹ Tsa lee re men mnayii lo rop syeg, tsa tow roo rop syeg, per lee rop syeg masraa mrez ne nzhab:

—Zha Nabee, Xgann rey David, blat leettsoo'a ne'a nee.

³² Tsa lee Jesús mlet, ne mrez Jesús rop syeg, ne nzhab Jesús lo rop syeg:

—¿Kwan nlaaz goo tsow'n lo goo?

³³ Tsa lee rop syeg mkab ne nzhab:

—Zha Nabee, nlaaz nee yeni lo nee.

³⁴ Tsa mlat leettsoo Jesús mne rop zha'a, ne mdiinn Jesús ngutlo rop zha. Ne oraaka mwii rop zha, ne mndeke zha dits Jesús nda zha.

21

*Jesús mndaab leen yez Jerusalén
(Mr. 11:1-11; Lc. 19:28-40; Jn. 12:12-19)*

¹ Leettsa lee Jesús ndetsin gaxa yez Jerusalén, tsa mzin Jesús yez Betfagé kuu

nzi gaxta yii Olib, tsa mtaal Jesús chop zha kuu ngeteed lo Jesús ya yeza, ² ne nzhab Jesús lo zha:

—Gwa goo yez kuu nzi baa. Tya yetsal goo thib burr kuu ndekedoo rop zhiiinn. Xak goo maa ne yaadno goo maa. ³ Ne os cho zha kwan ne lo goo, gab goo lo zha: “Zha Nabee ndeche maa, ne tsaraa yaadtaan zha rop maa”.

⁴ Koree ngok, tsa mrolo re kuu nzhab profet kuu ngoo ndala, leettsa nzhab zha:

⁵ Guz goo lo re zha yez Jerusalén: “Wii goo, lee rey goo ndyaad lo goo, zha kuu nadoo nak, ndob dits thib burr ndyaad,

zhiiinn thib maa kuu nzhee yoo”. [Zac. 9:9]

⁶ Tsa lee rop zha kuu ngeteed lo Jesús, ngwa zha ne mtsow zha taxal nzhab Jesús lo zha. ⁷ Ne mndeno zha rop zhiiinn burr, tsa mxoob zha xab zha dits burr yeena, ne mndob Jesús dits maa. ⁸ Ne kwathoz men nzi, cho zha ngix xabe net, ne cho zha nga baat ne ngix zhay net. ⁹ Ne lee re zha kuu ndener ne re zha kuu ndeke, nex mbez zha:

—¡Golaa lo Zha kuu ndyaad Nabee lo raz chaan rey David! ¡Aka wen nak zha kuu ndyaad kon yalnabee chaan Zha Nabee!

¡Golaa lo Diox kuu ndob yibaa!

¹⁰ Ne leettsa mndaab Jesús yez Jerusalén, reta zha yeza mgab ndata leettsoo zha, ne mnaabdz zha lo altaa zha, ne mbez zha:

—¿Cho nak zha ree?

¹¹ Ne reta men mbez:

—Zha ree nak Jesús, profet zha yez Nazaret kuu nzi yezlyu Galilea.

Jesús mtezhonn re zha kuu ntho lee roo gwodoo

(Mr. 11:15-19; Lc. 19:45-48; Jn. 2:13-22)

¹² Ne leettsa mndaab Jesús lee roo gwodoo, tsa mloo Jesús re zha kuu nzi ntho ne re zha kuu ndi tya. Ne mlobi Jesús re mes chaan re zha kuu ntsil temi, ne mlobi Jesús re mes chaan re zha kuu ntho palom. ¹³ Ne nzhab Jesús:

—Lee lo xkeets Diox nzhab: “Lee liz'n nak yuu ta ndediz re men lon”, [Is. 56:7; Jer. 7:11] ne noga tedib ta nzhab: Per lee re goo mtsowe taxal liz wann.

¹⁴ Ne lee roo gwodoo mbig re zha syeg ne re zha renk lo Jesús, ne mtegwe Jesús re zha. ¹⁵ Tsa lee re ngwleyy kuu nabee lo re ngwleyy ne re maestr kuu nloo xkiiz Diox, mwii zha re kuu thoz kuu mtsow Jesús, ne mbin zha lee re ndyeen bzhizh mbez: “¡Golaa lo Zha Kuu Mtaal Diox Yaad Nabee, zha kuu ndyaad lo raz chaan rey David!”, tsa kwathoz mnayii re zha. ¹⁶ Ne nzhab zha lo Jesús:

—¿Chu nzhonaa kuu mbez re ndyeen baa?

Tsa lee Jesús mkab ne nzhab:

—Ah, nzhon nay. ¿Per chu ter lab goo lo xkeets Diox ta nzhab koree: “Mtsowa lee re ndyeen bzhizh ne re mbetdoo gol lo’aa”? [Sal. 8:2]

¹⁷ Tsa mlaa Jesús re zha ne nda Jesús yez Betania, ne tyā mlet Jesús yaala.

*Jesús mlode ya ig
(Mr. 11:12-14, 20-26)*

¹⁸ Ne til tedib wiza leettsa mre Jesús yez Jerusalén tedib welt, tsa mlann Jesús. ¹⁹ Tsa mwii Jesús lee thib ya ig ndob gax roo net, tsa mbig Jesús lo ya, tsa naa chu ndab xle lo ya, per mzalt Jesús ig lo ya beeta la ndab lo ya. Kona nzhab Jesús lo ya:

—Neeka mas taat raa lu xle.

Ne oraaka lee ya mbiz. ²⁰ Leettsa mwii re zha kuu ngeteed lo Jesús kona, kwathoz mzegey leettsa zha ne nzhab zha:

—¡Xomod oraaka mbiz ya ig!

²¹ Lee Jesús mkab ne nzhab:

—Wlipaa na nin lo goo, os lee thib goo nyelaaz Diox ne gagt chop xgab goo, tak tsow goo koree ne asta tak gab goo lo yii ree: “Beche nzhee ne bla leen nitdoo”, ne leey gak. ²² Reta kuu naab goo lo Diox, os nyelaaz goo lee goo kayaay, tekayaa gooy.

*Cho mndaa yalnabee lo Jesús
(Mr. 11:27-33; Lc. 20:1-8)*

²³ Tsa lee Jesús mndael lee roo gwodoo, ne mndelo Jesús mloo lo re men, tsa lee re ngwleyy kuu nabee lo re ngwleyy, ne re zha gol kuu nabee lo re zha Israel, mbig lo Jesús, ne mnaabdiz zha lo Jesús, ne nzhab zha:

—¿Cho mndaa diiz ntsowa koree? ¿Ne cho mndaa yalnabee ntsow luy?

²⁴ Jesús mkab ne nzhab:

—Noga na naabdiz’n thib kwaa lo goo. Os lee re goo kab goo yalnabdiz da, tsa nin lo goo naa cho mndaa diiz ntsow’n ree koree. ²⁵ ¿Cho mtaal Juan kuu mtsowleyy re men? ¿Chu Diox mtaal zha o re men mtaal zha? ¡Kab goo lon nal!

Tsa lee re zha mndelo mbyodiz kon re altaa zha, ne nzhab zha:

—Os lee’aa gabaa: “Diox mtaal zha”, tsa ne zha lo’aa: “¿Chebee ngwalaazt goo kuu mni zha?” ²⁶ Ne os lee’aa gabaa: “Re men mtaal zha”, tsa yii re men ne re menaa, tak ne re men lee Juan nak thib profet chaan Diox.

²⁷ Tsa mkab re zha lo Jesús ne nzhab zha:

—Net nee cho mtaal Juan.

Tsa lee Jesús mkab ne nzhab:

—Neeka na nit’n lo goo naa cho mndaa yalnabee lon ntsow’n re koree.

Kwent nanzee chaan chop xgann zha

²⁸ Tsa lee Jesús nzhab lo re men:

—Nal leen ta thib kwent lo goo. Thib mbyi mkeno chop xgann, ne nzhab mbyi lo xgann mbyi kuu ner: “Gwa ke’ā tsuin

naltserree”. ²⁹ Ne lee xgann mbyi mkab lo xute ne nzhab: “Yat’n”. Per bluz mtsee zha xgab zha ne ngwa zha. ³⁰ Tsa nzhab mbyi lo tedib xgann mbyi, leeka taxal nzhab mbyi lo xgann mbyi kuu nera. Ne lee zha’ā nzhab: “Mbay, nal ndan”. Per ngwat zha. ³¹ Lo rop zha’ā, ¿cho mbin diiz lo xute?

—Zha nera —nzhab re zha.

Tsa lee Jesús nzhab:

—Wlipaa na nin lo goo, re zha kuu ntsow kobral temi chaan yezlyu kuu nzhab lo zha kuu nabee Roma, ne re ngot kuu ntho kwerp, ne tedib net re zha kuu ndaa falt, re zha’ā tab ta nabee Diox. ³² Tak lee Juan myaad mloo lo goo, naa xomod ndoblo nali ban goo, ne lee goo ngwalaazt goo kuu mni Juan. Per lee re zha kuu ntsow kobral temi chaan yezlyu kuu nzhab lo zha kuu nabee Roma, ne re ngot kuu ntho kwerp, re zha’ā ngwalaazt goo kuu nzhab Juan, ne lee re goo tegal mwii goo kuu nzhab Juan, per neeka mlaat goo mod went kuu nak goo, ne neeka ngwalaazt goo kuu mni Juan.

Kwent nanzee chaan re zha nakap kuu mke tsuin lo luts ub

(Mr. 12:1-12; Lc. 20:9-19)

³³ Kenza goo tedib kwent nanzee kuu nin lo goo: Thib welt lee thib mbyi mkeno thib fink, ne mto zha luts ub dita lo yu zha. Ne mtow zha dita fink kon btsin ke. Ne mdexk-waa zha thib ta tii zha ub, noga mdexk-waa zha thib yuu naro kuu ya ndab, ta loo dita lo yu zha lo zha. Ne mndaa zha yu zha kompani lo tedib net zha, ne mroo zha nda zha tit. ³⁴ Leettsa ngozhoob wiz kuu dop ub, tsa mtaal zha chop tson mos zha, ya lo zha kuu nke tsuin lo yu zha, tsa tsow rol zha ub kuu ndoblo zha kaa zha. ³⁵ Per lee re zha kuu nzhan lo yu zha, mzhen re mos zha, ne mdin re zha thib mos, lee tedib mos mbeth zha ne lee tedib mos mkee zha ke yeke. ³⁶ Tsa lee zha kuu nak chaan fink, mtaal tedib net mos lo re zha kuu nke tsuin lo yu zha; per lee re zha kuu nzhan lo yu zha, leeka taxal mtsow re zha lo re mos kuu ner, tataka mtsow zha lo tedib net mos.

³⁷ Bluz mtaal zha xgann zha, tak mtsow zha xgab, nzhab zha: “Lo xgann na si ton re zha diz”. ³⁸ Per leettsa mwii re zha kuu nzhan lo yu zha lee xgann zha ndyaad, tsa nzhab zha lo re altaa zha: “Zha ree kayaa reta chaan xute, leettsa lee xut zha gath. Nal kuthaa zha, tsa yaan re chaan zha lo’aa.” ³⁹ Tsa mzhen re zha xgann zha ne mloo zha xgann zha thib lad, ta nzhannt zha ne mbeth zha zha.

⁴⁰ Lee nal leettsa yaad zha kuu nak chaan fink, ¿kwan ntsow goo xgab, kwan tsow zha kon re zha kuu nzhan lo yu zha?

⁴¹ Lee re zha mkab ne nzhab:

—Kuth zha re zha'a, ne latta leettsoo zha ne zha re zha wenta, ne taa zha fink zha lo tedib net zha, tsa ke zha tsiiina, ne tsa taa re zha'a kuu ndoblo zha kaa zha leettsa gak yalgonn.

⁴² Tsa lee Jesús nzhab lo re zha:

—¿Chu ter lab goo lo xkeets Diox ta ten-zhee nzhab:
Lee ke kuu mlobi re zha kuu nta yuu thib lad,
leey nak thib ke kuu mas nataak kuu ndob skin yuu?

Lee Diox kuu nak Zha Nabee lo'aa mtsow koree;
ne mzegey leettsoo'aa ne'aa koree. [Sal. 118:22-23]

⁴³ Kona nin lo goo: Leettsoo goo nak diiz nabee Diox, per lee nal yiibelo goo ne kayaa tedib net re men tedib yeze, re mena si tetsow kuu nabee Diox. ⁴⁴ Ne lee zha kuu ral ke ree nii tats zha; ne os lee ke ree la dits thib zha, dita tsowe zha.

⁴⁵ Tsa lee re ngwleyy kuu nabee lo re ngwleyy ne re fariseo, myeen zha lee kwent nanzee ree nloo re kuu ntsow re zha. ⁴⁶ Kona leeka ora ngwalaaz re zha gaten zha Jesús, per nzeb re zha ne zha re men, tak lee re men nyelaaz lee Jesús nak profet chaan Diox.

22

Kwent nanzee chaan fandan (Lc. 14:15-24)

¹ Tsa mnika Jesús lo re men kon diiz nanzee, ne nzhab Jesús:

² —Nal tan tedib kwent. Leettsa nabee Diox leettsoo men, leey nak taxal thib rey kuu mtsow thib ani leettsa mtseyaa xgann rey. ³ Tsa mtaal rey re mos ya yachez re zha kuu naka diiz ya lo ani, ne lee re zha'a mzhyalt gaya lo ani. ⁴ Mbre rey mtaal tedib net mos, ne nzhab rey lo re mos: "Gwa goo ne guz lo re zha kuu naka diiz yaad lo ani, tsa yaad zha. Ne gab goo lo zha, mdexkwaa'a na kuu wu re zha kuu yaad lo ani, mbetha na ngon da ne re maa da kuu mas natsi, ne reta kuu nzi'a." ⁵ Per lee re zha kuu naka diiz yaad lo ani mzhyalt gayaad lo ani. Thib zha ndatwi lo yu, lee tedib zha nda lo negos, ⁶ ne lee tedib net zha mzen re mos rey, tsa mteti zha mos, ne mbeth zha re mos. ⁷ Ne or mbin rey kona, kwathoz mnayii rey ne mtaal rey re soldad rey ngwa mbeth re zha kuu nzhuth mena, ne mteyy rey laz re zha'a. ⁸ Tsa nzhab rey lo re mos rey: "Reta kuu nzi'a par yo fandan, per lee re zha kuu naka diiz yaad, ndoblot zha yaad zha. ⁹ Gwa goo re net to ne guz gooy lo reta zha kuu tsaal goo, tsa yaad zha lo fandan." ¹⁰ Tsa lee re mos mroo ngwa re neta, ne mrez mos reta zha kuu mwii mos, zha wen

ne zha went; tsa lee yuu ta yo fandan mze nzo re men.

¹¹ Tsa lee rey mndaab leen yuu, ne mwii rey lo re zha kuu mrez rey yaad fandan, tsa mwii rey thib mbyi kuu ndob tyu, kuu nogt lar kuu nzrok re zha kuu nya lo fandan.

¹² Tsa nzhab rey lo zha'a: "Amig, ¿xomod mndaaba nzhee ne nogta lar kuu nzrok re zha kuu nya fandan?" Ne lee zha'a mkabt neeka thib lan diiz. ¹³ Tsa nzhab rey lo re mos rey: "Bliib goo nii zha ne yaa zha, ne bloo goo zha lee ta kwathoz nakow na, tyu gonn zha ne tub zha keley zha". ¹⁴ Tak kwathoz zha mrez Diox per lut zha mli Diox.

Yalnaabdiz chaan chu ndoblo kix zha temi chaan yezlyu lo César

(Mr. 12:13-17; Lc. 20:20-26)

¹⁵ Tsa ndya re fariseo, ne ngwa re zha mndediz zha ne myaan zha diiz, naa xomod tsow zha gab Jesús thib kuu went, par tak keki zha Jesús. ¹⁶ Tsa mtaal zha chop tson re zha zha kuu ngeteed lo zha, ne chop tson zha Herodes, tsa lee re zha'a nzhab:

—Maestr, ne nee wli kuu ni'a, ne nali nloo'a xnet Diox lo re men taxal ndobloy, yewal ni'a lo reta men ne ngwiita chu nataak zha o nataagt zha. ¹⁷ Kona lu ne, kwan ndoblo nee tsow nee: ¿Chu ndoblo kix nee lo zha kuu ntsow kobral temi chaan yezlyu, kuu nhax lo zha Roma, o ndoblot nee kix neey?

¹⁸ Per lee Jesús ne'a went nak xgab re zha, kona nzhab Jesús lo re zha:

—¡Zha nkedi nak goo, zhaa kuu mbez ne zhaa kuu ntsow goo, nlaaz goo naabdiz goo kuu wli per went nak goo! ¿Chebee tabaa mod nkwaan goo ten goo na? ¹⁹ Bloo goo thib temi kuu ngix goo lon.

Tsa mloo zha thib temi lo Jesús. ²⁰ Ne or mwii Jesús loy, tsa mnaabdiz Jesús lo re zha:

—¿Cho lo ne cho le nke loy?

²¹ Lee re zha mkab ne nzhab:

—Chaan César kuu nabee Roma.

Tsa nzhab Jesús lo re zha:

—Taa goo lo César kuu ndoblo César, ne taa goo lo Diox kuu ndoblo Diox.

²² Leettsa mbin re zha koree, kwathoz mzegey leettsoo re zha xa mkab Jesús, tsa mlaa re zha Jesús ne ndya zha.

Yalnaabdiz chaan yalroban

(Mr. 12:18-27; Lc. 20:27-40)

²³ Leeka wiza lee chop tson zha saduceo, re zha kuu nyelaazt lee re zha nguth roban, mnaabdiz lo Jesús ne nzhab:

²⁴ —Maestr, lee Moisés mkeey lo xkeets Diox: "Os le thib mbyi kuu mtseyaa gath, ne mkenot mbyi neeka thib zhiinn mbyi, tsa lee wets mbyi ndoblo tseyaa kon ngot mbyi, tsa keno wets mbyi thib zhiinn mbyi kuu ngutha, tsa gak zhiinn wets mbyi taxal raz chaan mbyi kuu ngutha". [Dt. 25:5] ²⁵ Thib

welt ngoo gaz wets zha; lee zha ner mtseya ne nguth, ne mkenot zha neeka thib zhi-inn zha, tsa lee tedib wets zha mtseya kon ngota.²⁶ Leeka tata mzhaak zha'a, ne tataka mzhaak zha myon; ne tataka mzhaak reta gazta wets zha.²⁷ Bluz leettsa ngwalu nguth re zha, noga ngot nguth.²⁸ Kona os lee re men roban, *¿cho gak tsaa ngota, tak re gazta wets zha mtseya kon ngota?*

²⁹ Jesús mkab lo re zha ne nzhab:

—¡Thitanax ngoobeet goo! Nyent goo re kuu nke lo ley chaan Moisés, ne neeka nlebeet goo yalney chaan Diox.³⁰ Leettsa lee re zha nguth roban, neeka mbyi ne neeka ngot tseyat raa, sinke lee re zha gak taxal re mandad chaan Diox kuu nzo yibaa.³¹ Perleen ni lo goo, wlipaa lee re zha nguth teroban. *¿Chu ter lab goo lo xkeets Diox, ta leeka Diox nzhab kwent chaan re zha nguth:*³² “Na nak Diox chaan Abraham, Diox chaan Isaac ne Diox chaan Kob”? [Ex. 3:6] ¡Lee Diox nagt Diox chaan re zha nguth, lee Diox nak Diox chaan re zha nabban!

³³ Leettsa mbin re zha koree kwathoz mzegey leettsou re zha xa mllo Jesús.

Diz kuu mas nataak

(Mr. 12:28-34)

³⁴ Ne leettsa mbin re fariseo lee Jesús mtow roo re zha saduceo, tsa mkaltaa re fariseo.³⁵ Tsa lee thib zha kuu nak maestr kuu nloo ley chaan Moisés, mnaabdzib thib kwaa lo Jesús, tsa naa chu tab Jesús thib kuu ndoblot, ne nzhab zha:

³⁶ —Maestr, *¿cho diz kuu mas nataak lo ley chaan Moisés?*

³⁷ Tsa lee Jesús nzhab lo zha:

—“Ke leettsou Diox kuu nabee lo'a kon dib ndroo leettsoa', kon dib yalnabana, ne kon dib xgaba”. [Dt. 6:5]³⁸ Koree nak kuu ner ne kuu mas nataak.³⁹ Ne lee tediibe mer lalka nak: “Ndoblo ke leettsoa' tabena taxal nke leettsoa' lu”. [Lv. 19:18]⁴⁰ Ne os lee'a ntoswa ropta koree, ngetswa reta kuu nzhab lo ley chaan Moisés ne reta kuu nzhab re profet.

¿Cho zhiinn nak Crist Kuu Mtaal Diox Nabee?

(Mr. 12:35-37; Lc. 20:41-44)

⁴¹ Ne or lee re fariseo bee nzika,⁴² tsa mnaabdzib Jesús lo re zha, ne nzhab Jesús:

—¿Kwaan ntosw goo xgab kwent chaan Crist Kuu Mtaal Diox Nabee? *¿Cho lo raz ndyaad Crist Kuu Mtaal Diox Nabee?*

Ne lee re zha mkab ne nzhab:

—Lo raz David ndyaad zha.

⁴³ Tsa lee Jesús nzhab:

—Os tata nake, xomod leettsa mban rey David ndala lee Mbi Nayon mtsow lee David, nzhab Zha Nabee lo Crist, tenzhee mkee David:

⁴⁴ Lee Diox kuu nak Zha Nabee,

nzhab lo Zha Nabee lon:

“Btob lad ban lon,

asta tsow'n lee'a gak nabee lo reta zha kuu nayii ne'a,

ne tobxub zha lo'a”. [Sal. 110:1]

⁴⁵ ¡Xomod tak gak Crist xgann David, os Zha Nabee nzhab David lo Crist?

⁴⁶ Ne neeka thib zha ngogt gakab thib lan diiz lo Jesús. Ne desde tyatha, yent raa cho mye leettsou ganaabdiz raa lo Jesús.

23

Jesús mkeki re maestr kuu nloo xkiiz Diox ne re fariseo

(Mr. 12:38-40; Lc. 11:37-54; 20:45-47)

¹ Bluz lee Jesús nzhab lo re men, ne lo re zha kuu ngeteed lo Jesús:

² —Lee re maestr kuu nloo xkiiz Diox ne re fariseo, ndak zha beeta lee zha nap yalnabee, tak ne zha naa xomod nak ley chaan Moisés.³ Kona bin goo re kuu ne btsow goo re kuu ni zha. Per tsowt goo taxal ntsow zha, tak zhaa kuu mbez zha ne zhaa kuu ntsow zha.⁴ Ntsib zha re kuu ne dits re men, kuu neeka gagt gwe men, ne lee zha neeka kwen yaa zha ndiinnt zhay.

⁵ Reta kuu ntsow zha, ntsow zhay tsa wen wii re men lo zha. Nyow leettsou zha ke lut xkiiz Diox yeklo zha ne yen yaa zha. Nyow leettsou zha ntsow nol zha lozh xab zha, tsa wii re men zha taxal zha ro.⁶ Nyow leettsou zha tob zha ta mas nataak leettsa nyoo ani, ne ta mas nataak ta nkaltaa'a anteadaa xkiiz Diox.⁷ Ne nyow leettsou zha kiits re men yek men lo zha, or ni re men “diox” lo zha lo xbi, ne kwathoz wen nzo leettsou zha nkiits re men yek men lo zha ni re men “maestr” lo zha.

⁸ Per lee goo, ndoblot tsow goo tsa ni re men maestr lo goo, tak thibka maestr nap goo ne wets goo re goo.⁹ Ne nit goo xut goo lo neeka thib zha yezlyu, tak thibka xut goo kuu ndob yibaa nap goo.¹⁰ Ne ndoblot ni re men lo goo, “lee goo nak zha kuu nloo xkiiz Diox” tak beeta na Crist Kuu Mtaal Diox Nabee, nak kuu nloo lo goo.¹¹ Tak lee zha kuu mas nataak lo re goo, zha'a ndoblo lortsin lo re goo.¹² Tak lee zha kuu leeka lee ntosw naro, tetsin thib wiz lee zha'a thoy; ne lee re zha kuu nadoo nak, tetsin thib wiz lee zha'a gak zha nataak.

¹³ ¡Aka kwathoz nati rid goo maestr kuu nloo xkiiz Diox, ne re goo zha fariseo! ¡Zha nkedi nak goo, zhaa kuu mbez ne zhaa kuu ntosw goo! Kuu ntosw goo nak taxal thib zha kuu ntow roo yuu lo tedib zha, tsa gagtab zha. Nlaat goo nabee Diox leettsou re men, ne neeka goo nlaazt goo nabee Diox leettsou goo.

¹⁴ ¡Aka kwathoz nati rid goo maestr kuu nloo xkiiz Diox ne goo zha fariseo! ¡Zha

nkedi nak goo, zhaa kuu mbezz ne zhaa kuu ntsow goo! Tak nkib goo liz re ngot byud, ne par kaats goo kuu ntsow goo, nol ndediz goo lo Diox. Kona mas nathoz yalti kuu rid re goo.

¹⁵ ;Aka kwathoz nati rid goo maestr kuu nlloo xkiiz Diox ne re goo zha fariseo! ;Zha nkedi nak goo, zhaa kuu mbezz goo ne zhaa kuu ntsow goo! Ndiy goo dita lo yezlyu ne ndriid goo lo nitdoo, nkwaan goo re zha kuu nagt zha Israel, tsa teteed goo zha re leyy goo, ne leettsa nyelo nteteed goo zha, ntsow goo nzhab zha chop welt mas nakap nake goo kuu ndya gabil.

¹⁶ ;Aka kwathoz nati rid goo, zha kuu nlaaz loo net lo tedib syeg taxal goo! Tak mbezz goo: "Os lee thib zha ntselo kruz por gwodoo, par tsow zha thib trat, yent pa nataak kona. Per os lee zha ntselo zha kruz por kuu nzo leen gwodoo, konasi nataak ne ndoblo tsow zha kuu mtselo zha kruz." ¹⁷ ;Zha bxen ne zha syeg! Mas nataak gwodoo nake or, tak por gwodoo nayon or kuu nzo leen gwodoo. ¹⁸ Ne noga mbezz goo: "Os cho zha ntselo kruz por bkoog par tsow zha thib trat, nataagte. Per os lee zha ntselo zha kruz por gon kuu nzib lo bkoog, konasi nataak ne ndoblo tsow zha kuu mtselo kruz zha." ¹⁹ ;Zha bxen ne zha syeg! Mas nataak bkoog, tak por bkoog nayon re gon. ²⁰ Kona lee zha kuu ntselo kruz por bkoog, ntselot zha beeta por bkoog, noga ntselo zha por reta kuu nzib lo bkoog. ²¹ Ne lee zha kuu ntselo kruz por gwodoo chaan Diox, ntselot zha beeta por gwodoo, noga ntselo zha kruz por Diox. ²² Leeka tata, lee zha kuu ntselo kruz por yibaa ta ndob Diox, ntseloga zha por ta ndob Diox, ne por Diox, kona ndoblo tsow zha kuu nzhab zha.

²³ ;Aka kwathoz nati rid goo maestr kuu nlloo xkiiz Diox ne goo zha fariseo! ;Zha nkedi nak goo, zhaa kuu mbezz goo ne zhaa kuu ntsow goo! Tak ndaa goo tsii part re chaan goo gon lo Diox, ne asta re bthyon xtil, re komin ne relota yizh kwaan kuu nyetle komid. Per nhont goo diiz re diiz kuu mas nataak lo xkiiz Diox, kuu nak: Tsow goo re kuu nali lo re men, blat leettsoo goo ne goo taben goo, ne btsow goo kuu ni goo. Re koree nak kuu ndoblo tsow goo, ne btsowka goo tedib net re kona. ²⁴ ;Goo nak taxal zha syeg kuu nlloo net lo re zha kuu nak taxal syeg; ngoo goo mzhuz leen nit kuu nzhuu goo, per nyeent goo ngab goo dib kamey!

²⁵ ;Aka kwathoz nati rid goo maestr kuu nlloo xkiiz Diox ne re goo zha fariseo! ;Zha nkedi nak goo, zhaa kuu mbezz goo ne zhaa kuu ntsow goo! Tak wen wen nteech goo dits yann ne dits bas, ne lee leen leettsoo goo tseta nzo re kuu went: yalwann ne yaltablaaz. ²⁶ ;Fariseo syeg! Ner blaa goo

mod went kuu nak goo, kona nak taxal ntembi goo leen bas ne leen yann, tsa noga ditse gak nambi.

²⁷ ;Aka kwathoz nati rid goo maestr kuu nlloo xkiiz Diox ne re goo zha fariseo! ;Zha nkedi nak goo, zhaa kuu mbezz ne zhaa kuu ntsow goo! Goo nak taxal thib roo baa kuu naguz na dits, per lee leene tseta nzo tsidh re zha nguth, ne nzo re kuu nambit. ²⁸ Tbaa nak goo; kwathoz wen ntsow goo leettsa ngwii re men lo goo, per lee leen leettsoo goo tseta nzo yalrub ne re kuu kwathoz went.

²⁹ ;Aka kwathoz nati rid goo maestr kuu nlloo xkiiz Diox ne re goo zha fariseo! ;Zha nkedi nak goo, zhaa kuu mbezz goo ne zhaa kuu ntsow goo! Tak ndexkwaa goo almirroo baa chaan re profet kuu ngoo ndala, ne re roo baa chaan re zha kuu nali, re zha kuu mtsow kuu wen,³⁰ ne ni goo: "Os lee'aa gabanaa, leettsa mban re teyaa zha ndala, gatsowtaa ayud re teyaa leettsa mbeth re teyaa re profet kuu ngoo ndala, ne tataga ntsow goo". ³¹ Ne kon kuu mbezz goo, leeka goo nyeen goo lee re goo nak zha raz chaan re zha kuu mbeth re profet. ³² Baa btelo btsow goo goo re kuu mindelo re tey goo zha ndala.

³³ ;Goo nak zha nakap nak taxal mbeel! ;Xomod laa goo lo yalti, goo kuu ndya gabil? ³⁴ Kona lee na taal profet lo goo, re zha kuu nap yalnzaak ne re maestr. Ne lee re goo kuth thib re zha'a, ne kee goo zha lo kruz, ne lee techop tson zha kin goo, ta nkaltaa re'aa nteedaa xkiiz Diox, ne reke goo dits zha thib yez ne tedib yez. ³⁵ Kona goo ndab ren chaan re zha nali, re zha kuu nguth ndala. Ren chaan Abel kuu mbeth zha ner, ne asta ren chaan Zacarí xgann Berequías, kuu mbeth zha xtow bkoog ne gwodoo. ³⁶ Wlipaa na nin lo goo, lee re men tyemp ree ndab re falt kuu mtsow re zha'a.

Jesús mbinn por yez Jerusalén (Lc. 13:34-35)

³⁷ ;Zha yez Jerusalén, zha yez Jerusalén, goo kuu nzhuth ne nkee ke yek re profet, re Zha Kuu Mtaal Diox Nabee lo goo! Tyen welt ngwalaz'n gakaltaan re zhiinn goo, taxal nkaltaa ngid re zhiinn ngid xann xiiil ngid, per mzhylat goo. ³⁸ Wii goo, lee liz goo yaan wan. ³⁹ Ne leen ni lo goo, desde nalar wiit raa goo na, asta leettsa tsin wiz kuu bretab'n, tsya gab goo: "¡Aka wen nak zha kuu ndyaad kon le Zha Nabee!"

24

Jesús nzhab lee gwodoo Jerusalén lux (Mr. 13:1-2; Lc. 21:5-6)

¹ Leettsa lee Jesús mroo lee roo gwodoo ndya, tsa lee re zha kuu ngeteed lo Jesús

mbig lo Jesús, ne mloo zha re bla gwodoo lo Jesús. ²Tsa lee Jesús mkab ne nzhab:

—¿Chu nloo re koree lo goo? ¡Wlipaa na nin lo goo, neeka thib re ke ree yaante dits tedibe, reta koree lux!

*Re seny kuu loo leettsa lux yezlyu
(Mr. 13:3-28; Lc. 21:7-24; 17:22-24)*

³Ne nda re zha yek yii Olib, tya mndob Jesús, tsaa lee re zha kuu ngeteed lo Jesús mbiglo Jesús, ne mnnaabdiz zha lo thita Jesús ne nzhab zha:

—Nlaaz nee ne'a lo nee, ¿pol gak re koree ne cho seny loo leettsa yaada tedib welt, leettsa lux yezlyu?

⁴Tsa lee Jesús mkab ne nzhab:

—List gwatsin goo, tsaa neeka thib zha kedit goo, ⁵tak kwathoz zha yaad ne: “Na mkayaa yalnabee lo Jesús”. Ne noga ne zha: “Na nak Crist Kuu Mtaal Diox Nabee”, ne kedi zha kwathoz men. ⁶Per leettsa gon goo lee zhoo nzo nzhee ne baa na, ne gon goo tooraa zhoo, tsebt goo, tak tata ndoblo gake; per naagt re kona kuu lux yezlyu. ⁷Lee thib yez yo kon tedib yez, ne thib nación yo kon tedib nación, ne kwathoz ta la win ne gwin zho thoz. ⁸Leettsa gak reta koree, penta telo yalti kuu rid men.

⁹Tsa taa zha goo lo re zha kuu nak tsii, par teti zha goo, kuth zha goo ne reta zha yii ne goo, tak nyelaaz goo na. ¹⁰Ne lee re wiza kwathoz zha laa na, ne yii zha ne zha thib zha ne tedib zha, ne kedi zha thib zha ne te-dib zha. ¹¹Kwathoz zha kuu wlit nak profet yaad ne: “Lee na nak profet Diox”, ne kedi zha kwathoz men. ¹²Ne tak kwaro yo kuu went, kona naroob zha ket raa leettsoo zha altaa zha. ¹³Per lee zha kuu xek, asta yelo rid reta koree, zha'a tsow gan yalnaban kuu thitanax. ¹⁴Ne ditta lo yezlyu taa zha kwent Diiz Chul, kwent chaan xomod Nabee Diox leettsoo re zha Diox, tsa reta men reta yez gone; tsaraa lee yezlyu lux.

¹⁵Ne leettsa wii goo lee thib kuu kwathoz nakap kwib ta ndoblote kwibe, taxal nzhab profet Daniel zha ndala. (Loka cho nlab koree ndoblo zha yen koree.) ¹⁶Tsa lee re zha yezlyu Judea ndoblo zhonn ne ya net yii. ¹⁷Ne lee zha kuu ndob yek yuu, ndoblot raa zha ya zha leen liz zha par koo zha thib chaan zha. ¹⁸Ne lee zha kuu ndo wan ndoblot raa bretab zha xit zha xab zha. ¹⁹Aka kwathoz nati rid re ngot kuu nzo zhiinn wiza, ne re ngot kuu nap mbeddoo. ²⁰Naab goo lo Diox, tsa gagt re koree re mbee kuu kwathoz nla yig, ne neeka gagte wiz sabd. ²¹Lee re wiza gak thib wiz kuu kwathoz rid re men yalti, kuu neeka mas ter yo desde leettsa terka texkwaa Diox yezlyu, ne neeka yot raay bluz. ²²Ne os lee Zha Nabee gatsow nadopt re wiza, neeka thib

zha laat lo yalti'a. Per mtsow nadop zhay, tak nke leettsoo zha re zha kuu mli zha.

²³Ne lee re wiza, os lee thib zha ne lo goo: “Wii goo, lee Crist Kuu Mtaal Diox Nabee ndo nzhee, o ne zha lee zha ndo baa”, yelaazt gooy, ²⁴tak yaad re zha kuu kedi. Ne lee re zha'a ne: “Na nak Crist Kuu Mtaal Diox Nabee”, ne lee tedib net zha ne: “Na nak profet chaan Diox”, per wlit zhay. Ne tsow zha re kuu thoz par kedi zha re men, ne asta re zha kuu mli Diox kedi zha, os take lo zha, per gagt tsow zhay. ²⁵Lee nal ni'a na re koree lo goo. ²⁶Kona os lee zha ne zha lo goo: “Gwa goo. Lee Crist ndo yubiz”, yat goo, ne os lee zha ne zha lo goo: “Lee Crist nzogaats nzhee”, yelaazt gooy. ²⁷Tak leettsa yal na, Kuu Mzin Ngok Men, gake taxal bel bti kuu nkkee xni ta nlen wiz ne nkkee xni asta ta mbix wiz, tata yal'n. ²⁸Tak ta nax maa nguth, tya nkaltaa re ngol.

Xomod bretab Jesús

(Mr. 13:24-37; Lc. 21:25-33; 17:26-30, 34-36)

²⁹Leettsa yelo yezhoob wiz kuu rid reta zha yalti, tsaa lee wiz ne mbree taat raa xni, ne lee re mbel rethinh lobee ne lee re kuu nzo lobee zhiit. ³⁰Tsa lee seny chaan Zha Kuu Mzin Ngok Men loo lobee ne looy lo reta men lo yezlyu ree. Ne re men reta raz lo yezlyu gonn zha, leettsa wii zha lee na yal xid xkow lobee. Ne wii zha lee na nabee kon kwathoz yalnabee ne yal'n xid xni thoz. ³¹Tsa taal'n re mandad da, ne dib gan zha kwez zha trompet, ora lee re mandad da kaltaa re zha kuu mlin dib naxta lo yezlyu, desde thib lad lo yezlyu ne asta tedib lad lo yezlyu.

³²B'teed goo lo ya ig. Leettsa lee re zhite ndelo nla bzhits, ne ntsetab lay, tsa ne goo lee mbee beyi ndetsin gaxa. ³³Leeka tata, leettsa ne goo lee re koree ngeyak, tsa ne goo lee na, Kuu Mzin Ngok Men, mera bretab'n. ³⁴Wlipaa na nin lo goo, reta koree gak. Tsaraa gath re men tyemp ree. ³⁵Lobee ne yezlyu telux, per lee xkiz'n ridt; leechay gake.

³⁶Neeka thib zha net polar tsin wiza, neeka re mandad chaan Diox nete, neeka na, Kuu Mzin Ngok Men nete. Beeta Xut'n ney.

³⁷Leeka taxal ngok re wiz leettsa mban Noé, tataka gak leettsa bretab na, Kuu Mzin Ngok Men. ³⁸Re wiz kuu mban Noé, leettsa terka la yi thoz lo yezlyu ne asta wiz kuu lee Noé mndaab leen bark, lee re men nzi nzhuu ne nhzow ne ntseyaa ne ndaa zha yalntseyaa. ³⁹Per thitanax mtsowt zha xgab lee yi la luuz zha, tsa lee yi mndelo mla, ne mluux nit re zha. Tataka gak leettsa yal na, Kuu Mzin Ngok Men. ⁴⁰Ne wiza, lee chop mbyi ya wan, thib zha teno zha yibaa ne lee

tedib zha yaan. ⁴¹ Ne chop ngot ngetoo lo molin; thib ngot teno zha yibaa ne lee tedib ngot yaanka.

⁴² Kona thibka list gwatsin goo, tak net goo pol yal'n par tenon goo, Na Zha Nabee lo goo. ⁴³ Per ndoblo yen goo koree: Os lee thib zha kuu nak mndan thib yuu, ne zha polar la wann liz zha, tsa lowann wann chaan zha, gatta zha ne laat zha lowann wann chaan zha. ⁴⁴ Kona noga goo list gwatsin goo tsa tenon goo, tak lee na, Kuu Mzin Ngok Men, yal'n wiz kuu ntsowt goo xgabe.

*Mos wen ne mos went
(Lc. 12:41-48)*

⁴⁵ '¿Cho nak mos kuu ngobee? Lee mos kuu ngobee nak mos kuu mtaan patron lis patron, tsa taa mos kuu wu tedib net re mos, or kuu ndoblo taa zhay. ⁴⁶ Kwathoz wen nda mos kuu ngetsow kuu mnabee patron mos, leettsa lee patron bretab. ⁴⁷ Wlipaa na nin lo goo, lee patron taan mos tsa nabee mos lo reta kwaan nap patron. ⁴⁸ Per os lee mos patron nak thib mos kuu ngobee, ne tsow mos xgab: "Lee patron bretab lijer", ⁴⁹ ne telo mos kin mos re mos patron, ne telo mos wu mos ne gu mos kon re zha kuu nke yalgwiy. ⁵⁰ Ne wiz kuu ndat leettsou mos, ne or kuu ntsowt mos xgab lee patron tsin. ⁵¹ Tsa kwathoz teti patron mos, ne taal patron mos ta nzo re zha nkedi, re zha kuu zhaa kuu mbez ne zhaa kuu ntsow, ne ty a gonn mos ne tub mos keley mos.

25

Kwent nanzee chaan tsii mndyeen got

¹ 'Nal leen ta tedib kwent lo goo, tsa ne goo naa xomod nabee Diox leettsou men. Leey nak taxal tsii mndyeen got, kuu mroo mzhens kandil, tsa kwet mndyeen kayaa mndyeen mbyi kuu tseyea. ² Gaay mndyeen ngobee list nzi ne lee tedib gaay mndyeen ngobee. ³ Lee re mndyeen kuu ngobee, mzhens mndyeen kandil mndyeen, per mbet mndyeen masraa aseyt par yo leen kandil mndyeen. ⁴ Per lee tedib gaay mndyeen kuu ngobee, mzhens mndyeen kandil mndyeen ne mbe mndyeen aseyt, par tse kandil mndyeen. ⁵ Ne lee zha kuu tseyea mzent lijer, tsa reta mndyeen mzhens mkaal ne mdat. ⁶ Ne teeka ngulal yaal mbin re mndyeen thib bos kuu nzhab: "Lee zha kuu tseyea ndyaada, broo goo kayaa goo zha". ⁷ Tsa lee re mndyeen ngwache ne mtexnet mndyeen kandil mndyeen. ⁸ Tsa lee re gaay mndyeen kuu ngobee rtiz list, nzhab lo re gaay mndyeen kuu list nzi: "Taa goo lut aseyt goo kaa nee, tak lee kandil nee nlazaay yuyy". ⁹ Per lee re mndyeen kuu ngobee nzhab: "Taat neey, tak cha gaate lortsin nee ne neeka gaate lortsin goo. Mas wen gwa goo ta ntho zhay ne bzhi goo chaan

goo." ¹⁰ Per leettsa lee re gaay mndyeen kuu ngobee ndati aseyt, lee zha kuu tseyea mzin, ne lee re gaay mndyeen kuu ngobee list nzi mkayaa zha kuu tseyea, ne mndaab re zha leen yuu ta ngoo fandan, ne lee roo pwert myoww. ¹¹ Bluz tsaraa mzin re mndyeen kuu ngobee, ne nzhab mndyeen: "Zha Nabee, Zha Nabee, xaal roo pwert par tab neel!" ¹² Per lee zha mkab ne nzhab: "Wlipaa na nin lo goo, nlebeet'n goo".

¹³ Tsa lee Jesus mre nzhab:

—Kona list gwatsin goo, gatta goo, tak net goo wiz ne neeka or kuu yaad Zha Kuu Mzin Ngok Men.

*Kwent nanzee chaan temi
(Lc. 19:11-27)*

¹⁴ 'Nal tan tedib kwent nanzee lo goo, tsa ne goo xomod nak, leettsa lee Diox nabee leettsou men. Leey nak taxal thib mbyi kuu mera roo liz ya tit. Tsa mrez zha re mos zha ne mndaa zha temi zha ke mos tsiiin. ¹⁵ Lo thib mos mndaa zha gaay temi or, ne lee lo tedib mos mndaa zha chop temi ne lee lo tedib mos mndaa zha thibka temi, ne lo kadta thib mos mndaa zha taxalta kuu tak lo mos ke mos tsiiin. Ne mroo zha nda zha tit. ¹⁶ Tsa lee mos kuu mkayaa gaay temi, tsyaka mndelo zha mke zha tsiiin kon temi'a ne mtsow zha gan tedib gaay temi. ¹⁷ Leeka tata, lee mos kuu mkayaa chop temi, mndelo mos mke tsiiin kon temi'a, ne mtsow mos gan techop temi. ¹⁸ Per lee mos kuu mkayaa thibka temi, ndya mos ne mdaan mos lo yu ne ty a mkaats mos temi patron mos.

¹⁹ Kwathoz bluz tsaraa lee patron re mos mretab. Tsa mtsow patron kwent kon re mos. ²⁰ Ner mzin mos kuu mkayaa gaay temi, ne ndyaadno mos tedib gaay temi mas lo patron, ne nzhab mos: "Zha Nabee, lee gaay temi'a kuu mndaa'alon nzhee, ne noga tan tedib gaaye kuu mtsowe gan". ²¹ Tsa lee patron nzhab lo mos: "Wene, lu nak thib mos da kuu wen ne ngobee; ne tak wen mke'a tsiiin lo lut kuu mndan lo'a, lee nal mas naroobe tan lo'a. Btaab ne naley bloo leettsou'a kon na." ²² Tsaraa mzin mos kuu mkayaa chop temi, ne nzhab mos: "Zha Nabee, lee chop temi'a kuu mndaa'alon nzhee, ne lee kuu mtsowe gan nzhee". ²³ Tsa lee patron nzhab lo mos: "Wene, lu nak thib mos da kuu wen ne ngobee; ne tak wen mtsowa lo lut kuu mndan lo'a, lee nal mas naroobe tan lo'a. Btaab ne naley bloo leettsou'a kon na."

²⁴ 'Tsaraa mzin mos kuu mkayaa thibka temi, tsa nzhab mos lo patron: "Zha Nabee, nen lee lu nak thib zha kuu nakap, nzhanne ta nagt loyu'a, ne nthopa yalgonn ta mlota bin. ²⁵ Kona mzeb'n nen lu ne mkaats'n temi'a lo yu. Lee nal lee temi'a nzhee."

²⁶ Tsa lee patron mkab ne nzhab lo mos: "Lu nak thib mos kuu went ne kwathoz natsaab, tak ne'a lee na nzhann na ta nagt lo yu da, ne nthop'n yalgonn ta mlot'n bin.²⁷ Kona ndoblo gago'a temi da bank, tsa leettsa gabretab'n gagayaan temi da kon zhiinne."²⁸ Tsa nzhab patron lo re zha kuu nzi tya: "Kib goo temi lo zha, ne btaa gooy lo zha kuu nap tsiiy."²⁹ tak lee zha kuu nkeno naroobe, masraay kayaa zha, tsa keno zha masraay; per lee zha kuu yent kwan nap, asta lut kuu nap zha teyiibe lo zha.³⁰ Bzhen goo zha tsaab baa, ne bleibi goo zha par lee ta nakow na, tya gonn zha ne tub zha keley zha."

Leettsa naab Diox kwent lo reta men kuu nzo dib naxta lo yezlyu

³¹ 'Leettsa lee na, Kuu Mzin Ngok Men, yal'n xid xni thozi kon re mandad da, tsa tob'n ta nla xni thozi ta nabeen.³² Reta men kuu nzi dib naxta lo yezlyu kaltaa lon, ne koo zhann zha, taxal ngoo zhaa zha mbak zhiil xid re chib.³³ Ne tsa tsin re mbak zhiil da lad ban lon ne lee re chib tsin lad beg lon.³⁴ Tsa lee na zha kuu nak rey, gap'n lo re zha kuu nzi lad ban lon: "De goo zha kuu mkayaa re kuu wen lo Xut'n, bkayaa goo ta nabee Xut'n, ta mdexkwaa Xut'n par goo, asta leettsa mdexkwaa yezlyu.³⁵ Tak mlann na ne mndaa goo kuu ndow'n, mndob xyeeek leettsoon ne mndaa goo kuu ngwin, mndiy'n ne yent ta gabet'n ne goo mndaa ta mlet'n,³⁶ mkenot'n lar gok'n ne goo mndaa lar mdok'n, mzhak nen ne myaad goo lon mkenap goo na, ngoon tsib ne myadtwii goo lon."³⁷ Tsa lee re zha nali kuu nzi lad ban lon ne: "Zha Nabee, ¿pol mne nee lee'a mlann ne mndaa nee kuu ndowa? ¿Ne pol mne nee lee'a mndob xyeeek leettsoo ne mndaa nee kuu ngwii'a?³⁸ ¿Ne pol mne nee lee'a ndiy ne yent ta kwetta ne mndaa nee ta mletta? ¿Ne pol ne lee'a nkenot lar goka ne mndaa nee lar mndoka?³⁹ ¿Ne pol ne lee'a ne mzhaak ne ngwatwii nee lo'a? ¿Ne pol ngoo'a tsib ne ngwatwii nee lo'a?"⁴⁰ Tsa lee na zha kuu nak rey kab'n ne nin: "Wlipaa na nin lo goo, reta kuu mtsow goo lo re thib wets'n, tegal nagt zha zha nataak, lon mtsow gooy".

⁴¹ 'Tsa lee na zha kuu nak rey gap'n lo re zha kuu nzi lad beg lon: "Beche goo lon tak mlode'a Diox goo. Tyee goo gabil, ta thitanax nyuyyt ki, ta mdexkwaa Diox par Maxuuy ne par re mandad Maxuuy.⁴² Tak mlann na ne mndaa goo kuu gawun, ne mndob xyeeek leettsoon ne mndaa goo kuu gagun.⁴³ Mndiy'n yent ta gayoon ne mndaa goo ta gayoon. Mkenot'n lar gagok'n, ne mndaa goo lar gagok'n, mzhak nen ne myadtwii goo lon gakenap goo na, ne ngoon tsib ne myadtwii goo lon."⁴⁴ Tsa

lee re zha kab ne: "Zha Nabee, ¿pol mne nee lee'a mlann, nzheek leettsoo'a, ndiya yent ta gabela, ne yent lar gagoka, mzhak ne'a, ngoo'a tsib, ne mtsowt nee ayuda?"⁴⁵ Tsa kab'n lo re zha, ne gap'n: "Wlipaa na nin lo goo, reta kuu mtsowt goo lo thib re wets'n, tegal nagt zha zha nataak, neeka lon mtsowt gooy".⁴⁶ Reta zha'a ndya ta rid zha yalti thitanax, ne lee re zha kuu nali nak ndya tsow gan yalnaban kuu thitanax.

26

Myaan re zha diiz naa xomod ten zha Jesús

(Mr. 14:1-2; Lc. 22:1-2; Jn. 11:45-53)

¹ Leettsa ngwalo nzhab Jesús reta koree, tsa nzhab Jesús lo re zha kuu ngeteed lo Jesús:

² —Reta goo ne, nzhab falt chop wiz gak ani Paskw, lee na Kuu Myaad Ngok Men, taa zha na lo re zha nak tsiiin par kee zha na lo kruz.

³ Ne re wiza lee re ngwleyy kuu nabee lo re ngwleyy, ne re zha gol zha Israel, mkaltaa re zha liz Caifás kuu nak ngwleyy kuu nabee lo reta ngwleyy. ⁴ Ne myaan re zha diiz naa xomod ten zha Jesús xlaanta, ne kuth zha Jesús. ⁵ Per lee re zha nzhab:

—Tsowtaay lo ani, tsa yiit re men ne'aa.

Thib ngot mlath aseyt kuu chul ndetsiyek Jesús

(Mr. 14:3-9; Jn. 12:1-8)

⁶ Tsa nda Jesús yez Betania liz Simún kuu mzhaak yiz kuu nteyaaaz kwerp zha.⁷ Tsa mbig thib ngot kuu ndyaadno thib bot ke kuu le alabastr, kuu tseta nzo aseyt kuu kwathoz chul ndetsi ne kwathoz naap. Ne leettsa lee Jesús ndoh roo mes, lee ngota mlath aseyt yek Jesús.⁸ Leettsa mwii re zha kuu ngeteed lo Jesús kona, tsa mnayii re zha ne mendelo zha mbeza zha:

—¿Chebee tbaata mlux koree?⁹ Ngok gadoy naap, ne garoo temi gataa lo re zha prob.

¹⁰ Jesús mbin koree, kona nzhab Jesús:

—¿Chebee ntsalzhoo goo ngot ree? Lee kuu mtsow ngot lon nak thib kuu wen.

¹¹ Tak lee re zha prob thibka nzi kon goo, ne tak tsow goo wen lo zha leettsa nlaaz goo, per lee na ndot'n lo goo thibka.¹² Lee ngot ree mtsow kuu tak lo ngot tsow ngot, mloo ngot aseyt kwerp da leettsa terka kaats zha na.¹³ Wlipaa na nin lo goo, dita lo yezlyu ta taa zha kwent Diiz Chul chaan da, noga teteth zha kuu mtsow ngot ree, tsa telaaz zha ngot.

Lee Judas myaan diiz kon re zha kuu nayii ne Jesús

(Mr. 14:10-11; Lc. 22:3-6)

¹⁴ Judas Iscariote, kuu nak thib zha lo re tsibchop zha kuu ngeteed lo Jesús, ngwa lo

re ngwleyy kuu nabee lo re ngwleyy. ¹⁵ Ne nzhab Judas lo re zha:

—¿Plal kix goo kan, tsa tan Jesús lo re goo?

Tsa myaan re zha diiz, ne mndaa zha galbstsi temi plat lo Judas.

¹⁶ Ne leeka ora lee Judas mkwaan naa xomod taa Judas Jesús lo re zha'a.

Rtsee bluz kuu ndow Jesús

(*Mr. 14:12-25; Lc. 22:7-23; Jn. 13 :21-30; 1Co.11 :23-26*)

¹⁷ Ne lee wiz ner ani Paskw, ani kuu nzhown zha pan kuu nyoot lebadur, lee re zha kuu ngeteed lo Jesús mbig ne mnaabdiz lo Jesús ne nzhab:

—¿Pa nlaaza texkwaa nee rtsee Paskw dow rtsee'aa?

¹⁸ Lee Jesús mkaab ne nzhab:

—Gwa goo yez, liz thib zha kuu nlebeen, ne gab goo lo zha: “Lee maestr ne: Mzin gaxa or da. Liza wun rtsee chaan Paskw kon re zha kuu ngeteed lon.”

¹⁹ Tsa lee re zha kuu ngeteed lo Jesús mtsow zha taxal nzhab Jesús lo zha. Ne mdexkwaa zha rtsee Paskw. ²⁰ Ne leettsa ngoo yaal yezlyu, lee Jesús ndob roo mes kon re tsuibchop zha kuu ngeteed lo Jesús. ²¹ Ne leettsa ngeyow rtsee re zha, nzhab Jesús:

—Wlipaa na nin lo goo, leeka thib goo tan lo re kuu nayii nen.

²² Tsa lee re zha kuu ngeteed lo Jesús kwathoz nabil ngoo leettsou zha, ne mndelo zha mnaabdiz zha thibga thibga zha lo Jesús, ne nzhab zha:

—¿Chu nay? Zha Nabee.

²³ Jesús mkaab ne nzhab:

—Thib zha kuu ntenit pan leen thibka yann kon nay, zha'a taan lo re zha kuu nayii nen. ²⁴ Lee na Kuu Mzin Ngok Men, ndoblo rid'n kwathoz yalti taxal nzhab lo xkeets Diox, per kwathoz nalatt rid zha kuu taan lo re zha kuu nayii nen. Mas wen gagalt zha'a.

²⁵ Tsa lee Judas kuu mndaa Jesús lo re zha kuu nayii ne Jesús, mnaabdiz ne nzhab lo Jesús:

—Maestr, ¿chu nay?

—Lu ney —nzhab Jesús.

²⁶ Ne leettsa ngeyow rtsee re zha, lee Jesús mzen pan, ne mndaa Jesús texkix lo Diox, ne mtsow rol Jesús pan, ne mndaa Jesús pan lo re zha kuu ngeteed lo Jesús, ne nzhab Jesús:

—Dow goo, koree nak beel da.

²⁷ Tsaraa mzen Jesús bas kuu nzo xit ub ne mndaa Jesús texkix lo Diox, ne mriid Jesús bas lo re zha kuu ngeteed lo Jesús, ne nzhab Jesús lo re zha:

—Wii goo xit ub kuu nzo leen bas ree.

²⁸ Koree nak ren da, ne leey nloo wli nak trat kub kuu mtsow Diox lo goo. Leey xon tsa tuy'n falt kwathoz men. ²⁹ Per wlipaa

na nin lo goo, gut raa na xit ub ree, asta wiz kuu leettsa gun kuu kub kon re goo ta nabee Xut'n.

Jesús nzhab lo Pey: “Lu gab nlebeeta na”
(*Mr. 14:26-31; Lc. 22:31-34; Jn. 13 :36-38*)

³⁰ Bluz leettsa ngwalo mbil re zha thib himn, tsa mroo re zha nda zha yek yii Olib.

³¹ Tya nzhab Jesús lo re zha kuu ngeteed lo Jesús:

—Nal yaal ree lee re goo laan, tak lee lo xkeets Diox nzhab: “Kuth'n zha kuu nkenap mbak zhil, tsa lee re mbak zhil raats”. [Zac. 13:7] ³² Per bluz leettsa roban na, ner'n ya lo re goo yezlyu Galilea.

³³ Tsa lee Pey nzhab lo Jesús:

—¡Tegal reta zha laa lu, per lee na thitanax lat'n lu!

³⁴ Lee Jesús nzhab lo Pey:

—Wlipaa na nin lo'a, leeka nal yaal ree, or terka kwez ngite, lee'a gab tson welt nlebeeta na.

³⁵ Tsa lee Pey nzhab:

—Tegal gath'n kon lu, per gabt'n nlebeet'n lu.

Ne reta re zha kuu ngeteed lo Jesús leeka tata nzhab zha.

Jesús mndediz lo Diox leen alo Getsemani
(*Mr. 14:32-42; Lc. 22:39-46*)

³⁶ Tsa nda Jesús kon re zha kuu ngeteed lo Jesús leen alo Getsemani, ne nzhab Jesús lo re zha:

—Nzhee brin goo, leen nda tediz lo Diox baa.

³⁷ Ne ndano Jesús Pey, ne rop xgann Zebedeo kuu nak Juan ne Santiag, tsa mndelo mndebi leettsou Jesús ne nalatt ngoo leettsou Jesús. ³⁸ Tsa nzhab Jesús lo re yon zha:

—Kwathoz nalatt nzo leettsoon, taxal zha ndeyatha. Yaanka goo nzhee ne gatta goo tsa wii goo kuu gak.

³⁹ Tsa lee Jesús nda tut kwat, ne mto-bxub Jesús asta mdiinn yeklo Jesús lo yu, ne mndediz Jesús lo Diox, ne nzhab Jesús:

—Xut'n, os leey take, btelaan tsa riidt'n yalti kuu riid'n, per nlazt'n gake taxal nlaz'n, sinke taxal nlaaza gake.

⁴⁰ Tsaraa mre Jesús lo re yon zha kuu ngeteed lo Jesús, ne lee re yon zha naxat; tsa nzhab Jesús lo Pey:

—¿Chu neeka thib or mxegt goo lo mkaal?

⁴¹ Bloo goo mkaal lo goo ne bnaab goo ayud lo Diox, tsa kedit Maxuuy goo. Nlaaz goo tsow goo kuu nlaaz Diox, per men nak goo ne xegt beel goo.

⁴² Mrop welt nda Jesús ne mndediz Jesús lo Diox, ne nzhab Jesús:

—Xut'n, os tak riidt'n yalti ree kuu ndoblon riid'n; per ndoblo gake taxal nlaaza.

⁴³ Tsa mre Jesús lo re yon zha kuu ngeteed lo Jesús tedib welt, ne lee re zha naxat, tak kwathoz ngwatin zha mkaal. ⁴⁴ Tsa mlaa Jesús re zha ne ngwa Jesús mindediz lo Diox tedib welt, ne nzhab Jesús leeka re diiz kuu nzhab Jesús ner. ⁴⁵ Tsa mretab Jesús ta nzi re zha kuu ngeteed lo Jesús, ne nzhab Jesús lo re zha:

—¡Nalsi bneyy goo ne bdat goo! Tak mzinna or kuu lee na, Kuu Mzin Ngok Men, taa zha lo re zha kuu nap falt. ⁴⁶ Gwache goo, ndaa goo re'aa, tak ndyaada zha kuu taan lo re zha kuu nayii nen.

Mzhen re zha Jesús

(Mr 14:43-50; Lc. 22:47-53; Jn.18 :2-11)

⁴⁷ Leettsa lee Jesús bee ngenika, lee Judas kuu nak thib re zha kuu mteed lo Jesús, mzin kon kwathoz zha kuu nzo espad ne ya yaa. Re zha'a ndyaad kwent chaan re ngwleyy kuu nabee lo re ngwleyy, ne kwent chaan re zha gol kuu nabee lo re zha Israel. ⁴⁸ Ne mndaa'a Judas thib seny lo re zha'a nzhab Judas:

—Zha kuu wun thib chut cho kwat, zha'a ten goo ne teno goo zha.

⁴⁹ Tsa lee Judas mbig lo Jesús ne mni "diox" lo Jesús ne nzhab:

—¡Maestr!

Oraaka ndow Judas thib chut kwat Jesús.

⁵⁰ Per lee Jesús nzhab lo Judas:

—Amig, btsow kuu ndyaadaa tsowa.

Tsa lee re men mbig ne mzhen Jesús, ne ndano zha Jesús.

⁵¹ Per thib re zha kuu ndo kon Jesús, mloo spad ne mga nza mos ngwleyy kuu nabee lo reta ngwleyy. ⁵² Tsa nzhab Jesús lo zha'a:

—Blotsow espada, tak reta zha kuu nzhab kon spad kon spadka gath zha. ⁵³ ¿Chu neta tak naab'n lo Xut'n, tsa taal Xut'n thib tsilchop mil mandad chaan Xut'n nalorka? ⁵⁴ Per os tatay, ¿xomod gak re kuu nzhab lo xkeets Diox, kuu nzhab leey tabaa ndoblo gak?

⁵⁵ Tsa lee Jesús nzhab lo re men kuu nzi tya:

—¿Chebee kon spad ne kon ya ndyaad goo ten goo na taxal thib wann? Gandata wiz ngwaton mloon lo goo lee roo gwadoo. Ne, ¿chebee mzhent goo na tsya? ⁵⁶ Per reta koree ngeyak, tsa rolo re kuu mkee re profet kuu ngoo ndala.

Tsa lee re zha kuu ngeteed lo Jesús mlaa zha Jesús, ne mzhonn zha ndya zha.

Lee ngwleyy kuu nabee lo reta ngwleyy mnaab kwent lo Jesús

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷ Tsa lee re zha kuu mzhen Jesús ndano zha Jesús liz Caifás, kuu nak ngwleyy kuu nabee lo reta ngwleyy, ne tya nzi re maestr kuu nloo xkiiz Diox ne re zha gol kuu nabee

lo re zha Israel. ⁵⁸ Per lee Pey tit tithe ndeke dits re zha'a, asta lee liz ngwleyy kuu nabee lo reta ngwleyy, tsa myaan Pey mndob Pey kon re polisi kuu nkenap liz ngwleyy, tak nlaaz Pey ne Pey naa kwan yelo tsowno re zha'a Jesús.

⁵⁹ Tsa lee re ngwleyy kuu nabee lo re ngwleyy, kon re zha gol kuu nabee lo re zha Israel, ne kon reta zha kuu mas nataak lo re zha Israel, nkwaan zha naa kwan keki zha Jesús, tegal kuu wlite, tsa kuth zha Jesús. ⁶⁰ Per mzalt zha naa kwan keki zha Jesús, par tak kuth zha Jesús, tegal nzin kwathoz men kuu nkedi ne nkeki Jesús. Tsaraa mzin chop zha kuu nzhab kuu wlit, ⁶¹ ne nzhab zha:

—Nee mbin lee zha ree nzhab: “Na luux gwodoo chaan Diox, ne tsonka wiz taa nay tedib welt”.

⁶² Tsa lee ngwleyy kuu nabee lo reta ngwleyy ngwateli, ne mnaabdiz lo Jesús, ne nzhab:

—¿Chebee nkabta neeka thib kwa? ¿Xomod nak re kuu nkeki zha lu?

⁶³ Per lee Jesús mkabt neeka thib kwa lo ngwleyy kuu nabee lo reta ngwleyy. Tsa lee ngwleyya mre mnaabdiz lo Jesús ne nzhab:

—Btselo lo Diox kuu naban lee'a ne kuu wli. Ne lo nee: ¿Chu lu nak Xgann Diox Kuu Mtaal Diox Nabee?

⁶⁴ Jesús mkab ne nzhab:

—Lu ney. Noga nin lo goo, lee goo wii goo lo na, Kuu Mzin Ngok Men, tob'n lad ban lo Diox kuu tak tsow reta kwa, tsa nabeen. Ne wii goo leen yal leen xkow lobee.

⁶⁵ Tsa lee ngwleyy kuu nabee lo reta ngwleyy mchat xab, ne nzhab:

—¡Lee zha ree ni de Diox! Kon kuu ni zha. Ndechet raa lee tedib testig, mbina goo xa ni de zha Diox. ⁶⁶ ¿Xa nloo koree lo goo?

Lee re zha mkab ne nzhab:

—Nap zha falt, ndoblo gath zha por falt zha.

⁶⁷ Tsa mtsuk zha lo Jesús ne mdinke zha Jesús. Ne chop tson zha mkee maket kwat Jesús. ⁶⁸ Ne mbezz zha:

—Lu ne, lu nak Crist Kuu Mtaal Diox Nabee, ne naa cho mkeey yeka.

Pey nzhab: "Nlebeet Pey Jesús"

(Mr. 14:66-72; Lc. 22:56-62; Jn.18 :15-18, 25-27)

⁶⁹ Leettsa lee Pey ndob lee liz ngwleyy kuu nabee lo reta ngwleyy, tsa lee thib ngot mndyeen kuu nke tsuin lo ngwleyya, mbig lo Pey ne nzhab:

—No'a ndiy kon Jesús zha Galilea, taxal tedib net zha.

⁷⁰ Per lee Pey nzhab lo re zha:

—Net'n kwan ntetha lon.

⁷¹ Tsa lee Pey nda ndo roo pwert, tsa mwii tedib ngot mndyeen kuu nke tsuin lo

ngwleyya lo Pey, tsa nzhab ngot lo re zha kuu nzi tyā:

—No zha ree ndiy kon Jesús, zha yez Nazaret.

⁷² Ne tedib welt lee Pey mtselo kruz, ne nzhab:

—¡Nlebeet'n mbyi baa!

⁷³ Tut bluz lee re zha kuu nzi tyā, mbig lo Pey ne nzhab:

—Wlipaa no'a thibka naka kon re zha baa, asta xa ndediza nabee.

⁷⁴ Tsa lee Pey mtselo kruz, ne mndelo mde leeka lee, ne nzhab:

—¡Wlipaa na, nlebeet'n mbyi baa!

Ne ora lee ngite mrez. ⁷⁵ Tsa lee Pey mteleaz kuu nzhab Jesús lo Pey: “Leettsa terka kwez ngite, lee'a gab tson welt nlebeeta na”. Or mteleaz Pey kona, mroo pey tya ne mla yalne leettsoo Pey ne mndelo Pey mbinn Pey.

27

Xomod nguth Judas

(Mr. 15:1; Lc. 23:1-2; Jn. 18:28-32)

¹ Leettsa ngwani yezlyu, lee re ngwleyy kuu nabee lo re ngwleyy ne re zha gol kuu nabee lo re zha Israel, myaan zha diiz tsa naa xomod tsow zha kuth zha Jesús. ² Tsa mlib zha Jesús ne ndano zha Jesús lo Pilat, zha kuu nabee dita yezlyu'a.

³ Tsa lee Judas kuu mndaa Jesús lo re zha kuu kuth Jesús, leettsa myeen Judas lee re zha kuth Jesús, kwathoz ndowe leettsoo Judas, ne ngwa Judas mtsere re galbtsii temi plat, lo re ngwleyy kuu nabee lo re ngwleyy ne lo re zha gol kuu nabee lo re zha Israel.

⁴ Ne nzhab Judas lo re zha:

—Mndan thib falt thoz, tak mndan thib zha kuu mtsowt neeka thib kuu went gath. Per lee re zha mkab lo Judas ne nzhab:

—¿Yent cho import nee kona? ¡Kwenta kona!

⁵ Tsa lee Judas mlobi re temi'a leen gwodoo, ne ndya Judas ne leeka lee Judas mloo doo yeme.

⁶ Tsa lee re ngwleyy kuu nabee lo re ngwleyy mthop temi'a, ne nzhab:

—Gagt ko'aa temi ree leen ta nyoo gon, tak nambit temi ree, tak leey mndaa re'aa par gath thib zha.

⁷ Tsaraa ngoo re zha thib junt, tsa naa kwan tsow zha kon temi'a, ne kon temi'a mzhii re zha thib le yu, ta ngoo re men yu ndexkwaa men yet, tsa tya gaats re zha titi.

⁸ Ta mod lee yu'a le Yu Ren asta nal. ⁹ Tbaa mrolo kuu nzhab profet Jeremí lo re men ndala, leettsa nzhab profet: “Mzhen zha re galbtsii temi plat, lala nataak zha nzhab re zha Israel. ¹⁰ Ne kon temi'a mzhii zha thib le yu, ta ngoo re men yu ndexkwaa men yet,

taxal mnabee Zha Nabee.” [Jer. 32:6; Zac. 11:12-13]

Jesús ngwato lo Pilat

(Mr. 15:2-20; Lc. 23:3-5, 13-25; Jn. 18:33-19:16)

¹¹ Tsa ndano zha Jesús lo Pilat zha kuu nabee tsya. Ne mnaabdiz Pilat lo Jesús ne nzhab Pilat:

—¿Chu lu nak rey chaan re zha Israel?

Jesús nzhab:

—Lu ney.

¹² Tsa lee re ngwleyy kuu nabee lo re ngwleyy ne re zha gol, mkeki zha Jesús kon kuu wlit, per lee Jesús neeka thib lan diiz mkabt. ¹³ Tsa lee Pilat nzhab lo Jesús:

—¿Chu nhontaa re kuu nkeki zha lu?

¹⁴ Per neeka thib lan diiz mkabt Jesús lo Pilat, tsa lee Pilat mzegey leettsoo ne net Pilat naa kwan tsow Pilat xgab.

¹⁵ Ne gandata liin lo ani Paskw, lee Pilat ntelaa thib zha kuu nzo tsib, loka zha kuu naab re men yez lo Pilat. ¹⁶ Lee thib zha kuu le Barrabás kuu kwathoz nzib xkiiz nzo tsib tsya, ne nlebee reta men zha. ¹⁷ Or lee reta zha mkaltaa, tsa mnaabdiz Pilat lo re zha kuu nzi tyā, ne nzhab Pilat:

—¿Cho nlaaz goo telaan? ¿Chu nlaaz goo telaan Barrabás, o Jesús kuu ni re zha, Crist Kuu Mtaal Diox Nabee?

¹⁸ Tak myeen Pilat lee re ngwleyy kuu nabee lo re ngwleyy kon re zha gol, mndaa zha Jesús lo Pilat, tak nayii zha ne zha Jesús.

¹⁹ Ne lee Pilat bee ndobka ta naab Pilat kwent, lee tsaal Pilat mtaal thib zha, nzhab lo Pilat:

—Tsowta neeka thib kuu went lo mbyi baa, tak zha wen nak zha. Ne naabtsi'a kwathoz went mtsaa leettsoon por mbyi baa.

²⁰ Per lee re ngwleyy kuu nabee lo re ngwleyy ne re zha gol, mtekiil zha re men kuu nzi tyā, tsa naab re zha telaa Pilat Barrabás ne lee Jesús kuth zha. ²¹ Tsa lee Pilat mre mnaabdiz, ne nzhab:

—¿Cho lo rop zha ree nlaaz goo telaan?

Tsa lee re men mkab ne nzhab:

—Barrabás btelaa.

²² Tsa lee Pilat mre mnaabdiz lo re men, ne nzhab:

—Ne, ¿kwan tsow'n kon Jesús kuu ni re zha, Crist Kuu Mtaal Diox Nabee?

Reta men mkab ne nzhab:

—¡Bkee zha lo kruz!

²³ Lee Pilat nzhab:

—Per, ¿kwan kuu went mtsow zha?

Lee re men masraa nex mrez, ne nzhab:

—¡Bkee goo zha lo kruz!

²⁴ Leettsa mne Pilat yet roo Pilat lo re men, tak masraa nakap nzhab re men, ora mtaal Pilat zha ngwaxii nit, ne mteech Pilat yaa

Pilat lo re men, tsa loo Pilat napt Pilat falt, ne nhhab Pilat:

—Kwibt ren chaan mbyi wen ree dits'n, goo bene.

²⁵Tsa lee re men mkaab ne nhhab:

—¡Dits nee, ne dits raz nee kwib ren chaan mbyi baa!

²⁶Tsa lee Pilat mtelaa Barrabás, ne mnabee Pilat mdinke zha Jesús, ne mndaa Pilat Jesús lo re soldad tsa kee zha Jesús lo kruz.

²⁷Tsa lee re soldad chaan Pilat ndano Jesús leen thib yuu naro lee liz Pilat, ne mkaltaa re soldad Pilat dita lo Jesús. ²⁸Ne mloo zha xabits Jesús ne mtegok zha Jesús thib lar kuu nanexa na. ²⁹Ne mtob zha thib koron kuu natexkwaa kon yits yek Jesús, ne mloo zha thib aga yaa ban Jesús. Ne mtobxub re zha lo Jesús ne mzhizno zha Jesús, ne mbezzha:

—¡Wii goo lo rey chaan re zha Israel!

³⁰Noga mtsuk re zha lo Jesús, ne leeka aga kuu nzo yaa Jesús mkeezha yek Jesús. ³¹Ne leettsa ngwaloo mzhizno zha Jesús, tsa mloo zha lar kuu nane'a yen Jesús, ne mtegok zha Jesús xabka Jesús. Tsa ndano zha Jesús ta kee zha Jesús lo kruz.

Mkee zha Jesús lo kruz

(Mr. 15:21-32; Lc. 23:26-43; Jn. 19:17-27)

³²Ne leettsa mroo re soldad tyaa, ndano zha Jesús ta kee zha Jesús lo kruz, tsa mzaal zha thib mbyi zha yez Cirene kuu le Simún. Tsa mnabee re soldad lo zha gwe zha kruz Jesús.

³³Ne leettsa mzin zha thib ta le Gólgota. (Diiz ree nak: "Tsidth yek zha.") ³⁴Ne mndaa zha xit ub kuu nabexnit kon zhewla gu Jesús; ne ngwaloo mtsow Jesús prebe, ngwiit Jesús nita.

³⁵Mkee zha Jesús lo kruz, tsa lee re soldad mloo swert tsa naa cho tsow gan xab Jesús.

³⁶Ne tyaa mndob re soldad tsa kenap soldad Jesús. ³⁷Ne yek kruz Jesús mkeezha thib letz kuu nhhab naa chebee mkeezha Jesús lo kruz. Lee Letr nhhab: "ZHA REE NAK JESÚS KUU NAK REY CHAAN RE ZHA ISRAEL".

³⁸Noga chop wann mke lo kruz kon Jesús, thib zha mke lad ban Jesús, lee tedib zha mke lad beg lo Jesús. ³⁹Ne reta zha kuu ndriid lo Jesús, ndota kuu mbezzha lo Jesús, ne nkwin zha yek zha lo Jesús. ⁴⁰Ne nhzhizno zha Jesús ne mbezzha lo Jesús:

—Lu mbezzha gwodoo, ne tsonka wiz taa'a tedibe. ¡Os lee'a wli Xgann Diox naka, leeka lu bla'a lo kruz!

⁴¹Ne tataka ndota kuu mbezzha lo ngwleyy, kuu nabee lo re ngwleyy lo Jesús ne re maestr kuu nllo xkiiz Diox lo re men ne re zha gol kuu nabee lo re zha Israel, ⁴²mbezzha:

—Mlaat zha gagath tedib net zha, ¿ne chebee gagt la zha leeka lee zha zha lo kruz? Ne os lee zha nak zha, Zha Kuu Mtaal Diox Nabee lo re zha Israel, ndoblo leeka lee zha la zha zha lo kruz, tsa yelaazaa zha. ⁴³Ne tak kwathoz nyelaaz zha Diox, nez Diox telaa zha nal, os wli nke leettsou Diox zha; tak leeka zha ne Xgann Diox nak zha.

⁴⁴Noga rop wann kuu nke lo kruz cho Jesús, ndota kuu mbezzha lo Jesús.

Xomod nguth Jesús

(Mr. 15:33-41; Lc. 23:44-49; Jn. 19:28-30)

⁴⁵Ndrolta wiz dita yezlyu mlaa yaal, koree mxek asta las tres. ⁴⁶Ne oraaka lee Jesús dib gan mrez ne nhhab:

—Elí Elí ¿lama sabactani? (Diiz ree nak: "Diox da, Diox da, ¿chebee mlaa'a na?") [Sal. 22:1]

⁴⁷Ne lee chop tson zha kuu nzi tyaa, mbin kuu nhhab Jesús, tsa nhhab zha:

—Lee zha ngebez profet Lí zha ndala.

⁴⁸Oraaka lee thib zha mrozhonn ngwaxii thib le zhiil, ne mtenit zhay leen xit ub kuu myal kuu nala ne ni, ne mtob zhay yek thib mnix, ne mtob zhay roo Jesús, tsa gu Jesús kona. ⁴⁹Per lee tecop tson zha nhhab:

—Laa goo, tsa ne'aa naa chu tyaad Lí telaa zha.

⁵⁰Ne lee Jesús dib gan mrez tedib welt ne nguth. ⁵¹Ne lee lar kuu ntow, Ta Kwathoz Nayon leen gwodoo, mrat asta yeke no asta xanne. Ne lee yezlyu mwin zho, ne lee re ke nabii ngok rol. ⁵²Ne lee re roo baa mzaah; ne kwaro re zha nguth kuu nali ngok lo Diox mre mban. ⁵³Tsa mroo re zha leen baa, leettsa ngulo mroban Jesús, mndaab re zha leen yez Jerusalén, ne tyaa kwathoz men mwii lo re zha.

⁵⁴Tsa lee soldad kuu nabee lo thib gayoo soldad ne re soldad kuu nkenap Jesús, mne zha mwin zho thoze ne mne zha reta kuu ngok, tsa kwathoz mzeb re zha ne nhhab zha:

—Wlipaa, lee mbyi ree nak Xgann Diox.

⁵⁵Kwaro ngot nzi titi ndiyngwii, re ngota mnideke dits Jesús desde yezlyu Galilea ne mtsow re ngota ayud Jesús. ⁵⁶Ne xid re ngota nzo Mari Magdalén, ne Mari xnaa Santiago ne xnaa Che, ne noga xnaa ropta xgann Zebedeo.

Mkaats zha Jesús

(Mr. 15:42-47; Lc. 23:50-56; Jn. 19:38-42)

⁵⁷Leettsa ndekowa yezlyu, tsa mzin thib mbyi rik kuu le Che, zha'a nak zha yez Arimatea ne no zha mnideke dits Jesús. ⁵⁸Tsa ngwa zha lo Pilat ne mnaab zha kwerp Jesús. Tsa mnabee Pilat taa zha kwerp Jesús lo zha. ⁵⁹Tsa mkayaa zha kwerp Jesús, ne mchiix zha kwerp Jesús kon thib le lar nambi. ⁶⁰Ne mloo zha kwerp Jesús leen thib baa zha, kuu kub kuu mdaan zha leen ke.

Ne mtow zha roo baa kon thib ke naro ne ndya zha.⁶¹ Ne tyo ndo Mari Magdalen ne tedib Mari, rop ngot ndob gax roo baa.

Re zha kuu mkenap roo baa Jesús

⁶² Ne leettsa ngwalo mriid wiz kuu ndexk-waa zha kuu nzhaw zha wiz sabd, tsa lee re ngwleyy kuu nabee lo re ngwleyy ne re fariseo ngwa lo Pilat,⁶³ ne nzhab zha:

—Zha nabee, mtelaaaz nee lee mybi kuu kwathoz maked'a, leettsa bee naban zha ne zha lo nee: “Bluz leettsa tsaal tson wiz lee na roban”.⁶⁴ Kona bnabee tsa wen kenap zha roo baa, asta tsaal tson wiz. Tak cha ya re zha kuu mteed lo zha yallowann kwerp zha yaal, ne gab re zha lo re men: “Lee zha mrobana”. Tsa lee yalkedi ree gak kuu masraa went nake kuu mtsow zha ner.

⁶⁵ Tsa lee Pilat nzhab:

—Baa nzi re soldad, gwa goo ne bkenap goo roo baa taxal nlaaz goo.

⁶⁶ Tsa ngwa re zha ne mkenap zha roo baa, ne key mtow zha roo baa, ne mtob zha sey cho ke kuu now roo baa, ne mtaan zha re soldad kenap roo baa.

28

Jesús mroban

(*Mr. 16:1-18; Lc. 24:1-12; Jn. 20:1-10*)

¹ Ngulo mriid wiz sabd, ne ndeyeni yezlyu wiz domin, lee Mari Magdalen ne lee tedib Mari ngwatvii roo baa ta mloo zha Jesús.² Ne oraaka lee thib zho thoz mwin lo yezlyu. Lee thib mandad chaan Diox mroo yibaa mla lo yu, mbig roo baa ne mkip ke kuu now roo baa ne mndob mandad dits ke.³ Ne taxal bel bti na mandad, ne lee xab mandad naguz na taxal na yig.⁴ Or mwii re soldad kona, kwathoz mzeb re zha ne mzhiit zha, ne thitanax mkow zha, taxal zha nguth.⁵ Tsa lee mandad nzhab lo rop ngot:

—Tsebt goo. Na ne lee goo nkwaan Jesús, zha kuu mkee zha lo kruz.⁶ Yenta zha nzhee, mrobana zha, taxal ne zha lo re goo. De goo tsa wii goo ta mloo zha zha.⁷ Lijer tyee goo no guz gooy lo re zha kuu mteed lo zha, lee zha mrobana. Ne ner Jesús ya yezlyu Galilea lo re goo. Tya wii goo Jesús. Koree nak kuu nin lo goo.

⁸ Ne lee rop ngota oraaka ndya, tak kwathoz mzeb rop zha ne kwathoz laz zha. Ne lijer ndya zha nzhab zhay lo re zha kuu mteed lo Jesús.⁹ Ne leeka ora lee Jesús cha mzin lo rop ngot, ne mni “diox” lo rop ngot. Tsa lee rop ngot mbig lo Jesús, ne mdeez zha nii Jesús, ne mtobxub zha lo Jesús ne mbil zha lo Jesús.¹⁰ Tsa nzhab Jesús lo rop zha:

—Tsebt goo. Gwa goo gwane goo lo re wets'n tsa ya zha Galilea, ne tyo wii zha na.

Yalkedi kuu nzhab re soldad

¹¹ Leettsa lee rop ngot ndya, tsa lee chop tson re soldad ngwa lo re ngwleyy kuu

nabee lo re ngwleyy ngwane reta kuu ngok.¹² Tsa lee re ngwleyy kuu nabee lo re ngwleyy mrez re zha gol kuu nabee lo re zha Israel, par yaan re zha diiz. Ne myaan re zha mndaa zha naroob temi lo re soldad,¹³ ne nzhab re zha lo re soldad:

—Lee re goo ndoblo gab: “Yaal, leettsa lee nee mzhen mkaal, lee re zha kuu mteed lo Jesús myaad mlowann kwerp Jesús”.¹⁴ Ne os lee Pilat gon xomod nak koree, lee re nee kab lo Pilat por goo, tsa tetit Pilat goo.

¹⁵ Tsa lee re soldad mkayaa temi, ne mt-sow re soldad taxal nzhab re zha'a lo re soldad. Kuu nzhab re soldad konaka nak kuu ni re zha Israel asta wiz naltserree.

Tsiin kuu mtaan Jesús tsow re zha kuu mteed lo Jesús

(*Mr. 16:14-18; Lc. 24:36-49; Jn. 20:19-23*)

¹⁶ Tsa lee re tsuibthib zha kuu mteed lo Jesús, ndya yezlyu Galilea, yek yii ta nzhaba Jesús lo re zha.¹⁷ Ne leettsa mwii re zha Jesús mbil zha lo Jesús, tegal nzo chop tson zha nyelaazte.¹⁸ Tsa lee Jesús mbig lo re zha ne nzhab:

—Lee Diox mndaa reta yalnabee lon leen yibaa ne lo yezlyu.¹⁹ Gwa goo lo reta men dib naxta lo yezlyu, ne btsow goo gak zha, zha kuu teed lon, ne btsowleyy goo zha, kon yalnabee chaan Xut'n, kon yalnabee chaan da, ne kon yalnabee chaan Mbi Nayon chaan Diox.²⁰ Ne bloo goo lo re zha gon zha diiz reta kuu mnabeen lo re goo. Ne btelaaz goo le na ndo kon reta goo reta wiz, asta leettsa lux yezlyu.

Diiz Chul chaan Jesucrist kuu mkee Mark

Juan kuu mtsowleyy

(Mt. 3:1-12; Lc. 3:1-9, 15-17; Jn. 1:19-28)

¹ Tenzhee mod mndelo Diiz Chul chaan Jesucrist Xgann Diox. ² Taxal nke lo xkeets Diox kuu mkee profet Isaí, or nzhab profet: Na taal thib zha kuu tener lo'a, tsa to list zha leettsoo re men, par kayaa men lu.

³ Ne dib gan zha kwez zha thib ta yubiz ne gab zha:

"Nali bloo goo leettsoo goo par kayaa goo Zha Nabee,
ne nali gok goo lo re kuu ntsow goo". [Is. 40:3]

⁴ Tata mrolo kuu nzhab Isaí, or lee Juan kuu mtsowleyy re men mzin mndaa kwent xkiiz Diox thib ta yubiz, ne nzhab Juan lo re men, ndoblo tsee zha re mod kuu went kuu nak zha ne tob yek zha xkiiz Diox, tsa tuyy Diox re falt kuu mtsow zha. ⁵ Reta zha Jerusalén yez naro, ne re yez bzhizh chaan yezlyu Judea, mzin re zha tsaa gon zha xkiiz Juan. Ne mndaa zha kwent re falt kuu mtsow zha, tsa mtsowleyy Juan zha leen yoo Jordán.

⁶ Juan mdok lar kuu natexkwaa kon yits lad kamey, ne naliib thib sinch yid leeyy Juan, ne kuu nzhoo Juan nak ngebeey ne kuu nzhoo Juan nak mzin wan. ⁷ Or mndaa Juan kwent xkiiz Diox, nzhab Juan:

—Mera yaad thib zha kuu mas nataak nake na, ne neeka ndoblot'n xak'n korre dits labiyid zha, tak mas nataak zha nake na. ⁸ Na mtsowleyy goo kon nit, per lee mbyi'a tsowleyy goo, or kuu taa zha Mbi Nayon chaan Diox lo goo.

Jesús ngokleyy

(Mt. 3:13-17; Lc. 3:21-22)

⁹ Thib wiz mroo Jesús yez Nazaret yezlyu Galilea, ne mzin Jesús ta getswowleyy Juan re men, tsa mtsowleyy Juan Jesús leen yoo Jordán. ¹⁰ Or mroo Jesús leen nit mwii Jesús lee lobee mzhaal, ne lee Mbi Nayon mla dits Jesús taxal thib palom. ¹¹ Oraaka mbin Jesús thib bos kuu mroo lobee kuu nzhab:

—Lu nak xgann na kuu kwathoz nke leettsoon, ne kwathoz wen nzo leettsoon nen lu.

Maxuuy ngwalaaz gakedi Jesús

(Mt. 4:1-11; Lc. 4:1-13)

¹² Tsa lee Mbi Nayon chaan Diox mndeno Jesús thib ta yubiz. ¹³ Tya ngoo Jesús chop gal wiz, ne chop gal yaal xid re maa nayii. Tsa lee Maxuuy ngwalaaz gakedi Jesús tyen

welt, tsaraa lee re mandad chaan Diox mkenap Jesús.

Jesús mndaa kwent xkiiz Diox yezlyu Galilea

(Mt. 4:12-17; Lc. 4:14-15)

¹⁴ Leettsa ngoo Juan tsib lee Jesús ngwa yezlyu Galilea, ne mndaa Jesús kwent Diiz Chul chaan Diox. ¹⁵ Ne nzhab Jesús:

—Mzin gaxa wiz kuu lee Diox nabee lo goo. Btsee goo mod went kuu nak goo, ne gwalaaz goo Diiz Chul chaan Diox.

Jesús mrez thap zha kuu niit mbel

(Mt. 4:18-22; Lc. 5:1-11)

¹⁶ Leettsa ndiy Jesús roo nitdoe yezlyu Galilea, tsa mwii Jesús Simún ne wets Simún kuu le Ndres, lee rop zha ngegobi yex zha leen nitdoe, tak zha niit mbel nak zha rop zha. ¹⁷ Ora nzhab Jesús lo rop zha:

—Bteke goo dits'n, tsa tsow'n gak goo zha kuu niit men par Diox.

¹⁸ Oraaka mlaa rop zha yex zha ne mnedeke zha dits Jesús.

¹⁹ Ne nda Jesús mas kwat, tsa mwii Jesús Santiag ne Juan kuu nak rop xgann Zebedeo, re zha nzo leen kano ngeyib yex. ²⁰ Tsa mrez Jesús rop zha'a, ne oraaka mlaa zha xut zha Zebedeo kuu nzo leen kano kon re mos, ne mnndeke rop zha dits Jesús.

Thib mbyi kuu nzo mbi fyer leettsoo
(Lc. 4:31-37)

²¹ Ne mndaab Jesús kon re zha yez Caper-naúm wiz kuu nzhool re zha Israel lo Diox, ne ngwa re zha ta nkaltaa re men nted xkiiz Diox, tsa mndelo Jesús mloo lo re men kuu nzi tya. ²² Kwathoz mzegey leettsoo re zha naa xomod mloo Jesús lo re zha, tak kon yalnabee mloo Jesús lo re zha, ne mloot Jesús taxal nloo re maestr chaan ley. ²³ Ne tya ndo thib mbyi kuu nzo mbi fyer leettsoo, ne lee zha'a mretsyath, ne nzhab:

—¿Kwan nlaaza kon nee Jesús zha Nazaret? ¿Chu ndyaada luuzha nee? Nen cho naka. Lu nak Zha kuu Nayon lo Diox.

²⁵ Oraaka mkox mbi fyer lo Jesús, ne nzhab Jesús:

—¡Btow roo'a, ne broo leettsoo mbyi ree!

²⁶ Tsa lee mbi fyer mtsow mlen zha'a yizguthye ne mretsyath mroo leettsoo zha.

²⁷ Ne reta zha kuu nzi tya kwathoz mzegey leettsoo zha, ne mnaabdiz zha lo altaa zha, ne nzhab zha:

—¡Neeka mas ter wii'aa koree! ¿Kwan koree? Zha ree nloo pur kuu kub, ne nabee zha lo re mbi fyer ne nzhone diiz lo zha.

²⁸ Tsa kwathoz ney mraats diiz re kuu mtsow Jesús dita yezlyu Galilea.

Jesús mtegwe xnaatsaap Pey

(Mt. 8:14-15; Lc. 4:38-39)

²⁹ Leettsa mroo re zha Jesús leen yuu ta nkaltaa re zha Israel, tsa ngwa Jesús kon

Santiag ne Juan liz Simún rop Ndres.³⁰ Tsa nzhab re zha lo Jesús lee xnaatsaa Simún, nax lo luun ndak xlee.³¹ Ora mbig Jesús ne mzen Jesús yaa zha ne mlit Jesús zha, oraaka mroo xlee zha, ne mndaa zha kuu mdow re zha.

*Jesús mtegwe kwathoz zha or ndebix wiz
(Mt. 8:16-17; Lc. 4:40-41)*

³² Or ndekowa yezlyu, tsa lee re men myaadno re mbyiz ne re zha kuu nzo mbi fyer leettsoo lo Jesús.³³ Ne dita yez mkalataa roo yuu ta ndo Jesús.³⁴ Tsa mtegwe Jesús re mbyiz, ne mloo Jesús kwathoz re mbi fyer kuu nzo leettsoo re men. Ne mndaa Jesús diiz gatediz re mbi fyera, tak ne'a re mbi fyera naa cho nak Jesús.

Jesús mndaa kwent xkiiz Diox ta nkaltunga re men

(Lc.4:42-44)

³⁵ Ne zhaaraa na ngwache Jesús, ne ngwa Jesús thib ta wan ta nagan, ta nlaaz Jesús to thita Jesús, tsa tediz Jesús kon Diox.³⁶ Tsa lee re altaa Simún ngwakwaan Jesús.³⁷ Ne or mzal Jesús lo re zha, tsa nzhab zha lo Jesús:

—jReta men ngekwaana!

³⁸ Per lee Jesús nzhab lo re zha:

—Nda goo re'aa re yez kuu nzi gaxta nzhee, tsa tan kwent xkiiz Diox lo re zha kuu nzo tyu, tak par kona ndyal'n.

³⁹ Ne mndaa Jesús kwent xkiiz Diox ta nkaltunga re zha Israel dita yezlyu Galilea, ne mloo Jesús re mbi fyer kuu nzo leettsoo re zha.

*Jesús mtegwe thib mbyi kuu ndeye kwerp
(Mt. 8:1-4; Lc. 5:12-16)*

⁴⁰ Tsa myaad thib zha kuu ndeye kwerp lo Jesús, ne mtobxub zha lo Jesús, ne dib ndroo leettsoo zha nzhab zha lo Jesús:

—Os lee'a nlaaza tegwe'a na, btegwen lo yiz ree.

⁴¹ Tsa mlat leettsoo Jesús mne Jesús zha'a, ne kon yaa Jesús mdiinn Jesús cho zha. Tsa nzhab Jesús lo zha:

—Nlaz'n we'a.

⁴² Leeka or kuu mni Jesús lo zha, oraaka mgwe zha, ne myaan nambi zha.⁴³ Tsa mteni Jesús zha, ne mtaal Jesús zha liz zha,⁴⁴ ne nzhab Jesús lo zha:

—Yent cho lo gaba koree, gwa lo ngwleyy ne be gon kuu ndoblo taa thib mbyi kuu mgwe'a taxal mnabeee Moisés, tsa ne reta zha lee'a mgwe'a.

⁴⁵ Per lee mbyi'a ndya ne nzhab lo reta men, kona ngogt raa gataab Jesús re yeza, sinke roo re yeza mlet Jesús, ne lee re men reta yez ndyaad lo Jesús.

2

*Jesús mtegwe thib zha mthans
(Mt. 9:1-8; Lc. 5:17-26)*

¹ Leetsa mriida chop tson wiz, tsa mretab Jesús yez Capernaúm tedib welt, ne mbin re men lee Jesús nzo liz thib zha.² Kwathoz ney mkalataa kwaro re men tyu, ne mgaat raa leen yuu gataab neeka tedib zha, tsa mndaa Jesús kwent xkiiz Diox lo re men.³ Tsaraa ndyaad thap mbyi kuu ndyaadno thib mbyi mthans lo Jesús.⁴ Ne ngogt gabig zha lo Jesús, tak kwaro men nzi, tsa mxaal re zha yek yuu, ne mla zha dib luun zha mthansa lo Jesús.⁵ Ne oraaka myeen Jesús lee re zha'a nyelaaz Diox. Tsa nzhab Jesús lo zha mthansa:

—Xgann na, mtuyya na re falta.

⁶ Per tyu nzi tyen maestr kuu nloo xkiiz Diox, re zha'a mtsow xgab ne nzhab:

⁷ “¿Chebee tabaa ndediz mbyi ree? ¡Taxal Diox ndediz zha! Neeka thib men gagt kib falt beeta Diox tak kib falt.”

⁸ Per lee Jesús myeen naa kwan ntsow re maestr chaan ley xgab, tsa nzhab Jesús lo re zha:

—¿Chebee tabaa ntsow goo xgab?⁹ ¿Kwan ntsow goo xgab? ¿Kwan mas nagant gap'n lo mbyiz: “Lee re falta myuyya”, o tegwen zha ne gap'n lo zha: “Gwache bzhen luuna ne bte”?¹⁰ Tsow'n koree lo re goo, tsa ne goo lee na, Kuu Mzin Ngok Men, nap'n yalnabee par tuy'n re falt chaan re men.

Tsa nzhab Jesús lo mthans:

¹¹ —Lo'a nin gwache, bzhen luuna ne tyee liza.

¹² Oraaka lee mbyi mthansa ngwache, ne mzen zha luun zha ne ndya zha, ne reta zha kuu mwii kuu ngok, kwathoz mzegey leettsoo zha, ne mndaa zha texkix lo Diox ne nzhab zha:

—¡Neeka mas ter wi'a koree! ¡Re kuu thoz kuu ntsow Diox!

*Jesús mrez Leví
(Mt. 9:9-13; Lc. 5:27-32)*

¹³ Tsa mre Jesús ngwa Jesús roo nitdoo tedib welt; ne lee re men ngwa lo Jesús, tsa mloo Jesús lo re zha.¹⁴ Ne nda Jesús tut kwat, tsa mwii Jesús Leví xgann Alfeo, thib zha kuu ntsow kobral temi chaan yezlyu, kuu nzhab lo zha Roma, tsa nzhab Jesús lo zha:

—Bteke dits'n.

Oraaka ngwateli Leví ne mndeke Leví dits Jesús.

¹⁵ Ngwalo mriid koree, lee Jesús kon re zha kuu ngeteed lo Jesús ngwa liz Leví, ne or ndob Jesús ngeyow Jesús liz Leví, kon tyen zha kuu ntsow kobral temi chaan yezlyu ne kon re zha kuu ntsowt kuu wen, tak kwaro men mndeke dits Jesús.¹⁶ Tsa lee chop tson maestr chaan ley kuu nak fariseo, mne zha

lee Jesús ndow kon re zha kuu ntsow kobral temi chaan yezlyu, tsa nzhab re zha lo re zha kuu ngeteed lo Jesús:

—¿Chebee nzhou zha baa, kon re zha kuu ntsow kobral temi chaan yezlyu, ne kon re zha kuu ntsowt kuu wen?

¹⁷ Jesús mbin kona, tsa nzhab Jesús lo re zha:

—Re zha kuu ndolizt ndechet zha cho tegwe zha, per lee re zha kuu ndoliz ndeche zha cho tegwe zha, ndyalt'n ndyaadchez' n re zha wen, lee na ndyal ndyaadchez re zha kuu ndab falt.

Yalnaabdiz chaan ayun

(Mt. 9:14-17; Lc. 5:33-39)

¹⁸ Re zha kuu mndeke dits Juan, ne re fariseo ntsow zha ayun, tsa mas wen tediz zha lo Diox. Tsa ngwa zha lo Jesús ne nzhab zha:

—Chebee lee re zha kuu mndeke dits Juan ne re fariseo, ntsow zha ayun, tsa mas wen tediz zha lo Diox, ne lee re zha'a ntsowt zha tata.

¹⁹ Lee Jesús nzhab lo re zha:

—¿Chu tak wut re zha kuu nzi lo fandan, or lee zha kuu mtseya ndoka lo re zha? ¡Rebeete! Tak dita lo ndo zha kuu mtseya'a lo re zha, gagt tsow zha ayun. ²⁰ Per tetsin thib wiz yib mbyi kuu mtseya'a lo re zha, tsasi lee re zha tsow ayun, tsa mas wen tediz zha lo Diox.

²¹ *Neeka thib zha ngibt thib le lar kub cho lar gox, tak mbich lar kub ne masraa nchattelar gox. ²² Ne neeka thib zha ngot xit ub kuu kub leen gom yid gox; tak lee xit ub kuu kub tsow ratt gom gox, ne luuzhe gom ne lee xit ub zho, kona lee xit ub kuu kub ndoblo yo leen gom yid kub.

Re zha kuu ngeteed lo Jesús mthop ton nzob xtil, wiz kuu nzholo re zha Israel lo Diox
(Mt. 12:1-8; Lc. 6:1-5)

²³ Thib wiz sabd nda Jesús kon re zha kuu ngeteed lo Jesús thib ta ndab nzob xtil, ne lee re zha kuu ngeteed lo Jesús mndelo mthop ton nzob xtil. ²⁴ Tsa lee re fariseo nzhab lo Jesús:

—¿Chebee ntsow re zha'a, thib kuu ndoblot tsowaa wiz kuu nzholoaa lo Diox?

²⁵ Lee Jesús nzhab lo re zha:

—¿Chu ter lab goo kuu mtsow rey David, leettsa mlann zha kon re zha kuu nda kon lee zha? ²⁶ Mndaab zha leen liz Diox, leettsa lee Abiatar ngok ngwleyy kuu mnabee lo reta ngwleyy, ne ndow zha pan kuu ndoblot zha wu zha, kuu beeta re ngwleyy ndoblo wu, ne noga mndaa zhay ndow re zha kuu nda kon lee zha.

²⁷ Ne noga nzhab Jesús lo re zha:

—Lee wiz kuu nzholoaa lo Diox mndaa Diox par wen rid re men ne mndaa Diox wiz par nabee wiz lo mbyi. ²⁸ Kona na nabee

lo wiz sabd, tak na nak xgann mbyi, Kuu Mzin Ngok Men.

3

Jesús mtegwe thib mbyi kuu mbiz yaa
(Mt. 12:9-14; Lc. 6:6-11)

¹ Tedib welt mndaab Jesús ta nkaltaa re zha nteed zha xkiiz Diox, ne tyo ndo thib mbyi kuu mbiz thib yaa. ² Noga nzi thiban zha kuu ngewii, naa chu tetegwe Jesús mbyi'a wiz kuu nzholo re zha Israel lo Diox, tsa tak keki zha Jesús. ³ Tsa lee Jesús nzhab lo mbyi kuu mbiz yaa'a:

—Gwateli, ne bto ndrol.

⁴ Tsa mnaabdiz Jesús lo re zha, ne nzhab Jesús:

—¿Kwan mas wen tsowaa wiz kuu nzholoaa lo Diox? ¿Chu ndoblo tsowaa kuu wen o kuu went? ¿Chu wen tegwe men thib zha, o chu wen kuth men thib zha?

Per lee re zha neeka thib kuu mkabt zha.

⁵ Tsa nayii mwii Jesús lo re zha kuu nzi lo Jesús: Ne nabil ngoo leettsou Jesús, tak kwathoz nad leettsou re zha'a, tsa nzhab Jesús lo mbyi'a:

—Bteli yaa'a.

Tsa mteli zha yaa zha, ne oraaka mgwe yaa zha taxal tedib yaa zha. ⁶ Tsa mkaltaa re fariseo kon re zha rey Herodes, tsa myaan zha diiz, naa xomod tsow zha par kuth zha Jesús.

Kwaro men mkaltaa roo nitdo

⁷ Leettsa mroo Jesús tyo ne nda Jesús roo nitdo kon re zha kuu ngeteed lo Jesús, kwaro re zha yezlyu Galilea kon re zha yezlyu Judéa, mndeke dits Jesús. ⁸ Ne noga re zha Jerusalén yez naro, kon zha yezlyu Idumea ngwa lo Jesús; noga ngwa re zha kuu nzo tedib lad roo yoo Jordán, re zha yez Tiro ne zha yez Sidón. Ngwa zha tak mbin zha re kuu thoz kuu ntsow Jesús. ⁹ Tsa nzhab Jesús lo re zha kuu ngeteed lo Jesús:

—Btolist goo thib kano par keen, tak narroob men ndeke dits'n ne kwaro nzhoor re men na.

¹⁰ Tak kwaro men mtegwe Jesús, ne lee re mbyi nzhoor Jesús, tak nlaaz zha diinn zha cho Jesús. ¹¹ Ne or ngwii re mbi fyer kuu nzo leettsou re zha lo Jesús, tsa ntsow mbi fyer ntobxbu re zha lo Jesús, ne mbetsyath zha mbez zha:

—Lu nak Xgann Diox.

¹² Kwathoz mkok re mbi fyer lo Jesús, ne nzhab Jesús:

—Yent cho lo gab goo naa cho nak'n.

Jesús mli tsuibchop zha

(Mt. 10:1-4; Lc. 6:12-16)

¹³ Tsa mkendab Jesús yek thib yii, ne mrez Jesús re zha kuu nlaaz Jesús, ne ngwa re zha lo Jesús. ¹⁴ Tsa mli Jesús tsuibchop zha par kwin kon Jesús, ne par taal Jesús zha yataa

zha kwent xkiiz Diox. ¹⁵ Ne mndaa Jesús yalnabee lo re zha, tsa koo zha re mbi fyer kuu nzo leettsoo re men. ¹⁶ Tsuibchop re zha ree nak re zha kuu mli Jesús:

Simún (kuu mtob le Jesús Pey),

¹⁷ Santiag ne Juan (rop zha ree nak xgann Zebedeo, kuu mtob le Jesús Boanerges, diiz ree nak: "Zhiinn bel bti");

¹⁸ Ndres,

Lip,

Bartolomé,

Mateo,

Mach,

Santiag (zhiinn Alfeo),

Tadeo,

Simún (kuu ngoo xid partid Cananita),
¹⁹ ne Judas Iscariote (kuu mndaa Jesús lo yalguth).

*Zha kuu ngode lo Mbi Nayon chaan Diox
(Mt. 12:22-32; Lc. 11:14-23; 12:10)*

²⁰ Ne mndaaab Jesús kon re zha kuu ngeete lo Jesús leen thib yuu, ne tedib welt kwathoz men mkaltaa lo Jesús, ne neeka myoxt gawu re zha. ²¹ Ne mbin re zha liz Jesús kona, tsa ngwa zha gaxii zha Jesús, tak nzhab zha:

—Mbix yek Jesús.

²² Ne lee re maestr chaan ley kuu mroo Jerusalén nzhab:

—Wlipaa yalnabee chaan Beelzebú nap Jesús, ne kon yalnabee chaan Beelzebú ngoo Jesús re mbi fyer.

²³ Tsa mrez Jesús re zha ne mni Jesús lo re zha kon diiz nanzee, ne nzhab Jesús:

—¿Xomod koo Maxuuy leeka lee Maxuuy Maxuuy? ²⁴ Os lee thib yez nzhab chop tant ne ngyo leeka re zha, xegt yeza nraob. ²⁵ Ne noga os leen thib yuu nzhab chop zha, ne ngyo leeka re zha, reta zha kuu nzo leen yuu'a xegt zha nraob tyemp. ²⁶ Kona os lee Maxuuy yo kon leeka lee Maxuuy, xegt yalnabee chaan Maxuuy nraob tyemp, gaxta ndo luzhe.

²⁷ 'Ne leeka tata gagt tab thib zha leen liz thib zha ney, os ter liib zha zha, tsa tak lowann zha re chaan zha.

²⁸ 'Wlipaa na nin, tekib Diox relota falt kuu ntsow men, asta kuu ngode lo Mbi Nayon chaan Diox, thitanax tuyyt Diox falta neeka mas.

³⁰ Tata nzhab Jesús lo re zha, tak lee re zha nzhab mbi fyer nzo leettsoo Jesús.

*Xnaa Jesús ne re wets Jesús
(Mt. 12:46-50; Lc. 8:19-21)*

³¹ Tya mzin xnaa Jesús kon re wets Jesús, ne mlet re zha roo yuu, tsa mtaal zha thib zha ngwachez Jesús. ³² Ne lee re zha kuu nzi re ladta lo Jesús nzhab lo Jesús:

—Lee xnaa'a ne re wetsa nzi lee ndiy nkwaana.

³³ Lee Jesús mkab ne nzhab:

—¿Cho nak xnaan ne re wets'n?

³⁴ Tsa mwii Jesús lo re zha kuu nzi re ladta lo Jesús, ne nzhab Jesús:

—Re zha ree ndak'n taxal xnaan ne re wets'n. ³⁵ Tak reta zha kuu ntsow kuu nlaaz Diox, zha'a nak wets'n, btan na ne xnaan.

4

*Kwent nanzee chaan zha ngo bin lo yu
(Mt. 13:1-9; Lc. 8:4-8)*

¹ Tedib welt mndelo Jesús mloo Jesús lo naroob men roo nitdoo, tak kwathoz zha mkaltaa roo nitdoo, tsa mke Jesús leen thib kano, ne mndob Jesús leene lo nitdoo. Ne lee re men mrin roo nitdoo. ² Tsa mloo Jesús tyen kuu lo re men kon diiz nanzee.

Ne nzhab Jesús:

³ —Kenza goo kwent kuu tan lo goo. Thib welt lee thib zha mroo ndalo bin. ⁴ Leettsa ngego zha bin, thib nete mla roo net, ne myaad re min ndowe. ⁵ Tedib nete mla xid ke, ta lut yu nzo. Ne neyta mlene tak lut yu nzib dits'e. ⁶ Per leettsa mla be, tee mgole ne mbize tak yent naroob lozhe. ⁷ Tedib nete mla xid yits, ne lee yits mzhenn ne mluux yitse, ta mod mndaate xle. ⁸ Per lee tedib nete mla lo yu naal, mlene ne mzhenn ne mndaay xle. Thib nete mndaa galbtsii bin por thibka bin, lee tedib nete mndaa tson gale, ne lee tedib nete mndaa thib gayoo. Tbaa nak kwent.

⁹ Ne nzhab Jesús:

—¡Os lee goo ndob nza goo, ndoblo yen goo koree!

*Chebee mni Jesús kon diiz nanzee
(Mt. 13:10-17; Lc. 8:9-10)*

¹⁰ Leettsa myaan Jesús kon re tsuibchop zha kuu ngeete lo Jesús, lee chop tson zha kuu nzi gax mnaabdiz lo Jesús, naa xomod nak kwent kuu mndaa Jesús. ¹¹ Tsa nzhab Jesús:

—Diox mzhyal ne goo naa xomod nak re kuu nzogaats kuu nak chaan Diox, tsa ne goo xomod nabee Diox. Per lee lo re zha kuu nlaazt teke dits'n, pur diiz nanzee nin lo zha. ¹² Tegal wii zhay ne yent zha kuu ngwii zha, ne tegal gon zhay per yent zhay, ta mod nyent zha xkiiz Diox ne nyelaazt zhay, tsa tuyyt Diox re falt zha.

*Xomod nak kwent chaan zha kuu ngo bin lo yu
(Mt. 13:18-23; Lc. 8:11-15)*

¹³ Tsa nzhab Jesús lo re zha:

—¡Os nyent goo koree? ¿Xomod yen goo tedib nete? ¹⁴ Lee zha kuu ngoo bin nak taxal thib zha kuu ndaa kwent xkiiz Diox.

¹⁵ Thib net men nak taxal bin kuu mla roo net. Leettsa nzhon zha xkiiz Diox, tsa nyaad Maxuuy nkib xkiiz Diox leettsoo zha, taxal nak bin kuu ndow min roo net. ¹⁶ Tedib net

zha nak taxal bin kuu mla xid ke, kwathoz wen nyoo leettsoo zha or nzhon zha xkiiz Diox. ¹⁷ Re zha'a nak taxal thib ya kuu yent lozh, ta mod nxegt zha, ne leettsa nzin thib yalti lo zha o ndreke zha dits zha, tak nyelaa zha Diox, tsa tee nlaa zha Diox. ¹⁸ Tedib net zha nak taxal bin kuu mla xid yits, nzhon zha xkiiz Diox, ¹⁹ per kwathoz ntsow zha xgab re kuu yezlyu ree, ndablaaz zha temi, ne reta kwaan yezlyu ree, kona nak kuu nkedi zha, re koree nluux xkiiz Diox leettsoo zha. Re zha'a nak taxal ya kuu ndaat xle. ²⁰ Per lee re zha kuu nak taxal bin kuu mla lo yu naal. Nzhon zha xkiiz Diox, ne nkayaa zhay kon dib ndroo leettsoo zha, re zha'a nak taxal bin kuu mndaa galbstii bin por thibka bin, taxal bin kuu mndaa tson gal bin ne taxal bin kuu mndaa gayoo bin.

*Kwent chaan xni
(Lc. 8:16-18)*

²¹ Noga nzhab Jesús:

—Neeka thib zha nkeet thib kandil ne ntow zhay kon thib zhibey, o ngoo zhay xann luun, sinke lee zha ntobe thib ta ya ndab, tsa nteniy. ²² Tak yent thib kuu naagaats kuu loot, ne yent thib kuu xlaan kuu net men. ²³ Os lee goo ndob nza goo ndoblo yen goo koree!

²⁴ Noga nzhab Jesús:

—Wen kenza goo reta kuu nin. Leeka taxal ntsow goo lo re taben goo, tataka rid goo, ne asta masraa kuu rid goo. ²⁵ Tak lee zha kuu nap kwaan, masraay kayaa zha, per lee zha kuu yent kuu nap, asta lut kuu nap zha teyiibe lo zha.

Kwent xomod nzheng bin

²⁶ Noga nzhab Jesús:

—Nalor tan tedib kwent, tsa ne goo xomod nak leettsa nabee Diox leettsoo men, leey nak taxal thib bin kuu ngo zha lo yu. ²⁷ Tegal nzhat zha o naxna zha, tse ne yaal lee bin nlen ne nzhene, per net zha naa xomod nzhene. ²⁸ Leeka yezlyu nxeene. Ner nlen kottse, tsaraa nziib gatte, nla doy, nziib kwate ne nla yattse. ²⁹ Ne bluz leettsa nzhatslay, tsa nthop zhay, tak mzina wiz dope. Tbaa nak kwent.

*Kwent chaan mbiz mostaz
(Mt. 13:31-32; Lc. 13:18-19)*

³⁰ Noga nzhab Jesús:

—Nal tan tedib kwent lo goo, tsa ne goo xomod nak leettsa nabee Diox leettsoo men. ³¹ Leey nak taxal thib mbiz mostaz, mbiz mostaz nak thib mbiz kuu mas lut lo re mbiz kuu nzhann men. ³² Leettsa nyelo nzhann mene, nlene nzhene ne nziib tyen zhite, ne ndaay xkal, ne asta ndyaad re min ndexkwaan lyaat loy. Tbaa nak kwent.

*Tenzhee mod mndaa Jesús kwent nanzee
(Mt. 13:34-35)*

³³ Kon tyen kwent nanzee mloo Jesús xkiiz Diox lo re men. Tata mni Jesús lo re men asta plotha kuu takta yen re mene. ³⁴ Leettsa ni Jesús lo re men pur nanzee ni Jesús, per leettsa nyaan Jesús kon re zha kuu ngeteed lo Jesús, tsaraa nambi ni Jesús lo re zha.

*Mbi ne nitdoo nzhon diiz lo Jesús
(Mt. 8:23-27; Lc. 8:22-25)*

³⁵ Leeka wiza or mbix wiz, tsa nzhab Jesús lo re zha kuu ngeteed lo Jesús:

—Nda goo re'aa tedib lad roo nitdoo.

³⁶ Tsa mlaa re zha reta men kuu nzi tya, ne nkendab re zha leen kano kuu ndob Jesús. Ne noga nzi techop tson kano tya.

³⁷ Ne leettsa nda re zha lo nitdoo, tsa mnodelo ngoth thib mbi thoz lo nitdoo, ne mnodelo mbimchop mbi kano, ne asta ndaab nit leen kano. ³⁸ Ne lee Jesús naxat par ya xann kano, ne mtob Jesús thib xkoog Jesús yek Jesús. Tsa lee re zha kuu ngeteed lo Jesús mloo mkaal lo Jesús, ne nzhab re zha:

—Maestr, ¿chu ndat leettsa'a mer lowg-waa leen nitdoo?

³⁹ Oraaka ngwache Jesús ne mkok mbi ne nitdoo lo Jesús, ne nzhab Jesús:

—¡Keeta bi! ¡Zheta gok!

Ne lee nitdoo zheta ngok.

⁴⁰ Tsa nzhab Jesús lo re zha kuu ngeteed lo Jesús:

—¿Chebee kwathoz nzeb goo? ¿Chu ntsow goo xgab lee Diox nkenapt goo?

⁴¹ Kwathoz mzegey leettsoo re zha ne kwathoz mzeb zha, ne nzhab zha lo re altaa zha:

—¿Cho nak zha ree? ¿Chebee asta mbi ne nitdoo nzhon diiz lo zha?

5

Thib zha yez Gadara kuu nzo mbi fyer leettsoo

(Mt. 8:28-34; Lc. 8:26-39)

¹ Ne leettsa mzin re zha tedib lad roo nitdoo yezlyu chaan re zha Gadara. ² Leettsa mla Jesús leen kano, tsa mbig thib zha kuu nzo mbi fyer leettsoo lo Jesús, zha'a ndende leen re kelyoo, ta nkaats zha re zha nguth. ³ Ne leen re kelyoo ta nkaats zha re zha nguth, tya mtsow zha'a taxal liz zha. Ne yent cho ntsow gan liib zha neeka kon kaden. ⁴ Tyen welt mliib zha zha'a kon kaden, per lee zha'a mchuug kaden ne yent cho nye lo zha. ⁵ Tse ne yaal ndende zha leen re kelyoo ne leen yii, mbetsyath zha, ne leeka lee zha ngin zha zha cho re ke. ⁶ Tith raa ngwani Jesús lo zha, oraaka mrezhonn zha mbig zha ne mtobxub zha lo Jesús. ⁷⁻⁸ Tsa nzhab Jesús:

—Mbi fyer broo leettsoo zha ree.

Tsa dib gan zha mretsyaath zha ne nzhab zha:

—Jesús. ¡Xgann Diox kuu ndob yibaa! ¡Kwan nlaaza kon nee! Naab'n lo'a tetita nee, leettsa ter tsin wiz kuu teti'a nee.

⁹ Tsa mnaabdiz Jesús lo zha, ne nzhab Jesús:

—¿Cho ble'a?

—Nee le kwathoz, tak kwathoz tyen nee —nzhab zha.

¹⁰ Lee re mbi fyer kwathoz mnaab lo Jesús, tsa koot Jesús re mbi fyera yezlyu'a.

¹¹ Ne gax chu yii ty a nzi naroob nguch ngeyow. ¹² Tsa lee re mbi fyera kwaro mnaab lo Jesús, ne nzhab:

—Taal nee lo re nguch baa, ne taa diiz tab nee leettsoo re maa baa.

¹³ Tsa mndaa Jesús diiz mndaab re mbi fyera leettsoo re ngucha. Ne nzhab teeka chop mil nguch, tsa mrezhonn re maa ne mrethin maa roo kedoo, ne mla maa leen nitdoo ne ngwaap maa nit.

¹⁴ Ne lee re zha kuu nkenap re ngucha, mzhonn ngwalo diiz lo re zha yez kuu ngok, ne noga nzhab zhay lo re zha kuu nzi wan. Tsa ngwatwii re zha yez naa kwan ngok. ¹⁵ Leettsa mzin re zha ta ndo Jesús, tsa mwii zha mbyi kuu ngoo mbi fyer leettsoo, ndoba nok xab ne mgwe'a mbyi, ora mzeb re zha. ¹⁶ Ne lee re zha kuu mwii kuu ngok kon mbyi kuu ngoo mbyi fyer leettsoo'a, ne kuu ngok kon re nguch, nzhab zhay lo re altaa zha. ¹⁷ Tsa mnaab re zha yeza lo Jesús ne nzhab zha:

—Broo nzhee.

¹⁸ Ne leettsa mretab Jesús leen kano tedib welt, lee zha kuu ngoo mbi fyer leettsoo'a, mnaab lo Jesús ne nzhab:

—Laa'a teken ditsa.

¹⁹ Per lee Jesús mzhyalt, ne nzhab:

—Tyee liza lo re zha liza, ne guz re kuu mtsow Zha Nabee lo'a, ne xa mlat leettsoo zha mne zha lu.

²⁰ Tsa ndya zha ne nzhab zha re kuu mtsow Jesús lo zha, lo re zha re tsii yez kuu nak Decápolis, ne reta zha re yeza mzegey leettsoo.

Jesús mtegwe thib ngot ne mteroban rt-saap Jairo

(Mt. 9:18-26; Lc. 8:40-56)

²¹ Leettsa ngwalo mriiid Jesús tedib lad roo nitdoo, myaanka Jesús leen kano, ne naroob men mkaaltaa lo Jesús roo nitdoo.

²² Tsa mzin Jairo thib zha kuu nataak ta nkaltaa re zha kuu nteed xkiiz Diox, ne or mwii zha Jesús, mtobxub zha xann nii Jesús, ²³ ne kwaro mnaab zha lo Jesús, ne nzhab zha:

—Lee rtsaap'n mer gath. De toba yaa'a dits nzaa, tsa gwe nzaa ne ban nzaa.

²⁴ Tsa ngwa Jesús kon lee zha, ne naroob men mnndeke dits Jesús, ne kwathoz nzhoor re men Jesús. ²⁵ Ne xid re mena ndyaad thib ngot mbyiz, kuu nda'a tsuibchop liin nlath ren leettsoo, ²⁶ ne kwathoz ndakti zha, reta temi zha kuu nap zha mluuzha zha lo re doctor, ne ngwet zha, leel masraa mndezhoo yiz kuu ndak zha. ²⁷ Ne leettsa mbin zha re kuu ngetsow Jesús, tsa mndaab zha xid re men kuu nzi lo Jesús, ne mzin zha par dits Jesús ne mdiinn zha xab Jesús. ²⁸ Tak mtsow zha xgab: “Os leen diinn na xab Jesús, tegwen”. ²⁹ Ne or mdiinn zha xab Jesús, oraaka mlet kuu nlath ren leettsoo zha, ne myeen zha lee zha mgwe'a lo yiz kuu ndak zha. ³⁰ Oraaka myeen Jesús lee Jesús integwe thib zha kon yalney chaan Jesús, tsa mtsere lo Jesús, ne mnaabdiz Jesús lo re zha kuu ndeke dits Jesús, ne nzhab Jesús:

—¿Cho mdiinn xab'n?

³¹ Lee re zha kuu ngeteed lo Jesús nzhab:

—¿Chu ngwiita re ladta nzhab zha lu? Ne naabdiza: “¿Cho mdiinn xab'n?”

³² Per lee Jesús mwii re ladta, naa cho kuu mdiinn xab Jesús. ³³ Tsa lee ngota kwathoz mzeb, tak tata nzhab Jesús, oraaka mbig ngot ne mtobxub ngot lo Jesús, ne nzhab ngot kuu wli. ³⁴ Tsa nzhab Jesús lo ngot:

—Rtsaap'n, tak ngwalaaza na kona mgwe'a. Wen tyee yat leettsoo'a, tak mgwe'a lu lo yiz kuu mzhaaka.

³⁵ Bee ngenika Jesús, lee chop tson zha liz Jairo mzin, nzhab lo Jairo:

—Ngutha rtsaapa. ¿Chebee ngenika lu lo maestr?

³⁶ Per lee Jesús mbin kona, tsa nzhab Jesús lo Jairo:

—Tsebta. Anta gwalaaz xkiz'n kon dib ndroo leettsoo'a.

³⁷ Ne mndaat Jesús diiz gateke choraa dits Jesús, beeta Pey, Santiag ne Juan wets Santiag. ³⁸ Or mzin re zha liz Jairo, tsa mwii Jesús lee re zha kuu nzi ty a nzhon ne mbetsyath. ³⁹ Tsa mndaab Jesús leen yuu, ne nzhab Jesús:

—¿Chebee kwathoz nkee goo bi ne nzhon goo? Ngutht nzaa, beeta naxat nzaa.

⁴⁰ Tsa mzhibzno re zha kuu nzi ty a Jesús, per lee Jesús mnabee mroo reta zha leen yuu, ne mndeno Jesús xnaa nzaa, xut nzaa ne re yon zha kuu ngeteed lo Jesús, tsa mndaab re zha leen yuu ta nax nzaa. ⁴¹ Tsa mzhen Jesús yaa nzaa ne nzhab Jesús lo nzaa:

—Talita kumi. (Diiz ree nak: “Nzaa, lo'a nin, igwache!”)

⁴² Oraaka ngwache nzaa ne mnde nzaa, ne lee nzaa nap tsuibchop liin. Ne reta zha kuu mwii kona kwathoz mzegey leettsoo zha. ⁴³ Per lee Jesús mnabee lo re zha, ne nzhab:

—Yent cho lo gab goo kuu ngok.

Noga nzhab Jesús lo zha:
—Taa goo kuu wu nzaa.

6

*Jesús ngwa yezlyu Nazaret
(Mt. 13:53-58; Lc. 4:16-30)*

¹ Mroo Jesús tyā ne ndya Jesús laz Jesús, kuu nak Nazaret, kon re zha kuu ngeteed lo Jesús. ² Leettsa ngok wiz sabd, wiz kuu nzhoole re nee kuu nak zha Israel lo Diox, tsa mloo Jesús lo re men, ta nkaltaa zha nteed zha xkiiz Diox. Ne kwathoz mzegey leettsoo re zha mbin zha kuu nzhab Jesús, tsa nzhab zha lo altaa zha:

—¿Pa ngwateed zha ree re kuu nzhaak zha? ³ ¡Ne cho mndaa yalnzaak lo zha? ¡Kona nzhaak ntsow zha re kuu thoz kuu gagt tsow re men yezlyu ree! ⁴ ¡Zha ree nak karpinter zhiinn Mari! ¡Ne re wets zha nak: Santiag, Che, Judas ne Simún ne re btan zha nzi lo aa nzhee!

Kona nataagt Jesús lo re zha, ne nzhont zha diz lo Jesús.

⁴ Tsa nzhab Jesús lo re zha:

—Lee re profet kuu ntaal Diox nataak zha reta ta, per lee laz zha ne lo re zha liz zha nataagt zha.

⁵ Kona ngogt gatsow Jesús kwaro kwaaz laz Jesús, beeta chop tsonta zha mxoob Jesús yaa Jesús yeke ne mtegwe Jesús zha. ⁶ Kwathoz mzegey leettsoo Jesús, mne Jesús lee re tawlaaz Jesús nyelaazt Jesús. Tsa mroo Jesús tyā ne ngwa Jesús re yez kuu nzi gaxta zha, ne mloo Jesús lo re men.

*Jesús mtaal re zha kuu ngeteed lo Jesús yataa zha kwent xkiiz Diox
(Mt. 10:5-15; Lc. 9:1-6)*

⁷ Tsa mrez Jesús re tsuibchop zha kuu ngeteed lo Jesús, ne mtaal Jesús chopga chopga zha, ne mndaa Jesús yalnabee lo re zha, tsa koo zha mbi fyer leettsoo re men. ⁸ Noga nzhab Jesús lo re zha:

—Be goo thibka aga ne yentraa kwan gwe goo, neeka bols, neeka kuu wu goo ne neeka temi. ⁹ Anta labiyid kuu nke nii goo be goo, ne ndoblot gwe goo chop net xab goo.

¹⁰ Ne noga nzhab Jesús lo re zha:

—Loka yuu ta tsin goo, tya kwet goo, asta leettsa bi goo tya. ¹¹ Ne os thib ta kayaat zha goo, ne neeka tyalt zha gon zha xkiiz goo, broo goo tya ne btsib goo yuyaaz kuu mke nii goo, tsa ne re zha yeza lee re zha'a went nak, tak mkayaat zha goo.

¹² Ne mroo re zha ngwataa zha kwent xkiiz Diox ne mbez zha, btsee goo mod went kuu nak goo ne btbz yek goo xkiiz Diox. ¹³ Noga mloo zha kwaro mbi fyer leettsoo re men, ne mndaa zha aseyt re mbyiz ne mtegwe zha re mbyiz.

Xomod nguth Juan kuu mtsowleyy re men

(Mt. 14:1-12; Lc. 9:7-9)

14 Ne lee rey Herodes mbin re kuu ntsow Jesús, tak reta ta nyath re kuu ntsow Jesús.

Tsa nzhab rey Herodes:

—Juan kuu mtsowleyy mroban, tata mod nzhaak ntsow zha re kuu gagt tsow re men yezlyu ree.

15 Lee tedib net zha mbez:

—Lee zha nak Lí kuu ngok profet ndala.

Ne tedib net zha nzhab:

—Lee zha nak thib re profet kuu ngoo ndala.

16 Or mbin rey Herodes re kona, tsa nzhab rey Herodes:

—¡Lee zha nak Juan kuu mtaal'n mchuug zha yek, ne nal mroban zha!

17 Tak kwent chaan Herodías, mnabee rey Herodes mzhén zha Juan, mliib zha Juan kon kaden ne mloo zha Juan tsib. Herodías nak tsaal Lip wets rey Herodes. Per lee rey Herodes nak rop Herodías. ¹⁸ Ne lee Juan nzhab lo rey Herodes:

—Went keno'a tsaal wetsa.

19 Kona mnayii Herodías mne Juan, ne nlaaz Herodías kuth Juan, per gagt tsow zhay. ²⁰ Tak nzeb rey Herodes ne Juan, noga ne rey Herodes lee Juan nak thib mbyi wen ne nayon lo Diox, kona nkenap rey Herodes Juan. Ne or kuu nkenza rey Herodes xkiiz Juan net rey Herodes naa kwan tsow rey Herodes, ne kwathoz nyow leettsoo rey Herodes nzhon xkiiz Juan. ²¹ Per mtsow rey Herodes thib ani naro, leettsa mzaal rey Herodes liin, ne mrez rey Herodes re zha kuu nabee lo yezlyu, re zha kuu nabee lo thib mil soldad ne re zha kuu mas nataak kuu nabee yezlyu Galilea. Tsa lee Herodías mwii tak tsow Herodías thib kwaaz. ²² Tsa lee rtsaap Herodías mndaab ta nzo ani ne mkani, ne kwathoz myow leettsoo rey Herodes ne re zha kuu nzi tya xa mkani nzaa, tsa nzhab rey Herodes lo nzaa:

—Bnaab loka kuu nlaaza lon, ne lee na tay.

²³ Ne mtselo rey kruz ne nzhab rey:

—Loka kuu naaba na taay, ne asta garol yezlyu ta nabeen tatan lo'a nzhab rey.

²⁴ Ora mroo nzaa ne mnaabdiz nzaa lo xnaa nzaa, ne nzhab nzaa:

—¿Kwaan naab'n?

Lee xnaa nzaa nzhab:

—Bnaab yek Juan kuu ntsowleyya.

²⁵ Oraaka nda nzaa ta ndob rey, ne nzhab nzaa lo rey:

—¡Nalorka nlaz'n taa'a yek Juan kuu ntsowleyya lon leen thib yann!

²⁶ Or mbin rey kona, kwathoz nabil ngoo leettsoo rey, tak mtselo rey kruz nzhab rey lee rey tsowe, ne reta zha kuu nzi lo ani mbin kuu nzhab rey, kona ngogt raa gatsee

rey xkiiz rey. ²⁷ Oraaka mtaal rey Herodes thib soldad, tsa yaxii soldad yek Juan. ²⁸ Tsa lee soldad ngwa leen tsib mga yek Juan, ne mloo zhay leen thib yann, ne ndyaadno zhay ne mndaa zhay lo nzaa, ne lee nzaa mndaay lo xnaa nzaa.

²⁹ Or mbin re zha kuu ngeteed lo Juan lee Juan nguth, tsa ngwanaab zha kwerp Juan mkaats zha.

*Jesús mndaa kuu ndow gaay mil men
(Mt. 14:13-21; Lc. 9:10-17; Jn. 6:1-14)*

³⁰ Tsaraa lee re zha kuu ngeteed lo Jesús kuu noga le apóstol, mkaltaa kon Jesús, ne mndaa re zha kwent re kuu mtsow zha ne re kuu mloo zha lo re men. ³¹ Tsa nzhab Jesús lo re zha:

—De goo, nda goo anta lee'aa thib ta yent men, tsa roxkwanaa lut.

Tak kwaro men nda ndyaad ne neeka yobt wu re zha. ³² Tsa ngoo Jesús beeta kon re zha kuu ngeteed lo Jesús leen kano, ne ndya re zha thib ta yent men. ³³ Ne naroob men mwii lee re zha nda, ne mlebee re men Jesús; tsa reta men re yez nda par tyu, ne ner re mena mzin nake Jesús kon re zha kuu ngeteed lo Jesús. ³⁴ Leettsa mla Jesús leen kano, mwii Jesús naroob men, tsa mlat leettsa Jesús mne Jesús re zha'a, tak taxal mbak zhii kuu napt bzaan nzhak zha, ne mndelo Jesús mloo kwaro kuu lo re zha. ³⁵ Ne leettsa nda'a or, lee re zha kuu ngeteed lo Jesús mbig lo Jesús, ne nzhab zha:

—Mzi'a yezlyu ne nzhee nak thib ta yubiz. ³⁶ Bchaats re men, tsa ya re zha re ranch kuu nzi gax nzhee, tsa tii zha kuu wu zha.

³⁷ Per lee Jesús mkab lo re zha, ne nzhab:

—Taa goo kuu wu zha.

Tsa nzhab re zha:

—¿chu nlaaza yati nee chop gayoo denario pan, tsa taa nee kuu wu re zha?

³⁸ Lee Jesús nzhab lo re zha:

—¿Plal pan nap goo? ¡Gwa goo gwatwii goo!

Ora ngwatwii re zha, tsa nzhab zha:

—Gaay pan ne chop mbel.

³⁹ Tsa mnabee Jesús lo re zha tob zha por grupga lo yizhwan. ⁴⁰ Ne mndob zha por grupga, nzo ta mrin thib gayooga zha, ne nzo ta mrin garol gayoo zha. ⁴¹ Tsa mzhen Jesús re pan ne rop mbel ne mwii Jesús lobee ne mndaa Jesús texkix lo Diox, ne mtsow rol Jesús pan ne mndaa Jesús pan lo re zha kuu ngeteed lo Jesús, tsa taa zhay lo re men, tataka mtsow rol Jesús rop mbel, ne mndaa re zhay lo re men. ⁴² Reta men ndow asta plotha mze leettsa re men. ⁴³ Ne mrozhooib tsuibchop chekwit pan byu ne mbel. ⁴⁴ Ne lee re men kuu ndow pan tyu ngok teeka gaay mil mbyz.

*Jesús mnde lo nitdoo
(Mt. 14:22-27; Jn. 6:16-21)*

⁴⁵ Leettsa ngwalo ngok kona, ora mtaal Jesús re zha kuu ngeteed lo Jesús, tsa mke re zha leen kano, par rid zha tedib lad roo nitdoo, par tsin zha yez kuu le Betsaida. Lee Jesús myaanka chaats re men. ⁴⁶ Or ngwalo mchaats Jesús re men, ora ngwa Jesús yek yii ngwatediz Jesús lo Diox. ⁴⁷ Ne leettsa mkow yezlyu lee kano nda'a ndrol nit ne lee Jesús myaan thita yubiz, ⁴⁸ ne mwii Jesús lee re zha kuu ngeteed lo Jesús, kwathoz ndakti kon kano lo nitdoo, tak kwathoz nax mbi. Ne zhaaraa na lee Jesús nde ndyaad lo nitdoo, mtsow Jesús taxal zha kuu nlaaz ner lo re zha. ⁴⁹ Or mwii re zha lee Jesús ndyaad lo nitdoo, mtsow re zha xgab, kuu fyera ne mretsyath re zha; ⁵⁰ tak reta zha mwiiy ne nzeb zha. Per ora lee Jesús mni lo re zha ne nzhab:

—¡Bloney goo leettsoo, tsebt goo nay!

⁵¹ Tsa mke Jesús leen kano ta nzo re zha, ne lee mbi mlet; kwathoz mzegey leettsoo re zha mwii zha kuu mtsow Jesús. ⁵² Tak myent re zha naa kwan mtsow Jesús kon re pan, tak ter tsow Diox yen zhay, tak mkow yek zha.

*Jesús mtegwe re mbyiz yezlyu Genesaret
(Mt. 14:34-36)*

⁵³ Tsa mriid Jesús kon re zha kuu ngeteed lo Jesús tedib lad roo nitdoo, tsa mzin re zha yezlyu Genesaret, tya mkedo zha kano roo nitdoo. ⁵⁴ Per or mla re zha leen kano, lee reta men mlebee Jesús. ⁵⁵ Tsa lee re men lijer ngwalo diize re yez gax, ne mbe re men re mbyiz ne nxoob zha re mbyiz lo da ne nyadtaan zha mbyiz ta ndo Jesús. ⁵⁶ Ne reta ta ndaab Jesús re ranch re yez bzhizh ne re yez naro, nyadtaan zha re mbyiz roo yuulow ne roo net ne naab zha lo Jesús, laa Jesús diinn zha xab Jesús; ne lee re zha kuu ndiinn xab Jesús ngwe zha.

7

*Kuu ntsow nambit men lo Diox
(Mt. 15:1-20)*

¹ Thib wiz mkaltaa thiban fariseo lo Jesús, kon thiban maestr kuu nloo ley, re zha'a ndyaad desde yez Jerusalén. ² Or mwii re zha'a lee chop tson zha kuu ngeteed lo Jesús, nat zha nzhaw zha, tsa mkekki re fariseo re zha Jesús. Tak ntsowt zha kuu mtsow re tey zha. ³ Tak lee re fariseo ne reta zha Israel ntsow zha re kuu mloo tey zha lo zha, os lee zha nat zha, wut zha. ⁴ Or ndretab zha nya zha lo xbi, wut zha os ter tsow zha kuu mloo tey zha lo zha, kuu nak na zha, ne kwaro re kuu tata ntsow zha, taxal nteech zha re tas, re yann ne re yet wen wen. ⁵ Tsa lee re fariseo ne re maestr chaan ley mnaabdiz lo Jesús, ne nzhab zha:

—¿Chebee lee re zha kuu ngeteed lo'a ntsowt zha re kuu mloo teyaa, nat zha nzhaw zha?

⁶ Jesúus mkab lo zha, ne nzhab:

—¡Zha nkedi nak goo, zhaa kuu mbez ne zhaa kuu ntsow goo! Wen wen mndaa profet Isai kwent naa xomod nak goo. Or kuu nzhab zha:

Lee re zha yez ree beeta kon roo zha nzhollo zha lon,

ne lee leettsoo zha tith ndo lon.

⁷ Nataagt nzhollo goo lon,

tak kuu nlloo goo nak leyy chaan re men. [Is. 29:13]

⁸ Thib lad nlaa goo xkiiz Diox, leettsa ntsow goo re kuu mloo re tey goo.

⁹ Noga nzhab Jesúus lo re zha:

—Thib lad nlaa goo kuu nabee Diox tsow goo, leettsa ntsow goo re kuu mloo tey goo lo goo. ¹⁰ Tak lee Moisés nzhab: “Bke leettsoo'a xuta ne xnaa'a”. [Ex. 20:12] Noga nzhab lo ley: “Lee zha kuu ngode xute ne xnaa, beth goo zha”. [Ex. 21:17] ¹¹ Per lee goo mbez goo: Tak gab zha lo xut zha ne lo xnaa zha: “Gagt raa tsow'n ayuda, tak reta kuu nkenon nak korban”. (Diiz ree nak: “Retay mndan lo Diox”.) ¹² Ne noga mbez goo, zha kuu tata gab, ndoblot raa tsow zha ayud xut zha ne xnaa zha. ¹³ Tata mod ntsow nataagt goo xkiiz Diox, kon re kuu mloo tey goo lo goo, ne kwaro re kuu tata ntsow goo.

¹⁴ Tsa mrez Jesúus re men, ne nzhab Jesúus lo re zha:

—Bin goo xkiz'n ne byen gooy. ¹⁵ Neeka thib kuu ndaab par roo zha, gagt tsow nambite zha lo Diox, sinke re kuu went kuu ntsin leettsoo zha, kona ntsow nzhab nambit zha lo Diox. ¹⁶ ¡Os lee goo ndob rza goo ndoblo goo yen goo koree!

¹⁷ Leettsa mlaa Jesúus re men tsa mndaaab Jesúus leen thib yuu, ne lee re zha kuu ngeteed lo Jesúus mnaabdiz lo Jesúus, ne nzhab:

—Xomod nak kwent kuu mndaa'a.

¹⁸ Tsa nzhab Jesúus:

—¿Chu no goo nyente? ¿Chu nyent goo neeka thib kuu ndaab par roo zha, gagt tsow nambite zha? ¹⁹ Tak ndaabte leettsoo zha, leey ndaab leyy zha, ne tsaraa ndrooy.

Kon diiz ree nlaaz Jesúus ne, reta kuu tak wu men tak nambiy.

²⁰ Ne noga nzhab Jesúus:

—Re kuu went kuu ntsin leettsoo zha, kona ntsow nzhab nambit zha lo Diox. ²¹ Tak leen leettsoo zha ndrooy re xgab went kuu nak:

Gak rop zha kon ndota zha, lowann zha,

kuth zha taben zha,

²² gak rop zha kon zha kuu nagt tsaal zha, ndablaaz zha keno zha reta kwaa,

ntsow zha reta kuu went,

nkedi zha,

ntsow zha re kuu nlortsint, nawent nzhak leettsoo zha ne zha chaan tedib zha,

ndediz zha diiz yix,

ndrub zha,

ngobeet zha.

²³ Reta kuu went ree ntsin leettsoo zha, ne ntsowe nzhak nambit zha lo Diox.

*Thib ngot tith ngwalaaz Jesúus
(Mt. 15:21-28)*

²⁴ Leettsa mroo Jesúus yezlyu Galilea, tsa nda Jesúus yezlyu Tiro ne Sidón, ne mndaab Jesúus leen thib yuu, tak nlaatz Jesúus yeen choraa zha pa ndo Jesúus. Per ngogt gakaslo Jesúus, ²⁵ tak kwathoz lijer myeen thib ngot kuu nap thib nzaa, kuu nzo mbi fyer leettsoo pa ndo Jesúus, ngota ndyaad lo Jesúus ne mtobxub ngot lo Jesúus. ²⁶ Lee ngota nak thib zha tith zha yez Sirofenicia, ne mnaab ngota lo Jesúus, tsa koo Jesúus mbi fyer kuu nzo leettsoo rtsaap ngot. ²⁷ Per lee Jesúus nzhab lo ngot:

—Laa wu re ndyeen bzhizh ner, tak went kib zha pan lo re ndyeen ne taa zhay lo re mbak.

²⁸ Lee ngot mkab ne nzhab:

—Wliy, Zha Nabee, per noga mbak nzhow mbak re kuu kuu ndrethin ya ndyeen nzhab xann mes.

²⁹ Lee Jesúus nzhab lo ngot:

—Wen mkaba, tyee lee mbi fyer mroo'a leettsoo rtsaapa.

³⁰ Or mzin ngot liz ngot, lee rtsaap ngot ndoba roo luun, ne lee mbi fyer mroo'a leettsoo rtsaap ngot.

Jesúus mtegwe thib zha kuu nakwee ne mud

³¹ Tsa mroo Jesúus yez Tiro ne mriid Jesúus yez Sidón ne re tsii yez kuu nak Decápolis, tsa mzin Jesúus roo nitdo chaan Galilea. ³² Ne tyu ngwano re men thib zha kuu nakwee ne mud lo Jesúus, ne mnaab zha, tsa xoob Jesúus yaa Jesúus dits zha'a. ³³ Tsa ndeno Jesúus zha thib lad lo re men, ne mtob Jesúus kwen Jesúus leen nza zha, ne kom nzuk mdiinn Jesúus lo loz zha. ³⁴ Ora mwii Jesúus lobee ne mndii leettsoo Jesúus, ne nzhab Jesúus lo mbyi'a:

—¡Efata! (Diiz ree nak: “¡Bxaal!”)

³⁵ Oraaka lee nza zha mzhaal, ne lee loz zha mgwe ne wen mndediz zha. ³⁶ Tsa mteni Jesúus re zha, tsa yent cho lo gab zha kuu mtsow Jesúus; per leel masraa mndediz zhay.

³⁷ Kwaro mzegey leettsoo re men, ne nzhab re men:

—¡Xomod ntsow zha ree re kuu tenzhee! ¡Ntsow zha nzhaal nza zha kuu nakwee, ne ntsow zha ndediz zha mud!

8

*Jesús mndaa kuu ndow thap mil zha
(Mt. 15:32-39)*

¹ Ne lee re wiza mkaltaa naroob zha, ne napt zha kuu wu zha. Tsa mrez Jesús re zha kuu ngeteed lo Jesús, ne nzhab Jesús lo re zha:

² —Nlat leettsoon nen re zha ree, tak nda'a tson wiz nzi re'aa nzhee, ne terka wu zha. ³ Os leen taal'n zha liz zha ne wut zha, cha laayal zha net, tak thib an zha ndyaad tith.

⁴ Tsaa lee re zha kuu ngeteed lo Jesús, mkaab lo Jesús ne nzhab:

—¿Per xomod taa'aa loww naroob men thib ta yubiz, taxal nzhee, ta yent cho nak?

⁵ Tsa mnaabdiz Jesús lo re zha, ne nzhab Jesús:

—¿Plal pan nap goo?

Tsa nzhab re zha:

—Gaze.

⁶ Tsa mnabee Jesús lo re men tob zha lo yu, ne mzhene Jesús re gaz pan ne ngwaloo mndaa Jesús texkiz lo Diox, mtsow rol Jesús pan ne mndaa Jesús pan lo re zha kuu ngeteed lo Jesús, ne lee re zha mdiide lo re men. ⁷ Noga nap re zha chop tson mbel; ne mndaa Jesús texkiz lo Diox por re mbela ne mnabee Jesús mdid zha maa. ⁸ Reta zha ndow asta mze leettsoo zha, ne mtse zha gaz chekwit ngoo re kuu byu kuu mrozhooob. ⁹ Ne teeka thap mil zha ndow, tsaraa mchaats Jesús re zha ndya zha laz zha. ¹⁰ Tsaraa lee Jesús kon re zha kuu ngeteed lo Jesús, mke re zhaleen kano ne ndya zha yezlyu kuu le Dalmanuta.

*Lee re fariseo mnaab thib seny lo Jesús
(Mt. 16:1-4; Lc. 12:54-56)*

¹¹ Tsa mzin re fariseo ne mndelo zha mbyodiz zha kon Jesús, tak nlaaz zha ne zha naa chu wli kuu ni Jesús. Tsa nzhab re zha lo Jesús:

—Tsow thib kwaa kuu beeta Diox tak tsow, tsaa ne nee lee Diox mtaala.

¹² Jesús mndii leettsoo ne nzhab:

—¿Chebee naab re men ree thib seny kuu gagt tsow re men? Wlipaa na kuu nin lo goo, neeka thib kuu thoz tsowt'n lo re men nal tyemp ree.

¹³ Tsa mlaa Jesús re men, ne mre Jesús mndaa leen kano ne ndya re zha tedib lad roo nitdo.

*Re kuu mloo re fariseo nak taxal lebadur
(Mt. 16:5-12)*

¹⁴ Ne mtelaazt re zha kuu ngeteed lo Jesús gagwe zha kuu wu zha, thibka zha ne tsaka pan. ¹⁵ Ne leettsoa nda re zha leen kano, tsa nzhab Jesús lo re zha:

—Bkenap goo goo lo lebadur chaan re fariseo ne lo lebadur chaan rey Herodes.

¹⁶ Ora lee re zha mndelo nzhab lo altaa:

—Tbaa ne zha, tak mtelaaztaa gagwe'aa pan.

¹⁷ Jesús myeen kuu ngetediz re zha, tsa mnaabdiz Jesús lo re zha, ne nzhab Jesús:

—¿Chebee mbez goo napt goo pan? ¿Chubee ter yen gooy? ¿Chu thitanax mkow yek goo par yen gooy? ¹⁸ ¿Nap goo ngutlo goo ne nyenite lo goo, nap goo nza goo ne nzhort gooy? ¿Chu thitanax ntelaazt goo? ¹⁹ Leettsa mtsow rol'n pan ndow thib gaay mil mbyi, ¿plal chekwite mrozhooob?

—Tsiibchope —nzhab re zha.

²⁰ —Ne leettsa mtsow rol'n pan ndow thib thap mil mbyi, ¿plal chekwite mrozhooob?

—Gaze —nzhab re zha.

²¹ Tsa nzhab Jesús:

—¿Chu terka yen gooy?

Jesús mtegwe thib zha syeg

²² Leettsa mzin re zha yez kuu le Betsaida, tsa lee thib an zha ndyaadno thib mbyi syeg lo Jesús, ne nzhab re zha lo Jesús:

—Tsow yalwen bxoob yaa'a dits mbyi ree, tsa gwe mbyi.

²³ Tsa mzhene Jesús yaa syeg ne mloo Jesús zha thib lad roo yez, ne mtenit Jesús lo zha kon nzuk, ne mxoob Jesús yaa Jesús yek zha, oraaka mnaabdiz Jesús lo zha, ne nzhab Jesús:

—¿Chu nyeni'a lo'a?

²⁴ Lee syeg mndelo mwii ne nzhab:

—Nloo re zha lon, taxal ya nloo zha.

²⁵ Tsa mre Jesús mdiinn ngutlo syeg, jora lee syeg mwii, tak mgwe'a ngutlo zha ne reta kuu mloo lo zha! ²⁶ Tsa mtaal Jesús zha liz zha, ne nzhab Jesús lo zha:

—Ridta leen yez.

Pey nzhab lee Jesús nak Crist, Zha Kuu Ne Diox Yaad

(Mt. 16:13-20; Lc. 9:18-21)

²⁷ Leettsa lee Jesús ne re zha kuu ngeteed lo Jesús, ngwa re ranch chaan yezlyu kuu le Cesarea-Filipo. Ne or ndo re zha net, tsa mnaabdiz Jesús lo re zha kuu ngeteed lo Jesús, ne nzhab Jesús:

—¿Cho nak'n ni re men?

²⁸ Lee re zha nzhab:

—Thib net zha mbez lee lu nak Juan kuu mtsowleyy, tedib net zha mbez lee lu nak profet Lí zha ndala, ne lee tedib net zha ni lee lu nak thib re profet.

²⁹ —Lee re goo, ¿cho nak'n ndak goo?

Pey mkaab ne nzhab:

—Lu nak Crist Kuu Mtaal Diox Nabee.

³⁰ Per lee Jesús mnabee lo re zha ne nzhab:

—Neeka thib lo zha gabt goo koree.

Jesús mndaa kwent naa xomod gath Jesús

(Mt. 16:21-28; Lc. 9:22-27)

³¹ Jesús mndelo mloo lo re zha kuu ngeteed lo Jesús, ne nzhab Jesús lo re zha:

—Na nak xgann mbyi, Kuu Mzin Ngok Men, ne ndoblo rid'n yalti, ne neeka kayaat re zha gol na neeka re ngwleyy kuu nabee lo re ngwleyy, neeka re maestr chaan ley. Ne kuth re zha na, per leettsa tsaal tson wiz lee na roban.

³² Nambi nzhab Jesús koree. Tsa mloo Pey Jesús thib lad, ne mndelo mkox Jesús lo Pey.

³³ Per lee Jesús mtsere lo mwii lo re zha kuu ngeteed lo Jesús, ne mkox Pey lo Jesús ne nzhab Jesús:

—¡Beche lon, lu nak taxal Maxuuy! Ntsowta xgab taxal ntsow Diox xgab; lu ntsow xgab taxal ntsow re men xgab.

³⁴ Tsa mrez Jesús re zha kuu ngeteed lo Jesús ne re men, ne nzhab Jesús:

—Os lee thib goo nlaaz teke dits'n, ndoblo laa goo reta kuu nap goo, ne reta kuu nzo yek goo tsow goo, ne ndoblo thib ko goo leettsoo goo gath goo, tak nyelaaz goo na.

³⁵ Os lee thib zha nzeb zha gath zha, tak nyelaaz zha na, tsowt zha'a gan yahnaban kuu thitanax. Per lee zha kuu nzebt gath,

tak nyelaaz zha na, zha'a tetsov gan yahnaban kuu thitanax. ³⁶ Per kwan tsow zha gan keno zha reta kwaan nzo yezlyu ree, ne tsowt zha gan yahnaban yibaa.

³⁷ Neeka thib kwaag taa zha lo Diox, par tsow zha gan yahnaban kuu thitanax yibaa. ³⁸ Os lee thib zha nthoy zha ne zha na ne xkiz'n xid re men tyemp ree, re men kuu thitanax mlaa Diox ne thitanax went nak, noga na Kuu Mzin Ngok Men, tethoy'n nen zha'a, leettsa bretab'n kon xni chaan Xut'n ne kon re mandad Xut'n kuu nayon.

9

¹ Noga nzhab Jesús:

—Wlipaa na nin lo goo, nzo goo kuu nzi nzhee, gatht goo asta wii goo naa xa nabee Diox, kon yahnabee chaan Diox.

Mzee mod na Jesús

(Mt. 17:1-13; Lc. 9:28-36)

² Leettsa mzaal xoop wiz lee Jesús ndano anta Pey, Santiag ne Juan zhaata, ne ngwa re zha thib yii naro, tya mzee mod na Jesús lo re yon zha. ³ Kwathoz mla xni xab Jesús, naguz mlooy, tegal mas tzech zha lar, ne tsowt zha gan looy tata. ⁴ Ne mloo lo re zha lee Lí ne Moisés ngetediz lo Jesús. ⁵ Tsa nzhab Pey lo Jesús:

—Maestr, kwathoz wen nzi nee nzhee; nal taa nee tson ramad, thibe par lu, tedibe par Moisés ne lee tedibe par Lí.

⁶ Tata nzhab Pey tak kwathoz mzeb re zha, ne neeka net Pey naa kwan nzhab Pey.

⁷ Ne oraaka lee thib xkow mla ne mtow re yon zha, ne xid xkowa mroo thib bos kuu nzhab:

—Zha ree nak xgann na kuu kwathoz nke leettsoon, bin goo diiz lo zha.

⁸ Ne or mwii re zha re ladta lo re zha, yent raa cho mwii zha, anta Jesús ndo.

⁹ Or kuu ndyaadla re zha mroo zha yek yii, tsa nzhab Jesús lo re zha:

—Yent cho lo gab goo re kuu mloo lo goo, asta tsin wiz kuu lee na, Kuu Mzin Ngok Men roban.

¹⁰ Ne mbin re zha diiz, ne yent cho lo nzhab zhay, per kwaro welt naabdiz zha lo altaa zha, naa xomod nak kuu roban men nguth. ¹¹ Tsa mnaabdiz re yon zha lo Jesús ne nzhab zha:

—¿Chebee ni re maestr kuu nloo xkiiz Diox, ner profet Lí zha ndala yaad?

¹² Lee Jesús nzhab:

—Wli lee Lí ner yaad, tsa to list zha re kwaan. Ne ¿chebee nzhab xkiiz Diox: “Lee na Kuu Mtaal Diox Ngok Men, ndoblo rid'n yalti ne tsow nataagt re men na”? ¹³ Per lee na nilo goo, lee Lí myaada ne mtsow re men loka kuu nlaaz re men lo Lí, taxal nkey lo xkiiz Diox.

Jesús mtegwe thib zha mndyeen kuu nzo mbi fyer leettsoo

(Mt. 17:14-21; Lc. 9:37-43)

¹⁴ Leettsa mretab Jesús kon Pey, Santiag ne Juan, tsa mzin Jesús ta nzi reta zha kuu ngeteed lo Jesús, tsa mwii Jesús kwaro men nzi lo re zha, ne lee re maestr chaan ley ngeyodiz kon re zha kuu ngeteed lo Jesús. ¹⁵ Ne or mwii re zha Jesús, reta zha mzegey leettsoo ne mrezzhon zha mni zha “diox” lo Jesús. ¹⁶ Tsa mnaabdiz Jesús lo re zha, ne nzhab Jesús:

—¿Kwan ngeyodiz goo kon tedib net zha baa?

¹⁷ Tsa lee thib zha kuu ndo xid re mena mkaab ne nzhab:

—Maestr, lee na ndyaadno xgann na lo'a, tak nzo thib mbi fyer leettsoo nyo, ne mtaan mude nyo. ¹⁸ Ndota ta ndo nyo lee mbi fyer nden nyo ne ngobi yno lo yu; ne ntsowe ndroo btsiin roo nyo ne ntube keley nyo ne ntely nyo. Kona kwathoz mlache nyo. Ne mnaaba na lo re zha kuu ngeteed lo'a, tsa koo zha mbi fyer baa leettsoo nyo, per ngogt gatsow zhay.

¹⁹ Jesús mkaab ne nzhab:

—¡Cho klas men nak goo! ¿Chebee nyelaazt goo lee Diox tak tsow koree? ¿Asta pol ton lo goo? ¿Asta pol kez leettsoon nen goo? Deno goo nyo nzhee.

²⁰ Tsa ngwano zha nyo lo Jesús, per or mwii mbi fyer Jesús, ora mlobi mbi fyer nyo lo yu ne mtsow mbi fyer mzhaak nyo yizguthye. ²¹ Jesús mnaabdiz lo xut nyo ne nzhab:

—¿Pol mndelo yiz ree lo nyo?

Lee xut nyo mkaab ne nzhab:

—Asta lut nyo mziibe. ²² Ne kwaro welt ngobi mbi nyo lo ki ne lo nit, tak nlaaz mbi

kuth mbi ny, os lee'a tak koo'a mbi fyer baa leettsoo ny, blat leettsoo'a ne'a nee, btsow ayud nee.

²³ Lee Jesús nzhab:

—¿Chebee mbeza chu take? ¡Reta kuu tak, os lee'a nyelaaaz luy!

²⁴ Tsa lee xut ny mrez dib gan ne nzhab:

—Nyelaz nay, btsow ayud'n tsa masraa yelaz nay.

²⁵ Ne or mwii Jesús kwaro men ndetsin, tsa mkox mbi fyer lo Jesús ne nzhab Jesús:

—Mbi fyer kuu ntsow nakwee ny ne kuu tsow mud ny. Na nabee lo'a, broo leettsoo ny ne bret raa lu taba leettsoo ny tedib welt.

²⁶ Tsa lee mbi fyer mreetsyath ne mtsow mzhaak ny yizguthye tedib welt, ne mroo mbi'a leettsoo ny ne mtaane ny taxal zha nguth. Ne lee re zha kuu nzi ty a nzhab:

—Nguth ny.

²⁷ Per lee Jesús mzhenn yaa ny ne mlit Jesús ny, tsa ngwateli ny.

²⁸ Tsaraa mndaab Jesús kon re zha kuu ngeteed lo Jesús leen thib yuu, tsa mnaabdiz re zha lo Jesús, ne nzhab zha:

—¿Chebee ngogt gagoo nee mbi fyera?

²⁹ Lee Jesús nzhab:

—Reta mbi kuu tabaa gagt rooy tabaata, ner ndoblo naab mene lo Diox.

Jesús mndaa kwent tedib welt naa xomod gath Jesús

(Mt. 17:22-23; Lc. 9:43-45)

³⁰ Tsa mroo re zha ty a ne mriiid zha yezlyu Galilea. Per lee Jesús nlaatz ne re men naa pa ndo Jesús. ³¹ Ne mloo Jesús lo re zha kuu ngeteed lo Jesús, ne nzhab Jesús:

—Na nak Zha Kuu mtaal Diox Ngok Men, ne taa zha na lo re zha kuu nak tsii ne kuth zha na, per leettsa tsaal tson wiz lee na roban.

³² Per lee re zha myent zha kuu nzhab Jesús, ne nzeb zha naabdiz zha lo Jesús.

Cho nak zha kuu mas nataak

(Mt. 18:1-5; Lc. 9:46-48)

³³ Ne mzin re zha thib yez kuu le Caper-naúm, or mzin re zha thib yuu. Tsa lee Jesús mnaabdiz lo re zha, ne nzhab:

—¿Kwaan mbyodiz goo net?

³⁴ Per neeka thib zha mkaabt, tak leettsa ndo re zha net nzhab re zha: “¿Cho'aa nak zha kuu mas nataak?” ³⁵ Tsa mndob Jesús ne mrez Jesús re tsuibchop zha kuu ngeteed lo Jesús, ne nzhab Jesús lo re zha:

—Os lee thib goo nlaaz gak zha kuu mas nataak, ndoblo gak goo zha kuu lortsin lo re men.

³⁶ Ne mto Jesús thib ndyeen lut ndrol, ne mdeez Jesús ndyeen, ne nzhab Jesús:

³⁷ —Loka cho nkayaa thib ndyeen lut tak nyelaaaz zha na, noga nkayaa zha na, ne noga nkayaa zha, zha kuu mtaal na.

Lee re zha kuu nayit ne'aa nzo zha fabo-raa

(Lc. 9:49-50; Mt. 10:42)

³⁸ Tsa nzhab Juan lo Jesús:

—Maestr, ne nee lee thib zha ngoo mbi fyer kon le'a, per nagt zha, zha'aa, kona nzhab nee lo zha: “Tsowt raa luy”.

³⁹ Tsa nzhab Jesús:

—Blaa goo yent kwan gab goo lo zha. Tak thib zha kuu ntsow thib kuu thoz kon len, ndoblot looz zha na, or ngwalo mtsow zhay. ⁴⁰ Tak reta zha kuu nayit ne'aa nzo zha'a fabo-raa. ⁴¹ Wlipaa na nin, loka cho taa thib bas nit gu goo, tak nak goo zha da, wlipaa na lee Diox kizhe lo zha.

Koree nak falt

(Mt. 18:6-9; Lc. 17:1-2)

⁴² —Loka cho tsow lee thib re zha kuu nyelaaaz na ne nzhon diiz xkiz'n tsow kuu went, mas wen liib zha thib ke naro yen zha'a ne kobi zha zha'a leen nitdoo. ⁴³ Os lee thib yaa'a ntsow ntsowa thib kuu went, ta bchuuge mas wen tunka ne tsowa gan yalnaban kuu thitanax, nake nkeno'a rop yaa'a ne ndya'a gabil ta thitanax nyuyyt bel, ⁴⁴ ta neeka mbyaat nlux, ne neeka nyuyyt bel. ⁴⁵ Ne os lee thib nii'a ntsow ntsowa kuu went taa bchuuge, mas wen tunka ne tsowa gan yalnaban kuu thitanax, nake nkeno'a rop ngutlo'a ne ndya'a gabil. ⁴⁶ Ta neeka mbyaat nlux, ne neeka nyuyyt bel. ⁴⁷ Os lee thib ngutlo'a, ntsow ntsowa kuu went, taa blooy mas wen nkeno'a thibka ngutlo'a ne tsowa gan yalnaban kuu thitanax, nake nkeno'a rop ngutlo'a ne ndya'a gabil, ⁴⁸ ta neeka mbyaat nlux, ne neeka nyuyyt bel.

⁴⁹ —Reta men gak natsig kon ki. ⁵⁰ Wen ted leettsa natsig ted, per os lee ted natsigt raa ted, gagt raa gak natsig ted tedib welt, ndoblo gak natsig goo taxal ted lo re men yezlyu ree, ne wen brin goo re altaa goo.

10

Jesús mloo went laa zha tsaal zha

(Mt. 19:1-12; Lc. 16:18)

¹ Tsa mroo Jesús yez Capernaúm ngwa Jesús yezlyu Judea, tedib lad roo yoo Jordán, ty mre mkaaltaa re men lo Jesús, tsa mloo Jesús lo re men, taxal ntsowka Jesús. ² Tsa mzin re fariseo, ne mnaabdiz zha lo Jesús, ne nzhab zha:

—¿Kwaan nzhab lo ley? ¡Chu tak laa thib mbyi tsaal mbyi! Tata nzhab zha, tak nlaaz zha keki zha Jesús, tsa tak ten zha Jesús.

³ Tsa nzhab Jesús lo re zha:

—¿Xomod nzhab lo ley chaan Moisés?

⁴ Tsa nzhab re zha:

—Moisés nzhab, tak laa mbyi tsaal mbyi, anta ndoblo taa mbyi thib yeets kuu mroo yuulow, ta nzhab lee mbyi mtso rop tsaal.

⁵ Tsa nzhab Jesús lo re zha:

—Tata nzhab Moisés lo re teyaa tak kwathoz nad zha. ⁶ Per leettsa mdexkwaa Diox yezlyu, thibka mbyi ne thibka ngot mtsaal Diox. ⁷ Kona nzhab Diox: “Lee mbyi ndoblo roo zhaa mbyi lo xut mbyi ne lo xnaa mbyi, tsa tseyaa mbyi kon ngot mbyi, ⁸ ne lee rop zha gak taxal thibka zha”. [Gn. 2:24] Kona nagt raa zha chop zha, sinke thibka men nak zha rop zha. ⁹ Diox mtsaal rop zha, kona ndoblot laa mbyi tsaaal mbyi.

¹⁰ Leettsa ndo'a Jesús kon re zha kuu ngeteed lo Jesús yuu, tsa mnaabdzíz re zha lo Jesús leeka kona. ¹¹ Tsa nzhab Jesús lo re zha:

—Loka cho mbyi kuu laa tsaal, ne kaa mbyi tedib ngot, ndaa mbyi thib falt ro lo tsaal mbyi kuu ner, ¹² noga ngot kuu laa tsaal, ne kaa ngot tedib mbyi, ndaa ngot thib falt ro lo tsaal ngot kuu ner.

Jesús mnaab tsow Diox kuu wen lo re ndyeen bzhizh

(Mt. 19:13-15; Lc. 18:15-17)

¹³ Ne myaadno re men re ndyeen bzhizh lo Jesús, tsa xoob Jesús yaa Jesús yek re ndyeen, per lee re men kuu ndyaadno ndyeen mkox lo re zha kuu ngeteed lo Jesús. ¹⁴ Or mwii Jesús kona, mnayii Jesús lo re zha kuu ngeteed lo Jesús, ne nzhab Jesús:

—Laa goo yaad re ndyeen lon, ne towt goo lo ndyeen, tak Diox nabee leettsoo re zha kuu nak taxal re ndyeen. ¹⁵ Wlipaa na kuu nin lo goo, loka cho goo taat diiz nabee Diox leettsoo goo, taxal re ndyeen ree, gagt tab goo ta nabee Diox.

¹⁶ Ne mdeez Jesús re ndyeen, ne mxoob Jesús yaa Jesús yek re ndyeen, ne mnaab Jesús lo Diox tsa kenap Diox re ndyeen.

Jesús ne zha rik

(Mt. 19:16-30; Lc. 18:18-30)

¹⁷ Thib wiz or ndaroo Jesús roo yez, mrozhonn thib zha ne mtobxub zha lo Jesús, ne nzhab zha:

—Maestr wen, ¿kwan tsow'n tsa tsow'n gan yalnaban kuu thitanax?

¹⁸ Jesús mkab lo zha:

—¿Chebee, zha wen ne'a lon? Neeka thib zha wen yent, beeta Diox nak zha wen. ¹⁹ Ne, ne'a lu re kuu mtaan Diox tsowa. Kuu nak re koree:

Kuththa tabena,
gagt ropa kon thib zha kuu nagt tsaaal,
lowannta,
kedita,
bke leettsaa' xuta ne xnaa'a.

²⁰ Tsa mkab zha ne nzhab zha:

—Desde lut'n ngetsow'n reta kona.

²¹ Jesús mwii lo zha ne mke leettsaa' Jesús zha, tsa nzhab Jesús lo zha:

—Thibka kuu ter tsowa, tyee ne btho reta kuu napa ne btaay lo re prob, tsa keno'a kwaro kwaa yibaa, ne bteke dits'n.

²² Per leettsa mbin zha tata nzhab Jesús lo zha, kwathoz nabil ngoo leettsaa' zha, tak naroob kwaa nap zha, ne ngoo zha net ndya zha. ²³ Tsa mwii Jesús lo re zha kuu ngeteed lo Jesús, ne nzhab Jesús:

—Kwathoz nagan laa thib zha rik nabee Diox leettsaa' zha.

²⁴ Ne kwathoz mzegey leettsaa' re zha kuu ngeteed lo Jesús, leettsa mbin zha kona, per lee Jesús mre mni lo re zha, ne nzhab:

—Re goo kuu nak taxal Xgann na, aka kwathoz nagan tab thib zha rik ta nabee Diox. ²⁵ Mas nagan rid thib kamey yeer kuu le ngutlo abuj, nake tab thib zha rik ta nabee Diox.

²⁶ Reta zha kuu ngeteed lo Jesús kwathoz ntsoo zha xgab, ne nzhab zha:

—Os leey tabaay, ¿cho kuu tsow gan ndya yibaa tsaa?

²⁷ Jesús mwii lo re zha, ne nzhab lo re zha:

—Lo re men yezlyu ree gagte, per lee Diox reta kuu tak tsow Diox.

²⁸ Tsa lee Pey nzhab lo Jesús:

—Per lee re nee, reta kuu mlaa nee, ne ndeke nee ditsa.

²⁹ Ne lee Jesús nzhab:

—Wlipaa na nin, loka cho zha laa liz, wets, btan, xut, xnaa, zhiinn, oyu zha, tak nyelaaz zha na ne nlaaz zha taa zha kwent Diiz Chul chaan da, ³⁰ wlipaa na gayoo welt tebre, liz zha, wets zha, btan zha, xnaa zha, zhiinn zha, ne yu zha lo zha, per noga teteriid re zha zha yalti lo yezlyu ree, per tetsin wiz kuu lee zha kayaa yalnaban kuu thitanax. ³¹ Wiza lee zha kuu nataak nal gak zha kuu nataagt raa tsya, ne lee zha kuu nataagt nal zha'a gak zha kuu nataak tsya.

Myon welt mndaa Jesús kwent naa xomod gath Jesús

(Mt. 20:17-19; Lc. 18:31-34)

³² Tsa ngoo Jesús net nda Jesús yez Jerusalén, ne mndener Jesús lo re men kuu ndeke dits Jesús, ne kwathoz mzegey leettsaa' re zha, ne kwathoz ntsoo zha xgab. Tsa mndeno Jesús re zha kuu ngeteed lo Jesús tedib lad, ne nzhab Jesús re kuu rid Jesús lo re zha. ³³ Ne nzhab Jesús:

—Bin goo koree. Nda goo re'a Jerusalén ta taa zha na Kuu Mtaal Diox Ngok Men, lo re ngwleyy kuu nabee lo re ngwleyy, lo re maestr kuu nlloo xkiiz Diox, ne lo re zha kuu nagt zha Israel, tsa kuth re zha na. ³⁴ Zhizno zha na, kin zha na, tsuk zha lon ne kuth zha na, per leettsa tsaaal tson wiz lee na roban.

Santiag ne Juan mnaab thib kuu nagan
(Mt. 20:20-28)

³⁵ Santiag ne Juan kuu nak rop xgann Zebedeo, ngwa lo Jesús ne nzhab:

—Maestr, nlaaz nee tsowa thib yalwen kuu naab nee lo'a.

³⁶ Tsa mkab Jesús ne nzhab Jesús:

—¿Kwan nlaaz goo?

³⁷ Tsa lee rop zha nzhab:

—Taa diiz tob thib nee lad ban ne lee tedib nee tob lad beg lo'a, leettsa nabee'a.

³⁸ Tsa nzhab Jesús lo rop zha:

—Net goo kwan ngenaab goo. ¿Chu texek goo rid goo yalti kuu mera riid'n, ne gath goo taxal gath'n?

³⁹ Tsa nzhab rop zha:

—Texek nee.

Jesús nzhab lo rop zha:

—Wli teriid goo yalti taxal rid nay ne gath goo taxal gath'n. ⁴⁰ Per tob'n goo lad ban ne lad beg lon, nagt na cho taa kona. Leey kayaay re zha kuu naka diiz kayaay.

⁴¹ Ne or mbin tedib tsii zha kuu ngeteed lo Jesús kona, tsa mnayii zha mne zha Juan rop Santig. ⁴² Tsa mrez Jesús re zha, ne nzhab Jesús lo re zha:

—Wen ne goo, lee re zha kuu nabee lo yezlyu ree, kwathoz nabee zha lo re zha kuu nzi lo zha, ne tataga re zha kuu nataak kwathoz nabee zha lo re zha zha. ⁴³ Per lee lo re goo, gagte tata, zhaa gake, loka cho nlaaz gak zha kuu nataak lo re goo, zha'a ndoblo gak zha kuu lortsin lo goo. ⁴⁴ Ne loka cho nlaaz nabee lo re goo, zha'a gak zha kuu lortsin lo re goo. ⁴⁵ Tak na nak Zha Kuu Mzin Ngok Men, ne ndyalt'n tsa lortsin re men lon, sinke lee na ndyal'n tsa lortsin na lo re men, ne gath'n por re men, tsa telaan naroob men lo yalguth, ne tan yahnaban lo re zha.

Jesús mtegwe ngutlo Bartimeo

(Mt. 20:29-34; Lc. 18:35-43)

⁴⁶ Tsa ngwa re zha yez Jericó, ne leettsa lee Jesús ndarao'a roo yezza kon re zha kuu ngeteed lo Jesús, ne kon re men kuu mndeke dits Jesús. Tsa lee thib zha syeg kuu le Bartimeo ndob ngenaab gon roo net, zha'a nak xgann Timeo. ⁴⁷ Leettsa mbin syeg lee Jesús zha yez Nazaret nda tya, tsa mndelo syeg mrez dib gan ne nzhab:

—Jesús xgann David, blat leettsoo'a ne'a na.

⁴⁸ Tsa lee tyen zha mnayii lo syeg, ne nzhab zha lo syeg:

—¡Tow roo'a!

Per lee syeg masraa mrez, ne nzhab:

—Jesús xgann David, blat leettsoo'a ne'a na.

⁴⁹ Tsa mlet Jesús ne nzhab Jesús:

—Brez goo zha.

Tsa mrez zha syeg ne nzhab zha lo syeg:

—Wen bloo leettsoo'a ne gwateli, tak lee Jesús negebez lu.

⁵⁰ Lee syeg mkee thibka brink ne mlobi xabits thib lad ne mbig lo Jesús. ⁵¹ Tsa mnaabdz Jesús lo syeg, ne nzhab Jesús:

—¿Kwaan nlaaza tsow'n lo'a?

Lee syeg mkab ne nzhab:

—Maestr, nlaz'n yeni lon.

⁵² Lee Jesús nzhab lo zha:

—Tyee, tak kon dib ndroo leettsoo'a ng-walaaza lee'a gwe, kona mgwe'a.

Ne oraaka lee lo zha mzhaal, ne mndeke zha dits Jesús.

11

Jesús mndaab leen yez naro Jerusalén
(Mt. 21:1-11; Lc. 19:28-40; Jn. 12:12-19)

¹ Or kuu ndetsin gaxa re zha yez naro Jerusalén, tsa mzin re zha gax rop yez kuu le Betfagé ne Betania, gax yii kuu le Olib, tsa mtaal Jesús chop zha kuu ngeteed lo Jesús, ² ne nzhab Jesús lo rop zha:

—Gwa goo yez kuu nzi baa. Ne or tab goo yeza, tya yetsal goo thib burr yeen kuu ndekedoo, thib maa kuu neeka thib zha ter ke. Xak goo maa ne yaadno goo maa. ³ Ne os cha naabdiz lo goo ne: “¿Chebee ntsow goo kobaa?” Tsa gab goo lo zha: “Lee Zha Nabee ndeche maa, tsaraa yaadtaan zha maa”.

⁴ Ne ngwa rop zha ne mzal zha burr, lee burr ndekedoo roo pwert thib lad roo net ne mxak zha burr.

⁵ Ne lee chop tson zha kuu nzi tya mnaabdz lo rop zha ne nzhab:

—¿Kwan ngetsoo goo? ¿Chebee ngexak goo burr?

⁶ Lee rop zha mkab taxal nzhab Jesús lo zha, tsa mlaa re zha'a rop zha. ⁷ Ne ndyaadno rop zha burr lo Jesús, ne mxoob re zha xab zha dits maa, tsa mke Jesús dits maa. ⁸ Kwaro zha mdix xab laaz net, ne tedib net zha mga baat ne mdix zhay laaz net. ⁹ Ne lee re zha kuu ndener ne re zha kuu ndeke, tenzhee mbez re zha:

—¡Aka wen nak Diox! ¡Wen nak zha kuu ndyaad kon le Zha Nabee! ¹⁰ ¡Aka wen leettsa nabee zha taxal mnabee teyaa David zha ndala! ¡Kwathoz wen nak Diox kuu ndob yibaa!

¹¹ Tsa mndaab Jesús leen yez naro Jerusalén, ne ngwa Jesús lee roo gwodoo ne mwii Jesús re ladta, ne mzi'a yezlyu, tsa nda Jesús yez Betania kon re zha kuu ngeteed lo Jesús.

Jesús mlode ya ig
(Mt. 21:18-19)

¹² Tedib wiz leettsa mroo re zha yez Betania, mlann Jesús. ¹³ Ne titi mloo thib ya ig kuu ndab la lo Jesús, tsa ngwa Jesús lo ya naa chu ndab xle lo ya. Per or mzin Jesús xann ya yent xle lo ya, beeta la ndab lo ya, tak nagt tyemp kuu ndaa ya xle. ¹⁴ Tsa nzhab Jesús lo ya ig:

—Neeka tedib welt wut raa zha xle lo'a.

Ne mbin re zha kuu ngeteed lo Jesús, kuu nzhab Jesús.

*Jesús mtezhonn re men lee gwodoo
(Mt. 21:12-17; Lc. 19:45-48; Jn. 2:13-22)*

¹⁵ Leettsa mzin Jesús yez naro Jerusalén, tsa mndaaab Jesús lee roo gwodoo naro, ne mndelo Jesús mloo re zha kuu ntho, ne re zha kuu ndi. Ne mlobi Jesús re mes chaan re zha kuu ntsiil temi, ne mlobi Jesús re asi chaan re zha kuu ntho palom.¹⁶ Neeka thib re zha kuu ndyaadno kuu ntho, mlaat Jesús gariid lee roo gwodoo.¹⁷ Ne mndelo Jesús mloo Jesús lo re men ne nzhab Jesús:

—Lo xkiiz Diox nzhab: “Lee liz'n nak yuu ta ndediz re men lo Diox”, per lee re goo ntsowe taxal liz wann.

¹⁸ Ne mbin re ngwleyy ne re maestr kuu nloo xkiiz Diox re kuu nzhab Jesús, tsa mndelo zha nkwaan zha naa xomod kuth zha Jesús, tak nzeb re zha ne zha re men yez, tak reta men yez nyow leettsa xa nloo Jesús, ne kwathoz mzegey leettsa re zha xa nloo Jesús.¹⁹ Per leettsa mzi'a yezlyu, tsa mroo Jesús kon re zha kuu ngeteed lo Jesús yeza.

*Lee ya ig mbiz
(Mt. 21:20-22)*

²⁰ Ne til tedib wiza, leettsa mriid re zha lo ya ig, tsa mwii zha lee dib lozh ya mbiz.

²¹ Tsa mtelaaz Pey kuu nzhab Jesús tedib wiza, tsa nzhab Pey lo Jesús:

—Maestr, wii lee ya ig kuu mlode'a mbiza.

²² Jesús mkab ne nzhab:

—Gwalaaz goo kon dib ndroo leettsa goo, lee Diox tak tsow reta kwaa.²³ Wlipaa na nin lo goo, loka cho thib zha kuu gab lo yii ree: “Beche nzhee ne bla leen nitdooy”, ne os gagt chop xgab zha, sinke yelaaz zha lee Diox tak tsowe ne leey gak.²⁴ Tata nin lo goo, reta kuu naab goo lo Diox, gwalaaz goo lee Diox taay ne tekayaa gooy.²⁵ Ne or tediz goo lo Diox, bloo goo yek goo reta kuu went kuu mtsow taben goo lo goo, tsa noga Xutaa kuu ndob yibaa, tuyy reta kuu went kuu mtsow goo.²⁶ Tak os lee goo koot goo yek goo, re kuu went kuu mtsow taben goo lo goo, noga Xutaa kuu ndob yibaa tuyyt zha reta kuu went kuu mtsow goo lo zha.

*Jesús nak Zha Nabee
(Mt. 21:23-27; Lc. 20:1-8)*

²⁷ Tsa mre re zha yez Jerusalén, ne or lee Jesús ndiy lee roo gwodoo, tsa ngwa re ngwleyy kuu nabee lo re ngwleyy, re maestr chaan ley ne re zha gollo Jesús.²⁸ Tsa nzhab re zha lo Jesús:

—¿Cho mndaa diiz lo'a ntsowa koree? Ne ¿cho nabee lo'a tsow luy?

²⁹ Jesús mkab ne nzhab:

—Noga na naabdiz'n thib kuu lo goo. Os lee goo kab goo kuu naabdiz'n lo goo, tsasi

tenin lo goo naa cho mndaa diiz ntsow'n koree.³⁰ ¿Cho mtaal Juan kuu mtsowleyy re men? ¿Chu Diox mtaal zha o re men mtaal zha? ¡Kab goo!

³¹ Tsa lee re zha mndelo zha nzhab zha lo re altaa zha:

—Os lee'aa gabaa: “Diox mtaal zha”, tsa ne zha lo'aa: “¿Chebee ngwalaazt goo kuu ne zha?”³² Ne os lee'aa gabaa: “Re men mtaal zha...”, per gagt gabaa tata —nzhab re zha.

Tak nzeb re zha ne zha re men, tak ne re men yez lee Juan nak profet kuu mndaa kwent xkiiz Diox.

³³ Tsa nzhab re zha lo Jesús:

—Net nee cho mtaal zha.

Tsa nzhab Jesús lo re zha:

—Neeka na nit'n lo goo, naa cho mndaa diiz ntsow'n koree.

12

Kwent chaan re zha kuu went mke tsiiin lo yu tedib zha

(Mt. 21:33-46; Lc. 20:9-19)

¹ Tsa mndelo Jesús mni lo re zha por kwent nanzee, ne nzhab Jesús:

—Lee na ta thib kwent chaan thib zha kuu mxeen luts ub dita lo yu, ne mtow zha dibé kon btsin ke, ne mdexkwaa zha thib ta tii zha ub. Noga mdexkwaa zha thib yuu naro ta nloo dita lo yu zha lo zha. Ne mndaa zha yu zha lo tedib net zha gaane, ne mroo zha nda zha tithe.² Ne leettsa mzin tyemp kuu thop zha ub, tsa mtaal zha thib mos zha lo re zha kuu ngonn lo yu zha, tsa tsow rol zha re ub kuu dop.³ Per lee re zha kuu nzhan lo yu zha mzhen zha mos ne mdin zha mos, ne yent kwan mndaa zha lo mos, or kuu mtaal zha mos.⁴ Tsalee zha kuu nak chaan yu mre mtaal tedib mos, per lee re zha kuu nzhan lo yu mdin mos, ne mle zha yek mos, ne mloo zha yalnathoy chaan mos ne mzhizzo zha mos.⁵ Tsalee zha kuu nak chaan yu mre mtaal tedib mos, per lee re zha kuu nzhan lo yu mbeth zha mos. Tsa lee zha kuu nak chaan yu mtaal tyen mos, per thib net mos mloo zha grid, lee tedib net mos mbeth zha.

⁶ Neeka tedib mos myaant raa lo zha kuu nak chaan yu'a, beeta thibka xgann zha, kuu kwathoz nke leettsa zha. Per mas bluz mtaal zha xgann zha, tak mtsow zha xgab nzhab zha: “Lo xgann na si ton re zha diz”.

⁷ Per lee re zha kuu nzhan lo yu zha nzhab lo altaa: “Zha ree kayaa yu leettsa gath zha kuu nak chaan yu, nda kuthaa zha tsa yaan dita yu lo'aa, ne gake chaanaa”.⁸ Tsa mzhen re zha xgann zha kuu nak chaan yu'a ne mbeth zha zha, ne mni re zha zha thib lad ta nzhannt zha, tabaa nak kwent.

⁹ Tsa mnaabdiz Jesús lo re zha, ne nzhab Jesús:

—¿Kwan ntsow goo xgab? ¿Kwan tsow zha kuu nak chaan luts ub? Yaad zha, ne kuth

zha re zha kuu ngonn lo yu zha ne taa zha yu zha lo tedib net zha.

¹⁰ ¿Chu ter lab goo lo xkeets Diox? Ta nzhab:

Lee ke kuu mni re zha kuu ndexkwaa yuu, leey nak thib ke kuu mas wen kuu ndob skin yuu.

¹¹ Lee Diox, Zha Nabee mtsow koree, ne kwathoz nzegey leettssoo'aa mwii leey. [Sal. 118:22-23]

¹² Tsa mkwaan re zha naa xomod ten zha Jesús, tak myeen re zha lee kwent nanzee kuu mndaa Jesús, ndaa kwent naa xomod nak re zha, per nzeb re zha ne zha re men, tsa mlaa re zha Jesús ne ndya zha.

Ngwalaaz zha gakeki zha Jesús

(Mt. 22:15-22; Lc. 20:26)

¹³ Tsa mtaal re fariseo chop tson fariseo, ne chop tson zha rey Herodes ngwa lo Jesús, tsa naa kwan gab Jesús lo re zha, tsa tak keki zha Jesús. ¹⁴ Or mzin re zha lo Jesús ne nzhab zha:

—Maestr, nee no lee'a nak thib zha wen ne nali, ndat leettssoo'a re kuu ni zha lu, ne yewal ni'a lo re men, ne ngwiita chu nataak zha o nataagt zha, sinke nali nloo'a xnet Diox. ¿Chu ndoblo nee kix nee kwent chaan yezyu lo Gobyern César kuu nabee Roma, o chu ndoblot kix neey?

¹⁵ Per lee Jesús ne'a naa kwan ntsow re zha xgab, tsa nzhab Jesús lo re zha:

—¿Chebee nlaaz goo kici goo na? Deno goo thib temi Roma lon, tsa wii nay.

¹⁶ Tsa ndyaadno zha thib temi lo Jesús, ne mnaabdiz Jesús lo re zha, ne nzhab Jesús:

—¿Cho yek, ne cho le nke loy?

Tsa mkab re zha, ne nzhab zha:

—Caan gobyern César.

¹⁷ Tsa lee Jesús mkab ne nzhab lo re zha:

—Btaa goo lo César kuu ndoblo César, ne btaa goo lo Diox kuu ndoblo Diox.

Or mbin re zha tata nzhab Jesús, kwathoz mzegey leettssoo re zha.

Yalnaabdiz chaan yalroban

(Mt. 22:23-33; Lc. 20:27-40)

¹⁸ Tsa ngwa chop tson saduceo lo Jesús, re zha'a ntsow xgab: "Lee re men nguth robant". Tsa ngwanaabdiz zha lo Jesús ne nzhab zha:

¹⁹ —Maestr, Moisés mke lo xkeets Diox nzhab: "Os lee thib mbyi kuu mtseya nguth ne mkenot mbyi neeka thib zhiinn mbyi, tsa lee wets mbyi ndoblo tseyaa kon tsaa mbyi kuu ngutha, tsa keno wets mbyi zhiinn mbyi, tsa luxt raz chaan mbyi". [Dt. 25:5] ²⁰ Thib welt ngoo gaz zha re wets zha. Lee zha kuu ner mtseya ne nguth, ne mkenot zha neeka thib zhiinn zha. ²¹ Lee tedib wets zha kuu ndeke dits zha mtseya kon ngota, ne noga zha'a nguth ne neeka thib mbet mkenot zha, ne tataka ngok kon

zha myon. ²² Ne tataka re gazta wets zha mtseya kon ngota, ne neeka thib zha mkenot zhiinne kon ngota, ne bluz noga ngot nguth. ²³ Leettsa roban re men, ¿cho gak tsaal ngota, tak re gazta zha mkaa ngot?

²⁴ Tsa mkab Jesús, ne nzhab Jesús:

—Lee na ni lo goo, ¡ngwatsaa xgab goo! Tak nyent goo xomod nak xkiiz Diox. ¿Chu net goo kwathoz ney Diox ne tak tsow Diox reta kwaa? ²⁵ Leettsa roban re men, neeka mbyi ne neeka ngot tseyat raa, sinke lee zha gak taxal re mandad chaan Diox kuu nzo yibaa. ²⁶ Wli lee re zha nguth roban, ¿chu ter lab goo xkeets Diox kuu mke Moisés leettsa mni Diox lo Moisés xid bel chaan ya bxiid? Leettsa nzhab Diox lo Moisés: "Lee na nak Diox chaan Abraham, Diox chaan Isaac ne Diox chaan Kob". [Ex. 3:6] ²⁷ ¡Nagt Diox, Diox re zha nguth, lee Diox nak Diox lo re men kuu naban! ¡Thitanax ngwatsaa xgab goo!

Diiz kuu mas nataak

(Mt. 22:34-40)

²⁸ Tsa mzin thib maestr kuu nloo xkiiz Diox, kuu mbin lee Jesús kon re saduceo mbyodiz. Ne mwii zha lee Jesús wen mkab lo re zha'a. Tsa mbig zha ne mnaabdiz zha lo Jesús, ne nzhab zha:

—¿Cho diiz kuu mke Moisés, nak diiz kuu mas nataak kuu mnabee Diox tsow men?

²⁹ Lee Jesús mkab ne nzhab:

—Lee diiz kuu mas nataak lo reta diiz kuu mnabee Diox nak: "Kenza goo men Israel, lee Diox kuu nabee lo'aa thibka nak. ³⁰ Bke leettssoo'a Diox kon dib ndroo leettssoo'a, kon dib yalnabana, kon dib xgaba ne kon dib yalney chaana." [Dt. 6:4-5] Diiz ree nak kuu mas nataak lo reta diiz. ³¹ Ne lee tedib diiz kuu kwathoz nataak nak: "Bke leettssoo'a tabena, leeka taxal nke leettssoo'a lu". [Lv. 19:18] Yent raa tedib diiz kuu mas nataak taxal rop diiz ree.

³² Tsa lee maestr kuu nloo xkiiz Diox nzhab lo Jesús:

—¡Wli luy, maestr! ¡Thibka Diox nzo ne yent raa tedib zha kuu mas nataak nake Diox! ³³ Ne ke leettssoo men Diox kon dib ndroo leettssoo men, kon dib xgab men, kon dib yalnabana men, kon dib yalney chaan men ne ke leettssoo men taben men taxal nke leettssoo men leeka lee men. Mas nataak koree nake reta maa kuu nzhub zha, por re falt zha ne re gon kuu nteyy zha lo bkoog.

³⁴ Ne ne Jesús lee maestr mkab kon yalnzaak, tsa nzhab Jesús lo maestr:

—Mera nabee Diox leettsoo'a.

Tsa lee re zha kuu nzi ty a mzeb naabdiz tedib kwaa lo Jesús.

¿Cho xgann nak Crist Kuu Mtaal Diox Nabee?

(Mt. 22:41-46; Lc. 20:41-44)

³⁵ Or ngeloo Jesús lo re men lee roo gwodoo chaan re zha Israel, tsa nzhab Jesús:

—¿Chebee lee re maestr kuu nloo xkiiz Diox mbez: “Lee Crist Kuu taal Diox Nabee, nak thib zha raz chaan David”? ³⁶ Ne leeka David mni por Mbi Nayon chaan Diox ne nzhab: Diox Kuu Nabee reta kwaa, nzhab lo Zha Kuu Nabee lon:

“Tob lad ban chon,
asta tsig’n re zha kuu nayii ne’ a xann nii’ a;
tsa tobxub zha lo’ a”. [Sal. 110:1]

³⁷ Ne leeka David nzhab lo zha: “Zha Nabee lon”. ¿Xomod gak zha zha raz chaan David?

Ne kwathoz men kuu nzi nzhon xkiiz Jesús tyo, ne kon dib ndroo leettsaa zha nzhon zhay.

Jesús nzhab naa xomod nak re maestr kuu nloo xkiiz Diox

(Mt. 23:1-36; Lc. 11:37-54; 20:45-47)

³⁸ Or kuu ngeloo Jesús lo re men, ne nzhab Jesús:

—Kenap goo goo, tsa kedit re maestr kuu nloo xkiiz Diox goo. Lee re zha’ a nyow leettsaa zha tiy zha kon lar wen, tsa ni re men “diox” lo zha lo xbi. ³⁹ Ne nkwaan zha re ta mas nataak tob zha leen yuu ta nkaltaa’aa nteedaa xkiiz Diox, ne re ta mas nataak nyetob zha leettsaa nyoo ani, ⁴⁰ ne nkib zha liz re ngot byud, ne kwathoz tetse naab zha lo Diox, par tak kaats zha re kuu ntsow zha. ¡Per mas naroob yalti teriid Diox re zha’ a!

Gon kuu mndaa ngot byud

(Lc. 21:1-4)

⁴¹ Thib welt ndo Jesús lee roo gwodoo chaan re zha Israel, gax ta ngo re zha gon leen alkansi. Tsa mwii Jesús ngo re zha gon leen alkansi, ne tyen re zha rik ngo naroob temi leen alkansi. ⁴² Ora mzin thib ngot byud kuu kwathoz prob, ne mloo ngot chopka temi kuu lut nataak leen alkansi. ⁴³ Tsa mreez Jesús re zha kuu ngeteed lo Jesús, ne nzhab Jesús lo re zha:

—Wlipaa na kuu nin lo goo, mas nataak gon kuu mloo ngot byud baa leen alkansi, nake kuu mloo re zha rik. ⁴⁴ Tak reta zha rik mloo zha temi kuu mrozhooib lo zha, per lee ngot prob baa mndaa ngot reta temi kuu nden ngot, par tii ngot kuu wu ngot.

13

Jesús nzhab lee gwodoo lux

(Mt. 24:1-2; Lc. 21:5-6)

¹ Or mroo Jesús roo gwodoo lee thib zha kuu ngeteed lo Jesús nzhab:

—¡Wii na, maestr! ¡Aka nabii re ke chaan gwodoo ree, ne kwathoz wen natexkwaa re yuu chaan gwodoo!

² Per lee Jesús mkab ne nzhab:

—Kwathoz naro gwodoo ree. ¡Per nzhee neeka thib ke yaant dits tedib ke, reta koree lux!

Pol gak re koree

(Mt. 24:3-28; Lc. 21:7-24; 17:22-24)

³ Tsa ngwa re zha yek thib yii kuu le Olib, tya nloo gwodoo, ne or ndob Jesús, tsa lee Pey, Santiag, Juan ne Ndres, mnaabdiz re zha zhaata lo Jesús, ne nzhab re zha:

⁴ —Nlaaz nee ne’ a loo nee naa pol gak re koree. ¿Ne cho seny loo lo nee, leettsa gak re koree?

⁵ Jesús mkab ne nzhab:

—List gwatsin goo tsa yent cho kedi goo.

⁶ Kwathoz tyen zha yaad ne ne zha: “Na nak Crist Kuu Mtaal Diox Nabee”. Ne kedi zha kwathoz men.

⁷ Per leettsa gon goo lee zhoo nzo nzhee ne baa, tsebt goo, tak tataa ndoblo gake, per nagt kona kuu lux yezlyu. ⁸ Tsa lee thib nación yo kon tedib nación, ne thib yez kon tedib yez ne tyen ta kwathoz ney gwin zho thoz, ne kwathoz ta la win, tsya neeka net re men naa kwan tsow re men, leettsa gak re koree, penta telo re men rid yalti.

⁹ Per list gwatsin goo, tak tataa zha goo lo re zha kuu nataak lo re zha Israel, ne kee chay yek goo ta nkaltung, ne men nteed xkiiz Diox. Ne noga tataa zha goo lo re zha kuu nabee ne lo re gobyern, tak nyelaaz goo na. Per tenzhee tak taa goo kwent chaan da lo re zha’ a. ¹⁰ Leettsa ter lux yezlyu, reta men ndoblo gon Diiz Chul chaan Diox dib naxta lo yezlyu. ¹¹ Leettsa kwez zha goo ne yataa zha goo lo re zha nak tsiin; yat leettsaa zha goo lo re zha nalo ngot, nee kwan gab goo, tak lee Mbi Nayon chaan Diox ne lo goo naa kwaan ndoblo goo gab goo ora. ¹² Tsya leeka wets zha kuu nyelaazt Diox taa zha lo yalguth; ne tataka leeka xut zha taa xgann zha; ne lee xgann zha gak bi lo xut, tsa kuth zha xut zha. ¹³ Reta men yii ne goo tak nyelaaz goo na, per loka cho xek rid re koree, zha’ a tsow gan yalnaban kuu thitanax.

¹⁴ Per leettsa wii goo, lee kuu kwathoz went kwib ta ndoblo kwibe, taxal nzhab profet Daniel. (Loka cho zha lab koree, ndoblo zha’ a yen zha’ ay.) Tsa lee re zha kuu nzo yezlyu Judea ndoblo zhonn net yii. ¹⁵ Ne lee re zha kuu ndob yek yuu wiza, neeka ndoblot la zha ne ya zha leen liz zha, par koo zha thib chaan zha; ¹⁶ ne lee re zha kuu ndo wan, neeka ndoblot zha bretab zha par thop zha xab zha. ¹⁷ ¡Per kwathoz nabil rid re ngot kuu nzozhiiinn ne re ngot kuu nap mbetdoo wiza! ¹⁸ Bnaab goo lo Diox, tsya gagt koree tyemp kuu nla yig. ¹⁹ Tak lee re wiza, gak thib wiz kuu mas rid re men yalti, nake reta yalti kuu mriid re men lo yezlyu ree, desde leettsa mdexkwaa Diox yezlyu,

ne yet raa tedib yalti kuu tata bluz. ²⁰ Ne os lee Zha Nabee gatsow nadopt re wiza, neeka thib zha laat lo yalti'a, per mtsow nadop zhay, tak nke leettsoo zha re zha kuu mli zha.

²¹ 'Ne re wiza, os lee thib zha ne lo goo: "Wii nzhee, lee Crist Kuu Mtaal Diox Nabee ndo nzhee". O "wii lee zha ndo baa", yelaazt goo xkiiz zha. ²² Tak yaad re zha kuu kedi; re zha kuu wlit nak profet chaan Diox, ne tsow zha re kuu thoz kuu gagt tsow re men, ne loo zha seny thoz, ne os take, asta re zha kuu mli Diox kedi zha. ²³ List gwatsin goo, tak reta kuu mni'a na lo goo.

Xomod bretab xgann myyi, Kuu Mzin Ngok Men

(Mt. 24:29-35, 42-44; Lc. 21:25-36)

²⁴ 'Ne re wiza, leettsa ngwalo'a mriid re men yalti, tsa leee wiz ne mbree taat raa xni. ²⁵ Ne lee re mbel rethin lobee, ne lee re kuu nzo lobee zhiit. ²⁶ Tsa wii re zha lee na Zha Kuu Mtaal Diox Ngok Men, yaal'n leen xkow kon kwathoz yalney ne xni. ²⁷ Tsa taal'n re mandad da thop re zha kuu mlin dita lo yezlyu, desde thib lad lo yezlyu ne asta tedib lad lo yezlyu.

²⁸ 'Bteed goo lo ya ig, leettsa lee zhite nziib ne nziib lay, tsa ne goo lee mbee beyi mzin gaxa. ²⁹ Tataka leettsa ne goo lee re koree ngeyak, ndoblo yen goo lee wiza ndetsin gaxa. Ne lee na, Kuu Mzin Ngok Men, ndo'a roo pwert. ³⁰ Wlin kuu nin lo goo, reta koree gak leettsa terka gath re men tyemp ree. ³¹ Lee yezlyu ne lee lo lobee telux per lee xkiz'n ridte, retay ndoblo gak.

³² 'Per lee wiza ne ora yent cho ney; neeka re mandad chaan Diox, neeka Xgann Diox, beeta Xu'tn Zha Nabee ney.

³³ 'Ne list gwatsin goo kenap goo goo, tak net goo pol tsin wiza. ³⁴ Koree nak taxal thib zha mroo nda tedib yez. Ne leettsa mroo zha liz zha mlaa zha re mos zha, tsa kenap re mos liz zha. Ne mndaa zha tsiiin tsow re mos, ne mtaan zha re mos, ne mto zha thib mos kuu kenap roo yuu. ³⁵ Kona list gwatsin goo, tak net goo naa pol yaad zha kuu nabee yuu. Cha yaad zha yaal, o ngulal yaal, o yaad zha or kwez ngite, o yaad zha or ndeyeni'a yezlyu. ³⁶ Tak cha tsin zha ne yegaa goo lo zha lee goo naxat. ³⁷ Koree nak kuu nin lo goo ne noga ni nay lo reta men: List gwatsin goo.

14

Mkwaan zha naa xomod kuth zha Jesú
(Mt. 26:1-5; Lc. 22:1-2; Jn. 11:45-53)

¹ Nzhak falt techop wiz par gak ani kuu le Paskw, leettsa ntelaaz re zha Israel, naa xomod mloo Diox re tey zha, zha ndala Egipto, lo ani kuu nzhaw zha pan kuu nyoot lebadur. Tsa lee re ngwleyy kuu nabee lo re

ngwleyy kon re maestr kuu nloo xkiiz Diox, zheta mkwaan zha mod ten zha Jesú, tsa kuth zha Jesú. ² Per nzhab zha:

—Tsowt leey leen ani, tsa net re mene ne yiit re men.

Thib ngot mloo perfum kuu chul ndetsi kwerp Jesú
(Mt. 26:6-13; Jn. 12:1-8)

³ Leettsa ndo Jesú Betania, liz Simún kuu mzhaak yiz kuu nteyaaz kwerp, ne or ndob Jesú roo mes. Tsa mzin thib ngot kuu myaadno thib bot kuu natexkwaa kon ke kuu le alabastr, kuu tseta nzo perfum kuu chul ndetsi, perfum kuu ngoo zha thib ya kuu le nardo, ne kwathoz naap perfuma, ne mle ngot bot tsa mzhaal bot, ne mloo ngot perfum kwerp Jesú. ⁴ Per lee chop tson re zha kuu nzi tyaa mnayii lo ngot, ne nzhab zha lo altaa zha:

—¿Chebee tabaata mlux perfum ree? ⁵ Lee perfum ree masraa nataak nake kuu tsow men gan thib liin, ngok gadoy tsa gataa'aa temi lo re zha prob.

Tsa mndelo re zha mnayii zha lo ngota. ⁶ Per lee Jesú nzhab lo re zha'a:

—Blaa goo ngot; ¿chebee nayii goo lo ngot? Lee kuu mtsow ngot lon nak thib kuu kwathoz wen. ⁷ Lee re prob thibka nzi lo goo, ne tak tsow goo wen lo prob leettsa nlaaz goo, per lee na ndot'n lo goo thitanax. ⁸ Lee ngot ree mtsow loka kuu takta tsow ngot, ner mloo ngot perfum na, leettsa terka gaats'n. ⁹ Wlipaa na nin, dita lo yezlyu ta taa zha kwent Diiz Chul chaan da, teteth zha kuu mtsow ngot ree, tsa telaaz zha ngot.

Judas mndaa Jesú lo re zha tsa kuth zha Jesú
(Mt. 26:14-16; Lc. 22:3-6)

¹⁰ Tsa lee Judas Iscariote kuu nak thib zha lo re tsuibchop zha kuu ngeteed lo Jesú, ngwanii lo re ngwleyy kuu nabee lo re ngwleyy, tsa myaan Judas diiz taa Judas Jesú lo re ngwleyy. ¹¹ Or mbin re zha kona, kwathoz wen ne naley ngoo leettsoo re zha. Ne nzhab re zha lo Judas:

—Nal kix nee kaa'a.

Tsa lee Judas mkwaan mod par taa Jesú lo re zha.

Rtsee chaan Zha Nabee
(Mt. 26:17-29; Lc. 22:7-23; Jn. 13:21-30;
1Co. 11:23-26)

¹² Ner wiz kuu ndelo ani, leettsa nzhaw zha pan kuu nyoot lebadur, ne nzhaw zha mbak zhiil yeen, tsa ntelaaz zha naa xomod mloo Diox re tey zha, zha ndala Egipto. Tsa lee re zha kuu ngeteed lo Jesú mnaabdiz lo Jesú ne nzhab:

—¿Pa nlaaza yatexkwaa nee kuu dow rtsee'aa nal ani Paskw?

¹³Tsa mtaal Jesús chop zha kuu ngeteed lo Jesús, ne nzhab Jesús lo rop zha:

—Gwa goo yez, ne ty a tsaal goo thib mbyi kuu ne thib ree nit, hteke goo dits zha, ¹⁴ne loka pa tab zha, gab goo lo zha kuu nak chaan yuu: “Lee maestr’ ne, nlaz’n wun kon re zha kuu ngeteed lon rtsee chaan Paskw. ¿Pa ndob yuu kuu ta wu rtsee nee?” ¹⁵Tsa loo zha thib yuu naro lo goo, kuu ndob asta yek yuu ta nzo reta kwa, tya texkwaa goo kuu dow rtsee’aa.

¹⁶Ne mroo rop zha kuu ngeteed lo Jesús nda zha yez, ne mizal zha zha kuu nzhab Jesús lo rop zha, ne mdexkwaa rop zha rtsee kuu le Paskw.

¹⁷Ne or mkow yezlyu, tsa mzin Jesús kon re tsiiibchop zha kuu ngeteed lo Jesús.

¹⁸Leettsa ndob re zha roo mes ngeyow rtsee re zha, tsa nzhab Jesús lo re zha:

—Wlipaa na nin lo re goo, thib goo kuu ngeyow kon na taan lo re men.

¹⁹Tsa nabil ngoo leettsoo re zha, ne mndelo re zha thibga thibga zha mnaabdiz lo Jesús, ne nzhab zha:

—¿Chu nay?

²⁰Tsa lee Jesús mkaab ne nzhab:

—Thib zha lo re thib tsiiibchop gooy, lee zha ntenit pan leen thibka yann kon na. ²¹Wlipaa lee Zha Kuu Mtaal Diox Ngok Men, ndoblo rid zha taxal nke lo xkiid Diox. Per thitanax went rid zha kuu tan lo re men, mas wen gagalt mbyi’aa.

²²Ne or kuu ndob re zha ngeyow rtsee zha, tsa lee Jesús mzen pan ne mndaa Jesús texkix lo Diox, ne mtsow rol Jesús pan ne mndaa Jesús pan lo re zha kuu ngeteed lo Jesús, ne nzhab Jesús:

—Dow goo, koree nak beel da.

²³Noga mzen Jesús bas ne ngwalo mndaa Jesús texkix lo Diox, ne mndaa Jesús bas lo re zha kuu ngeteed lo Jesús, tsa ngwii re zha kuu nzo leen bas. ²⁴Tsa nzhab Jesús:

—Koree nak ren da, leey texkwaa trat kub chaan Diox, ne leey xon kwent chaan naroob men. ²⁵Wlipaa na nin lo goo, nalsi gut raa na xit ub, asta wiz kuu gun kuu kub taabee Diox.

Pey nzhab nlebeet Pey Jesús

(Mt. 26:30-35; Lc. 22:31-34; Jn. 13:36-38)

²⁶Bluz or ngwalo mbil re zha, tsa ndya zha net yii ta ndab ya olib. ²⁷Tsa nzhab Jesús lo re zha:

—Reta goo laa goo na nal yaal ree, tak lee lo xkiiz Diox nzhab: “Kuth’n zha kuu nkenap re mbak zhiil, ne lee re maa raats”. [Zac. 13:7] ²⁸Per bluz leettsa roban na, tsa tener’n lo re goo ne ya re’aa yezlyu Galilea.

²⁹Tsa nzhab Pey lo Jesús:

—¡Per tegal reta zha laa’aa, per lee na lat’ lu!

³⁰Jesús nzhab lo Pey:

—Wlipaa na nin lo’aa, leeka nal yaal ree, neeka ter kwez ngite chop welt, lee lu gab tson welt nlebeeta na.

³¹Per lee Pey masraa nex mkaab ne nzhab:

—Tegal gath’n kon lu, per gabt’n: “Leen nlebeet’n lu”.

Ne reta zha tataga nzhab zha.

Jesús mndediz lo Diox leen alo Getsemani
(Mt. 26:36-46; Lc. 22:39-46)

³²Tsa mzin re zha leen thib alo kuu le Getsemani, tsa nzhab Jesús lo re zha kuu ngeteed lo Jesús:

—Tob goo nzhee, lee na nda tediz lo Diox.

³³Ne mndeno Jesús Pey, Santiag ne Juan ne mndelo mndebi ne nalatt ngoo leettsoo Jesús. ³⁴Tsa nzhab Jesús:

—Kwathoz nalatt nzo leettsoon, tak mera gath’n, nzheeta yaan goo, kenap goo goo ne gatta goo.

³⁵Tsa nda Jesús tut kwat ne mtobxub Jesús asta mdiin yeklo Jesús lo yu. Ne mnaab Jesús lo Diox, tsa ridt Jesús yalti kuu ndoblo Jesús rid Jesús. ³⁶Ne nzhab Jesús:

—¡Pal! Reta kuu tak tsowa. Btelaan lo yalti kuu riid’n, per nlazt’n gake taxal nlaz’n, sinke taxal nlaaza tata gake.

³⁷Leettsa mre Jesús ta nzi re zha, lee re zha naxat, tsa nzhab Jesús lo Pey:

—Simún, ¿chu naxata? ¿chu mxegta lo mkaal neeka thib or? ³⁸Nzheeta yaan goo ne gatta goo, bnaab goo lo Diox, tsa kedit Maxuuy goo. Wlipaa na nin, nlaaz zha tsow zha kuu nlaaz Diox, per lee kwerp zha xegtsowte.

³⁹Tsa ngwa Jesús tedib welt ne mndediz Jesús lo Diox, ne nzhab Jesús leeka re diiz kuu nzhab Jesús ner. ⁴⁰Leettsa mretab Jesús lo re zha kuu ngeteed lo Jesús ne lee re zha naxata tedib welt, tak ngwatin zha mkaal. Ne neeka net zha naa kwan kab zha lo Jesús. ⁴¹Ora ngwa Jesús myon welt, ne mre Jesús nzhab lo re zha:

—¡Nalsi, bneyy goo ne bdat goo! Wii goo, mzina or kuu lee na Zha Kuu Mtaal Diox Ngok Men, taa zha na lo re zha kuu ndab falt. ⁴²Gwache goo tsa ndaa goo, tak ndyaada zha kuu taan lo re men.

Mzen re men Jesús

(Mt. 26:47-56; Lc. 22:47-53; Jn. 18:2-11)

⁴³Ne lee Jesús bee ngenika, lee Judas kuu nak thib zha lo re tsiiibchop zha kuu mteed lo Jesús mzin. Ne kwathoz men ndeke dits Judas kon espad ne kon ya, lee re zha’aa ndyaada kwent chaan re ngwleyy kuu nabee lo re ngwleyy, kwent chaan re maestr’ kuu nloo xkiiz Diox ne kwent chaan re zha gol. ⁴⁴Ne mndaa’aa Judas thib seny lo re zha’aa: Or nzhab Judas:

—Loka cho zha kuu wun thib chut kwat, zha’aa ten goo ne teno goo.

⁴⁵ Ne or mzin Judas, ne mbig Judas lo Jesús ne nzhab Judas:

—jMaestr! jMaestr!

Ne mdow Judas chut kwat Jesús. ⁴⁶ Tsa mzheng re zha Jesús ne ndano zha Jesús.

⁴⁷ Per lee thib zha kuu ndo lo Jesús mloo espad ne mga nza mos ngwleyy kuu nabee lo reta ngwleyy. ⁴⁸ Tsa nzhab Jesús lo re men:

—¿Chebee ndyaad goo kon espad ne kon ya, ten goo na taxal thib wann? ⁴⁹ Reta wiz mndon lo goo, ne mloon lo re men lee roo gwodoo, ne neeka thib welt mzhent goo na. Per koree ngeyak, tsa gak kuu nzhab lo xkeets Diox.

⁵⁰ Tsa lee re zha kuu mteed lo Jesús mlaa zha Jesús ne mzhonn zha. ⁵¹ Per lee thib nde kuu ndeke dits Jesús, nok thib le lar, tsa mzheng re men nde'a. ⁵² Per lee nde'a mlaa nde xab nde ne cheey nde mzhonn nde.

Mndeno zha Jesús lo ngwleyy kuu nabee lo reta ngwleyy
(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Tsa mndeno zha Jesús lo ngwleyy kuu nabee lo reta ngwleyy, ne mkaltaa re ngwleyy kuu nabee lo re ngwleyy, re zha gol ne re maestr kuu nloo xkiiz Diox. ⁵⁴ Per lee Pey titi thib mnndeke dits re zha, asta mzin Pey lee liz ngwleyy kuu nabee lo reta ngwleyy, ne myaan Pey mbiz Pey kon re polisi kuu ngebiz lo ki.

⁵⁵ Ne lee re ngwleyy kuu nabee lo re ngwleyy ne re zha kuu nataak yuulow, mkwaan zha mod, naa xomod keki zha Jesús, tsa kuth zha Jesús, per mzalt mod lo re zha. ⁵⁶ Kwathoz zha nkedi, per zhaa kuu mbez thib zha ne zhaa kuu mbez tedib zha. ⁵⁷ Tsa lee chop tson zha ngwateeli ne mkedi zha ne mkeki zha Jesús nzhab zha:

⁵⁸ —Nee mbin lee'a nzhab: “Na luux gwodoo ree kuu mdexkwaan kon yaa men, ne tsonka wiz tan tedibe, kuu texkwaat kon yaa men”.

⁵⁹ Per tegal tata mbez re zha, per nzaalt kuu mbez re zha.

⁶⁰ Tsa lee ngwleyy kuu nabee lo reta ngwleyy mndeli xid re zha, ne mnaabdiz lo Jesús, ne nzhab:

—¿Chebee neeka thib kuu nkabta? ¿Kwan re kuu nkeki zha lu?

⁶¹ Per lee Jesús mkabt neeka thib kwaan, tsa lee ngwleyy kuu nabee lo reta ngwleyy mre mnaabdiz lo Jesús, ne nzhab:

—¿Chu lu nak Crist kuu Mtaal Diox nabee? ¿Chu lu nak Xgann Diox?

⁶² Lee Jesús mkab ne nzhab:

—Nay. Ne wii goo lee na Zha Kuu Mtaal Diox Ngok Men, tob lad ban lo Diox kuu nzhab ntsow reta kwaan. Ne wii goo lee na yal tedib welt xidith xkow lobee.

⁶³ Tsa lee ngwleyy kuu nabee lo reta ngwleyy mchat xab ne nzhab:

—jNdechet raa lee tedib testig! ⁶⁴ jMbina goo ne zha, yewal zha kon Diox! ¿Xa ntsow goo xgab koree?

Reta men nzhab:

—jNdoblo gath zha!

⁶⁵ Tsa lee chop tson zha mndelo mtsuk lo Jesús, ne mtow zha lo Jesús, ne mdin re zha Jesús ne nzhab zha lo Jesús:

—jNe, naa cho mkeey yeka!

Ne lee re polisi maaat yaa lo Jesús.

Pey nzhab nlebeet Pey Jesús
(Mt. 26:69-75; Lc. 22:55-62; Jn. 18:15-18, 25-29)

⁶⁶ Ne lee Pey ndob lee liz ngwleyy. Ora mzin thib ngot kuu nke tsuin lo ngwleyy kuu nabee lo reta ngwleyy. ⁶⁷ Ne or mwii ngot lee Pey ngebiz lo ki, yichey mwii ngot lo Pey ne nzhab ngot:

—No'a ndiy kon Jesús, zha yez Nazaret.

⁶⁸ Per lee Pey nzhab:

—Nlebeet'n Jesús, neeka net'n naa kwan

ngeeni'a lon.

Ne or mroo Pey lee lee ngite mrez thib roo. ⁶⁹ Ne tedib welt mwii ngot lo Pey, ne nzhab ngot lo re zha kuu nzi ty:

—Zha ree nak thib zha kuu ndiy kon re zha baa.

⁷⁰ Per lee Pey mkab tedib welt ne nzhab:

—Nlebeet'n mbyi baa.

Ne bluz lee re zha kuu nzi tya nzhab lo Pey:

—Wlipaa no'a nak thib re zha kuu nzo xid re zha baa, tak lu nak zha yezlyu Galilea.

⁷¹ Tsa mndelo Pey mde Pey, ne mteth Pey Diox, ne nzhab Pey:

—jWlipaa naa nlebeet'n mbyi kuu nteth goo lon!

⁷² Ne oraaka lee ngite mrez tedib welt, tsa lee Pey mtelaaz kuu nzhab Jesús lo Pey ner: “Terka kweez ngite chop welt ne lee lu gab tson welt nlebeeta na”. Ne or mtelaaz Pey kona, oraaka mndelo Pey mbinn Pey.

15

Mndeno zha Jesús lo Pilat
(Mt. 27:1-2, 11-14; Lc. 23:1-5; Jn. 18:28-38)

¹ Kwathoz til mkaltaa re ngwleyy kuu nabee lo re ngwleyy, re zha gol, re maestr kuu nloo xkiiz Diox, ne reta zha kuu nabee lo re zha Israel. Ne ngwalo myaan re zha diiz, tsa milib zha Jesús ne mndaa zha Jesús lo Pilat. ² Lee Pilat mnaabdiz lo Jesús ne nzhab:

—¿Chu lu nak rey chaan re zha Israel?

Lee Jesús mkab nzhab:

—Lu ney.

³ Ne lee re ngwleyy kuu nabee lo re ngwleyy mkeki zha Jesús. ⁴ Tsa lee Pilat mnaabdiz tedib welt lo Jesús ne nzhab Pilat:

—¿Chebee neeka thib kuu nkabta? ¡Wii naa plal kuu nkeki zha lu!

⁵ Per lee Jesús mkabt neeka thib lan diiz. Tsaa lee Pilat kwathoz mzegey leettsoo ne net Pilat naa kwan tsow Pilat xgab.

*Pilat mnabee mbeth zha Jesús
(Mt. 27:15-31; Lc. 23:13-25; Jn. 18 :38-19:16)*

⁶ Ne reta liin lo ani'a lee Pilat ntelaa thib zha kuu nzo tsib, loka cho zha kuu naab re men yez. ⁷ Ne lee thib mbyi kuu le Barrabás, nzo tsib thibka kon thiban zha kuu mbeth men, leettsa mbyo re zha kon re zha gob-yern Roma. ⁸ Tsa mzin re men, ne mndelo zha mnaab zha lo Pilat, tsa telaa Pilat thib zha taxalka ntsow Pilat reta liin. ⁹ Ne lee Pilat mkaab ne nzhab:

—¿Chu nlaaz goo telaan Jesús, kuu nak rey chaan re zha Israel?

¹⁰ Tata nzhab Pilat, tak ne'a Pilat lee re ngwleyy kuu nabee lo re ngwleyy, nyowt leettsoo zha ndeke tyen men dits Jesús, kona mndaa re zha Jesús lo Pilat. ¹¹ Per lee re ngwleyy kuu nabee lo re ngwleyy mteki re men, tsa gab re men lo Pilat telaa Pilat Barrabás. ¹² Tsa lee Pilat mnaabdiz tedib welt:

—¿Kwaan nlaaz goo tsow'n, kon zha kuu mbezz goo nak rey chaan re zha Israel?

¹³ Ne lee re men mrez dib gan ne nzhab:

—¡Bkee zha lo kruz!

¹⁴ Per lee Pilat nzhab:

—¿Kwaan kuu went mtsow zha ree?

Per lee re men mre mrez dib gan ne nzhab:

—¡Bkee zha lo kruz!

¹⁵ Per lee Pilat nlaaz yaan wen kon re men, kona mtelaa Pilat Barrabás, ne bluz mnabee Pilat mdin re zha Jesús, tsaraa mndaa Pilat Jesús, tsa kee re soldad Jesús lo kruz.

¹⁶ Tsa lee re soldad mndeno Jesús par lee liz Pilat, ne mrez zha reta soldad. ¹⁷ Ne mtegok zha Jesús thib lar kuu nanexa na, ne mtob zha thib koron kuu natexkwaa kon yits yek Jesús. ¹⁸ Ne oraaka mndelo re zha mrez zha dib gan zha, ne nzhab zha:

—¿Kwathoz kuubil rey chaan re zha Israel!

¹⁹ Mkei re zhay yek Jesús kon thib le ya, mtsuk zha lo Jesús ne mtobxub re zha lo Jesús taxal lo rey. ²⁰ Ne or kuu ngwalo mzhizno zha Jesús, tsa mloo zha lar kuu nanexa na yen Jesús, ne mtegok zha Jesús xabka Jesús, ne mloo re zha Jesús tsa kee zha Jesús lo kruz.

*Mkee zha Jesús lo kruz
(Mt. 27:32-44; Lc. 23:26-43; Jn. 19:17-27)*

²¹ Ne lee thib mbyi zha yez Cirene kuu le Simún, kuu nak xut Alejandr ne xut Rufo ndyaad ngwa wan. Ne or nderid zha tya, tsa mnabee re soldad lo zha gwe zha kruz Jesús.

²² Ne mndeno re zha Jesús thib ta le Gólgota. (Diiz ree nak: "Tsidth yek men".)

²³ Ne mndaa zha xit ub kon thib remed kuu nala kuu le mirra gagu Jesús, per lee Jesús ngwiite. ²⁴ Tsa mkei re soldad Jesús lo kruz. Ne mndelo re zha mloo zha swert, tsa naa cho zha tsow gan xab Jesús, ne kwan kuu diinn kadta thib zha.

²⁵ Ne til teeka las nueve mkei zha Jesús lo kruz. ²⁶ Ne lee letr kuu mkei zha yek kruz nzhab, naa chebee mbeth zha Jesús, ne lee letr nzhab "REY CHAAN RE ZHA ISRAEL". ²⁷ Ne thibka mkei zha Jesús lo kruz kon chop wann, thib zha mkei zha lad ban lee tedib zha mkei zha lad beg lo Jesús.

²⁸ Tata ngok tsa mrolo xkiiz Diox kuu nzhab: "Thibka ngok kwent zha kon re wann".
—¡Lu kuu nlaaz luux gwodoo, ne tsonka wiz taa luy tedib welt, ³⁰ os lee'a kwathoz kuubi'a laata gatha, leeka lu bla'a lo kruz!

³¹ Ne noga re ngwleyy kuu nabee lo re ngwleyy ne re maestr chaan ley, mzhizno zha Jesús ne nzhab zha lo altaa zha:
—Mlaat zha gagath tedib net zha, per lee zha gagat la zha leeka lee zha lo kruz.
—Noga nzhab re ngwleyy:

—Lu ne: Lu nak Crist Kuu Mtaal Diox nabee lo re zha Israel. Bla lo kruz nal, tsa ne nee lee lu nap yalnabee, ne tsa yelaaz nee lu.
Ne asta rop wann kuu nke lo kruz ntsalzoo Jesús kon ndota diiz.

Yalguth chaan Jesús

(Mt. 27:45-56; Lc. 23:44-49; Jn. 19 :28-30)

³³ Ne teeka ndrol wiz dita yezlyu mla yaal, ne lee kona mxek tson or. ³⁴ Ora lee Jesús mrez dib gan ne nzhab:

—Eloi, Eloi, ¿lama sabactani? (Diiz ree nak: "Diox da, Diox da, ¿chebee mla'a na?")

³⁵ Ne lee chop tson zha kuu nzi tya mbin kuu nzhab Jesús, tsa nzhab zha:

—Bin goo, lee zha ngebez profet Lí zha ndala.

³⁶ Oraaka le thib zha mrez henn mzhien thib le lar, ne mtenit zhay kon xit ub kuu ni, ne mtob zhay yek thib nth ne mndaa zhay ngwii Jesús.

Tsa nzhab tedib zha:

—Laa, naa chu tyaad Lí la zha lo kruz.

³⁷ Per lee Jesús mrez dib gan ne nguth.

³⁸ Tsa lee lar kuu now Ta Kwathoz Nayon leen gwodoo mrat asta yek ne asta xann.

³⁹ Ne lee soldad kuu nabee lo thib gayoo soldad ndo lo Jesús, ne mbin zha dib gan

Jesús mrez Jesús ne mwii zha naa xa nguth Jesús. Tsa nzhab zha:

—Wlipaa lee mbyi ree nak Xgann Diox.

⁴⁰ Noga chop tson ngot nzi tith ngewii, xid re ngota ndo Mari Magdalen ne Mari xnaa Santiag kuu mas yeen lo Che ne lo Salomé.

⁴¹ Re ngota mnudeke dits Jesús, ne mtsow zha ayud Jesús leettsa mndiy Jesús yezlyu Galilea. Ne tyen ngot kuu ngwa kon Jesús yezlyu Jerusalén nzi tya.

Mkaats zha Jesús

(Mt. 27:57-61; Lc. 23:50-56; Jn. 19:38-42)

⁴² Lee wiza nak wiz byern kuu ndexkwaa re zha kuu nzhon re zha wiz sabd kuu ndrox-kwan zha. Ne mzi'a yezlyu wiza, ⁴³ tsa lee Che kuu nak zha yez Arimatea, kuu nak thib zha kuu kwathoz nataak lo re zha Israel, ne lee zha ngebet wiz kuu nabee Diox. Tsa thib mloo zha yek zha ne ngwa zha lo Pilat. Ne mnaab zha kwerp Jesús. ⁴⁴ Tsa lee Pilat kwathoz mzegey leettsoo, tak lijer nguth Jesús ne mrez Pilat soldad kuu nabee lo thib gayoo soldad, tsa mnaabdiz Pilat ne nzhab Pilat:

—¿Chu ngutha Jesús?

⁴⁵ Lee soldad kuu nabee lo thib gayoo soldad nzhab:

—Ngutha zha.

Tsa mndaa Pilat diiz mbe Che kwerp Jesús. ⁴⁶ Tsa mzhii Che thib lar wen, ne mchial Che lar kwerp Jesús, ne mloo Che kwerp Jesús leen thib baa kuu natekqwaa cho ke, ne mtow Che thib ke naro roo baa. ⁴⁷ Ne lee Mari Magdalen ne Mari xnaa Che mwii zha ta mloo zha Jesús.

16

Jesús mroban

(Mt. 28:1-10; Lc. 24:1-12; Jn. 20:1-10)

¹ Leettsa mriid wiz sabd, lee Mari Magdalen ne Mari xnaa Santiag ne Salomé, mzhii perfum kuu chul ndetsi, tsa ko zhay kwerp Jesús. ² Ne til wiz domin, ngwa re ngot roo baa ta ngoo Jesús, ne penta mlen wiz ora. ³ Tsa nzhab ngot lo altaa ngot:

—¿Cho kib ke kuu now roo baa or tsinna?

⁴ Per or mzin yon ngot, tsa mwii ngot lee ke naro kuu now roo baa mbyiiba. ⁵ Ne or mndaab re ngot leen baa, mwii re ngot lee thib nde ndob lad ban, nok thib lar kuu naguz ne nol kuu ndedoob asta dits nii nde, tsa kwathoz mzeb re ngot. ⁶ Per lee nde nzhab:

—Tsebt goo. Goo ngekwaan Jesús zha Nazaret, zha kuu mkee zha lo kruz. ¡Mrobana zha! ¡Yent zha nzhee! Wii goo ta mloo zha zha. ⁷ Tyee goo lo re zha kuu mteed lo Jesús ne lo Pey. Ne gab goo lo re zha: “Lee Jesús tener lo goo ya yezlyu Galilea, tya wii goo Jesús taxal ne Jesús lo goo”.

⁸ Tsa lee re ngota mroo roo baa, ne mzhiit re ngot tak kwathoz mzeb re ngot. Ne yent cho lo nzhab re ngote, tak nzeb re ngot.

Jesús ngwani lo Mari Magdalen

(Jn. 20:11-18)

⁹ Bluz or ngwalo mroban Jesús domin til, ner lo Mari Magdalen mloo Jesús, ngot kuu mloo Jesús gaz mbi fyer leettsoo. ¹⁰ Ne lee ngota ngwalo diiz lo re zha kuu mteed lo Jesús, ne nzhonn re zha ne nabil nzo leettsoo re zha. ¹¹ Or mbin re zha lee Jesús naban, ne lee ngota mwii'a Jesús, ngwalaazt re zhay.

Jesús ngwani lo chop zha kuu mteed lo Jesús

(Lc. 24:13-35)

¹² Ngwalo mriid kona, tsa ngwani Jesús tedib mod lo chop zha kuu ndo net nda wan.

¹³ Tsa lee rop zha mretab; ne ngwalo zha diize lo re altaa zha, per neeka xkiiz rop zha'a ngwalaazt re zha.

Re zha kuu mteed lo Jesús myaan taa kwent xkiiz Diox

(Mt. 28:16-20; Lc. 24:36-49; Jn. 20:19-23)

¹⁴ Mas bluz lee Jesús ngwani lo re tsibthib zha kuu mteed lo Jesús. Or lee re zha ndob roo mes, tsa mkox re zha lo Jesús tak kwathoz nad leettsoo re zha, tak ngwalaazt re zha xkiiz re zha kuu mwii lee Jesús mroban. ¹⁵ Tsa lee Jesús nzhab lo re zha:

—Gwataa goo kwent xkiiz Diox lo re men dib naxta lo yezlyu. ¹⁶ Ne loka cho zha kuu yelaaz na ne gakleyy zha, tetsow zha gan yahnaban kuu thitanax; per lee zha kuu yelaazt na, Diox teriid zha yalti kuu thitanax gabil. ¹⁷ Ne koree tsow re zha kuu yelaaz na ne xkiz'n: Kon len koo zha mbi fyer; ne tediz zha tedib net diiz kub. ¹⁸ Ne os lee zha ten zha mbeel kon yaa zha; ne os wu zha kwaan yent kwan tak zha, ne xoob zha yaa zha yek re mbyiz, ne lee re mbyiz gwe.

Jesús ngwazhoob yibaa

(Lc. 24:50-53)

¹⁹ Ne ngwalo mni Jesús lo re zha kuu mteed lo Jesús, tsa lee Jesús Zha Nabee lo'aa ngwazhoob yibaa, ne mndob Jesús lad ban lo Diox. ²⁰ Ne lee re zha kuu mteed lo Jesús mroo, ne mndaab kwent Diiz Chul chaan Jesús reta ta, diiz kuu ndyaadno yahnaban kuu thitanax. Ne lee Zha Nabee ntsow ayud re zha, ne nloo Zha Nabee lee xkiiz Diox nak kuu wli, ne ntsow re zha re kuu thoz kuu gagt tsow re men, tsa ne re men lee re kuu ni re zha nak xkiiz Diox. ¡Tbaa nak diiz chul chaan Jesús!

Diiz Chul chaan Jesucrist kuu mkee Luk

Chebee mkee Luk yeets ree lo Tyof

Tsan Tyof, zha kuu kwathoz nataak.

¹ Kwaro zha ngwalaaz gakee reta kuu ngok lo re nee, taxal ngoke, ² re zha kuu mwii re kuu ngok kon prop lo zha, ne mwii zha xomod mndelo re koree ndala, re zha'a mkayaa tsii par taa zha kwent xkiiz Diox, ne mne zhay lo re nee. ³⁻⁴ Kona mnaabdiza na wen wen naa xomod nak kwent ree, ne ndak'n wen keen thibgay lo yeets taxal ngoke, tsa ne'a xomod mndelo re kuu wli kuu mloo zha lo'a amig Tyof.

Thib mandad chaan Diox nzhab lee Juan gal

⁵ Leettsa lee Herodes nak rey yezlyu Judea, tsya ngoo thib ngwleyy kuu le Zacari, thib zha kuu nak zha partid chaan ngwleyy Abias. Ne lee tsaal Zacari le Elisabet kuu nak zha raz Aarón. ⁶ Rop tsaalta zha nali ndo nyelaaz Diox, nzhon zha diiz reta kuu nabee ley chaan Zha Nabee, tata mod neeka thib kuu gagt keki re men rop zha. ⁷ Per napt rop tsaal zha mbet, tak mndaat Diox mbet lo Elisabet, ne zha gola rop zha.

⁸ Thib wiz, leettsa mdiinn re zha partid Zacari tsow zha tsii lo Diox leen gwodoo chaan Diox, ⁹ ne lee kosturm re zha nak koo zha swert, ne Zacari mdiinn tab leen gwodoo chaan Zha Nabee, par teyy zha straak lo Diox. ¹⁰ Ne or lee straak ngey-eek, lee re men nzi lee ngenaab lo Diox. ¹¹ Tsa lee thib mandad chaan Diox ngwani lo Zacari, ndeli lad ban lo bkoog ta nteyy zha straak. ¹² Ne or mwii Zacari lo mandad, kwathoz mzegey leettsoo Zacari ne mzeb Zacari. ¹³ Per lee mandad nzhab lo Zacari:

—Zacari, tsebeta, tak mbina Diox kuu mnaaba lo Diox, lee tsalaal Elisabet gap thib mbet, ne Juan tob le'a mbet. ¹⁴ Ne kwathoz naley yo leettsoo'a, ne noga kwathoz men naley yo leettsoo tak lee mbet gal, ¹⁵ tak lee xganna gak thib zha nataak lo Zha Nabee. Ne gut zha uit ub ne neeka thib re nit kuu nzo xtuz, ne leettsa bee ter gal mbet lee Mbi Nayon chaan Diox nabee'a leettsoo mbet. ¹⁶ Ne lee xganna tsow, tsa kwaro re zha Israel bre lo Diox kuu nak Zha Nabee. ¹⁷ Ne Juan tener lo Zha Nabee, ne keno Juan leeka Mbi Nayon ne yalney chaan Lí, zha kuu ngok profet ndala. Tsa lee re zha wen kwin zha kon re zhiinn zha, ne lee re zha kuu nzhont diiz, teed gon diiz. Tenzhee mod tolist Juan leettsoo re men, tsa kayaa re men Zha Nabee.

¹⁸ Tsa mnaabdiz Zacari lo mandad ne nzhab Zacari:

—¿Xomod nen wli kuu ne'a lon? Tak zha gola rop tsaal nee.

¹⁹ Tsa lee mandad mkab, ne nzhab lo Zacari:

—Na nak mandad Gabriel, na ntsow tsiiin lo Diox. Ne lee Diox mtaal'n par tediz'n lo'a, tsa nin re kuu wen ree lo'a. ²⁰ Per nal, tak ngwalaazta kuu nin, kona yaana mud, ne gagt tediza asta wiz kuu gak re koree.

²¹ Ne lee re men ngebet Zacari lee roo gwodoo, ne naabdiz zha lo re altaa zha, naa chebee ntsan Zacari leen gwodoo. ²² Ne leettsa mroo Zacari gagt raa tediz Zacari, tsa myeen re zha lee Zacari mwii thib kwaan gwodoo, ne kon seny mni Zacari lo re zha, tak myaan Zacari mud.

²³ Ne leettsa ngozhoob wiz kuu mtsow Zacari kuu ndoblo tsow Zacari leen gwodoo, tsya ndya Zacari liz Zacari. ²⁴ Bluz leettsa ngwalo mriid re koree, lee tsaal Zacari Elisabet ngoo zhiinn, ne thitanax mroot ngot liz ngot dita thib gaay mbee, tak mtsow ngot xgab: ²⁵ “Mtsow Zha Nabee ayud'n, mlat leettsoo zha mne zha na, ne mkiib zha yalnathoy da lo re men”.

Lee mandad Gabriel ngwanii lo Mari

²⁶ Xoop mbee bluz lee Diox mtaal mandad Gabriel yez Nazaret kuu nzi yezlyu Galilea, ²⁷ ne ngwa mandad lo thib nzaa yeen kuu le Mari, kuu ter gak rop kon neeka thib mbyi, ne nzaa ree naka diiz tseyea kon thib mbyi kuu le Che, kuu nak thib zha raz chaan rey David. ²⁸ Tsa mndaab mandad ta nzo Mari ne nzhab mandad:

—iTsan Mari, naley bloo leettsoo'a, tak kwathoz wen nzo leettsoo Diox ne Diox lu! Ne lee Zha Nabee ndo kon lu.

²⁹ Per or mbin Mari kuu nzhab mandad chaan Diox lo Mari, neeka net Mari naa kwan tsow Mari, tsa mtsow Mari xgab na chebee tata nzhab mandad lo Mari.

³⁰ Tsa lee mandad nzhab:

—Mari, tsebeta, tak wen nzo leettsoo Diox ne Diox lu. ³¹ Nal lee lu yo zhiinn ne gapa thib mbet ne tob le'a mbet Jesús. ³² Lee mbet gak thib zha kuu kwathoz nataak lo Diox, ne Xgann Diox kuu ndob yibaa tob le re men mbet, ne lee Diox kuu nak Zha Nabee, tsow tsa nabee zha taxal mnabee David tey zha, zha ndala, ³³ tsa thitanax nabee zha lo re zha Israel. Ne lee yalnabee chaan zha luxt thitanax.

³⁴ Tsa lee Mari mnaabdiz lo mandad, ne nzhab:

—¿Xomod tak gak koree? Tak lee na ter gak'n kon neeka thib mbyi.

³⁵ Lee mandad mkab, ne nzhab:

—Lee Mbi Nayon ne lee yalney chaan Diox kuu ndob yibaa la ditsa taxal thib

xkow. Kona lee zhiinna kuu gal role Xgann Diox. ³⁶ Noga Elisabet zha liza gap thib mbet, tegal zha gola Elisabet, ne tegal mndaat Diox mbet lo Elisabet. Per nda'a xoop mbee nzo zhiinn Elisabet. ³⁷ Tak lee Diox nzhaak ntsow reta kwa.

³⁸ Tsa lee Mari nzhab:

—Na nak mos chaan Zha Nabee, ndoblo tsow Diox lon taxal ne'a lon.

Oraaka lee mandad ndya.

Mari ngwatwii lo Elisabet

³⁹ Ne leeka thib re wiza, kwathoz nyob leettsa Mari ngwa Mari thib yez kuu nzi leen yii yezlyu Judea, ⁴⁰ ne or mzin Mari liz Zacarí, mni Mari “diox” lo Elisabet. ⁴¹ Ne leettsa mbin Elisabet mni Mari “diox” lo Elisabet, lee mbet Elisabet kwathoz naley ngoo leettsa, ne mwini mbet leettsa Elisabet, ne oraaka lee Mbi Nayon mnabee leettsa Elisabet. ⁴² Tsa lee Elisabet nex nzhab:

—jKwathoz wen nzo leettsa Diox ne Diox lu nake tedib net re ngot, ne kwathoz wen nzo leettsa Diox ne Diox xganna! ⁴³ ¿Cho nak'n par ndyada ndyaadtwi'a lon xnaa Zha Nabee lon? ⁴⁴ Tak leettsa mbin na mni'a “diox” lon, kwathoz naley ngoo leettsa mbet da ne mwini mbet leettsa. ⁴⁵ jKwathoz wen nda'a, tak ngwalaaza lee Zha Nabee tsow re kuu ne zha tsow zha lo'!

⁴⁶ Tsa lee Mari nzhab:

Lee yalnaban da nzhoool lo Zha Nabee, tak lee zha nzhaak ntsow reta kwa,

⁴⁷ ne lee xbi da kwathoz naley nzo leettsa ne Diox, kuu koon lo yalguth ne lo re falt da.

⁴⁸ Ne tegal nataagt, per lee Diox mlin, ne desde nal lee re men telo ni lon zha nataak,

⁴⁹ tak lee Diox nap yalney, kona mtsow Diox re kuu thoz lon.

¡Ne Nayon nak le Diox!

⁵⁰ Thibka nlat leettsa Diox ne Diox re zha kuu nzhon diiz lo Diox.

⁵¹ Ne mtsow Diox re kuu thoz, kon yalney chaan Diox.

Ne mluux Diox re xgab re zha kuu naro nak.

⁵² Mkib Diox yalnataak lo re zha kuu nabee, ne mtsow nataak Diox re zha kuu nataagt, kuu nadoo nak.

⁵³ Kwaro kwaa mndaa Diox lo re zha kuu nlann,

per lee lo re zha rik yent kwan mndaa Diox lo re zha.

⁵⁴ Mtsow Diox ayud re nee, zha Israel, ne mlat leettsa Diox mne Diox nee, mnithlaazt Diox re nee zha kuu nak mos Diox,

⁵⁵ taxal nzhab Diox lo teyaa Abraham zha ndala, lo Abraham ne lo re zha raz Abraham.

⁵⁶ Tsa mlet Mari teeka tson mbee liz Elisabet, tsaraa ndya Mari liz Mari tedib welt.

Leettsa ngol Juan

⁵⁷ Ne leettsa mzin wiz gal zhiinn Elisabet, ngop Elisabet thib mbet bi. ⁵⁸ Tsa mbin re zha liz Elisabet ne re zha kuu nzo gaxta liz Elisabet, lee Diox mlat leettsa mne Elisabet, tsa ngwatwii re zha lo Elisabet ne mndaa re zha texkix lo Diox. ⁵⁹ Ne leettsa mzaal mbet xon wiz, lee chop tson zha liz Zacarí ngwa mkeey seny mbet, kuu nak seny re zha Israel. Ne ngwalaaz re zha gatob le zha mbet Zacarí taxal le xut mbet. ⁶⁰ Per lee xnaa mbet nzhab:

—Rolet mbet tabaa, Juan role mbet.

⁶¹ Tsa lee re zha nzhab lo Elisabet:

—Neeka thib zha liza let tabaa.

⁶² Tsa kon seny mnaabdz zha lo xut mbet, tsa naa xomod nlaaz xut mbet role mbet.

⁶³ Per lee Zacarí xut mbet mnaab thib le tabl, tsa kee Zacarí lee mbet lo tabl, tsa mkeey Zacarí lo tabl: “Juan role mbet”. Ne reta zha kwathoz mzegey leettsa zha mbin zha kona. ⁶⁴ Ne oraaka lee Zacarí mre mndediz tedib welt, ne mndelo Zacarí mbil lo Diox. ⁶⁵ Ne reta zha kuu nzo gax liz Zacarí kwathoz mzeb zha por kuu ngok, ne reta zha kuu nzo re yez kuu nzi leen yii chaan yezlyu Judea, mndediz zha re kuu ngok. ⁶⁶ Ne reta zha kuu mbin re kuu ngok nda leettsa zha, ne nzhab zha: “¿Cho nak mbet ree?” Tata mtsow re zha xgab, tak lee Zha Nabee mtsow re kuu thoz lo mbet.

Zacarí mbil lo Diox

⁶⁷ Ne lee Mbi Nayon mnabee leettsa Zacarí xut mbet, tsa mndaa Zacarí kwent kuu nzhab Diox lo Zacarí, ne nzhab Zacarí:

⁶⁸ jKwathoz wen nak Zha Nabee, Diox kuu nak Diox re'aa zha Israel,

tak myaad Diox lo re'aa kuu wlipaa nak zha yez Diox, ne mtelaa Diox re'aa lo re faltaa!

⁶⁹ Ne mtaal Diox thib zha kuu tak koo'aa lo yalguth, ne tuyy zha re falt chaanaa kon yalney chaan zha.

Zha ree ndyad lo raz chaan rey David kuu ngok teyaa, ne kuu ngok mos Diox.

⁷⁰ Koree nak kuu nzhab re profet kuu ngoo ndala, re zha kuu nambi mndo lo Diox.

Leettsa nzhab zha:

⁷¹ Diox nak cho telaa'aa lo re zha kuu nayii ne'aa, ne lo re zha kuu went nzo leettsa ne'aa. [Sal. 106:10]

⁷² Ne loo Diox xa nlat leettsa Diox ne Diox re'aa, tak mnithlaazt Diox re diiz kuu nzhab Diox lo re teyaa, zha ndala.

⁷³ Ne koree nak kuu nzhab Diox lo teyaa Abraham:

⁷⁴ Nzhab Diox lee Diox telaa'aa lo re zha kuu nayii ne'aa, tsa tsibtaa tsowaa rtsin Diox.

⁷⁵ Ne ndoblo thibka nambi ne nali to'aa lo Diox, reta wiz kuu nabanaa.

Tsa nzhab Zácarí lo xgann Zácarí:

⁷⁶ "Lee lu nak profet chaan Diox kuu ndob yibaa, tak lu tener lo Zha Nabee, tsa xaala xnet zha,

⁷⁷ ne taa'a kwent lo re zha kuu nak zha yez chaan Diox,

lee Diox tuyy re falt zha,

ne taa Diox yalnaban kuu thitanax lo re zha.

⁷⁸ Tak nlat leettsoo Diox ne Diox re'aa, kona ndaa Diox tedib xni kuu taxal xni wiz lo re'aa,

⁷⁹ tsa la xni ree lo re zha kuu nzo lo yalkow, ne lo re zha kuu nzo xamal chaan yalguth,

ne ko Diox re'aa net kuu wen kwinaa."

⁸⁰ Ne lee mbet ndezhen raa ne nzhak ney mbet lo Mbi Nayon chaan Diox, ne wan ngoo zha, asta wiz kuu mndelo zha mndaa kwent xkiiz Diox lo re zha Israel.

2

Tenzhee ngol Jesús (Mt. 1:18-25)

¹ Ne lee re wiza lee Augusto nak zha kuu nabee dita ta nabee yez Roma, tsa mnabee Augusto thop zha le re men dita ta nabee Roma, tsa la le re men padron. ² Ne Ciren nak zha kuu nabee yezlyu Siria, leettsa mthop zha le re men welt ner. ³ Reta zha ndoblo zha ya zha laz zha, tsa la le zha padron.

⁴ Kona, no Che mrooyez Nazaret, ta nabee yezlyu Galilea, ne ngwa Che yez Belén kuu nzi yezlyu Judea ta ngol rey David, tak lee Che nak zha raz chaan rey David. ⁵ Tsa ngwa Che rop Mari ty, tsa la le rop zha padron ne naka diiz tseyaa Mari rop Che, ne lee Mari nzo zhiinna. ⁶ Ne leettsa bee nzi rop zha Belén, mzin wiz kuu lee Mari gal zhiinna. ⁷ Tya ngop Mari zhiinn Mari kuu ner, tsa mchiix Mari mbet lar ne mdix Mari mbet ta nzi yizh kuu nzhaw maa, tak mgaat rop zha yuu ta gabet zha.

Re mandad ne re zha kuu nkenap mbak zhiil

⁸ Gaxta Belén nzi chop tson zha kuu nkenap mbak zhiilee yaal. ⁹ Tsa cha mloo thib mandad chaan Diox lo re zha, ne lee xni chaan Zha Nabee mla dita ta nzi re zha, tsa kwathoz mzeb re zha. ¹⁰ Tsa lee mandad nzhab lo re zha:

—Tsebt goo, tak leen ndyaadno thib diiz kuu kwathoz wen lo goo, ne kwathoz naley yo leettsoo re men gone. ¹¹ Tak naltserree ngol thib mbet laz David, ne mbet ree telaa goo lo re falt goo. Ne mbet ree nak Crist

Kuu Mtaal Diox Nabee, ne leeka mbet nak Zha Nabee. ¹² Koree nak thib seny tsa yetsal mbet lo goo, lee mbet nabix lar nax lo yizh kuu nzhaw maa.

¹³ Ne leeka ora lee kwaro mandad chaan Diox mndo lo mandada, ne mbil re mandad lo Diox ne nzhab re mandad:

¹⁴ ¡Ndoblo gol re men lo Diox kuu ndob yibaa! ¡Ne wen kwin re men lo yezlyu ree, tak nlaaz Diox tsow Diox kuu wen lo re men!

¹⁵ Leettsa lee re mandad ndya yibaa, tsa lee re zha kuu nkenap mbak zhiil mndelo zha nzhab zha lo re altaa zha:

—Ndaa goo re'aa yez Belén nal, tsa wii'aa naa kwan ngok, tak kona mloo Zha Nabee diize lo'aa.

¹⁶ Tsa lijer nda re zha, ne mzal Mari ne Che lo re zha, ne lee mbet nax ta nzi yizh kuu nzhaw maa. ¹⁷ Ne or mwii re zha mbet, tsa mndelo zha mndaa zha kwent chaan mbet, kuu nzhab mandad chaan Diox lo re zha, ¹⁸ ne reta zha kuu mbin kuu nzhab re zha kuu nkenap mbak zhiil, kwathoz mzegey leettsoo re zha. ¹⁹ Per thibka nzo re diza yek Mari, ne thibka ntsow Mari xgabé. ²⁰ Tsa lee re zha kuu nkenap mbak zhiil ndya, ne mbil zha lo Diox ne mndaa zha texkix lo Diox, por re kuu mbin zha ne re kuu mwii zha, tak ngok reta kuu nzhab mandad chaan Diox lo re zha.

Mbe zha Jesúsgwodoo chaan Diox

²¹ Leettsa mzaal mbet xon wiz, tsa mkeez zha seny chaan zha Israel mbet, ne mtob le zha mbet Jesúsgwodoo, taxal nzhab mandad chaan Diox lo Mari, leettsa bee ter yo zhiinn Mari.

²² Ne leettsa ngwazhoob wiz kuu lee Mari ngok nambi, taxal nabee ley chaan Moisés, tsa lee Che ne Mari mbe mbet yez Jerusalén, tsa kayaa Zha Nabee mbet. ²³ Tata mtsow zha, tak lo ley chaan Zha Nabee nzhab: "Reta mbet bi kuu gal ner, gak zha nayon lo Zha Nabee". ²⁴ Ngwa zha ne mndaa zha gon kuu ndoblo zha taa zha, taxal nabee ley chaan Zha Nabee: "Ndoblo gwe zha chop ngog o chop palom".

²⁵ Ne re wiza ngoo thib mbyi kuu le Simeón yez Jerusalén. Ne mbyi'a nak thib zha nali lo Diox, ne nzhoool zha lo Diox, ne ngebet zha tetsey Diox leettsoo re zha Israel. Ne lee Mbi Nayon chaan Diox mnabee leettsaa zha, ²⁶ ne nzhaba Mbi Nayon lo zha gath zha, os ter wii zha, zha kuu taal Diox nabee. ²⁷ Tsa lee Mbi Nayon mtsow ngwa Simeón gwodoo, ne leeka ora mbe Che ne Mari mbet gwodoo, tsa tsow zha kuu nabee ley chaan Moisés. ²⁸ Ora mdeez Simeón mbet ne mbil Simeón lo Diox ne nzhab Simeón:

²⁹ Zha Nabee, nalsi ngoka kuu mne'a lon, kwathoz wen nzo leettsoon, taka laa'a gath'n nal.

³⁰ Tak nalsi mwii'a na zha kuu telaa re men lo yalguth,
³¹ mtaala zha lo reta men taxal mtsowa xgabe desde ndala.

³² Lee zha nak xni kuu teni lo reta men kuu nagt zha Israel,
 ne tsow nataak zha re nee, zha kuu nak zha Israel.

³³ Kwathoz mzegey leettsoo Che ne Mari xnaa Jesús, or mbin rop zha kuu nzhab Simeón kwent chaan Jesús. ³⁴ Tsa mnaab Simeón lo Diox kenap Diox re zha, ne nzhab Simeón lo Mari xnaa Jesús:

—Diox mli mbet ree par kib mbet falt chaan kwathoz tawlazaa o par masraa kwibe dits zha, ne nak mbet thib seny kuu kwaro zha kayaat mbet, ³⁵ tsa lee re kuu ntsow kadtä thib re men xgab gak nabeey. Per lee lo'a gak kona taxal thib espad kuu rid leettsoo'a.

³⁶ Ne leeka ty a ndo thib ngot kuu le An, ngota nak profet chaan Diox, ne ngota nak rtsaap Fanuel kuu nak zha raz chaan Aser, ne zha gola ngot. Tak kwathoz mndy- een ngot mtsyea ngot, gazka liin ngoo rop tsaal ngot, ³⁷ ne nda'a thap galbthap liin myaan ngot byud. Ne thitanax mbechet ngot gwodoo chaan Diox, tse ne yaal ntsow ngot tsiiin lo Diox ntsow ngot ayun ne ndediz ngot lo Diox. ³⁸ Ne ora mzin ngota ne mndelo ngot mndaa ngot texkix lo Diox, ne mndaa ngot kwent chaan Jesús, lo re zha kuu ngebet tsin zha kuu koo re zha Jerusalén lo yalguth.

³⁹ Ne leettsa ngwalo mtsow Che rop Mari re kuu nabee ley chaan Zha Nabee, tsa mretab rop zha yezlyu Galilea tedib welt, ta nak laz zha Nazaret. ⁴⁰ Ne thib wiz tedib wiz lee Jesús masraa ndezhen ne masraa nzhaak, ne lee Diox thibka ndo kon Jesús.

Lee Jesús ngwato lee roo gwodoo

⁴¹ Gandata liin nya xut Jesús ne xnaa Jesús lo ani Paskw yez Jerusalén. ⁴² Ne leettsa mzaal Jesús tsiiibchop liin, ngwa Jesús rop xut Jesús ne xnaa Jesús Jerusalén, taxal nak Kostumr zha. ⁴³ Ne leettsa ngwalo mriid ani, tsa mretab re zha laz zha, ne lee Jesús myaanka Jerusalén, per myeent xut Jesús ne xnaa Jesús lee Jesús myaanka. ⁴⁴ Tak mtsow rop zha xgab xid re men ndyaad Jesús, ne leettsa nda'a thib wiz ndo zha net. Tsaraa mndelo zha mkwaan zha Jesús xid re zha liz zha ne xid re tawlaz zha, per mzalt Jesús lo zha. ⁴⁵ Tsa mretab rop zha Jerusalén tedib welt, ne mkwaan zha Jesús.

⁴⁶ Ne leettsa mzaal tson wiz tsaraa mzaal Jesús lo rop zha. Lee Jesús ndob lee roo gwodoo chaan Diox xid re maestr kuu nloox xii Diox, nkenza Jesús ne naabdiz Jesús lo re maestr. ⁴⁷ Ne reta zha kuu nkenza kuu ni Jesús, kwathoz nzegey leettsoo re zha,

tak kwathoz nzhaak Jesús, ne nzhaak Jesús nkab lo re zha. ⁴⁸ Or mzaal Jesús lo xut Jesús ne lo xnaa Jesús, kwathoz mzegey leettsoo rop zha, tsa nzhab xnaa Jesús lo Jesús:

—Xgann na, ¿chebee tabaa mtsowa lo nee? Kwathoz nalatt nzhab rop nee xuta ngewaanaa nee lu.

⁴⁹ Lee Jesús mkaab ne nzhab:
 —¿Chebee nkwaan goo na? ¿Chu net goo lee na ndoblo ton lo re kuu nak rtsin Xut'n?

⁵⁰ Per lee xut Jesús ne xnaa Jesús myent rop zha kuu nzhab Jesús.

⁵¹ Tsa mre Jesús laz Jesús yez Nazaret kon xut Jesús ne kon xnaa Jesús, ne mbin Jesús diiz lo xut Jesús ne lo xnaa Jesús. Per thibka nzo re koree leettsoo Mari xnaa Jesús ne ntsow Mari xgab naa kwan nak re kona. ⁵² Ne lee Jesús masraa ndezhen, ne masraa nzhaak Jesús, ne nataak Jesús lo Diox ne lo re men por re kuu ngok lo Jesús.

3

Juan kuu mtsowleyy men mndo yubiz
(Mt. 3:1-12; Mr. 1:1-8; Jn. 1:19-28)

¹ Ne leettsa nda'a tsiiin liin nabee Tiberio César dita la nabee Roma, lee Poncio Pilat nak zha kuu nabee yezlyu Judea, lee Herodes nabee Galilea, lee Lip wets Herodes nabee yezlyu Iturea ne yezlyu Traconite, ne lee Lisanias nak zha kuu nabee yezlyu Abilinia. ² Ne Anás ne Cáifas nak ngwleyy kuu kwathoz nataak yez Jerusalén tsya. Re wiza lee Juan xgann Zacari ngoo thib ta yubiz, ne lee Diox mni lo Juan. ³ Tsa lee Juan mriid dita yezlyu kuu nzi roo yoo Jordán, ne mbez Juan lo re men, ndoblo laa re men net went ne tsee zha mod went kuu nak zha, ne gakleyy zha, tsa tuyy Diox re falt zha. ⁴ Ne lee kona ngok taxal nzhab Isái, kuu ngok profet ndala, or nzhab Isai:

Thib zha kuu ndo yubiz nex gab:
 “Btexkwaa goo xnet Zha Nabee;
 bxaal goo thib net nali te zha.” [Is. 40:3]

⁵ Reta bte ndoblo zhobtse, ne reta yií ne reta lom ndoblo gak nali, ne reta net kuu naral nak ndoblo gak nali, ne lee re net kuu nakap nak tezhobtse,

⁶ ne reta men wii Zha Kuu Mtaal Diox Nabee, zha kuu telaa re men lo yalguth. [Is. 40:3-5]

⁷ Leettsa mzin re men kuu gakleyy lo Juan, tsa mbez Juan lo re zha:

—¡Goo nak zha kuu nakap nak taxal mbeel! ¡Cho mloo diiz lo goo par zhonn goo lo yalnayii kuu ne Diox yaad? ⁸ Bloo goo lee goo mlaa'a goo re kuu went ne wlipaa mlaa goo mod went kuu nak goo, ne gabt goo lo altaa goo: “¡Lee’aa nak raz chaan Abraham!” Tak wlipaa na nin lo goo, lee Diox tak tsow, tsa noga re ke ree gak raz

chaan Abraham.⁹ Ne lee yeba ndoba xann re ya kuu ndaaat xle wen, tsa ga zhay ne ko zhay lo ki.

¹⁰ Tsa lee re zha mnaabdiz lo Juan, ne nzhab zha:

—¿Kwan ndoblo nee tsow nee?

¹¹ Juan mkab ne nzhab:

—Loka cho goo kuu nap chop xab, btaa goo thibe lo zha kuu napte, ne loka cho goo nap kuu wu, btaa gooy wu zha kuu napte.

¹² Ne noga myaad chop tson zha kuu ntsow kobral temi chaan yezlyu, kuu nzhax lo zha Roma lo Juan, tsa tsowleyy Juan zha, tsa mnaabdiz zha lo Juan, ne nzhab zha:

—Maestr, ¿kwan ndoblo nee tsow nee?

¹³ Juan nzhab lo re zha:

—Bnaab goo beeta kuu ndoblo zha kix zha lo goo.

¹⁴ Noga chop tson soldad mnaabdiz lo Juan, ne nzhab:

—¿Lee nee kwan ndoblo nee tsow nee?

Tsa lee Juan mkab, ne nzhab lo re zha:

—Kibt goo chaan re men lafwers, neekit kekit goo zha kon thib kuu wlit, ne ndoblo wen yo leettsoo goo kon temi kuu nzhax lo goo.

¹⁵ Lee re men ngebet naa kwan gak. Ne ntsow zha xgab cha lee Juan nak Crist Kuu Mtaal Diox Nabee.¹⁶ Per lee Juan nzhab lo re zha:

—Na, ntsowleyy goo kon nit, per dits'n ndeke tedib zha kuu tsowleyy goo kon Mbi Nayon ne kon ki. Mas nataak zha'a nake na, kona neeka korre dits labyid zha'a ndoblot'n xak'n.¹⁷ Ne nzo'a ya yaa zha par koo zha paj lo nzob xtil, ne kotsow zha nzob xtil leen loo ta nyetsow nzob xtil, ne lee paj ko zha lo ki kuu thananax nyuyyt.

¹⁸ Tenzhee, ne kwathoz tyen mod mteni Juan re men, ne mndaa Juan kwent Diiz Chul chaan Diox lo re men.¹⁹ Ne noga rey Herodes mkoz lo Juan, tak ngok rop Herodes kon Herodias kuu nak tsaal Lip wets Herodes, ne noga mkoz Herodes lo Juan, tak mtsow Herodes tedib net re kuu went,²⁰ ne mbint rey Herodes diiz lo Juan, leel tedib kuu mas went mtsow Herodes, mloo Herodes Juan tsib.

*Jesús ngokleyy
(Mt. 3:13-17; Mr. 1:9-11)*

²¹ Ne leettsa ngetsowleyy Juan re men, noga Jesús ngwá ngokleyy, ne leettsa ngeni zha lo Diox lee yibaa mzhaal,²² ne lee Mbi Nayon mloo taxal thib palom mla dits Jesús, ne koree mloo lo re men, tsa lee thib bos mroo yibaa ne nzhab:

—Lu nak xgann na, kuu kwathoz nke leettsoon ne kwathoz wen nzo leettsoon nen lu.

*Raz chaan re tey Jesús
(Mt. 1:1-17)*

²³ Teeka galbtsii liin nap Jesús leettsa mndelo Jesús mndaa Jesús kwent Diiz Chul chaan Diox. Ne lee re men ngwalaaz lee Jesús nak xgann Che,

Che xgann Eli,

²⁴ Elí ngok xgann Matat,

Matat ngok xgann Leví,

Leví ngok xgann Melqui,

Melqui ngok xgann Jana,

Jana ngok xgann Che,

²⁵ Che ngok xgann Matatías,

Matatias ngok xgann Amós,

Amós ngok xgann Nahúim,

Nahúm ngok xgann Eslí,

Eslí ngok xgann Nagai,

²⁶ Nagai ngok xgann Maat,

Maat ngok xgann Matatías,

Matatias ngok xgann Semeí,

Semeí ngok xgann Josec,

Josec ngok xgann Judá,

²⁷ Judá ngok xgann Joanán,

Joanán ngok xgann Resa,

Resa ngok xgann Zorobabel,

Zorobabel ngok xgann Salatiel,

Salatiel ngok xgann Nerí,

²⁸ Nerí ngok xgann Melqui,

Melqui ngok xgann Adí,

Adí ngok xgann Cosam,

Cosam ngok xgann Elmadam,

Elmadam ngok xgann Er,

²⁹ Er ngok xgann Jesú,

Jesús ngok xgann Eliezer,

Eliezer ngok xgann Jorim,

Jorim ngok xgann Matat,

³⁰ Matat ngok xgann Leví,

Leví ngok xgann Simeón,

Simeón ngok xgann Judá,

Judá ngok xgann Che,

Che ngok xgann Jonám,

Jonám ngok xgann Eliaquim,

³¹ Eliaquim ngok xgann Meleá,

Meleá ngok xgann Mena,

Mena ngok xgann Matatá,

Matatá ngok xgann Natán,

³² Natán ngok xgann rey David,

rey David ngok xgann Isaí,

Isaí ngok xgann Obed,

Obed ngok xgann Booz,

Booz ngok xgann Salmón,

Salmón ngok xgann Naasón,

³³ Naasón ngok xgann Aminadab,

Aminadab ngok xgann Admín,

Admín ngok xgann Arní,

Arní ngok xgann Esrom,

Esrom ngok xgann Fares,

Fares ngok xgann Judá,

³⁴ Judá ngok xgann Kob,

Kob ngok xgann Isaac,

Isaac ngok xgann Abraham,

Abraham ngok xgann Taré,

Taré ngok xgann Nacor,

³⁵ Nacor ngok xgann Serug,

Serug ngok xgann Ragau,
Ragau ngok xgann Péleg,
Péleg ngok xgann Heber,
Heber ngok xgann Sala,
36 Sala ngok xgann Cainán,
Cainán ngok xgann Arfaxad,
Arfaxad ngok xgann Sem,
Sem ngok xgann Noé,
Noé ngok xgann Lamec,
37 Lamec ngok xgann Matusalén,
Matusalén ngok xgann Enoc,
Enoc ngok xgann Járed,
Járed ngok xgann Mahalaleel,
Mahalaleel ngok xgann Cainán,
38 Cainán ngok xgann Enós,
Enós ngok xgann Set,
Set ngok xgann Adán,
Adán ngok xgann Diox.

4

*Ngwalaaz Maxuuy gakedi Maxuuy Jesús
(Mt. 4:1-11; Mr. 1:12-13)*

¹ Ne kwaro mnabee Mbi Nayon leettsou Jesús, leettsa mroo Jesús roo yoo Jordán, tsa ndano Mbi Nayon Jesús ta nak yubiz. ² Ne chop gal wiz ne chop gal yaal mndo Jesús tyá, ne neeka thib kwaa ndowt Jesús, tsaraa mlann Jesús. ³ Tsa lee Maxuuy ngwalaaz gakedi Jesús, ne nzhab lo Jesús:

—Os lee'a wlipaa Xgann Diox naka, guz lo ke ree tsa reyale pan.

⁴ Lee Jesús mkab ne nzhab:

—Lo xkeets Diox nzhab: “Nabant men beeta kon pan, sinke lee men nabban kon reta diiz kuu ndroo roo Diox”. [Dt. 8:3]

⁵ Tsaraa ndano Maxuuy Jesús yek thib yii naro, ne mloo Maxuuy reta yez kuu nzi lo yezlyu lo Jesús. ⁶ Ne nzhab Maxuuy lo Jesús:

—Na ta dita yahnabee ne yalney chaan re yez ree lo'a, tsa nabee luy, tak chaan da nake, ne loka cho lo nlaz'n ta nay. ⁷ Os lee'a tobuxa lon ne gola lon, retay gak chaana.

⁸ Per lee Jesús mkab, ne nzhab:

—Beche lon Maxuuy, tak lo xkeets Diox nzhab: “Beeta lo Diox kuu nabee lo'a ndoblo gola ne ndoblo tsowa tsuin lo”. [Dt. 6:13]

⁹ Tsa mndeno Maxuuy Jesús yez Jerusalén, ne ngwano Maxuuy Jesús yek gwodoo ta mas ya ndab, tsa nzhab Maxuuy lo Jesús:

—Os lee'a wlipaa Xgann Diox naka, gob par yath, ¹⁰ tak lo xkeets Diox nzhab:

Diox taal mandad chaan Diox tsa kenap mandad lu,

tsa yent kwan taka,

¹¹ ne ten mandad yaa'a, tsa yent kwan tak nii'a lo ke. [Sal. 91:11-12]

¹² Jesús mkab, ne nzhab:

—Noga nzhab lo xkeets Diox: “Kwaanta mod par kedi'a Diox kuu nak Zha Nabee lo'a”. [Dt. 6:16]

¹³ Ne lee Maxuuy ngogt raa gakedi Jesús, tsa mlaa Maxuuy Jesús thib tyemp.

Jesús mndelo rtsin

(Mt. 4:12-17; Mr. 1:14-15)

¹⁴ Tsa mre Jesús yezlyu Galilea kon yalney chaan Mbi Nayon, ne dita yezlyu'a mndediz re men kwent chaan Jesús. ¹⁵ Ne mloo Jesús lo re men ta nkaltaa re zha Israel nteed xkiiz Diox, ne ntsoo nataak re men Jesús.

Jesús mzin yez Nazaret

(Mt. 13:53-58; Mr. 6:1-6)

¹⁶ Tsa ngwa Jesús yez Nazaret ta mzhén Jesús. Thib wiz sabd kuu ndroxkwan re zha Israel, mndaab Jesús ta nkaltaa re zha Israel nteed zha xkiiz Diox, taxalka nak kostumr Jesús, ne mndeli Jesús lab Jesús xkeets Diox.

¹⁷ Tsa mndaa zha yeets kuu mkee profet Isaí lo Jesús. Ne leettsa mxaal Jesús lo yeets, mzal Jesús ta tenzhee nzhab:

¹⁸ Lee Mbi Nayon chaan Zha Nabee ndo kon na,

tak mli zha na par tan kwent Diiz Chul chaan zha lo re zha prob,

ne mtaal zha na, tsa tetsey'n leettsou re zha kuu yent gan leettsou,

noga mtaal zha na, tsa telaan re zha kuu nzo tsib lo Maxuuy,

par tegwen ngutlo re syeg;

ne par telaan re zha kuu ndakti lo Maxuuy; ¹⁹ ne tan kwent chaan wiz kuu leettsa lee

Zha Nabee,

taa re chaane kuu wen lo re men. [Is. 61:1-2]

²⁰ Tsaraa mthuz Jesús yeets, ne mndaa Jesús yeets lo zha kuu nkenap ta nkaltaa re zha nteed xkiiz Diox, ne mndob Jesús. Ne reta zha kuu nzi tya key mwii zha lo Jesús.

²¹ Tsa lee Jesús mndelo nzhab lo re zha:

—Naltserree ngok kuu nke lo xkeets Diox

lo re goo.

²² Ne reta zha wen mndediz zha Jesús, ne kwathoz mzegey leettsou zha mbin zha re diiz kuu nzhab Jesús, ne mbez re zha lo altaa zha:

—¿Chu leet zha ree nak xgann Che?

²³ Tsa mkab Jesús lo re zha, ne nzhab Jesús:

—Wlipaa na nin lo goo, lee re goo ntsow goo xgab ne goo diiz ree lon: “Doctor leeka lu btegwe'a lu”. Ne noga ntsow goo xgab ne goo lon: “Lee re kuu mbin nee mtsowa yez Capernaúm, noga nzhee laza btsowe”.

²⁴ Noga nzhab Jesús:

—Wlipaa na nin lo goo, neeka thib re profet nkayaat re tawlawz zha zha. ²⁵ Wlipaa na nin lo goo, kwathoz tyen ngot byud ngoo lazaa yez Israel, tyemp kuu mban profet Lí, leettsa mlat yi tson liin narol, ne mla win dita lo yezlyu. ²⁶ Per mtaalt Diox Lí lo neeka

thib ngot byud zha tawlazaa zha Israel, sinke lee Diox mtaal Lí lo thib ngot byud zha yez Sarepta, kuu nzi ta nabee yez Sidón.

²⁷ Ne nogá ngoo kwathoz tawlazaa kuu mzhaak yíz kuu ndezhoz kwerp zha, tyemp kuu mban profet Eliseo, per neeka thib zha mtegewt Eliseo, sinke beeta Naamán zha yezlyu Siria mtegewt Eliseo.

²⁸ Ne or mbin re zha Israel kuu mkaltaa ta nteed zha xkiiz Diox kona, kwathoz mkezhyan re zha. ²⁹ Tsa ngwateli re zha ne mloo zha Jesús tya, ne ndano zha Jesús yek yii kuu nzi yeza, tsa tub zha Jesús. ³⁰ Per lee Jesús mriid xid re zha ne nda Jesús.

*Thib mbyi kuu nzo mbi fyera leettsoo
(Mt. 1:21-28)*

³¹ Tsa lee Jesús ngwa yez Capernaúm, kuu nzi yezlyu Galilea. Ne reta sabd wiz kuu nzhollo re zha Israel lo Diox, mloo Jesús lo re men. ³² Ne kwathoz mzegey leettsoo re zha, mwii zha xa mloo Jesús lo re zha, tak kon yalnabee ni Jesús lo re men.

³³ Ne ta nkaltaa re zha nteed zha xkiiz Diox, ndo thib mbyi kuu nzo mbi fyera leettsoo, mretyath ne nzhab:

³⁴ —¡Blaa nee! ¿Kwan ndaka ne'a nee? ¿Chu ndyaada luuzha nee Jesús zha Nazaret? Nlebeen lu, nen lee'a nak Zha Kuu Nayon lo Diox.

³⁵ Tsa mkok mbi fyera lo Jesús, ne nzhab Jesús:

—¡Btow roo'a ne broo leettsoo mbyi ree!

Tsa lee mbi fyera mlobi mbyi'a lo yu xid re mena, ne mroo mbi fyera leettsoo mbyi'a, ne yent kwan mzhaak mbyi. ³⁶ Reta zha kuu nzi tya kwathoz mzegey leettsoo zha, ne mbez zha lo altaa zha:

—¿Cho nak zha ree? Nap zha yalnabee ne yalney ngoo zha re mbi fyera leettsoo re men, ne nzhon re mbi fyera diiz lo zha.

³⁷ Ne kwathoz ney mraats diiz, re kuu mtsow Jesús dita yezlyu Galilea.

Jesús mtegwe xnaatsaap Pey ne kwathoz mbyi

(Mt. 8:14-15; Mr. 1:29-31)

³⁸ Tsa mroo Jesús ta nkaltaa re zha Israel nteed xkiiz Diox, ne nda Jesús liz Pey, tsa nzhab re zha lo Jesús lee xnaatsaap Pey ndak xlee, ne mnaab zha lo Jesús tsa tegwe Jesús xnaatsaap Pey. ³⁹ Tsa mwii Jesús lo ngot, ne ora mkok xlee lo Jesús, ne oraaka mroo xlee ngot. Ne ngwache ngot ne mndaa ngot kuu ndow re zha.

Jesús mtegwe naroob mbyi

(Mt. 8:16-17; Mr. 1:32-34)

⁴⁰ Ne leettsa mera bix wiz, reta zha kuu nap mbyiiz kuu ndak zhaapaa zhaapaa yíz, myaadno zha re mbyiiz lo Jesús, tsa mxoob Jesús yaa Jesús yek re mbyiiz ne mtegwe Jesús mbyiiz. ⁴¹ Ne nogá mloo Jesús mbi fyera

leettsoo tyen zha, ne mbezunguth re zha ne mbezunguth re zha lo Jesús:

—¡Lu nak Xgann Diox!

Per lee re mbi fyera mkok lo Jesús, ne mlaat Jesús gani re mbi fyera lo Jesús, tak ne'a re mbi fyera lo Jesús nak Crist Kuu Mtaal Diox Nabee.

*Jesús mloo Diiz Chul lo re men
(Mr. 1:35-39)*

⁴² Leettsa ngwani yezlyu tedib wiza, mroo Jesús yeza ne nda Jesús thib ta to thita Jesús. Per lee re men mkaan Jesús, ne or mzin re zha ta ndo Jesús. Ngwalaaz zha gatekweet zha Jesús par bit Jesús. ⁴³ Per lee Jesús nzhab lo re zha:

—Noga ndoblo tan kwent Diiz Chul kuu ndaa kwent xomod nabee Diox lo re men tedib net re yez, tak par kona mtaal Diox'n.

⁴⁴ Ne mroo Jesús mndaa Jesús kwent Diiz Chul chaan Diox, re yez chaan Judea, ta nkaltaa re zha Israel nteed xkiiz Diox.

5

*Jesús mrez thap zha kuu niit mbel
(Mt. 4:18-22; Mr. 1:16-20)*

¹ Thib welt ndo Jesús roo nitdoo kuu le Genesaret, ne kwathoz men mkaltaa lo Jesús ne mzhoor re men Jesús, tak nlaaz re zha gon zha Diiz Chul chaan Diox kuu ndaa Jesús kwent. ² Tsa mwii Jesús chop kano roo nitdoo, kuu neeka thib men yent leene, tak lee re zha kuu niit mbel mroo leen kano ndateech yex. ³ Tsa mkendab Jesús leen kano chaan Simún, ne nzhab Jesús lo Simún tsig Simún kano tut kwat lo nitdoo. Tsa mndob Jesús leen kano, ne mndelo Jesús mloo Jesús lo re men, tsa nzhab Jesús lo Simún:

—Btsig goo kano lo nit, ne blebi goo yex goo, tsa niit goo mbel.

⁵ Tsa nzhab Simún lo Jesús:

—Maestr, dita yaal mke nee tsin ne neeka thib mbel mniitta nee, per tak lu ney, kona kobi nee yex nee leen nit.

⁶ Ne leettsa mloo re zha yex leen nitdoo, kwaro mbel mniit zha, ne asta ndrat yex.

⁷ Tsa mtsow re zha seny lo re altaa zha kuu nzoo leen tedib kano, tsa yaad re zha'a tsow ayud re zha. Ne myaad re zha'a mtsow ayud zha, ne mtse zha ropta kano, ne nlaa nlaa tab naats kano leen nitdoo. ⁸ Ne leettsa myeen Simún Pey kwathoz mbel mniit re zha, tsa mtobxub Pey lo Jesús ne nzhab Pey:

—¡Beche lon, Zha Nabee, tak zha ndab falt nak'n!

⁹ Kwathoz mzegey leettsoo Simún kon re altaa Simún, tak kwaro mbel mniit re zha.

¹⁰ Ne nogá Santiac ne Juan kuu nak rop xgann Zebedeo, rop zha'a nak altaa Simún. Per lee Jesús nzhab lo Simún:

—Tsebta, tak desde naltserree gaka zha kuu niit men par Diox.

¹¹ Leettsa ngwalo mtsino re zha kano roo nitdoo, tsa mlaa zha reta kwaan ne mnideke zha dits Jesús.

Jesús mtegwe thib zha kuu mzhaak yiz kuu ndeye
(Mt. 8:1-4; Mr. 1:40-45)

¹² Thib wiz leettsa ndo Jesús thib re yeza, tsa mzin thib zha kuu ndak yiz kuu ndeye lo Jesús, ne or mwii zha lo Jesús, mtobxub zha lo Jesús asta mndiinn yeklo zha lo yu, ne nzhab zha:

—Zha Nabee, os lee'a nlaaza, tak tegwe'a na lo yiz ree.

¹³ Tsa mxoob Jesús yaa Jesús yek zha, ne nzhab Jesús lo zha:

—Nlaz'n we'a.

Ne oraaka mgwe zha. ¹⁴ Tsa nzhab Jesús lo zha:

—Neeka thib lo zha yent kwan gaba. Sinke gwa lo ngwleyy, tsa ne zha lee'a mgwe'a lo yiz kuu mzhaaka, ne btaa gona taxal mnabee Moisés.

¹⁵ Per lee re kuu mtsow Jesús masraa mraats, ne kwathoz men mkaltaa mkenzaa kuu mni Jesús, ne noga mkaltaa re zha tsa tegwe Jesús zha lo yiz kuu ndak zha. ¹⁶ Per lee Jesús mbeche lo re men ne nda Jesús ta yent men, ne tya mndediz Jesús lo Diox.

Jesús mtegwe thib zha mthans

(Mt. 9:1-8; Mr. 2:1-12)

¹⁷ Thib wiz leettsa lee Jesús ngeloo lo re men, xid re mena ndob chop tson fariseo ne chop tson maestr kuu nloo xkiiz Diox, re zha'a ndyaad re ye zkuu nzi dita ta nabee Galilea, Judea ne Jerusalén, ne nap Jesús yalney chaan Diox ntegwe Jesús re mbyiz. ¹⁸ Tsa mzin chop tson mbyi kuu ngwano thib zha mthans kuu nzoob lo luun, ne nlaaz re zha ko zha mthans leen yuu, tsa kix zha mthans lo Jesús. ¹⁹ Ne ngogt gataab zha leen yuu, tak kwaro men nzi tya, tsa mkendab zha yek yuu, ne mxaal zha lut yek yuu, ne tya mriiid zha dib luun mthans, ne mdix zha mthans lo Jesús. ²⁰ Ne myeem Jesús lee re zha kuu myaadno mbyiza wlipaa nye-laaz Diox, tsa nzhab Jesús lo mbyiz:

—Lee re falta myuyya.

²¹ Tsa lee re maestr kuu nloo xkiiz Diox kon re fariseo mndelo mtsow xgab: “¿Cho nak mbyi ree? ¿Chebee tabaa mbez mbyi ree? Beeta Diox nak cho kuu tak tuyy re falt chaan re men.” ²² Per lee Jesús myeem naa kwan ntsow re zha xgab, tsa nzhab Jesús lo re zha:

—¿Chebee tabaa ntsow goo xgab? ²³ ¿Kwan ntsow goo xgab? ¿Kwan mas nagant gap'n lo mbyiz: “Lee re falta myuyya”, o tegwen zha ne gap'n lo zha: “Gwache, bzhen luuna ne tyee”? ²⁴ Per tsow'n koree lo goo, tsa ne goo

lee na, Kuu Mzin Ngok Men, nap'n yalnabee tuy'n re falt goo.

Tsa nzhab Jesús lo zha mthansa:

—Lo'a nin, gwache, bzhen luuna ne tyee liza.

²⁵ Ne oraaka lee zha'a ngwache, ne mzhenn luun, ne ngeyol zha lo Diox ndya zha liz zha. ²⁶ Kwathoz mzegey leettsoo reta men ne mbil men lo Diox, ne lo tseb re zha nzhab zha:

—jNaltseree si mwii'a thib kuu thoz kuu mtsow Diox!

Jesús mrez Levi'

(Mt. 9:9-13; Mr. 2:13-17)

²⁷ Bluz leettsa ngwalo mriiid re koree, tsa mroo Jesús ne mwii Jesús thib zha kuu ntsow kobral temi chaan yezlyu, kuu nzhax lo zha Roma, zha'a le Leví, ndob zha roo mes ta nya re men ngix lo zha. Tsa nzhab Jesús lo Leví:

—Bteke dits'n.

²⁸ Tsa ngwateli Leví ne mlaa Leví reta kwaas, ne mnideke Leví dits Jesús.

²⁹ Tut bluz, mtsow Leví thib ani liz Leví par Jesús, ne tya mkaltaa kwaro re zha kuu ntsow kobral temi chaan yezlyu kuu nzhax lo zha Roma, ne noga nzi tedib net re zha kuu ngeyow kon re zha roo mes. ³⁰ Per lee re fariseo ne re maestr kuu nloo xkiiz Diox, mndelo zha mreza zha loo re zha kuu ngeteed lo Jesús, ne nzhab re zha:

—¿Chebee nzhoo goo ne nzhuu goo kon re zha kuu ntsow kobral temi chaan yezlyu, ne kon re zha kuu ntsowt kuu wen?

³¹ Jesús mkab ne nzhab lo re zha:

—Re zha kuu net ndak, ndechet zha zha kuu tegwe zha, per lee re zha kuu ne ndak, ndeche zha zha kuu tegwe zha. ³² Ne ndyalt'n ndyaadchez'n re zha wen, sinke lenndyal ndyaadchez re zha kuu nap falt, tsa tsee zha mod went kuu nak zha ne yelaaz zha Diox.

Yalnaabdiz chaan ayun

(Mt. 9:14-17; Mr. 2:18-22)

³³ Tsa mnaabdiz re zha lo Jesús, ne nzhab zha:

—¿Chebee lee re zha kuu ngeteed lo Juan ne re fariseo kwathoz ntsow zha ayun, ne noga kwaro ndediz zha lo Diox, per lee re zha kuu ngeteed lo'a thibka nzhoo zha ne nzhuu zha?

³⁴ Jesús mkab ne nzhab:

—¿Chu tak tsow goo, wut re zha kuu nzi lo fandau, or kuu lee zha kuu mtseyaa ndoka lo re zha? ³⁵ Per too thib wiz kib zha zha kuu mtseyaa lo re zha, tsyasi tatsow zha ayun.

³⁶ Ne noga mndaa Jesús thib kwent nanzee lo re zha, ne nzhab Jesús:

—Neeka thib zha ngat lut lar kub, ne ngib zhay chu lar gox. Os lee zha tata tsow zhay, ntetsaa zha lar kub, tak lee lar kub nzaalte

gwataak cho lar gox. ³⁷ Ne neeka ngot zha xit ub kuu kub leen gom yid gox. Tak os lee zha tata tsow zhay, lee xit ub kuu kub luux gom gox. Tsa lee xit ub zho ne lee gom gox lux. ³⁸ Kona lee xit ub kuu kub ndobloy yo leen gom yid kub, tsa roptay lortsin. ³⁹ Ne reta zha kuu nzhuu xit ub kuu nda'a wiz mroo, yowt leettsou zha gu zha kuu kub, tak gab zha: "Mas wen ndee kuu gox".

6

Lee re zha kuu ngeteed lo Jesús mthop chop tson ton nzob xtil wiz sabd

(Mt. 12:1-8; Mr. 2:23-28)

¹ Thib sabd, wiz kuu nzhoor re zha Israel lo Diox, lee Jesús ndiy thib ta nzhanh zha nzob xtil, tsa lee re zha kuu ngeteed lo Jesús mndelo zha mdiits zha ton nzob xtil, ne mtembali zhay kon yaa zha ne ndow zhay, ² tsa lee chop tson fariseo mnaabdiz lo re zha, ne nzhab:

—¿Chebee ntsow goo thib kuu ndoblotaa tsowaa wiz sabd?

³ Tsa mkab Jesús, ne nzhab Jesús lo re zha:

—¿Chu ter lab goo xkeets Diox, naa kwan mtsow David thib welt, leettsa mlann David kon re altaa David? ⁴ Mndaab David leen gwodoo chaan Diox, ne mzhen David re pan kuu Nayon lo Diox, kuu beeta re ngwleyy ndoblo wu, ne ndow David pan ne noga mndaa Davide ndow re zha kuu nda kon lee David.

⁵ Ne noga nzhab Jesús:

—Na nak Zha Kuu Mtaal Diox Ngok Men ne nap'n yahnabee, tsa nabeen lo wiz sabd.

Jesús mtegwe thib mbyi kuu mbiz yaa
(Mt. 12:9-14; Mr. 3:1-6)

⁶ Lee tedib sabd, wiz kuu nzhoor re zha Israel lo Diox, lee Jesús mndaba ta nkaltaa re zha Israel nteed xkiiz Diox, ne mndelo Jesús mloo lo re men. Ne tya ndo thib mbyi kuu mbiz yaa ban. ⁷ Tsa lee re maestr kuu nloo xkiiz Diox ne re zha fariseo yichey mwii lo Jesús, tsa naa chu tetegwe Jesús mbyiz wiz sabd, tsa tak keki zha Jesús. ⁸ Per lee Jesús ne'a naa kwan ntsow re zha xgab, tsa nzhab Jesús lo mbyi kuu mbiz yaa'a:

—Gwateli ne bto ndrol lo re zha.

Tsa lee mbyi'a ngwateli ne ngwato. ⁹ Tsa nzhab Jesús lo re zha kuu nzi tya:

—Nal naabdiz'n thib kuu lo goo: ¿Kwan ndoblo tsow men wiz sabd, kuu wen o kuu went? ¿Chu wen tegwe men thib men, o chu wen kuth men thib men?

¹⁰ Tsa mwii Jesús lo re zha kuu nzi lo Jesús, tsaraa nzhab Jesús lo mbyi kuu mbiz yaa'a:

—Bteli yaa'a.

Tsa lee mbyi'a mteli yaa, ne oraaka lee yaa mbyi mgwe. ¹¹ Per lee re fariseo ne re maestr kwathoz mkezhyan ne mndelo

mbyodiz, tsa naa xomod tsow zha par keki zha Jesús.

Jesús mli tsiiibchop apóstol
(Mt. 10:1-4; Mr. 3:13-19)

¹² Ne thib re wiza lee Jesús ngwa yek thib yii, tsa tediz Jesús lo Diox, ne dita yaal mndediz Jesús lo Diox. ¹³ Ne leettsa ngwani yezlyu, tsa mrez Jesús re zha kuu ngeteed lo Jesús, ne xid re zha kuu ngeteed lo Jesús mli Jesús tsiiibchop zha kuu gak apóstol. ¹⁴⁻¹⁶ Simún (kuu mtob le Jesús Pey), Ndres (wets Simún), Santiag, Juan, Lip, Bartolomé, Mateo, Mach, Santiag (xgann Alfeo), Simún (kuu ngoo xid partid zha Canaán), Judas (xgann Santiag) ne Judas Iscariote (kuu mndaa Jesús lo re zha kuu mbeth Jesús).

Jesús mloo lo kwathoz men
(Mt. 4:23-25)

¹⁷ Tsa mroo Jesús yek yii kon re zha kuu ndeke dits Jesús, ne mzin re zha thib ta laats nak. Tya mkaltaa Jesús kon re zha kuu mndeke dits Jesús, ne noga kwaro re men tedib net re yez ngwa lo Jesús, re zha'a mroo re yez chaan yezlyu Judea ne yezlyu Jerusalén, ne rop yez kuu nak Tiro ne Sidón kuu nzi roo nitdoo. ¹⁸ Reta zha'a mzin tya tsu kenza zha kuu gab Jesús, ne noga tsa tegwe Jesús zha lo yiz kuu ndak zha. Ne reta re zha kuu ndakti lo mbi fyer, mtegwe Jesús zha. ¹⁹ Kona reta men nlaaz diinn cho Jesús, tak myeen re zha cho Jesús ndroo yalney kuu ntegwe Jesús re mbyiz.

Jesús mloo lo re men
(Mt. 5:1-12)

²⁰ Tsa mwii Jesús lo re zha kuu ngeteed lo Jesús, ne nzhab Jesús lo re zha:

—Wen nda re goo zha prob, tak chaan goo gak ta nabee Diox.

²¹ 'Wen nda re goo zha kuu nlann nal, tak lee re goo gak zha kuu tse leettsou.

'Wen nda re goo zha kuu nzhonnal, tak bluz lee re goo zhiz.

²² 'Wen nda goo leettsa yii re men ne goo, leettsa ndriid goo yalti tak nyelaaz goo na, Kuu Mzin Ngok Men, leettsa koo zha goo laz goo, ne leettsa nge zha goo. ²³ Naley bloo goo leettsou goo ne bzhiz goo wiza, tak lee re goo kayaa thib kuu thoz leen yibaa, tak tataka mnayii re tey re zha'a mne re profet kuu ngoo ndala.

²⁴ 'Per aka nalatt rid re goo zha kuu rik nal, tak mkeno'a goo reta kuu mtetsey leettsou goo.

²⁵ 'Ne aka nalatt rid re goo, kuu nap na-roob kuu wu nal, tak lee re goo talann.

'Ne aka nalatt rid re goo kuu nzhiq nal, tak lee re goo gonn ne nabil yo leettsou.

²⁶ 'Aka nalatt rid re goo tak wen ndediz re men goo, tak tataka mndediz wen re men re zha kuu wlit ngok profet.

Ndobel ke leettsoo men re zha kuu nayii ne men

(Mt. 5:38-48; 7:12)

²⁷ Ne noga nzhab Jesús:

—Per lee na ni lo re goo kuu ngeyon xkiz'n: Bke leettsoo goo re zha kuu nayii ne goo, ne wen btsow goo lo re zha kuu ndak leettsoo ne goo. ²⁸ Ne wen btediz goo lo re zha kuu ngode goo, ne bnaab goo lo Diox por re zha kuu ntsalzhoo goo. ²⁹ Os lee thib zha kee thib maket cho kwat goo, noga btaa goo tedib lad kwat goo lo zha. Ne lee zha kuu nlaaz kib chamar goo, noga laa goo gwe zha kamis goo. ³⁰ Ne loka cho naab thib kwaa lo goo, btaa gooy lo zha, ne os lee thib zha ten thib kuu nak chaan goo, gabt goo lo zha tsere zhay lo goo. ³¹ Leeka taxal nlaaz goo tsow re men lo goo, leeka tata btsow goo lo re men.

³² "Tak os lee goo nke leettsoo goo beeta re zha kuu wen ntsow lo goo, ¿kwan kuu wen ntsow goo tsa? Noga re zha kuu ndab falt tata ntsow. ³³ Ne os lee goo wen nak goo beeta lo re zha kuu wen nak lo goo, ¿kwan kuu wen ntsow goo tsa? Noga re zha kuu ndab falt tata ntsow. ³⁴ Ne os ntseche goo kwaa beeta lo re zha kuu taa thib kwaa lo goo, ¿kwan kuu wen ntsow goo tsa? Noga re zha kuu ndab falt, ntseche zha kwaa lo altaa zha kuu ndaa thib kwaa lo zha. ³⁵ Ndobel ke leettsoo goo re zha kuu nayii ne goo, wen btsow goo lo re zha, ne btseche goo kwaa lo re zha, ne kwetta goo taa zha thib kwaa lo goo, tsa naroob kwaa kayaa goo yibaa, ne gak goo zhiinnpaa Diox kuu ndob yibaa, tak wen nak Diox lo reta men kuu ndaat texkix lo Diox ne lo re men kuu nakap nak. ³⁶ Ne blat leettsoo goo ne goo re men, taxal nlat leettsoo Diox ne Diox reta men.

Ndoblöt gak goo zha naab kwent lo taben goo

(Mt. 7:1-5)

³⁷ 'Ndoblöt gak goo zha kuu naab kwent lo tedib men, tsa lee Diox naabt kwent lo goo. Naabt goo kuu went par tedib men, tsa tsowt Diox rid goo tata. Bloo goo yek goo re kuu went kuu mtsow taben goo lo goo, tsa noga Diox tuyy re kuu went kuu mtsow goo. ³⁸ Taa goo kwaa lo tedib net zha, tsa noga Diox taa kwaa lo goo, kon thib medid kuu wen nabix. Tak leeka taxal nchiix goo kuu ndaa goo lo tedib net men, leeka tata chiix Diox kuu taa Diox lo goo.

³⁹ Noga nzhab Jesús diiz nanzee ree lo re zha:

—¿Chu tak teno thib syeg tedib syeg? ¿Chu ropt zha gab leen yeeryu? ⁴⁰ Neeka thib zha kuu ngeteed nataagt zha masraa nake maestr zha, per leettsa yelo teed zha, tsaraa gak zha taxal maestr zha.

⁴¹ '¿Chebee ngwii'a paj kuu nzo ngutlo wetsa, ne ngwiita ya kuu nzo ngutlo'a? ⁴² Os lee'a nyeenta nzo thib le ya ngutlo'a, ¿xomod nye leettsoo'a mbeza lo wetsa: "Wets, taa diiz gon paj kuu nzo ngutlo'a"? ¡Zha kuu nkedi ne ntsowt kuu wen naka! Ner bloo ya kuu nzo ngutlo'a, tsa tak wii'a wen, par tak koo'a paj kuu nzo ngutlo wetsa.

Por xle kuu ndaa ya nabee ya
(Mt. 7:17-20; 12:33-35)

⁴³ Noga nzhab Jesús:

—Yent thib ya wen kuu ndaa xle went, ne yent thib ya went kuu ndaa xle wen. ⁴⁴ Reta ya nabee ya por xle kuu ndaa ya, tak nthopt zha ig lo ya yits, ne neeka nthopt zha ub lo luts yitsti. ⁴⁵ Lee mbyi wen, kuu wen ndediz mbyi, tak kuu wen ntsin leettsoo mbyi. Ne lee mbyi went, kuu went ndediz mbyi, tak kuu went ntsin leettsoo mbyi. Tak leettsoo zha ntsin reta kuu ndediz zha.

Jesús mndaa kwent chaan chop simyent
(Mt. 7:24-27)

⁴⁶ '¿Chebee Zha Nabee ni goo lon, ne ntsowt goo kuu nabeen lo goo? ⁴⁷ Nal nin lo goo naa xomod nak zha kuu nkenza xkiz'n ne ntsow kuu nin. ⁴⁸ Lee zha'a nak taxal thib zha kuu mta thib yuu. Ner mdaan zha simyent, asta mgaa zha ke, ne leettsa mla yizhoo, kwathoz ngoo nit yoo ne mke nit yuu, per mtsowt nit gan gakwin nit yuu, tak lo ke ndob yuu. ⁴⁹ Per lee zha kuu nzhon kuu nin, ne ntsowt kuu nin, zha'a nak taxal thib zha kuu mta yuu lo gux, mdaant zha simyent naats. Ne leettsa mla yizhoo kwathoz ngoo nit yoo, ne mke nit yuu'a ne mluux nit yuu thitanax.

7

Jesús mtegwe thib mos chaan thib soldad kuu nabee lo thib gayoo soldad
(Mt. 8:5-13)

¹ Leettsa ngwalo mni Jesús lo re men, tsa nda Jesús yez Capernaúm. ² Ne yeza nzo thib zha Roma, kuu nak thib soldad kuu nabee lo thib gayoo soldad, ne lee zha'a nap thib mos kuu kwathoz nke leettsoo zha, kuu ne ndak ne mer gath. ³ Ne leettsa mbin soldad kuu nabee lo thib gayoo soldad re kuu mtsow Jesús, tsa mtaal soldad chop tson zha bye zha Israel, tsa yachez zha Jesús, tsa tegwe Jesús mos zha. ⁴ Ne leettsa mzin re zha'a lo Jesús, tsa mnaab zha lo Jesús ne nzhab zha:

—Ndoblo tsowa ayud soldad kuu nabee lo thib gayoo soldad, ⁵ tak kwathoz nke leettsoo zha re tawlazaa, ne mdexkwaa zha thib ta nkaltaa'aa nteedaa xkiiz Diox.

⁶ Tsa lee Jesús mndeke dits re zha'a, per leettsa mera tsin re zha liz soldad kuu nabee lo thib gayoo soldad, tsa lee soldad kuu nabee lo thib gayoo soldad, mtaal zha chop tson amig zha nzhab lo Jesús:

—Zha Nabee, tsowta xgab taba leen liz'n, tak thitanax ndoblot nay,⁷ kona neeka myalt'n gakwaan na lu. Beeta nabee tsa lee mos da gwe.⁸ Tak noga na nap'n zha kuu nabee lon, ne tataga, nap'n soldad kuu nabee lo. Leettsa mbez'n lo thib zha: "Gwa" ne nda zha, ne leettsa mbez'n lo tedib zha: "De", ne nyaad zha, ne leettsa nabee lo mos da tsow mos thib kwa, ntsow zhay.

⁹ Kwathoz mzegey leettsa Jesùs or mbin Jesùs kona, ne mwii Jesùs lo re zha kuu ndeke dits Jesùs, ne nzhab Jesùs:

—Wlipaa na nin lo goo, jneeka thib tawlaazaa nyelaazt Diox taxal mbyi ree!

¹⁰ Ne leettsa mretab re zha kuu mtaal soldad lo Jesùs, liz soldad kuu nabee lo thib gayoo soldad, lee mos soldad kuu nabee'a mgwe'a.

Jesùs mteroban xgann thib ngot byud

¹¹ Bluz leettsa ngwalo mriid re koree, tsa lee Jesùs kon re zha kuu ngeteed lo Jesùs nda yez kuu le Naín. Ne kwaro men mnndeke dits Jesùs.¹² Per or ndetsin gaxa re zha yeza, tsa mwii re zha, kwaro men yeza nda ndakaats thib thebol, ne thita zha kuu ngutha lo xnaa zha, ne byud xnaa zha.¹³ Tsa mwii Zha Nabee lo xnaa thebol, ne mlat leettsa Zha Nabee mne xnaa thebol, tsa nzhab Jesùs lo ngot:

—Gonnata.

¹⁴ Ne ora mbig Jesùs gax cho kaj, ne lee re zha kuu ndano kaj mlet, tsa lee Jesùs mdiinn cho kaj, ne nzhab Jesùs lo zha kuu ngutha:

—Mndyeen, lo'a nin: ¡Gwache!

¹⁵ Tsa lee zha kuu ngutha, cha mndob ne mndelo mnndediz, ne lee Jesùs mzen yaa zha ne mtelis zha, ne mndaa Jesùs zha lo xnaa zha.¹⁶ Ne kwathoz mzeb re men mwii re men kuu ngok, ne mndelo zha mbil zha lo Diox, ne nzhab zha:

—Thib profet kuu kwathoz nataak mzin lo'aa nzhee nal.

Noga nzhab re zha:

—Diox ndyaad tsow ayud re tawlaazaa.

¹⁷ Ne dita yezlyu Judea mbin re men kuu mtsow Jesùs, ne noga tedib net re zha kuu nzo yezlyu gax mbin re koree.

Juan kuu mtsowleyy mtaal chop zha lo Jesùs

(Mt. 11:2-19)

¹⁸ Reta kona mbin Juan, tak lee re zha kuu ngeteed lo Juan nzhab lo Juan. Tsa mrez Juan chop zha kuu ngeteed lo Juan,¹⁹ ne mtaal Juan zha yanaabdiz zha lo Jesùs, tsa naa chu lee Jesùs nak Zha Kuu Mtaal Diox Nabee, o chu leet zhay, par kwet zha yaad tedib zha.²⁰ Tsa lee rop zha kuu mtaal Juan mbig lo Jesùs, ne nzhab:

—Juan kuu mtsowleyy re men, mtaal nee tsa naabdiz nee lo'a, "naa chu lu nak Zha

Kuu Mtaal Diox Nabee o chu tebet nee tedib zha?"

²¹ Ne leeka ora mtegwe Jesùs kwathoz men lo relota yiz, noga mloo Jesùs re mbi fyer kuu nzo leettsa re men kuu nteti re men, ne noga mtsow Jesùs mzhaal ngutlo re syeg.

²² Tsaraa mkab Jesùs lo rop zha kuu mtaal Juan, ne nzhab Jesùs:

—Tyee goo ne guz goo re kuu mwii goo ne re kuu mbin goo lo Juan. Guz goo lo Juan lee ngutlo re syeg nzhaal, lee re zha mthans nde, lee re zha kuu ndak yiz kuu ndezhoz ngwe, lee re zha kuu nakwee nzhaal nza, lee zha nguth ndroban, ne lee lo re zha prob ndaa zha kwent Diiz Chul chaan Diox.²³ Wen nda re zha kuu nzhatc chop xgab, tak nyelaaz zha na!

²⁴ Or lee rop zha kuu mtaal Juan mbi lo Jesùs, tsa lee Jesùs mndelo mndaa kwent chaan Juan lo re men, ne nzhab Jesùs:

—Leettsa ngwa goo yubiz, ¿kwan ngwatwii goo? ¿Chu lo thib nith kuu nkwin mbi ngwatwii goo?²⁵ Ne os nagte tata, ¿cho lo ngwatwii goo tsa? ¿Chu ngwa goo ngwatwii goo lo thib zha kuu nzrok lar wen? Wen ne goo lee re zha kuu nzrok lar wen ne re zha kuu ntsow kuu nlaaz, nak re zha kuu nzo liz rey.²⁶ Mbay, ¿kwan mroo goo ngwatwii goo tsa? ¿Chu ngwatwii goo lo thib profet? Wlipaa na nin, lee Juan nak thib zha kuu mas nataak nake thib re profet kuu ngoo ndala.²⁷ Juan nak zha kuu ndaa xkeets Diox kwent, ta nzhab:

Leen taal thib mos da kuu tener lo'a, tsa to list zha leettsa re men par kayaa re mena. [Mal. 3:1]

²⁸ Per lee na ni lo goo, neeka thib zha ngok nataagt taxal Juan. Per tegal tata nake lee zha kuu nataagt ta nabee Diox, zha'a nak zha kuu mas nataak nake Juan.

²⁹ Leettsa mbin reta men kona, noga re zha kuu ntsow kobral temi chaan yezlyu kuu nzha lo zha Roma mbine, tsa reta zha kuu ngokleyy lo Juan, nzhab zha: "Nali nak Diox".³⁰ Per lee re fariseo ne re maestr kuu nloo xkiiz Diox, ngokleyyt zha lo Juan, ta mod mkayaat zha kuu nap Diox par re zha.

³¹ Tsa lee Jesùs nzhab:

—Nal nin lo goo naa xa nzhab re men tyemp ree ne xa nak zha.³² Lee re men nzhab taxal re ndyeen bzhizh, kuu nzi nee byith lo xbi, kuu mbez lo altaa: "Naley mbil nee flaut, per mkanit goo, mbilga nee nabil nee mbinnt goo".³³ Tbaa nin, tak leettsa myaad Juan kuu mtsowleyy, ndowt Juan pan neeka ngwiit Juan xit ub, tsa nzhab goo: "Mbi fyer nzo leettsa Juan".

³⁴ Lee nal ndyal na, Kuu Mzin Ngok Men, nzhown' ne nzhun reta kwa, tsa mbez goo, lee na nak thib zha kuu kwathoz nzhowncho ne kwathoz nzhun xit ub, noga

mbez goo, nak'n zha kuu nzaal leettsoo, kon re zha kuu ntsow kobral temi chaan yezlyu kuu nhaz lo zha Roma, ne nog a mbez goo, nak'n zha kuu nzaal leettsoo kon re zha kuu ntsow kuu went. ³⁵ Per lee zha kuu nap yalnzaak chaan Diox, por re kuu ntsow zha nabee lee zha nap yalnzaak.

Jesús ngwa liz thib fariseo kuu le Simún

³⁶ Tsa lee thib fariseo kuu le Simún mn-deno Jesús lize, tsa wu Jesús kon lee zha. Ne leettsa ngeyow zha, ³⁷ tsa lee thib ngot kuu nzo yeza, kuu ndab kwathoz falt ngwa lo Jesús, tak mbín ngot lee Jesús ngeyow liz fariseo, ne ngwano ngot thib bot kuu natexkwaa kon thib ke kuu le alabastr, kuu tseta nzo perfum kuu kwathoz wen ndetsi. ³⁸ Ne mn-delo ngot mbín ngot xann nii Jesús, ne leeka kon nit kuu nzhonn ngot mtenit ngot nii Jesús, ne mtekwiiz ngot nii Jesús kon yitsek ngot, ne mtselo ngot nii Jesús, tsaraa mdaab ngot perfum nii Jesús. ³⁹ Ne ora lee fariseo kuu mn-deno Jesús lize, mwii kuu mtsow ngota, tsa mnda leettsoo zha: "Os lee mbyi ree nak thib profet, tey-en mbyi naa cho men kuu ngediinn cho mbyi, tak thib ngot kuu mtsow kuu went nak ngot baa". ⁴⁰ Tsa lee Jesús nzhab lo fariseo:

—Simún, nlaz'n nin thib kwaal lo'a.

Tsa lee fariseo mkab, ne nzhab:

—Ne, naa kwan nlaaza ne'a maestr.

⁴¹ Tsa lee Jesús nzhab:

—Nal tan thib kwent lo'a. Thib welt ngoo chop zha kuu mdinn temi lo thib zha. Thib zha mdinn gaay gayoo temi plat; lee tedib zha mdinn chop galbtsii temi plat. ⁴² Ne napt rop zha temi par kix zha lo zha kuu mt-seche temi lo zha, tsa lee zha kuu mtseche temi lo rop zha, mtsow perdon temi kuu ndab rop zha. Per nal naabdiz'n lo'a Simún: Lo rop zha'a, ¿cho zha masraa ke leettsoo zha kuu mtseche temi?

⁴³ Tsa lee Simún mkab, ne nzhab:

—Ndak'n zha kuu mdinn masraa temi'a, masraa ke leettsoo zha.

Tsa lee Jesús nzhab lo Simún:

—Wen mkaba.

⁴⁴ Tsa lee Jesús mwii lo ngota, ne nzhab Jesús lo Simún:

—Chu ngwii'a ngot ree? Leettsa mndaab'n liza mndaata nit gateech'n niin, per lee ngot ree mteech niin kon nit kuu mbín ngot, ne mtekwiiz ngot niin kon yitsek ngot. ⁴⁵ Leettsa mndaab'n leen liza, neeka mt-selota lon, per lee ngot ree, lo lal mzin ngot ne asta nal ngetselo ngot niin. ⁴⁶ Ne neeka aseyt mdaabta yek'n, per ngot ree si mdaab perfum nin. ⁴⁷ Kona nin lo'a, lee reta falt chaan ngot ree mtuyya nay, tak kwathoz mke leettsoo ngot'n. Per lee zha kuu lutta nke leettsoo na, lutta falt chaan zha tuy'n.

⁴⁸ Tsa nzhab Jesús lo ngot:

—Reta falt chaana mtuyya na.

⁴⁹ Tsa lee re zha kuu nzi tya, mnda leettsoo re zha ne nzhab zha:

—¿Cho nak mbyi ree? ¿Chebee ndak mbyi tak tuyy mbyi falt?

⁵⁰ Tsa lee Jesús nzhab lo ngota:

—Tak nyelaaza na, kona mtuy'n reta falta, tyee ne wen bloo leettsoo'a.

8

Re ngot kuu mtsow ayud Jesús

¹ Leettsa ngwalo mriid re koree, tsa nda Jesús kon re tsuibchop zha kuu ngeteed lo Jesús, nda re zha ngetaa zha kwent Diiz Chul chaan ta nabee Diox, re yez ne re ranch. ² Ne nog a nda chop tson ngot kuu mloo Jesús mbi fyer leettsoo, ne re ngot kuu mtegwe Jesús lo yiz. Ne thib re ngota nak Mari kuu nog a le Magdalen, kuu mloo Jesús gaz mbi fyer leettsoo, ³ ne tedib ngot kuu le Juan kuu nak tsaal Cuza, kuu mke tsii lo rey Herodes, nog a Susan ne tedib net re ngot kuu mtsow ayud Jesús kon kuu nap re ngot.

Kwent nanzee chaan zha kuu nzhann
(Mt. 13:1-15; Mr. 4:1-9)

⁴ Ne kwaro men mroo laz ngwa gon kuu ni Jesús, ne leettsa ngwalo mkaltaa kwaro men, tsa mni Jesús lo re men kon diiz nanzee, ne nzhab Jesús:

⁵ —Nal leen ta thib kwent lo goo, kwent chaan thib zha kuu mroo ndalo nzob xtil lo yu. Ne leettsa ngelaal zhay, thib nete mlaa laaz net, ne lee re men mloo ditse, ne myaad re min ndowe. ⁶ Tedib nete mlaa xid ke, ta yent naroob yu, ne leettsa mlene mzhene lut, ne zhenga zhenga mbize, tak yent naroob naz par gazhene. ⁷ Lee tedib nete mla xid yits, mlene ne thibka mzhene kon yits, ne mluux yitsé. ⁸ Per lee tedib nete mla lo yu naal, ne kwathoz mzhene ne kwaro ngoke, asta thib gayoo nzob xtil mndaa thibka bin. Tata nak kwent.

Tsa nex nzhab Jesús:

—¡Os lee goo ndob nza goo ndoblo yen goo koree!

Chebee mni Jesús kon diiz nanzee
(Mt. 13:10-17; Mr. 4:10-12)

⁹ Tsa lee re zha kuu ngeteed lo Jesús mnaabdzil lo Jesús, ne nzhab:

—¿Xomod nak kwent nanzee ree?

¹⁰ Jesús mkab lo re zha ne nzhab:

—Diox mtsow tsa yen goo naa xomod nak re kuu nloot chaan ta nabee Diox; per lee lo tedib net zha pur nanzee nin lo zha, tsa tegal wii zhay loote lo zha, ne tegal gon zhay yent zhay.

Jesús mndaa kwent naa xomod nak kwent nanzee chaan zha kuu nzhann
(Mt. 13:18-23; Mr. 4:13-20)

¹¹ 'Tenzhee nak kwent nanzee: Lee nzob xtil nak taxal xkiiz Diox. ¹² Lee nzob xtil kuu mla laaz net, nak taxal re zha kuu nhon xkiiz Diox, per lee Maxuuy nyaad nkibe leettsoo zha, tsa yelaazt zha Diox ne tsowt zha gan yahnaban kuu thitanax. ¹³ Lee nzob xtil kuu mla xid ke, ta yent naroob yu, nak taxal re zha kuu nhon xkiiz Diox; ne kwathoz naley nzo leettsoo zha nkayaa zhay, per taxal ya kuu napt lozh nak zha, nyelaaz zhay lut, per leettsa nzin thib yalti lo zha, tsa nlaa zha Diox. ¹⁴ Lee nzob xtil kuu mla xid yits, nak taxal re zha kuu nhon xkiiz Diox, per lutga lutga lee re xgab yezlyu ree, kuu nak xomod gak rik zha, ne re gust yezlyu ree ntsow gan lo zha, re kona nlux xkiiz Diox leettsoo zha, kona ndaat zha xle. ¹⁵ Per lee nzob xtil kuu mla lo yu naal, nak taxal re zha kuu nhon xkiiz Diox kon dib ndroo leettsoo, ne ntsow zha re kuu mbez xkiiz Diox, ne ney ndo zha lo xkiiz Diox, re zha'a ndaa kwathoz xle.

*Kwent nanzee chaan xni
(Mr. 4:21-25)*

¹⁶ Noga nzhab Jesús:

—Neeka thib zha nkeet thib kandil ne ntow zhay kon thib zhibey o ngo zhay xann luun, sinke ntob zhay thib ta ya ndab, tsa teniy lo re zha kuu tab leen yuu. ¹⁷ Leeka tata, neeka thib kuu nzogaats gagt loote, ne neeka thib kuu xgaats gagt net re mene, raytanabeeey.

¹⁸ 'Kona wen kenza goo re kuu nin. Tak lee re zha kuu nkeno kwa, tekayaa zha masraay, per lee re zha kuu nkenote, asta lut kuu nap zha teyiib lo zha.

*Xnaa Jesús ne re wets Jesús
(Mt. 12:46-50; Mr. 3:31-35)*

¹⁹ Lee xnaa Jesús ne re wets Jesús mzin ta ndo Jesús, per gagt big re zha gax lo Jesús, tak kwathoz men nzi tya. ²⁰ Tsa mloo zha diiz lo Jesús nzhab zha:

—Lee xnaa'a ne re wetsa nzi lee, ne nlaza zha ni zha lo'a.

²¹ Jesús mkab ne nzhab:

—Reta zha kuu nhon xkiiz Diox ne ntsow kuu nzhab xkiiz Diox, re zha'a nak taxal xnaan ne re wets'n.

*Mbi ne nitdoor nzhon diiz lo Jesús
(Mt. 8:23-27; Mr. 4:35-41)*

²² Thib wiz mndaab Jesús leen kano kon re zha kuu ngeteed lo Jesús, tsa nzhab Jesús lo re zha:

—Nda goo re'aa tedib lad roo nitdoo.

Tsa nda re zha tedib lad roo nitdoo. ²³ Ne leettsa nda re zha lo nitdoo, lee Jesús mdat. Ne lee thib mbi thoz ngoth lo nitdoo, ne lee nit mndelo mndaab leen kano, ne asta nlaa loww kano leen nit, ne kwathoz mzhakti re

zha. ²⁴ Tsa mloo re zha mkaal lo Jesús, ne nzhab zha lo Jesús:

—¡Maestr! ¡Maestr! ¡Mer lowgwaa!

Tsa ngwache Jesús ne mkok mbi ne nitdoo lo Jesús, ne oraaka lee mbi ne nitdoo zheta ngok. ²⁵ Tsa nzhab Jesús lo re zha kuu ngeteed lo Jesús:

—¿Chebee nzeb goo? ¿Ma kuu ni goo nye-laaz goo Diox?

Per lee re zha kwathoz mzeb zha ne mzegey leettsoo zha, ne naabdz zha lo altaa zha ne mbez zha:

—¿Cho nak zha ree, chebee nzhaak nabee zha lo mbi ne lo nitdoo ne nzhone diiz lo zha?

*Zhayez Gadara kuu nzo mbifyer leettsoo
(Mt. 8:28-34; Mr. 5:1-20)*

²⁶ Leettsa mzin re zha tedib lad roo nitdoo chaan yezlyu Galilea, yezlyu chaan re zha yez Gadara. ²⁷ Ne or mla Jesús leen kano, tsa myaad thib zha yeza mbig lo Jesús. Ne lee zha'a nda'a tyemp nzo mbi fyer leettsoo zha. Ne neeka nzhogt zha xab zha, ne neeka nzot zha liz zha, sinke leen re baa ta nkaats re men re thebol nyoo zha. ²⁸ Per or mwii zha Jesús, tsa mbig zha mtobxub zha lo Jesús ne mrez zha, nzhab zha:

—¿Chebee ndyaada lo nee Jesús Xgann Diox kuu ndob yibaa? ¡Naab'n lo'a tetita nee!

²⁹ Tata nzhab zha, tak lee mbi fyer mkok lo Jesús tsa roo mbi fyer leettsoo zha. Tyen welt nden mbi fyer zha, ne tegal nliib re men zha kon kaden, per ntsow zha gan nchuug zhay ne nyano mbi fyer zha re yubiz. ³⁰ Tsa mnaabdz Jesus lo zha, ne nzhab Jesús:

—¿Cho ble'a?

Lee zha mkab, ne nzhab:

—Leen le, kwathoz.

Tata nzhab zha, tak kwathoz mbi fyer nzo leettsoo zha. ³¹ Tsa lee re mbi fyer mnaab ne nzhab lo Jesús:

—Taالتا nee leen yeerdoo.

³² Ne gaz tya nzi naroob nguch ngeyow, tsa nzhab re mbi fyera lo Jesús:

—Taa diiz tab nee leettsoo re nguch baa.

Tsa mndaa Jesús diize. ³³ Tsa lee re mbi fyera mroo leettsoo mbyi'a ne mndaab re mbi'a leettsoo re nguch. Ne oraaka lee re nguch mrezzonn ne mla re maa leen nitdoo, ngwaap re maa nit ne thitanax nguth re maa.

³⁴ Per leettsa mne re zha kuu nkenap re nguch kona, tsa lijer ndya zha ne mndaab zha kwent kuu ngok, lo re zha kuu nzi wan ne lo re zha kuu nzo yez. ³⁵ Tsa lee re men yez mroo ngwatwii naa kwan kuu ngok. Ne leettsa mzin re zha ta ndo Jesús, tsa mwii zha lee mbyi kuu mroo re mbi fyer leettsoo'a ndoba lo Jesús, ne nok xaba mbyi ne mgwe'a mbyi, tsa kwathoz mzeb re men.

36 Ne lee re zha kuu mwii kuu ngok, mndaa zha kwente lo tedib net re zha, naa xomod mgwe zha kuu ngoo mbi fyer leettsoo'a.
37 Tsa lee re men kuu nzo yezlyu Gadara, nzhab lo Jesús bi Jesús, tak kwathoz mzeb re zha. Tata mod lee Jesús mndaab leen kano ne mroo Jesús tya.³⁸ Per lee mbyi kuu mroo re mbi fyer leettsoo, nzhab lo Jesús:

—Laa'a teken ditsa.

Per lee Jesús mnabee lo zha, tsa yaan zha, ne nzhab Jesús lo zha:

³⁹—Tyee liza, ne guz re kuu mtsow Diox lo'a.

Tsa lee mbyi'a ndya, ne mndaa kwent lo re men kuu mtsow Jesús lo zha.

Jesús mtegwe thib ngot ne mteroban rtsaap Jairo

(Mt. 9:18-26; Mr. 5:21-43)

⁴⁰ Leetsa mretab Jesús tedib lad roo nitdoo, kwathoz laz re men mkayaa re men Jesús, tak reta men ngebet Jesús.⁴¹ Ne ora mzin thib mbyi kuu le Jairo, kuu nak thib zha kuu nabee ta nkaltaa re zha Israel nteed xkiiz Diox, ne mtobxbu lo Jesús, ne mnaab zha lo Jesús ya Jesús liz zha,⁴² tak thibka rtsaap zha nap zha, kuu nap teeka tsuibchop liin, ne mer gath rtsaap zha. Ne or nda Jesús kwaro men mnndeke dits Jesús, ne kwathoz mzhoo re men Jesús.⁴³ Ne xid re mena nda thib ngot, kuu nda'a tsuibchop liin ndak yiz kuu nlath ren leettsoo. Ne reta kuu nap ngot mluux ngot ngwa ngot lo re doctor, ne yent cho ngok gategwe ngot.⁴⁴ Tsa lee ngota mbig dits Jesús, ne mdiinn ngot xab Jesús. Ne oraaka lee kuu nlath ren leettsoo ngot mlet.⁴⁵ Tsa lee Jesús mnaabdiz, ne nzhab:

—¿Cho mdiinn chon?

Ne lee re zha nzhab:

—Yent cho mdiinn cho'a.

Tsa lee Pey nzhab:

—Maestr, ¿chu ngwiita reta lad nzhoor zha lu, ne naabdzia, cho mdiinn cho'a?

⁴⁶ Tsa lee Jesús mre nzhab:

—Nzo cho mdiinn chon, tak myeen na mroo yalney chon mtegwen thib zha.

⁴⁷ Tsa lee ngot myeen ngot ngogaa ngot, tsa mzhiit ngot ne mbig ngot ne mtobxbu ngot lo Jesús. Ne tyo lo re men nzhab ngot naa chebee mdiinn ngot xab Jesús, ne xomod oraaka mgwe ngot, tak mdiinn ngot xab Jesús.⁴⁸ Tsa nzhab Jesús lo ngot:

—Rtsaap'n, tak ngwalaaza Diox, kona mgwe'a. Wen bloo leettsoo'a ne tyee.

⁴⁹ Bee ngenika Jesús leettsa mzin thib zha liz Jairo, nzhab lo Jairo:

—Lee rtsaapa ngutha, chebee ngenika lu lo maestr.

⁵⁰ Per lee Jesús mbin nzhab zha kona, tsa nzhab Jesús lo Jairo:

—Tsepta; beeta gwalaaz Diox, ne lee rtsaapa tegwe.

⁵¹ Ne leettsa mzin Jesús liz Jairo, mndaaat Jesús diiz gataab re men liz Jairo, beeta Pey, Santiag, Juan ne xut nzaa ne xnaa nzaa.
⁵² Ne reta men nzi nzhab lo re zha:
—Gonnt goo, tak ngutht nzaa, beeta naxat nzaa.

⁵³ Tsa mzhizno re zha Jesús, tak ne re zha ngutht nzaa.⁵⁴ Tsa mzhien Jesús yaa nzaa, ne nex nzhab Jesús:

—¡Nzaa, gwache!

55 Tsa lee nzaa mroban. Ne oraaka ngwache nzaa, ne mnabee Jesús taa zha kuu wu nzaa.⁵⁶ Ne lee xut nzaa ne xnaa nzaa kwathoz mzegey leettsoo. Per lee Jesús nzhab lo rop zha, yent cho lo gab zha kuu ngok.

9

Jesús mtaal re zha kuu ngeteed lo Jesús yataa kwent xkiiz Diox

(Mt. 10:5-15; Mr. 6:7-13)

¹ Tsa mrez Jesús re tsuibchop zha kuu ngeteed lo Jesús, ne mndaa Jesús yalney ne yalnabee lo re zha, tsa tak koo zha relota mbi fyer kuu nzo leettsoo re men, ne par tegwe zha re mbyiz.² Ne mtaal Jesús re zha tsa taa zha kwent chaan ta nabee Diox, ne par tegwe zha re mbyiz.³ Ne nzhab Jesús lo re zha:

—Neeka thib kwaa gwet goo leettsa yo goo net, neeka aga, neeka bols goo kuu yo re chaan goo, neeka pan, neeka temi; ne neeka gwet goo chop net xab goo.⁴ Ne loka yuu ta tsin goo, tya kwet goo asta leettsa roo goo yezza.⁵ Ne loka yez ta kayaat zha goo, broo goo yezza ne btsib goo yuyaaz kuu mke nii goo, tak kona nak thib seny kuu loo lo re tawlaz zha lee re zha'a went nak zha, tak nkayaat zha goo.

⁶ Tsa mroo re zha ne ngwa zha re yez ne re ranch, mndaa zha kwent Diiz Chul ne mtegwe zha re mbyiz.

Yalguth chaan Juan kuu mtsowleyy
(Mt. 14:1-12; Mr. 6:14-29)

⁷ Ne lee rey Herodes zha kuu nabee dita yezlyu Galilea mbin reta kuu mtsow Jesús; ne neeka net rey Herodes naa kwan tsow rey xgab, tak chop tson men mbez lee Juan mroban, ne lee Juan ntsow re kona.⁸ Ne lee tedib net zha mbez lee Jesús nak Lí kuu ngok profet ndala, ne lee tedib net zha mbez lee Jesús nak thib re profet kuu ngoo ndala, mroban.⁹ Per lee rey Herodes nzhab:

—Si na mnabee mga zha yek Juan. Mbay ne, ¿cho nak zha kuu nzhon na ndaa zha kwent chaan tsa?

Kona nlaaz rey Herodes wii Jesús.

Jesús mndaa kuu ndow thib gaay mil mbyi
(Mt. 14:13-21; Mr. 6:30-44; Jn. 6:1-14)

¹⁰ Ne leettsa mretab re kuu ngeteed lo Jesús, tsa nzhab zha re kuu mtsow zha lo Jesús. Tsa mndeno Jesús beeta re zha, ne ngwa re zha thib ta yubiz, gaxta yez Bet-saida tsa kwin anta re zha. ¹¹ Per leettsa myeen re men lee Jesús nda neta, tsa mndekre re zha dits Jesús, ne mkayaa Jesús re zha ne mndaa Jesús kwent chaan ta nabee Diox lo re zha, ne mtegwe Jesús re mbyiz.

¹² Per leettsa ndetsiy yezlyu, tsa mbig re tsuibchop zha kuu ngeteed lo Jesús ne nzhab zha lo Jesús:

—Taal re men ree bi, tsa ya zha neyy zha ne yakwaan zha kuu wu zha, re ranch kuu nzi gaxta nzhee; tak yent kwan nak nzhee wu zha.

¹³ Tsa nzhab Jesús lo re zha:

—Taa goo kuu wu zha.

Tsa lee re zha mkab, ne nzhab:

—Beeta gaay pan ne chop mbel nap nee, chu nlaaza yati nee kuu wu reta men ree.

¹⁴ Ne tyu nzi teeka gaay mil mbyi. Tsa nzhab Jesús lo re zha kuu ngeteed lo Jesús:

—Guz goo lo re men, tsa yetob chop galbtiiiga zha.

¹⁵ Ne tata mtsow re zha, tsa ngwatob re men. ¹⁶ Tsa mzhen Jesús re gaay pan ne rop mbel, ne mwii Jesús lobee ne mndaa Jesús texkix lo Diox, tsa tsow Diox gak narooibe, ne mtsow rol Jesús re pan ne mndaa Jesús pan lo re zha kuu ngeteed lo Jesús, tsa kiid zhay lo re men.

¹⁷ Reta men ndow asta plotha mze leettsoo re men; ne bee mtse re zha tsuibchop chekwit pan kuu mrozhooob.

Pey nzhab lee Jesús nak Crist Kuu Mtaal Diox Nabee

(Mt. 16:13-19; Mr. 8:27-29)

¹⁸ Thib wiz thita Jesús ndo ngetediz lo Diox, ne lee re zha kuu ngeteed lo Jesús nzi gaxta lo Jesús, tsa mnaabdiz Jesús lo re zha, ne nzhab Jesús:

—¿Cho nak'n ni re men?

¹⁹ Lee re zha mkab ne nzhab:

—Thib net zha mbez lee lu nak Juan kuu mtsowleyy, tedib net zha mbez lee lu nak Lí, ne lee tedib net zha mbez lee lu nak thib re profet kuu ngoo ndala, kuu mroban nal.

²⁰ —Lee re goo, ¿cho nak'n ndak goo?

Tsa lee Pey mkab, ne nzhab lo Jesús:

—Lu nak Crist Kuu Mtaal Diox Nabee.

Jesús mndaa kwent naa xomod gath Jesús
(Mt. 16:20-28; Mr. 8:30-9:1)

²¹ Per lee Jesús mnabee lo re zha, tsa yent cho lo gab zha kona. ²² Tsa nzhab Jesús lo re zha:

—Lee na nak Zha Kuu Mtaal Diox Ngok Men, ndoblo riid'n kwathoz yalti. Ne kayaat re zha gol'n, neeka re ngwleyy kuu nataak, ne neeka re maestr kuu nloo xkiiz Diox. Ne

kuth zha na, per leettsa tsaal tson wiz lee na roban.

²³ Ne nogaa nzhab Jesús lo re zha:

—Loka cho goo nlaaz teke dits'n, ndoblo laa goo reta kuu nap goo, ne reta kuu nzo yek goo tsow goo, ne ndoblo thib ko goo yek goo gath goo, tak nyelaaz goo na. ²⁴ Os lee thib zha gath tak ndeke zha dits'n, tetsov zha gan yalnaban kuu thitanax. Per os lee zha nzeb zha gath zha tak ndeke zha dits'n, tsowt zha gan yalnaban kuu thitanax yibaa? ²⁵ ¿Per kwan tsow zha gan tegal reta kwaayezlyu ree keno zha, ne tsowt zha gan yalnaban kuu thitanax yibaa? ²⁶ Ne loka zha kuu nthoy nen ne xkiz'n, nogaa na Kuu Mzin Ngok Men, tethoy'n nen zha'a, leettsa bretab'n lo yezlyu ree tedib welt kon xni thoz chaan da, ne kon xni thoz chaan Xut'n ne kon re mandad da kuu nayon. ²⁷ Wlipaa na nin lo goo, lee chopta goo kuu nzi nzhee nal gathog goo, asta wii goo naa xomod nabee Diox kon yalnabee chaan Diox.

Mzee mod na Jesús

(Mt. 17:1-8; Mr. 9:2-8)

²⁸ Ne leettsa nda'a teeka xon wiz nzhab Jesús kona, tsa mkkendab Jesús yek thib yii par tediz Jesús lo Diox. Ne mndeno Jesús Pey, Santiag ne Juan. ²⁹ Ne leettsa ngetediz Jesús lo Diox, mzee mod na Jesús, kwathoz naguz mloo xab Jesús, ne kwathoz mla xniy. ³⁰ Ne mloo chop mbyi kuu ngetediz lo Jesús. Rop zha'a nak Moisés ne Lí. ³¹ Ne ngoo re yon zha xid thib xni thoz, ne mndediz re zha kwent chaan yalguth chaan Jesús, kuu rid Jesús yez Jerusalén. ³² Ne lee Pey, Santiag ne Juan ngwatin re zha mkaal, per mdatta zha, tsa mwii zha xni thoz chaan Jesús ne lo rop zha kuu mndo lo Jesús. ³³ Per leettsa lee rop mbyi'a ndya, tsa lee Pey nzhab lo Jesús:

—Maestr, jwen nzi nee nzhee! Nal taa nee tson ramad, thibe gak chaana, tedibe gak chaan Moisés ne tedibe gak chaan Lí.

Per neeka net Pey naa kwan nzhab Pey.

³⁴ Leettsa lee Pey bee ngenika lee thib xkow mla mtow re zha, ne kwathoz mzeb re zha ngoo zha xid xkowa. ³⁵ Ne xid xkowa mroo thib bos kuu nzhab:

—Zha ree nak xgann na kuu mlin. Bin goo re kuu ne zha.

³⁶ Bluz or ngwalo mni bosa, tsa mwii re zha thita Jesús ndo. Ne re wiza yent cho lo nzhab re zha kuu mwii zha.

Jesús mtegwe thib mndyeen kuu nzo mbi fyer leettsoo

(Mt. 17:14-21; Mr. 9:14-29)

³⁷ Ne lee tedib wiz, leettsa ndyaad re zha ngwa zha yek yii, tsa kwathoz men ngwa lo Jesús. ³⁸ Tsa lee thib mbyi kuu nzo xid re mena, nex nzhab:

—Maestr, blat leettsoo'a ne'a xgann na, tak thibka zha lon. ³⁹ Ne nden thib mbi

fyer zha, ne ntsow mbi mbetsyath zha, ne ntsow mbi rlen zha yizguthye, ne ntsow mbi ndroo btsiin roo zha. Kwathoz nakap ntsowno mbi zha ne nlaazt mbi laa mbi zha.⁴⁰ Ne nzhaba na lo re zha kuu ngeteed lo'a, tsa koo zha mbi fyer leettsou xgann na, per ngogt gatsow zhay.

⁴¹ Lee Jesús mkab ne nzhab:

—Men nad, kuu nyelaazt Diox! ⁴² ¿Plal tyemp ndoblo ton lo goo ne xek leettsou nen goo? Deno xganna nzhee.

⁴² Ne leettsa lee zha ngebig, tsa lee mbi fyer mlobi zha lo yu, ne oraaka mtsow mbi mlen zha yizguthye tedib welt. Per lee mbi fyer mkox lo Jesús, ne mtegewe Jesús zha, ne mndaa Jesús zha lo xut zha.⁴³ Ne reta men kuu nzi tyu, kwathoz mzegey leettsou zha mwii zha kuu thoz kuu mtsow Diox.

Ne leettsa lee reta zha bee nzegey leettsou mwii kuu ngok, tsa lee Jesús nzhab lo re zha kuu ngeteed lo Jesús:

⁴⁴ —Wen wen kenza goo koree ne nith-laazt gooy, tak na, Kuu Mzin Ngok Men, taa zha na lo re men.

⁴⁵ Per myent re zha kuu nzhab Jesús, tak mkow yek zha kona myent zha. Ne nzeb re zha naabdiz zha lo Jesús, naa kwan kuu nzhab Jesús lo re zha.

*Cho nak zha kuu mas nataak
(Mt. 18:1-5; Mr. 9:33-37)*

⁴⁶ Tsa lee re zha kuu ngeteed lo Jesús mnadelo zha mbyodiz re zha naa cho nak zha kuu mas nataak lo re zha.⁴⁷ Per lee Jesús myeen naa kwan ntsow re zha xgab, tsa mdeez Jesús thib ndyeen lut, ne mto Jesús ndyeen lo re zha.⁴⁸ Tsa nzhab Jesús lo re zha:

—Loka zha kuu nkayaa thib ndyeen, na nkayaa zha'a, ne loka zha kuu nkayaa na, noga nkayaa zha, zha kuu mtaal'n. Tak lee zha kuu mas nataagt lo re goo, zha'a nak zha kuu mas nataak.

Re zha kuu nayiit ne'aa nzo zha'a fabo-raa

(Mr. 9:38-40)

⁴⁹ Tsa lee Juan nzhab lo Jesús:

—Maestr, mwii nee lee thib zha ngoo mbi fyer kon yalnabee chaana, ne nzhab nee lo zha: “Tsowt zhay”, tak nagt zha, zha'aa.

⁵⁰ Per lee Jesús nzhab lo re zha:

—Ndoblot gab goo lo zha: “Tsowt zhay”, tak lee zha kuu nayiit ne'aa, nzo zha'a fabo-raa.

Mkok Santiag ne Juan lo Jesús

⁵¹ Leettsa ndetsin gaxa wiz kuu bretab Jesús yibaa, thib mloo Jesús yek Jesús ya Jesús Jerusalén.⁵² Tsa mtaal Jesús chop tson zha mndenerga lo Jesús, ne lee re zha'a ngwa thib yez lut chaan zha Samaria, tsa kwaan zha pa kwet re zha.⁵³ Per lee re

zha yeza mkayaat zha re zha, tak myeen re zha yeza lee re zha nda yez Jerusalén.⁵⁴ Or mbin Santiag ne Juan kona, tsa nzhab rop zha:

—Zha Nabee, ¿chu nlaaza nabee nee tsa roo ki yibaa, ne luuzhe re zha yez ree?

⁵⁵ Tsa mwii Jesús lo Santiag ne lo Juan, ne mkox rop zha lo Jesús.

⁵⁶ Tsaraa nda re zha tedib yez.

*Re zha kuu nlaaz teke dits Jesús
(Mt. 8:19-22)*

⁵⁷ Leettsa ndo Jesús kon re zha net, thib re zha nzhab lo Jesús:

—Zha Nabee, nlaz'n teken ditsa loka pa ta ya'a.

⁵⁸ Tsa mkab Jesús lo zha, ne nzhab Jesús:

—Lee re mbeet nap maa kelyoo ta nyoo maa, ne lee re min nap maa lyaat maa; per lee na, Kuu Mzin Ngok Men napt liz'n.

⁵⁹ Tsa nzhab Jesús lo tedib zha:

—Bteke dits'n.

Per lee zha'a mkab, ne nzhab:

—Zha Nabee, laa yelo kaats'n xut'n.

⁶⁰ Lee Jesús mkab lo zha, ne nzhab:

—Laa kaats re zha nguth zha nguth; per lee lu gwa gwataa kwent xkiiz Diox.

⁶¹ Ne lee tedib zha nzhab lo Jesús:

—Zha Nabee, nlaz'n teken ditsa, per beeta laa'a yalon diize lo re zha liz'n.

⁶² Jesús mkab lo zha, ne nzhab:

—Loka zha kuu nden yaa arad ne ngwii zha par dits zha, lortsint zha'a par taa zha kwent chaan ta nabee Diox.

10

Jesús mtaal tson galbtsii chop zha ng-wataa kwent xkiiz Diox

¹ Leettsa ngwalo mriid re koree, tsa lee Zha Nabee mli tson galbtsii chop zha, ne mtaal Jesús chopga chopga zha tener lo Jesús, tsa ya zha re yez ta naka diiz ya Jesús.
² Tsa nzhab Jesús lo re zha:

—Wlipaa na nin lo goo, kwathoz nzo rtsin Zha Nabee, per lutta zha kuu ke rtsin zha nzo. Kona bnaab goo lo Zha Nabee, tsa taal zha masraa zha kuu ke rtsin zha thop yalgonn chaan zha.³ Gwa goo, ne wen wii goo, tak lee na ngetaal goo taxal mbak zhil xid re mbeez kuu nayii.⁴ Ne neeka thib kwaan gwet goo, gwet goo bols kuu yo re chaan goo, neeka temi, neeka tedib net labyid, ne kwetta goo tediz goo lo neeka thib zha net.⁵ Ne leettsa tab goo leen thib yuu, ner bni goo “diox” gab goo: “Wen kwin re goo kuu nzo yuu ree”.⁶ Ne os lee re zha kuu nzo yuu'a ndoblo zha kayaa zha re diiz wen kuu ni goo lo zha, tekayaa zhay, per os lee zha ndoblot zha kayaa zhay yaante lo zha.⁷ Ne kwet goo yuu'a, ne dow goo ne gwii goo loka kuu taa zha lo goo, tak lee zha kuu nke tsin ndoblo gax kaa zha. Ne

yat goo thib yuu tedib yuu. ⁸ Ne loka yez ta ya goo ne kayaat zha goo, dow goo loka kuu tsib zha lo goo, ⁹ ne btegwe goo re mbyiz kuu nzo yeza, ne gab goo lo re zha: “Lee wiz kuu nabee Zha Nabee lo goo mzin gaxa lo goo”. ¹⁰ Per os tsin goo thib yez ta kayaat zha goo, broo goo yeza ne gab goo lo zha: ¹¹ “¡Asta yuaaz laz goo kuu mke nii nee, tsib neey tsa yaane! Tsa ne re tawlaz goo lee goo mkayaat nee. Per ndoblo ne goo koree: Lee wiz kuu nabee Diox mzin gaxa lo goo.” ¹² Tak wlipaa na nin, lee wiz kuu naab Diox kwent lo reta men, lee yalti kuu rid re zha yeza, gak masraa natu nake yalti kuu rid re zha yeza Sodoma.

*Yalti kuu rid chop yez kuu mbint diiz
(Mt. 11:20-24)*

¹³ ¡Aka nalatt rid re goo zha yez Corazín! ¡Aka nalatt rid re goo zha yez Betsaida! ¡Aka nalatt rid goo yalti! Os leen yez Tiro ne Sidón gagak re kuu thoze kuu ngok lo re goo, nda'a wiz gatsee zha mod nak zha ne gagok zha lar kuu nambaat ne gatob zha lo di, tsa galoo zha lee leettsoo zha kwathoz nabil nzo por re falt kuu mtsow zha lo Diox. ¹⁴ Kona lee wiz kuu naab Diox kwent lo reta men, lee yalti kuu rid goo gak masraa natu, nake yalti kuu rid re zha yez Tiro ne Sidón. ¹⁵ Ne lee re goo zha yez Capernaúm, ¿chu ntsow goo xgab lee goo tsin yibaa? ¡Nagte tata, sinke lee goo tsin asta xann ta nak Hades ta nzo xbi re zha nguth!

¹⁶ Tsa nzhab Jesús lo re zha kuu mtaal Jesús re yeza:

—Loka zha kuu kenza kuu gab goo, noga kenza zha kuu nin; ne lee zha kuu kayaat goo noga na nkayaat zha, ne lee zha kuu nkayaat na noga nkayaat zha, zha kuu mtaaln.

Leettsa mretab re tson galbtsii chop zha kuu mtaal Jesús

¹⁷ Leettsa mretab re tson galbtsii chop zha kuu mtaal Jesús re yez, kwathoz naley nzo leettsoo re zha, ne nzhab zha:

—Zha Nabee, asta re mbi fyer nzhon diiz lo nee kon yalnabee chaana.

¹⁸ Tsa lee Jesús nzhab lo re zha:

—Mwiin lee Maxuuy mrethin yibaa taxal bel bti.

¹⁹ 'Mndan yalnabee lo goo, tsa lo goo dits mbeel ne dits mbezhub, ne mndan yalnabee lo goo tsow goo gan lo yalney chaan Maxuuy, ne yent kwan tak goo. ²⁰ Ne ndoblot yo naley leettsoo goo, tak nzhon re mbi fyer diiz lo goo, sinke naley bloo goo leettsoo goo, tak lee le goo nke'a yibaa.

*Naley ngoo leettsoo Jesús
(Mt. 11:25-27; 13:16-17)*

²¹ Ne leeka ora lee Mbi Nayon mtsow kwathoz naley ngoo leettsoo Jesús, ne nzhab Jesús:

—Nzholol lo'a Xut'n, Zha Nabee yibaa ne yezlyu, tak mkaatsa koree lo re zha kuu nzhaak, ne lo re zha kuu nyen re kuu, ne mloo luy lo re zha kuu gagt. Xut'n tabaa mtsow luy tak tabaa nlaaza.

²² 'Reta kwaamndaa Xut'n lon. Ne neeka thib zha net cho nak'n, sinke beeta Xut'n ne cho nak'n. Ne neeka thib zha net cho nak Xut'n, sinke beeta na ne cho nak Xut'n, ne lo re zha kuu nlaz'n lebee zha Xut'n, tetsow'n lebee zha Xut'n.

²³ Tsa mwii Jesús lo re zha kuu ngeteed lo Jesús, ne nzhab Jesús lo re zha:

—Wen nda re zha kuu ngwii re kuu ngwii goo. ²⁴ Tak wlipaa na nin lo goo, tyen re profet ne tyen re rey ngwalaaz gagwii re kuu ngewii goo, per mwiiit zhay, ne ngwalaaz zha gagon zha re kuu ngeyon goo per mbint zhay.

Kwent nanzee chaan zha yez Samaria

²⁵ Tsa lee thib maestr kuu nloo xkiiz Diox, ngwateli ne mnaabdiz lo Jesús, tak nlaaz zha yetsal zha thib kuu keki zha Jesús, tsa nzhab zha:

—Maestr, ¿kwan ndoblo tsow'n, tsa tsow'n gan yalnaban kuu thitanax?

²⁶ Jesús mkab ne nzhab:

—¿Kwan nzhab ley? ¿Ne kwan nyena or nlab luy?

²⁷ Lee maestr kuu nloo xkiiz Diox mkab, ne nzhab:

—Ndoblo ke leettsoo'a Diox kon dib ndroo leettsoo'a, ne kon dib yalnaban chaana, ne kon dib yalney chaana, ne kon dib xgaba, ne ndoblo ke leettsoo'a tabena taxal nke leettsoo'a leeka lu. [Lv. 19:18; Dt. 6:5]

²⁸ Jesús mkab lo zha, ne nzhab:

—Wen mkaba, btsow koree tsa bana.

²⁹ Per lee zha nlaaz gab, nyent zha kona, tsa mnaabdiz zha lo Jesús, ne nzhab zha:

—¿Ne cho nak taben da tsa?

³⁰ Tsa lee Jesús mkab lo zha, ne nzhab:

—Nal tan thib kwent lo'a. Thib zha mrooyez Jerusalén ndyaadla zha yez Jericó, ne mrooy chop tson wann lo zha, tsa mlowann re wann chaan zha; ne mkee wann yek zha ne mtaan wann zha taxal zha nguth. ³¹ Tsa lee thib ngwleyy mriid tyo. Per or mwii ngwleyy zha, beeta mwii ngwleyy lo zha, ne thib lad mriid ngwleyy nda ngwleyy.

³² Ne leeka tata mriid thib zha raz Leví, ne or mwii zha zha'a, beeta mwii zha zha, ne mriid zha nda zha. ³³ Per leettsa mriid thib zha Samaria neta, or mwii zha zha'a, mlat leettsoo zha mne zha zha. ³⁴ Tsa mbig zha lo zha'a, ne mloo zha aseyt ne xit ub lo grid zha'a, ne mliib zha lar lo grid zha'a. Ne mtob

zha zha dits burr zha, ne mndeno zha zha thib yuu ta mbet re men ne mkenap zha zha.³⁵ Ne lee tedib wiza or lee zha Samaria mbi, tsa mloo zha chop temi, ne mndaa zhay lo zha kuu mndaa ta mlet zha, ne nzhab zha lo zha'a: "Bkenap mbyi ree, ne os lee'a tsow raa lu gast, yat leettsoo'a na yizhe lo'a leettsa bretab'n".

³⁶Tsa mnaabdiz Jesús lo maestr, ne nzhab Jesús:

—¿Kwan ntsowa xgab? ¿Cho lo re yon zha'a nak taben zha kuu mkee re wanne yek?

³⁷ Lee maestr kuu nloo xkiiz Diox mkaab, ne nzhab:

—Zha kuu mlat leettsoo mne zha kuu mkee wanne yek.

Tsa nzhab Jesús lo maestr:

—Tyee, ne tataga btsow.

Jesús ngwatwii lo Mart ne lo Mari

³⁸ Ne lee Jesús ndaka xnet, tsa mzin Jesús thib yez, ne tyu lee thib ngot kuu le Mart mkayaa Jesús lize.³⁹ Ne nap Mart thib bel Mart kuu le Mari. Ne lee Mari mndob lo Jesús, nzhon Mari re kuu nzhab Jesús.⁴⁰ Per lee Mart kwathoz ntsow xgab re rtsin, tsa mbig Mart lo Jesús, ne nzhab Mart:

—Zha Nabee, thita na mlaa bel'n, tsow reta kwaas. Guz lo bel'n tsa tsow zha ayud'n.

⁴¹ Lee Jesús mkaab lo Mart, ne nzhab:

—Mart, Mart, kwathoz nda leettsoo'a, ne kwathoz ntsowa xgab,⁴² per thibka kuu ndoblo tsow men ne lee Mari mli kuu mas wen, ne yent cho kibe lo Mari.

11

Jesús mloo naa xomod tediz men lo Diox (Mt. 6:9-15; 7:7-11)

¹ Thib wiz leettsa ngetediz Jesús lo Diox thib ta. Ne leettsa ngwalo mndediz Jesús lo Diox, lee thib zha kuu ngeteed lo Jesús nzhab lo Jesús:

—Zha Nabee, bloo lo nee naa xomod ndoblo tediz nee lo Diox, taxal mloo Juan lo re zha kuu mndeke dits Juan.

²Tsa nzhab Jesús lo re zha:

—Leettsa tediz goo lo Diox tenzhee ndoblo gab goo:

Xut nee Diox kuu ndob yibaa, nayon nak le'a.

Nlaaz nee yaada nabee'a lo yezlyu ree, taxal nabee'a yibaa.

³Taa kuu wu nee naltserree.

⁴Btuyu reta falt kuu ntsow nee lo'a, taxal ngoo nee yek nee re falt kuu ntsow taben nee lo nee.

Ne layaata nee par tsow nee kuu went.

⁵Noga nzhab Jesús lo re zha:

—Tsow goo xgab, lee thib amig thib zha ya liz zha ngulal yaal, ne gab amig zha lo zha: "Amig, tseche tson pan lon,⁶ tak lee

thib amig da kuu tith mzin liz'n, ne napt'n kuu tan wu zha".⁷ Ne lee zha kab asta leen yuu ne gab zha: "Tow roo'a keeta bi yek'n, tak noowa roo yuu ne naxata re zhiinn na, yechet'n par tan pan lo'a".⁸ Wlipaa na nin lo goo, tegal nlazaat zha yeche zha par taa zha pan lo amig zha ngulal yaal, per tak thib ndo amig zha ngenaabe lo zha, teyech zha ne taa zha reta kuu ndeche amig zha.⁹ Kona nin lo goo; bnaab gooy, ne lee Zha Nabee taay; bkwaan gooy tsa yetsale lo goo; Bteez goo roo yuu, tsa xaal zha roo yuu lo goo.¹⁰ Tak reta zha kuu naabe tekayaa zhay; ne reta zha kuu nkwaane, teyetsale lo zha; ne reta zha kuu nteez roo yuu, taxaal zha roo yuu lo zha.

¹¹'Os lee thib goo nap thib ndyeen lut, ne naab ndyeen tsa pan wu ndyeen lo goo, ¿chu tataa goo thib ke lo ndyeen? O os lee ndyeen naab ndyeen thib mbel wu ndyeen, ¿chu tataa goo thib mbeel lo ndyeen?¹² Ne os lee ntayen naab thib ngo lo goo, ¿chu tataa goo thib mbezhub lo ndyeen?¹³ Ne tegal zha went nak goo, per nzhaak goo ndaa goo kuu wen lo zhiinn goo, ne lee Xutaa kuu ndob yibaa, masraa wen nak zha, ixomod taat zha Mbi Nayon chaan zha lo reta zha kuu naabe lo zha!

Nkeki zha Jesús lee Jesús nap yalnabee chaan Maxuuy

(Mt. 12:22-30; Mr. 3:20-27)

¹⁴ Leettsa lee Jesús ngegoo thib mbi fyer leettsa thib mbyi mud; ne leettsa mroo mbi fyera leettsa mbyi'a, lee mbyi'a mndediz. Tsa kwathoz mzegey leettsa re men mwii kona.¹⁵ Per lee chop tson zha nzhab:

—Kon yalney chaan Beelzebú, kuu nabee lo re mbi fyer ngo zha re mbi fyer.

¹⁶ Lee tedib net zha nlaaz ne naa cho nak Jesús, tsa nzhab zha lo Jesús:

—Bloo thib seny yibaa lo nee.

¹⁷ Per ne'a Jesús naa kwan ntsow re zha xgab, tsa nzhab Jesús lo re zha:

—Reta yez kuu nzhab chop, ne ngyo zha leeka re tawlaw zha, xegt yeza naroob, ne tataka leen thib yuu ta ngyo zha kon leeka re zha kuu nzo liz zha, xegt re zha'a naroob.¹⁸ Ne tataka, os lee Maxuuy nzhab chop, ne ngyo Maxuuy kon leeka Maxuuy, xegt Maxuuy naroob. Nin koree tak lee re goo mbezz lee na ngo mbi fyer kon yalney chaan Beelzebú;¹⁹ Ne os leey tatay, ¿cho mndaa yalnabee lo re zha kuu ngeteed lo goo, tsa ngoo zha mbi fyer? Tak leeka re zha nloo wlit kuu ni goo.²⁰ Per os leen ngon mbi fyer kon yalney chaan Diox, koree nloo lee yalnabee chaan Diox mzina lo re goo.

²¹ 'Leettsa lee thib mbyi kuu ney wen nkenap liz kon yiib, wlipaa na nin, yent cho lowann re chaan zha.²² Per os lee tedib mbyi kuu mas ney nake lee zha, ndyaad ne

tsow gan lo zha, ne kib mbyi'a reta yiib zha kuu nap zha konfyans, tsasi tak kib mbyi'a re kuu nkeno zha ne kiid mbyiy lo re aimig mbyi.

²³ Re zha kuu nagt zha da, re zha'a nak zha kuu nayii nen; ne lee re zha kuu nketsiin kon na, re zha'a nluux rtsin na.

Mbi fyer kuu ndretab

(Mt. 12:43-45)

²⁴ Leettsa lee thib mbi fyer ndroo leettsoo thib zha, nda mbi thib ta yubiz, ne nkwaan mbi ta roxkwaa mbi; ne tak mzalt a roxkwaa mbi, tsa nda leettsoo mbi fyer: "Bretabka na liz'n, ta mroon". ²⁵ Ne leettsa ndretab mbi, nzal mbi leettsoo zha kuu mroo mbi, taxal leen thib yuu kuu nalob ne nambii na. ²⁶ Tsa nda mbi ne ndaxii mbi tedib gaz mbi kuu mas nakap nak nake mbi'a. Tsa lee zha'a mas nakap gak nake taxal ngok zha ner.

Yalnaley kuu wlipaa

²⁷ Leettsa ngeni Jesús re koree, tsa lee thib ngot kuu nzo xid re mena mrez dib gan ne nzhab:

—¡Kwathoz wen nda xnaa'a, kuu ngopa ne mnndaan nzi ngwii'a!

²⁸ Per lee Jesús mhab, ne nzhab:

—Lee na ni: ¡Kwathoz wen nda re zha kuu nzhan xkiiz Diox, ne nhzon dize!

Lee re men mnaab tsow Jesús thib kuu thož

(Mt. 12:38-42; Mr. 8:12)

²⁹ Ne leettsa mkaltaa kwaro men lo Jesús, tsa nzhab Jesús lo re zha:

—Kwathoz nakap nak re men kuu nzo tyempree, tak nlaaz zha tsow'n thib kuu thož, per neeka thib kuu thož loot lo re zha, beeta seny chaan Jonás loo lo re zha. ³⁰ Tak leeka taxal ngok Jonás thib seny lo re zha yez Níniye, leeka tata gak na, Kuu Mzin Ngok Men, seny lo re men kuu nzi nal. ³¹ Ne lee wiz kuu naab Diox kwent lo re men tyempree, tsa lee ngot kuu nabee lo re zha re yez kuu nzi lad Sur, keki re men kuu nzi nal re wiz ree, tak lee zha'a mroo asta tedib lad lo yezlyu ne myaad zha par gon zha yalnzaak chaan Salomón. Ne nzhee ndo thib zha kuu mas nataak nake Salomón. ³² Ne noga re zha yez Níniye keki re zha kuu nzi nal re wiz ree, wiz kuu naab Diox kwent lo reta men, tak mbin re zha yezza diiz lo Jonás, ne mtsee zha mod went kuu nak zha ne ngwalaaz zha Diox. Ne nzhee ndo thib zha kuu mas nataak nake Jonás.

Ngutlo men nak xni men

(Mt. 5:15; 6:22-23)

³³ Neeka thib zha nkeet thib xni, ne ntob zhay thib ta nagaats, ne neeka ntowt zhay leen thib zhibey, sinke ntob zhay thib ta ya ndab, tsa teniy lo re zha kuu ndaab leen

yuu. ³⁴ Ngutlo zha nak taxal xni kuu nteni dita zha; ne os lee ngutlo zha wen, dita zha ndo lo xni; per os lee ngutlo zha went, dita zha ndo lo yalkow. ³⁵ List gwatsin goo, tak cha nyenit ngutlo goo ne cha lo yalkow nzi goo. ³⁶ Kona os lee dita kwerpa nzo xni, ne neeka lutte nakowt na, reta kuu wen loo lo'a, taxal thib ta wen nke xni.

Mkox re fariseo ne re maestr kuu nloo xkiiz Diox lo Jesús

(Mt. 23:1-36; Mr. 12:38-40; Lc. 20:45-47)

³⁷ Leettsa ngwalo nzhab Jesús re koree, tsa lee thib fariseo ngwa nzhab lo Jesús, ya Jesús wu Jesús liz zha. Ne leettsa mzin Jesús liz zha, tsa mndob Jesús ne mndelo Jesús ndow. ³⁸ Tsa mzegey leettsoo zha mwii zha, lee Jesús mnat ngeyow. ³⁹ Tsa lee Jesús Zha Nabee, nzhab lo zha kuu nak liz yuu:

—Lee re goo zha fariseo, wen wen nteech goo dits re bas ne dits re yann, per lee leettsoo goo nambit, tak tsey nzo re kuu nlowann goo ne re kuu went. ⁴⁰ ¡Zha nad! ¿Chu net goo leeka zha kuu mdexkwaa dits kwaa leeka zha'a mdexkwaa leene? ⁴¹ Mas wen leettsa taa goo karida lo thib zha prob, tsa dita goo gak zha nambi.

⁴² ¡Aka nalatt rid goo zha fariseo! Tak ndaa goo tsii part re chaan goo gon lo Diox, ne asta re bthyon xtil, rud ne relota yizh kwaan, per ntsowt goo xgab tsow goo re kuu nak kuu wen, ne neeka yent yalnkelaz chaan Diox leettsoo goo. Re koree nak kuu ndoblo tsow goo, ne neeka laat goo tsow goo teed net re kona.

⁴³ ¡Aka nalatt rid goo zha fariseo! Tak kwathoz nyow leettsoo goo tob goo re ta nataak, ta nkaltaa re'aa nteedaa xkiiz Diox, ne wen nzo leettsoo goo nkiits yek re men ni men "diox" lo goo lo xbi.

⁴⁴ ¡Aka nalatt rid re goo zha fariseo ne goo maestr kuu nloo xkiiz Diox! Tak lee re goo nak taxal roo baa kuu nloot, ne lee re men kuu ndiy ditse nete.

⁴⁵ Tsa lee thib re maestr kuu nloo xkiiz Diox nzhab lo Jesús:

—¡Maestr, leettsa tabaa ni'a lo nee, nkox nee lo'a!

⁴⁶ Tsa nzhab Jesús lo zha:

—¡Noga goo maestr kuu nloo xkiiz Diox, aka nalatt rid goo! Tak ntsib goo kuu ne dits tedib men, kuu neeka thib men yet gwe. Ne lee goo neeka kon kwen yaa goo ndiinnt gooy.

⁴⁷ ¡Kwathoz nalatt rid goo! Tak ndexkwaa goo almirit re roo baa chaan re profet kuu ngoo ndala, re zha kuu leeka re tey goo mbeth. ⁴⁸ Ne koree nloo lee re goo ndak goo wen kuu mtsow re tey goo zha ndala, tak re tey goo mbeth re profet, ne lee re goo ndexkwaa almirit roo baa chaan re profeta.

⁴⁹ 'Kona lee Diox lo yalnzaak chaan Diox nzhab Diox: "Taal'n re profet da ne re apóstol da, ne thib net zha kuth zha ne lee tedib net zha reke zha dits". ⁵⁰ Kona lee ren chaan reta profet kuu mbeth zha ndala, desde leettsa mdexkwaa yezlyu ne asta nal, leey naab kwent lo reta men kuu nal re wiz ree, ⁵¹ desde leettsa mxo ren Abel ne asta leettsa mxo ren Zacarí kuu mbeth zha xtow bkoog ne gwodoo. Wlipaa na nin lo goo, reta koree naab Diox kwent lo re zha kuu nzi nal wiz ree.

⁵² 'Aka kwathoz nalatt rid goo maestr kuu nloo xkiiz Diox! Tak nap goo yab chaan yalnzaak, per nteedt goo ne neeka nlaat goo teed tedib net zha.

⁵³ Leettsa ngwalo nzhab Jesús re koree; tsa lee re maestr kuu nloo xkiiz Diox ne re fariseo kwathoz mkezhyan zha, ne mndelo re zha mnaabdiz zha kwaro kwaa lo Jesús, ⁵⁴ tsa kab Jesús thib kuu went, tsa tak keki zha Jesús.

12

Reta kuu nagaats tanabee

¹ Ne tyen mil men mkaltaa lo Jesús, asta ndelo zha nzhoo altaa zha. Tsa mni Jesús lo re zha kuu ngeteed lo Jesús, ne nzhab Jesús:

—List gwatsin goo lo re kuu nloo re fariseo, re zha kuu kwathoz ndrub ne ntsowt kuu wen, tak lee re zha nak taxal lebadur kuu ntsow nyezhoob koob. ² Tak reta kuu nloot, too thib wiz telooy, ne reta kuu nzogaats too thib wiz leey roo lo xni. ³ Kona, reta kuu ni goo lo yalkow, reta zha gone lo xni, ne reta kuu mni goo xlanta, asta yek yuu to zha ne dibgan zha gab zhay.

Cho lo ndoblo tseb men

(Mt. 10:26-33; 12:32; 10:19-20)

⁴ 'Lo re goo kuu nak amig da nin. Tsebt goo ne goo re zha kuu nzhuth kwerp, tak leettsa yelo tsow zha kona yent raa kwan tak tsow zha lo goo. ⁵ Nal nin lo goo naa cho lo ndoblo tseb goo; btseb goo ne goo zha kuu tak kuth kwerp goo ne nap yalnabee par ko goo gabil. Lo zha'a btseb goo.

⁶ 'Wii goo, nthot zha gaay min bzhizh por chopka rehal. Per wlipaa na nin, nithlaazt Diox neeka thib re maa'a. ⁷ Ne asta re yitsek goo nak kwent lo Diox. Kona tsebt goo, tak masraa nataak goo nake naroob min bzhizh.

⁸ 'Wlipaa na nin, os lee thib zha gab zha lo re men lee zha nak zha da, noga na Kuu Mzin Ngok Men, gap'n lo re mandad Xut'n, lee zha nak zha da. ⁹ Per lee re zha kuu gab lo re men nagt zha, zha da, noga na gap lo re mandad chaan Xut'n nagt zha'a zha da.

¹⁰ 'Ne reta zha kuu ni diiz went lo na, Kuu Mzin Ngok Men, tetuyy Diox falta, per lee

zha kuu ngode lo Mbi Nayon chaan Diox, tuyyt Diox falt chaan zha'a.

¹¹ 'Ne leettsa yataan zha goo lo re zha kuu nak gobyern ne lo re zha kuu nak tsiin, ne lo re zha kuu nabee ta nkaltaa'aa nteedaa xkiiz Diox, tsowt goo xgab naa kwan kab goo ora, ¹² tak lee Mbi Nayon ne lo goo naa kwan kuu ndoblo goo gab goo ora.

Kwent nanzee chaan thib zha rik

¹³ Tsa lee thib zha kuu ndo xid re men nzhab lo Jesús:

—Maestr, guz lo wets'n, tsa taa zha garol herens chaan xut'n lon.

¹⁴ Jesúus mkab, ne nzhab:

—Amig, ¿cho mton lo goo par gak'n jwez o par gak'n zha kuu kiid yu?

¹⁵ Tsa lee Jesús mwii lo re men, ne nzhab:

—List gok goo, kenap goo goo, tablaazt goo keno goo masraa kwaa kuu ndoblot goo keno goo, tak nataagt re kona masraa nake yalnaban chaan goo.

¹⁶ Tsa mndaa Jesús thib kwent nanzee, ne nzhab Jesús:

—Ngoo thib zha rik, kuu kwathoz ngok yalgonn, ¹⁷ ne kwathoz ntsow zha xgab, ne nzhab zha: "¿Kwan tsow'n? Nap'tn pa kotsow'n re yalgonn da." ¹⁸ Tsa mtsow zha xgab nzhab zha: "Ne'a na kwan tsow'n. Nal luuzh'n re loo da ta ngotsow'n xoob'n ne texkwaan tedib kuu mas naro, tsa tegaay kotsow'n re yalgonn da, ne re kuu nap'n", ¹⁹ ne gap'n lo yalnaban da: "Nalsi kwathoz kuu napa, ne tegaay wu'a tyen liin, kwathoz wen bloo leettsoo'a, broxkwani, bdow ne wii". ²⁰ Per lee Diox nzhab lo zha'a: "Mbyi nad, leeka nal yaal ree yal'n kib'n yalnaban chaana, ne lee re kuu napa, ¿cho lo yaane tsaa?" ²¹ Tbaa tak re zha kuu nkaltaa naroob kwaa lo yezlyu ree, per lee lo Diox neeka thib kwaa napt zha.

Nkenap Diox re zhiinn Diox

(Mt. 6:25-34)

²² Tsa nzhab Jesús lo re zha kuu ngeteed lo Jesús:

—Tata mod nin lo goo: Tsowt goo xgab por kuu wu goo ne kuu gu goo par ban goo, ne neeka tsowt goo xgab lar kuu gok goo, ²³ tak masraa nataak yalnaban chaan goo nake kuu nzhoo goo, ne masraa nataak kwerp goo nake xab goo. ²⁴ Wii goo lo re myak, neeka nzhannt maa, neeka nthopt maa yalgonn, ne neeka ngotsowt maa yalgonn maa leen loo, per lee Xutaa kuu ndob yiba, ndaa kuu nzhoo maa. Ne masraa nataak goo nake re myak. ²⁵ Ne tegal kwathoz ntsow goo xgab zhen goo telut, per gagt raa zhen goo. ²⁶ Ne os lee goo gagt tsow goo thib kuu lut taxal koree, ¿chebee ntsow goo xgab tedib net re kwa?

²⁷ 'Wii goo naa xomod nzhen re yee kuu ndab wan. Nkeet yee tsuin ne neeka ndexkwaat yee lar. Per nin lo goo, neeka rey Salomón, kuu mdok pur lar wen, mdok xabt taxal thib re yee ree. ²⁸ Ne os lee Diox ntswow chul na re yizh kuu ndab wan naltserree, ne lee gal yee thop zhay ne teyy zhay lo ki, wlipaa na tataga taa Diox re kuu ndeche goo lo goo. ¿Chebee lutta nyelaz goo Diox? ²⁹ Kona yat leettsoo goo naa kwan wu goo ne gu goo. ³⁰ Tak lee re men yezlyu ree nkwaan re koree, per lee Xutaa ne'a naa kwan ndeche goo. ³¹ Mas wen kwaan goo nabee Diox lo goo lo reta kwaas, tsa lee Diox taa reta kuu ndeche goo.

*Keno goo kwaan leen yibaa
(Mt. 6:19-21)*

³² 'Tsebt goo, tak goo nak mbak zhiil da, tegal lutta goo, lee Xutaa nlaaz taa yibaa ta nabee Xutaa lo goo. ³³ Btho goo re kuu nap goo, ne btaa goo temi lo re prob, tabaa mod ngegotsov goo chaan goo leen bols kuu nlux, tsa keno goo chaan goo yibaa, ta gagt lowann zhay ne ta ket mbete. ³⁴ Tak ta nap goo re chaan goo, leeka ty ando leettsoo goo.

Ndoble list yetsinaa

³⁵ 'List gwatsin goo, ne list bdok goo xab goo, ne list bkee goo kandil goo, ³⁶ gok goo taxal thib mos kuu list ndo, leettsa lee patron mos bretab ngwa lo fandan, or lee patron zha teez roo yuu, lee zha lista ndo xaal roo yuu. ³⁷ Kwathoz wen nda re mos kuu list ndo leettsa lee patron mos yaad; wlipaa na nin lo goo, lee patron zha gab lo zha: "De wu'a". Ne leeka lee patron zha ko kwaas leen yann wu zha. ³⁸ Ne kwathoz wen nda re mos kuu list ndo leettsa yaad patron zha, tegal ngulal yaal o ndeyeni'a yezlyu yaad patron zha. ³⁹ Per ndoble ne goo koree: Os lee zha kuu nabee thib yuu, ne zha polar la wann liz zha, thibka list to zha ne taat zha diiz xaal wann liz zha, tsa lowann wann chaan zha. ⁴⁰ Kona noga goo list gwatsin goo, tak lee na, Kuu Mzin Ngok Men, yal'n wiz kuu ntsowt goo xgabé.

*Mos wen ne mos went
(Mt. 24:45-51)*

⁴¹ Tsa lee Pey mnaabdiz ne nzhab:
—Zha Nabee, ¿chu lo re nee mni'a kwent nanzee ree o noga lo re men mni luy?

⁴² Tsa lee Zha Nabee nzhab:

—¿Cho nak mos wen? Lee mos wen nak zha kuu mlaa patron liz patron, tsa taa zha kuu wu tedib net re mos patron, leettsa ndoble wu re mos. ⁴³ Kwathoz wen nda mos kuu ngetsov kuu nzhab patron mos lo mos, leettsa lee patron zha bretab. ⁴⁴ Wlipaa na nin lo goo, lee patron zha tsow gak zha, zha kuu nabee lo reta kuu nap patron. ⁴⁵ Per

os lee mosa tsow xgab: "Bretabt patron da nal", ne telo zha kee zhay yek tedib net mos patron, ne telo zha wu zha ne gu zha ne ke zha yalgwi, ⁴⁶ ne wiz kuu ntsowt zha xgab lee patron zha bretab, ne leettsa tsin patron zha, tsa teti patron zha, ne ko patron zha'a ta nzo re zha kuu nzhort diiz.

⁴⁷ Lee mos kuu ne'a, naa kwan mtaan patron zha tsow zha, ne mndo lista zha, ne neeka mbint zha diiz kuu mnabee patron lo zha, kwathoz kin zha zha'a. ⁴⁸ Per lee mos kuu net naa kwan mtaan patron zha tsow zha, ne mtsow zha kuu went, mas lutta yaa bins kee zha yek zha'a. Tak loka zha kuu kwaro kwaas mndaa patron lo, kwaro kwaas naab patron lo zha'a, ne lee zha kuu mkayaa naroob kwaas lo patron, tataga na-roob kwaas naab patron lo zha'a.

*Kwent chaan Jesús nzhak rol re men
(Mt. 10:34-36)*

⁴⁹ Tsa nzhab Jesús:

—Lee na ndyal mtob ki lo yezlyu ree. ¡Ne ndakn malaay mzhena bele! ⁵⁰ ¡Per ndoble riid'n yalti kuu kwathoz nagan, kuu nak taxal gak ley'n! ¡Ne dita nal kwathoz nallatt nzo leettsoon, asta yelo riid'n koree! ⁵¹ ¿Chu ntsow goo xgab lee na ndyal, tsa wen kwin re men lo yezlyu ree? Nagte tata. Sinke leen ndyal tsow rol re men. ⁵² Ne desde naltserree par delant, leen thib yuu ta nzo gaay zha, tson zha yii ne chop zha, ne chop zha yii ne tson zha. ⁵³ Tsa lee xut zha yii ne xgann zha ne lee xgann zha yii ne xut zha, ne lee ngot yii ne rtsaap, ne lee rtsaap ngot yii ne xnaa. Ne lee xnaatsaap zha yii ne zhizh ne lee zhizh zha yii ne xnaatsaap zha.

*Lee re men mnaab thib seny lo Jesús
(Mt. 16:1-4; Mr. 8:11-13)*

⁵⁴ Ne noga nzhab Jesús lo re men kuu nzi tyta:

—Leettsa ne goo lee xkow nke ta mbix wiz, mbezz goo: "Tala yi", ne tata nzhab. ⁵⁵ Ne leettsa ne goo le mbi ndroo lad sur, mbezz goo: "Kwathoz la bee nal", ne tata nzhabke. ⁵⁶ ¡Zha nkedi nak goo, zhaa kuu mbezz ne zhaa kuu ntsow goo! Nlebee goo re seny kuu nlloo lobee ne kuu nlloo lo yezlyu, ¿per xomod gagt yen goo naa cho tyemp naban goo nal?

Ndoble yaan wen goo kon zha kuu nayii ne goo

(Mt. 5:25-26)

⁵⁷ ¿Ne chebee gagt kobee goo naa kwan nak kuu wen? ⁵⁸ Os lee'a ndoble ya'a lo re zha kuu nak tsuin kon zha kuu nayii ne'a, mas wen btsow yaan wen goo rop goo leettsa ndo goo net, tsa teriitd zha lu yuulow, ne tsa lee zha kuu nak tsuin taat zha lu lo zha kuu nkenap tsib, tsa ko zha'a lu

tsib. ⁵⁹ Tak wlipaapaa na nin lo'a, roota tsib, asta yelo kizha kuu ndoblo'a kizha.

13

Ndoblo tsee men mod went kuu nak men

¹ Ne leeka thib re wiza, ngwa chop tson zha nzhab lo Jesús, lee Pilat mbeth chop tson zha yezlyu Galilea, ne mchuuxnit Pilat ren re zha'a kon ren re maa kuu mndaa re zha'a lo Diox.

² Tsa nzhab Jesús lo re zha:

—¿Kwan ntsow goo xgab? ¿Chu ntsow goo xgab tata mzhaak re zha'a, tak masraa falt ndab zha nake tedib net re zha yezlyu Galilea? ³ Per lee na ni lo goo, nagte tata; ne os lee goo laat goo re mod went kuu nak goo, ne yelaazt goo Diox, noga goo tath goo. ⁴ Ne, ¿kwan ntsow goo xgab? Leettsa mla thib yuu naro dits re tsinbtson zha, thib ta le Siloé ne nguth re zha, ¿chu ntsow goo xgab masraa ndab re zha'a falt nake re zha yez Jerusalén? ⁵ Bren ganin lo goo, nagte tata; os lee goo laat goo re mod went kuu nak goo, ne yelaazt goo Diox, noga goo gath.

Kwent nanzee chaany ya ig kuu ndaat xle

⁶ Tsa lee Jesús nzhab tedib kwent nanzee lo re zha, ne nzhab Jesús:

—Thib mbyi mkeno thib xann ya ig lo yu zha ta nzhanh zha luts ub. Ne ngwa zha ngwakwaan zha ig lo ya, per neeka thib ig mzalt lo zha. ⁷ Tsa nzhab zha lo zha kuu nkenap yu zha: “Wii, nda'a tson liin thibka nyal'n nyaadkwaan na xle lo ya ree, per neeka thib welt nzalt'n xle lo ya. Bgay tak ntetsaay yu da.” ⁸ Per lee zha kuu nke tsin lo zha, nzhab: “Zha Nabee, btaane tedib liin, nal teleen yu xanne ne gon bewgwe, ⁹ ne os leey taay xle ya wene, per os leey taate xle tsa ga nay”.

Jesús mtegwe thib ngot wiz kuu ndroxkwani re zha Israel

¹⁰ Jesús mloo lo re men ta nkaltaa zha nteeed zha xkiz Diox wiz kuu ndroxkwani zha. ¹¹ Ne tyo ndo thib ngot kuu nda'a tsinbtson liin ndakti lo thib mbi went, kuu ndaat diiz li dits ngot. ¹² Ne leettsa mwii Jesús zha, tsa mrez Jesús zha, ne nzhab Jesús lo zha:

—Mgwe'a lu lo yiz went kuu mzhaaka.

¹³ Ne mxoob Jesús yaa Jesús dits zha, ne oraaka lee dits zha mli, ne mndelo zha mbil zha lo Diox. ¹⁴ Tsa lee zha kuu nabee ta nkaltaa re zha nzholzha lo Diox, mkezhyan zha, tak lee Jesús mtegwe thib ngot wiz kuu ndroxkwani re zha, tsa nzhab zha'a lo re men:

—Xoop wiz nke men tsin thib sman ne tsow men re kwaaw, tsa ndoblo goo yaad goo tsa tegwe zha goo. Per yaadt goo wiz kuu ndroxkwanaa.

¹⁵ Tsa lee Jesús mkab ne nzhab:

—¿Zha nkedi nak goo, zhaa kuu mbezz goo ne zhaha kuu ntsow goo! ¿Chu nxagt goo ngon goo o burr goo, wiz kuu ndroxkwanaa, ne nyano goo maa nzhuu maa nit? ¹⁶ Ne lee ngot ree, nak zha raz chaan Abraham, ne nda'a tsinbtson liin naliib zha lo Maxuuy, ne ¿chu ndoblot laa ngot nal wiz kuu ndroxkwanaa?

¹⁷ Leettsa ngwalo nzhab Jesús kona, reta zha kuu nayii ne Jesús mthoy zha, per lee re men kwathoz naley ngoo leettsoo mwii re kuu thoz kuu mtsow Jesús.

*Kwent nanzee chaan mbiz mostaz
(Mt. 13:31-33; Mr. 4:30-32)*

¹⁸ Tsa lee Jesús nzhab lo re men:

—Nal leen ta tedib kwent nanzee lo goo, chaan ta nabee Diox. ¹⁹ Leey nak taxal thib mbiz mostaz kuu ngonn thib mbyi lo yu mbyi. Mlene, mzhene ne ngoke thib ya, tsa lee re min mdexkwaa lyaat lo re zhite.

²⁰ Noga nzhab Jesús:

—Nal lee na ta tedib kwent nanzee lo goo, tsa ne goo xomod nak ta nabee Diox. ²¹ Leey nak taxal lebadur kuu mloo thib ngot leen tson medid arin, tsa tsowe yezhoob koob.

Pwert naya

(Mt. 7:13-14, 21-23)

²² Ne leettsa ndo Jesús net nda Jesús Jerusalén, tsa mloo Jesús lo re zha kuu nzo re yez ne lo re zha kuu nzo re ranch ta ndriid Jesús. ²³ Tsa lee thib zha mnaabdiz lo Jesús, ne nzhab:

—Zha Nabee, ¿chu lut zha nak zha kuu tsow gan yalnaban kuu thitanax?

Tsa lee Jesús mkab ne nzhab:

²⁴—Bxek goo tsa tetsov goo gan tab goo roo pwert kuu naya, tak wlipaapaa na nin lo goo, kwathoz zha kwaan zha tab zha, per tsowt zha gan tab zha.

²⁵ Ne leettsa lee zha kuu nak chaan yuu yeteli tow roo yuu, tsa lee re goo kuu yaan lee teez goo roo yuu, ne gab goo: “Zha Nabee, xaal roo yuu lo nee”. Tsa lee Zha Nabee kab lo goo ne ne: “Nlebeet'n goo, ne neeka net'n naa cho nak goo”. ²⁶ Tsa lee re goo telo ne lon: “Ndow nee kon lu ne ngwii nee kon lu, ne lu mloo lo re tawlzw nee re net”. ²⁷ Per lee na ni lo re goo tedib welt: “Nlebeet'n goo, neeka net'n naa cho zha goo; beche goo lon, zha kuu ntsow kuu went”. ²⁸ Ne tsa gonn goo ne tub keley goo, or wii goo Abraham, Isaac, Kob ne reta profet, re zha kuu nzo yibaa ta nabee Diox, ne lee re goo yaan lee. ²⁹ Tak kwathoz re zha kuu nzo dib naxta lo yezlyu, yaad tob roo mes leen yibaa ta nabee Diox. ³⁰ Ne nzo chop tson goo kuu nataagt nal, gak nataak tsya; ne lee re goo kuu nataak nal, lee tsya gak goo zha nataagt.

*Mlat leetsoo Jesús mne Jesús zha yez Jerusalén
(Mt. 23:37-39)*

31 Ne lee chop tson fariseo mbig lo Jesús, ne nzhab:

—Broo nzhee ne tyee, tak lee rey Herodes nlaaz kutha.

32 Lee Jesús mkab ne nzhab:

—Gwa goo ne guz goo lo mbeeta: “Naltserree ne yee gor re mbi fyer, ne tegwene mbyiz, ne lee wiz yelo luuzh'n rtsin na”.

33 Per ndoblo ndaka na xnet'n, naltserree yee ne wiz. Tak ndoblot gath thib profet ta nagt Jerusalén.

34 †Men Jerusalén, men Jerusalén, goo kuu nzhuth re profet ne nkee ke yek re zha kuu ntaal Diox lo goo! †Tyen welt ngwalaz'n gathop'n re zhiinn goo, taxal nthop ngid re bich ngid xann xiil ngid, per mzhalyt goo!

35 Wii goo, lee ta nzo goo yaan wan; ne wlipaan na nin lo goo, bret raa goo wii goo na, asta leettsa tsin wiz kuu gab goo: “Kwathoz wen nak zha kuu ndyaad kon yalnabee chaan Zha Nabee!”

14

Jesús ngwa ndow liz thib fariseo

1 Thib wiz sabd, lee Jesús ngwa ndow liz thib fariseo, kuu nabee lo re fariseo, ne lee tedib net fariseo ngewii naa kwan tsow Jesús. 2 Ne tyo ndo thib zha kuu ndak yiz ki. 3 Tsa lee Jesús mnaabdiz lo re maestr chaan ley ne lo re fariseo, ne nzhab:

—¿Kwan nzhab lo ley? ¿Chu tak tegwe men thib mbyiz wiz sabd o gagte?

4 Per mkabt re zha. Tsa lee Jesús mdiinn mbyiza ne mtegwe Jesús zha ne mtaal Jesús zha ndya zha. 5 Tsaraa nzhab Jesús lo re fariseo:

—Os lee thib goo nap thib xgann o thib ngon, ne la xgann goo o ngon goo leen pos wiz sabd, ¿chu koot goo xgann goo o ngon goo wiz sabd?

6 Ne neeka thib zha ngogt gakab lo Jesús.

Re zha kuu mrez zha ya lo fandan

7 Or mwii Jesús lee re zha kuu mrez zha lo ani, ngekwaan zha thib ta mas wen tob zha, tsa mre Jesús mni Jesús kon diiz nanzee lo re zha tedib welt, ne nzhab Jesús:

8 —Leettsa lee thib zha kweza ya'a fandan, kwiita ta mas nataak toba, tak cha tsin tedib zha kuu mas nataak nake lu, 9 tsa lee zha kuu mreza big ne lo'a: “Amig taa ta ndoba tob zha ree”. Tsa nathoy nzhabaka yeteli'a ne ya'a toba lo bank kuu nzi asta dits re men. 10 Kona mas wen leettsa kwez zha lu ya'a lo thib fandan, asta par dits re zha toba, ne leettsa yaad zha kuu mreza, tsa ne zha lo'a: “Amig, briid toba asta delant”. Tsasi gaka zha kuu nataak taxal re zha kuu nzi ta nataak. 11 Tak lee zha kuu ntsow

nataak leeka lee, zha'a gak zha kuu nataagt, ne lee re zha kuu ntsow nataagt leeka lee, zha'a gak zha nataak.

12 Tsa nzhab Jesús lo zha kuu mtsow fandán:

—Leettsa tsowa thib ani, kwezta re amiga, neeka re wetsa, neeka re zha liza, ne neeka re zha rik kuu nzo gaxta liza; tak reta zha'a tak kwez zha lu wu'a liz zha, ne tata kix zha kuu ndow zha lo'a. 13 Kona mas wen leettsa tsowa thib ani, brez re prob, re tank, re mthans ne re zha syeg, 14 tsa lee Diox taa re kuu wen lo'a, tak lee re zha'a gagt kix zha re kuu ndow zha lo'a, per leettsa tsin wiz kuu roban re zha kuu nali ngok lo Diox, tsa lee'a kayaa kuu wen kuu mtsowa gan.

Kwent nanzee chaan rtsee ro

15 Leettsa mbín thib zha kuu ndob roo mes kona, tsa nzhab zha lo Jesús:

—Kwathoz wen nda re zha kuu tab wu pan leen yibaa ta nabee Diox.

16 Tsa lee Jesús mkab lo zha'a ne nzhab:

—Thib mbyi mtsow thib rtsee ro, ne mrez zha kwaro men. 17 Ne or mzin or kuu wu rtsee re men, tsa mtaal zha mos zha ngwane lo re zha kuu mrez zha: “De goo, tak reta kuu nziba”. 18 Per lee reta zha mndelo zha nzhab zha lo mos gagt ya zha. Lee thib zha nzhab: “Ngwalota mzhiih thib le yu, ne ndeche yatwiin loy, ta mod gagt yan; gaba lo zha kuu mtaala tsow zha perdon na”.

19 Lee tedib zha nzhab: “Ngwalota mzhiih gaay net ngon, kona gagt yan; gaba lo zha kuu mtaala tsow zha perdon na”. 20 Ne lee tedib zha nzhab: “Ngwalota mtseyan, kona gagt yan”. 21 Tsa lee mos mre ne mndaa kwent kona lo patron. Tsa lee patron mos kwathoz mndak leettsoo, ne nzhab lo mos:

“Lijer gwa re net to ne re net thib dita yez, ne yaadno'a re zha prob, zha tank, zha mthans ne re zha syeg”. 22 Ne leettsa mretab mos nzhab mos: “Zha Nabee, mtsowa na kuu mnabbee'alon, per bee nzo raa ta tob masraa men”. 23 Tsa lee patron nzhab lo mos: “Gwa re net yez ne re net kuu nda wan, ne btsow fwers re zha tsa yaad zha, tsa tse liz'n. 24 Tak lee na ni, neeka thib re zha kuu mrez'n ner, wut kuu mtsow'n.”

Kuu ndoblo tsow zha kuu ndeke dits Jesús

25 Ne kwathoz men mndeke dits Jesús, tsa mtsere lo Jesús ne nzhab Jesús lo re zha:

26 —Os lee thib zha nlaaz teke dits'n, ne nket leettsa zha na masraa nake xut zha ne xnaa zha, ne tsaal zha, ne zhiinn zha, ne wets zha ne btan zha ne leeka lee zha, gagt gak zha, thib zha kuu teke dits'n. 27 Ne os kot zha leettsa zha thib gath zha tak nyelaaz zha na, ne teket zha dits'n, gagt gak zha thib zha da. 28 Tak os lee thib zha nlaaz ta thib yuu, ndoblo koo zha kwent naa chu tegaa temi lo zha par taa zha yuu. 29 Tak os lee zha

tob zha simyent ne tsowt zha gan taa zha yuu, tsa lee re zha kuu wiyi telo zha zhizno zha zha,³⁰ ne gab zha: "Anta mtob zha baa simyent ne mtsowt zha gan gata zha yuu".³¹ Ne tataka, os lee thib rey, nlaaz yo kon tedib rey, ner ndoblo tob rey ne tsow rey xgab, naa chu tak yo rey kon tsii mil soldad chaan rey, kon tedib rey kuu ndyaad kon thib gal mil soldad.³² Ne os lee rey ne rey gagg yo rey kon tedib reya; leettsa lee tedib reya bee ndo tith, tsa ndoblo rey taal thib zha kuu ya ni lo tedib reya, tsa wen kwin re zha ne yot zha.³³ Ne tataka, os lee goo laat goo re kuu nap goo, gagg gak goo zha kuu teke dits'n.

*Wen ted leettsa natsig ted
(Mt. 5:13; Mr. 9:50)*

³⁴ 'Wen ted leettsa natsig ted, per os lee ted natsigt raa ted, gagg raa gak natsig ted tedib welt.³⁵ Neeka lortsin raa ted par gak ted beww, neeka par gake yu sinke tabaata kobi zhay. ¡os lee goo ndob nza goo ndoblo yen goo koree!

15

Kwent nanzee chaan mbak zhiil kuu mndab

(Mt. 18:10-14)

¹ Reta zha kuu ntsow kobral temi chaan yezlyu kuu nhax lo zha Roma nzi tyu, ne re zha kuu went nak, mbig re zha tsa gon zha kuu ni Jesú. ² Per lee re fariseo ne re maestr kuu nloo xkiiz Diox, nlooz zha Jesú ne mbez zha:

—¡Zha ree nkayaa re zha kuu nap falt ne noga nhown zha kon re zha kuu ndab falt!

³ Tsa lee Jesú nhhab tedib kwent nanzee lo re zha, ne nhhab Jesú:

⁴ —¿Cho thib zha, os nap zha thib gayoo mbak zhiil ne mtab zha thib maa? ¿Chu laat zha re thap gal tsiiinbthap maa ne yakwaan zha maa kuu mndaba, asta yetsal maa lo zha?⁵ Ne leettsa mzaal maa lo zha, kwathoz laz zha ne mxoob zha maa dits yen zha ne ndyaadno zha maa,⁶ ne leettsa mzin zha liz zha, tsa mkaltaa zha re kuu nzaal leettsou zha ne kon re zha kuu nzo gax liz zha, ne mbez zha lo re zha'a: "Naley bloo goo leettsou goo kon na, tak mzala na mbak zhiil da kuu mndab".⁷ Per lee na ni lo goo, tabaaga naley nzo leettsou re zha kuu nzo yibaa, leettsa lee thib zha kuu ndab falt, ntsee zha mod went kuu nak zha, ne tsowt raa zha kuu went ne nyelaaz zha Diox, nake thap gal tsiiinbthap zha kuu ndak wen nak, kuu ndechet tsee mod went nak lo Diox.

Kwent nanzee chaan temi kuu mndab

⁸ Noga mni Jesú tedib kwent nanzee lo re zha, ne nhhab Jesú:

—Os lee thib ngot nap tsii temi plat ne tab ngot thibe, ¿kwan ntsow goo xgab? ¿Chu

keet ngot kandil ne loob ngot yuu wen wen, asta yetsale lo ngot?⁹ Ne leettsa mzale lo ngot, tsa mbez ngot re ta got ngot kuu nzaal leettsou ngot ne lo re zha kuu nzo gax liz ngot, ne mbez ngot lo re zha: "Naley bloo goo leettsou goo kon na, tak mzala na temi da kuu mtab'n".¹⁰ Ne leen ni lo goo, leeka tata naley nzo leettsou re mandad chaan Diox kuu nzo yibaa, leettsa lee thib zha kuu ndab falt, nlaa zha re kuu went kuu mtsowt zha ne nyelaaz zha Diox.

Kwent nanzee chaan zha kuu mkeno chop xgann

¹¹ Noga nhhab Jesú tedib kwent nanzee, ne nhhab Jesú:

—Ngoo thib mbyi kuu mkeno chop xgann.¹² Ne lee xgann mbyi kuu mas mndyeen, nhhab lo mbyi: "Pa, taa kuu ndoblon diinn na". Tsa lee xut zha mtsow garol chaane lo rop xgann zha.¹³ Ne leettsa mriid lut tyemp lee xgann mbyi kuu mas mndyeena, mtho zha reta kuu mndaa xut zha lo zha, ne mroo zha nda zha tith. Ne tya mluux zha reta temi zha kuu ndano zha, lo re kuu went kuu yezlyu ree.¹⁴ Ne leettsa ngwalo mluux zha reta temi zha, mla win yezlyu'a, ne mzhaak zha win.¹⁵ Tsa ngwakwaan zha tsii ke zha lo thib zha yeza, ne lee zha yeza mtaal zha tsa kenap zha nguch.¹⁶ Ne tak kwathoz nlann zha, ngwalaaz zha gawu zha re ton kuu nhown guch, per yent cho mndaay gawu zha.

¹⁷ 'Leettsa myeen zha kuu ngeriid zha, tsa mtsow zha xgab, ne nhhab zha: "¡Plapaa re zha kuu nke tsii liz xut'n, nap zha kuu nhown zha ne asta ndrohoobee lo zha! ¡Ne lee na mer gath lo win nzhee!"¹⁸ Nal bretab'n ne ndyan lo xut'n, ne gap'n lo xut'n: "Pa, mndan falt lo Diox ne lo'a,¹⁹ ndoblot raa na rolen xganna, sinke bt-sow'n taxal thib mosa".

²⁰ 'Tsa ngoo zha net ne ndya zha liz xut zha. Ne leettsa tithe raa ndyaad zha, lee xut zha mwii lee zha ndyaad, tsa mlat leettsou xut zha mne zha. Ne mrozhonn xut zha nda lo zha ne mdeez xut zha zha, ne mdow xut zha chut kwat zha.²¹ Tsa nhhab zha lo xut zha: "Pa, mndan falt lo Diox ne lo'a, ndoblot raa na gak'n xganna".²² Per lee xut zha mnabee lo re mose ne nhhab: "Deno goo lar kuu mas wen ne btegok gooy xgann na, ne bloo goo thib ani kwen yaa zha ne bkee goo labiyid nii zha.²³ Ne gwaxii goo thib la ngon kuu mas natsi, ne beth goo maa dowaa, tsa tsowaa ani,²⁴ tak lee xgann na kuu ngutha, mre mroban, mndab zha per mre mzaal zha." Tsa mndelo re zha mtsow zha ani.

²⁵ 'Ne lee xgann mbyi kuu nera ndo wan, ne or ndyaad zha ndetsin gax zha liz zha, mbin zha nhool musk ne lee re men

ngekani.²⁶ Tsa mrez zha thib mos xut zha, ne mnaabdz zha lo mos, naa kwan ngetsovut zha.²⁷ Tsa lee mos nzhab lo zha: "Lee wetsa kuu nda'a mre, ne lee xuta mnabee mbeth zha ngon kuu mas natsi, tak nagwe wetsa ne wen wetsa mzin wetsa".

²⁸ Per lee wetsa zha kuu bye'a kwathoz mkezhyan, ne mzhalyt zha gataab zha leen yuu. Tsa lee xut zha mroo leen yuu ne ngwa nzhab lo zha, tsa tab zha leen yuu.²⁹ Per lee zha nzhab lo xute: "Tyen liin nda nkeen tsiiin lo'a ne thibka nzhon na diiz lo'a, ne neeka thib mbak zhii lut ter taa'a lon, par tsow'n ani kon re zha kuu nzaal leettsoon.³⁰ Ne lee nal mzin xganna kuu legal mluux temi'a lo re ngot kuu ntho kwerp lo re men, ne mbetha ngon kuu mas natsi."

³¹ Tsa lee xut zha nzhab lo zha: "Xganna, thibka ndo'a lon, ne reta kuu nap'n nak chaana.³² Per nal ndoblo tsowaa ani ne naley yoo leettsoo'aa, tak lee wetsa kuu ngutha mroban, mndab zha per nal mzala zha."

16

Kwent nanzee chaan mos kuu went nke tsiiin

¹ Tsa lee Jesús nzhab lo re zha kuu ngeteed lo Jesús:

—Ngoo thib zha rik kuu mkeno thib mos kuu nabee re chaan zha. Ne lee tedib zha ngwa lo zha rika, ne nzhab lo rik: "Lee mosa ngeluuz re chaana".² Tsa mrez rik mos kuu nke tsiiin lo rik, ne nzhab rik lo mos: "Kwan re kuu nzhon na kwent chaana, ney lon. ³ Kwan ngetsowa kon re chaan na? Tak gaggat raa gaka mos da." ³ Tsa mnda leettsoo mos ne nzhab mos: "Kwan tsow'n nal, tak lee patron da taat raa tsiiin keen? Gaggat keen tsiiin, ne nthoy'n naab'a gon.⁴ Ah, ne'a na kwan tsow'n, tsa taa re men kuu wun, leettsa napt raa na tsiiin keen."⁵ Tsa mrez mos thibga thibga re zha kuu ndab lo patron mos, ne nzhab mos lo zha kuu ner: "Plal ndaba lo patron da?"⁶ Tsa lee zha'a mkab ne nzhab: "Thib gayoo barril aseyt ndab'n". Tsa lee mos nzhab lo zha: "Lee xkeetsa nzhee, bluuuzhe ne btexkwaa tedibe ne bkee loy leey nak garol gayoo barril aseyt".⁷ Tsa mnaabdz mos lo tedib zha ne nzhab mos lo zha: "Plal ndaba?" Lee zha'a mkab ne nzhab: "Thib gayoo sak nzob xtil ndab'n". Tsa lee mos nzhab lo zha: "Lee xkeetsa nzhee, bluuuzhe ne btexkwaa tedibe, ne bkee loy leey nak thap gal sak nzob xtil".⁸ Ne leettsa mne patron mos kona, tsa nzhab patron: "Kwathoz nalatts zha baa, tsa naa xomod rid zha bluz". Tak lee re men yezlyu ree mas nalatts yek zha lo re kuu yezlyu ree nake re zha kuu nzi lo xni.

⁹ Tsa lee Jesús nzhab:

—Per lee kuu ganin lo goo nak, blortsin goo re kuu nap goo lo yezlyu ree, tsa tsow goo gan amig goo. Tsa leettsa lux re kuu yezlyu ree, napa goo cho kayaa goo leen thib yuu kuu thitanax luxt.¹⁰ Loka zha kuu wen nke tsiiin tegal kon lut kwa, tataka wen ke zha tsiiin kon naroob kwa, ne lee zha kuu nket tsiiin wen kon lut kwa, tataka went ke zha tsiiin kon naroob kwa.¹¹ Ne os lee goo went mke goo tsiiin kon temi yezlyu ree, ¹² cho taa re kuu wlipaa lo goo tsa?¹² Ne os lee goo mtsowt goo nali lo re kuu nagt chaan goo, ¹³ cho taa kuu ndoblo kayaa goo lo goo tsa?¹³ Neeka thib mos gaggat ke tsiiin lo chop patron, tak teyii mos ne mos thib zha ne kelaaz mos tedib zha, lee lo thib zha wen ke mos tsiiin ne laa mos tedib zha. Gaggat teke goo xnet Diox ne teke goo dits re kuu yezlyu ree.

¹⁴ Per lee re fariseo mbin re kona, ne mzhizno zha Jesús, tak kwathoz ndablaaz zha temi.¹⁵ Tsa nzhab Jesús lo re zha:

—Leeka goo mbez goo lo re men lee goo wen nak, per lee Diox nlebee re xgab chaan goo; tak lee re kuu ndak re men nataak, nkap leettsoo Diox ne Diox re kona.

Xomod nak ley ne xomod nabee Diox

¹⁶ Asta leettsa mzin Juan kuu mtsowleyy re men, lee ley ne re kuu nzhab re profet mlortsin. Desde wiza asta nal ngetaa zha kwent Diiz Chul naa xomod nabee Diox leettsoo re men, ne reta zha nlaaz yelaaze.¹⁷ Mas nagant lux yezlyu ne yibaa, nake gaggat lut kuu nke lo ley chaan Diox.

Jesús mloo went laa zha tsaal zha (Mt. 19:1-12; Mr. 10:1-12)

¹⁸ Os lee thib mbyi laa tsaal, ne kaa mbyi tedib ngot, ndaa mbyi falt lo Diox, ne loka mbyi kuu tseyaa kon ngot kuu mlaa zha, noga mbyi'a ndaa falt lo Diox.

Zha rik ne Las

¹⁹ Jesús mndaa tedib kwent nanzee, ne nzhab Jesús:

—Ngoo thib zha rik kuu nhok lar wen, ne ganda wiz ntsow ani ne pur kuu wen nzhow rik.²⁰ Ne noga ngoo thib mbyi prob kuu le Las, kuu dita mzaal yaaz, ne nyatob Las gax roo pwert zha rika, naab Las gon.²¹ Lee mbyi'a nlaaz tse leettsoo kon re kuu ndrethin roo mes rik. Ne lee re mbak nteeloz lo re yaaz kuu ndo mbyi'a.²² Per thib wiz lee Las nguth, ne lee re mandad chaan Diox mndeno Las ta nzo Abraham. Ne leettsa mzin wiz lee rik nguth ne mkaats zha rik.

²³ Ne leettsa kwathoz ndakti rik gabil, tsa mlap lo rik ne mwii rik lee Abraham ndo tith, ne lee Las ndo lo Abraham.²⁴ Tsa dib gan rik nzhab rik: "Xut'n Abraham, blat leettsoo'a ne'a na. Btaal Las tsa tenit Las

yek kwen yaa Las, ne tee Las kwen Las lo loz'n, tsa rozhylaloz'n, tak kwathoz ndaktin lo bel nzhee." ²⁵ Per lee Abraham nzhab lo rik: "Xgann na, btelaaz mkeno'a lu reta kuu mndablaaza lo yezlyu, ne lee Las neeka thib kuu mkenot Las lo yezlyu, per nal lee Las naley nzo leettsou no nzhee, ne lee lu ndakti baa." ²⁶ Ne noga, nzhee nzo thib ble thoz kuu ntow lo goo ne lo nee, tsa neeka thib zha kuu ndo nzhee gagt rid baa tegal nlaaz zha, ne neeka thib zha kuu ndo baa, gagt yaad nzhee tegal nlaaz zha."

²⁷Tsa lee zha rik mkab ne nzhab: "Xut'n Abraham, naab'n lo'a, tsa taala Las ya liz xut'n, ²⁸tak nap'n gaay wets'n, ne nlaz'n ni Las lo re zha, tsa yaadt zha nzhee, tak kwathoz nati nzhee". ²⁹ Per lee Abraham nzhab lo rik: "Napa zha re kuu mkee Moisés ne re kuu mkee re profet; ndoblo gon zha diiz re kuu nzhab re zha'a". ³⁰Tsa lee rik mkab ne nzhab: "Xut'n Abraham, gont zha diize, per os lee thib zha kuu ngutha ya lo re zha, tetsee zha mod went kuu nak zha ne tsowt raa zha kuu went ne teyelaaz zha Diox". ³¹ Per lee Abraham nzhab lo rik: "Os lee zha nlaazt zha gon zha diiz, re kuu nzhab Moisés ne re kuu nzhab re profet kuu ngoo ndala, gont zha diize, tegal thib re zha kuu ngutha roban ne yataa kwent lo zha".

17

*Xomod ndoblo yelaaz zha Diox
(Mt. 18:6-7, 21-22; Mr. 9:42)*

¹ Jesúus nzhab lo re zha kuu ngeteed lo Jesúus:

—Wli too kuu tsow par tsow re zha kuu nyelaaz Diox kuu went: ¡Per aka nalatt rid re zha kuu tsow par la re zha kuu nyelaaz Diox lo kuu went! ²Mas wen gakegaa zha thib ke molin yen zha, ne kobi zha zha leen nitdoo, nake tsow zha par tsow thib re zha kuu nyelaaz Diox kuu went. ³¡Kenap goo goo! Os lee wets goo taa falt lo goo, ndoblo kox zha lo goo, os lee zha laa zha re mod went kuu nak zha, tee bnithlaaz goo kuu mtsow zha lo goo. ⁴Ne tegal os gaz welt ndaa zha falt lo goo thib wiz, ne os tataka gaz welt yaad zha thib wiz ne zha lo goo: "Tsowt raa nay", ndoblo nithlaaz goo re kuu mtsow zha lo goo.

Kuu mnaab re zha kuu ngeteed lo Jesúus

⁵Tsa lee re zha kuu ngeteed lo Jesúus nzhab lo Jesúus:

—Btsow tsa masraa yelaaz nee lu.

⁶Tsa lee Zha Nabee mkab lo re zha, ne nzhab:

—Os lee goo nyelaaz goo na, mase lut taxal na thib mbiz mostaz, tak gab goo lo ya ree: "Beche nzhee ne to leen nitdoo", ne lee ya ton diiz lo goo.

Kuu ndoblo tsow zha kuu nak mos

⁷'Os lee thib goo nkено thib mos kuu ndyaad ngwa gonn gon gonn o ndyaad ngwatewoy maa wan, chu mbez goo lo mos: "Briid tob tsa wu'a". ⁸Ntsowt gooy, sinke leel mbez goo lo mos: "Btexkwaan kuu wrtseen, ne list to'a tsa ko'a kwaa leen yann, or wun ne gun. Tsaraa wu'a ne gu'a." ⁹¿Chu ndaa patron texkix lo mos, tak mtsow mos kuu mnabee patron lo mos? Wlipaa ndaat zha texkix lo mos. ¹⁰Tataka goo, leettsa yelo tsow goo kuu nabee Diox tsow goo, tsa gab goo: "Lee'aanak mos kuu nataagt, tak beeta mtsowaa kuu ndoblo aa tsowaa".

Jesúus mitegwe tsii zha kuu ndak yiz kuu ndezhoz

¹¹Leettsa nda Jesúus yez Jerusalén, tsa mriid Jesúus yezlyu chaan zha Samaria ne yezlyu chaan zha Galilea. ¹²Ne leettsa mzin Jesúus thib ranch, tsa mzin tsii mbyi kuu ndak yiz kuu ndezhoz cho lo Jesúus. Ne tithxa mrin re zha lo Jesúus. ¹³Tsa mrez re zha lo Jesúus, ne nzhab zha:

—¡Maestr! ¡Jesúus! ¡Blat leettsoo'a ne'a nee!

¹⁴Leettsa mwii Jesúus re zha; tsa nzhab Jesúus lo re zha:

—Gwa goo, gwaloogoo goo lo ngwleyy.

Ne leettsa ndo re zha net nda zha, ora mgwe re zha. ¹⁵Ne lee thib re zha'a myeen zha lee zha mgwe, tsa mretab zha ne mbil zha lo Diox kon dib ndroo leettsou zha, ¹⁶tsa mtobxub zha ne mkiits zha yek zha lo yu, ne mndaa zha texkix lo Jesúus.

Ne zha Samaria nak zha'a. ¹⁷Tsa lee Jesúus nzhab lo zha'a:

—¿Chu nagt tsii goo mgwe? ¿Ma tedib yee zha? ¹⁸Beeta zha tith ree mretab ne mndaa texkix lo Diox.

¹⁹Tsa nzhab Jesúus lo mbyi'a:

—Gwateli ne tyee. Tak ngwalaaza Diox kona mgwe'a.

*Xomod bretab Jesúus, Kuu Mzin Ngok Men
(Mt. 24:23-28, 36-41)*

²⁰Tsa lee re fariseo mnaabdiz lo Jesúus ne nzhab:

—¿Pol tsin yahnabee chaan Diox?

Tsa mkab Jesúus, ne nzhab Jesúus:

—Leettsa yaad yahnabee chaan Diox, loote lo goo. ²¹Neeka yent cho gab: "¡Leey lo nzhee! O ¡Leey ndo baa!" Tak lee yahnabee chaan Diox mzin gaxa lo goo.

²²Tsa nzhab Jesúus lo re zha kuu ngeteed lo Jesúus:

—Tetsin wiz kuu tak re goo, malaay wii goo wiz kuu nabee na, Kuu Mzin Ngok Men lo yezlyu ree, per wiit gooy. ²³Tyen zha gab: "Lee zha ndo nzhee, lee zha ndo baa", per neeka yat goo ne neeka teket goo dits zha. ²⁴Tak taxal nla xni bel bti dita lo yezlyu, tata gak wiz kuu lee na, Kuu Mzin Ngok Men bre yaad. ²⁵Per ner ndoblo riid'n kwathoz yalti, ne lee re men kuu nzi wiz ree kayaat zha na.

²⁶ Leeka taxal ngok re wiz kuu mban Noé, tataka gak wiz kuu bretab na, Kuu Mzin Ngok Men. ²⁷ Ne re wiz kuu mban Noé, leettsa terka la yi luux re kwa, lee re men nzi nzhow ne nzhuu, ntseyaa zha ne ntetseyaa zha re zha, asta wiz kuu lee Noé mndaab leen bark, ne lee yi mndelo mla mluux re men. ²⁸ Ne leeka tata ngok re wiz kuu mban Lot, lee re men nzi nzhow ne nzhuu, ntho zha ne ndi zha, rzhann zha ne nta zha liz zha. ²⁹ Per lee wiz kuu lee Lot mroo yez Sodoma, lee ki ne azufre mroo lobee, ne taxal yimlayyeza, ne mluuzhe reta men yez Sodoma. ³⁰ Ne tataka gak wiz kuu leettsa lee na, Kuu Mzin Ngok Men bretab. ³¹ Lee wiza loka zha kuu ndob yek yuu, lat zha koo zha re chaan zha kuu nzotsow leen liz zha, ne lee re zha kuu ndo wan bret zha liz zha.

³² ¡Btelaaz goo naa kwan ngok kon tsaal Lot!

³³ 'per os lee thib zha gath zha tak nyelaaz zha na, ne nlaaz zha gon zha diiz xkiz'n, tet-sow zha'a gan yalnaban kuu thitanax, per lee zha kuu nzeb gath zha tak nyelaaz zha na, tsowt zha'a gan yalnaban kuu thitanax. ³⁴ Ne wlipaa na nin lo goo, lee yaala lee chop zha nax lo thibka luun, thib zha teno zhalee tedib zha yaanka. ³⁵ Lee chop ngot ngetoo nil, thib ngot teno zha lee tedib ngot yaanka. ³⁶ Lee chop mbyi kuu nke tsiiin wan; thib zha teno zha lee tedib zha yaanka.

³⁷ Tsa mnaabdiz zha lo Jesús, ne nzhab zha:

—¿Pa gak re koree, Zha Nabee?

Lee Jesús mkab, ne nzhab:

—Ta nax re maa nguth, tya nkaltaa re ngol.

18

Kwent nanzee chaan thib byud kon thib jwez kuu went nak

¹ Noga mndaao Jesús tedib kwent nanzee lo re zha, tsa ne re zha thibka ndoblo tedib zha lo Diox, ne laat zha tsow zhay. ² Tsa nzhab Jesús:

—Thib welt thib yez ngoo thib jwez kuu nzebt ne Diox ne neeka ndat leettsoo zha ne zha re men. ³ Ne leeka yeza ngoo thib byud kuu ngyo kon tedib zha, ne thibka nya ngot lo jwez ne mbez ngot lo jwez: “¡Btsw ayud'n ne bloo zha kuu nayii nen tsibi!” ⁴ Ne nda'a thibana Welt nlaazt jwez tsow jwez kas ngot, per mzin thib wiz mtsow jwez xgab, ne nzhab jwez: “Neeka nzebt'n nen Diox ne neeka ndat leettsoon nen re men, ⁵ per tak lee byud ree thibka ngegozhon, kona tsow'n ayud zha, tsa yaadt raa zha, tak cha yeche leettsoon nen zha”.

⁶ Tsa lee Zha Nabee nzhab:

—Bkenza goo kuu nzhab jwez kuu went nak. ⁷ Kona nin, wlipaa tetsow Diox ayud re zha kuu mli Diox ne ton Diox xkiiz re

zha kuu tse ne yaal naabe lo Diox, ne nxek leettsoo Diox ne Diox zha. ⁸ Wlipaa na nin lo goo, wlipaa tetsow Diox ayud goo leettsa naab gooy lo Diox. Per leettsa yal na, Kuu Mzin Ngok Men lo yezlyu ree, ¿nabet naa chu tetsal raa na zha kuu nyelaaz'n lo yezlyu ree?

Kwent nanzee chaan thib fariseo ne chaan thib zha kuu ntsow kobral temi

⁹ Jesús mndaao tedib kwent nanzee lo tedib net re zha kuu ndak wen nak, ne ndak zha lee tedib net re men thitanax went nak.

¹⁰ Tsa nzhab Jesús:

—Thib welt lee chop mbyi ndaa gwodoo nda tedib lo Diox. Thib zha nak fariseo, lee tedib zha nak zha kuu ntsow kobral temi chaan yezlyu kuu nzhab lo zha Roma.

¹¹ Tsa lee fariseo mndeli, ne tenzhee mndelo zha nzhab zha lo Diox: “Diox, texkizha, tak nagt'n taxal tedib net re men. Nagt'n wann, zha wen nak'n, neeka nagt'n thib zha kuu nzhab rop kon tedib ngot, ne neeka nagt'n taxal zha ree, zha kuu ntsow kobral temi chaan yezlyu kuu nzhab lo zha Roma. ¹² Ne chop welt ntsow'n ayun thib sman, ne ndan lo'a tsii part lo re kuu ntsow'n gan.”

¹³ Per lee zha kuu ntsow kobral temi chaan yezlyu ndo tithxa, ne neeka mlapt zha lo zha lobee, sinke nkaan yaa zha pech zha ne mbez zha: “Diox, blat leettsoo'a ne'a na, tak thib zha kuu ntsow kuu went nak'n”. ¹⁴ Lee na ni lo goo, mtuyya Diox falt zha kuu ntsow kobral temi chaan yezlyu, leettsa mre zha liz zha, per lee fariseo mtuyyt Diox re falt zha. Tak lee zha kuu ntsow nataak leeka lee lo Diox, nataagt zha'a, per lee zha kuu ntsow nataagt leeka lee lo Diox, tetsin wiz lee zha'a gak zha nataak.

*Jesús ne re ndyeen bzhizh
(Mt. 19:13-15; Mr. 10:13-16)*

¹⁵ Tsa lee re men ngwano re ndyeen bzhizh lo Jesús, tsa xoob Jesús yaa Jesús yek re ndyeen. Per leettsa mwii re zha kuu ngeteed lo Jesús kona, tsa mkox re zha kuu ngwano re ndyeen lo re zha kuu ngeteed lo Jesús. ¹⁶ Tsa mrez Jesús re zha kuu ngeteed lo Jesús, ne nzhab Jesús lo re zha:

—Laa goo yaad re ndyeen lon, ne towt goo lo ndyeen. Tak Diox nabee leettsoo re zha kuu nak taxal re ndyeen bzhizh ree. ¹⁷ Wlipaa na ngenin lo goo, loka zha kuu tyalt nabee Diox leettsoo, taxal thib re ndyeen ree, gagg tab zha ta nabee Diox.

*Thib mndyeen rik mnodediz kon Jesús
(Mt. 19:16-30; Mr. 10:17-31)*

¹⁸ Thib zha kuu nataak mnaabdiz lo Jesús, ne nzhab:

—Maestr wen, ¿kwan ndoblo tsow'n, tsa tsow'n gan yalnaban kuu thitanax?

¹⁹ Jesús mkab ne nzhab:

—¿Chebee ne'a wen nak'n? Neeka thib men wen yent, beeta Diox wen nak.²⁰ Ne'a lu re kuu mtaan Diox tsowa: "Ndoblot gak ropa kon thib ngot kuu nagt tsaala, kuththa tabena, lowannta, tedizta kuu wlit, ne bke leettsoo'aa xutaa ne xnaa'a".

²¹ Lee zha'a nzhab:

—Reta koree ngetsow'n desde leettsa mndyeen na.

²² Or mbin Jesúus kona, tsa nzhab Jesúus lo zha:

—Tediibka kuu nzhak falt tsowa. Tyee, ne btho reta kuu napa ne btaa temi lo re zha prob, tsa keno'a naroob kwaa leen yibaa, tsaraa yaada ne teke'a dits'n.

²³ Per leettsa mbin zha rika kona, kwathoz nabil ngoo leettsoo zha, tak kwathoz rik zha. ²⁴ Ne mwii Jesúus nabil ngoo leettsoo zha, tsa nzhab Jesúus:

—Aka nagan laa thib zha rik nabee Diox leettsoo zha! ²⁵ Ne mas nagant rid thib kamey yeer kuu le ngutlo abuj, naake tsow thib zha rik gan tab yibaa ta nabee Diox.

²⁶ Ne lee re zha kuu mbin kona nzhab:

—Os leey tabaay cho tsow gan ndya yibaa tsa?

²⁷ Tsa lee Jesúus nzhab lo re zha:

—Re kuu nagan lo re men yezlyu ree, lo Diox nagante.

²⁸ Tsa lee Pey nzhab:

—Lee re nee, mlaa nee reta kuu nap nee, ne ndeke nee ditsa.

²⁹ Tsa lee Jesúus mkab, ne nzhab lo re zha:

—Wlipaa na ngenin lo goo, loka zha kuu laa liz, tsaal, wets, xut ne xnaa, ne zhiinn kwent chaan ta nabee Diox, ³⁰ zha'a mas naroobe kaya lo yezlyu ree, ne tetsin wiz kaya zha yalnaban kuu thitanax yibaa.

Myon welt mndaa Jesúus kwent naa xomod gath Jesúus

(Mt. 20:17-19; Mr. 10:32-34)

³¹ Tsa mrez Jesúus re tsuibchop zha kuu ngeteed lo Jesúus, ne nzhab Jesúus lo re zha:

—Bin goo, nal nda re'aa yez Jerusalén, ta ndoblo gak reta kuu mkeer re profet kuu ngoo ndala, kwent chaan da, Kuu Mzin Ngok Men. ³² Taa zha na lo re zha kuu nagt zha Israel, tsa zhizno zha na, tsalzhoo zha na ne tsuk zha lon. ³³ Ne leettsa yelo kin zha na, tsaraa kuth zha na, per leettsa tsaal tson wiz lee na roban.

³⁴ Per lee re zha kuu ngeteed lo Jesúus, myent zha re kuu nzhab Jesúus, ne neeka net zha na kwan kuu nzhab Jesúus, tak lee Diox mkaats re kona lo re zha.

Jesúus mtegwe ngutlo thib zha syeg zha yez Jericó

(Mt. 20:29-34; Mr. 10:46-52)

³⁵ Ne leettsa ndetsin gaxa Jesúus yez Jericó, tsa mwii Jesúus lee thib mbyi syeg ndob roo net genaab gon. ³⁶ Or mbin syeg kwathoz

men nderid, tsa mnaabdiz syeg ne nzhab syeg:

—¿Kwan ndiy nzhak?

³⁷ Tsa nzhab re men lo syeg:

—Jesúus zha Nazaret nderid nzhee.

³⁸ Tsa lee syeg dib gan mrez, ne nzhab:

—¡Jesúus xgann David, blat leettsoo'a ne'a na!

³⁹ Tsa lee syeg mkox lo re zha kuu ndener, ne nzhab zha:

—¡Btow roo'a!

Per lee syeg masraa mrez ne nzhab:

—¡Jesúus xgann David, blat leettsoo'a ne'a na!

⁴⁰ Tsa lee Jesúus mlet, ne mnabee Jesúus ngwaxii zha syeg. Ne leettsa mzin syeg lo Jesúus. Tsa mnaabdiz Jesúus lo syeg:

—¿Kwan nlaaza tsow'n lo'a?

Tsa lee syeg mkab ne nzhab:

—Zha Nabee, nlaz'n yeni ngutlon.

⁴² Lee Jesúus nzhab lo zha:

—Tak yени ngutlo'a, tak ngwalaaza na.

⁴³ Ne oraaka lee lo zha mzhaal, ne mnudeke zha dits Jesúus ne mbil zha lo Diox. Ne reta zha kuu mwii kuu ngok, noga re zha'a mbil lo Diox.

19

Jesúus ne Zaqueo

¹ Tsa mndaab Jesúus yez Jericó ne mriid Jesúus leen yeza. ² Ne tyo nzo thib mbyi rik kuu le Zaqueo, ne lee zha nak zha kuu nabee lo re zha kuu ntsow kobral temi chaan yezlyu kuu nzhax lo zha Roma. ³ Ne nlaaz zha wii zha Jesúus, per gagt wii zha Jesúus, tak kwathoz men nzi, ne tak kwathoz lut Zaqueo. ⁴ Tsa lijer mndener zha ne mkendab zha lo thib ya kuu le sicómoro, par wii zha Jesúus leettsa rid Jesúus tyo. ⁵ Leettsa mzin Jesúus tyo, ne mwii Jesúus lo ya, tsa nzhab Jesúus lo zha:

—Zaqueo, lijer bla, tak liza bet'n nalt-seree.

⁶ Tsa lijer mla zha ne kwathoz naley ngoo leettsoo zha, mbin zha lee Jesúus kwet liz zha.

⁷ Ne or mbin re men kona, mndelo zha mbez zha lo re altaa zha, ne nzhab zha; lee Jesúus nda kwet liz thib zha kuu kwathoz ndab falt.

⁸ Tsa lee Zaqueo mndeli ne nzhab lo Jesúus:

—Zha Nabee, wii, garol re kuu nap'n tan lo re zha prob; ne os leen mlowann na chaan thib zha, thap lai kuu mki'b'n lo zha tseren lo zha.

⁹ Tsa nzhab Jesúus lo Zaqueo:

—Naltserree lee re zha kuu nzo yuu ree nkayaa yalnaban kuu thitanax, tak no zha ree nak zha raz Abraham. ¹⁰ Tak lee na, Kuu Mzin Ngok Men, ndyaad kwaan re zha kuu mndab, tsa tan yalnaban lo re zha.

*Kwent nanzee chaan tsii temi
(Mt. 25:14-30)*

¹¹ Ne leettsa ngeyon re zha re kuu ngeni Jesús, tsa nzhab Jesús tedib kwent nanzee lo re zha, tak gaxa Jerusalén nzi re zha kon Jesús, ne mtsow re zha xgab, mera nabee Diox lo re men. ¹² Tsa lee Jesús nzhab lo re zha:

—Ngoo thib zha rik kuu kwathoz nataak, ne mroo zha nda zha thib ta kwathoz tithe, ne tyu gak zha rey kuu nabee, ne tsaraa bretab zha. ¹³ Ne leettsa ter roo zha, tsa mrez zha tsii mos zha, ne mndaa zha thibga temi kuu mas nataak lo kadta thib mos, ne nzhab zha lo re mos: “Bke goo tsii kon temi ree, asta leettsa bretab’n”. ¹⁴ Per lee re tawlaw zha nayii ne zha, tsa mtaal re tawlaw zha thib net zha ngwalo diiz lo rey ne nzhab: “Nlaazt nee gak zha ree rey lo nee”.

¹⁵ Per leettsa naka zha rey, tsa mre zha laz zha. Tsa mrez zha re mos zha kuu mndaa zha temi lo, tak nlaaz zha ne zha naa xa mke re mos tsii kon temi’ a. ¹⁶ Tsa mzin mos kuu ner ne nzhab mos: “Zha Nabee, lee temi kuu mndaa’ a lon, mtsowe gan tedib tsiiy”. ¹⁷ Tsa lee rey nzhab lo mos: “Mos da, kwathoz wen mke’ a tsii. Wen mtsowa lo lut kwaan mndan lo’ a, kona lee nal tan tsii yez lo’ a, tsa nabee luy”. ¹⁸ Tsa mzin tedib mos ne nzhab lo rey: “Zha Nabee, lee temi’ a kuu mndaa’ a lon mtsowe gan tedib gaaye”. ¹⁹ Tsa lee rey nzhab: “Nal tan thib gaay yez lo’ a tsa nabee luy”. ²⁰ Tsa mzin myon mos ne nzhab: “Zha Nabee, lee temi’ a kuu mndaa’ a lon nzhee. Mkee nay lo thib panyit ne mkaats nay, ²¹ tak nzeb’ n nen lu, tak nen lee lu nak thib zha kuu kwathoz nakap, ndena kuu mtaanta ne nthop yalgonn ta ngonnta.” ²² Tsa lee rey nzhab lo mos: “Kon leeka re diiz kuu mroo roo’ a, naab’ n kwent lo’ a; lu nak thib zha nakap. Ne’ a lee na nden na kuu mtaant’ ne nthop’ n yalgonn ta mloot’ n bin. ²³ ¿Chebee mlotia temi da bank? Tsa leettsa gabren, gataa’ a temi da kuu mndan lo’ a, ne gataa’ zhiinne kuu mtsowe gan lon”. ²⁴ Tsa nzhab rey lo re zha kuu nzi lo rey: “Bkib goo temi lo mos ree, ne btaa gooy lo mos kuu nap tsii”. ²⁵ Tsa lee re zha nzhab lo rey: “Zha Nabee napa zha baa tsii temi”. ²⁶ Per lee rey mkaab ne nzhab: “Lee na ni lo goo: Lee zha kuu nap naroobe tekayaa zha masraay, per lee zha kuu yent kwan nap, asta lut kuu nap zha yiib lo zha. ²⁷ Ne noga nzhab rey: Deno goo re zha kuu nlaazt gak’ n rey lo nzhee, ne beth goo zha nzhee lon.”

*Lee Jesús mndaab yez Jerusalén
(Mt. 21:1-11; Mr. 11:1-11; Jn. 12:12-19)*

²⁸ Leettsa ngwalo nzhab Jesús kona, ndaka Jesús yez Jerusalén. ²⁹ Leettsa ndetsin gaxa Jesús yez Betfagé ne yez

Betania, gaxta yii kuu le Olib, tsa mtaal Jesús chop zha kuu ngeteed lo Jesús, ³⁰ ne nzhab Jesús lo rop zha:

—Gwa goo yez kuu nzi gaxta nzhee, tyu yetsal goo thib burr kuu ndekedoo, thib maa kuu terka yo xab. Xak goo maa ne yaadno goo maa nzhee.

³¹ Ne os cho zha naabdiz lo goo ne: “¿Chebee ngexak goo burr?” Gab goo lo zha: “Lee Zha Nabee ndeche maa”.

³² Tsa lee rop zha kuu mtaal Jesús nda, ne mzal burr lo zha taxal nzhab Jesús lo rop zha. ³³ Ne leettsa ngexak zha burr, lee bzhaan burr, mnaabdiz lo rop zha ne nzhab:

—¿Chebee ngexak goo burr da?

³⁴ Tsa lee zha mkab ne nzhab:

—Lee Zha Nabee ndeche maa.

³⁵ Tsa ngwano zha maa lo Jesús. Ne mxoob zha xab zha dits maa ne mke Jesús dits maa. ³⁶ Ne taxal nderid Jesús lee re men ngix xab net. ³⁷ Ne or ndyaadla re zha ndetsin zha gax yii kuu le Olib, tsa lee reta men kuu ndeke dits Jesús mndelo zha mbil zha dibgan zha ne mndaa zha texkix lo Diox, por re kuu thoz kuu mwii zha mtsow Jesús. ³⁸ Ne mbezz re zha:

—¡Kwathoz wen nak zha kuu ndyaad kon le Zha Nabee! ¡Wen kwin re zha yibaa ne golaa lo Diox kuu ndob yibaa!

³⁹ Tsa lee chop tson re fariseo kuu nzi xid re mena, nzhab lo Jesús:

—Maestr, gok nayii lo re zha kuu ndeke ditsa.

⁴⁰ Per lee Jesús nzhab lo re zha:

—Wlipaa na nin lo goo, os lee re zha ree tow roo, lee re ke kwez guth.

⁴¹ Leettsa ndetsin gax Jesús yez Jerusalén, or mwii Jesús yez, ora mbinn Jesús, ⁴² ne nzhab Jesús:

—¡Os lee re goo zha yez Jerusalén gane goo, lee wiz nalteree tak wen kwin goo, per tak nzogaats koree lo goo, kona nloote lo goo! ⁴³ Tak too wiz kuu lee re zha kuu nayii ne goo telo yo kon goo, ne tow zha re ladta lo goo, taxal thib btsin ke. ⁴⁴ Wlipaa teluux zha re zhiinnta goo, ne neeka thib ke yaant dits tedib ke yez ree, tak mlebeet goo Diox wiz kuu myaadtwii Diox lo goo.

Jesús mtezhonn re zha kuu nzi ntho lee roo gwodoo naro

(Mt. 21:12-17; Mr. 11:15-19; Jn. 2:13-22)

⁴⁵ Tsa mndaab Jesús lee roo gwodoo naro, ne mndelo Jesús mtezhonn re zha kuu ntho ne ndi tyu. ⁴⁶ Tsa nzhab Jesús lo re zha:

—Nke’ a lo xkeets Diox ta mbezz: “Lee liz’ n nak yuu ta ndediz re men lon” [Is. 56:7; Jer. 7:11]; ne lee re goo ntsowe taxal liz wann.

⁴⁷ Gandata wiz nloo Jesús lo re men lee roo gwodoo, per lee re ngwleyy kuu nabee lo re ngwleyy, ne re maestr kuu nloo xkiiz

Diox lo re men, ne re zha kuu nabee yez, nkwaan zha naa xomod kuth zha Jesús.
⁴⁸ Per mzalt zha mod gatsow zhay, tak kwathoz men nzi nhzon re kuu nlloo Jesús.

20

Cho mndaa yalnabee lo Jesús (Mt. 21:23-27; Mr. 11:27-33)

¹ Thib wiz leettsa lee Jesús ngeloo lo re men lee roo gwodnoo, ne mndaa Jesús kwent Diiz Chul lo re men, tsa ngwa re ngwleyy kuu nabee lo re ngwleyy lo Jesús, noga re maestr chaan ley ne re zha gol. ² Tsa nzhab zha lo Jesús:

—¿Cho mndaa diiz ntswa re koree? Ne ¿cho mndaa yalnabee lo'a?

³ Tsa lee Jesús nzhab lo re zha:

—Noga na naabdiz thib kwaa lo goo, kab goo lon. ⁴ ¿Cho mtaal Juan tsowleyy Juan re men? ¿Chu Diox mtaal Juan o mene?

⁵ Ne lee re zha mndelo zha mbez zha lo re altaa zha:

—Os lee'aa gabaa lo zha: “Diox mtaal Juan”, tsa ne zha lo'aa: “¿Chebee mbint goo diiz lo zha?” ⁶ Per os lee'aa gabaa lo zha: “Re men mtaal zha”, tsa kuth re menaa kon ke, tak ne re men lee Juan nak profet chaan Diox.

⁷ Tsa lee re zha nzhab:

—Net nee cho mtaal Juan.

⁸ Tsa lee Jesús nzhab lo re zha:

—Neeka na nit'n naa cho mndaa yalnabee lon ntswon're koree.

Kwent chaan re zha kuu went mke tsiin loyu tedib zha

(Mt. 21:33-44; Mr. 12:1-11)

⁹ Tsa lee Jesús nzhab tedib kwent nanzee lo re men, ne nzhab Jesús:

—Thib welt ngoo thib zha kuu ngonn luts ub dita lo yu zha, ne mndaa zha yu zha kompani lo tedib net zha tsa tenaa zhay, ne ndya zha ngoo zha tith naroob tyemp. ¹⁰ Ne leettsa mzin tyemp kuu thop zha yalgonn, tsa mtaal zha thib mos zha, par yanaab kuu ndoble zha diinn zha. Per lee re zha kuu nke tsiin lo yu zha, mdinke re zha'a mos zha, ne mtenet zha mos tabaata. ¹¹ Tsa lee zha kuu nak chaan yu mtaal zha tedib mos zha, ne lee re zha kuu nke tsiin lo yu zha, mdinke zha mos ne kwathoz metti zha mos ne mtenet zha mos tabaata. ¹² Tsa lee zha kuu nak chaan yu mre mtaal tedib mos, per lee re zha kuu nhzann lo yu zha, mloo zha grid mos, ne mlobi zha mos ta nhzann zha. ¹³ Tsa lee zha kuu nak chaan yu nzhab: “¿Kwan tsow'n? Nal taal'n thibka xgann na kuu nap'n; ne leettsa wii zha xgann na, ton re zha diiz lo xgann na.” ¹⁴ Per leettsa mwii re zha kuu nhzann lo yu lee xgann zha kuu nak chaan yu'a ndyaad, tsa nzhab zha lo altaa zha: “Zha ree nak kuu kayaa

dita chaan xute, leettsa lee xut zha gath. Nda kutha zha, tsa lee yu ree gak chaanaa”. ¹⁵ Tsa mloo re zha zha laats ta ndab luts ub ne mbeth zha zha.

Tsa mnabdiz Jesús ne nzhab Jesús:

—¿Kwan ntswa goo xgab? ¿Kwan tsow zha kuu nak chaan yu lo re zha kuu mke tsiin lo yu zha? ¹⁶ Yaad zha ne kuth zha re zha kuu nhzann lo yu zha, ne taa zha yu zha lo tedib net zha.

Leettsa mbin re men kona, tsa nzhab re zha:

—¡Net Diox kona!

¹⁷ Tsa lee Jesús mwii lo re zha, ne nzhab Jesús:

—¿Xomod nak kuu nzhab lo xkeets Diox? Ta nzhab:

Lee ke kuu mlobi re zha kuu nta yuu, lee nal leey ngok ke kuu mas wen kuu mtob zha skin yuu. [Sal. 118:22]

¹⁸ Ne reta zha kuu ral ke ree nii tats zha, per os lee ke ree la dits thib zha dita tsowe zha.

Yalnaabdiz kuu chu ndoblo gax temi yez-lyu lo César

(Mt. 22:15-22; Mr. 12:13-17)

¹⁹ Tsa lee re ngwleyy kuu nabee lo re ngwleyy ne re maestr kuu nlloo xkiiz Diox, ngwalaaz zha gaten zha Jesús, tak myeen re zha lee kwent nanzee kuu nzhab Jesús, nlloo naa xomod nak re zha. Per nzeb zha ne zha re men, kona mlaa zha Jesús ne ndya zha. ²⁰ Tsa lee re zha kuu nayii ne Jesús thibka nkwaan re zha mod ten zha Jesús. Tsa mtaal zha chop tson zha kuu ntsw taxal zha kuu wlipa a ngeteed lo Jesús, beeta par yegaa Jesús, os lee Jesús ni thib kuu ndoblot, tsa tak taa zha Jesús lo gobyern. ²¹ Tsa nzhab re zha'a lo Jesús:

—Maestr, ne'a nee lee re kuu ndediza ne re kuu nlloo'a nak kuu wli, ne lalka nzhab leettsoo'a ne'a reta men, ne nali nlloo'a xnet Diox lo re men. ²² ¿Chu ndoblo kix nee temi o ndoblot kix nee temi lo César?

²³ Ne lee Jesús ne'a lee re zha ngekedi, tsa nzhab Jesús lo re zha:

²⁴ —Bloo goo thib temi lon. ¿Cho yek nke loy? ¿Ne cho le nke loy?

Tsa lee re zha mkab, ne nzhab:

—Chaan César, zha kuu nabee Roma nke loy.

²⁵ Tsa lee Jesús nzhab lo re zha:

—Mbay, btaa goo chaan César lo César, ne btaa goo chaan Diox lo Diox.

²⁶ Ne mzalt zha neeka thib kuu went lo re kuu nlloo Jesús lo re men. Ne leettsa mbin re zha kuu mkab Jesús, kwathoz mzegey leettsoo zha ne zheta mtow roo zha.

Yalnaabdiz chaan yalroban

(Mt. 22:23-33; Mr. 12:18-27)

²⁷ Tsa lee chop tson zha saduceo re zha kuu nyelaazt lee re zha nguth roban, ngwa mnaabdz lo Jesús, ne nzhab:

²⁸ —Maestr, lee Moisés mke lo xkeets Diox nzhab: “Os lee thib zha gath, ne lee tsaal zha yaan ne ngopt tsaal zha neeka thib zhiinn zha, tsa lee wets zha ndoblo tseyal kon byuda, tsa keno wets zha zhiinn zha, ne lee zhiinn wets zha yaan taxal zhiinn zha ngutha”. ²⁹ Thib welt ngoo gaz re wets zha. Lee zha kuu ner mtseya, ne nguth. Ne mkenot zha neeka thib zhiinn zha. ³⁰ Tsalee tedib wets zha kuu ndeke dits zha, mtseya kon byuda, ne noga zha'a nguth, ne neeka mkenot zha zhiinn zha. ³¹ Ne tataka ngok kon wets zha kuu myon. Ne re gazta wets zha mtseya kon byuda ne neeka thib zha mkenot zhiinn. ³² Ne bluz noga ngot nguth. ³³ Os lee re men roban, ¿cho thib re zha'a gak tsaal ngota, tak kon re gazta wets zha mtseya ngot?

³⁴ Tsa nzhab Jesús lo re zha:

—Lee re men yezlyu ree ntseyaa zha. ³⁵ Per lee re zha kuu ndoblo ndya yibaa ne roban xid zha nguth, neeka tseyat zha ne neeka taat raa zha zhiinn zha tseyal. ³⁶ Ne gathrt raa zha, tak mroban zha tsa gak zha zhiinn Diox, ne gak zha taxal re mandad chaan Diox. ³⁷ Ne asta Moisés mloo lee re men roban, leettsa mndaa Moisés kwent chaan ya yits kuu ngeyeek, or mni Zha Nabee lo Moisés, ne nzhab zha: “Na nak Diox Abraham, Diox Isaac ne Diox Kob”. [Ex. 3:6]

³⁸ ¡Ne lee Diox nagt Diox Diox re zha nguth, lee Diox nak Diox lo re men kuu naban, tak lo Diox reta zha naban!

³⁹ Tsa lee thib maestr kuu nloo xkiiz Diox, nzhab lo Jesús:

—¡Kwathoz wen mkaba!

⁴⁰ Ne ngwalo mriiid re koree, myet raa leettsa zha ganaabdz zha masraa kwa lo Jesús.

¿Cho lo raz ndyaad Crist Kuu Mtaal Diox Nabee?

(Mt. 22:41-46; Mr. 12:35-37)

⁴¹ Tsa lee Jesús nzhab lo re men:

—¿Xomod mbezz goo lee Crist Kuu Mtaal Diox Nabee nak xgann David? ⁴² Ne leeka David mke lo yeets chaan salm, ne nzhab: Lee Diox kuu nak Zha Nabee lo reta kwa, nzhab lo Zha Nabee lon:

“Btob lad ban lon,

⁴³ asta tsuin na re zha kuu nayii ne'a, tsa tobzub zha lo'a”. [Sal. 110:1]

⁴⁴ ‘Ne leeka David nzhab: “Lee zha nak: Zha Nabee lon”. ¿Xomod tak gak zha xgann David tsa?

Jesús mkekire maestr kuu nloo xkiiz Diox

(Mt. 23:1-36; Mr. 12:38-40; Lc. 11:37-54)

⁴⁵ Reta men nzi ngeyon leettsa lee Jesús nzhab lo re zha kuu ngeteed lo Jesús:

⁴⁶ —Kenap goo goo, tsa kedit re maestr kuu nloo xkiiz Diox goo, tak nyow leettsa zha gok zha re lar nol kuu kwathoz wen, ne nyow leettsa zha kiits yek re men ni re men “diox” lo zha lo xbi. Ne nkwaan zha re ta mas wen tob zha ta nkaltaa'aa nteedaa xkiiz Diox, ne nkwaan zha ta mas nataak nyetob zha leettsa nyoo ani. ⁴⁷ Ne nkib zha liz re ngot byud. Tsaraa kwathoz tetse naab zha lo Diox, tsa wen wii re men lo zha. ¡Per mas naroob yalti teriid Diox re zha'a!

21

Gon kuu mndaa ngot byud
(Mt. 12:41-44)

¹ Tsa mwii Jesús lee re zha rik ngo naroob temi leen alkansi kuu ndob lee roo gwodoo chaan re zha Israel. ² Ne noga mwii Jesús thib ngot byud kuu prob. Lee ngota mloo chopka temi kuu nataagt leen alkansi. ³ Tsa nzhab Jesús:

—Wlipaa na nin lo goo, lee ngot prob ree mndaa mas naroob gon nake tedib net re men. ⁴ Tak reta zha mloo naroob temi leen alkansi, per beeta kuu mrozhooib lo zha mloo zha. Per lee ngot prob ree mndaa reta temi kuu nap ngot, kuu tii ngot kuu wu ngot.

Jesús nzhab lee gwodoo lux
(Mt. 24:1-2; Mr. 13:1-2)

⁵ Tsa lee chop tson re men kuu nzi ngeteediz kwent chaan gwodoo chaan re zha Israel. Ne mbezz zha lee re ke kuu naya gwodoo kwathoz chul nay, ne kon kwaro gon ngway. Tsa nzhab Jesús lo re zha:

⁶ —Lee re ke kuu ngewii goo nal, tetsin thib wiz lee reta ke ree lux, yaant thibe dits tedibe.

Re kuu gak leettsa terka lux yezlyu
(Mt. 24:3-28; Mr. 13:3-23)

⁷ Tsa mnaabdz re zha lo Jesús, ne nzhab zha:

—Maestr, ¿pol gak re koree? Ne, ¿kwan loo leettsa mera gak re koree?

⁸ Jesús mkab lo re zha, ne nzhab:

—Kenap goo goo, tsa neeka thib zha kedit goo. Tak kwathoz zha yaad ne ne: “Na nak Crist Kuu Mtaal Diox Nabee”. Ne noga ne zha: “Mzin gaxa wiz kuu gak re koree”, per yelaatz goo kuu ne zha neeka teket goo dits zha. ⁹ Leettsa gon goo nzo zhoo reta ta, tsebt goo. Reta koree ndoblo gak ner; per nagt koree kuu lux yezlyu.

¹⁰ Noga nzhab Jesús lo re zha:

—Lee thib yez yo kon tedib yez, ne lee re zha kuu nzo ta nabee thib rey yo kon re zha kuu nzo ta nabee tedib rey. ¹¹ Ne kwathoz gwin zho thoz lo yezlyu, ne la win, ne kwathoz tyen ta la yiz, ne loo re seny thoz lobee, ne yo re kuu thoz kuu tseb re men ne. ¹² Per leettsa ter gak re koree, lee re men ten goo ne teti zha goo, ne yataan zha

goo ta nkaltaa re'aa nteedaa xkiiz Diox, ne noga yataan zha goo lo re rey, ne lo re zha kuu nak tsiin tsa ko zha goo tsib. Reta koree tsowno zha goo tak nyelaaz goo na.¹³ Reta koree gak tsa tak taa goo kwent chaan da lo re men.¹⁴ Tsowt goo xgab naa kwan kab goo, or kuu naab re zha kuu nak tsiin kwent lo goo.¹⁵ Tak na ta yalnzaah lo goo, tsa wen ne goo naa kwan kab goo ora; tsa lee re zha kuu nayii ne goo, gagt tow zha roo goo ne neeka gagt kab zha neeka thib kwaal lo goo.¹⁶ Ne leeka xut goo, leeka re wets goo, leeka re zha liz goo, ne leeka re zha nyey goo, yataan goo lo zha kuu nak tsiin. Ne kuth zha chop tson goo.¹⁷ Reta men yii ne goo, tak nyelaaz goo na.¹⁸ Per neeka thib yitsek goo luxt.¹⁹ Per loka zha kuu xek rid re koree, zha'a tetsow gan yalnaban kuu thitanax.

²⁰ 'Leettsa wii goo lee re soldad kwin dita roo yez Jerusalén, tsa ne goo mera lux Jerusalén.²¹ Tsa lee re zha kuu nzo yezlyu Judea ndoblo zhonn zha par net yii, ne lee re zha kuu nzo yeza ndoblo zhonn zha par yek yii, ne lee re zha kuu nzi wan, ndoblot bretab zha yez.²² Tak re wiza gak wiz kuu lee re mena rid kwathoz yalti thoz, tak retay ndoblo gak taxal nzhab lo xkiiz Diox.²³ Kwathoz natii rid re ngot kuu nzo zhiinn wiza. Ne kwathoz natii rid re ngot kuu nap mbetdoo wiza, ne kwathoz natii rid re men kuu nzi lo yezlyu ree wiza, tak lee yalnayii chaan Diox la dits re zha kuu nzi lo yezlyu ree wiza.²⁴ Lee thib net re men gath lo zhooh, ne lee tedib net zha teno zha zha par gak zha mos tedib yezlyu. Tsa lee re zha kuu nagt zha Israel nabee lo re zha yez Jerusalén, asta yezhoob wiz kuu ndoblo nabee re zha'a lo re zha Israel.

Xomod bre Jesucrist

(Mt. 24:29-35, 42-44; Mr. 13:24-37)

²⁵ Ne telo loo re seny thoz lo wiz, lo mbee ne lo re mbel kuu nzib lobee. Tsa lee re men kuu nzo re yez kuu nzi lo yezlyu ree, teguz zha lo tseb leettsa wii zha lee nitdoor telo bexnit ne ke bi.²⁶ Ne thitanax teguz re men lo tseb, por re kuu rid lo yezlyu, tak lee re kuu nzo lobee zhiit.²⁷ Tsa lee re men wii, lee na Kuu Mzin Ngok Men, yal'n xid zkow kon kwaro walnabeen chaan da ne kon xni thoz chaan da.²⁸ Leettsa ne goo lee re koree ngeyak, gwateli goo ne wii goo lobee, tak mera tsin na kuu taa yalnaban kuu thitanax lo goo.

²⁹ Tsa nzhab Jesús tedib kwent nanzee lo re men, ne nzhab Jesús:

—Wii goo lo ya ig ne wii goo lo tedib net re ya.³⁰ Leettsa ngwii goo lee re zhite ndelo la bzhits, tsa ne goo lee mbee beyi ndetsin gaxa.³¹ Leeka tata, leettsa wii goo lee re koree ngeyak, ne'a goo ndetsin gaxa wiz kuu lee Diox nabee lo goo.³² Wlipaa na nin

lo goo, terka gath re men kuu nzi lo yezlyu nal ne lee re koree gak.³³ Yezlyu ne lobee telux per lee xkiz'n ridt.

³⁴ 'Bkenap goo goo, lo re kuu yezlyu ree, tsa kedit re kuu yezlyu ree goo, tsowt goo re kuu went kuu nlortsint, keet goo yalgwyi, neeka tsowt goo xgab naa kwan wu goo ne gu goo, tsu lista nzi goo wiz kuu lee na bretab,³⁵ tak lee wiz kuu wenta chatta tsin lo reta men kuu nzo dib naxta lo yezlyu.³⁶ List gwatsin goo, ne thibka bnaab goo lo Diox gadata or, tsa ridt goo neeka thib re kuu went kuu rid, ne tsa ney to goo nyelaaz goo na, Kuu Mzin Ngok Men.

³⁷ Ne gadata wiz nloo Jesús lo re men lee roo gwodoo, ne reta yaal nya Jesús yii kuu le Olib, ne tyaa nyaan Jesús.³⁸ Ne gadata wiz kwathoz til nzin re men lee roo gwodoo, tsa gon zha kuu ni Jesús.

22

Mkwaan zha naa xomod keki zha Jesús
(Mt. 26:1-5, 14-16; Mr. 14:1-2, 10-11;

Jn.11:45-53)

¹ Ne tsya ndetsin gaxa wiz ani kuu le Paskw, leettsa nzhou zha pan kuu nyoot lebadur, tsa ntelaaz re zha Israel naa xomod mloo Diox re tey zha yezlyu Egipto.² Tsa lee re ngwleyy kuu nataak lo re ngwleyy, ne re maestri kuu nloo xkiiz Diox, nkwaan zha naa xomod kuth zha Jesús xgaatsta, tak nzeb zha ne zha re men yez.

³ Tsa lee Maxuyu mndaab leettsoo Judas kuu le Iscariote, zha'a nak thib zha lo re tsuibchop zha kuu mteed lo Jesús.⁴ Tsa lee Judas ngwa mndediz lo re ngwleyy kuu nabee lo re ngwleyy ne lo re polisi kuu nkenap gwodoo, tsa naa xomod tsow Judas par taa Judas Jesús lo re zha'a.⁵ Kwathoz laz re zha or mbin zha kona, ne nzhab re zha taa zha temi lo Judas.

⁶ Tsa lee Judas myaan diiz taa Jesús lo re zha, ne mkwaan Judas mod tsow Judas or kuu yent men.

Rtsee bluz kuu ndow Jesús

(Mt. 26:17-29; Mr. 14:12-25; Jn.13:21-30;
1 Co. 11:23-26)

⁷ Tsa mzin wiz kuu ndelo ani kuu le Paskw, wiz kuu nzhou zha pan kuu nyoot lebadur, ne leeka wiza nzhuth zha mbak zhiil kuu ndaa zha gon lo Diox.⁸ Tsa mtaal Jesús Pey rop Juan ne nzhab Jesús lo rop zha:

—Gwa goo ne btexkwaa goo rtsee Paskw dowaa.

⁹ Per lee rop zha mnaabdiz lo Jesús, ne nzhab zha:

—¿Pa nlaaza yatexkwaa neey?

¹⁰ Lee Jesús mkab, ne nzhab:

—Gwa goo yez, ne tyaa tsal goo thib mbyi kuu ne thib ree nit, teke goo dits zha, asta yuu ta tab zha,¹¹ ne gab goo lo zha kuu nak

chaan yuu: "Lee maestr ne: *¿Pa ndob yuu ta wu rtseen rtsee Paskw kon re zha kuu ngeteed lon?*"¹² Tsa loo zha thib yuu naro kuu chop pis lo goo, ne yuu kuu ndob par ya tya nzi'a reta kuu lortsin goo, tya texkwaa goo kuu dow rtsee'aa.

¹³Tsa nda rop zha kuu ngeteed lo Jesús, ne mzal zha re kuu taxalka nzhab Jesús lo zha, ne mdexkwaa zha rtsee Paskw.

¹⁴Leettsa mzin or kuu wu rtsee re zha, tsa lee Jesús mndob roo mes kon re tsiiibchop apóstl.¹⁵ Ne nzhab Jesús lo re zha:

—Kwathoz nlaz'n wun rtsee Paskw ree kon re goo, nal kuu bee ter riid'n yalti.¹⁶ Wlipaa na nin lo goo, bret raa na wun rtsee ree tedib welt, asta leettsa gak kuu nak rtsee ree yibaa ta nabee Diox.

¹⁷Tsa mzhen Jesús bas ne mndaa Jesús texkix lo Diox, ne nzhab Jesús:

—Bzhen gooy ne gwii gooy ne briid gooy lo re altaa goo.¹⁸ Tak wlipaa na nin lo goo, nalsi gut raa na xit ub, asta wiz kuu gu nay ta nabee Diox.

¹⁹Tsa mzhen Jesús pan ne mndaa Jesús texkix lo Diox, ne mtsow rol Jesús pan. Ne mndaa Jesús pan lo re zha kuu ngeteed lo Jesús, ne nzhab Jesús lo re zha:

—Koree nak beel da, kuu tan tsa tsow goo gan yalnaban kuu thitanax. Btsow goo koree tsa telaaz goo na.

²⁰Ne leeka tata mzhen Jesús bas, leettsa ngwalo ndow re zha pan, tsa nzhab Jesús:

—Lee xit ub kuu nzo leen bas ree, leey nak ren da kuu nak trat kub, ne ta nay por re goo.²¹ Wii goo, lee zha kuu taan lo re zha kuu nayii nen, thibka nzob yaa lo mes kon na.²² Wlipaa na nin lo goo, lee na Kuu Mzin Ngok Men, taa zha na lo re zha kuu nayii nen, tak tata mtsow Diox xgabe. ¡Per thitanax went rid zha kuu taan lo re zha kuu nayii nen!

²³Tsa lee re zha kuu ngeteed lo Jesús, mndelo zha mnaabdiz zha lo altaa zha, naa cho zha kuu tsow kona.

Cho nak zha kuu mas nataak

²⁴Tsa lee re zha kuu ngeteed lo Jesús mndelo zha mbyodiz zha, naa cho zha nak zha kuu mas nataak.²⁵ Per lee Jesús nzhab lo re zha:

—Wen ne goo lee re zha kuu nabee lo yezlyu ree, kwathoz nabee zha lo re zha kuu nzi lo zha, ne tataka mtsow re zha kuu nataak kwathoz nabee zha lo re zha zha, ne ni re men lee zha nak zha kuu mtsow kuu wen.²⁶ Per lo re goo gagte tata zhaa gake. Lee zha kuu mas nataak lo re goo zha'a ndoblo gak taxal zha kuu mas mndyeen, ne lee zha kuu nabee lo goo ndoblo gak kuu lortsin lo goo.²⁷ ¿Kwan mtsow goo xgab? ¿Cho nak zha kuu mas nataak; chu zha kuu ndob roo mes negeyowe o zha kuu ngego

kwaan yanne? Wlipaa, zha kuu ndob roo mes nak zha kuu mas nataak nake zha kuu ngego kwaan yanne yann. Per lee na nak zha kuu nlortsin lo goo.

²⁸'Ne lee re goo thibka ndo goo kon na lo re yalti kuu ngeriid'n.²⁹ Kona tan yalnabee nabee goo, taxal mndaa Xut'n yalnabee nabee,³⁰ tsa tak wu goo ne gu goo ta nabeen, ne tob goo naab goo kwent lo re tsiiibchop raz zha Israel.

Jesús nzhab lo Pey: "Lu gab nlebeeta na"
(Mt. 26:31-35; Mr. 14:27-31; Jn. 13:36-38)

³¹Tsa nzhab Jesús lo Pey:

—Pey, bkenza koree. Lee Maxuuy mnaab nabee lo goo, tsa koo zhaa Maxuuy goo, taxal ntsib zha nzob xtil leettsa ntembi zhay.³² Per lee na ngenaab lo Diox, tsa laata kuu nyelaaza. Tsa leettsa bre'a lon, tsowa ayud re wetsa tsa ney to zha lon.

³³Per lee Pey nzhab lo Jesús:

—¡Zha Nabee! Lista ndon yan tsib kon lu, ne asta lista ndon gath'n kon lu.

³⁴Lee Jesús mkab lo Pey ne nzhab:

—Pey, wlipaa na nin lo'a, leettsa terka kwez ngite naltserree lee'a gab tson welt nlebeeta na.

Mzin gax wiz kuu lee Jesús rid re kuu nagan

³⁵Tsa nzhab Jesús lo re zha kuu ngeteed lo Jesús:

—Leettsa mtaal'n goo, nin lo goo gwet goo temi, neeka bols kuu yo re chaan goo, neeka tedib net labyid goo. Ne, ¿chu nzo kwan ngok falt lo goo?

Tsa lee re zha mkab ne nzhab:

—Neeka thib kwaan ngogt falt lo nee.

³⁶Tsa lee Jesús nzhab lo re zha:

—Per lee nal zhaa nake; ndoblo gwe goo temi ne bols kuu yo re chaan goo. Ne loka cho goo kuu nkenot espad, ndoblo tho goo kamis goo tsa tii goo thibe.³⁷ Ne leen ni lo goo, ndoblo gak kuu nke lo xkeets Diox kwent chaan da, ta nzhab: "Lee re men ndak no zha nak thib zha went". [Is. 53:12] Ne reta kuu nzhab lo xkeets Diox kwent chaan da, leechay ndoblo gak.

³⁸Tsa lee re zha kuu ngeteed lo Jesús nzhab:

—Zha Nabee, nzhee nap nee chop espad.

Tsa lee Jesús mkab ne nzhab:

—Wene.

Jesús mndediz lo Diox leen alo Getsemani
(Mt. 26:36-46; Mr. 14:32-42)

³⁹Tsa lee Jesús mroo tya, ne ngwa Jesús yii kuu le Olib taxalka mtsow Jesús, ne nogar re zha kuu ngeteed lo Jesús ngwa kon Jesús.

⁴⁰Ne leettsa mzin Jesús tya, tsa nzhab Jesús lo re zha:

—Bnaab goo lo Diox tsa kedit Maxuuy goo.

⁴¹ Tsa mbeche Jesús lo re zha, asta teeka plotha gol men thib ke. Ne tyo mtobxbub Jesús ne mndelo Jesús mnaab lo Diox. ⁴² Ne tenzhee nzhab Jesús:

—Xut'n, os lee'a nlaaza, laata riid'n re kuu ndoblo riid'n, per gagte taxal nlaz'n, sinke taxal nlaaza gake.

⁴³ Tsa lee thib mandad chaan Diox ndyaad mroo yibaa mloney leettsoo Jesús. ⁴⁴ Ne kwathoz nalatt ngoo leettsoo Jesús, tsa mas tetse mndediz Jesús lo Diox. Ne lee lon Jesús nzhab lo yu taxal thib ke ren.

⁴⁵ Ne leettsa ngwalo mndediz Jesús lo Diox, tsa ngwateli Jesús, ne mretab Jesús ta mlaa Jesús re zha kuu ngeteed lo Jesús. Ne or mzin Jesús lo re zha, lee re zha naxat, tak kwathoz nabil nzo leettsou re zha.

⁴⁶ Tsa nzhab Jesús lo re zha:

—¿Chebee naxat goo? Gwache goo ne bnaab goo lo Diox, tsa kedit Maxuuy goo.

Mzhen zha Jesús

(Mt. 26:47-56; Mr. 14:43-50; Jn. 18:2-11)

⁴⁷ Ne leettsa lee Jesús bee ngenika lo re zha, tsa lee Judas kuu nak thib zha lo re tsuibchop zha kuu mteed lo Jesús, ndener lo kwaro men. Tsa mbig Judas lo Jesús ne ndow Judas chut cho kwaro Jesús. ⁴⁸ Per lee Jesús nzhab lo Judas:

—Judas, ¿chu anta kon thib chut taa'a na, Kuu Mzin Ngok Men lo re zha kuu nayii men?

⁴⁹ Or mwii re zha kuu nzi lo Jesús kuu ngeyak, tsa mnaabdiz re zha lo Jesús ne nzhab zha:

—Zha Nabee, ¿chu ndoblo yo nee kon espad nee?

⁵⁰ Per lee thib zha kuu ndo kon Jesús, mloo espad ne mga zha nza ban mos ngwleyy kuu nabee lo reta ngwleyy.

⁵¹ Tsa lee Jesús nzhab lo zha kuu mga nza mos ngwleyy:

—¡Laa!

Ne ora mzhen Jesús nza mosa ne mkengiin Jesús nza mos tedib welt. ⁵² Oraaka nzhab Jesús lo re ngwleyy kuu nabee lo re ngwleyy ne lo re zha kuu nabee lo re zha kuu nkenap gwodoo, ne lo re zha gol, re zha kuu ndyaad teno Jesús:

—¿Chebee kom espad ne kon ya ndyaad goo ten goo na taxal thib wann?

⁵³ Gandata wiz mndon lo re goo lee roo gwodoo, ne mzhent goo na. Per nal nak or goo, tak lee yalkow nabee lo goo.

Lee Pey nzhab nlebeet Pey Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Tsa mzhen zha Jesús ne ndano zha Jesús liz ngwleyy kuu nabee lo reta ngwleyy, ne lee Pey titi nthi ndeke dits re zha. ⁵⁵ Tsa mtee re zha bel lee, ne mndob re zha roo lo ki mbiz zha. Ne no Pey mndob xid re zha

mbiz lo ki. ⁵⁶ Tsa lee thib ngot kuu nak mos chaan ngwleyy kuu nabee lo reta ngwleyy, mwii lee Pey ndob ngebiz lo ki, ne wen wen mwii ngot lo Pey ne nzhab ngot:

—Noga mbyi ree mndiy kon zha baa.

⁵⁷ Per lee Pey mkedi ne nzhab:

—Ngot, neeka nlebeet'n mbyi baa.

⁵⁸ Tüt bluz, lee tedib zha mwii lo Pey, ne nzhab zha:

—Noga lu naka thib zha kuu mnndeke dits re zha baa.

Per lee Pey nzhab:

—¡Aha, not'n!

⁵⁹ Ne teeka thib or bluz, lee tedib zha nzhab:

—Wlipaa noga mbyi ree ndiy kon zha baa, tak lee mbyi ree nak thib zha yezlyu Galilea.

⁶⁰ Per lee Pey mkab, ne nzhab:

—¡Neeka net'n naa kwan mbeza lon!

Ne lee Pey bee ngenika lee ngite mrez.

⁶¹ Ne ora lee Zha Nabee mwii lo Pey, tsa mtelaa Pey kuu nzhab Zha Nabee lo Pey, or kuu nzhab zha: “Leettsa terka kwez ngite, lee'a gab tson welt nlebeeta na”. ⁶² Tsa lee Pey mroo ne kwathoz nabil ngoo leettsou Pey ne kwathoz mbinn Pey.

Mzhizno zha Jesús

(Mt. 26:67-68; Mr. 14:65)

⁶³ Ne lee re zha kuu mkenap Jesús mzhizno zha Jesús, ne mdin zha Jesús. ⁶⁴ Ne mtow re zha lo Jesús kon thib le lar, ne mbez re zha lo Jesús:

—¡Ne, naa cho mkeey yeka!

⁶⁵ Ne kwathoz re kuu went mbez re men lo Jesús.

Lee ngwleyy kuu kwathoz nataak ne re zha Israel zha nataak mnaab kwent lo Jesús
(Mt. 26:59-66; Mr. 14:55-64; Jn. 18:19-24)

⁶⁶ Leettsa ngwani yezlyu tedib wiz, lee re zha kuu natako lo re zha Israel, re ngwleyy kuu nabee lo re ngwleyy ne re maestr kuu nloo xkiiz Diox, mkaltaa re zha, ne mndeno zha Jesús ta nzi re men kuu mkaltaa re zha. Ne tyo mnaabdiz zha lo Jesús, nzhab zha:

⁶⁷ —Ne lo nee, ¿chu lu nak Crist Kuu Mtaal Diox Nabee?

Jesús mkab ne nzhab:

—Os ni nay lo goo yelaazt gooy. ⁶⁸ Ne os leen naabdiz'n thib kwa lo goo, kabt goo lon. ⁶⁹ Per desde naltserree, lee na Kuu Mzin Ngok Men tob lad ban lo Diox kuu kwathoz ney.

⁷⁰ Tsa reta men nzhab lo Jesús:

—¿Chu lu nak Xgann Diox tsa?

Tsa lee Jesús nzhab:

—Leeka re goo mbez, lee na nake.

⁷¹ Tsa lee re zha nzhab:

—Ndechet raa naabdizaa lo masraa zha, kuu taa kwent chaan zha ree. Mbina lee leeka lee zha mney kon roo zha.

23

Mndeno zha Jesús lo Pilat
(Mt. 27:1-2, 11-14; Mr. 15:1-5; Jn. 18:28-38)

¹Tsa lee reta zha ngwateli ne mndeno zha Jesús lo Pilat.

²Ne mndelo re zha mkeki zha Jesús, ne mbez re zha:

—Ngogaa zha ree lo re nee, lee zha ndano taw laz nee tedib net kuu went, ne mbez zha lo re men: “Ndoblot kizhaa temi chaan yezlyu lo César zha kuu nabee Roma”, ne nog a nzhab zha: “Lee zha nak Crist Kuu Mtaal Diox Nabee”.

³Tsa lee Pilat mnaabdiz lo Jesús, ne nzhab:

—¿Chu lu nak rey chaan re zha Israel?

Jesús mkab lo Pilat ne nzhab:

—Taxal ne'a, tabaa nake.

⁴Tsa lee Pilat nzhab lo re ngwleyy kuu nabee lo re ngwleyy ne lo re men kuu nzi ty a:

—Nidak'n neeka thib falt mndaat mbyi ree.

⁵Per lee re men ndelo mbez:

—Wii, asta yezlyu Galilea mndelo zha ngeloo zha kwent chaan zha, ne nal mzin a zha asta nzhee yez Judea.

Mtaal zha Jesús lo rey Herodes

⁶Leettsa mbin Pilat koree, tsa mnaabdiz Pilat:

—¿Chu zha yezlyu Galilea nak mbyi ree?

⁷Ne leettsa mbin Pilat lee Jesús nak zha yezlyu ta nabee rey Herodes, tsa mtaal Pilat Jesús lo rey Herodes. Ne lee wiza lee Herodes ndo yez Jerusalén. ⁸Ne kwathoz laz Herodes or mwii zha Jesús, tak nda'a wiz nlaaz zha wii zha Jesús, tak kwathoz tyen welt nda nzhon zha kwent chaan Jesús, ne nlaaz zha wii zha tsow Jesús thib kuu thoz. ⁹Tsa lee Herodes mnaabdiz kwaro kwaa lo Jesús, per yent kwan mkab Jesús lo zha. ¹⁰Per lee re ngwleyy kuu nabee lo re ngwleyy, ne re maestr kuu nloo xkiiz Diox kuu nzi ty a, naroob kuu mkeki re zha Jesús. ¹¹Tsa lee Herodes ne re soldad zha, taxal zha kuu nataagt mtsowno re zha Jesús ne mzhizno zha Jesús. Ne mtegok xab zha Jesús taxal thib rey. Tsaraa mtaal Herodes Jesús lo Pilat tedib welt. ¹²Ne wiza lee Pilat rop Herodes myey, tak mbyo rop zha ndala.

Pilat mndaa Jesús tsa kuth zha Jesús

(Mt. 27:15-26; Mr. 15:6-15; Jn. 18:39-19:16)

¹³Tsa lee Pilat mrez re ngwleyy kuu nabee lo re ngwleyy ne re zha kuu nabee lo re zha yez, ne re men yez, tsa kaltaa re zha.

¹⁴Tsa nzhab Pilat lo re zha:

—Lee goo myaadno zha ree lon, ne nkeki goo zha lee zha nkedi re men, ne ndano

zha re men net went. Ne nal ngewii goo mnaabdiz'n lo zha, ne ndak'n neeka thib re kuu nkeki goo zha mtsowt zha. ¹⁵Ne nog a Herodes ndak yent kwan mtsowt zha, kona mre Herodes mtaal zha lon tedib welt. Ne neeka thib kuu went mtsowt zha ree par ndoblo zha gath zha. ¹⁶Nal tetin zha, tsaraa telaan zha.

¹⁷Ne gandata liin leettsa ntsow zha ani Paskw, lee Pilat ntelaa thib zha kuu nzo tsib.

¹⁸Per reta men mndelo mrez dib gan, ne nzhab:

—¡Nlaazt nee telaa'a mbyi baa! ¡Lee nee nlaaz telaa'a Barrabás!

¹⁹Ne lee Barrabás nak thib zha kuu mbeth men, leettsa mbyo Barrabás kon re zha kuu nabee yez, kona mloo zha Barrabás tsib.

²⁰Tsa lee Pilat ngwalaaz gatelaa Jesús, tsa mre Pilat mni zha lo re men tedib welt.

²¹Per lee re men mre mrez dib gab tedib welt, ne nzhab:

—¡Bkee zha lo kruz, bkee zha lo kruz!

²²Myon welt mre Pilat nzhab lo re men:

—Mbay, ¿kwan thib kuu went mtsow zha ree? Ten yetsal'n neeka thib kuu went kuu mtsow zha par ndoblo gath zha, beeta tetin zha, tsaraa telaan zha.

²³Per lee re zha tataka dib gan nzo zha mbez zha; ndoblo ke Jesús lo kruz. Ne kwaro mrez re zha, asta mtsow zha gan mtsow Pilat kuu nlaaz zha. ²⁴Tsa lee Pilat mnabee gake taxal nlaaz re men. ²⁵Tsa mtelaa Pilat Barrabás kuu nzo tsib, kuu mbeth men leettsa mbyo re zha, kon zha kuu nabee yez, ne mndaa Pilat Jesús lo re zha, tsa tsowno zha Jesús loka kuu nlaaz zha.

Mkee zha Jesús lo kruz

(Mt. 27:32-44; Mr. 15:21-32; Jn. 19:17-27)

²⁶Leettsa ndano zha Jesús par kee zha Jesús lo kruz, tsa lee thib mbyi kuu le Simún kuu nak zha yez Cirene, ndyaad ngwa wan, tsa mnabee re soldad gwe Simún kruz Jesús ne teke Simún dits Jesús.

²⁷Ne kwathoz men mndeke dits Jesús, ne kwathoz re ngot nalatt nzhonn ne Jesús.

²⁸Per lee Jesús mwii lo re ngot ne nzhab:

—Rtsaap'n zha Jerusalén, nzhonn goo ne goo na, lee goo nzhonn kwent chaanka goo ne kwent chaan re zhiinn goo. ²⁹Tak too thib wiz kuu gab goo: “Kwathoz wen nda re ngot kuu mndaat Diox mbet lo, ne nog a kwathoz wen nda re ngot kuu ngwiit mbet nzii”. ³⁰Tsa telo re men gab lo re yii: “Bla goo dits nee”. Ne nog a gab zha lo re yii: “Bkaats goo nee”. ³¹Tak os lee zha tenzhee ntsow zha lo thib ya nayee, ¿kwanta nak ya biz lo zha?

³²Ne nog a ndano zha chop zha nakap, tsa thibka kuth zha rop zha'a kon Jesús.

³³ Leettsa mzin re zha thib ta ni zha "Tsith yek men", tsa lee re soldad mkee Jesús lo kruz, ne nogaa mkee zha rop zha kuu mbeth men lo kruz, thib zha mkee zha lad ban lo Jesús lee tedib zha mkee zha lad beg lo Jesús.

³⁴ Tsa lee Jesús nzhab:

—Xut'n, btuyy re kuu went kuu ngetsow re zha ree, tak net zha naa kwan ngetsow zha.

Ne mloo re soldad swert naa cho tsow gan xab Jesús, tsa naa kwan diinn kadta thib thib zha. ³⁵ Ne dita lo Jesús nzi re men ngewii, ne xid re zha'a nzi re zha kuu nabee lo re zha yez, ne mzhizno zha Jesús, mbezzha:

—Mlaat zha gagath tedib net zha, ne chebee gagt la zha leeka lee zha lo kruz, os lee zha nak Crist Kuu Mtaal Diox Nabee lo re zha Israel. ³⁶ Ne nogaa re soldad mzhizno Jesús, ne mbig zha mndaa zha xit ub kuu ni gu Jesús. ³⁷ Tsa nzhab re soldad lo Jesús:

—Os lu nak rey chaan re zha Israel, bla'a leeka lu lo kruz.

³⁸ Ne mkee zha thib letre lo kruz kuu nzhab: "ZHA REE NAK REY CHAAN RE ZHA ISRAEL". ³⁹ Tsa lee thib wann kuu nke lo kruz cho Jesús, mtsalzhoo Jesús, ne nzhab:

—Os lu nak Crist Kuu Mtaal Diox Nabee, bla'a leeka lu lo kruz, ne blaga nee lo kruz.

⁴⁰ Per lee tedib wann kuu nke tedib lad cho Jesús lo kruz, mnayii lo tedib wanna, ne nzhab:

—Chebee nzebta ne'a Diox? Si re yonaa ngeriid yalti. ⁴¹ Ropaa ndoblo ridaa yalti tak mtsowaa kuu went, per lee mbyi ree neeka thib kuu went mtsowt zha.

⁴² Tsa nzhab zha'a lo Jesús:

—Zha Nabee, btelaaz'n, leettsa tsina ta nabee'a.

⁴³ Tsa lee Jesús nzhab lo zha:

—Wlipaa na nin lo'a, leeka naltserree lee'a to kon na laats chul chaan Diox.

Jesús nguth

(Mt. 27:45-56; Mr. 15:33-41; Jn. 19:28-30)

⁴⁴ Ne ndrol wiz mkow yezlyu, ne kona mxek asta las tres mziy yezlyu. ⁴⁵ Ne lee wiz mndaa raa xni. Ne lee lar kuu now Ta Kwathoz Nayon leen gwodoo mrat ngok chop le. ⁴⁶ Tsa lee Jesús mrez ne nzhab:

—Xut'n, lo'a tan xbi da.

Or ngwalo nzhab Jesús kona, nguth Jesús.

⁴⁷ Tsa lee soldad kuu nabee lo thib gayoo soldad, or mwii zha xa nguth Jesús, mbil zha lo Diox, ne nzhab zha:

—Wlipaa lee mbyi ree nak thib mbyi nali.

⁴⁸ Ne reta zha kuu nzi ngwii naa xa nguth Jesús, kwathoz nabil ngoo leettsou zha ne nkaan yaa zha pech zha ndya zha. ⁴⁹ Ne reta zha kuu nzaal leettsou ne Jesús, ne re ngot kuu mndeke dits Jesús desde Galilea, tithxa

mrin zha mwii zha re kuu mtsowno re men Jesús.

Mkaats zha Jesús

(Mt. 27:57-61; Mr. 15:42-47; Jn. 19:38-42)

⁵⁰ Noga ngoo thib mbyi wen kuu le Che. Zha'a nak thib zha yez Arimatea yez chaan yezlyu Judea, ne nak zha thib re zha kuu nataalk lo re zha Israel, re zha kuu mnabee nguth Jesús. ⁵¹ Ne ngebet zha tsin wiz kuu nabee Diox, ne ngooot leettsou zha kuu mtsowno re men Jesús. ⁵² Tsa ngwa zha lo Pilat ne mnaab zha kwerp Jesús. ⁵³ Leettsa mla zha kwerp Jesús lo kruz, mchiix zhay thib le lar kuu kwathoz wen, ne mloo zha kwerp Jesús leen thib baa kuu mdaan zha cho ke. Kuu neeka thib zha ter yo. ⁵⁴ Wiza nak wiz kuu ndexkwaa re zha re kuu nzhaw zha wiz kuu ndroxkwan zha, kuu mera telo.

⁵⁵ Ne lee re ngot kuu mndeke dits Jesús desde Galilea, ngwa re ngot roo baa. Ne mwii ngot xa mloo zha kwerp Jesús leen baa. ⁵⁶ Tsa mretab re ngot ndya ngot, ne mzhii re ngot thib perfum kuu kwathoz chul ndetsi, ne mneyy re zha wiz kuu ndroxkwan re zha, taxal nabee ley.

24

Jesús mroban

(Mt. 28:1-10; Mr. 16:1-8; Jn. 20:1-10)

¹ Leettsa penta ndeyeni yezlyu wiz domin wiz kuu nak ner sman, tsa ngwa re ngota roo baa ta mloo zha kwerp Jesús, ne mbe re ngot perfum kuu kwathoz chul ndetsi.

² Leettsa mzin re ngot roo baa, mwii re ngot lee ke kuu myow roo baa, nowtle roo baa.

³ Tsa mndaaab re ngot leen baa, ne mzalt re ngot kwerp Jesús. ⁴ Ne leettsa kwathoz ngetsegey leettsou re ngot, mwii re ngot lee chop mbyi ndeli cho ngot, nok lar naguz kuu nla xni. ⁵ Ne tak kwathoz mzeb re ngot, tsa mkiuts ngot yek ngot ne mwii ngot lo yu. Tsa lee rop mbyi'a nzhab lo re ngot:

—Chebee nkwaan goo zha kuu naban xid re zha nguth? ⁶ Wii goo yenta zha nzhee; mrobana zha. ⁷ Chu ntelaazt goo kuu ne zha lo goo, leettsa ndoka zha lo goo yezlyu Galilea? ⁷ Leettsa ne zha lo goo: "Lee na Kuu Mzin Ngok Men, ndoblo taa zha na lo re zha kuu ndab falt, tsa kee zha na lo kruz, per leettsa tsaal tson wiz lee na roban".

⁸ Tsaraa mtelaaz re ngot naa kwan nzhab Jesús lo re ngot, leettsa bee ndo Jesús lo re ngot. ⁹ Ne leettsa mretab re ngot ngwa roo baa, tsa nzhab re ngot re kuu mwii re ngot lo re tsuibthib zha kuu mteed lo Jesús, ne lo tedib net zha. ¹⁰ Ne re ngota nak kuu ngwalo diize lo re tsuibthib zha kuu mteed lo Jesús; Mari Magdalen, Juan ne Mari xnaa Santiag ne tedib net ngot. ¹¹ Per lee re zha kuu mteed lo Jesús mgab ndata leettsou zha

mbin zha re kuu nhab re ngot lo re zha, ne ngwalaazt zhay.

¹² Oraaka lee Pey ngwateli ne mrozhonn ngwa roo baa. Ne or mzin Pey mwii Peyleen baa, ne beeta lar kuu mchiix zha Jesús mwii Pey, tsa kwathoz mzegey leettsoo Pey ndya Pey, tak mwii Pey kona.

*Jesús ngwani lo chop zha kuu nda net Emaús
(Mt. 16:12-13)*

¹³ Leeka wiza lee chop zha kuu mteed lo Jesús nda net yez Emaús, yez kuu nzi teeka tsuibthib kilometro lo yez Jerusalén. ¹⁴ Nda rop zha ne ndediz zha re kuu ngok. ¹⁵ Ne leettsa ngetediz rop zha, leeka ora lee Jesús nda ndiy kon rop zha, ¹⁶ per thib kuu mtow lo rop zha, kona mlebeet zha Jesús. ¹⁷ Tsa lee Jesús mnaabdiz lo rop zha ne nhab:

—¿Chu kwent ngetediz goo ndo goo net?

Tsa mlet rop zha ne kwathoz nabil ngoo leettsoo rop zha.

¹⁸ Tsa lee thib zha kuu le Cleofas nhab lo Jesús:

—¿Chu nagt Jerusalén mroo'a? ¿Chu ter gona re kuu ngok nal leen re wizree?

¹⁹ Tsa lee Jesús mnaabdiz lo rop zha ne nhab:

—¿Kwan ngok?

Lee rop zha mkab ne nhab:

—Lee nee ngetediz kwent chaan Jesús zha Nazaret, lee zha ngok thib zha kuu kwathoz nataak ne ngok zha profet lo re men. Diox mtaal zha mtsow zha re kuu thoz, ne mni zha kon yalnabee lo re men, ne kwathoz mzegey leettsore re men mwii re kuu mtsow zha. ²⁰ Ne lee re ngwleyy kuu nabee lo re ngwleyy ne re zha kuu nabee, mndaa zha Jesús lo re zha kuu mbeth Jesús, ne mke zha Jesús lo kruz. ²¹ Ne lee re nee mtsow xgab lee Jesús gak zha kuu nabee lo re tawlaaza, ne tenet zha re zha yez Roma, per nal nda'a tson wiz nguth zha. ²² ¡Per nal til ree lee chop tson ngot mtsow mzegey leettsoo nee, tak ngwa re ngot roo baa Jesús, ²³ ne mzalt ngot kwerp Jesús! Ne leettsa mretab re ngot ne ngot lo nee, lee ngot mwii chop mandad chaan Diox, kuu nhab lo ngot lee Jesús naban. ²⁴ Tsa ngwa chop tson nee, ngwatalii roo baa, ne leeka taxal mne re ngota ne zha, per mwiiit zha Jesús.

²⁵ Tsa lee Jesús nhab lo rop zha:

—¡Chebee kwathoz naye yek goo! Ne chebee kwathoz nad leettsoo goo ne nyelaazt goo re kuu nhab re profet kuu ngoo ndala? ²⁶ ¿Chu ndoblot rid Crist Kuu Taal Diox Nabee yalti, ne tsaraa bretab zha ndya zha lo xni ta nabee zha?

²⁷ Tsa lee Jesús mndelo mndaa kwent naa xomod mrolo re kuu nke lo xkeets Diox kwent Jesús, ne mndelo Jesús mndaa kwente kon re kuu mke Moisés lo re libr

chaan ley ne re kuu mke re profet kuu ngoo ndala.

²⁸ Ne leettsa mzin rop zha yez ta nda zha, tsa lee Jesús mtsow taxal thib zha kuu nda mas tith, ²⁹ tsa lee rop zha nhab lo Jesús:

—Blet kon nee, tak mzi'a yezlyu.

Tsa mlet Jesús lo rop zha.

³⁰ Leettsa nzi re zha roo mes wu zha, ora mzhen Jesús pan ne mndaa Jesús texkix lo Diox ne mtsow rol Jesús pan ne mndaa Jesús pan lo rop zha. ³¹ Tsaraa mzhaal lo rop zha, ne mlebee zha Jesús. Per oraaka lee Jesús mnith lo rop zha. ³² Tsa nhab rop zha lo altaa zha:

—¿Chu wlipaap neeka lut myeentaa leettsa ndyaadaa ngetedizaa net, leettsa ngetaa zha kwent xkiiz Diox kuu nke lo xkeets Diox lo ropaa? ¿Chu thitanax mdowte leettsoo'aa ora?

³³ Ne oraaka ngoo rop zha net mretab zha yez Jerusalén tedib welt. Ne leettsa mzin rop zha tsa mzaal zha re tsuibthib zha kuu mteed lo Jesús, ne tedib net re zha kuu nzi kon re zha'a. ³⁴ Tsa nhab re zha lo rop zha'a:

—Wlipaa mroban Zha Nabee, tak mwii'a Simún zha.

³⁵ Tsaraa lee rop zha'a mndaa kwent, naa xomod mwii zha Jesús leettsa ndo zha net, ne xomod mlebee rop zha Jesús, leettsa mtsow rol Jesús pan.

*Jesús cha mtsetab lo re zha kuu mteed lo Jesús
(Mt. 28:16-20; Mr. 16:14-18; Jn. 20:19-23)*

³⁶ Leettsa lee re zha bee ngetedizka re kona, lee Jesús cha mtsetab lo re zha, ne nhab lo re zha:

—Wen brii goo.

³⁷ Per lee re zha kwathoz mzeb zha, ne mndaa leettsoo zha thib xbi thib zha ngewii. ³⁸ Per lee Jesús nhab lo re zha:

—¿Chebee kwathoz nzeb goo? ¿Ne chebee nhak chop xgab goo? ³⁹ Wii goo yaan ne niin. ¡Nay! Bdiinn goo na, tsa ne goo nay. Tak thib mbi yent beel mbi neeka yent tsidth mbi, taxal na.

⁴⁰ Leettsa ngwalo nhab Jesús kona, tsa mloo Jesús yaa Jesús ne nii Jesús lo re zha.

⁴¹ Ne tegal tata mloo Jesús yaa Jesús ne nii Jesús lo re zha, per ngwalaazt zhay, tak bee laz re zha. Tsa nhab Jesús lo re zha:

—¿Chu nap goo lut kuu dowaa nzhee?

⁴² Tsa mndaa zha thib le mbel kuu mbyex lo ki lo Jesús. ⁴³ Ne tyaka lo re zha ndow Jesús kona. ⁴⁴ Tsa nhab Jesús lo re zha:

—Koree nak kuu mniin lo re goo, leettsa mndon kon re goo, reta kwent chaan da kuu nke lo ley chaan Moisés, ne re kuu nhab re profet Diox zha ndala, ne re kuu mke zha lo libr chaan salm, retay mrolo.

⁴⁵ Tsaraa mtsow Jesús mzhaal yek re zha, tsa myen re zha xkiiz Diox. ⁴⁶ Tsa nzhab Jesús lo re zha:

—Tbaa nzhab lo xkiiz Diox lee Crist Kuu taal Diox Nabee ndoblo gath, ne leettsa tsaal tson wiz lee zha roban, ⁴⁷ ne ndoblo taa goo kwent re koree lo reta men kuu nzo reta yez dib naxta lo yezlyu, ne ndoblo telo goo yez Jerusalén, ne koree nak kuu ndoblo gab goo lo zha, ndoblo tsee zha mod went kuu nak zha, tsa tuyy Diox re falt zha. ⁴⁸ Re goo ndoblo taa kwent chaan da, tak re goo mbin ne mwii re kuu mtsow'n. ⁴⁹ Kenza goo. Lee na taal zha kuu mne Xut'n taal Xut'n lo goo, per ndoblo kwet goo yez Jerusalén, asta yelo kayaa goo yalney kuu roo yibaa.

Jesús ndya yibaa

(Mr: 16:19-20)

⁵⁰ Tsa mlloo Jesús re zha tyo ne mndeno Jesús re zha asta thib yez kuu le Betania, tsa mlap Jesús yaa Jesús ne mnaab Jesús lo Diox por re zha, tsa kenap Diox re zha. ⁵¹ Ne leettsa bee ngenika Jesús lo Diox, zhega zhega ngwaap Jesús yibaa. ⁵² Ne leettsa ngwalo mbil re zha lo Jesús, kwathoz laz re zha mretab zha Jerusalén tedib welt. ⁵³ Ne thibka nzi re zha lee roo gwodoo chaan Diox, nzhool zha ne ndaa zha texkix lo Diox.

Diiz Chul chaan Jesucrist kuu mkee Juan

Lee diiz Naban ngok men

¹ Leettsa ter yo neeka thib kwaas, lee diiz naban nzo'a, ne lee diiz naban ndo kon Diox, ne leeka diiz naban nak Diox. ² Lee diiz naban ree ndo'a kon Diox desde ndala. ³ Ne por diiz naban mdexkwaa reta kwaas, ne os nagte por diiz naban neeka thib re kuu nzo nal gatekwaate. ⁴ Lee diiz naban ree nak yalnaban, ne lee yalnaban nak xni lo re men yezlyu. ⁵ Lee xni ree ndaa xni lo yalkow, ne lee yalkow gagt tuyye.

⁶ Ngoo thib mbyi kuu le Juan, Diox mtaal Juan, ⁷ tsa myaad Juan par mndaa Juan kwent chaan xni, tsa yelaaz re men zha kuu nak xni por lee Juan. ⁸ Nagt Juan xni, per lee Juan nak thib zha kuu mtaal Diox mndaa kwent chaan xni. ⁹ Tsa lee xni kuu wlipaa nak xni kuu nteni lo re men, ndyaad lo yezlyu ree.

¹⁰ Lee zha kuu nak diiz naban myaad lo yezlyu ree, ne tegal por lee zha mdexkwaa Diox yezlyu ree; per lee re men yezlyu ree mlebeet zha zha. ¹¹ Lee zha myaad por re tawlaw zha, per lee re tawlaw zha mkayaat zha zha. ¹² Per lee re zha kuu mkayaa zha ne ngwalaaz zha, mndaa zha diiz lo re zha'a, par gak re zha'a zhiinn Diox. ¹³ Lee re zha ree nak zha zhiinn Diox, tak tata nlaaz Diox, ne nagte tak nlaaz xut zhay o xnaa zhay.

¹⁴ Lee diiz naban ngok men, mban zha ne ngoo zha xid re nee, mwii nee yalnkelaaaz chaan zha ne mne nee wli kuu nzhab zha. Ne noga mwii nee yalnabee chaan zha kuu mndaa Xut zha lo zha; ne yalnabee ree mloo beeta lee zha nak Xgann Diox. ¹⁵ Juan mndaa kwent chaan zha, leettsa nzhab Juan:

—Zha ree nak zha kuu mteth'n lo goo leettsa mnin: “Lee zha kuu ndyaad tut bluz nake na, mas nataak zha'a nake na, tak nzo'a zha'a desde ndala leettsa terka gal'n”.

¹⁶ Ne retalee nkayaa'aa yalwen lo zha, thibe ne tedibe nkayaa'aa. ¹⁷ Moisés nak cho mndaa ley chaan Diox lo re men, per lee yalnkelaaaz chaan Diox ne kuu wli myaad por Jesucrist. ¹⁸ Neeka thib men ter wii Diox, beeta Xgann Diox kuu thita lo Diox, kuu thibka ndo lo Diox mwii lo Diox, ne lee Xgann Diox nak cho mloo naa xa nak Diox.

Juan kuu mtsowleyy mndaa kwent chaan Jesús

(Mt. 3:11-12; Mr. 1:7-8; Lc. 3:15-17)

¹⁹ Leettsa lee re zha Israel zha Jerusalén, mtaal re ngwleyy ne re zha kuu ntsow ayud re ngwleyy ngwanaabdiz lo Juan, naa cho

nak Juan. ²⁰ Tsa lee Juan mkab lo re zha, ne nzhab Juan:

—Nagt'n Crist Kuu Mtaal Diox Nabee.

²¹ Tsa lee re zha mre mnaabdiz lo Juan, ne nzhab:

—¿Cho naka tsa? ¿Chu lu nak Lí, profet kuu ngoo ndala?

Juan mkab ne nzhab:

—Nagte na.

Tsa mre re zha nzhab:

—¿Chu lu nak tedib re profet kuu ngoo ndala, kuu naka diiz yaad?

Lee Juan mkab ne nzhab:

—Nagte na.

²² Tsa mre re zha mnaabdiz zha:

—¿Cho naka tsa? Tak ndoblo gab nee thib kwaal lo re zha kuu mtaal nee. ¿Chu tak ne'a lo nee naa cho naka?

²³ Juan mkab ne nzhab:

—Na, nak thib thib bos kuu nii thib ta yubiz, taxal nzhab profet Isaí zha ndala, or kuu nzhab zha: ¡Bxaal goo thib net nali par te Zha Nabee! [Is. 40:3]

²⁴ Tsa lee re zha kuu mtaal re fariseo lo Juan, mre mnaabdiz lo Juan, ²⁵ ne nzhab:

—Os lee'a nagta Crist Kuu Mtaal Diox Nabee, neeka nagta Lí, ne neeka nagta thib re profet, ¿chebee ntsowleyya re men tsa?

²⁶ Juan mkab, ne nzhab:

—Na ntsowleyy re men kon nit, per xid goo ndo thib zha kuu nlebeet goo, ²⁷ lee zha ndyaad tut bluz nake na, per masraa nataak zha nake na, ne kona neeka korre dits labyid zha ndoblot'n xak'n.

²⁸ Ne reta koree ngok thib ta le Betania, tedib lad roo yoo Jordán, ta mtsowleyy Juan re men.

Jesús nak Mbak zhiil Diox

²⁹ Ne lee tedib wiza mwii Juan lee Jesús ndyaad lo Juan, tsa nzhab Juan:

—¡Wii goo, zha ree nak Mbak zhiil Diox,

kuu nkib falt chaan re men yezlyu ree!

³⁰ Zha ree nak zha kuu mndan kwent lo goo or kuu mnin: “Tut bluz nake na ndyaad thib zha kuu mas nataak nake na, tak nzo'a zha desde ndala leettsa terka gal'n”. ³¹ Tegal mlebeet'n zha, per mtsowleyy're men kon nit, par lebee re zha Israel zha.

³² Ne noga mndaa Juan kwent ne nzhab Juan:

—Mwiin lee Mbi Nayon mroo lobee taxal thib palom mla dits zha. ³³ Ne lee na net'n cho nak zha tsya. Per lee zha kuu mtaal'n tsowleyy're men kon nit, ne lon: “Loka zha kuu wii'a la Mbi Nayon dits ne yaan Mbi Nayon lo, zha'a nak zha kuu tsowleyy kon Mbi Nayon”. ³⁴ Ne na mwiiy, ta mod ndan kwent lo re men, lee zha nak Xgann Diox.

Jesús mrez Ndres ne Pey

³⁵ Ne lee tedib wiza, leeka tya ndo Juan kon chop zha kuu geeted lo Juan. ³⁶ Or

mwii Juan lee Jesús nderid tya, tsa nzhab Juan:

—JWii goo, zha baa nak, Mbak zhil Diox!

³⁷ Ne mbin rop zha kuu ngeteed lo Juan kuu nzhab Juan, tsa mnndeke rop zha dits Jesús. ³⁸ Or mtsere lo Jesús lee rop zha'a ndeke dits Jesús, tsa mnaabdiz Jesús lo rop zha, ne nzhab Jesús:

—¿Kwan nkwaan goo?

Lee rop zha mkab ne nzhab:

—Maestr, ¿pa nzo'a?

³⁹ Jesús mkab ne nzhab lo rop zha:

—De goo, tsa ne gooy.

Tsa ngwa rop zha, ne mwii zha pa nzo Jesús, ne myaanka rop zha kon Jesús wiza, tak nda'a or, ora nzhab teeka las cuatro wiza.

⁴⁰ Ne lee Ndres wets Simún Pey, nak thib zha lo rop zha kuu mbin kuu nzhab Juan, ne mnndeke zha dits Jesús. ⁴¹ Ne or mzal Ndres wets Ndres kuu le Simún, tsa nzhab Ndres lo Simún:

—Mwii'a nee Zha Kuu Mtaal Diox Nabee (zha le Crist).

⁴² Tsa ndano Ndres Simún ta ndo Jesús, ne or mwii Jesús lo Simún, tsa nzhab Jesús lo Simún:

—Lu nak Simún, xgann Jonás, per desde nal lee'a role Cefas (diiz ree nak "Pey").

Jesús mrez Lip ne Natanael

⁴³ Ne tedib wiza lee Jesús mroo nda yezlyu Galilea. Tsa mwii Jesús Lip ne nzhab Jesús lo Lip:

—Bteke dits'n.

⁴⁴ Ne lee Lip nak zha yez Betsaida, tawlaz Ndres rop Pey nak Lip. ⁴⁵ Tsa ngwakwaan Lip Natanael, ne or mzal Natanael lo Lip, nzhab Lip:

—Mzala nee zha kuu mndaa Moisés kwent lo libr chaan ley, leeka zha kuu mndaa re profet kwent. Lee zha nak Jesús xgann Che zha Nazaret.

⁴⁶ Tsa nzhab Natanael:

—¿Chu tak roo thib zha ro yez Nazaret?

Lip mkab ne nzhab:

—De, tsa ne luy.

⁴⁷ Or mwii Jesús lee Natanael ngebig lo Jesús, tsa nzhab Jesús:

—Baa ndyaad thib zha kuu wlipaa nak zha Israel, thib zha kuu nkedit.

⁴⁸ Tsa lee Natanael mnaabdiz lo Jesús ne nzhab:

—¿Xomod nlebee'a na?

Jesús mkab lo Natanael ne nzhab:

—Or kuu ter kwez Lipa, mwiin lee'a ndob xann ya ig.

⁴⁹ Tsa nzhab Natanael lo Jesús:

—Maestr, ¡lu nak Xgann Diox, lu nak rey lo re zha Israel!

⁵⁰ Jesús mkab lo Natanael, ne nzhab:

—¿Nyelaaza na tak nin lo'a: Lee'a ndob xann ya ig? Per nalraa wii'a masraa re kuu thoz nake koree.

⁵¹ Noga nzhab Jesús lo re zha:

—Wlipaa na nin: Desde naltseraa wii goo lee lobee zhaal, ne lee re mandad chaan Diox ndeke ne ndela lo na, Kuu Mzin Ngok Men.

2

Jesús ngwa thib Jwandan

¹ Ne leettsa nda'a tson wiz, tsa ngoo thib fandán yez Caná, yez kuu nzi yezlyu Galilea. Ne tya ndo xnaa Jesús, ² ne noga mrez zha Jesús kon re zha kuu ngeteed lo Jesús, tsa ya re zha lo fandán. ³ Per leettsa mbiz xit ub, tsa nzhab xnaa Jesús lo Jesús:

—Nkenot raa zha ree xit ub.

⁴ Tsa lee Jesús mkab ne nzhab:

—¿Chebee lon mbeza koree? Bee ter tsin or kuu leen tsow koree.

⁵ Per lee xnaa Jesús nzhab lo re zha kuu ngeyiid xit ub:

—Btsow goo reta kuu ne zha lo goo.

⁶ Ne tya nzi xoop ree ke, kuu nlortsin re zha Israel par nyoo nit kuu na zha, tsa nzhab nambi zha lo Diox ley lo zha. Ne kadta thib re ree'a nyoo teeka thap gal o thib gayoo litr nit. ⁷ Tsa nzhab Jesús lo re zha kuu ntsow tsuin ty:

—Btse goo re ree baa bloo goo nit.

Ne mtse zhay mlloo zha nit. ⁸ Tsa nzhab Jesús lo re zha:

—Bloo goo lutte, ne be gooy lo zha kuu nabee lo goo.

Ne tata mtsow zha. ⁹ Ne lee zha kuu nabee lo re zha mtsow preb nit kuu mreyal xit ub, per neeka net zha pa mrooy, beeta re zha kuu ntsow tsuin ne pa mrooy, tak re zha mtsre ree. Ne lee zha kuu nabee lo re zha mrez mbyi kuu mtseyaa, ¹⁰ ne nzhab zha lo mbyi:

—Reta zha, ner ndaa zha xit ub kuu mas wen, ne or lee re zha kuu mrez zha yaad lo ani ngwii'a zha naroobe, tsaraa ndaa zha xit ub kuu rax. Per lee lu mlotswa xit ub kuu wen par kiida bluz.

¹¹ Koree mtsow Jesús yez Caná kuu nzi yezlyu Galilea, ne koree nak thib re kuu thoz, kuu ner mtsow Jesús, tenzhee mlloo Jesús yalnabee chaan Jesús, tsa lee re zha kuu ngeteed lo Jesús ngwalaaz zha Jesús.

¹² Leettsa ngwalo mriid koree, tsa ngwa Jesús yez Capernaúm kon xnaa Jesús, kon re wets Jesús ne kon re zha kuu ngeteed lo Jesús, ne mlet re zha tya chop tsonta wiz.

Jesús mtezhonn re zha kuu ntho maa lee roo gwodoo naro

(Mt. 21:12-13; Mr. 11:15-18; Lc. 19:45-46)

¹³ Ne tsya ndetsin gaxa ani Paskw chaan re zha Israel, tsa ngwa Jesús yez Jerusalén.

¹⁴ Ne mndaab Jesús roo gwodoo naro Jerusalén, ne mwii Jesús re zha kuu ntho ngor, re zha kuu ntho mbak zhiil, re zha kuu ntho palom, ne re zha kuu ndob ntsiil temi lo re men. ¹⁵ Ne or mwii Jesús re zha, tsa mzhén Jesús chop tson doo bzhizh ne mdexkwaa Jesús thib bins, ne kon binsa mloo Jesús re zha lee gwodoo kon re mbak zhiil zha ne kon re ngor zha. Ne mchaats Jesús re temi re zha kuu ntsiil temi, ne mlobi Jesús re mes chaan re zha'a. ¹⁶ Ne nzhab Jesús lo re zha kuu ntho palom:

—¡Nalorka bloo goo re maa goo nzhee!
¡Tsowt goo xbi leen liz Xut'n Diox!

¹⁷ Tsa lee re zha kuu ngeteed lo Jesús mtelaa xkiiz Diox ta nzhab: "Nkezhan na por re kuu ntsow zha leen liza". [Sal. 69:9]

¹⁸ Tsa lee re zha Israel mnaabdiz lo Jesús ne nzhab:

—¿Kwan thib kuu loo'a lo nee, tsa ne nee'ea a mtsow re koree kon yalnabee chaan Diox?

¹⁹ Jesús mkab lo re zha ne nzhab:

—Bluux goo gwodoo ree, ne lee na tsonka wiz taa nay tedib welt.

²⁰ Tsa lee re zha Israel nzhab lo Jesús:

—Chop galbxoop liin mta zha gwodoo naro ree, ¿ne lee lu tsonka wiz taa luy?

²¹ Per gwodoo kuu mteth Jesús lo re zha nak kwerp Jesús. ²² Kona leettsa mroban Jesús xid re zha nguth, tsa lee re zha kuu ngeteed lo Jesús mtelaa kuu nzhab Jesús, ne ngwalaaz zha re kuu nzhab lo xkiiz Diox ne re kuu nzhab Jesús, nak kuu wli.

Jesús nlebee reta men

²³ Leettsa bee ndo Jesús lo ani Paskw yez Jerusalén, kwaro zha ngwalaaz Jesús, tak mwii zha mtsow Jesús re kuu thoz lo re men. ²⁴ Per nyelaazt Jesús kuu mbeze re men, tak nlebee Jesús reta men. ²⁵ Ne ndechet Jesús naa cho taa kwent lo Jesús naa xa nak re men, tak lee Jesús nlebee leettsa reta men.

3

Jesús ne Nicodemo

¹ Ngoo thib mbyi kuu le Nicodemo kuu nak fariseo, ne lee mbyi'a nak thib zha kuu nataak lo re zha Israel. ² Thib btsi ngwa zha lo Jesús ne nzhab zha:

—Maestr, nee ne lee Diox mtaala lo nee, tak yent cho tak tsow re milagr thoz kuu ntsowa, os lee Diox ndot kon lee zha.

³ Tsa nzhab Jesús lo zha:

—Wlipaa na nin lo'a, loka cho galt tedib welt, gagt tab zha ta nabee Diox.

⁴ Tsa mnaabdiz Nicodemo, ne nzhab zha:

—¿Xomod tak gal men tedib welt leettsa ngozha men? ¿Chu tak tab men leettsa xnaa men ne gal men tedib welt?

⁵ Lee Jesús nzhab lo zha:

—Wlipaa na nin lo'a, os galt zha leen nit ne kayaat zha Mbi Nayon chaan Diox, gagt tab zha ta nabee Diox. ⁶ Lee zha kuu nzhal lo men, men nak zha, ne lee zha kuu nkayaa Mbi Nayon leen leettsoo zha, taxal Mbi Nayon nak zha. ⁷ Tsegeyt leettsoo'a tak nin lo'a: "Ndoblo gala tedib welt." ⁸ Lee mbi nzhab mbi loka pa nlaaz mbi, ne tegal nzhonha nzhab, per neta naa pa ndyaade ne neeka neta naa pa nday. Tbaa nak re zha kuu nkayaa Mbi Nayon chaan Diox leettsoo.

⁹ Lee Nicodemo mre mnaabdiz lo Jesús ne nzhab:

—¿Xomod tak gak re koree?

¹⁰ Tsa nzhab Jesús lo Nicodemo:

—¿Lu nak maestr lo re zha Israel, ne xomod nyenta koree? ¹¹ Wlipaa na nin lo'a, nee ndediz nee kuu ne nee, ne ndaa nee kwent kuu mwii nee, per lee re goo nyelaazt goo re kuu nii nee. ¹² Ne os lee goo nyelaazt goo re kuu yezlyu ree kuu ndan kwent lo goo, ¿xomod yelaaz goo os kuu yibaa tan kwent lo goo?

¹³ 'Neeka thib men ter ya yibaa, sinke beeta zha kuu mroo yibaa ne mla lo yezlyu ree, ne lee zha kuu nteth'n lo'a nak na, Kuu Mzin Ngok Men. ¹⁴ Ne leeka taxalka mkeee Moisés mbeel lo ya yubiz, tataka kee zha na, Kuu Mzin Ngok Men lo ya, ¹⁵ tsa reta zha kuu yelaaz'n, tsow zha gan yalnaban kuu thitanax.

Nke leettsa Diox re men yezlyu ree

¹⁶ Ne tak kwathoz mke leettsa Diox reta men kuu nzi lo yezlyu ree, kona mtaal Diox thibka Xgann Diox kuu nkeno Diox myaad lo yezlyu ree, ne lee zha kuu yelaaz Xgann Diox, gatht zha, sinke keno zha yalnaban kuu thitanax. ¹⁷ Tak mtaalt Diox Xgann Diox lo yezlyu ree, par naab Diox kwent lo re men ne par teti Diox re men, sinke mtaal Diox Xgann Diox, tsa por Xgann Diox tsow re men gan yalnaban kuu thitanax.

¹⁸ Ne lee zha kuu yelaaz Xgann Diox, naabt Diox kwent lo zha'a, per lee re zha kuu yelaazt Xgann Diox wlipaa mnaaba Diox kwent lo zha'a, tak ngwalaazt zha Xgann Diox kuu thibka lo Diox. ¹⁹ Ne re zha kuu yelaazt Xgann Diox, mnaaba Diox kwent lo re zha'a, tak leettsa myaad zha kuu nak xni lo yezlyu ree, mas myow leettsoo re men yalkow nake xni, tak pur kuu went ntsow zha. ²⁰ Reta zha kuu ntsow kuu went, nayii zha ne zha zha kuu nak xni, ne mbigt zha lo xni, tsa loot re kuu went kuu ntsow zha. ²¹ Per lee re zha kuu ndeke dits kuu wli, mbigt zha lo xni, tsa loot re kuu went kuu ntsow zha nak kuu nlaaz Diox.

Juan mre mndaa kwent chaan Jesús tedib welt

²² Bluz leettsa ngwalo nzhab Jesús koree, tsa mroo Jesús kon re zha kuu ngeteed lo

Jesús yez Jerusalén, ne ngwa Jesús yezlyu Judea, tyā mlet re zha chop tson wiz, ne mtsowleyy zha re men.²³ Ne nog Juan get-sowleyy re men xlen, kuu le Enón, gaxta thib ta le Salim, tak tyā nzo naroob nit ne lee re men nya lo Juan, ne ntsowleyy Juan re zha.²⁴ Re koree ngok, leettsa ter ko zha Juan tsib.

²⁵ Per lee chop tson zha kuu ngeteed lo Juan mndelo mbyodiz kon thib zha Israel, kwent chaan xomod gak nambi men lo Diox,²⁶ tsa myaad zha mnaabdiz zha lo Juan ne nzhab zha:

—Maestr, lee zha kuu mndo rop goo roo yoo Jordán, zha kuu mndaa'a kwent lo nee, nal lee zha ngetsowleyy re men, ne reta men nya lo zha.

²⁷ Tsa lee Juan nzhab lo re zha:

—Neeka thib zha gagt kayaa thib kwaas os lee Diox taate lo zha.²⁸ At mbin goo kwathoz nambi mnin, nagt'n Crist Kuu Mtaal Diox Nabee, lee na nak beeta thib zha kuu mtaal Diox ndener lo zha.²⁹ Tak lee lo thib fandan, lee mbyi kuu nden yaa nzaa, nak kuu tseyaa kon nzaa, ne lee amig mbyi kuu tseyaa'ndo tya, ne nzhon amig mbyi kwan ndediz rop zha kuu tseyaa', ne naley nzo leettsao amig mbyi nzhon amig mbyi ndediz rop zha kuu tseyaa'. Kona leeka tata kwathoz naley nzo leettsao.³⁰ Tak lee zha ndoblo gak zha masraa nataak, ne lee na ndoblo gak'n zha kuu nataagt raa.

Zha kuu mroo yibaa

³¹ Lee zha kuu mroo yibaa nabee zha lo reta men ne lo reta kwaas. Lee zha yezlyu ree, zha yezlyu ree nak zha, ne pur kuu yezlyu ree ndediz zha. Per lee zha kuu mroo yibaa, zha'a nak zha kuu nabee lo reta men ne lo reta kwaas,³² ne ndediz zha kuu mwii zha ne kuu mbin zha, per neeka thib zha nyelaazt kuu ni zha.³³ Per lee zha kuu nyelaazt kuu ni zha, zha'a nlloo lee Diox nali nak.³⁴ Tak lee zha kuu mtaal Diox taa kwent chaan Diox, ndaa zha kwent chaan Diox ne ndaa Diox Mbi Nayon lo zha, ne ngwiit Diox ploy ndaa Diox lo zha.³⁵ Nke leettsao Xut zha zha, ne mndaa Xut zha yalnabee lo Zha, tsa nabee zha reta kuu nzo lo yezlyu ree ne lobee.³⁶ Ne loka zha kuu yelaazt Xgann Diox, tetsow zha'a gan yalnaban kuu thitanax, per lee zha kuu yelaazt Xgann Diox, tsowt zha'a gan yalnaban, sinke lee yalnayii chaan Diox la dits zha'a.

4

Jesús mndediz lo thib ngot kuu nak zha yez Samaria

¹ Tsa mbin re fariseo lee dits Jesús ndeke masraa zha nake dits Juan, ne masraa zha nda ntsowleyy Jesús nake Juan.² Per tegal leet Jesús ntsowleyy re men, sinke re zha

kuu ngeteed lo Jesús ntsowleyy re men.³ Ne leettsa myeen Jesús kona, tsa mroo Jesús yezlyu Judea ne nda Jesús yezlyu Galilea tedib welt.

⁴ Per or nda Jesús, ndoblo rid Jesús yezlyu Samaria.⁵ Tsa mzin Jesús thib yez chaan Samaria kuu le Sicar, ne gax tya nax thib le yu kuu mndaa Kob lo Che xgann Kob.⁶ Ne tyā ndob pos kuu ni re zha pos Kob. Ne tak ngokwan Jesús ndo Jesús net, tsa mnneyy Jesús thib lad roo pos. Kona ngok teeka ndrol wiz.⁷⁻⁸ Ne lee re zha kuu ngeteed lo Jesús, mlaa zha Jesús, ne nda re zha yez ndati zha kuu wu zha. Ne ora lee thib ngot kuu nak zha yez Samaria ngwaxii nit roo pos, tsa nzhab Jesús lo ngot:

—Taa lut nit gun.

⁹ Per lee re zha Israel nzaalt leettsoo kon re zha Samaria, kona lee ngota mkab, ne nzhab lo Jesús:

—¿Chebee lon naaba nit, si zha Samaria nak'n ne lee lu nak zha Israel?

¹⁰ Lee Jesús mkab lo ngot ne nzhab:

—Os lee'a nlebee'a kuu nataak kuu nde-laaz Diox, ne os ne'a naa cho nak zha kuu ngenaab nit lo'a, ne os lu naaba nit lo zha, lee zha taa nit kuu ndaa yalnaban gu'a.

¹¹ Tsa lee ngot nzhab lo Jesús:

—Zha Nabee, per neeka thib kuu ndenta par koo'a nit, ne lee pos kwathoz naats, ¿ne pa nkeno'a nit kuu ndaa yalnaban kuu taa'a gun?¹² Naa ¿chu masraa nataaka nake tey nee Kob? Lee zha mlaa pos ree lo nee, ne lee zha, re zhiinn zha ne re maa zha ngwii nit pos ree.

¹³ Ora mkab Jesús ne nzhab Jesús lo ngot:

—Reta zha kuu nzhuu nit pos ree, tebre tob xyeek leettsao zha,¹⁴ per lee zha kuu gu nit kuu tan, thitanax bret raa zha tob xyeek leettsao zha, tak lee nit kuu tan gu zha, leettsao zha gake taxal thib xlen nit, kuu ndaa yalnaban kuu thitanax.

¹⁵ Tsa lee ngot nzhab lo Jesús:

—Zha Nabee, taa nita gun, tsa tob xyeegt raa leettsao, ne tsa yalt raa na yaadlon nit nzhee.

¹⁶ Ora nzhab Jesús lo ngot:

—Gwa gwaxii tsala, tsaraa yaada nzhee.

¹⁷ Lee ngot mkab ne nzhab:

—Napt'n tsaal'n.

Tsa nzhab Jesús lo ngot:

—Wli'a kuu ne'a, napt'a tsala,¹⁸ tak mkeno'a lu gaay tsala, ne lee zha kuu napa na, nagt zha tsala, wli'a kuu ne'a.

¹⁹ Or mbin ngot kona, tsa nzhab ngot:

—Ndak'n thib profet naka.²⁰ Lee re tey nee zha ndala mbil zha lo Diox yek yii ree, per lee re goo zha Israel mbez goo, yez Jerusalén nak ta ndoblo golaa lo Diox.

²¹ Tsa lee Jesús nzhab lo ngot:

—Wlipaa na nin lo'a, too wiz kuu ndechet raa yaad goo yek yii ree, neeka Jerusalén,

par gol goo lo Diox. ²² Lee re goo net goo cho lo nzhoor goo, per lee re nee nee cho lo nzhoor nee, tak lo re zha Israel ndyaad yalnaban kuu thitanax. ²³ Per mzina or, ne nal nak or kuu lee re zha kuu wlipaa nzhoor lo Diox, gol zha lo Diox taxal nlaaz Mbi Nayon chaan Diox. Tak tata nlaaz Diox gol re men lo Diox. ²⁴ Diox nak mbi, ne lee re zha kuu wlipaa nzhoor lo Diox, taxal nlaaz Mbi Nayon, ndoblo gol zha lo Diox.

²⁵ Tsa nzhab ngot lo Jesús:

—Nen tyaad Zha Kuu taal Diox Nabee (kuu nak Crist), ne leetsa yaad zha, tsa ne zha naa xomod nak reta kwaao lo nee.

²⁶ Jesús nzhab lo ngot:

—jNaak zha'a, kuu ngetediz lo'a!

²⁷ Ne ora mzin re zha kuu ngeteed lo Jesús, ne kwathoz mzgey leettssoo re zha, tak mwii zha lee Jesús ngetediz kon thib ngot, per neeka thib zha myet leettssoo ganaabdz, kwan nlaaz ngot o cho kwent ngetediz Jesús kon ngot. ²⁸ Tsa lee ngota mlaa ree, ne ngwane ngot lo re men yez, nzhab ngot:

²⁹ —Ndaa goo, tsa wii goo thib mbyi, kuu mne lon reta kuu mtsow'n. ¿Naa chu nagt zha Crist Kuu Mtaal Diox Nabee?

³⁰ Tsa mroo re zha ne ngwa zha ta ndo Jesús. ³¹ Ne lee re zha kuu ngeteed lo Jesús, nzhab lo Jesús:

—Maestr, dowl lut kwaao.

³² Per lee Jesús nzhab lo re zha:

—Nap'n thib kwaao wun, per net goo kwane.

³³ Tsa lee re zha kuu ngeteed lo Jesús mnodelo zha mnaabdiz zha lo altaa zha, ne nzhab zha:

—¿Chu nzo cho myaadtaan kuu ndow zha?

³⁴ Per lee Jesús nzhab lo re zha:

—Lee kuu nzhow'nak, ntsow'n kuu nlaaz zha kuu mtaal'n, ne kona nak taxal kuu nzhow'n, ne wlipaa teyelo tsow nay.

³⁵ Lee re goo mbbez: “Bee nzhab falt thap mbee par thop zha yalgonn”, per lee na ni lo re goo, wii goo, ngoka yalgonn ne mzina wiz thop zhay. ³⁶ Lee zha kuu nke tsii par thop yalgonn, nzhab lo zha, ne lee yalgonn kuu nthop zha, nak kuu xek thitanax, tsa lee zha kuu mloo bin, ne zha kuu mthop yalgonn kwathoz naley nzo leettsoo rop zha. ³⁷ Wli kuu nzhab diiz: “Thib zha ngo bin lo yu ne lee tedib zha nthop yalgonn”. ³⁸ Na mtaal goo thop goo yalgonn kuu ngonnt goo, tedib net zha nak zha kuu ngonne ne mtembiy, per lee re goo thope ne kayaay.

³⁹ Kwathoz zha yez Sicar kuu nzi yezlyu Samaria ngwalaaz Jesús, tak lee ngota nzhab lo re zha: “Mne zha reta kuu mtsow'n”. ⁴⁰ Ne or lee re zha yez Samaria mzzi, tsa nzhab zha lo Jesús, kwet Jesús lo re zha. Tsa mlet Jesús lo re zha chop wiz, ⁴¹ ne

naroob raa zha ngwalaaz Jesús por re kuu nzhab Jesús. ⁴² Ne nzhab re zha lo ngot:

—Nagt beeta por kuu ne'a lo nee, tsa nyelaaz nee Jesús, sinke mbina nee kuu ne Jesús, ne kona ne nee wlipaa lee Jesús nak zha kuu ntelaar re men lo yalguth ne ndaa yalnaban lo re men.

Jesús mtegwe zhiinn thib mbyi kuu nataak lo rey

⁴³ Leettsa nda'a chop wiz, tsa lee Jesús mroo ndya par yezlyu Galilea. ⁴⁴ Ne leeka Jesús nzhab lo re men, nzhort re men diiz lo thib zha kuu nak profet, leettsa tawlaazka zha nak Profet. ⁴⁵ Per leettsa mzin Jesús Galilea, wen mkayaa re zha Jesús tya, tak ngwa re zha lo ani Paskw yez Jerusalén, ne mwii zha re kuu mtsow Jesús tya.

⁴⁶ Jesús mre ngwa yez Caná kuu nzi yezlyu Galilea, ta mtsow Jesús mreyal nit xit ub. Ne tya mzaal Jesús thib zha kuu nataak kuu nke tsii lo rey, ne lee xgann zha'a ne ndak nzo yez Capernaúm. ⁴⁷ Or lee zha kuu nataak lo rey mbin lee Jesús mzin yezlyu Galilea, tsa ngwa zha lo Jesús ne mnaab zha lo Jesús, ya Jesús liz zha, yategwe Jesús xgann zha kuu mer gath. ⁴⁸ Tsa nzhab Jesús lo zha:

—Os leen tsowt'n thib re milagr thoz lo goo, yelaazt goo na.

⁴⁹ Per lee zha'a nzhab lo Jesús:

—Zha Nabee, lijer ndaa tak cha gath xgann na.

⁵⁰ Tsa lee Jesús nzhab lo zha:

—Tyee liza, imgwe'a xganna, naban xganna!

Tsa lee zha'a ngwalaaz kuu nzhab Jesús ne ndya zha liz zha. ⁵¹ Ne or ndo zha net ndya zha liz zha, lee re mos zha ngwaxii net zha, ne nzhab lo zha:

—imgwe'a xganna!

⁵² Tsa mnaabdiz zha lo re mos zha, polor mnodelo ngoo wen leettsoo xgann zha, tsa lee re mos mkab ne nzhab:

—Naa'a a la una mroo xlee xganna.

⁵³ Tsa lee xut nde'a mtelaaz, leeka ora nzhab Jesús lo zha “naban xganna”. Tsa re lizta zha'a ngwalaaz Jesús.

⁵⁴ Ne koree ngok mrop milagr kuu mtsow Jesús, leettsa mroo Jesús Judea ne ndyaad Jesús par Galilea.

5

Jesús mtegwe thib zha mthans ta le Betesda

¹ Bluz leettsa ngwalo mriid koree, lee re zha Israel mtsow thib ani, tsa lee Jesús ngwa Jerusalén tedib welt. ² Ne leen yez Jerusalén, gax roo pwert kuu ni zha chaan re mbak zhiil, tya ndob thib tank kuu diiz hebreo le Betesda, kuu nap gaay korredor, ³ ne roo re korredora nzi thibana zha syeg, zha mthans

ne zha kuu gagt gwin. ⁴ Tya nzi re zha ngebet zha, or lee mandad chaan Diox kwin nit leen tank, ne loka zha kuu ner tab leen tank, ngwe zha lo yiz kuu ndak zha. ⁵ Ne xid re zha'a nzo thib zha mthans kuu nda'a galbtsiibxon liin ne ndak. ⁶ Ne or mwii Jesús lee zha nax tya, ne ne Jesús nda'a tyen liin tata ndak zha, tsa mnaabdiz Jesús lo zha, ne nzhab Jesús:

—¿Chu nlaaza we'a?

⁷ Lee mbyiza mkab ne nzhab:

—Zha Nabee, napt'n cho kon leent tank or lee nit gwin. Ne kadta leettsa nlaz'n taab'n leel ner tedib zha ndaab.

⁸ Tsa lee Jesús nzhab lo zha:

—Gwache, bthuz da'a ne bte.

⁹ Ne oraaka lee zha mgwe, ne mthuz zha da zha ne mndelo zha mnde zha. Ne kona ngok thib wiz sabd. ¹⁰ Tsa lee re zha Israel nzhab lo zha kuu mgwe'a:

—Naltseree nak wiz sabd kuu ndroxkwanaa, ndoblot gwe'a da'a.

¹¹ Tsa lee mbyi'a mkab ne nzhab:

—Zha kuu mtegwen ne lon: “Bzhen da'a ne bte”.

¹² Tsa lee re zha'a mnaabdiz lo mbyi'a ne nzhab:

—¿Cho ne lo'a: “Bzhen da'a ne bte”?

¹³ Per lee mbyi'a net mbyi naa cho mtegwe mbyi, tak lee Jesús mnith xid re men kuu nzi tya. ¹⁴ Tut bluz mzaal Jesús mbyi'a roo gwodoo, tsa nzhab Jesús lo mbyi:

—Wii mgwe'a lu, tsowt raa lu kuu went, tsa ridta tedib yalti kuu mas nathoz nake kuu mriida.

¹⁵ Lee mbyi'a ndya ne nzhab lo re zha Israel: “Jesús nak zha kuu mtegwen”.

¹⁶ Ne tak mtsow Jesús kona wiz kuu ndroxkwan re zha Israel, kona mreke re zha Israel dits Jesús ne nlaaz zha kuth zha Jesús. ¹⁷ Per lee Jesús nzhab lo re zha:

—Lee Xut'n thibka nke tsiiin, ne noga na tataga nkeen tsiiin.

¹⁸ Ne kona lee re zha Israel masraa nlaaz zha kuth zha Jesús, ne nagte tak beeta nke Jesús tsiiin wiz sabd, sinke tak noga nzhab Jesús lee Diox nak Xut Jesús, ne tata mod ntsow Jesús leeka lee Jesús taxal Diox ley lo zha.

Yalnabee chaan Xgann Diox

¹⁹ Tsa nzhab Jesús lo re zha:

—Wlipaa na nin, na nak Xgann Diox ne neeka thib kuu ntsowt'n tak nlaz'n tsow nay, beeta ntsow'n re kuu ngwiin ntsow Xut'n. Ne reta kuu ntsow Xut'n ntsowga nay. ²⁰ Ne tak nke leettsou Xut'n na nloo Xut'n reta kuu ntsow Xut'n lon, ne nalaroo loo Xut'n masraa kuu thoz lon, re kuu kwathoz tsegey leettsou goo wii goo. ²¹ Ne leeka taxal nteroban Xut'n re zha nguth, ne ntsow Xut'n mban zha tedib welt, leeka

tabaa ndan yalnaban lo zha kuu nlaz'n ta nay. ²² Ne nagt Xut'n kuu naab kwent lo re men, sinke mndaa Xut'n yalnabee lon tsa naab'n kwent lo re men, ²³ tsa reta zha gon diiz lon taxal nzhon zha diiz lo Xut'n; tak lee zha kuu nataagt'n lo, noga Xut'n kuu mtaal'n nataagt lo zha'a.

²⁴ Wlipaa na nin lo goo, loka zha kuu nkenza xkiz'n kuu nin lo goo, ne yelaaz zha lee Diox mtaal'n, tetsow zha'a gan yalnaban kuu thitanax, ne naabt Diox kwent lo zha'a wiz bluz, tak mroo'a zha'a xid re zha nguth ne nkено'a zha yalnaban kuu thitanax. ²⁵ Wlipaa na nin lo goo, mzin gaxa wiz, ne nal nak or kuu lee re zha nguth gon bos da, ne loka zha kuu gon bos da taban zha. ²⁶ Ne leeka taxal nap Xut'n yalnaban por leeka lee Xut'n, leeka tata mndaa Xut'n yalnabee lon par nap'n yalnaban, ²⁷ ne noga mndaa Diox yalnabee lo na, Kuu Mzin Ngok Men, tsa naab'n kwent lo re men. ²⁸ Tsegeyt leettsou goo por ree kuu nin lo goo, tak tetsin wiz kuu lee reta zha nguth gon bos da, ²⁹ tsa roo re zha leen baa. Ne lee re zha kuu mtsow kuu wen, roban zha par kayaa zha yalnaban, per lee re zha kuu mtsow kuu went, roban zha beeta par kayaa zha yalti kuu thitanax lo Diox.

Kuu nloo lee Jesús nak Xgann Diox

³⁰ Gagt tsow'n neeka thib kuu por leeka na. Naab'n kwent taxal nabee Xut'n lon, ne nali naab'n kwent lo re men, tak ntsowt'n kuu nlaz'n, sinke ntsow'n kuu nlaaz zha kuu mtaal'n. ³¹ Os leen ndan kwent chaanka na, wlit kuu ndan kwent. ³² Per nzo thib zha kuu ndaa kwent chaan da, ne nen wli kuu ni zha. ³³ Re goo mtaal zha kuu ngwa mnaabdiz lo Juan, ne wli kuu mkab Juan lo goo. ³⁴ Ne ndechet'n neeka thib zha kuu taa kwent chaan da, per nin koree lo goo, tsa ne goo tak laa goo lo yalguth ne tsow goo gan yalnaban. ³⁵ Juan nak taxal thib xni kuu mke ne mteni lo goo, ne lo xni chaan Juan ngwalaaz goo gayoo naley leettsou goo lut. ³⁶ Per lee na, nap'n thib zha kuu taa kwent chaan da mas nali, nake kuu mndaa Juan kwent. Re kuu ntsow'n leey nak re kuu mnabee Xut'n lon tsow'n, ne leey nloo lee Xut'n mtaal'n. ³⁷ Ne noga Xut'n kuu mtaal'n nzo fabor da, ne neeka ter gon goo bos chaan Xut'n, ne neeka ter wii goo Xut'n, ³⁸ ne neeka yent xkiiz Xut'n leettsou goo, tak nyelaatz goo lee Xut'n mtaal'n. ³⁹ Kwathoz nteed goo xkiiz Diox, tak ndak goo loy yetsal goo yalnaban kuu thitanax, per nyent goo lee xkeets Diox ndaa kwent naa cho nak'n. ⁴⁰ Per lee re goo nlaazt goo yaad goo lon, tsa keno goo yalnaban kuu thitanax.

⁴¹ Nkwaant'n tsa tsow nataak re men na. ⁴² Per nlebeen re goo, ne nen napt goo yalnkelaaaz chaan Diox leettsou goo.

⁴³ Na ndyal'n kwent chaan Xut'n, per lee re goo nkayaat goo na, ne os tedib zha yaad por kwent chaanka zha, zha'a si tekayaa goo. ⁴⁴ ¿Xomod yelaaz goo na, os beeta nkwaan goo par tsow nataak re men goo, ne nkwaant goo par tsow nataak Diox goo? ⁴⁵ Tsowt goo xgab lee na keki goo lo Xut'n, lee zha kuu nkeki goo nak Moisés kuu mndaa ley kuu nyelaaz goo, ne ndak goo por leey tsow goo gan yalnaban. ⁴⁶ Os wli nyelaaz goo kuu mkee Moisés, noga ndoblo yelaaz goo na, tak kwent chaan da mndaa Moisés lo re yeets kuu mkee Moisés. ⁴⁷ Per os nyelaazt goo kuu mkee Moisés, ¿xomod yelaaz goo kuu nin lo goo?

6

Jesús mndaa kuu ndow gaay mil men
(Mt. 14:13-21; Mr. 6:30-34; Lc. 9:10-17)

¹ Ne leettsa ngwalo mriid re koree, tsa ngwa Jesús tedib lad roo nitdoo Galilea, kuu le Tiberias. ² Ne naroob men mndeke dits Jesús, tak mwii zha re milagr thoz kuu mtsow Jesús lo re men kuu ne ndak. ³ Tsa lee Jesús kon re zha kuu ngeteed lo Jesús, mkkendab re zha yek thib yii ne tya mndob re zha. ⁴ Ne ndetsin gaxa anि Paskw chaan re zha Israel. ⁵ Or mtsere lo Jesús mwii Jesús lo re men kuu ndeke dits Jesús, tsa nzhab Jesús lo Lip:

—¿Pa yati'aa kuu wu re men ree?

⁶ Tenzhec mnaabdiz Jesús, tsa naa kwan gab Lip, tak ne'a Jesús naa kwan tsow Jesús. ⁷ Tsa lee Lip mkab lo Jesús ne nzhab:

—Neeka chop gayoo denario pan, gaate par wu re men lutgay.

⁸ Tsa lee Ndres thib re zha kuu ngeteed lo Jesús kuu naak wets Simún Pey, nzhab:

⁹ —Nzhee ndo thib nde lut kuu nap gaay pan cebad ne chop mbel; per pa ga koree wu naroob men.

¹⁰ Tsa nzhab Jesús:

—Guz goo lo re men tsa tob men.

Ne kwaro ndab yizhwan tya, tsa mndob re men ne beeta re mbyi nak teeka gaay mil zha. ¹¹ Tsa mzhén Jesús re pan, ne mndaa Jesús texkix lo Diox, ne mdid re zhay lo re men. Ne tataka mtsow Jesús kon rop mbel, ne mdow re zha asta plotha mze leettsoo zha. ¹² Or ngwalo ndow re zha, tsa nzhab Jesús lo re zha kuu ngeteed lo Jesús:

—Bthop goo re kuu mrozhooob, tsa yet-saate.

¹³ Tsa mthop re zhay, ne mtse zha tsiiibchop chekwit ngoo re kuu byu kuu mrozhooob lo re gaay pan. ¹⁴ Or mwii re men re milagr kuu mtsow Jesús, tsa nzhab re zha:

—Wlipaa lee zha ree nak profet kuu ne Diox yaad lo yezlyu.

¹⁵ Per myeen Jesús lee re men ngwalaaz to Jesús, tsa gak Jesús rey lo re zha, kona tee mbeche Jesús lo re zha, ne ngwa thita Jesús yek yii tedib welt, tak nlaaz Jesús to thita Jesús.

Jesús mnde lo nitdoo
(Mt. 14:22-27; Mr. 6:45-52)

¹⁶ Or ngoo yaal, lee re zha kuu ngeteed lo Jesús ndala roo nitdoo, ¹⁷ ne mke re zha leen thib kano par rid zha tedib lad nitdoo, par tsin zha yez Capernaúm. Ne ngoo'a yaal lee Jesús terka tsin lo re zha. ¹⁸ Ne lee thib mbi thoz mroo mndelo mkwin nitdoo. ¹⁹ Ne or nda'a re zha teeka thib gaay mil o xoop mil metr lo nitdoo, tsa mwii re zha lee Jesús ndetsin lo re zha ndyaad nde lo nitdoo, tsa kwathoz mzeb re zha. ²⁰ Ora nzhab Jesús lo re zha:

—iTsebt goo nay!

²¹ Ne mlaa re zha mke Jesús leen kano, per oraaka mzin re zha yezlyu ta nda zha.

Lee re men nkwaan Jesús

²² Ne tedib wiza, lee re men kuu myaan te-dib lad roo nitdoo, myeen re men lee re zha kuu ngeteed lo Jesús ndya leen thibka kano kuu mndob tya, ne myeen re men ndat Jesús kon re zha. ²³ Tsa lee tedib net kano mzin gax ta ndow re zha pan, ta mndaa Jesús texkix lo Diox, re kano'a nak kano chaan re zha yez Tiberias. ²⁴ Or mwii re men neeka Jesús ne neeka re zha kuu ngeteed lo Jesús yenta tya, tsa mke re zha leen kano ne ndya zha par Capernaúm nda kwaan zha Jesús.

Jesús nak pan kuu ndaa yalnaban

²⁵ Or mzin re men tedib lad roo nitdoo, ne tya mzal Jesús lo re zha, tsa mnaabdiz zha lo Jesús nzhab zha:

—Maestr, ¿pol mzina nzhee?

²⁶ Tsa nzhab Jesús lo re zha:

—Wlipaa na nin lo goo, ngekwaant goo na tak myen goo re kuu thoz kuu mtsow'n, sinke nkwaan goo na, tak ndow goo asta plo mze leettsoo goo. ²⁷ Ket goo tsiiin par kwaan goo kuu wu goo kuu nlux, sinke bkwaan goo kuu ndaa yalnaban kuu thitanax, ne na Kuu Mzin Ngok Men, ta yalnaban kuu thitanax lo goo, tak lee Diox kuu nak Xut'n mtob seny chaane na, tsa ne re men lee na nak Xgann Diox.

²⁸ Tsa mnaabdiz re zha lo Jesús, nzhab zha:

—¿Kwan ndoblo tsow nee, tsa tak tsow nee reta kuu nabee Diox tsow nee?

²⁹ Ora mkab Jesús ne nzhab Jesús:

—Kuu nlaaz Diox nak, yelaaz goo zha kuu mtaal Diox.

³⁰ Tsa mnaabdiz re zha lo Jesús ne nzhab zha:

—¿Cho thib re milagr tak loo'a lo nee, tsa yelaaz nee lu? ¿Kwan kuu tak tsowa?

31 Lee re teyaa zha ndala ndow zha pan kuu le maná yubiz, taxal nzhab lo xkiiz Diox: "Pan yibaa mndaa Diox ndow re zha". [Sal. 78:24]

32 Tsa mkab Jesús ne nzhab Jesús:

—Wlipaa na nin, nagt Moisés kuu mndaa pan kuu mroo yibaa ndow goo, sinke Xut'n nak kuu ndaaa pan kuu wlipaa mroo yibaa lo re goo. 33 Tak lee pan kuu wlipaa ndaaa Diox, nak zha kuu mroo yibaa, ne ndaaa yalnaban lo re men yezlyu ree.

34 Tsa lee re zha mnaab lo Jesús ne nzhab zha:

—Zha Nabee, thibka btaa pana wu nee.

35 Jesús mkab ne nzhab lo re zha:

—Na nak pan kuu ndaaa yalnaban. Ne lee zha kuu yaad lon thitanax laant raa zha, ne lee zha kuu yelaaz na thitanax naa tob xyeekt raa leettsoo zha. 36 Per ni'a na lo goo, nyelaazt goo na tegal ngwii goo na. 37 Reta zha kuu mndaa Xut'n lon, ndyaad zha lon, ne reta zha kuu ndyaad lon, tezhonnt'zha. 38 Yibaa mroon ne ndyalt'n par tsow'n kuu nlaz'n, sinke ndyal'n tsow'n kuu nlaaz Xut'n kuu mtaal'n. 39 Ne lee kuu nlaaz Xut'n kuu mtaal'n nak, lee reta zha kuu mndaa Xut'n lon, lat'n lux neeka thib re zha, sinke teroban na zha wiz bluz. 40 Tak kuu nlaaz Xut'n nak, lee reta zha kuu yelaaz xgann Xut'n, keno zha yalnaban kuu thitanax ne lee na teroban zha wiz bluz.

41 Tsa mindelo re zha Israel mbyodiz, tak lee Jesús nzhab: "Na nak taxal pan kuu mroo yibaa". 42 Ne lee re men nzhab:

—¿Chu leet zha ree nak Jesús xgann Che? Nlebee'aa xut zha ne xnaa zha. Ne ¿chebee mbez zha yibaa mroo zha?

43 Tsa lee Jesús mkab ne nzhab lo re zha:

—Tow roo goo yodizt raa goo. 44 Neeka thib zha yaadt lon, os lee Xut'n kuu mtaal'n yaadnot zha lon, tsa lee na teroban zha wiz bluz. 45 Ne lo yeets kuu mkee re profet mbez: "Diox teteed reta men". Kona lee reta zha kuu nhzon diiz lo Xut'n ne nteed lo Xut'n, ndyaad zha lon.

46 'Ne yent neeka thib zha kuu mwii lo Xut'n Diox, sinke beeta zha kuu mroo lo Diox mwii lo Diox. 47 Wlipaa na nin, lee zha kuu nyelaaz na napa zha'a yalnaban kuu thitanax. 48 Na nak taxal pan kuu ndaaa yalnaban. 49 Lee re teyaa zha ndala ndow zha maná yubiz, ne nguth re zha. 50 Per lee na ngetan kwent chaan pan kuu mroo yibaa lo goo, ne loka zha kuu wuy taban zha thitanax. 51 Na nak pan kuu naban kuu mroo yibaa, ne loka zha kuu wu pan ree taban zha thitanax. Lee pan kuu tan nak kwerp da, ne ta nay por reta men yezlyu ree.

52 Tsa lee re zha Israel mindelo mbyodiz, ne nzhab:

—¿Xomod taa mbyi ree leeka beel mbyi ree wu men?

53 Tsa nzhab Jesús lo re zha:

—Na Kuu Mzin Ngok Men. Wlipaa na nin lo goo, os lee goo wut goo beel da, ne gut goo ren da kenot goo yalnaban kuu thitanax.

54 Loka zha kuu wu beel da ne gu ren da, tekono zha yalnaban kuu thitanax, ne lee na teroban zha wiz bluz. 55 Tak lee beel da wlipaa nak loww zha, ne lee ren da wlipaa nak kuu nzhuu zha. 56 Ne lee zha kuu nhow beel da ne nzhuu ren da, thibka nak nee rop nee zha'a ne thibka ndon kon lee zha. 57 Lee Xut'n kuu mtaal'n nkeno yalnaban, ne lee na naban na por Xut'n; ne tataka lee zha kuu wu beel da taban zha por na. 58 Kwent chaan pan kuu mroo yibaa ngetan. Lee pan ree nagt taxal maná kuu ndow re teyaa zha ndala, tegal ndow zhay per nguth zha, per lee zha kuu wu pan kuu tan taban zha thitanax.

59 Re koree nzhab Jesús lo re men yez Capernaúm, or mloo Jesús xkiiz Diox lo re men ta nkaltaa zha nteed zha xkiiz Diox.

Diiz kuu ndaaa yalnaban

60 Or mbin re men re kuu mloo Jesús, tyen re zha kuu ngeteed lo Jesús nzhab:

—Kwathoz nagan yenaa kuu ni zha; ¿cho tak gon diiz xkiiz zha?

61 Ne myeene Jesús kwan ngetediz re zha, tsa nzhab Jesús:

—Cho koree ntsw went nzo leettsoo goo.

62 ¿Kwan tsow goo xgab, os wii goo lee na, Kuu Mzin Ngok Men, ndyan yibaa leeka ta mroom? 63 Lee Mbi Nayon nak kuu ndaaa yalnaban, per lee lo kwerp yent pa lort-sine. Ne lee re kuu nin lo goo nak chaan Mbi Nayon ne leey nak kuu ndaaa yalnaban. 64 Per bee nzo thib chop goo kuu nyelaazt na.

Tak desde ner ne'a Jesús, naa cho nak re zha kuu nyelaazt Jesús, ne cho taa Jesús lo re zha kuu kuth Jesús.

65 Tsa nzhab Jesús:

—Kona nin lo goo, neeka thib zha gagt yaad lon, os lee Xut'n yaadnot zha lon.

66 Kona tyen zha kuu kuu ngeteed lo Jesús, mlaa zha Jesús ne ndya zha, ne mndiyt raa zha kon Jesús. 67 Tsa nzhab Jesús lo re tsuibchop zha kuu ngeteed lo Jesús:

—¿Chu noga goo nlaaz goo bi goo?

68 Tsa nzhab Simún Pey lo Jesús:

—Zha Nabee, ¿cho lo ya nee? Si xkiiza nak kuu ndaaa yalnaban kuu thitanax. 69 Re nee ne lee'a nak Zha Nali kuu mroo lo Diox, ne nyelaaz nee lu.

70 Jesús mkab ne nzhab:

—Tsiuibchop goo nak zha kuu mlin, per thib goo nak kuu nhzon diiz lo Maxuu.

71 Or nzhab Jesús kona ngeteth Jesús Judas Iscariote, xgann Simún Iscariote, tak Judas nak kuu taa Jesús lo re zha kuu kuth Jesús,

tegal lee Judas nak thib zha lo re tsiibchop
zha kuu ngeteed lo Jesús.

7

*Ngwalaazt re wets Jesús lee Jesús nak,
Zha Kuu Mtaal Diox Nabee*

¹ Leettsa ngwalo mriiid re koree, lee Jesús mndiy re yez yezlyu Galilea ne nilaazt Jesús ya Jesús yezlyu Judea, tak ty a nlaazt re zha Israel kuth Jesús. ² Per ndetsin gaxa ani kuu le Ramad, thib re ani kuu ntsow re zha Israel, ³ tsa lee re wets Jesús nzhab lo Jesús:

—Broo nzhee, ne gwa yezlyu Judea, tsa noga re zha kuu nyelaaza kuu nzo ty, wii re kuu ntsowa. ⁴ Tak leettsa lee thib zha nlaazt zha lebee re men zha, ntsowt zha re kuu xgaatsta. Ne nal os ntsowa re kuu thoz, btsowe delant lo reta men.

⁵ Tak neeka re wets Jesús ngwalaazt zha Jesús. ⁶ Tsa nzhab Jesús lo re zha:

—Ter tsin or da, per lee re goo reta or wen lo goo. ⁷ Lee re men yezlyu nayiit zha ne zha goo, per na si nayii zha ne zha na, tak nloon lee re kuu ntsow zha went nak. ⁸ Gwa goo lo ani yat'n nal, tak ter tsin or kuu yan.

⁹ Ngwalo nzhab Jesús kona lo re wets Jesús, tsa myaanka Jesús yezlyu Galilea.

Ngwa Jesús lo ani kuu le Ramad

¹⁰ Leettsa lee re wets Jesús nda, noga Jesús mnndeke ngwa lo ani, per xgaatsta ngwa Jesús. ¹¹ Tsa lee re zha Israel mkwaan Jesús lo ani, ne mbezt re zha:

—¿Ma mbyi'a?

¹² Ne kwathoz nteth re men Jesús. Thib net zha mbezt: “Wen nak mbyi'a”; per lee tedib net zha mbezt: “Pa gak zha'a zha wen, lee zha nak thib zha kuu nkedi re men”.

¹³ Per neeka thib zha myet leettsou gate-diz kwent chaan Jesús lo re men, tak nzeb zha ne zha re zha Israel kuu nataak.

¹⁴ Per leettsa ndrola ani, tsaraa lee Jesús ngwa lee roo gwodoo, ne mndelo Jesús mloo lo re men ty. ¹⁵ Tsa lee re zha Israel kwathoz mzegey leettsou zha, ne nzhab zha:

—¿Chebee kwathoz nzhaak zha ree, ne ngwat zha skwel?

¹⁶ Ora mkaab Jesús lo re zha, ne nzhab Jesús:

—Lee ley় kuu ngeloon lo re goo nagte

chaan na, leey nak chaan zha kuu mtaal'n.

¹⁷ Os lee thib zha nlaazt tsow kuu nlaaz Diox, tak lebee zha os lee ley় kuu ngeloon nake chaan Diox o chaan na. ¹⁸ Lee zha kuu ndaa leeka kwent chaane, ntsow zhay tsa tsow nataak re men zha, per lee zha kuu nkwaan par tsow nataak re men zha kuu mtaal zha, zha'a si mbezt kuu wli ne nkedit zha.

¹⁹ ¿Chu wlit lee Moisés mndaa ley lo re goo? Per neeka thib goo ntsowt kuu nzhab lo ley. ¿Tak nlaazt goo kuth goo na?

²⁰ Tsa lee re men mkaab ne nzhab lo Jesús: —iMbi fyer nzo leettsoo'a, nzhab naxen yekal! ¿Cho nlaazt kutha?

²¹ Ora nzhab Jesús lo re men:

—Reta goo mzegey leettsoo goo, tak mt-sow'n thib kuu thoz wiz sabd, wiz kuu ndroxkwan re'aa zha Israel. ²² Moisés mloo lo goo kee goo seny ree mbet byi, seny kuu nak seny chaan re'aa zha Israel (tegal leet Moisés nak kuu mndelo mtsow koree, sinke re teyaa zha ndala mndeloy), ne tegal wiz sabd nal per lee re goo nkee goo seny re mbet byi goo. ²³ Ne os ndak goo wen kee goo seny thib mbetdoo wiz sabd, wiz kuu ndroxkwan re'aa zha Israel, par tsow goo kuu mbezt lo ley chaan Moisés, mbay ¿chebee nayii goo ne goo na, tak mtegwen thib zha wiz sabd tsa? ²⁴ Naabt goo kwent taxal nloo re kwaa lo goo, sinke leettsa naab goo kwent, btsow goo thib mod nali.

Mndaa Jesús kwent naa pa mroo Jesús

²⁵ Tsa lee chop tson re zha Jerusalén nzhab:

—¿Chu leet zha ree kuu nkwaan zha par kuth zha? ²⁶ Ne nal lee zha ndo ngeni lo re men baa, ne neeka thib zha yent kwan mbezt lo zha. ¿Chu noga re zha kuu nak tsiin nyelaaz lee zha nak Crist Kuu Mtaal Diox Nabee? ²⁷ Per lee'aa ne'aa naa cho nak zha, tak leettsa yaad Crist Kuu Taal Diox Nabee, neeka thib zha net naa pa lad roo zha.

²⁸ Ne or ngeloo Jesús lo re men lee roo gwodoo, mbin Jesús tata nzhab re zha, tsa nex nzhab Jesús lo re zha:

—iNdak goo nlebee goo na, ne ne goo pa mroon! Per ndyalt'n tak nlaz'n yal'n, sinke lee zha kuu mtaal'n, nak thib zha kuu nali ne wli, ne lee re goo nlebeet goo zha. ²⁹ Per na si nebleen zha, tak lo zha mroon ne lee zha mtaal'n.

³⁰ Tsa ngwalaaz re zha gaten zha Jesús, per neeka thib zha mzhent Jesús, tak ter tsin or kuu ten zha Jesús. ³¹ Kwaro zha ngwalaaz Jesús ne mbezt zha:

—Leettsa yaad Crist Kuu Taal Diox Nabee, ¿chu tetsov zha masraa kuu thoz nake zha ree?

Lee re fariseo ngwalaaz gaten Jesús

³² Tsa lee re fariseo mbin kuu nzhab re men kwent chaan Jesús, re zha'a ne re ng-wleyy kuu nataak, mtaal zha chop tson zha kuu nkenap gwodoo, tsa ten zha Jesús.

³³ Tsa lee Jesús nzhab:

—Bee ndon lo re goo telut tyemp, tsaraa bren lo zha kuu mtaal'n. ³⁴ Tsa lee re goo kwaan na, per yetsalt'n lo goo, tak gagt ya goo ta ndyan.

³⁵ Tsa lee re zha Israel mndelo mnaabdiz lo re altaa nzhab:

—¿Pa bi zha, xomod gagt yetsal zha lo'aa? ¿Chu lo re tawlazaa kuu nzo tedib ta ndya

zha, re zha kuu nzo xid re zha kuu nagt zha Israel ne tyo loo zha lo re zha'a? ³⁶ ¿Kwan nak kuu ne zha lo'aa: "Kwaan goo na per yetsalt'n lo goo, tak gagt ya goo ta ndyan"?

Nit kuu ndaa yalnaban

³⁷ Ne wiz kuu nyelo nlux ani wiza nak wiz ro. Ne wiza lee Jesús mndeli ne nex nzhab lo re men:

—Os lee thib goo nzheek leettsoo, de goo lon ne gwii goo nit? ³⁸ Taxal nke lo xkiiz Diox: "Lee zha kuu nyelaaaz na, leen leettsoo zha gats taxal thib yoo kuu ndaa nit kuu ndaa yalnaban thitanax". [Ez. 47:1; Zac. 14:8]

³⁹ Kon re diiz ree ngwalaaz Jesús gagab Jesús lo re zha: Loka zha kuu yelaaaz Jesús, kayaa zha Mbi Nayon, per ter yaad Mbi Nayon, tak ter bretab Jesús yibaa tsya.

Ngok rol re men kwent chaan Jesús

⁴⁰ Tsa lee chop tson zha kuu mbin kona nzhab:

—Wlipaa lee zha ree nak thib zha kuu ni Diox lo, profet nak zha.

⁴¹ Tedib net zha mbez:

—Zha ree nak Crist Kuu Mtaal Diox Nabee.

Per lee tedib net zha mbez:

—Leet zhay, tak lee Crist Kuu Taal Diox Nabee, root Zha yezlyu Galilea. ⁴² Tak lee lo xkiiz Diox nzhab lee Crist Kuu Taal Diox Nabee, ndoblo gak zha, zha raz chaan rey David, ne ndoblo gak zha, zha yez Belén, leeka yez pa ngol rey David.

⁴³ Kona ngok rol re men kwent chaan Jesús. ⁴⁴ Nzo cho zha ngwalaaz gago zha Jesús tsib, per neeka thib zha mtsowte.

Ngwalaazt re zha nak tsiin Jesús

⁴⁵ Tsa lee re zha kuu nkenap gwodoo mre ta nzi re fariseo ne re ngwleyy kuu nataak, ne mnaabdiz re zha'a lo re zha kuu nkenap gwodoo:

—¿Chebee ndyaadnot goo mbyi'a?

⁴⁶ Lee re zha kuu nkenap gwodoo mkab ne nzhab:

—¡Neeka thib zha ndedizt taxal ndediz mbyi'a!

⁴⁷ Tsa lee re fariseo nzhab:

—¿Chu noga goo mkedi'a mbyi'a? ⁴⁸ Si neeka thib re zha kuu nabee ne neeka re fariseo, ngwalaazt lee mbyi'a nak Crist, Zha Kuu Ne Diox Yaad Nabee. ⁴⁹ Per pasya re men kuu nlebeet ley chaan Moisés, tak makayaa zha mbyi'a taxal Zha Kuu Mtaal Diox Nabee.

⁵⁰ Tsa lee Nicodemo, kuu nak thib fariseo kuu ngwatediz lo Jesús thib welt, mkab ne nzhab:

⁵¹ —Lee ley chaanaa mbez: Gagt keki'aa thib zha, os ter gonaa kuu ne zha, tsa ne'aa naa kwan mtsow zha.

⁵² Lee re zha mkab nzhab:

—¿Chu noga lu nak zha Galilea? Bteed xkiiz Diox, tsa yena neeka thib profet ndroot yezlyu Galilea.

⁵³ Tsa kadta thib thib zha ndya zha liz zha.

8

Ngot kuu ngok rop kon tedib mbyi

¹ Tsa nda Jesús yek yii Olib, 2 ne leettsa ngwani yezlyu tedib wiz, mre Jesús ngwa Jesús lee roo gwodoo. Tsa mndob Jesús mloo Jesús lo re men kuu mkaltaa lo Jesús tya.

³ Ne lee re maestr chaan ley ne re fariseo ngwa lo Jesús, ngwano thib ngot kuu ngok rop kon thib mbyi. Ne mto re zha ngot ndrol lo re men kuu nzi lo Jesús, ⁴ tsa nzhab re zha lo Jesús:

—Maestr, lee ngot ree ngogaa lo nee, ngok rop kon thib mbyi kuu nagt tsaal ngot. ⁵ Ne lee lo ley mnabee Moisés, ndoblo kuthaa ngot kuu tabaa ntsow kon ke. ¿Per lee lu xa ne'a?

⁶ Tata nzhab re zha, tak lee xgab re zha nak, naabdiz zha thib kwaa lo Jesús, tsa tak keki zha Jesús. Per lee Jesús mkiits yek ne mndelo mkee kon kwen yaa lo yu. ⁷ Per kom naabdizka re zha lo Jesús, tsa mlit yek Jesús ne nzhab Jesús:

—Loka cho thib goo kuu napt neeka thib falt, zha'a ndoblo kee ke yek ngot ree ner.

⁸ Tsa mre Jesús mkiits yek ne mkeeka lo yu. ⁹ Or mbin re zha kona, tsa mroo thibga thibga zha ndya zha, ne ner re zha gol mndelo mroo ndya, tsaraa mroo reta zha. Ne or beeta Jesús kon ngota myaan tya, ¹⁰ tsa mlit Jesús yek Jesús ne mnaabdiz Jesús lo ngota:

—¿Ma re zha kuu mkeki'a? ¿Chu neeka thib zha myet leettsoo gagutha?

¹¹ Tsa mkab ngot:

—Neeka thib zha, Zha Nabee.

Tsa nzhab Jesús lo ngot:

—Neeka na yent kwan tsow'n lo'a, tyee ne tsowt raa lu kuu went.

Jesús nak xni lo re men yezlyu

¹² Jesús mre mni lo re men, ne nzhab:

—Na nak xni lo re men yezlyu ree, ne loka cho kuu teke dits'n, tekono zha xni kuu ndaa yalnaban, ne tet raa lo yalkow.

¹³ Tsa lee re fariseo nzhab lo Jesús:

—Leeka kwent chaanaa ndaa'a kwent, nataagt kuu ni'a.

¹⁴ Jesús mkab ne nzhab:

—Wli kuu mnin tegal leeka na mniy. Tak nen pa mroon ne pa ndyan, per lee re goo neeka net goo pa mroon ne neeka net goo pa ndyan. ¹⁵ Lee re goo naab goo kwent lo re men taxal ntsow re mene, per lee na naabt kwent lo neeka thib men, ¹⁶ per os leen naab'n kwent lo re men, nali nak kuu tsow'n, tak nagt thita na kuu tsowe, sinke noga Xut'n kuu mtaal'n naab kwent kon na.

¹⁷ Ne leeka lo ley chaan goo mbez: Os lee chop testig mbez thibka kwa, wli kuu ni rop zha. ¹⁸ Leeka na nak thib testig da, ne lee Xut'n kuu mtaal'n nak tedib testig.

¹⁹ Tsa mnaabdz re zha lo Jesús, ne nzhab zha:

—¿Ma Xuta?

Jesús mkab ne nzhab:

—Nlebeet goo na, ne neeka Xut'n nlebeet goo, os nlebee goo na noga nlebee goo Xut'n.

²⁰ Jesús nzhab re kona, leetsa mloo Jesús lo re men lee roo gwodoo, ta nzib re alkansi kuu ngo zha gon. Per neeka thib zha mzhent Jesús, tak ter tsin or kuu ten zha Jesús.

“Ta ndyan gagtya goo”

²¹ Jesús mre nzhab lo re zha:

—Leen ndya ne lee re goo kwaan na, ne lee re goo tath goo por re falt goo, lee ta ndyan gagtya goo.

²² Tsa nzhab re zha Israel:

—¿Chu ntsow zha xgab leeka lee zha kuth zha zha, kona mbez zha gagtya re'aa ta ya zha?

²³ Per lee Jesús nzhab lo re zha:

—Lee re goo zha yezlyu ree nak goo, per lee na nagt'n zha yezlyu ree, zha yibaa nak'n. ²⁴ Kona nin lo goo, tath goo por re falt goo, tak os lee goo nyelaazt goo lee na nak Crist, Zha Kuu Mtaal Diox Nabee, tath goo por re falt goo.

²⁵ Tsa mnaabdz re zha lo Jesús ne nzhab zha:

—¿Cho naka?

Jesús mkab ne nzhab:

—Desde ner ni'a naa cho nak'n. ²⁶ Ne kwathoz re kuu nlaz'n nin lo goo ne naab'n kwent lo goo, per lee zha kuu mtaal'n kuu wli ni zha, ne beeta kuu ne zha lon kona nin lo re men yezlyu ree.

²⁷ per myent re zha lee Jesús mndaa kwent chaan Xut Jesús lo re zha. ²⁸ Kona nzhab Jesús lo re zha:

—Leetsa kee goo na zha kuu Myaad Ngok Men lo kruz, tsaraa ne goo naa cho nak'n, ne tsaraa ne goo ntsowt'n kuu nlaz'n, sinke beeta kuu mloo Xut'n lon kona nin. ²⁹ Tak lee Xut'n kuu mtaal'n ndo kon na; nlaat Xut'n na, tak thibka ntsow'n kuu nlaaz Xut'n.

³⁰ Leetsa nzhab Jesús re koree, kwaro zha ngwalaaz Jesús.

Re zha kuu wlipaa nak zhiinn Diox

³¹ Tsa nzhab Jesús lo re zha Israel kuu ngwalaaz Jesús:

—Os lee goo wlipaa gon goo diiz xkiz'n, wlipaa zha kuu ngeteed lon nak goo, ³² tak lebee goo kuu wli, ne lee kuu wli tsow gak goo zha kuu laa.

³³ Lee re zha mkab ne nzhab:

—Zha raz Abraham nak nee, ne neeka mas ter gak nee mos lo thib zha, ne ¿chebee mbeza lo nee, gak nee zha kuu laa?

³⁴ Tsa nzhab Jesús lo re zha:

—Wlipaa na nin lo goo, reta zha kuu ndaa falt mos nak zha lo falt zha. ³⁵ Tak lee thib mos nyaant mos liz zha kuu nabee lo mos thitanax, per lee xgann zha'sa thitanax nyaan xgann zha liz zha. ³⁶ Kona os lee Xgann Diox telaa goo lo re falt goo, tsasi wlipaa gak goo zha kuu mlaa. ³⁷ Ne'a na lee re goo nak zha raz chaan Abraham, per nlaaz goo kuth goo na, tak nlat xkiz'n leettsoo goo. ³⁸ Na nin kuu mloo Xut'n lon, ne lee re goo ntsow goo kuu ne xut goo lo goo.

³⁹ Lee re zha mkab ne nzhab:

—¡Abraham nak xut nee!

Per lee Jesús nzhab lo re zha:

—Os lee goo wlipaa xgann Abraham nak goo, kuu mtsow Abraham ndoblo goo tsow goo. ⁴⁰ Per lee re goo, tegal kuu wli kuu mloo Diox lon mnin lo goo, ne nlaaz goo kuth goo na. ¡Ne lee Abraham thitanax mtsowt Abraham kuu tata! ⁴¹ Lee re goo ntsow goo kuu ntsow xut goo.

Lee re zha mkab nzhab:

—¡Lee re nee nagt nee zhiinn wan zha, nap nee thibka xut nee, kuu nak Diox!

⁴² Jesús mkab ne nzhab:

—Os wlipaa Diox nak xut goo, gake leettsoo goo na, tak lo Diox mroon, ne ndyal't tak nlaz'n yal'n, sinke ndyal'n tak lee Diox mtaal'n. ⁴³ ¿Chebee nyent goo re kuu nin lo goo? Nyent gooy, tak nlaazt goo gon goo xkiz'n. ⁴⁴ Maxuuy nak xut goo, zha Maxuuy nak goo, ne ntsow goo re kuu nlaaz Maxuuy. Tak lee Maxuuy nak thib zha kuu nzhuth men desde ndala. Ne ndediz Maxuuy kuu wli, tak neeka lut kuu wli yent leettsoo Maxuuy. Ne leetsa ndediz Maxuuy kuu wli kuu nak Maxuuy kona ndediz Maxuuy, tak zha nkedi nak Maxuuy, ne lee Maxuuy nak xut yalkedi. ⁴⁵ Per lee na kuu wli nin lo goo ne nyelaazt goo xkiz'n. ⁴⁶ ¿Cho thib goo, tak loo goo lee na nap thib falt? Os kuu wli nin lo goo, ¿chebee nyelaazt goo xkiz'n? ⁴⁷ Lee zha kuu nak zha Diox, nkenza zha xkiiz Diox, per lee goo nagt goo zha Diox, kona nlaazt goo gon goo xkiiz Diox.

Lee Crist Kuu Mtaal Diox Nabee nzo'a desde ndala nake Abraham

⁴⁸ Tsa lee re zha Israel nzhab lo Jesús:

—Wenka nzhab nee lee lu nak thib zha yez Samaria, ne mbi fyer nzo leettsoo'a.

⁴⁹ Jesús mkab ne nzhab:

—Neeka thib mbi fyer yent leettsoon. Lee kuu ntsow'n nak ntsow nataak na Xut'n; per lee re goo ngoo goo yalnathoy da. ⁵⁰ Nkwaant'n tsatsa nataak re men na, per nzo thib zha kuu nlaaz tsow nataak re men

na, ne lee zha'a nak zha kuu naab kwent.
⁵¹ Wlipaa na nin, loka cho kuu nzhon diiz
 xkiz'n gathth zha.

⁵² Lee re zha Israel mkab ne nzhab:

—Nalsi ne nee, wlipaa mbi fyer nzo
 leettsoo'a, Abraham ne reta profet nguth
 zha, ne lee lu mbeza: "Loka zha kuu gon diiz
 xkiz'n gathth".⁵³ Naa *čhu* mas nataaka
 nake teyaa Abraham? Lee Abraham, ne
 noga re profet kuu ngoo ndala nguth re zha.
čCho naka ndaka?

⁵⁴ Jesús mkab ne nzhab:

—Os leen tsow nataak na leeka na,
 nataagt kuu nin. Per lee zha kuu ntsow
 nataak na nak Xut'n, leeka Diox kuu mbez
 goo naak Diox goo.⁵⁵ Per nlebeet goo Diox.
 Per na si nlebeen Diox. Ne os nin nlebeet'n
 Diox, noga na nak'n zha nkedi taxal goo.
 Per wlipaa nlebeen Diox, ne ntsow'n kuu
 nabee Diox.⁵⁶ Lee Abraham teyaa zha
 ndala, kwathoz laz zha, tak ngwalaaz zha
 gawii zha wiz ree, ne mwii zhay ne kwathoz
 naley ngoo leettsoo zha mwii zhay.

⁵⁷ Lee re zha Israel nzhab lo Jesús:

—jNeeka napta chop galbtsii liin, ne
 mbeza mwii'a lu Abraham!

⁵⁸ Jesús mkab ne nzhab:

—jWlipaa na nin lo goo, nzo'a na leettsa
 terka yo Abraham!

⁵⁹ Tsa lee re zha mzhen ke, gakee zha
 yek Jesús, per lee Jesús mkaslo ne mroo lee
 roo gwodoo, ne mriid Jesús xid re men nda
 Jesús.

9

Jesús mtegwe thib zha syeg

¹ Or nderid Jesús thib ta, tsa mwii Jesús
 thib mbyi kuu ngol syeg.² Tsa lee re zha
 kuu ngeteed lo Jesús mnaabdiz lo Jesús ne
 nzhab:

—Maestr, *čchebee* syeg mbyi ree ngol
 mbyi? *čhu* tak mndaa xut mbyi ne xnaa
 mbyi falte o chu tak leeka mbyi mndaa falt
 konay?

³ Tsa lee Jesús mkab ne nzhab:

—Ngolt mbyi tabaa, por falt chaan xut
 mbyi ne xnaa mbyi, neeka nagte por falt
 mbyi, tabaa ngol mbyi, tsa por lee mbyi loo
 Diox re kuu tak tsow Diox.⁴ Ne nal beet
 raa tse nzi'aa, ndoblo tsow'n rtsin zha kuu
 mtaal'n, tak leettsa nlaa yaal neeka thib zha
 gagg raa ke tsiiin.⁵ Nal kuu bee ndon lo
 yezlyu ree, xni nak'n lo re men yezlyu ree.

⁶ Or ngwalo nzhab Jesús re koree, tsa
 mtsuk Jesús lo yu, ne mtsow Jesús lut ben ne
 mdaab Jesús ben ngutlo syeg.⁷ Tsa nzhab
 Jesús lo syeg:

—Gwa, gwateech ngutlo'a roo tank kuu le
 Siloé. (Diiz ree nak: "Ntaal zha zha".)

Tsa ngwa zha syega ngwateech ngutlo, ne
 leettsa mretab zha nyeni'a ngutlo zha.⁸ Tsa

lee re zha kuu nzo gax liz zha'a, ne re zha
 kuu mwii lee zha mnaab karida, mnaabdiz
 zha lo re altaa zha ne mbez zha:

—*čhu* leet zha ree kuu nyatob nyanaab
 karida ganda wiz?

⁹ Tsa thib net zha mbez:

—Lee zhay.

Lee tedib net zha mbez:

—Leet zhay, tegal tata na zha.

Per lee zha mbez:

—Nay.

¹⁰ Tsa mnaabdiz re zha lo zha'a ne nzhab
 zha:

—*Xomod* nzhaaka ngwi'a?

¹¹ Lee zha mkab ne nzhab:

—Lee mbyi kuu lee Jesús mtsow lut ben,
 ne mdaab mbyiy ngutlon, tsa ne mbyi lon:
 "Gwa roo tank Siloé gwateech ngutlo'a". Ne
 oraaka ngwan ne mteech'n ngutlon, ne lee
 ngutlon mzaal.

¹² Tsa mnaabdiz re zha lo zha'a ne nzhab
 zha:

—*čMa mbyi'a* tsa?

Tsa nzhab zha:

—Net'n, ma mbyi.

*Lee re fariseo mnaabdiz lo zha kuu ngok
 syeg*

¹³ Tsa ndano re zha zha kuu ngok syega lo
 re fariseo.¹⁴ Ne wiz sabd kuu ndroxkwani
 re zha Israel, wiza mtsow Jesús lut ben ne
 mtegwe Jesús ngutlo zha kuu ngok syega.¹⁵ Tsa lee re fariseo mnaabdiz lo zha kuu
 ngok syega ne nzhab re zha:

—*Xomod* mgwe ngutlo'a?

Lee zha mkab ne nzhab:

—Lee mbyi'a mdaab ben ngutlon, ne
 mteech'n ngutlon, ne lee nal nzhaaka ngwi'i.

¹⁶ Lee chop tson fariseo nzhab:

—Nagt mbyi'a thib zha kuu mtaal Diox,
 tak ngotsowt zha wiz sabd kuu ndroxkwanaa.

Per techop tson zha mbez:

—*Xomod* nzhaaka ntsow zha re milagr
 thoze ree, os zha kuu nap falt nak zha?

Ne ta mod ngok rol re zha.¹⁷ Tsa mre re
 zha mnaabdiz zha lo zha kuu ngok syega, ne
 nzhab zha:

—Lee lu, *čcho* nak zha kuu mtegwe
 ngutlo'a ndaka?

Lee zha mkab ne nzhab:

—Na ni lee zha nak thib profet chaan
 Diox.

¹⁸ Per lee re zha Israel ngwalaazt zha lee
 zha kuu ngok syega, nzhaaka ngwi'i, tsa
 mtaal re zha chop tson zha ngwachez xut
 zha'a ne xnaa zha,¹⁹ ne or mzin xut zha ne
 xnaa zha, tsa mnaabdiz re zha lo xut zha ne
 lo xnaa zha, ne nzhab re zha:

—¿Chu zhiinn goo nak mbyi ree? ¿Chu wli goo syeg zha ngol zha? ¿Ne xomod nzhaaka ngwii zha nal?

²⁰ Lee xut zha ne xnaa zha mkab ne nzhab:

—Wli xgann nee nak zha, ne syeg zha ngol zha,²¹ per net nee chebee nzhaaka ngwii zha, ne neeka net nee cho mtewge ngutlo zha. Bnaabdiz goo lo zha zha bye'a zha, lee zha tak ney lo goo.

²² Tata nzhab xut zha ne xnaa zha, tak nzeb rop zha ne zha re zha Israel kuu nataak, tak lee re zha kuu nataaka myaan re zha diiz, os lee thib zha gab lee Jesús nak Zha Kuu Mtaal Diox Nabee, koo zha zha'a xid re zha ta nkaltaa re zha nteed zha xkiiz Diox.²³ Ta mod nzhab xut zha ne xnaa zha: "Bnaabdiz goo lo zha zha bye'a zha".

²⁴ Tsa lee re zha Israel mre mrez zha kuu ngok syega, ne nzhab re zha lo zha'a:

—Bloo roo'a lo nee delant lo Diox. Tak ne'a nee lee mbyi'a nak thib zha kuu ndaa falt.

²⁵ Tsa lee zha'a mkab ne nzhab:

—Net'n chu zha nap falt nak zha o nagt zha zha kuu nap falt. Beeta kuu nen nak, ngok'n syeg, per lee nal nyeni'a ngutlon.

²⁶ Tsa mre re zha mnaabdiz zha lo zha'a nzhab zha:

—¿Kwan mtsow zha'a lo'a? ¿Xomod mtsow zha par mzaahl ngutlo'a?

²⁷ Lee zha mkab ne nzhab:

—Ni'a nay lo goo, per nyelaazt gooy. ¿Chebee nlaaz goo bren ni nay lo goo tedib welt? O, ¿chu no goo nlaaz goo teke goo dits Jesús?

²⁸ Tsa mtsalzhoo re zha zha'a, ne nzhab re zha:

—Lu ndeke'a dits mbyi'a, per lee nee ndeke nee dits Moisés.²⁹ Nee ne lee Diox mni lo Moisés, per lee mbyi'a neeka net nee pa mroo mbyi'a.

³⁰ Lee mbyi kuu ngok syega mkab ne nzhab:

—¡Koree si wlipaa nzegey leettsoo men ngwii men! Tak ¿chebee net goo pa mroo zha, ne lee zha mtewge ngutlon?³¹ Retalee ne'aa nzhont Diox xkiiz re zha kuu nyelaaz Diox ne ntsow kuu nlaaz Diox.³² Thitanax neeka mas ter yath, lee thib zha ntsow nyeni lo thib zha kuu ngol syeg.³³ Os lee mbyi'a ndyaadt por Diox, yent kwan tak tsow mbyi.

³⁴ Tsa nzhab re zha lo zha kuu ngol syega:

—¡Zhiinn wan zha naka! Ne nlaaza teni'a nee.

Tsa mloo re zha zha'a ta nkaltaa re zha nteed zha xkiiz Diox.

Re zha kuu mkow yek ne leettsoo lo xkiiz Diox

³⁵ Tsa mbin Jesús lee re fariseo mloo zha kuu ngol syega, ta nkaltaa zha nteed zha xkiiz Diox, ne or mzaal Jesús zha kuu ngok syega, tsa nzhab Jesús lo zha:

—¿Chu nyelaaza, Zha Kuu Mtaal Diox Ngok Men?

³⁶ Lee zha kuu ngok syega mkab ne nzhab:

—Zha Nabee, ne lon choy, tsa yelaz'n zha.

³⁷ Jesús mkab lo zha ne nzhab:

—Mwii'a lu zha, tak na nak zha'a kuu ngetediz lo'a.

³⁸ Tsa lee mbyi'a mtobxub lo Jesús ne nzhab:

—Zha Nabee, nyelaz'n lu.

³⁹ Ora nzhab Jesús lo zha:

—Na ndyal'n lo yezlyu ree par naab'n kwent lo re men yezlyu ree, tsa lee re zha kuu syeg yeni lo, ne lee re zha kuu nyeni lo yaan syeg.

⁴⁰ Per lee chop tson fariseo kuu nzi tyo, or mbin zha kona, tsa mnaabdiz zha lo Jesús ne nzhab zha:

—¿Chu no nee nak nee taxal syeg?

⁴¹ Jesús mkab lo re zha ne nzhab:

—Os gagak goo syeg, napt goo falt lo Diox. Per tak mbez goo wen nyeni lo goo, kona nap goo falt lo Diox.

10

Kwent nanzee chaan zha kuu nkenap zhiil

¹ Tsa nzhab Jesús:

—Wlipaa na nin, lee zha kuu ndaabt par roo korral chaan re mbak zhiil, sinke ndaab zha thib lad cho liz maa, wann nak zha'a.

² Per lee zha kuu ndaab par roo liz maa, zha'a nak zha kuu nkenap maa.³ Ne lee zha kuu nkenap roo korral, nxaal zha roo korral lo zha kuu nkenap re mbak zhiil, ne ndaab zha ne mbezt zha thib thib mbak zhiil por le mbak zhiil ne lee re mbak zhiil nlebee maa xkiiz zha. Ne ngoor zha maa leen korral.⁴ Ne or ngwaloo'a mroo reta maa, ora ndener zha lo re maa, ne ndeke maa dits zha tak nlebee maa xkiiz zha.⁵ Per os leey thib zha kuu nlebeet maay, nzhonn maa lo zha ne tekete maa dits zha, tak nlebeet maa xkiiz zha.

⁶ Jesús nzhab kona lo re men, per lee re men myent kuu nlaaz Jesús gab Jesús lo re men.

Jesús nak zha kuu wen nkenap re mbak zhiil

⁷ Jesús mre nzhab lo re men:

—Wlipaa na nin lo goo: Na nak taxal roo pwert ta ndaab re mbak zhiil.⁸ Reta zha kuu myaad ner nake na, wann nak re zha'a, per lee re mbak zhiil mbint mbak zhiil diiz lo re zha'a.⁹ Na nak taxal roo pwert, ne lee zha kuu tab roo pwert ree, telaa zha lo re falt chaan zha. Ne gak zha taxal thib mbak zhiil,

kuu ndaab ne ndroo ne nyetsal yizh nayee wu.

¹⁰ 'Lee wann beeta ndyaad wann par lowann wann, par kuth wann ne par luux wann re maa, per lee na ndyal'n par keno goo yalnaban kuu thitanax. ¹¹ Na nak zha kuu wen nkenap re mbak zhiil. Ne lee zha kuu wen nkenap re mbak zhiil, ndaa zha yalnaban chaan zha por re mbak zhiil, ¹² per lee zha kuu nzhash lo por nkenap re mbak zhiil, or ne zha lee mbeez ndyaad, nlaa zha re mbak zhiil ne nzhhonn zha, tak nagt zha'a, zha kuu wen nkenap re mbak zhiil, neeka nagt re maa, maa zha. Tsa lee mbeez nla nzhhuth re mbak zhiil, ne nchaats mbeez re maa. ¹³ Lee zha'a nzhhonn zha, tak tsii nke zha beeta par gax kaa zha, ne ndat leetsoo zha por re mbak zhiil.

¹⁴⁻¹⁵ 'Na nak zha kuu wen nkenap re mbak zhiil. Ne taxal nlebee Xut'n na, ne lee na nlebeen Xut'n, leeka tata nlebeen re mbak zhiil da, ne noga re maa da nlebee maa na. Ne ndan yalnaban da por re maa. ¹⁶ Noga nap'n tedib net maa kuu nagt maa korral ree, ne noga re maa'a ndoblo yaxin. Tsa gon maa diiz lon, ne yo re maa thibka korral, tsa keno maa thibka zha kuu wen kenap re maa.

¹⁷ 'Lee Xut'n nke leetsoo Xut'n na, tak ndan yalnaban da, par kayaa nay tedib welt. ¹⁸ Neeka thib zha gagt kuth'n, per tan diiz kuth zha na tak tata nlaz'n. Tak nap'n yalnabee par tan yalnaban da, ne nap'n yalnabee par kayaa nay tedib welt. Koree nak kuu mnabee Xut'n lon tsow'n.

¹⁹ Or mbin re zha Israel re kona, mre zha ngok rol zha tedib welt. ²⁰ Kwathoz zha mbeez:

—¿Chebee nzhon goo kuu ni zha? Si mbi fyer nzo leetsoo zha ne nzhash naxen yek zha.

²¹ Per lee tedib net zha mbeez:

—Neeka thib zha kuu nzo mbi fyer leetsoo nit tabaa. ¿Chu, tak tegwe thib mbi fyer ngutlo thib zha syeg?

Mkayaat re zha Israel Jesús

²² Tyemp kuu nla yig, lee re zha yez Jerusalén ntsow zha ani chaan gwodoo zha. ²³ Ne lee Jesús ndiy lee roo gwodoo ne roo korredor gwodoo, korredor kuu le chaan Salomón. ²⁴ Tsa lee re zha Israel mkaltaar re ladta lo Jesús, ne mnaabdiz zha lo Jesús ne nzhab zha:

—¿Asta pol ne'a lo nee naa cho naka, tsa rooy yek nee? ¿Chu lu nak Crist Kuu Mtaal Diox Nabee? Neey lo nee.

²⁵ Jesús mkab ne nzhab:

—Ni'a nay lo goo, per nyelaazt goo xkiz'n. Reta kuu ntsow'n, ntsow nay kon yalnabee chaan Xut'n, re kona nambi nloo naa cho nak'n, ²⁶ per nyelaazt gooy, tak nagt goo

mbak zhiil da, taxal mni'a na lo goo. ²⁷ Lee re mbak zhiil kuu nak mbak zhiil da, nlebee maa xkiz'n, ne nlebeen maa, ne ndeke maa dits'n. ²⁸ Ne na nda yalnaban kuu thitanax lo re maa, ne thitanax gathth raa maa, ne yent cho tak kib maa lon. ²⁹ Tak lee Xut'n kuu mndaa reta mbak zhiil lon, lee Xut'n nak kuu mas ney nake reta kwaaw, ne yent cho tak kib maa lo Xut'n. ³⁰ Tak lee Xut'n ne na thibka nak nee.

³¹ Tsa lee re zha Israel mre mzhenn ke, par kee zhay yek Jesús tedib welt, ³² per lee Jesús nzhab lo re zha:

—Kon yalnabee chaan Xut'n mtsow'n re kuu thoz lo re goo, ¿por cho thib re kona nlaaz goo kee goo ke yek'n?

³³ Tsa lee re zha Israel mkab lo Jesús ne nzhab:

—Keet nee ke yeka por re kuu wen kuu mtsowa, lee nee keey yeka por kuu went kuu ni'a. Tak thib mbyi naka, ne leeka lu ntsowa lu taxal Diox.

³⁴ Jesús mkab ne nzhab:

—At lo ley chaan goo mbeez: "Na ni lee goo nak diox", nzhab Diox. [Sal. 82:6] ³⁵ Ne tak lo xkeets Diox nzhabé gagt gabaa wlite, ne os lee Diox, diox mtob le Diox re zha kuu mkayaa xki Diox. ³⁶ ¿Chebee mbeez goo lon leen mni kuu went, tak nin lee na nak'n Xgann Diox? Ne lee Diox mlin ne mtaal'n lo yezyu ree. ³⁷ Os leen ntsowt'n re kuu ntsow Xut'n, yelaazt goo na. ³⁸ Per os leen ntsow re kuu ntsow Xut'n, tegal yelaazt goo na, per gwalaaz goo re kuu ntsow'n, tsa ne goo lee Xut'n ndo kon na ne lee na ndon kon Xut'n.

³⁹ Ne tedib welt ngwalaaz re zha gaten zha Jesús, per lee Jesús tee mbeche lo re zha.

⁴⁰ Mre Jesús tedib welt tedib lad roo yoo Jordán, ta mtsowley Juan re men, ne tyá myaan Jesús. ⁴¹ Ne naroob men ngwa lo Jesús, ne nzhab re men:

—Wlipaa, tegal neeka thib milagr thoz mtsowt Juan, per reta kuu ne Juan kwent chaan mbyi ree wliy.

⁴² Tsa kwaro zha ngwalaaz Jesús tyá.

11

Yalguth chaan Las

¹ Ngoo thib mbyi kuu le Las kuu mzhak ne, ne btan Las nak Mari ne Mart, zha yez Betania nak re zha. ² Ne Mari'a, nak zha mxo perfum kuu chul ndetsi nii Jesús Zha Nabée, ne mtekwiiiz Mariy kon yitsek Mari. ³ Tsa mtaal rop bel ngot thib zha ngwa nwane lo Jesús ne nzhab:

—Zha Nabée, lee amiga Las kuu kwathoz nke leetsoo'a ne ndak.

⁴ Or mbin Jesús kona, tsa nzhab Jesús:

—Lee yiza nagt kona par gath Las, sinke leey nak par loo yalnabee chaan Diox, ne noga looy yalnabee chaan Xgann Diox.

⁵ Ne kwathoz nke leettsoo Jesús Mart, bel Mart ne btan Mart Las, ⁶ or mbin Jesús lee Las ne ndak, mletka Jesús ta ndo Jesús techop wiz. ⁷ Tsaraa nzhab Jesús lo re zha kuu ngeteed lo Jesús:

—Nda goo re'aa tedib welt yezlyu Judea.

⁸ Tsa nzhab re zha lo Jesús:

—Lo nal lee re zha Israel kuu nzo yezlyu'a, ngwalaaz gagutha kon ke, ne nal nlaaza lu ya'a tya tedib welt.

⁹ Tsa nzhab Jesús:

—¿Chu nagt tsuibchop or nak thib wiz? Os lee thib zha tiy zha tse, yent kwan ral nii zha, tak nteni xni wiz lo zha, ¹⁰ per os lee zha tiy zha yaal, teral kuu nii zha, tak yent xni kuu teni lo zha.

¹¹ Ngwalo nzhab Jesús kona, noga nzhab Jesús:

—Lee amigaa Las naxat, per nal yan yalitchen Las.

¹² Tsa lee re zha kuu ngeteed lo Jesús nzhab:

—Zha Nabee, os lee zha naxat zha, tegwe zha.

¹³ Lee Jesús ngwalaaz gagab lee Las nguth, per lee re zha kuu ngeteed lo Jesús mtsow xgab naxat Las. ¹⁴ Tsaraa nambi nzhab Jesús lo re zha kuu ngeteed lo Jesús:

—Ngutha Las. ¹⁵ Ne kwathoz laz'n tak mndotaa tya, tak tabaa mas wen par goo, tsa yelaaz gooy. Nda goo re'aa lo Las.

¹⁶ Tsa lee Mach kuu ni zha "kwach", nzhab lo tedib net re zha kuu ngeteed lo Jesús:

—Nda goo re'aa, tsa noga lee gathaa kon lee zha.

Jesús nak yalndroban ne yalnaban

¹⁷ Ne leettsa mzin Jesús yez Betania, mne Jesús lee Las nda'a thap wiz mqaats. ¹⁸ Ne gax yez Jerusalén nzi yez Betania, teeka tson kilometro. ¹⁹ Ne kwathoz re zha Israel kuu nzo Jerusalén nzi tya, ngwa ngwatetsey leettsoo Mart ne Mari, tak nguth Las btan rop zha. ²⁰ Or mbin Mart lee Jesús ndetsin tya, tsa mroo Mart mkayaa Mart Jesús, per lee Mari myaanka yuu. ²¹ Tsa nzhab Mart lo Jesús:

—Zha Nabee, os lee'a gato'a nzhee gagathet btan na. ²² Per tegal nalraa ndo'a nzhee, nen tetsow Diox kuu naaba lo Diox.

²³ Lee Jesús nzhab lo Mart:

—Lee btana teroban.

²⁴ Tsa lee Mart nzhab:

—Wiy, ne'a na lee btan na roban wiz kuu roban re zha nguth, leettsa gak wiz bluz.

²⁵ Tsa nzhab Jesús lo Mart:

—Na nak yalndroban ne yalnaban. Loka zha kuu yelaaz na, tegal gath zha taban zha, ²⁶ ne reta zha kuu naban ne nyelaaz na, thitanax gath zha. ¿Chu nyelaaza koree Mart?

²⁷ Lee Mart mkab ne nzhab:

—Nyelaz nay Zha Nabee. Ne, nen lee Lu Nak Crist, Xgann Diox Kuu Mtaal Diox Nabee, kuu naka diiz yaad lo yezlyu ree.

Jesús mbinn roo baa Las

²⁸ Ngwalo nzhab Mart kona, tsa ngwachez Mart bel Mart Mari, ne xlaanta nzhab Mart lo Mari:

—Lee maestr ndo nzhee ne ngebez maestr lu.

²⁹ Or mbin Mari kona, oraaka ngwateli Mari nda Mari lo Jesús. ³⁰ Ne lee Jesús neeka ter tab leen yez, bee ndoka Jesús ta mwii Mart Jesús. ³¹ Ne or mwii re zha Israel kuu ngetetsey leettsoo Mari, lee Mari ngwateli nda, tsa mnudeke re zha dits Mari, tak mtsow re zha xgab lee Mari nda roo baa Las nday-onn.

³² Ne or mzin Mari ta ndo Jesús, tsa mto-bxub Mari xann nii Jesús, ne nzhab Mari:

—Zha Nabee, os lee'a gato'a nzhee, gagathet btan na.

³³ Ne or mwii Jesús nzhab Mari ne noga re zha Israel kuu ndeke dits Mari nzhab, kwathoz nalatt ne nabil ngoo leettsoo Jesús, ³⁴ tsa mnaabdiz Jesús ne nzhab Jesús:

—¿Pa mkaats goo Las?

Lee re zha nzhab:

—Zha Nabee, de tsa wii'a.

³⁵ Tsa mbinn Jesús. ³⁶ Ne lee re zha Israel nzhab:

—iWii goo xa kwathoz mke leettsoo zha Las!

³⁷ Per lee chop tson zha mbez:

—Zha ree kuu mtegwe ngutlo syega; ne ¿chu ngogt gatsow zha tsa na gagatht Las?

Jesús mteroban Las

³⁸ Ne tedib welt kwathoz nalatt ngoo leettsoo Jesús, tsa mbig Jesús roo baa. Lee baa'anak leen thib kelyoo, ne now thib ke rooy. ³⁹ Tsa nzhab Jesús:

—Kib goo ke.

Tsa lee Mart, btan Las nzhab:

—Zha Nabee, ser ndetsi'a Las, tak nda'a thap wiz nguth Las.

⁴⁰ Jesús mkab ne nzhab:

—¿Chu nit'n lo'a, os lee'a nyelaaza na, tewii'a re kuu thoz kuu tsow Diox?

⁴¹ Tsa mkiib zha ke. Ne lee Jesús mwii lobee ne nzhab:

—Xut'n, ndan texkix lo'a tak mbina kuu nin lo'a. ⁴² Na ne, lee lu thibka nzhabna xkiz'n, per ni nay tsa ne re men kuu nzi nzhee lee lu mtaal'n.

⁴³ Or ngwalo mni Jesús koree, tsa dib gan Jesús nzhab Jesús:

—iLas broo baa!

⁴⁴ Ne lee mbyi kuu ngutha mroo nabix lar, ne noga lo zha nabix lar, tsa nzhab Jesús:

—Bkib goo lar kuu nabix Las ne laa goo bi Las.

*Ngwalaaz re men gago Jesús tsib
(Mt. 26:1-5; Mr. 14:1-2; Lc. 22:1-2)*

⁴⁵ Ta mod kwaro re zha Israel kuu ngwatsetsey leettssoo Mari ngwalaaz Jesús, tak mwii zha kuu mtsow Jesús. ⁴⁶ Per lee chop tson zha ngwalaaz lo re fariseo, ne nzhab zha kuu mtsow Jesús. ⁴⁷ Tsa lee re fariseo ne re ngwleyy kuu nataaka, mkaltaa re zha lo thib jun ne nzhab zha:

—¿Kwan tsowaa? Tak lee mbyi'a getsow re milagr thoz. ⁴⁸ Os laa'aa zha, reta men yelaaz zha, tsa lee re zha yez Roma yaad zha ne luux zha lazaa ne gwodoo'aa.

⁴⁹ Per lee thib zha kuu nzo xid re zha'a kuu le Caifás, thib zha kuu nak ngwleyy kuu nabee lo reta ngwleyy liina, nzhab lo re zha:

—¡Yent kwan nane goo! ⁵⁰ Ne neeka nyent goo re kwaas, mas wen gath thibka mbyi por reta men yez, nake reta men yez lux.

⁵¹ Per nzhabt Caifás kona por leeka lee Caifás, sinke lee Caifás nak ngwleyy liina, kona mtsow Diox, par mroo roo Caifás lee Jesús gath por reta zha Israel, ⁵² ne nagte beeta por re zha Israel, sinke noga par kaltaa Diox re zhiinn Diox kuu nzo dib naaxta lo yezlyu, tsa gak re zha thibka yez. ⁵³ Ne desde wiiza lee re zha kuu nataak myaan re zha diiz kuth zha Jesús.

⁵⁴ Kona mndiyt raa Jesús legal xid re zha Israel, sinke mroo Jesús yezlyu Judea, ne ngwa Jesús thib yez kuu nzi gax yubiz kuu le Efrain, ne tyaa myaan Jesús kon re zha kuu ngeteed lo Jesús.

⁵⁵ Ne leettsa mera tsin ani Paskw chaan re Israel, tsa kwathoz men kuu nzo tedib net re yez ngwa Jerusalén, par tsow zha taxal nak kostumr zha kuu nak, ntsow nambi zha zha lo Diox ley lo zha. ⁵⁶ Tsa ndiy re zha nkwaan zha Jesús lee roo gwodoo, ne naabdiz re zha lo altaa zha, mbeze zha:

—¿Kwan ndak goo? ¿Chu tyaad mbyi'a lo ani o yaadt mbyi?

⁵⁷ Tsa lee re fariseo ne re ngwleyy kuu nabee lo re ngwleyy mnabee re zha, tsa loka zha kuu wii Jesús, ko zha diize, tsa ten zha Jesús.

12

*Ngot kuu mloo perfum Jesús
(Mt. 26:6-13; Mr. 14:3-9)*

¹ Leettsa ndoraa xoop wiz tsin ani Paskw, tsa myaad Jesús yez Betania ta nzo Las kuu lee Jesús mteroban. ² Ne tyaa mdexkwaa zha thib rtsee par Jesús, lee Mart mloo komid leen yann, ne lee Las nak thib re zha kuu mndob roo mes ndow kon Jesús. ³ Tsa lee Mari ndyadno teeka garol litr perfum kuu chul ndetsi, kuu natexkwaa kon ya kuu le nardo ne kwathoz naape, tsa mloo Mari perfum nii Jesús ne kon yitsek Mari mtekwiiz Mariy. Ne dita leen yuu mndetsii tsii

perfum. ⁴ Tsa lee Judas Iscariote, thib re zha kuu ngeteed lo Jesús, kuu mtsowa xgab taa Jesús lo re zha kuu nayii ne Jesús, nzhab:

⁵ —¿Chebee mdot perfum ree por tson gayoo denario, par gakaa re probe?

⁶ Per nzhabt Judas kona tak ntsow Judas xgab re prob, sinke tata nzhab zha tak wann nak zha, ne lee zha natsaal bols temi, ne nlowann zha temi kuu ngoo re zhaleen bols. ⁷ Tsa nzhab Jesús lo Judas:

—Laa'a Mari, tak mlotsw Mari perfum ree, tsa chul tetsin leettsa kaats zha na. ⁸ Lee re prob thibka nzi zha lo goo, per lee na ndot'n lo goo thitanax.

Lee re ngwleyy kuu nabee lo re zha Israel ngwalaaz zha gaguth Las

⁹ Tyen re zha Israel mbin lee Jesús ndo yez Betania, tsa ngwa zha tyaa, par wii zha Jesús ne par wii zha Las kuu lee Jesús mteroban. ¹⁰ Tsa lee re ngwleyy kuu nabee lo re ngwleyy myaan zha re zha diiz kuth zha Las, ¹¹ tak por lee Las naroob re zha Israel ngwalaaz Jesús ne mlaa zha re ngwleyy.

Jesús mndaab yez Jerusalén

(Mt. 21:1-11; Mr. 11:1-11; Lc. 19:28-40)

¹² Ne lee tedib wiza, lee naroob re men kuu ngwa lo ani Paskw, leettsa mbin re zha lee Jesús ndetsin Jerusalén, ¹³ tsa mga re zha la yin, ne mroo zha mkayaa zha Jesús, ne nex nzhab re zha:

—¡Aka wen nak Diox! ¡Aka wen nak zha kuu ndyaad kon yalnabee chaan Zha Nabee! ¡Golaa lo zha kuu nak rey lo re zha Israel!

¹⁴ Tsa mzaal Jesús thib burr yeen ne mke Jesús dits maa, tsa gak kuu mbeze lo xkiiz Diox:

¹⁵ Tsebt goo zha yez Sión.

Wii goo, lee zha kuu nak rey goo ndyaad ndob dits thib burr yeen. [Zac. 9:9]

¹⁶ Per lee re zha kuu ngeteed lo Jesús, myent zha neeka thib re koree, per bluz leettsa lee Jesús ndya yibaa, tsaraa mteleaza re zha re kuu ngok, re kuu ndaa xkiiz Diox kwent chaan Jesús.

¹⁷ Ne lee re zha kuu ndo kon Jesús, leettsa mrez Jesús Las roo baa, ne mteroban Jesús Las, re zha'a mndaa kwent kuu mwii zha mtsow Jesús. ¹⁸ Kona lee re men mroo ngwaxiinet Jesús, tak mbin zha re milagr thoz kuu mtsow Jesús. ¹⁹ Per lee re fariseo mbeze lo re altaa:

—¿Chu ngwiit goo yent kwan tak tsowaa? Reta men ndeke dits zha.

Lee chop tson zha gryeg mkwaan Jesús

²⁰ Ne xid re zha kuu ngwayollo Diox lo ani yez Jerusalén, ngwa chop tson zha kuu nak zha gryeg. ²¹ Lee re zha'a mbig lo Lip, kuu nak zha yez Betsaida, thib yez chaan yezlyu Galilea, ne nzhab re zha lo Lip:

—Nlaaz nee wii nee Jesús.

²² Ora lee Lip ngwa nzhabo lo Ndres ne ngwa rop zha nzhab zhay lo Jesús.

²³ Tsa nzhab Jesús lo rop zha:

—Mzina or kuu lee Diox tsow nataak xgann. ²⁴ Wlipaa na nin, os lee thib bin nzob xtil yot lo yu ne os leey gathie par lene, thibe yaane ne taate nzob xtil, per os leey yoy lo yu ne lene naroob nzob xtil taay. ²⁵ Lee zha kuu nke leettsou yalnaban chaan teluux zhay, per lee zha kuu nket leettsou yalnaban chaan lo yezlyu ree, tetsow zha'a gan yalnaban kuu thitanax yibaa. ²⁶ Os lee thib zha nlaaz tsow rtsin na, ndoblo teke zha dits'n, ne loka pa ta ndon no zha kuu ntsow rtsin na ndo tyo. Ne lee re zha kuu ntsow rtsin na, lee Xut'n tsow nataak zha'a.

Jesús mndaa kwent lee Jesús gath

²⁷ ¡Kwathoz nalat nzo leettsoon nalar! Ne net'n kwan gap'n: "Xut'n, laata riid'n yalti ree". ¡Per par kona ndyal'n! ²⁸ Xut'n, btsov nataak le'a.

Tsa ora mbin na thib bos kuu mroo lobee, kuu nzhab:

—Mtsow nataaka nay, ne tetsow nataak nay tedib welt.

²⁹ Ne mbin re zha kuu nzi tya bosa, tsa nzhab re zha, bi ngundiyy, per lee tedib net zha nzhab:

—Thib mandad chaan Diox mni lo zha.

³⁰ Tsa nzhab Jesús lo re men kuu nzi tya:

—Mniit bosa por na, sinke por goo mniy. ³¹ Ne nal nak or kuu naab Diox kwent lo re men yezlyu ree, ne nal koo Diox Maxuyu kuu nabee lo yezlyu ree. ³² Per leettsa robana, tsa tsow'n lee re men yelaaz na.

³³ Ne tenzhee mod mndaa Jesús kwent naa xomod gath Jesús. ³⁴ Lee re men mkaab lo Jesús ne nzhab:

—Nee ne lee lo ley kuu mkee Moisés mbezz, lee Crist Kuu Taal Diox Nabee, thitanax ban zha ne gathit zha. ¡Kona chebee mbeza lee Zha Kuu Mzin Ngok Men ndoblo roban? Ne icho nak Zha Kuu Mzin Ngok Men?

³⁵ Tsa nzhab Jesús lo re zha:

—Nal bee ndo xni lo re goo telut. Bte goo lo xni nalt raa kuu bee ndobke xni, tsa tsint yalkow chatta lo goo taxal thib kuu ngebeta goo, tak lee zha kuu ndiy lo yalkow, net zha pa nda zha. ³⁶ Gwalaaz goo xni nalt raa bee ndobkey lo goo, tsa gak goo zhiinn zha kuu nak xni.

Or ngwalo nzhab Jesús re koree, tsa nda Jesús ne mkaslo Jesús lo re men.

Ngwalaaz re zha Israel Jesús

³⁷ Ne tegal mtsow Jesús re milagr thozi lo re zha, per ngwalaaz re zha Jesús, ³⁸ tak tabaa mrolo kuu mkee profet Isaí lo re men, leettsa nzhab profet:

Zha Nabee, ngwalaazt re men xkiiza kuu mndaa nee kwent lo re men, tegal mt-sowa re kuu thozi lo re zha ngwalaazt zha lu. [Is 53:1]

³⁹ Ngwalaazt re zha Jesús, tak noga mkee Isaí:

⁴⁰ Diox mtekow ngutlo re men, ne mtsow nad Diox leettsoo re men, tsa gagt wii zha ne tsa gagt yen zha xkiiz Diox.

"Tsa bretabt zha lon, ne tegwet'n zha". [Is. 6:10]

⁴¹ Nzhab Isaí re koree, tak mwii Isaí yalnabee chaan Jesús, kona mndaa Isaí kwent chaan Jesús.

⁴² Ne tegal tatay, kwathoz re zha Israel ngwalaaz Jesús, ne asta chop tson re gob-yern ngwalaaz Jesús, per nzeb re zha gab zhay, tak nzeb zha ne zha re fariseo, tak os lee zha gab zhay, tsa lee re fariseo koo zha ta nkaltaa re zha nteed zha xkiiz Diox.

⁴³ Tak mas nlaaz zha tsow nataak re men zha, nake tsow nataak Diox zha.

Por xkiiz Jesús naab Diox kwent lo re men

⁴⁴ Tsa nex nzhab Jesús:

—Loka cho nyelaaz na, nyelaazt zha beeta na, sinke noga Xut'n kuu mtaal'n nyelaaz zha. ⁴⁵ Ne loka zha kuu ngwii lon noga ngwii zha zha kuu mtaal'n. ⁴⁶ Na nak taxal xni, ne ndyal'n lo yezlyu ree, tsa loka zha kuu yelaaz na yaant lo yalkow.

⁴⁷ Per lee zha kuu nhzon xkiz'n, ne nhzhont diize, nat naab kwent lo zha, tak ndyal'n par naab'n kwent lo re men, sinke leen ndyal'n par telaan re men lo yalguth. ⁴⁸ Lee zha kuu nyelaazt na ne ntswot re kuu nin, napa zha'a cho naab kwent lo zha, leeka re diiz kuu mnin naab kwent lo zha wiz bluz. ⁴⁹ Tak mniit'n kuu nlaz'n; sinke re kuu mnabee Xut'n kuu mtaal'n, kona mnnin. ⁵⁰ Ne, nen lee kuu mnabee Xut'n nak, tsow re men gan yalnaban kuu thitanax. Kona reta kuu nin, ni nay taxal mnabee Xut'n lon.

13

Jesús mteech nii re zha kuu ngeteed lo Jesús

¹ Ne leettsa mera ndetsin ani kuu le Paskw, ne'a Jesús mzina or kuu lee Jesús laa Jesús yezlyu ree, par ndya Jesús lo Xut Jesús. Ne kwathoz mke leettsou Jesús re zha Jesús kuu nzi lo yezlyu ree, tataka mke leettsou Jesús re zha asta bluz.

² Leettsa ngeyow rtsee re zha lee Maxuyu mloo'a yek Judas Iscariote, xgann Simún, tsa taa zha Jesús lo re zha kuu kuth Jesús.

³ Ne kom ne'a Jesús lo Diox mroo Jesús ne lo Diox bretabt Jesús, ne noga ne'a Jesús lee Xut Jesús mndaa reta yalnabee lo Jesús. ⁴ Kona leettsa ngeyow rtsee re zha, tsa ngwateli Jesús roo mes ne mloo Jesús thib xab Jesús, ne mliib Jesús thib tway leey Jesús. ⁵ Tsaraa

mloo Jesús nit leen thib bandej ne mndelo Jesús mteech nii re zha kuu ngeteed lo Jesús, ne mtekwiiz Jesús nii zha kon tway kuu naliib leey Jesús.

⁶ Per or ndateech Jesús nii Pey, tsa nzhab Pey lo Jesús:

—Zha Nabee, ¿chu ne'a lu teech niin?

⁷ Tsa mkab Jesús lo Pey ne nzhab Jesús:

—Nyenta kuu ngetsow'n nal, per bluz tsaraa yen luy.

⁸ Lee Pey nzhab:

—Neeka mas lat'n teecha niin.

Lee Jesús mkab ne nzhab:

—Os leen teecht'n nii'a gagt gaka zha da.

⁹ Simún Pey mkab ne nzhab:

—Os leey tabaay, Zha Nabee, teecheeta beeta niin, noga yaan ne yek'n bteech.

¹⁰ Per lee Jesús nzhab lo Pey:

—Lee zha kuu mkee'a got, ndechet yeech dita zha sinke beeta nii zha ndoblo yeech, tak nambi'a zha. Ne nambi'a re goo, tegal ret gooy.

¹¹ Leettsa nzhab Jesús: "Ret goo nambi", tata nzhab Jesús, tak ne'a Jesús naa cho kuu taa Jesús lo re zha kuu kuth Jesús.

¹² Leettsa ngwalo mteech Jesús nii re zha, tsa mdok xab Jesús, ne mndob Jesús roo mes tedib welt, ne nzhab Jesús lo re zha:

—¿chu nyen goo kuu mtsow'n? ¹³ Lee re goo ni goo maestr ne Zha Nabee lon, ne wen ntsow goo ni gooy, tak nak nay. ¹⁴ Na nak maestr goo ne Zha Nabee lo goo, ne mteech'n nii goo, kona noga goo ndoblo goo teech goo nii altaa goo. ¹⁵ Mtsow'n koree lo goo, tsa noga goo tsow goo taxal mtsow'n lo goo. ¹⁶ Wlipaa na nin lo goo, neeka thib mos nataagt mos masraa naake zha kuu nabee lo mos, ne neeka thib zha kuu ntsow mandad nataagt zha masraa naake zha kuu mtaal zha. ¹⁷ Os lee goo nyen goo re koree ne ntsow gooy, kwathoz wen nda goo.

¹⁸ 'Ngenit'n koree lo reta goo, tak ne'a na cho re zha kuu mlin. Per ndoblo gak kuu mbezi lo xkiiz Diox: "Lee zha kuu nzhown kon na, nak zha kuu mnayii nen". [Sal. 41:9]

¹⁹ Nin koree lo goo, tsa leettsa gake, yelaaz goo lee na nak'n kuu nak'n. ²⁰ Wlipaa na nin, loka zha kuu kayaa zha kuu tal'n, na nkayaa zha'a, ne loka zha kuu nkayaa na, nkayaa zha zha kuu mtaal'n.

Jesús mndaa kwent lee Judas taa Jesús lo re zha kuu nak tsiin

(Mt. 26:20-25; Mr. 14:17-21; Lc. 22:21-23)

²¹ Or ngwalo nzhab Jesús re koree, kwathoz nalatt ngoo leettsoo Jesús, tsa nzhab Jesús:

—Wlipaa na nin lo goo, lee thib re goo taan lo re zha kuu kuth'n.

²² Tsa lee re zha kuu ngeteed lo Jesús mndelo mwii lo altaa, ne neeka net zha naa cho mteth Jesús. ²³ Ne lee thib zha kuu kwathoz

nke leettsoo Jesús ndob cho Jesús, ²⁴ tsa lee Simún Pey mtsow seny lo zha'a, tsa naabdiz zha naa cho nak zha kuu mteth Jesús. ²⁵ Tsa mbig zha'a mas gax cho Jesús ne mnaabdiz zha lo Jesús ne nzhab zha:

—Zha Nabee, ¿cho kuu ntetha?

²⁶ Jesús mkab ne nzhab:

—Nal tenit'n thib le pan ne lo zha kuu ta nay, zha'ay.

Ora mtenit Jesús lut pan ne mndaa Jesús pan lo Judas Iscarioote, xgann Simún Iscarioote. ²⁷ Ne ora mzhen Judas pan, ne ndow Judas pan ne oraaka lee Maxuuy mndaab leettsoo Judas. Tsa nzhab Jesús lo Judas:

—Loka kuu nlaaza tsowa, btsowe nalar.

²⁸ Per lee re zha kuu ngeteed lo Jesús kuu nzi ty, myent zha naa chebee tata nzhab Jesús lo Judas. ²⁹ Ne kom lee Judas nak kuu nden bols temi, kona lee chop tson zha kuu ngeteed lo Jesús mtsow xgab, lee Jesús nzhab lo Judas, tii Judas lut kuu ndeche re zha lo ani o taa Judas lut kwaaw lo re prob.

³⁰ Ngwalo ndow Judas pan kuu mzhen Judas oraaka nda Judas. Ne mkowa yezlyu ora.

Diiz kub kuu nataak kuu nabee Jesús

³¹ Ne or ngwalota mroo Judas, tsa nzhab Jesús:

—Mzina or kuu lee re men tsow nataak na, Kuu Mzin Ngok Men, ne tataga tsow nataak re men Diox por Xgann Diox. ³² Ne os por Xgann Diox tsow nataak re men Diox, noga Diox tetsow nataak xgann, ne mera tsow nataak Diox Xgann Diox. ³³ Re goo kuu nak taxal zhiinn na, telutta ndon lo goo. Tsa lee re goo kwaan na, per leeka kuu nzhap'n lo re zha Israel, nin lo goo nal: Gagt ya goo na ndyan. ³⁴ Ne lee nal nabeen thib diiz kub kuu nataak lo goo: Bke leettsoo goo thib goo ne tedib goo. Taxal nke leettsoon leeka goo, leeka tata bke leettsoo goo thib goo ne tedib goo. ³⁵ Os lee goo nke leettsoo goo thib goo ne tedib goo, reta men yezlyu ree ne lee re goo nak zha da.

Jesús nzhab lee Pey gab nlebeet Pey Jesús
(Mt. 26:31-35; Mr. 14:27-31; Lc. 22:31-34)

³⁶ Tsa lee Simún Pey mnaabdiz lo Jesús ne nzhab:

—Zha Nabee, ¿pa ndya'a?

Lee Jesús mkab nzhab:

—Gagt ya'a ta ndyan, per mas bluz tsaraa yaada.

³⁷ Lee Pey nzhab:

—Zha Nabee, ¿chebee gagt teken ditsa nal? iSi lista ndon gath'n por lu!

³⁸ Jesús mkab lo Pey ne nzhab:

—¿Gatha por na kaa? Wlipaa na nin lo'a, leettsa terka kwez ngite lee'a gab tson welt nlebeeta na.

14

Jesús nak net lo Diox

¹ 'Gagt chop xgab goo, gwalaaz goo Diox ne gwalaaz goo na. ² Lee liz Xut'n kwathoz yuu ta yo men nzo; ne os leey nagte tata, ganit nay lo goo. Kona lee nal ndyan ndatexkwaan ta yo goo. ³ Ne os leen ndyan ne ndatexkwaan ta yo goo, bren tedib welt ne yaadxin goo, tsa no goo yo goo ta yoon. ⁴ Ne'a goo pa ndyan, noga ne goo net.

⁵ Tsa lee Mach nzhab lo Jesús:

—Zha nabee, net nee pa ndya'a, ne ḥxomod ne nee net tsa?

⁶ Lee Jesús mkab ne nzhab:

—Na nak taxal net, na nak kuu wli, ne na nak yalnaban. Ne neeka thib men tsint lo Xut'n, os nagte por na. ⁷ Os lee goo nlebee goo na, noga nlebee goo Xut'n; ne nlebee'a goo Xut'n, tak mwii'a goo Xut'n.

⁸ Tsa nzhab Lip lo Jesús:

—Zha nabee, beeta bloo Xuta lo nee, ne kon kona wena yo leettsou nee.

⁹ Tsa lee Jesús nzhab:

—Lip, nda'a wiz ndon lo re goo, ne ḥchu terka lebee'a na? Loka zha kuu ngwii lon, mwii'a zha'a lo Xut'n; ne ḥchebee mbeza lon “bloo Xuta lo nee”? ¹⁰ ḥChebee nyelaazta lee Xut'n nzo leettsou ne lee na nzon leettsou Xut'n? Lee re kuu nin lo goo, nit nay por kwent chaan da, sinke lee Xut'n kuu thibka ndo kon na, ntsow Xut'n rtsin Xut'n. ¹¹ Gwalaaz goo lee na nzon leettsou Xut'n, ne lee Xut'n nzo leettsou. Ne os lee goo nyelaaz gooy, por re kuu ntsow'n gwalaaz goo kuu nin. ¹² Wlipaa na nin, loka zha kuu nyelaaz na, no zha tetsow zha re kuu ntsow'n, ne masraa kuu thoz tsow zha, tak lee na ndyan lo Xut'n. ¹³ Ne reta kuu naab goo lo Xut'n por len, tetsow nay, tsa gak naataak Xut'n por na. ¹⁴ Os naab goo thib kuu por len, tetsow nay.

Jesús nzhab taal Mbi Nayon

¹⁵ 'Os lee re goo nke leettsou goo na, bin goo diiz re kuu mnabeen lo goo. ¹⁶ Ne lee na nal naab'n lo Xut'n, tsa taal Xut'n Mbi Nayon, par tsow ayud goo ne thibka to lo goo, ¹⁷ ne Mbi ree nak Mbi Nayon kuu wli ne gagt kayaa re men yezlyu Mbi ree, tak nloot Mbi lo zha ne neeka nlebeet zha Mbi, per lee re goo nlebee goo Mbi, tak lo goo ndo Mbi, ne thitanax ban Mbi leettsou goo.

¹⁸ 'Lat'n goo taxal btab, bren tedib welt tsa ton kon re goo. ¹⁹ Telutta ne lee re men yezlyu ree wiit raa na; per lee re goo tewii goo na ne taban goo, tak lee na naban na. ²⁰ Ne wiza lee re goo ne, lee na nzon leettsou Xut'n, ne lee re goo nzo leettsou, ne lee na nzo leettsou goo. ²¹ Ne loka zha kuu nkayaa re kuu nabeen ne nzhon zha diize, zha'a nak zha kuu wlipaa nke leettsou na; ne lee zha kuu nke leettsou na nke leettsou Xut'n

zha'a ne noga na nke leettsou zha'a, ne lon na lo zha, tsa mas wen lebee zha na.

²² Tsa lee Judas (kuu nagt Judas Iscariote), mnaabdiz lo Jesús ne nzhab:

—Zha Nabee, ḥchebee loo'a lu lo nee, ne lee lo re zha yezlyu loota lu?

²³ Lee Jesús mkab ne nzhab:

—Lee zha kuu nke leettsou na nzhon zha diiz kuu nabeen; ne lee Xut'n nke leettsou Xut'n zha'a, ne lee rop nee Xut'n yaad nee yo nee kon zha'a. ²⁴ Lee zha kuu nket leettsou na, nzhont zha'a diiz lon. Lee re diiz kuu ngeyon goo ngenin, nagte xkiz'n, leey nak xkiiz Xut'n kuu mtaal'n.

²⁵ 'Nal ndon lo goo ngenin re koree lo goo, ²⁶ per lee Mbi Nayon kuu taal Xut'n par kenap re goo kwent chaan da, lee Mbi loo reta kuu lo goo, ne tsow Mbi telaaz goo reta kuu mnin lo goo.

²⁷ Lee na ndyan, per nlaz'n wen kwin goo, ne tsow'n tsa wen kwin goo, per tsowt nay taxal ntsow re men yezlyu reey. Yat leettsou goo ne neeka tsebt goo. ²⁸ Mbina goo nin, lee na ndya ne bren yal'n tedib welt. Os lee goo wlipaa nke leettsou goo na, kwathoz naley gayoo leettsou goo mbin goo lee na ndya lo Xut'n, tak masraa nataak Xut'n naake na. ²⁹ Ne nal nin re koree lo goo, tsa leettsa gake yelaaz goo na.

³⁰ 'Telutta tediz'n lo goo, tak ndyaada Maxuuy kuu nabee lo yezlyu ree. Ne tegal neeka lut yalnabee naprt Maxuuy par nabee Maxuuy lon, ³¹ per tabaa ndoblo gake. Tsa lee re men yezlyu ree ne lee na nke leettsou Xut'n, ne ntsow'n re kuu mtaal Xut'n na tsow'n.

Tsa nzhab Jesús:

—Gwateli goo nda goo re'aa.

15

Jesús nak taxal thib luts ub

¹ Noga nzhab Jesús:

—Na wlipaa nak'n taxal thib xann luts ub, ne Xut'n nak kuu nteneaa luts. ² Ne os lee thib zhit luts ndaate xle, thitanax nchuug Xut nay. Per lee zhit kuu ndaa xle, ntembi Xut nay tsa ke masraa xley. ³ Ne lee goo nambi'a goo por re diiz kuu mnin lo goo. ⁴ Thibka gwato goo lon, taxal thibka ndon kon goo. Taxal thib zhit gagt taay xle os leey ndobte lo luts; tataka gagt taa goo xle, os lee goo ndot goo kon na.

⁵ Na nak taxal xann luts ta mas nachaa, ne lee re goo nak taxal re zhit luts. Kona lee re zha kuu thibka ndo kon na, ne lee na thibka ndo kon lee zha kwathoz xle ndaa zha, tak os lee goo ndot goo kon na, yent kwan tak tsow goo. ⁶ Tak lee zha kuu ndot kon na, zha'a nak taxal thib zhit ya kuu mlobi zha kwatxa tsa bize, ne tsaraa nthop zhay ngo zhay lo ki ne nzheeke.

7 'Os lee goo thibka ndo goo kon na, ne ntsow goo kuu mnabbeen lo goo, bnaab goo loka kuu nlaaz goo lon ne lee na tay. 8 Tsa lee re men tsow nataak Xut'n leettsa wii zha lee re goo ndaa xle, ne os lee goo ndaa goo xle, wlipaa nak goo zha kuu ngeteed lon. 9 Ne nke leettsoon goo taxal nke leettsou Xut'n na, ne thibka gwato goo lo yalnkelaaaz da. 10 Os nhzon goo diiz re kuu nabbeen lo goo, tsasi wlipaa ndo goo loo yalnkelaaaz da, leeka taxal nhzon na diiz ntsow'n re kuu nabee Xut'n lon, ne thibka ndon lo yalnkelaaaz chaan Xut'n.

11 'Mnin koree lo goo, tsa yo yalnaley chaan da leettsou goo, tsa thibka naley lo leettsou goo. 12 Lee kuu nabbeen lo goo nak koree: Bke leettsou goo thib goo ne tedib goo, taxal nke leettsou goo. 13 Lee yalnkelaaaz kuu mas nataak nak, leettsa lee thib zha taa zha zha gath zha por amig zha. 14 Goo nak amig da, os lee goo ntsow goo kuu mnabeen lo goo tsow goo. 15 Ne nit'n lo goo lee goo nak mos da, tak lee mos net mos naa kwan ntsow patron mos. Amig nin lo goo, tak reta kuu ne Xut'n lon mni'a nay lo goo. 16 Goot mlin, sinke na mli goo par taa goo kwathoz xle, ne lee xle kuu taa goo, gak xle kuu xek thitanax; tsa lee Xut'n taa lo goo, reta kuu naab goo lo Xut'n por len. 17 Koree nak kuu nabbeen lo goo: Bke leettsou goo thib goo ne tedib goo.

Lee re men yezlyu ree mnayii zha mne zha Jesús ne re zha Jesús

18 'Os lee re men yezlyu ree yii ne goo, nlaz'n ne goo, na nayii zha ne zha os lee zha yii zha ne zha goo. 19 Os lee goo gagak goo zha yezlyu ree, kwathoz ke leettsou re men yezlyu ree goo, taxal nke leettsou zha re zha zha, per tak mlin goo xid re men yezlyu ree, kona nayii re men yezlyu ree ne goo, tak nagt raa goo zha yezlyu ree. 20 Btelaaz goo kuu mnin lo goo: "Neeka thib mos nataagt mos masraa nake patron mos". Ne os mreke zha dits'n, noga dits goo tereke zha, ne os lee zha mbin zha diiz xkiz'n, noga tonga zha diiz xkiz goo. 21 Reta koree tsowno zha goo por na, tak nlebeet zha naa cho mtaal'n.

22 'Os gayalt'n ne os ganit'l lo re men, neeka thib falt napt re men. Per nal nap zha falt ne yent kwan kuu kelo zha, tak mni'a na lo zha. 23 Loka zha kuu nayii nen, noga nayii zha ne zha Xut'n. 24 Ne gagapt re men falt, os gatsowt'n re kuu thoz lo re zha, re kuu neeka thib zha gagt tsow. Per nal mwii'a zha mtsow'n re kuu thoz, ne tegal mwii zhay, nayii zha ne zha na ne Xut'n. 25 Per lee re koree ngeyak tsa gak re kuu nke lo ley: Yent xkwan ne nayii zha ne zha na. [Sal. 35:19; Sal. 69:4]

26 'Per leettsa yaad Mbi Nayon tetsey leettsou goo, Mbi kuu taal'n lo goo por Xut'n,

Mbi kuu wlipaa roo lo Xut'n, lee Mbi taa kwent chaan na lo goo. 27 Ne no goo taa kwent chaan da, tak desde ner ndo goo kon na.

16

1 'Nin re koree lo goo, tsa thib to goo yelaaz goo na. 2 Tak tagoo zha goo ta nteed zha xkiiz Diox, noga tetsin or o wiz ndota zha kuth thib goo, tak tsow zha xgab nget-sow zha kuu nyow leettsou Diox. 3 Tata tsow zha tak nlebeet zha Xut'n ne neeka na. 4 Nin koree lo goo, tsa leettsa gake, telaaz goo lee na mni'a nay lo goo, ne mnit'n koree lo goo ner, tak ndon lo goo tsya.

Kuu ntsow Mbi Nayon

5 Ne noga nzhab Jesús:

—Per lee nal leen ndya lo Xut'n kuu mtaal'n, ne *¿chu neeka thib goo naabdizt lon naa pa ndyan?* 6 Leel nabil nzo leettsou goo, tak nin koree lo goo. 7 Per kuu wli nin lo goo, mas wen ndyan. Tak os leen bit'n yaadt Mbi kuu tsow ayud goo, per os leen bin, na taal Mbi. 8 Ne leettsa yaad Mbi, nambi loo Mbi re kuu went, re kuu wli ne kuu wen lo re men yezlyu ree, ne loo Mbi xomod naab Diox kwent lo re men yezlyu ree. 9 Lee Mbi Nayon loo lo re zha lee zha went nak zha, tak nyelaazt zha na. 10 Ne lee Mbi Nayon loo lo re zha lee na wen nak'n, tak lee na ndyan lo Xut'n ne wiit raa goo na; 11 Ne lee Mbi Nayon loo lo re men yezlyu ree, naa xomod naab Diox kwent lo reta men, tak mnaaba Diox kwent loo Maxuuy kuu nabee lo yezlyu ree.

12 'Kwathoz kuu nzo nin lo goo, per gagt nin rey lo goo nal, tak gagt yen gooy os ni nay lo goo. 13 Per leettsa yaad Mbi Nayon kuu wlipaa, tsa loo Mbi re kuu wli lo goo, tak nit Mbi por leeka lee Mbi, sinke lee Mbi taa kwent beeta re kuu gon Mbi, tsa ne Mbi re kuu gak lo goo. 14 Lee Mbi tsow tsa tsow nataak re men na, tak kayaa Mbi kuu nak chaan da kuu wli tsa ne Mbi Nayone lo goo. 15 Reta kuu nap Xut'n nak chaan da, kona nin lo goo lee Mbi Nayon kayaa kuu nak chaan da ne taa Mbi Nayone lo goo.

16 'Telutta ne wiit raa goo na, per telut bluz lee goo bre wii'n.

Lee yalnabil gak yalnaley

17 Tsa lee chop tson zha kuu ngeteed lo Jesús, mndelo zha mnaabdiz zha lo altaa ne nzhab zha:

—*¿Kwan nlaaz Jesús ne, ne chebee mbez Jesús?* Telutta ne wiit raa goo na ne telutta lee goo bre wiin, ne *¿chebee mbez Jesús ndyan lo Xut'n?* 18 *¿Kwan nlaaz Jesús ne, ne chebee mbez Jesús: "telutta"?* Nyentaa kuu ndediz Jesús.

19 Per myeen Jesús lee re zha nlaaz naabdiz lo Jesús, tsa nzhab Jesús lo re zha:

—Na ni lo goo telutta ne wiit raa goo na, ne telut bluz bre goo wii goo na tedib welt, ¿chu nyent goo koree? ²⁰ Wlipaa na nin, lee re goo gonn goo ne nabil yo leettsoo goo, per lee re men yezlyu ree naley yo leettsoo zha. Per tegal nabil yo leettsoo goo, ne lee yalnabil kuu yo leettsoo goo gak yalnaley lo goo. ²¹ Leettsa gal zhiinn thib ngot, nlaaz leettsoo ngot tak mzina or kuu gal zhiinn ngot, per leettsa ngwalo ngol zhiinn ngot, nithlaaz ngot yalnlaaz, tak kwathoz naley nzo leettsoo ngot, tak ngola zhiinn ngot. ²² Ne leeka tata nabil nzo leettsoo goo nal, per tebre'aa tsaalaa tedib welt. Tsa lee re goo kwathoz naley yo leettsoo, ne yent cho kib yalnaleya leettsoo goo.

²³ 'Ne wiza yent raa kwan naabdiz goo lon. Wlipaa na nin, lee Xut'n taa reta kuu naab goo lo Xut'n por len. ²⁴ Asta nal, neeka thib kuu ter naab goo por len, bnaab gooy ne tekayaa gooy, tsa kwathoz naley yo leettsoo goo.

Jesús mtsow gan lo yezlyu ree

²⁵ 'Reta koree nin lo goo kon diiz nanzee, per tetsin wiz kuu niit raa na lo goo kon diiz nanzee, sinke nambita nin kwent chaan Xut'n lo goo. ²⁶ Ne wiza lee re goo naab kuu lo Xut'n por len, ne niit'n lo goo lee na naab'n lo Xut'n por re goo, ²⁷ tak nke leettsoo Xut'n goo. Ne nke leettsoo Xut'n goo, tak nke leettsoo goo na, ne nyelaaz goo leen mroo lo Diox. ²⁸ Lo Xut'n mroon ndyal'n lo yezlyu ree, ne lee nal lan yezlyu ree ne bren ndyan lo Xut'n.

²⁹ Tsa lee re zha kuu ngeteed lo Jesús nzhab:

—Nalsi nambita ngeni'a loo nee, ngenit raa lu kon diiz nanzee. ³⁰ Nalsi ne nee lee lu ne reta kwa, ne ndechet naabdiz neeka thib zha lo'a. Kona nyelaaz nee lee Diox mtaala.

³¹ Jesúis mkab ne nzhab lo re zha:

—¿Chu nalsi nyelaaz goo lee Diox mtaal'n? ³² Per mzina or kuu lee re goo raats, kadta goo ndya goo liz goo ne laa goo thita na. Per ndot'n thita na, tak lee Xut'n ndo kon na. ³³ Reta koree ngenin lo goo, tsya yat leettsoo goo tak nyelaaz goo na. Lo yezlyu ree teriid goo yalti, per tsebt goo, tak mtsowa na gan lo yezlyu ree.

17

Lee Jesús mnaab lo Diox por re zha kuu ngeteed lo Jesús

¹ Or ngwalo nzhab Jesús re koree, tsa mwii Jesús lobee, ne nzhab Jesús:

—Xut'n, nalsi mzina or kuu leen rid yalti, btsow tsa tsow nataak re men xganna. Tsa noga xganna tsow tsa tsow nataak zha lu.

² Lu mndaa yalnabee lon, tsa nabeen lo reta men yezlyu ree, tsa tan yalnaban kuu

thitanax lo re zha kuu mndaa'a lon. ³ Lee yalnaban ree nak, lebee re zha lee lu nak thibka Diox kuu wlipaa ne Jesucrist kuu mtaala.

⁴ 'Mtsowa tsa tsow nataak re mena lo yezlyu ree, tak mtsowa na re kuu mtaala na tsow'n. ⁵ Kona Xut'n, taa yalnabee lon, yalnabee kuu mkenon leettsa mndon lo'a, leettsa terka texkwaa yezlyu.

⁶ 'Mloon naa cho naka lo re zha kuu mli'a, re zha kuu mndaa'a lon, tak zha'a nak zha ne mndaa'a zha lon ne mbin zha diiz xkiiza. ⁷ Lee nal ne a zha lee reta kuu mndaa'a lon chaana nake. ⁸ Tak nzhapa na lo re zha re kuu ne a lon, mbina zhay ne wlipaa ne zha lo'a mroon ne wlipaa ngwalaaz zha lee lu mtaal'n.

⁹ 'Ngenaab'n lo'a tsa kenapa re zha ree, per ngenaab'n lo'a por reta men yezlyu, sinke ngenaab'n lo'a, tsa kenapa re zha kuu mndaa'a lon, tak zha'a nak re zha. ¹⁰ Reta zha da nak zha'a ne reta zha'a nak zha da, ne lee re zha ree ntsow nataak zha na.

¹¹ 'Ya yetot raa na lo yezlyu ree, per lee re zha ree bee nzi zha lo yezlyu ree, lee na ndyal lo'a Xut'n kuu nayon, bkenap re zha kon yalnabee chaana kuu mndaa'a lon, tsa thibka gak zha re zha taxal thibka nakaaropaa.

¹² 'Leettsa mndon kon re zha kuu mndaa'a lon lo yezlyu ree, tsa mkenap'n re zha kon yalnabee chaana kuu mndaa'a lon. Ne neeka thib zha kuu mndaa'a lon mluuxt, beeta zha kuu naka diiz lux mlux, tsa ngok kuu nke lo xkeetsa.

¹³ 'Ne lee nal beren lo'a, per nal kuu bee ndon lo yezlyu ree, ngenin koree, tsa kwathoz naley yo leettsoo re zha, taxal naley nzo leettsoon. ¹⁴ Na mndaa kwent xkiiza lo re zha, per lee re men yezlyu nayii ne re zha, tak nagt zha zha yezlyu ree, taxal nagt na zha yezlyu ree. ¹⁵ Ngenaab't'n lo'a koo'a zha lo yezlyu ree, sinke ngenaab'n lo'a tsa kenapa zha lo Maxuuy. ¹⁶ Leeka taxal nagt'n zha yezlyu ree, noga re zha nagt zha zha yezlyu ree. ¹⁷ Btembi re zha kon xkiiza kuu wli nak. Tak xkiiza nak kuu wli.

¹⁸ Leeka taxal mtaala na lo re men yezlyu ree, tabaaka taal'n re zha lo re men yezlyu ree. ¹⁹ Ne por re zha ree, ntembin na leeka na, tsa noga re zha gak nambi zha por xkiiza kuu nak kuu wli.

²⁰ 'Ne ngenaab't'n lo'a kenapa beeta re zha ree, sinke ngenaabka na lo'a tsa kenapa re zha kuu yelaaz na bluz por xkiiz re zha ree. ²¹ Xut'n naab'n lo'a, tsa gak re zha ree taxal nakaaropaa, nzo'a leettsoon ne nzon leettsoo'a, ne naab'n tsa wlipaa yo re zha leettsoo'a ne leettsoon, tsa yelaaz re men yezlyu ree lee lu mtaal'n. ²² Ne ntsow nataak na re zha, taxal ntsow nataaka na, tsa thibka gak re zha, taxal thibka nakaaropaa.

ropaa. ²³ Na nzo leettsoo re zha ne lu nzo leettsoo na, tsa wlipaak gak re zha thibka, tsa lee re men yezlyu ne lee lu mtaal'n, ne ne re men yezlyu ree nke leettsoo'a re zha, taxal nke leettsoo'a na.

²⁴ 'Xut'n, nlaz'n lee reta zha kuu mnida'a lon kwin zha ta ndon, tsa wii re zha yalnabee kuu mnida'a lon; leettsa terka texkwaa'a yezlyu, nke'a leettsoo'a na. ²⁵ Xut'n nali naka, lee re men yezlyu ree nlebeet zha lu, per lee na nlebeen lu, ne noga re zha ree ne zha lee lu mtaal'n. ²⁶ Mloon lo re zha naa cho naka, ne teloo raa nay, tsa taxal nke leettsoo'a na, ke leettsoo'a re zha, ne lee na to kon re zha.

18

Mzhen re men Jesús

(Mt. 26:47-56; Mr. 14:43-50; Lc. 22:47-53)

¹ Leettsa ngwalo mndediz Jesús lo Diox, tsa mroo Jesús kon re zha kuu ngeteed lo Jesús, ne ndano Jesús re zha tedib lad roo bte kuu le Cedrón. Tya nak leen thib alo. Ne ty a mndaab Jesús kon re zha kuu ngeteed lo Jesús. ² Noga Judas kuu mnidaa Jesús lo re zha nak tsin nlebee ty, tak tyen welt mrin Jesús kon re zha kuu ngeteed lo Jesús ty. ³ Tsa mzin Judas kon thiban soldad ne kon tyen zha kuu nkenap gwodoo; ne re ngwleyy kuu nabee lo re ngwleyy kon re fariseo mtaal re zha'a, ne ne zha yiib, kandil ne yerbel. ⁴ Per ne'a Jesús naa kwan rid Jesús, tsa mroo Jesús ne nzhab Jesús lo re zha:

—¿Cho nkwaan goo?

⁵ Lee re zha mkab ne nzhab:

—Lee nee nkwaan Jesús zha kuu nak zha yez Nazaret.

Lee Jesús nzhab lo re zha:

—Na nak Jesús.

Ne no Judas kuu mnidaa Jesús ndyaad kon re zha'a. ⁶ Ne leettsa nzhab Jesús lo re zha, na nak Jesús, tsa mre ardis re zha ne ngob zha lo yu. ⁷ Tsa mre Jesús mnaabdiz lo re zha ne nzhab:

—¿Cho nkwaan goo?

Lee re zha mre mkab ne nzhab:

—Lee nee nkwaan Jesús zha yez Nazaret.

⁸ Tsa nzhab Jesús lo re zha:

—Ni'a na lo goo, na nak Jesús. Os lee goo nkwaan goo na, laa goo bi re zha ree.

⁹ Koree ngok, tsa mrolo kuu nzhab Jesús, Xut'n lee re zha kuu mnidaa'a lon, neeka thib zha mluxt. ¹⁰ Tsa lee Simún Pey nkeno thib espad, ne mloo Pey espad ne mchuug Pey nza ban thib zha kuu lee Malco kuu nak mos ngwleyy kuu nabee lo reta ngwleyy.

¹¹ Tsa nzhab Jesús lo Pey:

—Pey blotsow espada. Os lee Xut'n nlaaz riid'n yalti, ¿chu nda leettsoo'a riidt nay?

Mndeno zha Jesús lo ngwleyy kuu nabee lo reta ngwleyy

(Mt. 26:57-58; Mr. 14:53-54; Lc. 22:54)

¹² Tsa lee re soldad, re zha kuu nabee lo re soldad ne re polisi kuu nkenap gwodoo, mzhen re zha Jesús ne mliib zha Jesús. ¹³ Tsa ner ndano zha Jesús liz Anás, tak lee Anás naa xutsaap Caifás kuu nak ngwleyy kuu nabee lo reta ngwleyy liina. ¹⁴ Ne leeka Caifás nak kuu nzhab lo re zha Israel, mas wen gath thibka zha por dita yez, nake gath reta zha yez.

Pey nzhab nlebeet Pey Jesús

(Mt. 26:69-70; Mr. 14:66-68; Lc. 22:55-57)

¹⁵ Tsa lee Simún Pey ne thib zha kuu ngeteed lo Jesús mndeke dits Jesús. Tak lee tedib zha kuu ngeteed lo Jesús nlebee zha ngwleyy kuu nabee lo reta ngwleyy, kona mndaab zha kon Jesús lee roo yuu. ¹⁶ Per lee Pey myaan lee dits pwert, tsa lee zha kuu mteed lo Jesús kuu nlebee ngwleyy, mni lo mos got kuu nkenap roo pwert, tsa taa ngot diiz tab Pey. ¹⁷ Tsa lee ngot kuu nkenap roo pwert nzhab lo Pey:

—¿Chu nota nak thib re zha kuu ngeteed lo mbyi baa?

Lee Pey mkab lo ngot ne nzhab:

—Aha not na.

¹⁸ Ne tak kwathoz nal, tsa lee re mos ne re polisi kuu nkenap gwodoo mtee bel, ne ngebiz re zha ne noga Pey ndo lo re zha ngebiz.

Jesús ngwato lo ngwleyy kuu nabee lo reta ngwleyy

(Mt. 26:59-66; Mr. 14:55-64; Lc. 22:66-71)

¹⁹ Tsa lee ngwleyy kuu nabee lo reta ngwleyy mndelo mnaabdiz lo Jesús, kwent chaan re zha kuu mteed lo Jesús ne kwent ley kuu nlloo Jesús.

²⁰ Lee Jesús mkab ne nzhab:

—Na ndediz'n delant lo reta men, thibka nloon lo re men ta nkaltaa zha nteed zha xkiu Diox, ne roo gwodoo ta nkaltaa reta zha Israel, neeka thib kuu mloot'n lo re men xgaatsta. ²¹ ¿Chebee lon naabdiza? Bnaabdiz lo re zha kuu mbin kuu mnin. Re zha'a tak ne naa kwan nzhap'n.

²² Or nzhab Jesús kona, tsa lee thib zha kuu nkenap gwodoo mkaan yaa lo Jesús ne nzhab:

—¿Chu tabaa nkaba lo ngwleyy kuu nataak?

²³ Lee Jesús mkab ne nzhab:

—Os mnin thib kuu mal, bne lon naa kwan kuu mal mnin; per os kuu wli mnin, ¿chebee nkee luy yek'n?

²⁴ Tsa naliibka Jesús mtaal Anás Jesús lo Caifás kuu nak ngwleyy kuu nabee lo reta ngwleyy.

*Pey nzhab tedib welt nlebeet Pey Jesús
(Mt. 26:71-75; Mr. 14:69-72; Lc. 22:58-62)*

²⁵ Ne lee Pey negebizka lo ki tya, tsa mnaabdzizha lo Pey ne nzhab zha:

—¿Chu nota nak thib re zha kuu ngeteed lo mbyi baa?

Tsa lee Pey mkab ne nzhab:

—Not na.

²⁶ Tsa mnaabdziz thib mos kuu nke tsiin lo ngwleyy kuu nataaka lo Pey ne nzhab mos:

—¿Chu lut kuu ndo leen alo kon Jesús?

Mosa nak zha liz zha kuu mchuug Pey nza.

²⁷ Tsa lee Pey nzhab tedib welt, nlebeet Pey Jesús, ne oraaka lee ngite mrez.

Jesús ngwato lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Tsa mloo zha Jesús liz Caifás, ne ndano zha Jesús roo yuulow, ta ndob zha kuu nabee ne tak ndeyeni'a yezyli, kona mndaabit re zha Israel leen yuulow, tsa nam-bika zha ley lo zha, tsa tak wu zha rtsee chaan Paskw. ²⁹ Tsa mroo Pilat, ne nzhab Pilat lo re zha:

—¿Cho kwent nkeki goo mbyi ree?

³⁰ Tsa mkab re zha, ne nzhab zha:

—Os gagagt zha ree zha nakap, gayaad-not nee zha lo'a.

³¹ Tsa nzhab Pilat lo re zha:

—Btено goo zha, bnaab goo kwent lo zha taxal nzhab lo ley chaan goo.

Tsa lee re zha mkab ne nzhab:

—Lee re nee zha Israel, napt nee yalnabee par kuth nee thib men.

³² Tata nzhab zha, tsa ngok kuu nzhab Jesús, leettsa mndaa Jesús kwent naa xomod gath Jesús. ³³ Per lee Pilat mre mndaa leen yuulow, ne mrez Pilat Jesús ne mnaabdziz Pilat lo Jesús ne nzhab Pilat:

—¿Chu lu nak rey chaan re zha Israel?

³⁴ Lee Jesús mkab ne nzhab:

—¿Chu naabdiza koree por lu, o tak tedib net zha ney lo'a?

³⁵ Tsa lee Pilat mkab ne nzhab:

—¿Chu zha Israel nak'n? Lee re tawlaza ne re ngwleyy kuu nabee lo re ngwleyy mndaa'a lon. ¿Kwan mtsowa?

³⁶ Lee Jesús mkab ne nzhab:

—Nagt lo yezlyu ree ta nabeen, os lo yezlyu ree gagak ta nabeen, tsa lee re zha kuu nak zha da, gayo zha ne galaat zha na lo re tawlaz'n. Per lee ta nabeen nagte lo yezlyu ree.

³⁷ Tsa lee Pilat nzhab lo Jesús:

—¿Mbay rey naka tsa?

Tsa lee Jesús mkab ne nzhab:

—Wli kuu ne'a, rey nak'n. Par kona ngol'n ne par kona ndyal'n lo yezlyu ree; par tan kwent kuu wli lo re men. Ne reta zha kuu nyelaaz kuu wli nzhon zha diiz xkiz'n.

³⁸ Tsa nzhab Pilat lo Jesús:

—¿Kwan nak kuu wli?

Lee re men mnaab gath Jesús

(Mt. 27:15-31; Mr. 15:6-20; Lc. 23:13-25)

Or ngwalo mnaabdziz Pilat koree, tsa mroo Pilat ne mni Pilat lo re zha Israel tedib welt, ne nzhab Pilat:

—Neeka thib kuu went mtsowt mbyi ree.

³⁹ Per lee re goo nap goo costumr, telaan thib zha kuu nzo tsib lo ani Paskw. ¿Chu nyelaaz goo telaan zha kuu nak rey chaan re zha Israel?

⁴⁰ Tsa reta zha mre nzhab:

—¡Telaata zha baa! ¡Barrabás btelaa!

Ne Barrabás nak thib wann.

19

¹ Tsa ndano Pilat Jesús, ne mnabee Pilat mdin zha Jesús. ² Ne lee re soldad mdexk-waa thib koron kon yits ne mtob re soldade yek Jesús, ne mtegok zha Jesús thib lar kuu nane na. ³ Tsa mbig re zha lo Jesús ne nzhab zha:

—¡Kuubidoo rey chaan re zha Israel!

Ne mkaan yaa zha kwat Jesús.

⁴ Tsa lee Pilat mre mroo tedib welt, ne nzhab lo re zha:

—Wii goo, mloon zha tsa ne goo, neeka thib kuu mal mtsowt zha.

⁵ Ne ndob koron yitsa yek Jesús ne nok Jesús lar nane'a mroo Jesús. Tsa lee Pilat nzhab lo re men:

—¡Wii goo, lee zha ndo nzhee!

⁶ Leettsa mwii re ngwleyy kuu nabee lo re ngwleyy ne re soldad kuu nkenap gwodoo lo Jesús, ora mrez re zha ne nzhab:

—¡Bkee zha lo kruz! ¡Bkee zha lo kruz!

Tsa nzhab Pilat lo re zha:

—Bzhen goo zha ne bkee goo zha lo kruz, tak lee na mzalt'n neeka thib kuu went kuu mtsowt mbyi ree.

⁷ Per lee re zha Israel mkab ne nzhab:

—Lee re nee nap nee thib ley, ne lee lo ley chaan nee mbez ndoblo gath zha, tak ni zha lee zha nak Xgann Diox.

⁸ Or mbin Pilat kona masraa mzeb Pilat.

⁹ Tsa mre Pilat mndaab leen yuulow tedib welt, ne nzhab Pilat lo Jesús:

—¿Cho zha naka?

Per lee Jesús mkabt lo Pilat.

¹⁰ Tsa nzhab Pilat:

—¿Chebee nkabta lon? ¿Chu neta nap'n yalnabee par keen lu lo kruz ne nap'n yalnabee par telaan lu?

¹¹ Tsa lee Jesús mkab ne nzhab:

—Gagt nabee'a, os lee Diox gataat yalnabee lo'a; per masraa falt nap zha kuu mndaan lo'a nake lu.

¹² Ne desde ora mkwaan Pilat mod par gatelaa Pilat Jesús; per lee re zha Israel mre mrez ne nzhab:

—¡Os lee'a telaa'a zha baa, nagta amig zha kuu nabee Roma! ¡Tak loka zha kuu mbeze nak rey, zha'a nzhak zha kuu nayii ne zha kuu nabee dita ta nabee Roma!

¹³ Or ngwalo mbin Pilat kona; tsa mnabee Pilat mloo zha Jesús par lee ne mndob Pilat ta nyetob Pilat naab Pilat kwent lo re men, thib lee ta natexkwaa kon thib lo ke; ne lee diiz hebreo ley Gabata. ¹⁴ Teeka ndrol wiz ngok koree, wiz kuu ndelo zha ndexkwaa zha re kuu par ani Paskw. Tsa nzhab Pilat lo re zha Israel:

—Lee rey goo baa!

¹⁵ Per lee re zha mkab nzhab:

—¡Ndoblo gath zha! ¡Ndoblo gath zha! ¡Bkee zha lo kruz!

Lee Pilat nzhab lo re zha:

—¿Chu rey goo nlaaz goo keen lo kruz?

Tsa lee re ngwleyy kuu nabee lo re ngwleyy, mkab ne nzhab:

—¡Napt nee tedib rey, beeta César kuu nabee Roma nak rey nee!

¹⁶ Tsa mndaa Pilat Jesús lo re zha, tsa kee zha Jesús lo kruz, ne mzhen zha Jesús ndano zha Jesús.

Mkee zha Jesús lo kruz

(Mt. 27:32-44; Mr. 15:21-32; Lc. 23:26-43)

¹⁷ Ne mbe Jesús kruz Jesús asta thib ta le tsidth yek men, (ne lee diiz Hebreo ley Gólgota). ¹⁸ Tya mkee zha Jesús lo kruz kon tecop zha, mkee zha thibga kad lad cho Jesús tsa myaan Jesús xtow rop zha. ¹⁹ Tsa mnabee Pilat mkee zha thib letr yek kruz, kuu nzhab: “JESÚS ZHA NAZARET, REY CHAAN RE ZHA ISRAEL”. ²⁰ Kwathoz re zha Israel mlab kuu mkee zha yek kruz, tak gax yez Jerusalén nak ta mkee zha Jesús lo kruz, ne lee letr mkee zhay kon diiz Hebreo, kon diiz Latin ne kon diiz gryeg. ²¹ Tsa lee re zha Israel ne re ngwleyy kuu nabee lo re ngwleyy; nzhab lo Pilat:

—Keeta: “Rey chaan re zha Israel”, sinke bkee: “Zha kuu mbeze nak rey chaan re zha Israel”.

²² Per lee Pilat mkab ne nzhab:

—Kuu mkeen, mkee'a nay ne tabaaka yaane.

²³ Bluz or ngwalo mkee re soldad Jesús lo kruz, tsa mzhen re zha xab Jesús, ne mtsow zhay thap le, ne thibga ley mkaa thibga soldad. Ne noga mzhen zha tedib xab Jesús, kuu nak thib lar kuu asta yek ne asta xann yent pa nadibe. ²⁴ Tsa nzhab re soldad lo re altaa zha:

—Chatta lee lar ree, mas wen koo'aa swert, tsa naa cho'a diinne.

Ne tata ngok kuu nzhab lo xkiiz Diox: “Mdid zha xab'n lo re zha, ne mloo zha swert dits xab'n”. [Sal. 22:18] Ne tata mtsow re soldad.

²⁵ Ne gax lo kruz ndo xnaa Jesús, bel xnaa Jesús, Mari tsaal Cleofas ne Mari Magdalen. ²⁶ Ne or mwii Jesús lo xnaa Jesús, ne leeka tya ndo zha kuu mteed lo Jesús zha kuu kwathoz nke leettsoo Jesús, tsa nzhab Jesús lo xnaa Jesús:

—Lee xganna baa.

²⁷ Ne oraaka nzhab Jesús lo zha kuu ngeeted lo Jesús:

—Lee xnaa'a baa.

Ne desde tsyatha lee zha kuu mteed lo Jesús mkayaa xnaa Jesús lize.

Yalguth chaan Jesús

(Mt. 27:45-56; Mr. 15:33-41; Lc. 23:44-49)

²⁸ Leetsa ngwalo mriid re koree, ne'a Jesús lee re kuu nke lo xkeets Diox kwent Jesús ngwalo'a ngok, ne par yelo gák re kuu nzhab lo xkeets Diox, tsa nzhab Jesús:

—Nzheek leettsoon.

²⁹ Ne tyo nido thib jar kuu tse nzo xit ub kuu ni; tsa mtenit zha thib le zhiil leen xit uba, ne mtob zhay yek thib lee ya kuu le hisopo, ne mtob zhay roo Jesús. ³⁰ Tsa ngwii Jesús xit ub kuu ni'a ne nzhab Jesús:

—¡Retay ngwalo'a ngok!

Ora mkiits yek Jesús ne nguth Jesús.

Thib soldad mtsib lans cho Jesús

³¹ Re koree ngok wiz kuu ndelo zha ndexkwaa zha kuu wu zha lo ani Paskw, ne nlaazt re zha Israel yaan re kwerp lo kruz, wiz sabd kuu nzhoor re zha Israel lo Diox, tak lee wiza nak thib wiz ro lo re zha Israel, kona mnaab re zha lo Pilat, tsa nabee Pilat yakiits zha nii re yon zha kuu nke lo kruz ne la zha re kwerp re zha'a lo kruz. ³² Tsa lee re soldad ngwa mdiizts nii rop zha kuu mke lo kruz cho Jesús. ³³ Per or mbig re zha lo Jesús, mwii zha ngutha Jesús, kona mdiizts zha nii Jesús:

³⁴ Per lee thib re soldad mtsib thib le ya roo leettsoo Jesús ne ora mroo ren ne nit leettsoo Jesús. ³⁵ Ne na nak zha kuu mwii re koree ne ndan kwente, ne wli kuu ndan kwent; ne nen wli kuu mwiiin ne kuu ndan kwent; tsa no goo yelaaze. ³⁶ Ne re koree ngok, tsa ngok re kuu nke lo xkiiz Diox, kuu nzhab: “Kiitz zha neeka thib tsidth zha”. [Sal. 34:20] ³⁷ Ne lee tedib ta nzhab: “Wii re zha lo zha kuu mtsib zha thib le ya roo leettsoo”. [Zac. 12:10]

Mkaats zha Jesús

(Mt. 27:57-61; Mr. 15:42-47; Lc. 23:50-56)

³⁸ Ngwalo mriid re koree, tsa lee Che zha yez Arimatea, mnaab lo Pilat, tsa taa Pilat diiz gwe Che kwerp Jesús. Noga Che ree nak thib zha kuu mteed lo Jesús, per xgaatsta nteed zha, tak nzeb zha ne zha re zha Israel. Tsa mndaa Pilat diiz lo Che, tsa ngwa Che ne mbe Che kwerp Jesús. ³⁹ Ne noga ngwa Nicodemo kuu ngwa gwatediz

kon Jesús thib yaal, ne ngwano Nicodemo teeka galbtsii kil perfum kuu chul ndetsi, kuu natexkwaa kon thib lo ya kuu le mirra, ne kon thib lo ya kuu le áloe.⁴⁰ Tsa lee Che rop Nicodemo mbe kwerp Jesús, ne mchiix zha kwerp Jesús kon lar kuu ndo perfum kuu chul ndetsi, taxal ntsow re zha Israel leettsa nkaatsa zha thib thebol.⁴¹ Ne leeaka ta mkeek zha Jesús lo kruz, ndob thib wert, ne leen werta ndob thib baa kuu kub, kuu neeka thib zha ter yo.⁴² Ne tya mloo rop zha kwerp Jesús, tak gax tya ndob baa, ne tak mera telo wiz sabd kuu nzhoole re nee zha Israel lo Diox.

20

Jesús mroban

(Mt. 28:1-10; Mr. 16:1-8; Lc. 24:1-12)

¹ Ner wiz kuu ndelo sman, lee Mari Magdalén ngwa roo baa kwathoz til, or kuu bee nakow raa na; ne mwii Mari yenta ke kuu now roo baa.² Tsa lijer ndya Mari ta ndo Simún Pey kon na, ne ne Mari lo rop nee:

—Mloo'a zha Jesús Zha Nabee leen baa, ne netaa pa ngwalaala zha Jesús.

³ Tsa mroo rop nee Pey ne ngwa nee roo baa.⁴ Ne lijer nda nee rop nee, per masraa lijer ndanake Pey, ne ner'n mzin roo baa.⁵ Tsa mkiitsn yek'n ne mwii, tsa mwiiin re lar kuu mchiix zha Jesús, per mndaabt'n leen baa.⁶ Tsaraa mzin Simún Pey ne mndaab Pey leen baa. Ne noga Pey mwii re lar kuu mchiix zha Jesús;⁷ ne noga mwii Pey lar kuu mchiix zha yek Jesús ne nzibte thibka kon lar kuu mchiix zha Jesús, sinke leey naiiuts ne zhaata nzibe.⁸ Tsa no na mndaab leen baa; tsa mwiiin ne ngwalaaz'n kuu ngok.⁹ Tak ter yen na kuu mbez lo xkiiz Diox, kuu nzhab lee Jesús ndoblo roban xid re zha nguth.¹⁰ Ora lee rop nee Pey ndya nee liz nee.

Jesús ngwani lo Mari Magdalen

(Mr. 16:9-11)

¹¹ Per lee Mari Magdalén myaan par dits gax roo baa, ne nzhonni Mari ne nkiits yek Mari mwii Mari leen baa.¹² Tsa ngwani chop mandad chaan Diox lo Mari, rop mandad nok lar kuu nakits na ne rop mandad ndob ta mxoob zha kwerp Jesús, thib zha ndob ta mzhoob yek Jesús, lee tedib zha ndob ta mzhoob nii Jesús.¹³ Tsa nzhab rop mandad lo Mari:

—¿Chebee nzhonna?

Lee Mari mkab ne nzhab:

—Nzhonni na tak mbe zha Zha Nabee lon, ne net'n pa ngwalaala zha zha.

¹⁴ Ne ngwalo nzhab Mari koree, tsa mtsere lo Mari, ora mwii Mari lee Jesús ndo tya; per net Mari Jesúse.¹⁵ Tsa nzhab Jesús lo Mari:

—¿Chebee nzhonna? ¿Cho nkwaana?

Per lee Mari mtsow xgab zha kuu nkenap wert mni lo Mari. Tsa nzhab Mari:

—Os lu mbe zha, ne lon naa pa ngwatana zha, tsa gwen zha.

¹⁶ Tsa lee Jesús nzhab lo Mari:

—¡Mari!

Ne lee Mari mtsere lo, ne diiz Hebreo nzhab Mari:

—¡Raboni! —diz ree nak maestr.

¹⁷ Lee Jesús nzhab lo Mari:

—Keezta na, tak ter ndyan lo Xut'n, per gwa ne guz lo re wets'n, lee na ndyan lo Xut'n kuu nak Xut goo, lo Diox kuu nak Diox da ne Diox kuu nak Diox goo.

¹⁸ Tsa lee Mari Magdalen, myaadne lo re nee kuu mteed lo Jesús, lee Mari mwii Jesús Zha Nabee; ne ne Mari lee Jesús nzhab re koree lo Mari.

Jesús ngwani lo re zha kuu mteed lo Jesús

(Mt. 28:16-20; Mr. 16:14-18; Lc. 24:36-49)

¹⁹ Ne leettsa mziy yezlyu wizaka, kuu nak ner wiz sman, lee re nee zha kuu mteed lo Jesús, mkaltaa nee leen thib yuu ne mtow nee roo yuu, tak nzeb nee nee re zha Israel. Tsa lee Jesús mndaab ne mndo ndrol lo re nee, ne ne Jesús lo re nee:

—Tsan, reta goo, ¡nlaz'n wen kwin goo!

²⁰ Ngwalo nzhab Jesús kona, tsa mloo Jesús yaa Jesús ne cho Jesús lo re nee, tsa kwathoz naley ngoo leettsou nee, tak mwii nee Zha Nabee tedib welt.²¹ Tsa ne Jesús lo re nee tedib welt:

—¡Nlaz'n, wen kwin re goo! Leeka taxal mtaal Xut'n na. Tabaaka taal'n goo.

²² Ne or ngwalo ne Jesús koree, ora mlaa Jesús lo re nee nee Jesús:

—Bkayaa goo Mbi Nayon.²³ Loka zha kuu tsow goo perdon falt chaan, tetsow Diox perdon falt chaan zha'a; ne loka zha kuu tsowt goo perdon falt chaan, tsowt Diox perdon falt chaan zha'a.

Ngwalaazt Mach lee Jesús mroban

²⁴ Per lee Mach, kuu nak thib zha lo re tsib chop nee; zha kuu ni nee lo kwach, yent zha or mzin Jesús.²⁵ Bluz tsaraa nzhab nee lo Mach:

—Mwii'a nee Zha Nabee.

Per lee Mach mkab ne ne lo nee:

—Os leen wiit'n yaa Zha Nabee ta mtob re zha klab, ne os leen got'n kwen yaan ta mtob zha klab, ne got'n yaan cho zha, yelazi'n lee zha mroban.

²⁶ Xon wiz bluz; lee re nee mkaltaa leen yuu tedib welt, ne no Mach ndo kon re nee tsya. Ne now roo yuu nzo re nee, per lee Jesús mndaab ne mndeli ndrol lo re nee, ne ne Jesús:

—Tsan reta goo, nlaz'n wen kwin goo.

²⁷ Tsa nzhab Jesús lo Mach:

—Wii yaan ne bloo kwena tree, ne bloo yaa'a chon. Ne gagta zha nad. ¡Sinké gwalaaz leen mroban!

²⁸ Tsa lee Mach nzhab:

—¡Lu nak Zha Nabee lon ne Diox da!

²⁹ Tsa nzhab Jesús lo Mach:

—Nyelaaza mroban na, tak mwii'a na. ¡Wen nda re zha kuu mwii't na ne nyelaaz zha lee na mroban!

Chebee mke yeets ree

³⁰ Ne noga mtsow Jesús tedib net re milagr lo re nee, kuu mket lo yeets ree. ³¹ Per lee re diiz ree mkey, tsa yelaaz goo lee Jesús nak Crist Kuu Mtaal Diox Nabee, ne lee zha nak Xgann Diox, ne tsa tsow goo gan yalnaban kuu thitanax.

21

Jesús ngwani lo re gaz zha kuu mteed lo Jesús

¹ Ngwalo mriid re koree, tsa lee Jesús mre ngwani lo re nee zha kuu mteed lo Jesús roo nitdoo kuu le Tiberias, ne tenzhee ngoke: ² Ndo Simún Pey, Mach (kuu ni zha lo "kwach"), Natanael (zha yez Caná yez kuu nzi yezlyu Galilea), ne rop nee wets'n (xgann Zebedeo), ne techop zha kuu mteed lo Jesús. ³ Tsa lee Simún Pey nzhab:

—Lee na nda niit mbel.

Tsa nzhab re nee lo Pey:

—No nee ya kon lu.

Tsa mke re nee leen thib kano ne nda nee, per mniitta nee mbel yaala. ⁴ Ne or ndeyeni'a yezlyu, lee Jesús ngwani lo re nee roo nitdoo, per myeent re nee Jesús. ⁵ Tsa ne Jesús lo nee:

—Mndyeen, ¿chu neeka thib mbel mniitta goo?

Tsa nzhab nee:

—Neeka thibe.

⁶ Tsa ne Jesús lo nee:

—Blebi goo yex goo lad ban lo kano, tsa niit goo mbel.

Ne tata mtsow neey, ne kwathoz mbel mniit nee ne neeka gagt koo nee yex leen nit. ⁷ Tsa nzhap'n lo Pey:

—¡Zha Nabee!

Per or mbin Simún Pey, Zha Nabee, tsa mdok Pey xab Pey, tak mllo Pey xab ne oraaka mndaab Pey leen nit. ⁸ Lee tedib net nee mtsino kano asta roo nitdoo, ne mdobyu nee yex kuu tseta nzo mbel, tak teeka thib gayoo metr nzo nee lo nitdoo. ⁹ Ne or mzin re nee roo nitdoo, mwii nee nde bel, ne mwii nee lee thib mbel ngeyex lo ki, nogá mwii nee pan. ¹⁰ Tsa ne Jesús lo re nee:

—Deno goo chop tson mbel kuu mniit goo.

¹¹ Ne lee Simún Pey mke leen kano, ne mdobyu yex kuu nzo re mbel kuu nabii, asta roo nitdoo, ne leen yexa nzo thib gayoo

chop galbtsii btson mbel, ne tegal kwathoz mbel, per mratta yex. ¹² Tsa ne Jesús lo re nee:

—De wu ren goo.

Per neeka thib nee myet leettsoo ganaabdiz lo Jesús, naa cho nak Jesús. Tak ne ee Jesús Zha Nabee. ¹³ Tsa mbig Jesús gax ne mzhen Jesús pan ne mndaa Jesús pan lo nee; ne tataga mtsow Jesús kon mbel.

¹⁴ Welt ree ngok myon welt kuu ngwani Jesús lo re nee, kuu mteed lo Jesús, lo mrobana Jesús.

Jesús mndediz kon Simún Pey

¹⁵ Or ngwalo ndow ren re nee, tsa mnaabdiz Jesús lo Simún Pey ne nzhab Jesús:

—Simún xgann Jonás, ¿chu masraa nke leettsoo'a na nake re zha ree?

Pey mkab ne nzhab:

—Ah Zha Nabee, ne'a lu nke leettsoon lu. Tsa nzhab Jesús lo Pey:

—Bkenap re mbak zhil da.

¹⁶ Tsa mbre Jesús mnaabdiz lo Pey tedib welt, ne nzhab Jesús:

—Simún xgann Jonás, ¿chu nke leettsoo'a na?

Lee Pey mkab nzhab:

—Ah, Zha Nabee, ne'a lu nke leettsoon lu. Tsa nzhab Jesús lo Pey:

—Bkenap re mbak zhil da.

¹⁷ Ne ngok myon welt mnaabdiz Jesús lo Pey, ne nzhab Jesús:

—Simún xgann Jonás, ¿chu nke leettsoo'a na?

Tsa nabil ngoo leettsoo Pey, tak myona welt ngenaabdziz Jesús lo Pey, naa chu nke leettsoo Pey Jesús.

Ora mkab Pey ne nzhab Pey:

—Zha Nabee, reta kuu ne'a, ne'a lu nke leettsoon lu.

Tsa nzhab Jesús lo Pey:

—Bkenap re mbak zhil da. ¹⁸ Wlipaa na nin lo'a. Leettsa mndyeena mdoka xaba, ne nya'a loka pa ta nlaaza, per leettsa gaka zha gox, taaba yaa'a ne tedib zha tegok xaba, ne teno zha lu ta nlaaza ya'a.

¹⁹ Or nzhab Jesús kona, mndaa Jesús kwent naa xomod gath Pey, ne tsow Pey naroob men yelaaz Jesús. Tsaraa nzhab Jesús lo Pey:

—¡Bteke dits'n!

Zha kuu mteed lo Jesús kuu kwathoz mke leettsoo Jesús

²⁰ Or lee Pey mtsere lo, tsa mwii Pey na Juan ndeken dits re zha. Ne leeka na kuu mnaabdiz lo Jesús btsi kuu ndow rtsee re nee, rtsee chaan Zha Nabee, or kuu nzhap'n, ¿cho taa'a lo re zha kuu kutha? ²¹ Or mwii Pey na, tsa nzhab Pey lo Jesús:

—Zha Nabee, ne lee zha ree, ¿kwan gak kon zha ree?

²² Jesús mkab ne nzhab:

—Os leen nlaz'n banka zha, asta leettsa bretab'n, tata gake. ñNdoblota gona kona! Komsi bteke dits'n.

²³ Ne lee diza mraats lo re wets ne lo re btan lee na gath, per net Jesús gath't'n, sinke kuu nzhab Jesús lo Pey nak: "Os leen nlaz'n banka zha asta leettsa bren, ¿cho importa kona?"

²⁴ Na ndaa kwent re koree, mwiin re koree ne mkee nay lo yeets. Ne, ne'aa wli kuu mkeen.

²⁵ Noga mtsow Jesús tedib net re kuu thoz; ne os gake retay lo yeets, ndak'n neeka dita lo yezlyu gaat yo re yeets kuu gake retay. Tbaa nake.

Re kuu mtsow re apóstl

Jesús nzhab taal Mbi Nayon

¹ Amig Teófilo, lo yeets kuu mtaal'n lo'a ner, mkeen reta kuu mtsow Jesús ne reta kuu mloo Jesús, leettsa mndelo Jesús rtsin Jesús, ² ne asta wiz kuu ngozhoob Jesús yibaa. Per leettsa ndoraa yezhoob Jesús yibaa, mli Jesús re zha kuu gak apóstl Jesús, ne kon Mbi Nayon mloo Jesús lo re zha naa kwan ndoblo tsow re zha. ³ Nguth Jesús ne mroban Jesús, ne chop gal wiz ngwani Jesús lo re apóstl Jesús. Tata mtsow Jesús, tsa mne re zha wlipaan naban Jesús, ne nzhab Jesús lo re zha naa xomod nabee Diox.

⁴ Or bee ndoka Jesús lo re apóstl Jesús, nzhab Jesús lo re zha ndoblot roo re zha Jerusalén. Ne nzhab Jesús:

—Kwet goo yelo gak kuu mne Xut'n tsow Xut'n kuu mnda na kwent lo goo. ⁵ Wli lee Juan mtsowleyy re men kon nit, per tecopta wiz lee re goo kayaa Mbi Nayon kuu nabee leetsoo goo.

Jesús ngwazhoob yibaa

(*Mt. 16:19-20; Lc. 24:50-53*)

⁶ Lee re zha kuu nkaltaa lo Jesús, mnaabdiz lo Jesús ne nzhab:

—Zha Nabee, ¿chu nal tsowa bre nabee leeka re tawlazaan zha Israel lo'aa tedib welt?

⁷ Jesús mkab lo re zha, ne nzhab:

—Ndoblot goo ne goo polor o pol tsow Diox kuu beeta lee Diox ne pol tsow, ⁸ per leettsa kayaa goo Mbi Nayon, tsasi tekayaa goo yalnabee ne roo goo yataa goo kwent naa cho nak'n yez Jerusalén, dita yezlyu Judea, yezlyu Samaria ne dib naxta lo yezlyu.

⁹ Or ngwaloo tata nzhab Jesús, ngewiika re zha lee Jesús ndya lobee, ne mndaab Jesús leen xkow kuu mtow Jesús, ne mwit raa re zha Jesús. ¹⁰ Ne or ngewiika re zha lobee, leettsa lee Jesús ngeyap lobee, tsa lee chop mbyi kuu nok lar naguz mloo lo re zha, ¹¹ ne nzhab lo re zha:

—Men, Galilea, ¿chebee ngewiika goo lobee? Leeka Jesús kuu mndo xid re goo ne mwii goo ndya lobee, leeka Jesús ree yaad tedib welt, leeka taxal mwii goo ndya zha.

Mli zha Mati kayaa rtsin Judas

¹² Or mla re zha yek yii kuu le Olib, tsa mre re zha Jerusalén, ne mnnde re zha loka plotha kuu takta te zha wiz kuu ndroxkwana zha. ¹³ Or mzin zha Jerusalén, tsa mkendab re zha leen yuu kuu ndob yek thib yuu, tya nak ta mbet re zha, re zha ree nak: Pey, Juan, Santiag, Ndres, Lip, Mach, Bartolomé, Mateo, Santiag xgann Alfeo, Simún kuu ngoo xid partid Cananita ne Judas (wets

Santiag). ¹⁴ Ne thibka nkaltaa re zha naab zha lo Diox kon re wets Jesús, kon Mari xnaa Jesús ne kon tedib net re ngot.

¹⁵ Ne re wiza ngwateli Pey xid re zha kuu nyelaaz Jesús, ne nzhak teeka thib gayoo gal re zha kuu nkaltaa tya, tsa nzhab Pey lo re zha:

¹⁶ —Wets ne btan, re goo kuu nyelaaz Jesús, ndoblo ngok kuu nzhab Mbi Nayon por David lo xkeets Diox, leettsa nzhab David kuu mtsow Judas, kuu mndaa Jesús lo re zha kuu mzhén Jesús. ¹⁷ Ne Judas ngok thib re nee kuu mteed lo Jesucrist, tsa noga tsow zha kuu ngetsow nee. ¹⁸ Per lee Judas ngwa, mzhii thib le yu kon temi kuu ngox lo Judas, por kuu went kuu mtsow Judas, ne leeka loyu'a ngob Judas par yek Judas ne nrat Judas, ne mroo reta xtii Judas. ¹⁹ Ne or mbin re zha Jerusalén kona, tsa mtob le zha loyu'a Aceldama (diiz ree nak: "Loyu ren"). ²⁰ Tak nke a lo yeets chaan Salm ta nzhab: Lee liz Judas gan ne neeka thib zha yote.

[Sal. 69:25]

Ne noga nzhabe:

Tedib zha tsow rtsin Judas. [Sal. 109:8]

²¹ Kona xid re zha kuu mndiy kon Jesús, dita lo mndo Jesús lo re'aa, ²² desde or kuu mtsowleyy Juan Jesús, ne asta wiz kuu ngwazhoob zha yibaa. Xid re zha'a ndoblo yetsal thib zha kuu tsow ayud nee, taa nee kwent lo re men lee Jesús mroban.

²³ Tsa mli re zha chop zha: Thib zha le Mati lee tedib zha le Che Barsabás, zha kuu noga ni zha lo Justo. ²⁴ Ne mnaab re zha lo Diox, ne nzhab zha:

—Zha Nabee, lu nlebee leetsoo reta nee. Bloo naa cho thib lo rop zha ree mli'a, ²⁵ tsa gak zha apóstl ne tsow zha rtsin Judas, tak mlux Judas lo kuu went kuu mtsow Judas, ne ndya'a Judas ta ndoblo Judas.

²⁶ Tsa mloo zha swert, tsa naa cho diinne, ne leey mdiinn Mati. Ne leeka ora mla Mati xid re tsuibthib apóstl.

2

Mkayaa re zha Mbi Nayon

¹ Or mzin wiz kuu nyoo ani kuu le Pentecostés, reta zha kuu nyelaaz Jesús nkaltaa ne thibka mrin re zha. ² Ne cha ngoo thib bi kuu mroo lobee, taxal bi chaan thib mbi thoz, kuu mndez dita leen yuu ta nzi re zha. ³ Tsa mloo taxal loz bel, kuu mraats mlaal mla yek kadta thib re zha. ⁴ Ne reta zha mkayaa Mbi Nayon, ne mndelo re zha mnndediz zhaapaa zhaapaa diiz, kuu nlaaz Mbi Nayon tediz zha.

⁵ Ne re wiza lee re zha Israel kuu ndyaad gol lo Diox kuu nzi Jerusalén, re zha kuu ndyaad reta ta lo yezlyu. ⁶ Or mbin re zha bi'a, kwaro zha mzin tya tsa naa kwan ngok, ne neeka net re zha naa kwan tsow

zha xgab, tak kadta thib re zha nzhon zha ndediz re zha'a mer xkiiz zha. ⁷ Kwathoz mzegey leettsoo re zha, ne mndelo zha mnaabdiz zha lo altaa zha, ne nzhab zha:

—¿Chu nagt zha Galilea re zha kuu ngetediz ree? ⁸ ¿Chebee nzhonaa ndediz zha mer xkiizaa? ⁹ Nzhee nzi re'aa kuu ndyaad re yezlyu ree, Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto, Libia kuu nzi gax Cirene ne noga zha Roma kuu nzo tree. Re zha kuu nak zha Israel ne re zha kuu ngok zha Israel, tak nyelaaz zha re kuu nyelaaz re zha Israel. ¹¹ Ne noga nzi zha yezlyu Creta ne zha yezlyu Arabia nzhee. Per retalee ngeyon re kuu thoz kuu ntsov Diox, tak ngeyonaa ndediz re zha mer xkiizaa.

¹² Kwathoz mzegey leettsoo re zha, ne neeka net zha naa kwan tsow zha xgab, ne naabdiz zha lo altaa zha, ne mbez zha:

—¿Kwan koree?

¹³ Per lee tedib net zha mzhizno zha re zha Jesús, ne mbez zha:

—¡Nduz re zha baa!

Kuu nzhab Pey lo re men

¹⁴ Tsa ngwateli Pey kon re tsuibthib apóstol, ne nex nzhab Pey:

—Reta goo zha Israel, ne reta goo kuu nzo yez Jerusalén. Bne goo koree, ne wen bin goo kuu nin lo goo. ¹⁵ Nduzt re zha ree taxal ntsov goo xgab, tak til nal penta nzhak las nueve. ¹⁶ Sinke nal ngeyak kuu nzhab profet Joél, leettsa nzhab profet:

¹⁷ Diox nzhab:

“Thib wiz leen taal Mbi Nayon da leettsoo reta men lo yezlyu.

Ne lee re xgann goo ne re rtsaap goo, taa kwent kuu gap'n lo zha, kwaro kuu yibaa loo lo re xgann goo kuu mndyeen, ne lee re zha gol kwaro kuu tsaa leettsoo zha.

¹⁸ Ne re wiza taal'n Mbi Nayon da lo reta zha kuu ntsov rtsin na,

lo zha byi ne lo zha got, tsa taa zha kwent xkiz'n, ne gab zha re kuu nlaz'n gap'n lo re zha da.

¹⁹ Lee lobee tsow'n re kuu thoz, kuu tetsegey leettsoo re men wii men, lee lo yezlyu loo ren, bel, xkow ne tsen.

²⁰ Lee lo wiz kow ne lee lo mbee lo taxal ren,

leettsa terka tsin wiz ro kuu yaad Zha Nabee.

²¹ Ne reta zha kuu naab lo Zha Nabee, tetsow zha gan yalnaban kuu thitanax.” [Joél 2:28-32]

²² Men Israel, kenza goo kuu nin lo goo nal, wen ne goo lee Jesús zha Nazaret, nak thib mbyi kuu mtaal Diox lo re goo, ne

mtsow Jesús kwaro re milagr ne re kuu thoz kuu mzegey leettsoo'aa. Tbaa mloo Diox lee Diox mtaal Jesús. ²³ Ne ndala ne'a Diox naa kwan tsowno goo Jesús. Mzhen goo Jesús ne mndaa goo Jesús lo re zha went, tsa mbeth zha Jesús lo kruz. ²⁴ Per lee Diox mteroban Jesús, ne mtelaa Diox Jesús lo yalguth, tak gagt nabee yalguth lo Jesús. ²⁵ Ne leettsa mteth rey David Jesús, nzhab David: Ngwiin lee Zha Nabee lon thibka ndo kon na,

lee zha ndo lad ban lon, tsa thibka ney ndon. ²⁶ Kona naley nzo leettsoon, ne kwathoz laz'n nzhoon'l lo zha.

Tak ne'a na yent kwan tak'n or gath'n, ²⁷ tak laata yalnaban da leen baa ta nzo re zha nguth,

ne neeka laata yetsaa kwerp mosa, kuu mndaat falt.

²⁸ Mloo'a lu net kuu ndaa yalnaban lon, ne lu ntsov naley nzo leettsoon, tak ndo'a lon. [Sal. 16:8-11]

²⁹ Wets taa goo diz nin koree lo goo. Lee teyaa David zha ndala, nguth David ne mkaats zha David, ne lee baa David ndobka xidaa asta wiz naltserree. ³⁰ Per David ngok profet lo re men, ne wen mne David lee Diox nzhab lo David, lo raz David yaad Crist, zha kuu tob ta mndob David mnabee David.

³¹ Ne mni David taxal thib zha kuu mwii'a re kuu gak: Lee yalnaban chaan Zha Kuu Mtaal Diox Nabee, yaanta ta nzo re zha nguth, ne neeka kwerp zha yetsaat. ³² Ne lee Diox mteroban Jesús ne retalee ney. ³³ Ne leettsa mroban Jesús tsa ndya Jesús ndob lad ban lo Diox, ne mkayaa Jesús Mbi Nayon kuu nzhab Xutaa lo Jesús desde ner, ne lee

nal mtaala Jesús Mbi Nayona lo yezlyu ree, ne Mbi Nayona mtsow kuu ngewii goo ne ngeyon goo nal. ³⁴ Ne ngwat David yibaa. Per leeka David nzhab: Lee Diox Kuu Nabee, nzhab lo Zha Nabee lon:

“Btob lad ban lon,

³⁵ asta yelo tsin re zha kuu nayii ne'a, xann nii'a, tsaa tobxbub zha lo'a”. [Sal. 110:1]

³⁶ Kona retalee zha Israel ndoblo ne: Lee Jesús zha mkeey re goo lo kruz, Diox mtsow nak Jesús Zha Nabee, ne lee Jesús nak Crist Kuu Mtaal Diox Nabee.

³⁷ Or mbin re zha kuu mkaltaa ty a koree, kwathoz nabil ngoo leettsoo re zha, tsa mnaabdiz zha lo Pey ne lo re apóstol, ne nzhab zha:

—Wets, ¿kwan ndoblo nee tsow nee?

³⁸ Tsa lee Pey mkab lo re zha, ne nzhab:

—Btsee goo mod nak goo, ne gokleyy kadta thib goo kon le Jesucrist, tsa tuyy Diox re falt goo, ne taa Diox Mbi Nayon lo goo.

³⁹ Tak lee kuu mne Diox taa Diox nak par re goo, par re zhiinn goo ne par re zha ndo

tith, leey nak chaan reta zha kuu nlaaz Diox kwez Diox.

⁴⁰ Kon re diiz ree ne kon tedib net diiz mni Pey lo re zha ne mteni Pey re zha, ne nzhab Pey:

—jBroo goo lo re zha kuu ntsow kuu went!

⁴¹ Ne tata, lee re zha kuu ngwalaaz kuu nzhab Pey, ngokleyy zha, ne wiza mila teeka tsom mil re zha xid re zha kuu nyelaaz Jesús. ⁴² Reta zha kuu ngwalaaz Jesús, ntsow zha kuu mbez re apóstl, ne thibka nak xgab re zha, ne nzhon re zha rtsee chaan Zha Nabee, noga nkaltaa re zha naab zha lo Diox.

Tenzhee ngoo re zha kuu ngwalaaz Jesús ner

⁴³ Ne reta men kwathoz mzegey leettsou, por re milagr ne re kuu thoz kuu mtsow re apóstl. ⁴⁴ Ne reta zha kuu ngwalaaz Jesús thibka ngok xgab re zha, ne ngiid zha re kuu nap zha lo re altaa zha kuu ndechey. ⁴⁵ Ntho re zha kuu nap zha, ne nyadno zha temi ne ngiid zhay lo re zha taxalta ndeche zhay. ⁴⁶ Ne gadata wiz nkaltaa re zha lee gwodoo, nkaltaa zha liz re altaa zha ne thibka nzhon re zha, ne kwathoz naley nzo leettsou re zha, ne kwathoz nke leettsou zha altaa zha. ⁴⁷ Ne nzhool re zha lo Diox, ne dita yez nyow leettsou naa xa nak re zha, ne kad wiz lee Zha Nabee ntsow ayud re zha, tsa nyoo raa zha kuu nyelaaz xkiiz zha, ne ntuyy Diox falt chaan re zha'a.

3

Pey mtegwe thib zha mthans

¹ Thib wiz teeka las tres ngwa Pey rop Juan gwodoo, or kuu nkaltaa zha par ndediz zha lo Diox. ² Ne roo gwodoo ndob thib mbyi kuu mthans desde ngol, ne reta wiz nyatob zha zha roo pwert gwodoo kuu le chuldoos, tsa naab zha karida lo re zha kuu nya gwodoo. ³ Ne lee zha mthansa mwii lo Pey rop Juan, or mera tab rop zha gwodoo, ne mnaab zha karida lo rop zha. ⁴ Tsa key mwii Pey rop Juan lo zha, ne nzhab Pey lo zha:

—Wii lo nee.

⁵ Lee zha'a zheta mwii lo rop zha, mtsow zha xgab lee rop zha taa thib kwaa lo zha. ⁶ Per lee Pey nzhab lo zha:

—Ndent'n temi tan lo'a, per kuu tak tsow'n lo'a tetsow nay. Nalor nin lo'a: "Kon yahnabee chaan Jesucrist zha Nazaret, gwteli ne bte".

⁷ Or ngwalo tata nzhab Pey, mzhenn Pey yaa ban zha ne mteli Pey zha, ne oraaka ngoo fwers nii zha ne mli nii zha. ⁸ Tsa lee zha mthansa ngwateli ne mndelo mnde, ne mndaab zha leen gwodoo kon rop zha'a. Nkee zha brink ne nzhool zha lo Diox. ⁹ Reta zha yez mne lee zha mnde ne nzhool lo

Diox, ¹⁰ ne kwathoz mzegey leettsou re men ne mzeb zha mwii zha kuu ngok, tak nlebee zha mbyi'a, ne reta zha ne lee mbyi'a nyatob roo pwert gwodoo kuu le kwathoz chul, nyanaab karida.

Pey mndaa kwent chaan Jesucrist tedib welt

¹¹ Lee zha mthans kuu mgwe'a, mlaat zha Pey rop Juan. Leettsa mbin re men kona, kwathoz mzegey leettsou re zha ne mrozhonn re zha ngwa zha ta ndo Pey rop Juan, ta le korredor chaan Salomón. ¹² Or mwii Pey lo re mena, tsa nzhab Pey:

—Zha Israel, ¿chebee nzegey leettsou goo ngwii goo lo nee? ¿Chebee ngwii goo lo nee taxal nee mtsow mnde zha ree kon yalney chaan nee, o tak nali naban nee taxal nlaaz Diox, lee zha mgwe kon yahnabee chaan Jesucrist? ¹³ Lee Diox chaan re teyaa zha ndala, Diox chaan Abraham, chaan Isaac ne chaan Kob, lee Diox mndaa yahnabee lo Jesucrist kuu mndaa re goo lo re zha kuu nak tsiiin. Ne leettsa lee Pilat ngwalaaz gatelaa Jesucrist mzhalyt goo. ¹⁴ Leel mnaab goo mtelaa Pilat thib zha kuu mbeth men, tabaa mloo goo mlaa goo Jesús zha Nayon ne Nali nak. ¹⁵ Tbaa mbeth goo Xgann Diox, kuu ndaa yahnaben, per Diox mteroban Jesús, ne re nee mne koree. ¹⁶ Per lee mbyi kuu nllo lo goo, zha kuu reta goo nlebee, thitanax mgwe zha, tak ngwalaaz zha Jesús, ne reta goo ne mgwe zha.

¹⁷ 'Lee nal ne'a na, lee re goo kuu nak tawlaz'n kon re zha kuu nak tsiiin, mnabeee goo mbeth zha Jesús, per neeka net goo naa kwan mtsow goo. ¹⁸ Tata mtsow Diox, tsa ngok kuu nzhab re profet Diox zha ndala: Leettsa nzhab re profet lee Crist Kuu Taal Diox Nabee, ndoblo rid yalti ne gath.

¹⁹ Kona, bloo goo mtsee goo mod went kuu nak goo, ne bre goo lo Diox, tsa tuyy Diox re falt goo. Tsa tetsey Diox leettsou goo, ²⁰ ne taal Diox Jesús lo goo, kuu nak Crist Kuu Mtaal Diox Nabee. ²¹ Ne tegal nal lee Jesús ndoblo to yibaa, asta yelo wen tsi Diox reta kwaa, taxal nzhab re profet kuu ngoo ndala. ²² Moisés nzhab lo re teyaa zha ndala: "Lee Diox kuu nak Xutaa tsow roo thib profet xid re goo, thib profet kuu taa kwent xkiiz Diox taxal na lo re goo, [Dt. 18:15] bin goo diiz lo profet lo reta kuu ne profet, ²³ tak reta zha kuu tobyegt xkiiz profet, telux zha thitanax ne tegoo zha zha yez Israel". [Dt. 18:19]

²⁴ Reta profet desde Samuel par tenzhee, reta profet nzhaba zha re kuu ngeyak re wiz ree. ²⁵ Ne re goo nak zha kuu mdiinn re kuu nzhab re profet. Lo re goo lortsin xkiiz Diox kuu nzhab re profet, ne diinn goo re kuu nzhab Diox taa Diox lo teyaa Abraham, leettsa nzhab Diox lo Abraham: "Por raza kwathoz men dib naxta lo yezlyu

kayaa Diox por zha wen". [Gn. 22:18]²⁶ Tak leettsa mteroban Diox Jesucrist Xgann Diox, ner lo re goo mtaal Diox Jesucrist, tsa wen kwin goo kon Diox, ne tsa laa goo re kuu went kuu ntsow goo.

4

Mndeno zha Pey rop Juan lo zha nak tsii

¹ Lee Pey rop Juan ngenika lo re men, ne lee re ngwleyy zha Israel mzin kon zha kuu nabee lo re soldad kuu nkenap gwodoo Jerusalén ne kon re zha saduceo. ² Kwathoz nayii zha tak lee Pey rop Juan nloo lo re men, ne mbez rop zha lo re men; lee re zha nguth teroban taxal mroban Jesús. ³ Tsa mzhén zha Pey rop Juan, ne mloo zha rop zha tsib ne mlaa zha rop zha tsib, asta ngwani yezlyu tedib wiz, tak mziya yezlyu wiza. ⁴ Per kwaro re men kuu mbin kuu nzhab Pey rop Juan ngwalaaz xkiiz Diox, ne beeta re mbyi nak teeka thib gaay mil.

⁵ Or ngwani yezlyu tedib wiz, tsa mkaltaa re zha kuu nabee yez Jerusalén, kon re zha gol ne kon re maestr chaan ley; ⁶ ne nogá Anás kuu nak ngwleyy kuu nabee lo reta ngwleyy ndo tya, Caifás, Juan, Alejandr ne reta zha kuu nak zha liz ngwleyy kuu nabee lo reta ngwleyy. ⁷ Tsa mtaal zha zha ngwaxii Pey rop Juan ne mto zha rop zha ndrol lo re zha kuu nak tsii. Tsa mnaabdz zha lo rop zha, ne nzhab zha:

—¿Cho mndaa diiz lo goo ntsow goo koree? ¿Ne cho mndaa ynlabee ntsow goo re koree?

⁸ Tsa lee Pey kwaro mnabee Mbi Nayon leettsoo, ne nzhab lo re zha:

—Kenza goo, reta goo kuu nabee lo re zha Israel ne re goo kuu nak zha gol: ⁹ Lee re goo ngenaabdz lo nee, naa xomod mtsow nee yalwen mtegewe nee thib zha mthans, tsa ne goo naa xomod mgwe zha. ¹⁰ Kona ndyaad nee taa nee kwente lo re goo nzhee, tsa ne re goo lee mbyi kuu ndo nzhee lo re goo, mgwe kon ynlabee chaan Jesucrist zha Nazaret kuu mke re goo lo kruz, zha kuu leeka lee Diox mteroban. ¹¹ Re goo nak taxal zha kuu nta yuu ne lee Jesús nak taxal ke kuu mlaa re goo kuu nta yuu, per lee Jesús nak taxal ke kuu mas wen kuu mndob thib skin yuu. ¹² Tak beeta Jesús nak kuu ndaa ynlaban kuu thitanax, ne yent raa tedib zha kuu ndaa ynlaban kuu thitanax, tak mtaalt Diox tedib zha, kuu tak telaa re'aa lo yalguth.

¹³ Leettsa mne re zha kuu nak tsii lee Pey rop Juan ney leettsoo ndediz, ne wen ne re zha mteedit rop zha, ne neeka gagt lab rop zha, kona kwathoz mzegey leettsoo re zha, ne myeen re zha lee rop zha mndiy kon Jesús. ¹⁴ Ne lee mbyi kuu mgwe'a ndoka tya, kona gagt keki zha Pey rop Juan. ¹⁵ Tsa

mnabee re zha kuu nak tsii, mroo rop zha lo junt, tsa yaan beeta re zha tediz. ¹⁶ Tsa nzhab re zha:

—¿Kwan tsowaa kon rop mbyi ree? Tak reta zha Jerusalén mwii mtsow zha re milagr thoz ree, ne gagt gabaa wlite. ¹⁷ Per nal yii'aa lo zha ne tseba zha, tsa taat raa zha kwent chaan Jesús lo re men, tsa raats raa xkiiz Jesús lo re men.

¹⁸ Tsa mrez re zha rop zha ne mnabee zha lo rop zha, tsa tedizt raa zha zha ne neeka loot raa zha kwent chaan Jesús lo re men: ¹⁹ Per lee Pey rop Juan mkab lo re zha a ne nzhab:

—Leeka re goo btsow goo xgab, ¿chu mas wen gon nee diiz lo goo, nake gon nee diiz lo Diox? ²⁰ Leecha nee tediz re kuu mwii nee ne re kuu mbin nee.

²¹ Tsa lee re zha kuu nak tsii mre mnayii lo rop zha, ne mtelaa zha rop zha, tak mzalt zha mod gateti zha rop zha, tak reta men nzhooll Diox, tak mwii re men kuu mtsow rop zha. ²² Lee mbyi kuu mgwe lo milagr thoda, nap masraa chop gal liin.

Lee re zha kuu nyelaaz Jesús mnaab yalney lo Diox

²³ Leettsa mtelaa zha Pey rop Juan, tsa ngwa rop zha mkaltaa zha kon re altaa zha kuu nyelaaz Jesús, ne mndaa zha kwent reta kuu nzhab re ngwleyy kuu nabee lo re ngwleyy ne re zha gol zha Israel lo rop zha. ²⁴ Or ngwalo mbin re zha kuu nzhab rop zha, tsa reta zha mnaab lo Diox ne nzhab zha:

—Zha Nabee, lu mdexkwaa lobee, yezlyu, nitdoo ne reta kuu nzo leene, ²⁵ ne por Mbi Nayon chaana mni David re koree, or nzhab David:

¿Chebee nayii re men yezlyu ree?
¿Chebee ntsow re zha xgab kuu nataagt?

²⁶ Re rey ne re zha kuu nak tsii lo yezlyu ree, thibka ngok re zha,
tsa yi zha ne Zha Nabee,
kuu nak Crist Kuu Mtaala Nabee. [Sal. 2:1-2]

²⁷ Tak wlipaa mkaltaa Herodes kon Poncio Pilat ne re zha kuu nagt zha Israel, ne mbyii zha mne zha xganna Jesús, zha nayon kuu mli'a. ²⁸ Tbaa mtsow re men reta kuu mtsowa lu xgab gak desde ndala. ²⁹ Ne lee nal, Zha Nabee, wii naa xa nayii zha ne zha nee, tsow ayud re nee kuu nak mosa, tsa tsebt nee taa nee kwent xkiiza, ³⁰ ne kon yalney chaana tegwe nee re mbyiz, ne tsow nee re milagr thoz kon ynlabee chaan xganna Jesús kuu Nayon.

³¹ Or ngwalo mndediz re zha lo Diox, lee ta nzi re zha mndelo mzhiit. Ne reta zha mckayaa Mbi Nayon, ne mzebt re zha mnadelo zha mndaa zha kwent xkiiz Diox.

Reta kuu ngok chaan re zha

³² Ne thibka ngok xgab reta zha kuu nyelaaz Jesús. Ne neeka thib re zha mbezt zha beeta chaan zha nak re kuu nkeno zha, sinke chaan reta zha nake. ³³ Ne Diox mtsow ayud re apóstl, tsa mndaa re zha kwent lee Jesús Zha Nabee mroban, ne lee yalwen chaan Diox mndo kon re apóstl. ³⁴ Kona reta zha nap zha kuu ndeche zha, taklee zha kuu nkeno yu o thib yuu ntho zhay, ne nyadno zha temi ³⁵ ne ndaa zhay lo re apóstl, tsa kiid zhay lo re zha, taxalta ndeche kadta thib thib zhay. ³⁶ Ne xid re zha'a ngoo thib mbyi kuu le Che, zha kuu nak zha raz Leví, ne zha Chipre nak Che. Re apóstl mtoib le zha Bernabé. (Diz reenak: "Zha kuu ntetsey".) ³⁷ Lee mbyi ree mkeno thib le yu, ne mtho zhay ne myaadno zha temi lo re apóstl.

5

Kuu mtsow Ananías ne Safira

¹ Per ngoo thib mbyi kuu le Ananías ne lee tsaal Ananías le Safira. Mtho rop zha thib le yu zha. ² Ne myaan rop tsaal zha diiz kedi zha, ne mtaan Ananías garol temi, lee tegarole mndaa Ananías lo re apóstl. ³ Tsa lee Pey nzhab lo Ananías:

—¿Chebee mlaa'a mndaab Maxuuuy leettsoo'a, kona nlaaza kedi'a Mbi Nayon, tsa yaana kon plo temi kuu mtho'a loyau'a? ⁴ ¿Chu nagte loyau'a leettsa ter tho luy? ¿Chu nagt temi'a kuu mkayaa'a? ¿Chebee mtsowa xgab tsowa koree? Ngwalaaza gakedia're men per myeenta lo Diox ngetsow luy.

⁵ Or ngwalo mbin Ananías koree, cha ngob Ananías ne nguth Ananías. Ne reta zha kuu mbin koree kwathoz mzeb zha. ⁶ Tsa myaad chop tson zha mndyeen, mchal mndyeen lar Ananías ne mbe mndyeen Ananías ngwakaats mndyeen.

⁷ Teeka tson or bluz, tsaraa mzin tsaal Ananías, ne net ngot naa kwan ngok. ⁸ Tsa mnaabdiz Pey lo ngot, ne nzhab Pey:

—Ne lon, ¿chu taxal ne tsuala? ¿Chu lala mtho goo yu goo?

Lee ngot mkab ne nzhab:

—Ah, pres baa mtho neey.

⁹ Tsa lee Pey nzhab lo ngot:

—¿Chebee myaan rop tsaal goo diiz tsow goo koree, nlaaz goo kedi goo Mbi Nayon? Wii baa ndyaad re zha kuu ngwakaats tsuala, ne nalar gwe zha lu.

¹⁰ Ne oraaka lee Safira cha ngob lo Pey ne nguth. Ne or mndaab re mndyeen ngutha ngot, tsa mbe mndyeen ngot, ngwakaats mndyeen ngot leeka cho tsaal ngot. ¹¹ Ne reta zha kuu nyelaaz Jesús kon reta zha kuu mbin koree, kwathoz mzeb zha.

Kwathoz tyen milagr ne re kuu thoz mloo

¹² Lee re apóstl mtsow kwathoz milagr ne re kuu thoz lo re men; ne reta zha

nkaltaa roo korredor kuu ni zha, roo korredor chaan Salomón. ¹³ Lee re men yez kwaro wen ngoo leettsoo zha mne zha re zha kuu nyelaaz Jesús, per myet leettsoo zha gataab zha xid re zha kuu nyelaaz Jesús. ¹⁴ Ne masraa zha ngwalaaz Jesús tant mbyi ne ngot. ¹⁵ Ne nyadno re men re mbyiz roo net ne nxoob zha zha lo luun, tsa or lee Pey rid, mase xinn Pey diinn thib chop re zha, tsa gwe zha. ¹⁶ Ne noga kwaro re men re yez kuu nzi gax ngwa Jerusalén, ne nyadno zha re mbyiz ne re zha kuu nzo mbi fyer leettsoo. Ne reta zha ngwe.

Mreke zha dits Pey rop Juan

¹⁷ Tsa lee ngwleyy kuu nabee lo reta ngwleyy kon re saduceo kuu nzi kon lee zha, kwaro mnayii zha mne zha rop apóstl, ¹⁸ mzhen zha rop apóstl, ne mloo zha rop zha tsib. ¹⁹ Per leeka yaala lee thib mandad chaan Diox mxaal roo tsib, mloo rop zha ne nzhab lo rop zha:

²⁰ —Gwa goo lee gwodoo Jerusalén, ne btaa goo kwent xkiiz Diox kuu ndaa yalnaban lo re men.

²¹ Ne leettsa ngwalo mbin rop zha kona, ne til tedib wiz ngwa zha lee roo gwodoo ne mndelo zha mloo zha xkiiz Diox lo re men.

Tsa lee ngwleyy kuu nabee lo reta ngwleyy, ne re zha kuu nzi kon lee zha, mrez zha reta zha gol zha Israel lo thib junt, tsa mnaab zha yaxii zha rop apóstl tsib. ²² Per or mzin re zha kuu nkenap gwodoo roo tsib, yenta rop zha leen tsib, tsa mretab zha ndyaadno zha diiz, ²³ ne nzhab zha:

—Or mzin nee roo tsib, nowka roo tsib, ne lee re soldad nzika nkenap roo tsib. Per or mxaal nee tsib, yentka cho nak leen tsib.

²⁴ Ne leettsa mbin ngwleyy kuu nabee lo reta ngwleyy kon zha kuu nabee lo re zha kuu nkenap gwodoo, ne kon re ngwleyy kuu nabee lo re ngwleyy kona, tsa mndelo re zha mtsow zha xgab: “¿Asta plotha tsin re koree?”

²⁵ Ne oraaka mzin thib zha nzhab lo re zha:

—Lee rop zha kuu mloo goo tsib, ndo lee roo gwodoo ngeloo lo re men.

²⁶ Tsa lee re zha kuu nkenap gwodoo kon zha kuu nabee lo re zha, ngwakwaan rop apóstl, per yent kwan mtsow zha lo rop zha, tak nzeb zha kee re zha yez ke yek zha. ²⁷ Or mtsino zha rop apóstl lo re zha kuu nak tsuin ne lo ngwleyy kuu nabee lo reta ngwleyy. Tsa lee ngwleyya nzhab lo rop zha:

²⁸ —¿Chu mnet nee lo goo taat raa goo kwent chaan Jesús lo re men? Ne lee nal ngwalo'a mtsow goo, lee reta men mbin re kuu mloo goo, ne nlaaz goo keki goo nee lee nee mbeth mbyi'a.

²⁹ Tsa lee Pey kon tedib net re apóstl mkab, ne nzhab:

—Ndoblo ner lo Diox gon nee diiz, tsaraa gon nee diiz lo re men yezlyu ree.³⁰ Leeka Diox chaan re teyaa zha ndala, mteroban Jesús, kuu mbeth goo mkee goo lo kruz.³¹ Diox mteroban Jesús, ne mtob Diox Jesús lad ban lo Diox, lee Jesús nak Zha Nabee, lee Jesús nak zha kuu ntelaa re men lo re falt men, ne leeka Jesús mxaal net, tsa lee re'aa zha Israel tsowt raa lee kuu went, ne ndoblo yelaazaa Jesús, tsa tuyy Jesús re faltaa.³² Ne re nee ne Mbi Nayon nak cho ne koree, Mbi Nayon ree ndaa Diox lo re zha kuu nzhon diiz lo Diox.

³³ Or mbin re zha'a koree, kwathoz mkezhyan re zha, ne ngwalaaz zha gaguth zha rop apóstl.³⁴ Per xid re zha kuu nak tsiiin, ngoo thib fariseo kuu le Gamaliel, kuu nak thib maestr chaan ley, ne reta men yez nzhon diiz lo Gamaliel. Mndeli Gamaliel ne mnabee Gamaliel, tsa koo zha re apóstl lee thib gatil.³⁵ Ora nzhab Gamaliel lo re zha kuu nak tsiiin:

—Zha Israel, wen wii goo naa kwan tsow goo kon rop mbyi baa.³⁶ Btelaaaz goo ndala ngoo thib mbyi kuu le Teudas, kuu ngwalaaz gagak thib mbyi nataak, ne mkaltaa Teudas thap gayoo zha kuu mndeke dits Teudas, ne leettsa mbeth zha Teudas, reta zha kuu mndeke dits Teudas mraats mlaal, ne yent raa cho zha myaan. Tyatha ngwalo re kuu mtsow Teudas.³⁷ Ne noga leettsa mthop gobyern le re men, ngoo tedib mbyi kuu le Judas zha Galilea. Ne leeka tata mthop Judas kwaro re men kuu mndeke dits Judas, per noga mbeth zha Judas, ne reta zha kuu mndeke dits Judas mraats mlaal.³⁸ Kona lee na ni lo goo laa goo rop mbyibaa, yent kwan tsow goo lo zha. Tak os lee koree nak chaan re men, teluzhe.³⁹ Per os Diox ngetsow koree, tsowt goo gan lo zha, kenap goo goo cha leel kon Diox ngeyo goo.

⁴⁰ Reta zha mbin diiz lo Gamaliel. Tsa mrez re zha rop apóstl ne mkee zhay yek rop zha, ne nzhab zha lo rop zha, teditz raa zha kwent chaan Jesús lo re men. Tsaraa mtelaa zha rop zha.⁴¹ Per lee rop apóstl kwathoz laz zha mroo zha lo re zha nak tsiiin, tak mndaa Diox diiz mriid zha yalti, tak nyelaaz zha Jesús.⁴² Ne neeka mzebt zha ne neeka mlaat zha gataa zha kwent chaan Jesucrist lo re men gandata wiz, lee roo gwodoo Jerusalén ne noga liz re men.

6

Mli zha gaz zha

¹ Ne re wiza lee re zha kuu nyelaaz Jesús ndiy nzhak mas plo, ne lee re zha Jesús kuu ndediz diiz gryeg, mndelo mtob kej kwent chaan re zha kuu ndediz Hebreo. Mbez zha ke reta wiz, leettsa ngiid zha kuu wu re byud, lee re byud kuu ndediz gryeg nkayaat

ploy, taxal nkaya re byud kuu ndediz Hebreo.² Tsa lee re tsuibchop apóstl mkaltaa re zha kuu nyelaaz Jesús, ne nzhab re apóstl lo re zha:

—Went os laa nee taat raa nee kwent xkiiz Diox, par kiid nee kuu wu re men.³ Kona wets ne btan, bli goo gaz mbyi xid re goo, zha kuu nzhak ne nali nak ne kuu nabee Mbi Nayon leettsou, tsa taa nee tsiiin ree tsow zha.⁴ Ne lee re nee naabka lo Diox ne taa nee kwent xkiiz Diox.

⁵ Reta zha mkab nzhab tata gake, ne mli zha Steb, thib mbyi kuu wlipaay nyelaaz Jesús ne kwaro nabee Mbi Nayon leettsou zha, Lip, Prócoro, Nicanor, Timón, Pármenas ne Nicolás zha yez Antioquía (zha ree ngok zha Israel).⁶ Tsa mndeno zha re gazta re zha ree lo re apóstl, ne lee re apóstl mxoob yaa yek re zha, ne mnaab re zha lo Diox por re gazta zha ree.

⁷ Ne lee xkiiz Diox masraa mraats, ne lee re zha kuu nyelaaz Jesús ndiy ngeyak mas plo raa yez Jerusalén. Ne asta kwaro re ngwleyy noga ngwalaaz Jesús.

Mzhen zha Steb

⁸ Lee Steb kwaro nabee Mbi Nayon leettsou ne mndaa Diox yalnabee lo Steb, mndaa Diox diiz tsow Steb kwaro milagr ne re kuu thoz lo re men yez.⁹ Ne lee chop tson zha kuu nteed xkiiz Diox thib ta le: “Re men Libr” mndelo zha mbyodiz kon Steb, re zha ree ndyaad re yez ree, yez Cirene ne zha yez Alejandría, ne zha kuu ndyaad yezlyu Cilicia, ne re zha kuu ndyaad yezlyu Asia.¹⁰ Per yet roo re zha lo yalnzaak chaan Steb, tak lee Steb ndediz kon yalnzaak chaan Mbi Nayon.¹¹ Tsa mdix re zha lo chop tson mbyi, tsa gab re zha ree lee Steb nlooz Moisés ne Diox.¹² Ne tabaa mtsow re zha, tsa mbyii re zha yez, re zha gol ne re maestr chaan ley. Tsa mzhen zha Steb ne mndeno zha Steb lo re zha kuu nak tsiiin.¹³ Ne noga mkwaan re zha re zha kuu nkedi nzhab:

—Lee mbyi ree thibka nlooz gwodoo Nayon chaan Diox ne ley Diox.¹⁴ Ne re nee mbin nzhab zha lee Jesús, zha Nazaret luux gwodoo, ne tsee zha costumr kuu mlaa Moisés lo re'aa.

¹⁵ Lee re zha kuu nak tsiiin kon reta zha kuu nzi tyaa, or mwii re zha lo Steb, lee lo Steb mloo taxal lo thib mandad chaan Diox.

7

Steb ndo lo re ngwleyy kuu nabee lo re ngwleyy ne lo re zha gol

¹ Tsa lee ngwleyy kuu nabee lo reta ngwleyy mnaabdiz lo steb, ne nzhab:

—¿Chu wli re kuu mbezz re zha lo'a?

² Lee Steb mkab ne nzhab:

—Wets'n ne xut'n, kenza goo kuu nin, lee Diox kuu nak chaan xni ne kuu kwathoz naro mloo lo teyaa Abraham, leettsa ngoo Abraham yezlyu Mesopotamia, leettsa terka ya Abraham yo yez Harán. ³ Diox nzhab lo Abraham: "Broo laza ne blaa re tawlaza, tsa ndya'a yezlyu kuu lon lo'a". [Gn. 12:1] ⁴ Tsa mroo Abraham yezlyu Caldea ne ndya Abraham ngoo yez Haran. Ne tyaa nguthu xut Abraham ne leettsa nguthu xut Abraham, lee Diox ndyaadno zha yezlyu ree, ta nzo re goo nal. ⁵ Ne mndaat Diox neeka thib le yuree lo Abraham, neeka lutte, per nzhab Diox lo Abraham, taa Diox yezlyu ree lo re raz chaan Abraham, or lee Abraham nguthu. Ne napt Abraham zhiinn Abraham tsya. ⁶ Ne noga nzhab Diox lo Abraham: "Lee re zha raz Abraham ya yo thib yez tith, ne lee re zha yeza tsow, gak re zha raz Abraham mos lo re zha kuu nzo yeza, ne teti re zha yeza re zha raz Abraham thib thap gayoo liin". [Gn. 15:13] ⁷ Noga nzhab Diox lo Abraham: "Na teti zha yezlyu'a, zha kuu tsow gak raza mos lo re zha kuu nzo tya, per bluz roo re razza tya, ne yaad re zha nzhee gol zha lon". [Ex. 3:12] ⁸ Ne lo trat kuu mtsow Diox kon Abraham, mnabee Diox lo Abraham, tsa kee Abraham seny Abraham ne re zha raz Abraham. Kona penta mzaal xon wiz ngol xgann Abraham Isaac, mkee Abraham seny xgann Abraham, ne tataka mtsow Isaac kon xgann Isaac Kob; ne leeka tata mtsow Kob kon re xgann Kob, kuu ngok xut re tsuibchop re zha raz zha Israel.

⁹ 'Re xgann Kob kuu ngok re teyaa zha ndala, mnayii zha mne zha wets zha Che, tsa mtho zha Che lo zha kuu mriid ndya net Egipio, per mlaayaat Diox Che, ¹⁰ mtsow Diox ayud Che lo re yalti kuu mriid Che, ne mndaa Diox yalnzhaak lo Che, noga mtsow Diox lee faraón zha kuu nak rey Egipio mkayaa Che. Ne rey ree mtsow ngok Che zha nabee dita yezlyu Egipio ne noga liz rey.

¹¹ 'Tsyaa mla win dita yezlyu Egipio ne yezlyu Canaán, ne lee re teyaa kwathoz nabil ngoo leettsa zha, tak yent raa kuu wu zha. ¹² Ne leettsa mbin Kob nzo xtil yez Egipio; tsa mtaal Kob re xgann Kob tya, yaxii nzob xtil thib welt, ne re zha rree ngok re teyaa zha ndala. ¹³ Ne leettsa ngwa re zha tedib welt, tsaraa lee Che mlaa mlebee re wets Che Che, ne tabaa lee faraón mne naa cho raz ndyaad Che. ¹⁴ Tsa mnabee Che yaad xut Che Kob ne reta zha liz Che, tsa yo re zha Egipio, ne re zha rree nak tson gal tsii. ¹⁵ Ta mod ndya Kob ngoo Egipio; ne tyaa nguthu Kob, ne tyaka nguth re teyaa zha ndala. ¹⁶ Ne bluz mbe re zha tsidh Kob yez Siquem, ne mloo zhay leen baa kuu mzhi Abraham lo re zhiinn Hamor yez Siquem.

¹⁷ 'Ne leettsa ndetsin gaxa wiz kuu gak kuu nzhab Diox lo Abraham, lee zhiinn re teyaa zha ndala kwaro myazh zha Egipio. ¹⁸ Ne lee tedib rey mnabee Egipio, ne zha ree mlebeet zha Che. ¹⁹ rey ree mkedi re tawlaza ne mteti zha re tawlaza zha ndala. Mnabee zha, tsa laa re tawlaza gath re xgann zha kuu penta ngol. ²⁰ Ne thib re wiza ngol Moisés, thib mbet kuu kwathoz wen ngoo leettsoo Diox mne Diox, ne lee xnaa mbet ne xut mbet mxeen mbet tsonka mbee. ²¹ Ne mzin wiz kuu laa rop zha mbet, tsa lee rtsaap faraón mzaal mbet ne mxeen nzaa mbet taxal zhiinn nzaa. ²² Kona lee Moisés mteeed lo yalnzhaak chaan re zha Egipio, ne lo xkiiz Moisés ne lo re kuu mtsow Moisés ngok Moisés zha nataak.

²³ 'Per leettsa napa Moisés chop gal liin, tsa ngoo leettsoo Moisés ngwatwii Moisés lo re tawlaz Moisés, zha Israel. ²⁴ Tsa mne Moisés lee thib zha Egipio ngeyin thib zha Israel, tsa mla Moisés tawlaz Moisés, ne mbeth Moisés zha Egipio. ²⁵ Mtsow Moisés xgab tabaa mod lee re tawlaz Moisés yeen lee Diox mtaal Moisés, tsa koo Moisés re tawlaz Moisés Egipio; per myent re tawlaz Moisés. ²⁶ Ne tedib wiz mwii Moisés lee chop tawlaza zha Israel ngeyo ne nlaaz Moisés wen kwin rop zha, tsa nzhab Moisés lo rop zha: "Tawlaz rop goo; ¿Chebee ngyo goo kon leeka tawlaz goo?" ²⁷ Tsa lee zha kuu ngeyin tedib zha mchop Moisés ne nzhab lo Moisés: "¿Cho mto'a tsa nabee'a lo nee, ne ten'i a nee?" ²⁸ ¿Chu nlaaza kutha na taxal mbetha zha Egipio naa'a?" [Ex. 2:14-15] ²⁹ Leettsa mbin Moisés kona, tsa mzhonn Moisés ndya Moisés ngoo Moisés yezlyu chaan re zha yez Madián, ne tyaa ngoo Moisés taxal zha tedib yez ne tyaa mkeno Moisés chop xgann Moisés.

³⁰ 'Ne mriid chop gal liin lee Moisés ndo thib yubiz, gax yii Sinaí, tsa mloo thib mandad chaan Diox xid bel lo ya bxiid lo Moisés. ³¹ Tsa kwathoz mzegeyt leettsoo Moisés mwii Moisés kona, tsa mbig Moisés gax tsa wen wen wii Moisés. Ora mbin Moisés lee Zha Nabee mni lo Moisés, ne nzhab: ³² "Na nak Diox chaan re teya, Diox chaan Abraham, chaan Isaac ne chaan Kob". [Ex. 3:6] Tsa lee Moisés mzeb ne mzhiit ne myet raa leettsoo Moisés gawii Moisés kona. ³³ Tsa lee Zha Nabee nzhab lo Moisés: "Kib labyid ni'i'a, tak lee ta ndo'a, nak thib ta nayon. ³⁴ Na ngewii naa xa ngeriid re zha da kuu nzo Egipio yalti, ne asta nzhhon zha naab zha lon. Kona mlan tsia gon zha, de nzhee, tsa taal'n lu Egipio." [Ex. 3:5,7]

³⁵ 'Ne tegal mzegeyt re zha Moisés, or kuu nzhab zha lo Moisés: "¿Cho mto'a gaka zha kuu nabee ne naaba kwent lo nee?" Per lee Diox mtaal Moisés, tsa nabee Moisés

lo re teyaa, ne Moisés ngwa mloo re zha Egipto, ne lee mandad chaan Diox mtsow ayud Moisés, leeka mandad kuu mloo lo Moisés ndrol xid bello ya bxiid. ³⁶ Ne Moisés nak cho mloo re teyaa zha ndala yezlyu Egipto, ne kon yalney chaan Diox mtsow Moisés kwaro kuu thoz yezlyu Egipto ne lo Nitdoo Nane ne lo yubiz thib chop gal liin. ³⁷ Ne leeka Moisés ree nzhab lo re zha Israel: "Diox kwii thib zha xid re goo kuu gak profet taxal na". [Dt. 18:15] ³⁸ Ne Moisés mndo kon re teyaa yubiz, ne leeka lo Moisés mni mandad chaan Diox yek yii Sinai, ne lee Moisés mkayaa ley chaan Diox ne mndaa lo re teyaa zha ndala ne tabaaga mriide lo'aa.

³⁹ Per lee re teyaa zha ndala, ngwalaazt zha gagon zha diiz lo Moisés, ne mlaazt re zha Moisés, leel ngwalaaz re zha garetah zha Egipto tedib Welt. ⁴⁰ Ne nzhab re zha lo Aarón: "Btexkwaa thib diox kuu tener lo'aa, tak netaa naa kwan ngok kon Moisés kuu mloo re'aa yezlyu Egipto". [Ex. 32:1] ⁴¹ Tsa mdexkwaa zha thib ngon lut kuu or, kuu mtsow zha diox zha, ne mbeth zha maa mndaa zha lo kona, ne mtsow re zha thib ani lo kuu mdexkwaa re zha, tak kwathoz wen ngoo leettsoo re zha mdexkwaa zhay. ⁴² Kona mlaa Diox re zha, ne mlaa Diox mbil re zha lo wiz, lo mbee ne lo re mbel kuu nzib lobee. Tak tabaa nke lo xkeets Diox, kuu mke re profet lo re men, leettsa nzhab profet:

Zha Israel, leettsa mndiy re goo yubiz chop gal liin, ⁴³ ¿chu lon mndaa goo re maa kuu mbeth goo?

⁴³ Mndaa gooy lon sinke leel lo Moloc mbil goo, ne lo mbel chaan Refán, re diox kuu leeka re goo mdexkwaa ne mneden re goo yuu yid chaan kona. Ta mod taal'n goo mas tith lo Babilonia. [Amós 5:25-27]

⁴⁴ Leettsa mndiy re teyaa zha ndala yubiz, mkeno re zha yuu yid, ta mbil re zha lo Diox yubiz, ne leene mlotsov zha re ley chaan Diox. Ne yuu yid ree mdexkwaa taxal nzhab Diox lo Moisés. Or nzhab Diox lo Moisés tsow Moisés taxal kuu mloo Diox lo Moisés. ⁴⁵ Ne yuu yid ree myaan lo re teyaa zha ndala, ne re zha Josué mbe zhay, leettsa mbyo re zha kon tedib net yez, par mtsow zha gan yezlyu, ne Diox mtsow ayud re zha tsa mtsow zha gane, ne yuu yid ree mkeno re zha, asta wiz kuu ngok David rey. ⁴⁶ Ne lee Diox kwathoz wen ngoo leettsoo mne rey David, ne leeka David ngwalaaz gataa gwodoo chaan Diox re'aa zha Israel. ⁴⁷ Per rey Salomón raa mdexkwaa. ⁴⁸ Tegal nzot Diox leen gwodoo kuu ndexkwaa men, taxal nzhab profet kuu ngoo ndala, or kuu nzhab profet:

⁴⁹ Yibaa nak ta ndob'n nabeen,

ne lo yezlyu nak ta ndo nin.

¿Cho yuu taa goo par na?

¿Pa texkwaa goo ney'n?

⁵⁰ ¿Chu nagt na cho mdexkwaa reta kwaa?

Ne Zha Nabee. [Is. 66:1-2]

⁵¹ Per lee re goo nzhab Steb:

—Thitanax nad goo, taxal zha ndobt nza ntsow goo, ne nlaazt goo tsow goo kuu nlaaz Diox, neeka nlaazt goo gon goo kuu nlaaz Mbi Nayon chaan Diox ne lo goo, leeka taxal ngok re teyaa zha ndala taga nak goo. ⁵² Ne cho thib re profet kuu ngoo ndala, mtetit re teyaa zha ndala? Asta mbeth re teyaa re profet, or nzhab profet lee Zha Kuu Nali Nak Yaad, ne leettsa myaad Zha Kuu Nali Nak, mzhen goo zha ne mnabee goo mbeth zha, zha. ⁵³ Ne tegal re goo mkayaa ley chaan Diox lo re mandad chaan Diox, per nzhont goo diiz kuu nzhab lo ley.

Yalguth chaan Steb

⁵⁴ Leettsa mbin re zha diiz ree, kwathoz mkezhyan zha ne asta nduub zha keley zha, tak kwathoz mnayii zha mne zha Steb. ⁵⁵ Ne lee Mbi Nayon kwaro nabee leettsou Steb, ne mwii Steb yibaa ne mloo xni yibaa chaan Diox lo Steb, ne mloo lo Steb lee Jesús ndo lad ban lo Diox. ⁵⁶ Tsa nzhab Steb:

—iWii goo! Ngewiin lee yibaa ndezhaal, ne lee Jesucrist ndo lad ban lo Diox.

⁵⁷ Per lee re zha mtow zha nza zha, ne mrežta zha ne mbig zha mzhen zha Steb. ⁵⁸ Tsa mloo re zha Steb yez ne mke re zha ke yek Steb, ne lee re zha kuu mke re yek Steb, mlaa re zha chamar zha, tsa lee thib nde kuu le Saulo mkenape.

⁵⁹ Ne or ngekee re men ke yek Steb, lee Steb mnaab lo Diox ne nzhab:

—Jesús Zha Nabee, bkayaa xbi da.

⁶⁰ Or ngwalo nzhab Steb koree, tsa mto-bxub Steb ne dib gan Steb mrez Steb, ne nzhab Steb:

—iZha Nabee, naabta kwent re kuu went kuu ngetsow re zha ree lon!

Leettsa ngwalo tata nzhab Steb, ora nguth Steb.

8

¹ Ne wen ngoo leettsou Saulo lee Steb nguth.

Saulo mreke dits re zha kuu nyelaaz Jesús

Ne leeka re wiza mndelo re men mreke dits reta zha kuu nyelaaz Jesús yez Jerusalén. Kona reta zha mraats ndya tedib re yez chaan yezlyu Judea ne yezlyu Samaria beeta re apóstol myaan Jerusalén.

² Ne thib chop mbyi kuu thib mloo yek tsow kuu nlaaz Diox mkaats Steb, ne kwathoz mbinn zha lo Steb. ³ Ne lee Saulo mreke dits re zha kuu nyelaaz Jesús, ne ndaab Saulo liz re zha, ne lafwers ndeno Saulo mbyi ne ngot ngo Saulo tsib.

Lip mndaa kwent xkiiz Diox yez Samaria

⁴ Per lee re zha kuu mraats mndaa zha kwent xkiiz Diox reta ta nda zha. ⁵ Tsa lee Lip ngwa yez Samaria ne mndaa zha kwent xkiiz Diox tya. ⁶ Kwaro men nkaltaa, ne nkenza zha kuu ni Lip, ne mwii zha re milagr thoz kuu ntsow Lip. ⁷ Ne kwaro zha kuu nzo mbi fyer leettsoo ngwe, ne mbetsath re mbi fyer ndroo, ne lee re zha mthans ne re zha koj mgwe, ⁸ kona kwathoz laz re men yeza.

⁹ Per tya ngoo thib mbyi kuu le Simún, zha kuu mtsow yalwez ne mkedi Simún re men yez Samaria, mtsow Simún taxal thib zha kuu kwathoz nataak. ¹⁰ Reta men nzhon re kuu mbez Simún, desde zha mndyeen asta zha gox ne mbez re zha:

—Mbyi ree nap yalney chaan Diox.

¹¹ Nyelaaz re men kuu mbez Simún, tak kon yalwez mkedi Simún re men naroob tyemp. ¹² Per leettsa mndaa Lip kwent naa xomod nak yalnabee chaan Diox ne chaan Jesucrist; tsa ngwalaaz re zha Diox, ne mbyi ne ngot ngokleyy. ¹³ Asta noga Simún ngwalaaz Diox ne ngokleyy ne mndeke Simún dits Lip, ne kwathoz mzegey leettsoo Simún mwii re milagr thoz kuu ngok.

¹⁴ Ne leettsa mbin re apóstol kuu nzo Jerusalén lee re zha yez Samaria ngwalaaz Diiz Chul chaan Diox, tsa mtaal zha Pey rop Juan tya. ¹⁵ Ne or mzin rop zha tya, mnaab zha lo Diox por re zha kuu ngwalaaz Jesús tya; tsa kayaa re zha Mbi Nayon. ¹⁶ Tak neeka thib re zha'a ter kayaa Mbi Nayon, beeta ngokleyy re zha kon le Jesús Zha Nabee. ¹⁷ Tsa lee Pey rop Juan mxoob yaa yek re zha'a, ne tata mkayaa re zha Mbi Nayon.

¹⁸ Leettsa mwii Simún lee rop apóstol nxoob yaa dits re men, ne lee re men nkayaa Mbi Nayon, tsa ngwalaaz Simún gataa temi lo rop apóstol, ¹⁹ ne nzhab Simún lo rop apóstol:

—Noga lon taa goo yalnabee baa, tsa noga na or xoob'n yaan dits re men, tsa noga re zha kayaa Mbi Nayon.

²⁰ Tsa lee Pey mkab lo Simún, ne nzhab:

—Jlu ne temi'a lux kon lu, tak ntsowa xgab kon temi tii'a kuu nataak kuu ndelaaaz Diox! ²¹ Ndoblota ne neeka nzaalt tsowa tsiiñ ree, tak nalit nak leettsoo'a lo Diox. ²² Blaa re xgab went kuu nzo yeka, ne bnaab lo Diox tsa naa chu tetuyy Diox xgab went kuu mtsowa. ²³ Tak nyeen na anta yalnayii nzo leettsoo'a, ne naliiba lo kuu went kuu nabee lo'a.

²⁴ Tsa mkab Simún ne nzhab Simún:

—Naab goo lo Zha Nabee, tsa neeka thib re kuu ne goo lon tagt'n.

²⁵ Leettsa ngwalo mndaa rop apóstol kwent chaan Jesús ne xkiiz Diox lo re zha yez Samaria, tsa mretab rop zha Jerusalén ne

ndaa zha kwent Diiz Chul chaan Jesús re yez chaan Samaria.

Lip ne thib zha Etiopía

²⁶ Bluz or ngwalo mriid re koree, lee thib mandad chaan Zha Nabee, nzhab lo Lip:
—Gwa net yath, net kuu ndroo Jerusalén kuu nzin yez Gaza.

Net kuu ndriid yubiz. ²⁷ Tsa lee Lip ngoo net nda, ne neta mzaal Lip thib mbyi zha yezyu Etiopía, zha ree nak Eunuco, thib zha nataak; mbyi ree nkenap temi Candace ngot kuu nak reyna kuu nabee dita Etiopía, mbyi'a ndyaad ngwa Jerusalén ngwayol lo Diox. ²⁸ Ne ndya zha laz zha, ndob zha leen karret zha ne ngelab zha yeets kuu mkee profet Isaí zha ndala.

²⁹ Tsa lee Mbi Nayon nzhab lo Lip:

—Gwa tsa yedaab karret baa lo'a.

³⁰ Ne leettsa ngwadaab karret lo Lip, tsa mbin Lip lee zha Etiopía ngelab yeets kuu mkee Isaí. Tsa mnaabdiz Lip lo zha, ne nzhab Lip:

—¿Chu nyena kuu ngelaba?

³¹ Lee zha mkab lo Lip nzhab:

—¿Xomod yen nay, os yent cho ne lon naa xomod nake?

Tsa nzhab zha lo Lip kendab Lip leen karret zha, tsa tob Lip cho zha. ³² Lee xkiiz Diox kuu ngelab zha nak koree:
Mbe zha zha taxal thib mbak zhiil lo yalguth;
ne yent kwan nzhab zha taxal thib mbak zhiil kuu naxa lo re zha kuu ga yits lad maa.

³³ Ne leettsa mtsowno re men zha taxal nlaaz re men,
ne mnaabt zha kwent lo zha taxal ndobloy,

¿cho tak taa kwent chaan re raz zha?
Tak mkib re zha yalnaban chaan zha lo yezyu ree. [Is. 53:7-8]

³⁴ Tsa lee zha Etiopía nzhab lo Lip:

—Tsow yalwen ne lon, ¿cho nteth profet?
¿Chu leeka lee profeta o tedib zhay?

³⁵ Tsa lee Lip mndelo mndaa kwent xkiiz Diox lo zha, kon leeka xkiiz Diox kuu ngelab zha, tabaa mndaa Lip kwent Diiz Chul chaan Jesús lo zha. ³⁶ Ne or mzin rop zha thib ta nzo nit, tsa nzhab zha lo Lip:

—Nzhee nzo nit, ¿chu tak gakleyy'n?

³⁷ Tsa lee Lip nzhab lo zha:

—Os lee'a nyelaaza Jesús kon dib ndroo leettsoo'a, tak gakleyya.

Lee zha mkab ne nzhab:

—Nyelaz'n lee Jesús nak Xgann Diox.

³⁸ Tsa mnabee zha tekweet zha karret, ora mla rop zha ne mndaa zha leen nit, ne mtsowley Lip zha. ³⁹ Ne leettsa mroo rop zha leen nit, lee Lip mnith lo zha, tak lee Mbi Nayon chaan Zha Nabee mndeno Lip; ne kwathoz naley ngoo leettsoo zha Etiopía ndya zha xnet zha. ⁴⁰ Leettsa myeen Lip

lee Lip ndo'a yez Azoto, tsa mriid Lip thib yez ne tedib yez, mnndaa Lip kwent Diiz Chul chaan Jesucrist, asta mzin Lip yez Cesarea.

9

Saulo ngwalaaz Jesús (Hch. 22:6-16; 26:12-18)

¹ Lee Saulo be naiika ne re zha kuu nyelaaz Jesús, ne nlaaz Saulo kuth re zha. Tsa ngwa Saulo lo ngwleyy kuu nabee lo reta ngwleyy. ² Ngwanaab Saulo thib yeets, tsa tak ya Saulo yez Damasco re ta nkaltaa re zha nteed zha xkiz Diox, tsa liib Saulo mbyi na ngotkuu nyelaaz Jesús, ne teno Saulo zha tsa yo zha tsib yez Jerusalén. ³ Per leettsa ndo Saulo net gaxta yez Damasco, tsa cha mroo thib xni lobee kuu mla dita ta ndo Saulo. ⁴ Tsa ngob Saulo lo yu, ne mbin Saulo thib bos kuu nzhab lo Saulo:

—Saulo Saulo, ¿chebee ndreke'a dits'n?

⁵ Tsa mnaabdiz Saulo:

—¿Cho naka Zha Nabee?

Ne lee bosa mkab lo Saulo, ne nzhab:

—Na nak Jesús, zha kuu ngereke'a dits.

⁶ Gwateli ne gwa yez Damasco, tya ne zha lo'a naa kwan ndoblo tsowa.

⁷ Ne lee re zha kuu nda kon Saulo kwathoz mzeb zha, tak mbin zha bos, per yent kwan mllo lo zha. ⁸ Tsa ngwache Saulo; ne or mxaal Saulo ngutlo Saulo, nyenit raa ngutlo Saulo. Tsa mzhien re zha kuu nda kon lee Saulo yaa Saulo ne mndeno zha Saulo yez Damasco. ⁹ Tya ngoo Saulo tson wiz ne ngwanit lo Saulo, neeka thib kuu ndowt Saulo ne neeka thib kuu ngwiit Saulo.

¹⁰ Ne yez Damasco nzo thib mbyi kuu le Ananías kuu nyelaaz Jesús. Ne lee Jesús ngwanii lo Ananías, ne nzhab lo Ananías:

—¡Ananías!

Tsa lee Ananías mkab ne nzhab:

—Leen ndo nzhee, ¿kwan nlaaza Zha Nabee?

¹¹ Ne lee Zha Nabee nzhab lo Ananías:

—Bteli ne gwa kay kuu le Nali, ne liz Judas naabdiza thib mbyi zha yez Tarso kuu le Saulo, tak lee Saulo ngenaab lon. ¹² Tak lo Saulo ngwani thib mbyi kuu le Ananías, kuu mnndaab ne mxoob yaa yek Saulo, tsa yenil Saulo tedib welt.

¹³ Or mbin Ananías kona, tsa nzhab Ananías:

—Zha Nabee, kwaro zha ndaa kwent chaan mbyi'alon, ne re kuu went kuu ntsov Saulo lo re zha kuu nyelaaza Jerusalén. ¹⁴ Ne lee nal ndyaad Saulo nzhee ne nap Saulo yalnabee chaan re ngwleyy kuu nabee lo re ngwleyy, tsa ten Saulo re zha kuu nyelaaz lu nzhee ne teno Saulo re zha Jerusalén.

¹⁵ Per lee Zha Nabee nzhab lo Ananías:

—Gwa, tak mli'a na mbyi'a par taa zha kwent xkiz'n lo re zha kuu nagt zha Israel, ne lo re rey yezlyu, ne nogar lo re zha Israel. ¹⁶ Na loo lo Saulo lee Saulo ndoblo rid kwathoz yalti, leettsa taa Saulo kwent xkiz'n.

¹⁷ Tsa lee Ananías ngwa yuu ta mlet Saulo, ne or mnndaab Ananías, tsa mxoob Ananías yaa Ananías yek Saulo, ne nzhab Ananías:

—Wets Saulo, lee Jesús Zha Nabee kuu ngwani lo'a or ndyaada net mtaal'n, tsa yeni lo'a tedib welt, ne kayaa'a Mbi Nayon chaan Diox leen leettsoo'a.

¹⁸ Ne oraaka ngob thib kuu na taxal med mbel ngutlo Saulo, ne mre ngwani lo Saulo tedib welt, tsa ngwateli Saulo ne ngokleyy Saulo. ¹⁹ Tsaraa ndow Saulo tsaraa mkaa Saulo fwers, ne mlet Saulo thiban wiz lo re wets kuu nyelaaz Jesús kuu nzo yez Damasco.

Saulo mndaa kwent xkiiz Diox yez Damasco

²⁰ Tsa lee Saulo mndelo mnndaab kwent xkiiz Diox, lo re men ta nkaltaa re zha Israel nteed xkiiz Diox, ne mbez Saulo lee Jesús nak Xgann Diox. ²¹ Reta zha kuu nzhon kuu mbez Saulo; mzegey leettsoo re zha ne mbez zha:

—¿Chu leet zha ree kuu ndreke dits re zha Jerusalén kuu nyelaaz Jesús? ¿Chu ndyaadt zha nzhee, tsa ten zha re zha kuu nyelaaz Jesús ne teno zha zha lo re ngwleyy kuu nabee lo re ngwleyy?

²² Ne taxal ndriid wiz lee Saulo ngoo ney raa leettsoo, ndaa kwent xkiiz Diox, ne kwathoz nambi nzhab Saulo lee Jesús nak Crist Kuu Mtaal Diox Nabee, tsa lee re zha Israel kuu nzo Damasco, net zha naa kwan tsow zha xgab.

Saulo mzhonn yez Damasco

²³ Ne lutta ngwatey lee re zha Israel kuu nzo Damasco myaan diiz kuth Saulo, ²⁴ per myene Saulo lee re men nlaaz kuth Saulo. Tse ne yaal ntow zha lo Saulo roo pwert yez, tsa kuth zha Saulo. ²⁵ Per lee re zha kuu nyelaaz Jesús, yaal mloo zha Saulo leen thib chekwit ne mlaa zha Saulo lad cho blaa kuu now dita yez. Tbaa mroo Saulo yez.

Saulo mzin Jerusalén

²⁶ Leettsa mzin Saulo Jerusalén, ngwalaaz Saulo gakaltaa kon re zha kuu nyelaaz Jesús tya; per reta zha nzeb lo Saulo, tak nyelaazt re zha lee Saulo nyelaaza Jesús. ²⁷ Per lee Bernabé ngwano Saulo lo re apóstol. Ne nzhab Bernabé naa xomod mwii Saulo ne mni Jesús lo Saulo or ndo Saulo net nda Saulo yez Damasco. Ne xomod mzebt Saulo mnndaab Saulo kwent chaan Jesús yeza ²⁸ Tsa lee Saulo myaan Jerusalén ne ndiy Saulo kon re zha. Ne mzebt Saulo ndaa kwent

chaan Jesús. ²⁹ Ndediz Saulo ne ngoyodiz Saulo kon re zha Israel kuu ndediz diiz gryeg; per lee re zha ree nlaaz kuth Saulo. ³⁰ Leettsa myeen re zha kuu nyelaaz Jesús kona, tsa mndeno zha Saulo asta yez Cesarea, ne tya mtaal zha Saulo yez Tarso.

³¹ Tsa lee re zha kuu nyelaaz Jesús, kuu nzo re yez chaan Judea chaan Galilea ne chaan Samaria, wen ngoo re zha tak ndreket raa zha dits zha, ne xlaazga mas wen myen re zha xkiiz Diox ne nzhon zha diize, ne lee Mbi Nayon mtsow masraa myazh re zha kuu nyelaaz Jesús.

Eneas mgwe

³² Ne leettsa ndiy Pey re yez nyatwii Pey lo re zha kuu nyelaaz Jesús, noga ngwa Pey lo re zha kuu nyelaaz Jesús kuu nzo yez Lida.

³³ Tya mzal Pey thib mbyi kuu le Eneas, kuu nax ne ndak ne nda'a xon liin gagt gwin Eneas. ³⁴ Tsa nzhab Pey lo Eneas:

—Eneas, mtegwe'a Jesucrist lu. “Gwache ne blit da'a”.

Ne oraaka ngwache Eneas. ³⁵ Ne mne reta zha kuu nzo yez Lida ne re zha kuu nzo laats Sarón kona, ne ngwalaaz zha Jesús.

Dorcus mroban

³⁶ Ne tsya ngoo thib ngot kuu nyelaaz Jesús yez Jope, kuu lee Tabita (diiz gryeg le zha Dorcas). Lee ngot ree thibka mtsow yalwen, mtsow Dorcas ayud re zha prob dita lo mban Dorcas. ³⁷ Ne re wiza mlen liz Dorcas ne nguth Dorcas, ne ngwalo mtegat zha Dorcas, tsa mxoob zha Dorcas leen yuu kuu ndob yek yuu'a. ³⁸ Ne gax yez Jope nzi yez Lida ne tyu ndo Pey, ne or mbin re zha kuu nyelaaz Jesús lee Pey ndo tyu, tsa mtaal zha chop mbyi ngwachez Pey, ne nzhab re zha lo Pey:

—Tsow yalwen nda yez Jope.

³⁹ Tsa mnndeke Pey dits rop zha, ne or mzin re zha, tsa mndeno zha Pey yuu ta nax thebol, tya nzi re ngot byud nzonn, ne mloo re ngot re lar kuu mdexkwaa Dorcas lo Pey, leettsa bee nabban Dorcas. ⁴⁰ Tsa mnabee Pey mroo reta zha kuu nzi tyu, tsa mtobxub Pey ne mnaab Pey lo Diox: Ne ora mwii Pey lo thebol ne nzhab Pey:

—jTabita, gwache!

Tsa lee ngot mxaal lo, ne or mxaal ngot lo ngot mwii ngot lo Pey, ne mndob ngot. ⁴¹ Ne lee Pey mzhen yaa ngot mtsow ayud ngot mndeli ngot, tsaraa mrez Pey re zha kuu nyelaaz Jesús ne re byud, tsa mwii re zha lee ngot nabban. ⁴² Ne dita yez Jope myath koree ne kwaro zha ngwalaaz Jesús. ⁴³ Ne lee Pey myaan thiban wiz yez Jope liz thib zha le Simún kuu nteguuz yid.

10

Pey ne Kornel

¹ Ne yez Cesarea ngoo thib mbyi kuu le Kornel, kuu nak soldad kuu mnabee lo thib gayoo soldad, partid kuu le Italiana. ² Ne Kornel nak thib mbyi kuu nali kuu thib mloo yek tsow kuu nlaaz Diox kon re lizta Kornel, ne kwaro mtsow Kornel ayud re prob zha Israel, ne thibka naab Kornel lo Diox. ³ Thib wiz teeka las tres, taxal zha kuu ntsaa leettsao ngwani thib mandad chaan Diox lo Kornel kuu mndaab ta ndo Kornel, ne nzhab lo Kornel:

—jKornel!

⁴ Tsa mwii Kornel lo mandad chaan Diox ne mzeb Kornel nzhab Kornel:

—¿Kwaan nlaaza, Zha Nabee?

Tsa lee mandad chaan Diox nzhab lo Kornel:

—Mbina Diox re kuu nzhaba lo Diox, ne ngewii Diox xa ntsowa ayud re prob. ⁵ Btaal chop tson zha yez Jope, tsa yaxii zha Simún kuu noga le Pey. ⁶ Kuu nzo liz Simún kuu nteguuz yid, kuu ndob liz roo nitdoo, lee Pey ne lo'a naa kwan ndoblio tsowa.

⁷ Leettsa lee mandad chaan Diox kuu mndediz lo Kornel ndya, lee Kornel mrez chop zha kuu nke tsii lo Kornel, ne thib soldad zha kuu wlipaay nyelaaz Diox, zha kuu ne Kornel tetsow kuu gab Kornel lo.

⁸ Leettsa ngwalo mndaa Kornel kwent kuu mzhaak Kornel lo re zha, tsa mtaal Kornel re zha yez Jope. ⁹ Ne tedib wiz, leettsa lee re zha ndetsin gaxa yez Jope, teeka ndrol wiz lee Pey mkendab yek yuu, par tediz Pey lo Diox. ¹⁰ Kwathoz mlann Pey ne ngwalaaz Pey gawu Pey, per ora lee men ngetexkwa kuu wu Pey, ne ora cha ngwani thib kwaal lo Pey, ¹¹ ne mwii Pey mzhaal yibaa, ne mloo lo Pey thib kuu naa taxal thib le lar naro kuu ndob bgo re thapta skin, mlato lo Pey. ¹² Ne lo lara nzo relota maa kuu nde kon thap nii, noga re maa kuu ndedoob yu lo yu, ne re maa kuu nlazbi. ¹³ Tsa mbin Pey thib bos kuu nzhab lo Pey:

—Pey, gwateli, beth maa ne dow maa.

¹⁴ Tsa lee Pey mkab ne nzhab:

—Gagte, Zha Nabee; neeka thib welt ter wun maa nambit kuu nzhowt men.

¹⁵ Lee bosa mre mni tedib welt, ne nzhab lo Pey:

—Loka kuu mtembi'a Diox, ndoblot gaba nambite.

¹⁶ Ne tson welt ngwani kona lo Pey, tsaraa lee lar mre ngwaap yibaa tedib welt. ¹⁷ Ne lee Pey kwathoz mtsow xgab naa kwan nak kuu mloo lo Pey, ne oraaka mzin re zha kuu mtaal Kornel roo liz Simún, tak mnaabdiza zha naa pa nak liz Simún. ¹⁸ Ne or mzin re zha, mnaabdiz zha naa chu tyu mbet Simún, kuu noga le Pey. ¹⁹ Ne lee Pey bee ngetsw xgab naa kwan nak kuu mloo lo Pey, ne lee Mbi Nayon nzhab lo Pey:

—Wii lee tson mbyi ngekwaana.
²⁰ Gwateli, bla ne ngwake dits re zha, ne gagt chop xgaba, tak na mtaal zha.

²¹ Tsa mla Pey mzin Pey lo re zha kuu mtaal Kornel, tsa nzhab Pey lo re zha:

—Na nak zha kuu nkwaan goo, ¿chebee ndyaad goo?

²² Ne lee re zha mkab, ne nzhab:

—Nee ndyaad kwent chaan soldad Kornel, kuu nabee lo thib gayoo soldad. Lee Kornel nak thib mbyi nali, ne nzhon Kornel diiz lo Diox ne reta zha Israel ndediz wen zha Kornel. Ne thib mandad chaan Diox mni lo Kornel: Kona mtaal Kornel nee ndyaadzii nee lu, tsa ya'a liz Kornel, ne lee Kornel gon re kuu gaba lo Kornel.

²³ Tsa lee Pey nzhab lo re zha:

—Briid goo leen yuu.

Ne tyo myaan re zha yaala, lee tedib wiz ngwa Pey kon re zha, ne noga thiban re zha kuu nyelaaz Jesús ngwa kon Pey.

²⁴ Ne tedib wiza mzin re zha yez Cesarea, ta nak liz Kornel, ne lee Kornel mkaltaa re zha Liz Kornel ne re amig Kornel ne ngebet Kornel tsin Pey. ²⁵ Or mzin Pey liz Kornel, ora mroo Kornel mkayaa Pey ne mtobxub Kornel lo Pey taxal lo Diox. ²⁶ Per lee Pey mtieli Kornel, ne nzhab lo Kornel:

—Gwateli, tak roptalee nak men.

²⁷ Ne ngetediz Pey rop Kornel asta mzin roo pwert yuu, tsa mndaa Pey leen liz Kornel, ne mwii Pey kwaro men mkaltaa tya. ²⁸ Tsa nzhab Pey lo re zha kuu nzi tya:

—Wen ne re goo lee thib zha Israel, ndaat ley chaan nee diiz tsaal nee kon re zha kuu nagt zha Israel, ne neeka ndoblot nee tab nee leen liz zha, per lee Diox mloo'a lon, ndoblot gap'n lo neeka thib men lee zha nambit nak, neeka ndoblot tsow'n xgab went nak zha. ²⁹ Kona ndyal'n leettsa mrez goo na, ne neeka mtot'n neeka thib kuu tsa gayalt'n. Ne lee nal nlaz'n nen naa chebee mrez goo na.

³⁰ Kornel mkab ne nzhab:

—Nda'a tha piz wiz leeka or ree, ndon nzhee liz'n teekalas tres, ngetsow'n ayun ne ngetediz'n lo Diox, ne oraaka ngwani thib mbyi kuu nok thib lar kuu kwathoz nla xni lon. ³¹ Kuu mne lon: "Kornel, mbina Diox re kuu mnaaba lo Diox, ne ngewii Diox naa xa ntoswa ayud re zha prob. ³² Btaal zha ya yez Jope yaxii Simún, kuu noga le Pey, lee Pey nzo liz Simún kuu nteguuz yid kuu ndob liz gax roo nitdoo, lee Pey ne lo'a naa kwan ndoblo tsowa." ³³ Ta mod mtaal'n zha ngwaxii'a. Ne wen mtsowa ndyaada, ne nalar lee Diox ndewii lee retalee nzi nzhee ne nlazaan nee gon nee reta kuu mnabee Diox lo'a ne'a.

Pey mndaa kwent xkiiz Diox liz Kornel

³⁴ Tsa mndelo Pey mni ne nzhab:

—Nalsi nen wlipaal lalka nataak reta men lo Diox. ³⁵ Ne nkayaa Diox re zha kuu wlipaal ntsow kuu nlaaz Diox, tegal zha tedib yez nak zha. ³⁶ Diox mni'a lo re zha raz Israel, nzhaba Diox lo re zha naa xomod wen kwin re zha kon Diox, kwent chaan Jesús, Zha Nabee lo re'aa. ³⁷ Goo mbin xomod mndaa zha kwent chaan Jesús desde yezlyu Galilea ne asta dita yezlyu Judea, leettsa mndelo Juan mndaa kwent lo re men, lee re men ndoblo gakleyy. ³⁸ Ne wen ne goo lee Diox mndaa Mbi Nayon ne yalnabee lo Jesús zha Nazaret, ne Jesús ree mndiy mtsow yalwen ne mtegwe re zha kuu nzo mbi fyer leettsoo, ne reta koree ngok mtsow Jesús, tak lee Diox ndo kon Jesús. ³⁹ Ne nee nak cho mwii reta kuu mtsow Jesús dita yezlyu Judea ne yez Jerusalén. Ne or ngwalo mriid koree, tsaraa mbeth zha Jesús ne mkeer zha Jesús lo kruz. ⁴⁰ Per lee Diox mteroban Jesús leettsa nda'a tson wiz nguth Jesús, ne mndaa Diox diiz ngwani Jesús lo re nee. ⁴¹ Ne ngwanit Jesús lo reta men, sinke beeta lo re nee kuu mteed lo zha ngwani zha, ne nee ngok zha kuu mwii reta kuu mtsow Jesús. Ne re nee ndow ne ngwii kon Jesús, leettsa mroban Jesús xid re zha nguth. ⁴² Lee Jesús mtaal nee tsa taa nee kwent chaan Jesús lo re men, tak Diox mto Jesús, tsa naab Jesús kwent lo re zha kuu naban ne lo re kuu ngutha, leettsa tsin wiza. ⁴³ Ne reta profet kuu mndaa kwent xkiiz Diox lo re men ndala, mndaa'a profet kwent chaan Jesús, leettsa nzhab profet: "Reta zha kuu yelaaz Jesús; tetuyy Diox falt zha'a, tak ngwalaaz zha Jesús".

Re zha kuu nagt zha Israel mkayaa Mbi Nayon

⁴⁴ Bee ngetedizka Pey, lee re men kuu nzi ngeyon kuu nzhab Pey mkayaa Mbi nayon.

⁴⁵ Ne lee re zha Israel kuu nyelaaz Jesucrist kuu ngwake dits Pey, kwaro mzegey leettsoo re zha, tak noga re zha kuu nagt zha Israel mkayaa Mbi Nayon. ⁴⁶ Tak mbin re zha lee re zha'a ndediz tedib net diiz ne nzhoor zha lo Diox. ⁴⁷ Tsa nzhab Pey lo re zha:

—¿Chu nzo men tak ne, gagt gakleyy re zha ree kuu mkayaa'a Mbi Nayon taxal re'aa? ⁴⁸ Tsa mnabee Pey gakleyy re zha'a kon le Jesucrist.

Tsa nzhab re zha lo Pey kwet Pey lo re zha chop tsonta wiz.

11

Pey nzhab naa chebee ngwa Pey liz Kornel

¹ Lee re apóstol kon re zha Judea kuu nyelaaz Jesús, mbin re zha lee re zha kuu nagt zha Israel ngwalaaz xkiiz Diox. ² Ne leettsa mre Pey Jerusalén, tsa lee chop tson re zha

Israel kuu nyelaaz Jesús, re zha kuu bee ntsowka kuu nzhab lo ley, mndelo zha mbyodiz zha kon Pey.³ Ne nzhab re zha lo Pey:
—¿chebee ngwa'a liz zha kuu nagt zha Israel, ne mdowa kon re zha?

⁴ Tsa lee Pey nzhab lo re zha, naa chebee ngwa Pey, ne mndelo Pey nzhab reta kuu ngok. Ne nzhab Pey:

⁵ —Leettsa mndon yez Jope ngetediz'n lo Diox, tsa taxal lo mkaal ngwani thib kwaa lon: Kuu na taxal thib le lar naro kuu naliib re thapta skin kuu ndyaadla lobee, ndyaad asta ta ndon. ⁶ Ne or wen mwiiin naa kwan nzoleen lara, tsa mwiiin re maa nayii, re maa thap nii, re maa kuu ndedoob lo yu ne re maa nlazbi. ⁷ Tsa mbin na thib bos kuu mne lon: "Pey, gwateli, beth maa ne dow maa". ⁸ Ora nzhap'n: "Gagte Zha Nabee, tak neeka thib welt ter wun maa kuu nambit, maa kuu nzhowt men". ⁹ Tsa lee bosa mre mni lon desde lobee tedib welt ne ne lon: "Loka kuu mtembi'a Diox gabta nambite". ¹⁰ Tson welt ngok koree, tsaraa mrey ngwape lobee tedib welt. ¹¹ Ne ora lee tson mbyi mzin roo yuu ta ndon, re zha'a mroo desde Cesarea ne myaad kwaan zha na. ¹² Tsa lee Mbi Nayon ne lon: "Bteke dits zha"; noga mndenon xoop wets, ne reta nee mndaab liz Kornel. ¹³ Ne lee Kornel mndaa kwent lo nee, naa xomod mwii Kornel thib mandad chaan Diox liz Kornel, kuu nzhab lo Kornel: "Btaal zha ya yez Jope yaxii Simún kuu noga le Pey; ¹⁴ lee Pey ne lo'a naa xomod laa'a lo re falta, lu ne reta zha liza". ¹⁵ Ne leettsa mndel mndan kwent lo re zha, tsa mikayaa re zha Mbi Nayon, leeka taxal maykaya releey ner. ¹⁶ Tsa mtelaaz'n xkiiz Jesús, leettsa nzhab zha: "Wlipaa lee Juan mtsowley kon nit, per lee re goo gakleyy kon Mbi Nayon". ¹⁷ Kona nal, os lee Diox mndaa lo re zha'a leeka kuu mndaa Diox lo re'aa, leettsa ngwalaazaa Jesucrist Zha Nabee lo'aa, gagt gap'n went kuu nget-sow Diox.

¹⁸ Or mbin re zha koree, yent raa kwan nzhab zha, neeka mnayiit raa zha, ne mbil re zha lo Diox ne nzhab zha:

—¡Nalsi ne nee noga re zha kuu nagt zha Israel, mloo Diox naa xomod laa zha lo re kuu went kuu ntsow zha, tsa bre zha lo Diox, ne tsow zha gan yalnaban kuu thitanax!

Zha Antioquia ngwalaaz Jesús

¹⁹ Bluz or ngwalo mbeth zha Steb, mndelo re zha mreke zha dits re zha kuu nyelaaz Jesús, tsa lee re zha mzhonn, cho zha ndya yezlyu Fenicia, cho zha ndya yezlyu Chipre ne cho ndya yez Antioquia, tya mndelo re zha mndaa zha kwent Diiz Chul, beeta lo re zha Israel. ²⁰ Per xid re zha'a ngoo chop tson zha Chipre ne zha yez Cirene, leettsa mzin

re zha ree yez Antioquia, tsa noga mndelo zha mndaa zha kwent Diiz Chul chaan Jesús lo re zha kuu nagt zha Israel. ²¹ Ne lee yalney chaan Zha Nabee ndo kon re zha, ne ta mod kwathoz zha mlaa re kuu nyelaaz zha ndala, ne ngwalaaz Jesús Zha Nabee.

²² Or mbin re zha Jerusalén kuu nyelaaz Jesús kona, tsa mtaal zha Bernabé yez Antioquia. ²³ Ne leettsa mzin Bernabé tya, kwathoz naley ngoo leettsou Bernabé mne Bernabé naa xomod ngetso Diox ayud re zha'a, tsa mteni Bernabé re zha, tsa laat zha xkiiz Jesús kuu ngwalaaza zha. ²⁴ Tak lee Bernabé nak thib zha wen, ne kwaro nabee Mbi Nayon chaan Diox leettsou Bernabé, ne wlipaa nyelaaz Bernabé Jesús. Ta mod kwaro men ngwalaaz Jesús. ²⁵ Tsaraa ngwa Bernabé yez Tarso ngwakwaan Saulo, ²⁶ ne leettsa mzal Saulo lo Bernabé, tsa mndeno Bernabé Saulo yez Antioquia, tya mlet rop zha thib liin lo re zha kuu nyelaaz Jesús ne mloo rop zha lo re men. Ne tyá mndelo re men mtob le re zha kuu nyelaaz Jesús "cristian". (Diiz ree nak: "zha kuu ndeke dits Jesús"). ²⁷ Re wiza, chop tson profet mroo Jerusalén ngwa yez Antioquia. ²⁸ Thib re profeta le Agabo ngwateli ne nzhab, kuu nzhab Mbi Nayon:

—Lee win la dita yezlyu'a.

Ne koree ngok, leettsa mnabee rey Claudio. ²⁹ Tsa lee re zha Antioquia kuu nyelaaz Jesús, myaan diiz kaltaa loka kuu takta taa kadta thib zha, tsa tsow zha ayud re zha kuu nyelaaz Jesús kuu nzo yezlyu Judea. ³⁰ Ne tata mtsow re zha Antioquia, tsa mtaal zha Bernabé rop Saulo yataane lo re zha kuu nabee, lo re zha kuu nyelaaz Jesús kuu nzo yezlyu Judea.

12

Mbeth zha Santiag ne mloo zha Pey tsib

¹ Re wiza lee rey Herodes mzen thib chop re zha kuu nyelaaz Jesús, tsa teti rey zha. ² Mnabee Herodes mbeth zha Santiag wets Juan kon espad, ³ ne mwii Herodes wen ngoo leettsou re zha Israel, tak mtsow Herodes kona, tsa mnabee Herodes mzen zha Pey, koree ngok re wiz ani kuu nzhaw zha pan kuu nyoot lebadur. ⁴ Mzen zha Pey ne mloo zha Pey tsib, ne mnabee Herodes thap grup soldad kenap Pey, ne thapga soldad nak thib grup. Mtsow Herodes xgab loo zha Pey lo re men yez or yelo rid ani Paskw. ⁵ Lee Pey nzo tsib, ne kwathoz wen mkenap zha Pey, per lee re zha kuu nyelaaz Jesús thibka ngenaab lo Diox kwent chaan Pey.

Thib mandad chaan Diox mloo Pey tsib

⁶ Leeka yaal kuu yeni yezlyu kuu nak diiz galoo Herodes Pey lo re men yez, lee Pey naxat xtow chop soldad, ne naliib Pey

kon chop kaden, ne lee tedib net soldad ngekenap roo pwert tsib. ⁷ Tsa cha mzin thib mandad chaan Diox lo Pey, ne dita leen tsib mla xni, tsa lee mandad mkwin cho Pey mloo mkaal lo Pey, ne nzhab lo Pey:

—¡Lijer gwache!

Oraaka lee kaden mzhak yaa Pey. ⁸ Tsa nzhab mandad lo Pey:

—Btedoo leeyya, ne bkee labyida nii'a.

Ne tata mtsow Pey, tsa nzhab mandad lo Pey:

—Bdok xabitsa ne bteke dits'n.

⁹ Ne oraaka mndeke Pey dits mandad, ne neeka net Pey naa chu wli o wlit kuu ngetsow mandad, tak mzhaak Pey ngetsaa leettsou Pey. ¹⁰ Mbiid rop zha lo thib grup soldad kuu nkenap, ne tataka mriid zha lo tedib grup, tsaraa mzin Pey roo pwert yiib kuu nke roo kay. Lee pwert ree tubta mzhaal par mroo rop zha. Or ngwalo mriid Pey tedib kay, tsa lee mandad mlaa thita Pey. ¹¹ Tsaraa myeen Pey kuu ngok ne nzhab Pey:

—Nalsi nen lee Diox mtaal mandad Diox par mtelan lo Herodes ne lo re kuu nlaaz re zha Israel tsownon.

¹² Ne or ngwalo myeen Pey kona, ora ndya Pey liz Mari xnaa Juan kuu noga le Mark, ne kwaro men nzi ty a ngenaab lo Diox. ¹³ Ne or mteez Pey roo pwert, tsa mroo thib nzaa kuu le Rode wii naa choy. ¹⁴ Ne or myeen nzaa bos Pey, kwathoz naley ngoo leettsou nzaa, ne mzhonn nzaa ngwalo nzaa diiz lo re zha, lee Pey ndo dits pwert lee. ¹⁵ Ne lee re zha nzhab lo nzaa:

—¡Nzhak bxen yeka!

Per lee nzaa nzhab:

—Wlicheen na kuu nin lo goo.

Lee re zha mkab nzhab:

—Nagte Pey, ser mandad kuu nkenap Peya.

¹⁶ Per lee Pey ngeteetzka roo pwert, ne or mxaal zha roo pwert kwaro mzeb re zha mwii zha lo Pey. ¹⁷ Tsa lee Pey mtsow seny lo re zha, tsa keet raa zha bi ne mndaa Pey kwent naa xomod mloo Zha Nabee Pey tsib. Noga nzhab Pey:

—Guz goo koree lo Santiag ne lo reta wets kuu nyelaaz Jesús, tsaraa mroo Pey ndya tedib ta.

¹⁸ Leettsa ngwani yezlyu, lee re soldad neeka net re soldad naa kwan tsow re soldad xgab, tak net zha naa kwan ngok kon Pey. ¹⁹ Tsa lee Herodes mnaabe kwaan re soldad Pey, per mzalt Pey lo re zha. Ne or ngwalo mnaabdiz rey Herodes lo re soldad, naa kwan ngok kon Pey, tsa mnabee Herodes mbeth zha re soldada. Leettsa ngwalo mriid koree, lee Herodes mroo yezlyu Judea ne ndya ngoo Cesarea.

Herodes nguth

²⁰ Kwathoz mnayii Herodes mne re zha yez Tiro ne re zha yez Sidón, per lee re zha rop yez ree myaan diiz, naa xomod tsow zha gan tediz zha kon Herodes, re zha ree mtsow gan myey kon Blasto, thib zha kuu kwathoz nataak, kuu nke tsin lo rey Herodes, ne por zha'a mnaab zha wen kwin re zha kon Herodes, tak reta yez ta nabee Herodes, tya ndroo re kuu nzhow re zha rop yeza. ²¹ Herodes mto thib wiz, kuu tediz Herodes kon re zha'a, ne wiza mdok Herodes xab Herodes kuu mas wen, ne mindob Herodes lo asi ta nabee Herodes ne mindelo Herodes mni lo re men. ²² Tsa lee re men mindelo nex mrez ne nzhab:

—iLee zha kuu ngeni ree nagt zha men, lee zha nak thib diox!

²³ Ne oraaka lee thib mandad chaan Diox mtsow mlen liz Herodes, ne ndow mbyaat Herodes leettsa nguth Herodes. Tak mlaa Herodes mtsow nataak re men Herodes taxal Diox. ²⁴ Per lee xkiiz Diox ndiyka ngeraats reta ta, ne reta ta masraa ngeyax re zha kuu nyelaaz Jesús. ²⁵ Or lee Bernabé rop Saulo ngwalo mtsow zha kuu nak diiz tsow zha yez Jerusalén, tsa mre rop zha yez Antioquía ne mndeno zha Juan kuu noga le Mark.

13

Bernabé rop Saulo mndelo rtsin

¹ Xith re zha kuu nyelaaz Jesús yez Antioquía, ngoo profet ne maestr kuu ndaa kwent xkiiz Diox. Ne re zha ree nak, Bernabé, Simún kuu ni zha Niger, Lus zha yez Cirene, Manaén kuu thibka mzhen kon rey Herodes kuu mnabee yezlyu Galilea ne Saulo. ² Thib wiz leettsa lee re zha ngetsow ayun ne ngeyol lo Diox.

Tsa lee Mbi Nayon nzhab lo re zha:

—Bli goo Bernabé rop Saulo, tsa tsow zha tsin kuu mrez'n zha tsow zha.

³ Leettsa ngwalo mnaab re zha lo Diox ne mtsow zha ayun, tsa mxoob re zha yaa zha yek Bernabé rop Saulo, tsa tsow Diox ayud rop zha, par tsow zha tsin kuu mrez Diox zha tsow zha. Ne ngwatenet zha rop zha.

Bernabé rop Saulo mndaa kwent xkiiz Diox yezlyu Chipre

⁴ Ne lee Mbi Nayon mtaal Bernabé rop Saulo yez Seleucia, tya ngoo zha leen bark ndya zha par Chipre, thib yezlyu kuu nzi leen nitdoo. ⁵ Or mzin zha thib yez kuu le Salamina kuu nzi yezlyu Chipre, tya mndelo zha mndaa zha kwent xkiiz Diox ta nkaltaa re zha Israel nteed xkiiz Diox, ne noga mndeno zha Juan Mark par tsow ayud zha.

⁶ Mbiid zha dita yezlyu Chipre ne mzin zha yez Pafos, tya mzaal zha thib zha Israel kuu nak wez, kuu le Barjesús, zha ree

nkedi re men, mbez zha lee zha nak profet. ⁷ Ne nyey zha Sergio Paulo thib mbyi kuu kwathoz nalatts, ne Sergio Paulo nabee dita yezlyu Chipre, ne mtaal Sergio Paulo zha mrez Bernabé rop Saulo, tak nlaaz zha gon zha xkiiz Diox. ⁸ Per lee wez Barjesús kuu noga le Elimas diiz gryeg, nlaazt zha yelaaz Sergio Paulo xkiiz Diox. ⁹ Tsa lee Saulo kuu noga le Paba, kuu thitanax nabee Mbi Nayon leettsoo, key mwii lo weza. ¹⁰ Ne nzhab lo weza:

—¡Zhiinn Maxuuy, zha mal, zha nkedi, kuu nlaaz luux kuu wen! ¿Asta pol laa'a teke re men net nali chaan Diox? ¹¹ Kona teti Diozha ne yaana syeg ne gagt raa wii'a xni wiz thib tyemp.

Oraaka mkow lo Elimas ne ngogt raa gawii zha, tsa mkwaan zha cho ten yaa zha par teno zha. ¹² Or mwii zha kuu nabee yezlyu'a koree, tsa ngwalaaz zha yalney chaan Diox, ne kwathoz mzegye leettsoo zha mbin zha xkiiz Jesúus kuu mllo Paba lo zha.

Paba rop Bernabé mzin yezlyu Pisidia

¹³ Or ngwalo mriiid koree, lee re altaa Paba ngoo bark yez Pafos ne ngwa zha yez Perge kuu nzi yezlyu Panfilia. Tya mlaa Juan Mark rop zha, tsa mre Juan Mark Jerusalén. ¹⁴ Paba rop Bernabé mroo yez Perge ndya mzin yez Antioquía kuu nzi yezlyu Pisidia. Ne leettsa ngok wiz sabd ngwa zha ta nkaltaa re zha Israel nteed xkiiz Diox, ne mndob zha ty. ¹⁵ Leettsa ngwalo mlaab zha yeets kuu mkee Moisés ne kuu mkee re profet, tsa lee re zha kuu nabee ta nkaltaa re zha Israel, mtaal zha, zha nzhab lo rop zha:

—Wets, ¿os nlaaz goo ne goo thib diiz lo nee, tsa koney goo leettsoo re nee kuu nyelaaz Diox? ¡Ne gooy nalor!

¹⁶ Tsa lee Paba ngwateli, ne kon yaa zha mtsow zha seny tsa keet re zha bi, ne nzhab zha:

—Zha Israel kenza goo koree, ne noga re goo zha tedib yez kuu nzhon diiz lo Diox. ¹⁷ Lee Diox re'aa, mli re teyaa zha ndala ne mtsow Diox ngok re zha thib yez naro, leettsa bee nzo re zha yez Egipto taxal zha tedib yez, ne bluz kon yalney chaan Diox, mllo Diox re zha yezlyu'a. ¹⁸ Ne mkez leettsoo Diox mne Diox re zha chop gal liin, leettsa mndiy re zha yubiz, ¹⁹ ne mluuux Diox gaz nación kuu nzo yezlyu Canaán, ne mndaa Diox yezlyu'a lo re teyaa zha ndala. ²⁰ Re koree ngok thap gayoo chop galbtsii liin. Tsaraa mli Diox re jwez kuu mnabee lo re teyaa zha ndala, ne profet Samuel ngok jwez bluz lo re zha. ²¹ Bluz mnaab re zha thib rey kuu nabee lo re zha, tsa lee Diox mli Saúl xgann Cis, zha nak zha raz Benjamín ne chop gal liin ngok Saúl rey. ²² Leettsa mkiib Diox rey Saúl lo re zha, tsa mli Diox David ngok rey lo re zha, ne nzhab Diox:

“Mwii'a na lee David xgann Isaí nak thib zha kuu nlaa leettsoon, ne tetsow zha kuu nlaz'n”. ²³ Ne leeka lo raz David myaad Jesúus, Zha Kuu Mtaal Diox Nabee, par telaa re men Israel lo yalguth, taxal nzhab Diox. ²⁴ Leettsa bee ter yaad Jesúus, Juan nzhab lo re zha Israel ndoblo laa zha re kuu went ne ndoblo gakleyy zha. ²⁵ Ne or mera luux Juan rtsin Juan, nzhab Juan: “¿Nagt'n zha kuu ntswoo goo xgab? Per ndyaada zha kuu mas nataak nake na, zha kuu neeka ndoblot'n kib'in labyid nii”.

²⁶ Wets'n retalee kuu nak zha raz Abraham, ne re goo zha tedib yez kuu wlipaan nzhon diiz lo Diox; lee diiz kuu ndaa yalnaban ree nak par retalee. ²⁷ Tak lee re zha Jerusalén ne re zha kuu nabee lo re zha, mndaat zha yek zha gagon zha diiz lo Jesúus, neeka myent zha kuu mbez lo xkiiz Diox kuu mkeez re profet, kuu nlab zha ta nkaltaa re zha nteed zha xkiiz Diox reta wiz kuu ndroxkwani zha. Kona mbeth zha Jesúus, ne tabaa ngok re kuu nke lo xkeets Diox. ²⁸ Ne tegal mzalt zha neeka thib kuu keki zha Jesúus, par tak kuth zha Jesúus, per lee re zha nzhab lo Pilat “¡Beth Jesúus!” ²⁹ Bluz or ngwalo mtsowno zha Jesúus reta kuu ndaa xkiiz Diox kwent rid Jesúus, tsa mla zha Jesúus lo kruz ne mkaats zha Jesúus. ³⁰ ¡Per lee Diox mteroban Jesúus! ³¹ Ne tyen wiz ngwani Jesúus lo re zha kuu ngwa kon lee Jesúus, leettsa mroo Jesúus yezlyu Galilea ne ngwa Jesúus Jerusalén. Ne nal lee re zha ree nak zha kuu ndaa kwent chaan Jesúus lo re men.

³² Ne lee nal lee re nee ndaa kwent chaan Diiz Chul chaan Jesúus lo re goo, kuu nzhab Diox tsow Diox lo re teyaa zha ndala. ³³ Lee Diox mtsow koree lo'aa, zha kuu nak raz re zha'a, koree mtsow Diox leettsa mteroban Diox Jesúus, taxal nke lo salm chop ta nzhab: “Lu nak xgann na, ne na mnda yalnaban lo'a naltserere”. [Sal. 2:7] ³⁴ Diox nzhaba lee Diox teroban Jesúus, tsa yetsaat kwerp Jesúus; taxal nzhab xkiiz Diox ta nzhab: “Tetsow'n lo re goo reta kuu nali ne wli kuu nzhap'n lo David tsow'n”. [Is. 55:3] ³⁵ Noga tata nzhab tedib salm: “Ne'a lu taata diiz yet-saa kwerp mosa kuu nayon”. [Sal. 16:10] ³⁶ Lee kuu mbez salm ree nagt par David, leettsa ngwalo mnabee David lo re men taxal nzhab Diox lo David leettsa mban David, bluz nguth David ne mkaats zha David, ta mkaats zha re tey David ne lee kwerp David ngwatsaa. ³⁷ Per lee kwerp Jesúus mteroban Diox ne mluxte.

³⁸ Kona reta goo wets'n, ndoblo ne goo lee Jesúus tak tuyy reta falt goo, taxal ndaa nee kwent lo re goo, ³⁹ tsa reta zha kuu yelaaz Jesúus tuyy Jesúus re falt zha. Re kuu ngogt ley chaan Moisés gatuuy. ⁴⁰ Kona kenap goo goo, tsa diinnt goo re kuu mkeez re profet: ⁴¹ Wii goo, re goo kuu nzhizno re kuu wli,

wlipaa tetsegey leettsoo goo naa xa luux'n
goo,
tak lee re wiz kuu naban goo tsow'n thib
kuu kwathoz naro,
thib kuu yelaazt goo tegal taa zha kwente lo
goo. [Hab. 1:5]

⁴² Or mroo re altaa Paba ta nkaltaa re zha Israel nteed xkiiz Diox, tsa lee re zha kuu nagt zha Israel nzhablo Paba, tsa yaad Paba tedib wiz sabd, tsa looka Paba re diza lo re zha. ⁴³ Or ngwalo mraats re men ta nkaltaa re zha nteed zha xkiiz Diox, tsa kwaro zha Israel, ne re zha kuu ngok zha Israel, re zha kuu thib mloo yek tsow kuu nlaaz Diox, mndele zha dits Paba rop Bernabé. Lee rop zha mteni re zha'a, tsa nali to re zha lo yalwen chaan Diox, tak nke leettsoo re zha Diox.

⁴⁴ Ne lee tedib sman wiz sabd, mer dita zha yez mkaltaa mbin xkiiz Zha Nabee.

⁴⁵ Per lee re zha Israel ngok celos zha. Or mwii zha kwaro men mkaltaa ty, tsa mndelo zha mlooza zha Paba, ne mbez zha wlit kuu mbez Paba. ⁴⁶ Tsa lee Paba rop Bernabé ngoo ney leettsoo mkab lo re zha, ne mzebt Paba nzhab Paba:

—Ndoblo nee, taa nee kwent xkiiz Diox ner lo re goo zha Israel, per lee re goo nlaazt goo kayaa gooy, ne leeka goo ndak goo ndoblot goo kayaa goo yalnaban kuu thitanax, ta mod lee nee nda taa kwente lo re zha kuu nagt zha Israel. ⁴⁷ Tak tabaa mnabee Diox lo nee, taxal nke lo xkeets Diox ta nzhab:

Mton lu tsa gaka taxal xnlo re zha kuu nagt zha Israel,
tsa yataa'a kwent naa xomod laa re zha lo re
falt zha,
asta lo re zha kuu nzo ta mas titl lo yezlyu.
[Is. 49:6]

⁴⁸ Or lee re zha kuu nagt zha Israel mbin koree, kwathoz naley ngoo leettsoo zha, ne mndaa zha texkix lo Diox por xkiiz Diox kuu mbin zha, ne reta zha kuu naka diiz kayaa yalnaban kuu thitanax ngwalaaz Jesús. ⁴⁹ Ne lee xkiiz Zha Nabee mraats dita yezlyu'a. ⁵⁰ Per lee re zha Israel mtekiil chop tson ngot kuu nataak ne chop tson mbyi kuu nataak yez, tsa reke re zha dits Paba rop Bernabé, tsa koo zha rop zha yezlyu'a. ⁵¹ Tsa lee rop zha ree mtsib yuyaaz kuu mke nii zha, tak kona nak thib seny kuu nloo lee re zha'a ntsowt kuu nlaaz Diox, ora ndya rop zha yez Iconio. ⁵² Per lee re zha kuu ngwalaaz Jesús ty, kwaro naley ngoo leettsoo re zha ne kwaro mnabee Mbi Nayon leettsoo re zha.

14

¹ Leettsa mzin Paba rop Bernabé yez Ico-nio, tsa mndaab rop zha ta nkaltaa re zha Israel nteed xkiiz Diox, mndaa zha kwent Diiz Chul chaan Jesús ne kwaro zha Israel ne zha kuu nagt zha Israel ngwalaaz Jesús.

² Per lee re zha Israel kuu ngwalaazt Jesús, mndelo zha mtekiil zha re zha kuu nagt zha Israel, tsa tsow re zha ree xgab went nak re zha kuu nyelaazt Jesús. ³ Ne tegal tatay lee Paba rop Bernabé myaan ty a tyen wiz, ne mzebt zha mndaa zha kwent Diiz Chul chaan Jesús, ne ngwalaaz zha lee Zha Nabee tsow ayud zha. Kona lee Zha Nabee mndaa diiz mtsow zha re kuu thoz, re kuu mloo wli ne kuu mloo zha, ne kuu mndaa zha kwent chaan yalnkelaaaz chaan Diox.

⁴ Per lee re zha yeza ngok chop net zha, thib net zha ngoo fabor re zha Israel lee tedib net zha ngoo fabor rop apóstl. ⁵ Per lee re zha Israel kon re zha kuu nagt zha Israel myaan zha diiz kon re zha kuu nak tsiin, tsa tsalzhoo zha rop apóstl ne kee zha ke yek rop apóstl. ⁶ Per or mbin Paba rop Bernabé kona, tsa mzhonn rop zha ndya zha yez Listra ne yez Derbe rop yez kuu nzi yezlyu Licaonia, ne noga ngwa zha reta yez kuu nzi ty, ⁷ ngwa zha ngwataa zha kwent Diiz Chul chaan Jesús.

Mkee zha keyek Pabayez Listra

⁸ Yez Listra ngoo thib mbyi kuu gagt te, neeka thib welt mndet zha, tak tata'a mthans zha ngol zha. Lee mbyi ree ndob, ⁹ ngeyon re kuu ngeni Paba. Ne lee Paba mwii lo zha, tsa myeen Paba thib mloo zha leettsoo zha lee Diox tegwe zha. ¹⁰ Tsa nex nzhab Paba lo zha:

—iGwateli!

Ne lee mbyi'a ngwateli, mkee zha brink ne mndelo zha mnnde zha. ¹¹ Or lee reta men mne kuu mtsow Paba, tsa mndelo re zha mnnded zha mer xkiiz zha ne nzhab zha:

—iRe diox kuu na taxal men ndyaad lo'aa!

¹² Tsa nzhab re zha lee Bernabé nak diox Zeus, lee Paba nak diox Hermes, tak Paba nak zha kuu ni lo re zha. ¹³ Ne roo yeza ndob gwodoo chaan Zeus, tsa lee ngwleyy gwodoo'a kon re men mbe yee ne chop tson ngnon par kuth zha lo rop apóstl, taxal ntsow zhay lo re diox zha. ¹⁴ Per or mne Paba rop Bernabé kona, mchat zha xab zha ne lijer mndaa zha xid re mena, ne mrez zha ne nzhab zha:

¹⁵ —iKenza goo! ¿Chebee ntsow goo koree? Taben goo nak nee, lee nee ndyaadtaa kwent lo goo, tsa laa goo re kuu nataagt kuu ntsow goo. Tsa yelaaz goo Diox kuu naban, Diox kuu mdexkwaa lobee, yezlyu, nitdo ne reta kuu nzo leen re kona. ¹⁶ Re wiz ndala mlaa Diox mban re men taxal nlaaz re men, ¹⁷ ne tegal tatay mlaat Diox re men, thibka mloo Diox lo re men naa cho nak Diox, por

re kuu wen kuu ntsow Diox, tak lee Diox ntela yi tsa nzhab yalgonn goo, ne tabaa ndaa Diox reta kuu ndeche'aa, tsa naley nzo leettsoo'aa.

¹⁸ Per tegal tata nzhab Paba rop Bernabé, penta mtsow zha gan tsa mbeth re mena ngon gataa lo rop zha, taxal ndaa zhay lo re diox zha.

¹⁹ Tsa mzin chop tson zha Israel kuu nzo Antioquía ne Iconio, re zha ree mtekiil re zha yez Listra, tsa mkeez zha ke yek Paba, ne mnda leettsoo re zha mbetha zha Paba, tsa mdobyu zha Paba ne mloo zha Paba roo yez. ²⁰ Per or lee re zha kuu nyelaaz Diox mkaltaa dita welt lo Paba, ora ngwache Paba ne mre Paba mndaa yez tedib welt. Ne tedib wiza mroo rop zha Bernabé ndya zha yez Derbe. ²¹ Bluz or ngwalo mndaa zha kwent Diiz Chul chaan Jesús yeza, ne mtsow zha gan kwathoz men ngwalaaz Jesús, tsaraa mretab zha yez Listra, Iconio ne Antioquía. ²² Lee Paba rop Bernabé mloney leettsoo re zha kuu nyelaaz Jesús kuu nzo re yeza, tsa ney to re zha ne gagt chop xgab zha lo xkiiz Diox, ne nzhab zha lo re zha: "Os lee'aa nlaaza tabaa ta nabee Diox, ndoblo ridaan kwaro yalti". ²³ Noga kadta re gwodoo'a mli zha zha gol xid re zha kuu nyelaaz Jesús, tsa nabee zha lo re zha kuu nyelaaz Jesús re yeza. Tsa mtsow re zha ayun ne mnaab zha lo Diox tsa kenap Diox re zha gola.

Paba rop Bernabé mre yez Antioquía kuu nzi yezlyu Siria

²⁴ Leettsa mriid Paba rop Bernabé yezlyu Pisidia, mzin zha yezlyu Panfilia. ²⁵ Tsa mndaa zha kwent chaan Jesús yez Perge, tsaraa ngwa zha yez Atalia, ²⁶ tya ngoo zha bark ndya zha Antioquía. Ta nak ta mndaa re zha kuu nyelaaz Jesús rop zha lazya Diox, tsa tsow Diox ayud zha taa zha kwent chaan Jesús, ne kona nak kuu ngwalo mtsow zha. ²⁷ Or mzin zha Antioquía, mkaltaa zha re zha kuu nyelaaz Jesús tya, ne mndaa zha kwent re kuu mtsow Diox kon rop zha. Ne nzhab zha naa xomod mtsow Diox, tsa noga re zha kuu nagt zha Israel ngwalaaz Jesús. ²⁸ Ne myaan rop zha tya plo tyemp lo re zha kuu nyelaaz Jesús.

15

Junt kuu ngoo zha yez Jerusalén

¹ Re wiza, thiban zha kuu mroo yezlyu Judea mzin yez Antioquía, lee re zha ree mndelo mloo lo re zha kuu nyelaaz Jesús, ne nzhab zha:

—Yent mod laa goo lo re falt goo, os lee goo ket goo seny chaan re zha Israel, taxal nzhab lo ley chaan Moisés.

² Tsa lee Paba rop Bernabé mbyodiz kon re zha'a, ne bluz lee re zha kuu nyelaaz

Jesús mli Paba rop Bernabé, ne techop tson zha tsa ya re zha yez Jerusalén, tsa tediz zha kwent ree kon re apóstl ne kon re zha gol zha gwodoo naro.

³ Ne lee re zha kuu nyelaaz Jesús kuu nzo yez Antioquía, ngwatenet zha Paba rop Bernabé, ne leettsa nderid zha yezlyu Fenicia ne yezlyu Samaria, mndaa zha kwent naa xomod lee re zha kuu nagt zha Israel, mlaa' zha re creens zha ne ngwalaaz zha Diox. Ne kwathoz naley ngoo leettsoo re zha kuu nyelaaz Jesús mbin zha koree.

⁴ Leettsa mzin Paba rop Bernabé Jerusalén, tsa lee re zha kuu nyelaaz Jesús, re apóstl ne re zha gol mkayaa zha zha. Tsa mndaa rop zha kwent reta kuu mtsow Diox kon lee zha. ⁵ Per chop tson re fariseo kuu ngwalaaza Jesús ngwateli ne nzhab:

—Ndoblo gabaa lo re zha kuu nagt zha Israel, ndoblo ke zha seny chaan re'aa zha Israel, ne noga gabaa lo zha ndoblo gon zha diiz kuu nabee lo ley chaan Moisés.

⁶ Tsa mkaltaa re zha kon re apóstl ne kon re zha gol, tsa tediz re zha kwent ree. ⁷ Bluz or kwathozha mndediz zha, tsa lee Pey ngwateli ne nzhab:

—Wets wen ne goo, nda wiza, Diox mlin tsa tan kwent Diiz Chul chaan Jesús lo re zha kuu nagt zha Israel, tsa noga re zha yelaaz Jesús. ⁸ Ne Diox kuu nlebee leettsoo reta men, mloo Diox lee Diox mkayaa zha, ne mndaa Diox Mbi Nayon lo re zha, taxalka mndaa Diozhe lo'aa. ⁹ Ne leeka taxal mtsow Diox kuu wen lo re'aa, tataka mtsow Diox lo re zha'a, tak leeka taxal mtembi Diox leettsoo'aa, tataka mtembi Diox leettsoo re zha'a, tak ngwalaaz zha Diox. ¹⁰ Ne lee nal; ḷcheba thib lad nlaa goo kuu mtsow Diox, ne nlaaz goo tsow re zha kuu nyelaaz Jesús kuu mbez lo ley, thib kuu neeka re'aa ne neeka re teyaa ngogt gatsow? ¹¹ Ne ne'a lee mlaa' lee lo re faltaa, por yalwen chaan Jesucrist Zha Nabee, tataga mlaa' re zha'a tak nyelaaz re zha Jesús.

¹² Tsa mtow roo re zha ne mkenza zha, or lee Paba rop Bernabé mndaa kwent re milagr kuu mtsow rop zha por yalney chaan Diox lo re zha kuu nagt zha Israel.

¹³ Or ngwalo mni rop zha, tsa noga Santig nzhab:

—Wets, re goo kuu nyelaaz Jesús kenza goo kuu nin: ¹⁴ Simún Pey mndaa'a kwent lo re'aa ner, naa xomod mndelo Diox mli Diox re zha kuu nagt zha Israel, tsa gak zha zha Diox. ¹⁵ Reta koree ngok taxal nzhab re profet kuu ngoo ndala lo xkeets Diox ta mbez:

¹⁶ Bluz or ngwalo'a ngok re koree, tsa bren texkwaan liz David kuu mlux.

Bren tan kuu myaan ne xit nay tedib welt,
¹⁷ tsa lee tedib net re men kwaan Zha Nabee,

ne no re zha kuu nagt zha Israel kuu nlebee'a na.

¹⁸Tata ne Zha Nabee, Diox kuu mtsow mne re zha ndala koree. [Amós 9:11-12]

¹⁹'Kona lee na ni: Ndoblot tsowaa fwers re zha kuu nagt zha Israel gon zha diiz kuu mbez lo ley, re zha kuu mlaa'a re costumre ne ngwalaaz Diox. ²⁰Mas wen taalaa thib yeets lo re zha, tsa wut zha re kuu ntsib re men lo re dioz kuu nagt Diox, gagt rop zha kon ndota zha, wut zha beel re maa kuu nxot ren ne neeka ren ndoblot wu zha. ²¹Tata kee'aa lo re zha, tak reta yez nzo re zha kuu ndaa kwent ley desde ndala, ne nlab zha ley ta nkaltaa re tawlazaaz zha Israel nteed xkiiz Diox, wiz kuu ndroxkwanaa.

Yeets kuu mtaal zha lo re zha kuu nagt zha Israel

²²Tsa lee re apóstol ne re zha gol, kon reta zha kuu nyelaaz Jesús, myaan re zha diiz kwii zha chop tson zha kuu taal zha ya yez Antioquía kon Paba rop Bernabé. Tsa mli zha Judas kuu noga lee Barsabás ne Silas, rop zha ree nak zha kuu nataak xid re zha kuu nyelaaz Jesús, ²³ne lo re zha ree mtaal zha yeets kuu tenzhhee nzhab:

"Re nee kuu nak apóstol ne re nee kuu nak zha gol kon reta zha kuu nyelaaz Jesús. Tsan reta goo wets ne btan, kuu nagt zha Israel kuu nyelaaz Jesús kuu nzo yez Antioquía, ne reta goo kuu nzo yezlyu Siria ne Cilicia. ²⁴Mbin nee lee chop tson tawlawz nee ngwa lo re goo ne ntegan zha goo, tsa nzhak chop xgab goo, ne ne zha lo goo ndoblo goo ke goo seny chaan nee zha Israel, ne gon goo diiz kuu mbez lo ley, per leet nee mtaal zha. ²⁵Kona mtsow nee xgab kwenta ne myaan re nee diiz mli nee chop tson zha, par taal nee lo re goo kon Bernabé ne Paba rop zha kuu kwathoz nke leetsoo nee. ²⁶Rop zha ree mndaa zha yalnaban chaan par rid zha yalti kwent Diiz Chul chaan Jesús. ²⁷Ne kom rop zha mtaal nee Judas ne Silas, rop zha ree ne lo goo kuu myaan nee diiz nzhee. ²⁸Tak lee Mbi Nayon ne lo nee, ndoblot raa ne nee lo goo gon goo diiz kwan raa, beeta re koree ndoblo tsow goo: ²⁹Wut goo re beel kuu ndaa re men lo re dioz kuu nagt Diox, neeka wut goo ren neeka re beel maa kuu nxot ren, ne ndoblot gak rop goo kon ndota zha. Os lee re goo ntsow goo re koree, wen ngetsow goo."

³⁰Ne tata lee re zha kuu mtaal zha nda yez Antioquía, mkaltaa zha re zha kuu nyelaaz Jesús, ne mndaa zha yeetsa lo re zha. ³¹Or mlab re zha yeetsa, kwathoz naley ngoo leetsoo re zha, tak kwaro mtetsey re diza leetsoo zha. ³²Ne kom noga Judas rop Silas nak profet, kwaro mtetsey zha ne mloney rop zha ree leetsoo re zha kuu nyelaaz

Jesús ty. ³³Leettsa mzin yez wiz ndo Judas rop Silas ty, tsaraa lee re zha kuu nyelaaz Jesús mtaal zha rop zha, ne nzhab zha lo rop zha "Wen ndya goo", tsa bre rop zha Jerusalén lo re zha kuu mtaal zha. ³⁴Per lee Silas mtsow xgab mas wen yaanka zha ty. ³⁵Paba rop Bernabé myaan yez Antioquía, ne lo tyen zha yeza mloo rop zha ne mndaa zha kwent Diiz Chul chaan Jesús.

Paba rop Bernabé mtsos

³⁶Telut bluz lee Paba nzhab lo Bernabé: —Ndatwii'aa lo re zha kuu nyelaaz Jesús, reta yez ta mndaa'a lee kwent xkiiz Diox, tsa naa xa nzi re zha.

³⁷Bernabé ngwalaaz gateno Juan kuu noga le Mark, ³⁸per lee Paba mzhalyt gateno Juan, tak mlaa Juan Paba rop Bernabé yezlyu Panfilia ne mndeketa raa Juan dits rop zha gataa zha kwent xkiiz Diox.

³⁹Koree mtsow mbyodiz rop zha, ne asta mtsos rop zha; tsa lee Bernabé mndeno Juan Mark, ngoo leen bark nda par Chipre yezlyu kuu nzi leen nit. ⁴⁰Lee Paba mli Silas, tsa lee re zha kuu nyelaaz Jesús mlaa zha Paba lazya Diox, tsa tsow Diox ayud rop zha, ne mroo rop zha yez Antioquia. ⁴¹Ne ngwa zha Siria ne Cilicia ne nzhab zha lo re zha kuu nyelaaz Jesús ty, tsa ney to re zha lo kuu ngwalaaz zha.

16

Tim mreke dits Paba rop Silas

¹Paba rop Silas mzin yez Derbe ne yez Listra, tya mlebee zha thib zha kuu nyelaaz Jesús kuu le Tim, xgann thib ngot Israel kuu nyelaaz Jesús, per lee xut zha nak zha gryeg.

²Lee re zha kuu nyelaaz Jesús yez Listra ne re zha yez Iconio wen ndediz zha Tim. ³Tsa lee Paba nzhab teno Tim, per ner mkee Paba seny re zha Israel Tim, por re zha Israel, tak reta zha ne lee xut Tim nak zha gryeg.

⁴Reta yez ta mriid zha nzhab zha lo re zha kuu nyelaaz Jesús, tsa tsow re zha re kuu nzhab re apóstol kon re zha gol zha Jerusalén.

⁵Tsa lee re zha kuu nyelaaz Jesús masraa ney mndo zha lo kuu nyelaaz zha, ne wiz kon wiz ndiy ngok mas ploraaz zha.

Taxal lo mkaal ngwani thib mbyi zha yez Macedonia lo Paba

⁶Tsa lee re altaa Paba mriidabta yezlyu Frigia ne yezlyu Galacia, tak lee Mbi Nayon mzhalyt gataa zha kwent xkiiz Diox Asia, ⁷ne mzin zha yezlyu Misia. Tsa mtsow zha xgab ya zha yezlyu Bitinia, per mzhalytga Mbi Nayon gaga zha. ⁸Ne leettsa mriidabta zha Misia, tsa mzin zha yez Troas, tya mla zha leen bark. ⁹Ne yaala taxal lo mkaal ngwani thib zha yezlyu Macedonia lo Paba, thib zha kuu ndeli nzhab lo Paba: "Bzhyal de Macedonia tsa tsowa ayud nee".

¹⁰Or mzhaak Paba kona, oraaka lee re nee

mdexkwaa, tsa ndya nee yezlyu Macedonia, tak myeen nee lee Diox ngebez nee, tsa taa nee kwent Diiz Chul tyaa.

Paba rop Silas mzin yez Filipos

¹¹ Ngoo nee leen bark yez Troas ne ngwa nee nali par Samotracia yezlyu kuu nzi leen nit, ne lee tedib wiz mzin nee yez Neápolis. ¹² Ne tyaa mroo nee ngwa nee yez Filipos, kuu nak yez kuu mas nataak, kuu nzi ta ndelo yezlyu Macedonia ne Roma nabee yeza. Tyaa mlet nee chop tsonta wiz. ¹³ Thib wiz kuu ndroxkwan re zha Israel, mroo nee yez ne ngwa nee thib roo yoo, ta nea nee nkaltaa re zha Israel naab lo Diox, ne mindob nee mndaa nee kwent xkiiz Diox lo re ngot kuu mkalataa tyaa. ¹⁴ Ne xid re ngota ngoo thib ngot kuu le Lidia zha yez Tiatira, thib ngot kuu ntho lar morad kuu kwathoz wen, thibka nzhoolee ngot lo Diox, ne ngeyon ngot kuu mbeez Paba per Diox mtsow mzaala leettsou ngot, tsa kenza ngot kuu ngeni Paba. ¹⁵ Tsa ngokleyy re lizta ngot, ne mne ngot lo nee:

—Os lee goo wli nyelaaz goo lee na nyelaaz Jesúz, de goo tsa kwt goo liz'n.

Ne mtsow ngot fwers lo nee par myaan nee liz ngot.

Paba mtegwe thib nzaa kuu nzo mbi fyer leettsou

¹⁶ Thib wiz Leettsa nda nee ta nkaltaa re zha Israel nteed xkiiz Diox, tsa mzaal nee thib nzaa kuu nzo mbi fyer leettsou, ne kon yalanabee chaan mbi fyer mtsow nzaa divin, ne kwathoz ntsow re patron nzaa gan temi por yaldivina. ¹⁷ Lee nzaa ree mndeke dits re nee Paba ne mbetsyath nzaa mbezz nzaa: —¡Lee re mbyi ree nak zha kuu nke tsiin lo Diox kuu ndob yibaa, ne ndaa zha kwent lo re goo naa xomod laa goo lo re falt goo!

¹⁸ Tyen wiz tata mtsow nzaa, asta leettsa mkezhyan Paba, tsa lee Paba mre ne nzhab lo mbi fyera:

—Kon yalanabee chaan Jesucrist nabeen lo'a, broo leettsou nzaa ree.

Ne oraaka lee mbi fyer mroo leettsou nzaa.

¹⁹ Per leettsa myeen re patron nzaa, gagt raa tsow re zha gan temi kon nzaa'a, tsa mzhem zha Paba rop Silas ne mndeno zha rop zha yuulow lo re zha nak tsiin. ²⁰ Leettsa ngwalo mndaa zha rop zha lo zha kuu nak tsiin, tsa nzhab re zha:

—Re zha Israel ree ngetsee xgab re tawlaaza. ²¹ Ne nloo zha tedib net re ley ykuu ndoblot kayaa'aa ne neeka ndoblot tsowaa, tak zha Roma nakaa.

²² Tsa lee re men mnayii mne Paba rop Silas, oraaka lee re zha kuu nak tsiin mnabee, koche zha xab rop zha, tsa kin zha rop zha kon bar. ²³ Bluz or ngwalo kwathoza mdin zha rop zha, tsaraa mlo

zha zha tsib, ne mnabee zha lo re zha kuu nkenap roo tsib, tsa wen wen kenap zha rop zha. ²⁴ Or tata mbin zha kuu nkenap roo tsib, tsa mlo zha Paba rop Silas ta mas naats leen tsib, ne key mlo zha nii rop zha leen thib le ya nachaa.

²⁵ Per ngulal yaal lee Paba rop Silas mnaab ne mbil lo Diox, ne mbin re zha kuu nzo tsib kuu nzhoolee mwin kuu thitanax mtsib asta simyent tsib. Ne leeka ora mzaala reta pwert chaan tsib ne noga mzhak reta kaden kuu naliib re zha kuu nzo tsib. ²⁷ Leettsa mroo mkaal lo zha kuu nkenap roo tsib, mwii zha lee re pwert tsib ndezhaal, oraaka mlo zha espad zha, tsa kuth zha leeka lee zha, tak mtsow zha xgab lee re zha kuu nzo tsib mzhonna. ²⁸ Per lee Paba mrez ne nzhab lo zha:

—¡Kutha lu, reta nee nzika nzhee!

²⁹ Tsa lee zha kuu nkenap roo tsib mnaab xni, ne mzhonna zha mndaab zha leen tsib, ne lo tseba mtobxub zha lo Paba rop Silas. ³⁰ Tsa mlo zha rop zha tyaa ne mnaabdiz zha lo rop zha:

—Ne goo lon, ¿nnaa kwan ndoblo tsow'n, tsa tsow Diox laan gabil ne tsow'n gan yanaban kuu thitanax?

³¹ Lee rop zha mkaab, ne nzhab:

—Gwalaaz Jesúz Zha Nabee, tsa tuyy Diox re faltta ne falt re zha kuu nzo liza.

³² Ne mndaa zha kwent xkiiz Diox lo zha ne lo reta zha kuu nzo liz zha. ³³ Leeka yaala lee zha kuu nkenap roo tsib, mteech re grid Paba rop Silas kuu mdin zha zha, tsaraa ngokleyy re lizta zha. ³⁴ Ne mndeno zha rop zha ree liz zha ne mndaa zha kuu ndow zha, ne naley ngoo leettsou re lizta zha, tak ngwalaaz re zha Diox.

³⁵ Or ngwani yezlyu lee re zha kuu nak tsiin, mtaal chop tson soldad ngwayab lo zha kuu nkenap roo tsib, tsa telaa zha Paba rop Silas. ³⁶ Tsa lee zha kuu nkenap roo tsib nzhab lo Paba:

—Lee re zha nak tsiin mnabee telaan goo; taka roo goo ne yat leettsou goo ne wen tyaa goo.

³⁷ Per lee Paba nzhab lo re soldada:

—¡Nee nak zha Roma! Ne ndewii re men yez mdin zha nee, ne neeka mnaab zha kwent lo nee naa chu nap nee falt o napt neey, ne mlo zha nee tsib. Ne lee nal, ¿chebee nlaza zha telaa zha nee xlaanta? ¡Rebeete! Ndoblo lee zha yaad koo nee.

³⁸ Tsa lee re soldad ngwayab re koree lo re zha kuu nak tsiin, ne or mbin re zha lee rop zha nak zha Roma, kwathoz mzeb re zha.

³⁹ Tsa lee re zha kuu nak tsiin ngwanaab Perdon lo Paba rop Silas, ne mlo zha rop zha ne nzhab zha lo rop zha, tsa roo zha yeza. ⁴⁰ Or mroo rop zha tsib ngwa zha liz

Lidia, ne mloney zha leetsoo re zha kuu nyelaaz Jesús, tsaraa mroo zha yeza.

17

Kwathoz mnayii re zha yez Tesalónica

¹ Tsa nda Paba rop Silas ne mriid zha yez Anfípolis ne yez Apolonia, tsaraa mzin zha yez Tesalónica, ta nap re zha Israel thib ta nkaltaa zha nteed zha xkiiz Diox. ² Lee costumr Paba nak, nya Paba ta nkaltaa re zha nteed zha xkiiz Diox, ne tson wiz kuu ndroxkwani re zha Israel, ngwa Paba mnndaak kwent xkiiz Diox lo re zha. ³ Ne or mnndaab Paba kwent mloo Paba lo re men kon xkiiz Diox ta mbez: Lee Crist Kuu Mtaal Diox Nabee mbriid yalti, ne leettsa nguth zha, mroban zha xid re zha nguth. Tsa nzhab Paba lo re zha:

—Leeka Jesús kuu ngeten kwent lo re goo nak Crist Kuu Mtaal Diox Nabee.

⁴ Tsa lee chop tson re zha Israel kuu ngwalaaz Jesús, thibka ngok zha kon Paba rop Silas, noga tyen zha gryeg kuu ntosow kuu nzhab lo ley ngwalaaz Jesús, ne noga tyen ngot kuu nataak yez ngwalaaz Jesús. ⁵ Per lee re zha Israel kuu ngwalaaz Jesús, kwathoz mkezhyan zha, ne mkaltaa zha chop tson re zha kuu went nak kuu ndiy lo xbi, tsa tsow re zha ree yii re zha yez ne Paba rop Silas. Ne mnndaab zha liz Jasón mkwaan zha Paba rop Silas, tsa koo zha rop zha ne loo zha rop zha lo re zha yez; ⁶ per leettsa mne re zha yent rop zha tya, tsa mdobyu zha Jasón kon techop tson zha kuu nyelaaz Jesús, mnndeno zha re zha ree lo re zha kuu nak tsin yez, ne dib gan mrez re zha ne nzhab zha:

—¡Lee re zha ree ngetsetsaa reta men lo yezlyu, ne lee nal mzina zha nzhee, ⁷ ne Jasón mnndaab yuu mlet rop zha! ¡Rop zha ne reta zha kuu nyelaaz xkiiz zha, nzhort zha diiz kuu nzhab ley chaan César, tak mbezz re zha nzo tedib rey kuu le Jesús!

⁸ Or mbin re zha kuu nak tsin ne re zha kuu nzi tya koree, neeka net zha naa kwan tsow zha xgab. ⁹ Tsa mnaab re zha temi lo Jasón ne lo re zha kuu nyelaaz Jesús, kuu mzhenn re zha, ngwalo mdix re zha tsaraa mtelaa zha zha.

Paba rop Silas mzin yez Berea

¹⁰ Ne leeka yaala mtaal re zha kuu nyelaaz Jesús Paba rop Silas yez Berea. Leettsa mzin rop zha tya, ngwa zha ta nkaltaa re zha Israel nteed xkiiz Diox. ¹¹ Per lee re zha Israel kuu nzo yez, mas wen nak zha naake re zha kuu nzo yez Tesalónica, ne kon dib ndroo leetsoo zha mbin zha re kuu nzhab Paba, ne wiz kon wiz nlab re zha xkiiz Diox, tsa ne zha naa chu wli kuu mbezz Paba. ¹² Ta mod kwaro re zha ree ngwalaaz Jesús. Ne noga kwaro re zha gryeg ngwalaaz Jesús,

mbyi ne ngot kuu nataak tya. ¹³ Ne leettsa mne re zha Israel kuu nzo yez Tesalónica lee Paba ngetaa'a kwent xkiiz Diox yez Berea. Tsa ngwa re zha tya mtekil zha re zha yeza, tsa yii zha ne Paba. ¹⁴ Per lee re zha kuu nyelaaz Jesús, oraaka mtaal zha Paba par roo nitdoo, lee Tim rop Silas myaanka yez Berea. ¹⁵ Ne lee re zha kuu ngwatenet Paba ngwatan zha Paba asta yez Atenas. Ne mtaal Paba diiz lo re zha kuu ngwatan Paba, tsa leettsa bretab zha yez Berea, gab zha lo Tim rop Silas tsa lijer kaltaa rop zha kon Paba.

Paba mzin yez Atenas

¹⁶ Leettsa ngebet Paba lo Silas rop Tim yez Atenas, kwathoz nabil ngoo leettsa Paba, or mwii Paba lee re zha yez kwathoz nyelaaz zha re diox kuu nagt Diox. ¹⁷ Kona lee Paba ngwa ta nkaltaa re zha Israel nteed xkiiz Diox ne mnndediz Paba kon re zha ne kon re zha kuu nagt zha Israel kuu nyelaaz Diox, ne reta wiz ndediz Paba lo xbi yeza. ¹⁸ Noga mnndediz Paba kon chop tson re zha kuu nloo ley ychaan thib mbyi kuu mrole Epicúrio ne kon tedib net zha kuu nloo ley ychaan thib mbyi kuu mrole Estoico, ne mnndelo re zha mnndediz zha kon Paba, ne chop tson re zha ree nzhab:

—¿Kwan nlaaz mbyi kuu kwathoz ndediz ree ne?

Ne lee tedib net zha nzhab:

—Ndak'n lee zha ndaa kwent xkiiz re diox kuu nlebeetaa.

Koree mbezz re zha, tak lee Paba mnndaak kwent Diiz Chul chaan Jesús ne kwent chaan yalroban. ¹⁹ Tsa mnndeno zha Paba thib ta le Areópago, ta nkaltaa re zha, ne mnnaabdiz zha lo Paba:

—¿Chu tak ne nee naa xomod nak re diiz kub kuu ndyaad loo'a lo nee? ²⁰ Tak pur re diiz kuu ter gon nee ndediza, ta mod nlaaz nee ne nee naa xomod nak re diiz ree.

²¹ Tak reta zha yez Atenas ne re zha tedib yez kuu nzo tya, anta nyow leettsa zha kenza zha ne tediz zha pur kuu kub, ne thibka tata nzi re zha.

²² Tsa ngwatenet Paba lo re zha ta le Areópago, ne nzhab Paba lo re zha:

—Men Atenas, kuu nloo lon nak, lee re goo nak zha kuu kwathoz nyelaaz re diox kuu nagt Diox. ²³ Ne or mwii re ta nzholoo goo lo re diox goo, mza'l thib ta tenzhee mbezz: “DIOX KUU NLEBEETAA”. Lo Diox ree nzholoo goo ne neeka nlebeet goo Diox, xkiiz Diox ree nak kuu ngeten kwent lo goo nal.

²⁴ Diox ree mdexkwaa yezlyu ne reta kuu nzo lo yezlyu, lee Diox nabee yibaa ne lo yezlyu. Ne nzot Diox leen yuu kuu ndexkwaa re men, ²⁵ neeka ndechet Diox men kuu

tsow ayud Diox, tak lee Diox ndaa yalnaban, mbi ne reta kuu ndeche'aa.

²⁶ Ne por thibka mbyi mtsow Diox myazh kwaro men, tsa yo re zha dita lo yezlyu. Ne mloo'a Diox naa plo tyemp xek re raz zha, ne asta plotha nak ta yo zha ne nabee zha. ²⁷ Tsa kwaan zha Diox, tegal taxal zha kuu ndaa yaa nkwaan thib kwaa par tsal Diox lo zha, per kuu wli nak, ndot Diox tith lo'aa. ²⁸ Tak lee Diox ntsow nabanaa ne ngwinaa, ne lee Diox ntsow, tsa nzi'aa lo yezlyu ree. Taxal nzhab chop tson re tawlaz goo kuu nak zha kuu kwathoz nzhaak, leettsa nzhab zha: "Re'aa nak zha raz chaan Diox". ²⁹ Kona os lee'aa nakaa zha raz Diox, ndoblot tsowaa xgab lee Diox nak ndota kuu or, o plat, o ke, kuu ndexkwaa re zha taxal nlaaz zha. ³⁰ Re tyemp ndala mkez leettsoo Diox mne Diox re men, leettsa mtsow re men taxal mgab yek re men, tak mkow yek zha, per nalsi dita lo yezlyu, nabee Diox lo re men, tsa laa re men re falt men ne teke men dits Diox. ³¹ Tak mli'a Diox thib wiz, kuu nali naab Diox kwent lo reta men, ne mli Diox Jesucrist tsow koree, ne mloo Diox mli Diox Jesucrist tak mteroban Diox Jesucrist.

³² Or mbin zha nzhab Paba lee Jesucrist mroban, tsa lee thib net zha mndelo mzhizno Paba, lee tedib net zha nzhab:

—Tedib welt yelo taa'a kwent baa lo nee.

³³ Tsa mroo Paba xid re zha'a. ³⁴ Per noga chop tson re zha ngwalaaz Jesús, mzaal zha kon Paba. Xith re zha'a ngoo thib mbyi kuu le Nich, zha ree nak thib zha nataak ta nkaltaa re zha yeza ta le Areópago, ne thib ngot kuu le Dámaris kon tedib net zha.

18

Paba mzin yez Corinto

¹ Bluz leettsa ngwalo mriid re koree, tsa lee Paba mroo yez Atenas ndya yez Corinto. ² Tya mzaal Paba thib tawlaz Paba, zha Israel, zha ree le Aquila, zha ree ngol yezlyu Ponto. Aquila ne Priscila tsaal Aquila penta ndyaad rop zha mroo zha yezlyu Italia ne mzin zha tyo, tak lee rey Claudio mnabee roo reta zha Israel Roma. Tsa lee Paba ng-watwii lo rop tsaal zha. ³ Ne leeka tsin kuu ntsow Paba nak rtsin rop zha. Kona myaan Paba lo rop zha, tsa thibka mke re zha tsin, lee re zha ngib yid kuu ndexkwaa yuu yid. ⁴ Ne reta wiz kuu ndroxkwan zha, lee Paba nya ndaa kwent xkiiz Diox ta nkaltaa re zha Israel nteed xkiiz Diox, ne mkwaan Paba mod tsaa yelaa zha Israel ne re zha kuu nagt zha Israel Jesús.

⁵ Leettsa lee Silas rop Tim mzin yez Corinto, rop zha ree mroo yezlyu Macedonia. Tsa lee kuu ntsow Paba nak anta ndaa Paba kwent xkiiz Diox, ne mbez Paba lo re zha

Israel lee Jesús nak Crist Kuu Mtaal Diox Nabee. ⁶ Per lee re zha mndelo mnyaii mne Paba, ne mlooz zha Paba. Tsa lee Paba mtsib xabe lo re zha, taxal thib seny lee re zha nhont diiz, ne nzhab Paba lo re zha:

—Gooka nap falt os lux goo, napt nay. Desde nalor leen ndata kwent xkiiz Diox lo re zha kuu nagt zha Israel.

⁷ Tsa mroo Paba ta nkaltaa re zha Israel nteed xkiiz Diox, ne ngwa Paba liz thib mbyi kuu le Justo, zha ree kwathoz nzhon diiz lo Diox. Ne gaxta ta nkaltaa re zha nteed xkiiz Diox ndob liz zha. ⁸ Tsa lee Crispo thib zha kuu nabee ta nkaltaa re zha nteed zha xkiiz Diox, re lizta zha ngwalaaz Jesús, noga kwaro re zha yez Corinto leettsa mbin zha xkiiz Diox ngwalaaz zha Jesús ne ngokleyy zha. ⁹ Thib yaal lee Diox mloo lo Paba taxal lo mkaal, ne nzhab Diox lo Paba:

—Tsebta, taaka kwent xkiz'n. Towta roo'a, ¹⁰ tak na ndo kon lu, ne neeka thib zha gagt tsow thib kuu went lo'a, tak kwaro zha kuu no yez ree gak zha da.

¹¹ Ne mlet Paba thib liin narol yez Corinto, mteteed Paba re men xkiiz Diox.

¹² Per leettsa lee Galión nak zha kuu nabee yezlyu Acaya, tsa lee re zha Israel myaan zha diiz ne mzen zha Paba ne mndeno zha Paba lo Galión, ¹³ ne nzhab re zha lo Galión:

—Zha ree ngetsow thib kuu went lo ley chaanaa: Tak mbez zha lo re men, ndoblo men gol men lo Jesús.

¹⁴ Leettsa lee Paba nda ni, tsa lee Galión nzhab lo re men:

—Kenza goo zha Israel, os lee goo nkeki goo mbyi ree por thib kuu went kuu mtsow zha, taxal mbeth zha thib men, tetsov'n kas kuu ne goo. ¹⁵ Per koree nak kwent chaan ley chaan goo, btexnet gooy, nlaazt'n taab'n lo kwenta.

¹⁶ Ne mloo Galión re zha yuulow. ¹⁷ Tsa lee re zha'a mzen Sostenés zha kuu nabee ta nkaltaa re zha Israel nteed xkiiz Diox, ne mndine zha Sostenés roo yuulow, ne neeka kas mtsowt Galión kona.

Paba mretab yez Antioquía

¹⁸ Ne mlet Paba plo tyemp yez Corinto, tsaraa nzhab Paba lo re zha kuu nyelaaz Jesús lee Paba bi, ne ndya Paba kon Priscila ne Aquila par yezlyu Siria. Or bee ter ten Paba bark yez Cencrea, tsa mga Paba yit-sek Paba, tak mtsowa Paba thib kuu nzhab Paba lo Diox tsow Paba. ¹⁹ Or mzin re zha yez Éfeso, tya mlaa Paba Priscila ne Aquila, lee Paba ngwa ta nkaltaa re zha Israel nteed xkiiz Diox, ne mndediz Paba kon re zha kuu nkaltaa tya, ²⁰ ne lee re zha ree mnaab lo Paba kwet Paba plo tyemp lo re zha, per mzhyalt Paba. ²¹ Tsa nzhab Paba lo re zha:

—Leen ndya, tak ndoblo riid'n ani kuu ndyaad ree Jerusalén. Per os lee Diox taa diiz tayadtwin lo re goo tedib welt.

Ne telut bluz lee Paba ngoo bark mroo yez Éfeso.²² Ne or mzin Paba Cesarea, tsa ngwa Paba yez Jerusalén, ngwatwii Paba lo re zha kuu nyelaaz Jesús, tsaraa ndya Paba Antioquía.²³ Leettsa nda'a tempr nzo Paba Antioquía, tsa mre Paba ngwa thibga re yez kuu nzi yezlyu Galacia ne yezlyu Frigia, tsa mloney Paba leettsoo re zha kuu nyelaaz Jesús kuu nzo par tya.

Apolos mndaa kwent xkiiz Diox yez Éfeso

²⁴ Ne re wiza mzin thib zha Israel kuu le Apolos yez Éfeso, Apolos nak zha yez Alejandría. Ne kwathoz nzhaak Apolos ndediz, noga kwathoz nzhaak Apolos xkiiz Diox.²⁵ Kwathoz wen mteed Apolos xkiiz Diox, kon dib ndroo leettsoo Apolos mndaa Apolos kwent xkiiz Diox lo re men ne nambi mloo Apolos lo re zha, tegal beeta mod kuu mtsowleyy Juan nlebee Apolos.²⁶ Ne mzebt Apolos mndelo Apolos mndaa kwent xkiiz Diox, ta nkaltaa re zha Israel nteed xkiiz Diox, per or mbin Priscila rop Aquila koree, tsa mndeno rop zha Apolos liz zha ne mteed zha Apolos mas wen xkiiz Diox.²⁷ Or lee Apolos mtsow xgab ya yez Acaya, tsa lee re zha kuu nyelaaz Jesús yez Éfeso, mloney leettsoo Apolos ne mkee re zha thib yeets mtaal zha lo re zha kuu nyelaaz Jesús tya, tsa wen kayaa zha Apolos or tsin Apolos tya. Ne or mzin Apolos Acaya kwaro mtsow Apolos ayud re zha kuu ngwalaaz Jesús por yalwen chaan Zha Nabee,²⁸ ne kon xkiiz Diox kwathoz nambi mloo Apolos, lee Jesús nak Crist Kuu Mtaal Diox Nabee, ne mloo Apolos wlit re kuu mloo re zha Israel. Ne neeka thib zha yent kwan nzhab lo Apolos.

19

Paba mzin yez Éfeso

¹ Leettsa lee Apolos ndo yez Corinto, lee Paba mriid re yez kuu nzi net yii, tsa mzin Paba yez Éfeso, tya mzal Paba chop tson zha kuu nyelaaz Jesús.² Tsa mnaabdiz Paba lo re zha ne nzhab Paba:

—¿Chu mkayaa'a goo Mbi Nayon leettsa ngwalaaz goo Jesús?

Lee re zha mkab, ne nzhab:

—Neeka net nee naa chu nzo Mbi Nayon.

³ Tsa mnaabdiz Paba lo re zha tedib welt:

—¿Xomod ngokleyy goo?

Lee re zha mkab ne nzhab:

—Taxal mloo Juan, tata ngokleyy nee.

⁴ Tsa nzhab Paba lo re zha:

—Wli lee Juan mtsowleyy re men, kuu mlaa re kuu went kuu ntsow ne ngwalaaz Diox, ne nzhab Juan lo re men, yelaaz re

men zha kuu yaadke dits Juan. Lee zha ree nak Jesús.

⁵ Or mbin re zha koree, tsa ngokleyy zha kon le Jesús Zha Nabee,⁶ ne or mxoob Paba yaa Paba yek re zha, tsa mkayaa re zha Mbi Nayon ne mndelo re zha mndediz zha tedib net diiz, ne mndelo re zha mndaa zha kwent xkiiz Diox lo re men.⁷ Ne reta zha ree nzhab teeka tsuibchop mbyi.

⁸ Ne dita tson mbee ngwa Paba ta nkaltaa re zha Israel nteed xkiiz Diox, ne mzebt Paba mndaa Paba kwent xkiiz Diox lo re men tya. Mndediz Paba kon re zha ne mtsow Paba tsa yelaaz re zha naa xomod nak yalnabee chaan Diox.⁹ Per ngoo chop tson zha kuu ngok nad leettsoo ne ngwalaazt zha kuu mbez Paba, ne delant lo re men mndelo re zha ree mloo zha Paba, kwent chaan Diiz Chul chaan Jesucrist. Tsa mbeche Paba kon re zha kuu nyelaaz Jesús lo re zha'a, ne mndeno Paba re zha leen thib yuu skwel chaan thib zha kuu le Tirano, tya mteted Paba re zha gandata wiz.¹⁰ Ne tata mteted Paba re zha chop liin, ne reta zha kuu nzo Asia, zha Israel ne zha kuu nagt zha Israel mbin Diiz Chul chaan Jesús.¹¹ Ne kon yalney chaan Diox mtsow Paba re milagr thoz kuu mzegey leettsoo re men mwii,¹² ne asta noga panyit ne re lar kuu rdiinn cho Paba nzhe re men lo re mbyiz, tsa gwe re zha lo re yiz kuu ndak zha, ne noga ndroo re mbi fyer kuu nzo leettsoo re zha.

¹³ Ne ngoo chop tson zha Israel, kuu ndiy ngoo re mbi fyer kuu nzo leettsoo re men, re zha ree nlaaz lortsin le Jesús, tsa koo zha re mbi fyer, ne mbez zha lo re mbi fyer:

—Kon le Jesús kuu ndaa Paba kwent nabeen lo'a broo.

¹⁴ Koree mtsow re gaz xgann thib zha Israel kuu le Esceva, kuu ngok thib re ngwleyy kuu mnabee lo re ngwleyy.¹⁵ Per thib welt lee mbi fyer mkab lo re zha ne nzhab:

—Nlebeen Jesús, ne nen cho nak Paba, per lee re goo, ¿cho nak goo?

¹⁶ Ne lee zha kuu nzo mbi fyer leettsoo, mndelo mkeey yek re zha, ne kon yalney kuu nap zha mtsow zha gan lo reta zha, ne kwathoz nakap mkeey zhay yek re zha, kona cheey ne grid re zha mzhonn zha mroo zha leen yuu'a.¹⁷ Reta zha kuu nzo yez Éfeso mbin koree, re zha Israel ne re zha kuu nagt zha Israel, kona kwathoz mzeb re zha, ne tata mod lee xkiiz Jesús kwathoz ngok nataak tya.

¹⁸ Ne noga kwaro re zha kuu ngwalaaz Jesús, myaad zha ne mloo roo re zha re kuu went kuu mtsow zha ndala delant lo re men,¹⁹ ne noga kwaro re zha kuu mtsow yalwez, myaadno zha re libr zha ne ndewii re men mteyy zhay. Or mtsow zha kwent naa plo nataak re libra. Leey nataak chop galbsii

mil pes plat. ²⁰ Tata lee xkiiz Jesús masraa mraats re yeza ne naroob men ngwalaaz Jesús Zha Nabee.

²¹ Bluz leettsa ngwalo mriid re koree, mtsow Paba xgab ya Paba Macedonia ne Acaya, ne yaka Paba asta Jerusalén, ne noga nzhab Paba, or yelo ya Paba Jerusalén, tsa ya Paba asta Roma. ²² Tsa mtaal Paba Tim rop Erast par Macedonia rop zha ree ntsow ayud Paba, lee Paba myaanka Asia.

Kwathoz mnayii re zha yez Éfeso

²³ Ne re wiza kwaro mnayii re zha yez Éfeso ne xkiiz Jesús. ²⁴ Demetrio zha kuu ndexkwaa re kuu plat mtsow koree, ndexkwaa zha re gwodoo bzhizh, kuu nak taxal gwodoo chaan diox Diana, ne lee Demetrio ne re zha kuu nke tsiin kon plat, kwaro temi ntsow re zha gan. ²⁵ Tsa mkaltaa Demetrio re zha kuu nke leeka tsiina, ne nzhab Demetrio lo re zha:

—Companyer: Wen ne'aa lo tsiin ree ntsanaa'aa naroob temi. ²⁶ Per lee nal lee re goo ngwii ne nzhon, lee Paba ndiy mbez lo re men, lee re diox kuu ndexkwaa men nagt diox, ne tabaa netgsow Paba gan kwathoz men, ne nagte beeta re zha Éfeso sinke mera dita yezlyu Asia. ²⁷ Koree nak thib kuu thitanax went, tak cha lux rtsinaa, ne nagt beeta rtsinaa lux, sinke noga gwodoo chaan diox Diana nzo mod lux yalnataak kuu nkenoy. Ne tabaa lee re men yelaazt raay, taxal nyelaaz zhay asta nal, ne tsowt raa zha kas diox Diana, kuu nyelaaz re zha kuu nzo dita yezlyu Asia ne dita lo yezlyu.

²⁸ Or mbin re zha koree, kwathoz mnayii re zha, ne dib gan re zha mrez zha ne nzhab zha:

—jKwathoz naro nak Diana, diox re'aa zha Éfeso!

²⁹ Reta zha yeza, kwaro mkezhyan zha. Tsa mzen re zha Gayo rop Aristarco zha yezlyu Macedonia, zha kuu mndiy kon Paba, ne mdobyu zha rop zha'a asta ta nyoo junt. ³⁰ Ne ngwalaaz Paba gataab tyu, tsa ni Paba lo re men, per mzhyalt re zha kuu nyelaaz Jesús gaya Paba. ³¹ Noga chop tson zha kuu nak tsiin Asia, kuu nak amig Paba, mtaal diiz lo Paba tsa tabt Paba tyu. ³² Ne thib net re zha'a mbez thib kuu lee tedib net zha mbez tedib kuu, nathoz nkree re zha bi, ne kwaro zha kuu mkaltaa tyu neeka net zha naa chebee mkaltaa zha tyu. ³³ Tsa lee chop tson zha Israel mndaa kwent lo Alejandr re kuu ngeyak, ne mndeno zha Alejandr tsa ni Alejandr por re zha Israel, tsa mtsow Alejandr seny kon yaa Alejandr, tsa keet raa re men bi. ³⁴ Per or myene re men lee Alejandr nak zha Israel, tsa mndelo re men dib gan re men mrez re men teeka chop or ne nzhab re men:

—jKwathoz naro nak Diana, diox re'aa zha Éfeso!

³⁵ Or lee secretar yeza mtsow gan mkeet raa re men bi, tsa nzhab zha:

—Reta goo zha Éfeso, reta men yezlyu ne, lee re'aa zha yez ree nkenap gwodoo diox Diana, imaj kuu ngob lobee. ³⁶ Re goo ne wli koree, kona ndoblot kwez goo tabaa, os tsowt goo xgabre wen wen ner. ³⁷ Tak lee re mbyi kuu ndyaadno goo nzhee, mtsowt zha kuu went lo gwodoo ne neeka mloozt zha diox re'aa. ³⁸ Os lee Demetrio kon re zha kuu nke tsiin kon Demetrio nkeno zha thib kwaa kon thib zha, baa ndob yuulow, ta nzi re zha kuu nak tsiin, tyu ya zha yatexnet zha kwent chaan zha. ³⁹ Per os kwan raa nlaaz goo, leettsa yo junt yez tsa texneta. ⁴⁰ Ne nal por re kuu mriid ree, cha tsow gobyern xgablee'aa ngetekil re men tsow re kuu rax ree, ne os lee gobyern naabdiz lo'aa por re kuu ngok ree, jkwan kabaa lo re zha tsa?

⁴¹ Or ngwalo tata nzhab zha, tsa mchaats zha re men.

20

Paba ngwa yezlyu Macedonia ne yezlyu Grecia

¹ Or ngwalo ngok zhe re zha yez Éfeso, tsa lee Paba mrez re zha kuu nyelaaz Jesús, mteni Paba re zha, nzhab Paba lo re zha lee Paba bi, ne ndya Paba yezlyu Macedonia.

² Leettsa ngwa Paba re yez kuu nzi tyu, kwathoz mloney Paba leettsou re zha kuu nyelaaz Jesús kon re kuu nzhab Paba, ne ndya Paba mzin yezlyu Grecia, ³ tyu mlet Paba tson mbee. Or mer thoz ten Paba bark bi Paba par Siria, mbin Paba lee re zha Israel nlaaz tsow thib kuu went lo Paba. Tsa mtsee Paba xgab Paba ne mretab Paba par Macedonia tedib welt. ⁴ Ne re zha ree mtsow company Paba; Sópater zhiinn Pirro zha Berea, Aristarco ne Segundo rop zha ree nak zha Tesalónica, Gayo zha Derbe ne Tim, Tíquico ne Trófimo zha yezlyu Asia.

⁵ Reta zha ree mndener ne mlet zha lo rop nee Paba yez Troas. ⁶ Ne or ngwalo mriid ani kuu nzhow zha pan kuu nyoot lebadur, tsaraa mroo nee yez Filipos, ne gaay wiz ngoo nee bark mzin nee Troas, ta ngebet re zha lo nee, tyu mlet nee gaz wiz.

Paba mteroban Eutico

⁷ Ne or ngok wiz domin mkaltaa nee, tsa wu nee rtsee chaan Jesús Zha Nabee, ne lee Paba mtsowa xgab bi tedib wiz, kona asta ngulal yaal mndediz Paba ne mloo Paba lo re zha. ⁸ Ne leen yuu ya ta mkaltaa nee ndobke thib an, ⁹ tsa lee thib nyo mndyeen kuu le Eutico ndob roo ventan. Ne tak kwathoz nol mndediz Paba lo re zha, ngwatin nyo mkaal ne desde yon pis ya ngob nyo lo yu, ne ngutha nyo mlit zha nyo.

¹⁰Tsa mla Paba ta nax nylo ne mtobxub Paba mdeez Paba nylo, ne nzhab Paba lo re zha:

—Tsebt goo, nabon nylo.

¹¹Tsa mre Paba mkendab tedib welt, ne mdid Paba pan mdow re zha, tsa mndaaka Paba kwent lo re zha, asta ngwani yezlyu; tsaraa mbi Paba. ¹²Ne kwathoz mtsey leettsou re zha, tak nabon nylo kuu ngoba, ne mndeno re zha nylo liz zha.

Paba mrooyez Troas ne ngwayer Miletó

¹³Tsa mzhén nee bark ndya nee yez Asón, ta myaan nee diiz tsaal nee kon Paba, tak mtsowa Paba xgab ya ni Paba tya. ¹⁴Or mzaal nee Paba yez Asón, tsa mzhén re nee Paba bark ndya nee yez Mitilene. ¹⁵Tedib wiz mrooyez Mitilene mriid nee yezlyu kuu le Quíkuu nzi leen nitdo, ne tedib wiz tsaraa mzin nee ta le Samos, ne asta tedib wiz tsaraa mzin nee yez Miletó. ¹⁶Tak lee Paba mtsowa xgab ridndabta yez Éfeso, tsa tsant raa Paba Asia; tak nyoh leettsou Paba tsin Paba yez Jerusalén, tak lee xgab Paba nak, os leey take, tsin Paba ne to Paba tya lo ani Pentecostés.

Paba mteni re zha golzhayez Éfeso

¹⁷Or nzi'a nee yez Miletó, tsa mrez Paba re zha gol kuu nyelaaz Jesús yez Éfeso. ¹⁸Ne or mzin re zha, tsa nzhab Paba lo re zha:

—Desde wiz ner kuu leetsa mzin in nzhee Asia, ne asta naltserree, ne goo naa xa ngetsow'n, ¹⁹dita tyemp kuu nda ndon lo re goo, ngetsow rtsin Jesús kon dib ndroo leettsoon, ne relota yalti ngeriid'n lo re zha Israel, ne kwaro welt asta nzhhonn na. ²⁰Per tegal tabaay, mlat'n tan kwent re kuu nak kuu wen lo re goo, sinke mloon lo re goo de-lant lo re men ne liz goo. ²¹Lo re zha Israel ne lo re zha kuu nagt zha Israel, nzhaba na lo zha bre zha lo Diox ne yelaaz zha Jesús Zha Nabee. ²²Nal leen ndya Jerusalén, ta ngetaa Mbi Nayon na ne net'n naa kwan riid'n tya. ²³Beeta kuu nen nak, reta ta nyen ne Mbi Nayon lon, ko zha na tsib ne rid'n kwathoz yalti. ²⁴Per neeka thib lo re koree ndat leettsoon, kuu nataak nak tsow'n kuu nabee Jesús lon, kuu nak tan kwent Diiz Chul chaan Jesús, ne lon xomod nak yalwen chaan Diox.

²⁵Ne lee nal nen, bret raa goo wii goo na, re goo kuu mndan kwent lo naa xomod nabee Diox. ²⁶Ta mod nlaz'n nin lo reta goo nal, napt'n kulp os lee goo went ndo goo lo Diox. ²⁷Tak mnda'a na kwent naa xomod nak xkiiz Diox lo re goo, ne mkaats'n neeka thib kwaa lo goo. ²⁸Kona kenap goo goo ne kenap goo re zha kuu nyelaaz Jesús, re zha kuu mndaaka Mbi Nayon diiz kenap goo, taxal thib zha kuu nkenap re mbak zhii, tak kon ren Jesús mzhii Jesús re zha'a. ²⁹Noga nen or leen bi, lee tedib net re zha kuu kwathoz nayii taxal mbeez nak yaad, kuu nlaaz luux

re goo kuu nyelaaz Jesús. ³⁰Ne leeka xid re goo roo chop tson re zha kuu loo kuu wlit, ne tsow zha gan yelaaz re zha kuu nyelaaz Jesús xkiiz zha. ³¹Kona bkenap goo goo, btelaaz goo por tson liin tse ne yaal mlat'n thibka mnin lo goo, ne asta mbinn na.

³²'Kona re goo wets'n kuu nyelaaz Jesús, naab'n lo Diox tsa kenap Diox goo. Thibka btelaaz goo Diiz Chul chaan yalnkelaaaz chaan Diox, tak leey nap yalnabee tsow ayud re goo, tsa masraa ne goo naa xomod nlaaz Diox ban goo, tsa taa Diox re kuu mne Diox taa Diox lo re zha kuu nak zha Diox. ³³Mndablazt'n temi ne neeka xab neeka thib zha, ³⁴reta goo wen ne goo kon prop yaan mkeen tsii, tsa mtsanaan kuu ndow'n ne kuu ndow re zha kuu mndo kon na. ³⁵Mloon lo re goo naa xomod ndoblo ke men tsii, tsa tak tsow men ayud re zha kuu ndeche kwaaw. Btelaaz goo xkiiz Jesús Zha Nabee or nzhab zha: "Mas wen nzo leettsou zha kuu ndelaaz kwaaw, nake zha kuu nkayaay".

³⁶Or ngwalo nzhab Paba koree, tsa mtobxub Paba ne mnaab Paba lo Diox kon re zha'a. ³⁷Reta zha mbinn ne mdeez zha Paba ne mdow zha chut kwat Paba. ³⁸Ne kwathoz nabil ngoo leettsou re zha, tak lee Paba nzhab lo re zha: "Bret raa goo wii goo na". Tsaraa ngwatenet re zha Paba, asta ta ten Paba bark.

21

Paba ngwayer Jerusalén

¹Leettsa mlaa nee re wets zha yez Éfeso, tsa mzhén nee bark kuu ndya par Cos yezlyu kuu nzi leen nitdo. Ne tedib wiz tsaraa mzin nee yezlyu Rodas kuu nzi leen nitdo, ne tya mrooyez ndya nee yez Pátara.

²Ne tya mgaa nee thib bark kuu ndya par Fenicia, tsa mzhén nee barka. ³Ne leettsa ndya nee mwii nee lee yezlyu Chipre nzi lad beg. Ndyaka nee mzin nee Siria ne lee barka ndeche lath yez Tiro, tsa mla nee mndaab nee yeza. ⁴Tsa mzaal nee re zha kuu nyelaaz Jesús, ne mlet nee gaz wiz lo re zha, tsa nzhab re zha lo Paba yat Paba Jerusalén, tak lee Mbi Nayon mloo thib kuu lo zha. ⁵Per leettsa mzaal gaz wiza, tsa mrooyez ndya nee reta wets kon tsaa zha ne kon re zhiinn zha, myaadtaan zha nee asta roo nitdo yez. Ne tya roo nitdo mtobxub re nee ne mnaab nee lo Diox. ⁶Tsa nzhab nee lo re zha, lee nee ndya ne mke nee bark lee re zha mretab zha liz zha.

⁷Leettsa mrooyez yez Tiro mzin nee yez Tolemaida tyatha ngoo nee bark, ne or mzin nee tya mni re nee Paba "diox" lo re zha kuu nyelaaz Jesús, ne mlet nee lo re zha thibka wiz. ⁸Lee tedib wiz mrooyez nee Paba tya, tsa mzin nee yez Cesarea. Tsa ngwayer nee liz

Lip kuu ndaa kwent xkiiz Jesucrist, kuu nak thib re gaz zha kuu mli zha par tsow ayud re apóstl, ne mlet nee liz Lip. ⁹ Zha ree nap thap rtsaap kuu mndyeen, ne re nzaa ree nak profet chaan Diox. ¹⁰ Ne leettsa nda'a wiz ndo nee ty, tsa mzin Agabo thib profet chaan Diox, zha ree ndyaad yezlyu Judea. ¹¹ Ne or mzin zha lo nee, tsa mzen zha sinch Paba ne mliib zhay yaa zha ne ni zha, tsa mne zha:

—Lee Mbi Nayon ne, tenzhee liib zha bzhaan sinch ree yez Jerusalén, ne taa zha zha lo re zha kuu nagt zha Israel.

¹² Or mbin re nee kon re zha kuu nyelaaz Jesús kuu nzo yezza kona, tsa nzhab nee lo Paba yat Paba Jerusalén. ¹³ Per lee Paba mkab:

—¿Chebee rnhonn goo ne ntsow goo nabil nyoo leettsoon? Per na yent kwan nda leettsoon, tegal liib zha na o kuth zha na yez Jerusalén, kwent chaan Jesús Zha Nabee lo re'aa.

¹⁴ Per or mne nee mtsowt nee gan gatek-weet nee Paba, tsa mlaa nee ndya zha, ne nzhab nee lo zha:

—jGake taxal nlaaz Zha Nabee!

¹⁵ Or ngwalo mriid wiza mdexkwaa nee tsa ndya nee Jerusalén. ¹⁶ Ne noga chop tson re wets zha Cesarea mtsow company nee, ne xid re zha nzo thib zha Chipre kuu le Mnasón, zha kuu ndala nyelaaz Jesús ne liz zha mlet nee.

Paba ngwatwii lo Santiag

¹⁷ Leettsa mzin nee Jerusalén, kwathoz laz re zha kuu nyelaaz Jesús mkayaa zha nee. ¹⁸ Lee tedib wiz ngwatwii re nee Paba lo Santiag ne ty a nzi re zha gol kuu nabee lo re zha kuu nyelaaz Jesús. ¹⁹ Or ngwalo mni nee "diox" lo re zha, tsa mndelo Paba mndaa kwent thibga thibga re kuu mtsow Diox por Paba lo re zha kuu nagt zha Israel. ²⁰ Or mbin re zha kona, tsa mndelo re zha mbil zha lo Diox. Tsa nzhab re zha lo Paba:

—Wets Paba, wii xid re zha Israel kwaro zha ngwalaaza Jesús ne reta zha mbez ndobloka gon re men diiz lo ley chaan Moisés. ²¹ Ne mbin re zha lee'a ngeloo lo re zha Israel kuu nzot Israel, tsa gont raa zha diiz lo ley chaan Moisés, noga mbin zha nzhaba ndechet raa kee zha seny re xgann zha, ne tsowt raa zha re kuu mloo re teyya. ²² Lee nal, ¿kwan tsowaa nal? Tak reta zha Israel ne lee'a ndyaad. ²³ Mas wen btsow koree: Xith re nee nzhee nzo thap mbyi kuu tsow thib kuu nzhab zha lo Diox tsow zha. ²⁴ Gwa re goo zha ne btsow goo taxal nzhab lo ley, tsa gak nambi goo, ne bdix re gast zha, tsa tak ga re zha yitsek zha. Ne tabaa lee reta men ne, wlit kuu mbin zha kwent chaana, sinke nzhona diiz taxal nabee ley chaan Moisés. ²⁵ Per lee re zha kuu nagt zha Israel

kuu ngwalaaza Jesús, mtaala nee yeets lo re zha taxal mtsow nee xgab: Ndechet tsow zha reta kuu nzhab lo ley chaan Moisés. Per ndoblot wu zha re kuu ntsib re men lo diox re men, neeka wut zha ren ne re beel re maa kuu nxot ren, neeka gagt rop zha zha kon ndota zha.

Roo gwodoo mzen zha Paba

²⁶ Tsa mndeno Paba re thap mbyi'a, ne tedib wiza mtsow Paba taxal mbez lo ley kon re zha'a, tsa ngok nambi re zha. Tsaraa mndao Paba leen gwodoo naro yez Jerusalén, par gab Paba lo ngwleey, naa pol yelo tsow re zha kuu nabee ley, wiz kuu gwe kadta thib thib zha, thib maa kuu gath par taa zha gon lo Diox.

²⁷ Leettsa mera yezhoob gaz wiz kuu ndoblo tsow zha taxal nabee ley, tsa ndyaad chop tson zha Israel zha yezlyu Asia, ne mwii zha Paba roo gwodoo naro yez Jerusalén, ne mndelo re zha mkee zha bi ne mzen zha Paba, ²⁸ ne mbetsyath re zha nzhab zha:

—¡Tawlaaa zha Israel tsow goo ayud nee! Tak zha ree nak zha kuu ndiy reta ta ne nlooz zha re zha Israel ne gwodoo'aa, ne mbez zha lo re zha ndoblot tsow zha taxal nabee ley chaan Moisés. Ne nagte beeta kona, sinke noga mteyu zha gwodoo'aa, tak mloo zha, zha kuu nagt zha Israel leen gwodoo nayon chaanaa.

²⁹ Tata nzhab re zha, tak mwii zha lee Paba kon thib zha yez Éfeso kuu le Trófimo ndiy yez, ne mtsow zha xgab mloo Paba zha'a leen gwodoo.

³⁰ Tsa lee reta zha yez mkee bi ne mrezhonn re zha mzen zha Paba, mdobyu zha Paba mloo zha Paba leen gwodoo naro, ne oraaka mtow zha roo pwert gwodoo.

³¹ Ne or mera kuth re zha Paba, lee diiz mzin lo soldad kuu nabee lo thib mil soldad, lee re zha yez Jerusalén ngetsow thib zhoo.

³² Oraaka mkaltaa zha re soldad, ne tedib net re soldad kuu nabee lo thib gayoo soldad, ne lijer ngwa re zha ta nzi re men. Or mne re men lee soldad kuu nabee lo thib mil soldad mzin kon re soldad zha, tsa mlaa re men mdint raa zha Paba. ³³ Ora mbig soldad kuu nabee lo thib mil soldad ne mzen zha Paba, ne mnabee zha mliib zha Paba kon chop kaden; tsaraa mnaabdiz, naa cho nak Paba ne kwan mtsow Paba.

³⁴ Per thib net re men mbez thib kwaas lee tedib net zha mbez tedib kwaas, ne kwathoz mbetsyath re zha, ta mod neeka thib kuu myent zha kuu nabee lo re soldad. Tsa mnabee zha mndeno re soldad Paba ta nzo re soldad. ³⁵ Or mzin re zha lo skaler ty, tsa mxoob zhuk re soldad Paba, tak lee re men kuu ndeke nlaaz kuth Paba. ³⁶ Ne reta men mbetsyath mbez beth goo zha.

Paba mni lo re men

³⁷ Or mera ko zha Paba ta nzo re soldad, tsa mnaabdiz Paba lo soldad kuu nabee lo thib mil soldad:

—¿Chu tak nin chop lan diiz lo'a?

Lee soldada mkaab nzhab:

—¿Chu ndediza diiz gryeg? ³⁸ ¿Chu leet lu nak zha Egipto, kuu mbyo kon re zha kuu ntsiin, ne mndeno'a thap mil mbyi par net yubiz, re zha kuu nzthut men?

³⁹ Tsa nzhab Paba lo zha:

—Na nak zha Israel, zha yez Tarso kuu nzi yezlyu Cilicia, thib yez kuu nataakxa; tsow yalwen taa diiz nin lo re men ree.

⁴⁰ Lee soldada mzhyal. Tsa lee Paba mndeli lo skaler ne mtsow seny kon yaa, tsa keet raa re men bi. Or lee re men mkeet raa bi, tsa mni Paba lo re men kon diiz Hebreo, ne nzhab Paba:

22

¹—Re goo wets'n ne xut'n, kenza goo chop lan xkiz'n kuu nin lo goo.

² Or mbin re zha lee Paba mndediz diiz Hebreo, tsa masraa zheta ngok re zha ne mkenza zha kuu mni Paba, tsa nzhab Paba lo re zha:

³—Na nak zha Israel, ne ngol'n yez Tarso kuu nzi yezlyu Cilicia, per nzhee Jerusalén mzhen na ne lo maestr Gamaliel mteed'n reta ley chaan re teyaa zha ndala. Ne kon dib ndroo leetsoon mtob yek'n tsow'n kuu ne Diox, leeka taxal ntsow gooy nal. ⁴ Kona mreken dits re zha kuu nyelaaz Jesús asta mbeth'n zha, ne mlon mbyi ne ngot tsib. ⁵ Ne leeka ngwleyy kuu nabee lo re ngwleyy ne re zha kuu nak tsiin, reta zha ne wen wli reta koree, tak re zha mndaa yeets lon par mndan lo re zha Israel kuu nzo yez Damasco, tsa tak kwan na re zha kuu nyelaaz Jesús kuu nzo tya, tsa ten na zha ne yaadnon zha nzhee Jerusalén par tetin zha.

*Xomod ngwalaaz Paba Jesús
(Hch. 9:1-19; 26:12-18)*

⁶ Per leettsa ndon net ndan ne mera ndetsin na yez Damasco, teeka ndrol wiz cha mroo thib xni lobee kuu mlaa dita ta ndon, ⁷ tsa ngob'n lo yu. Ne mbin na thib bos kuu mne lon: “Saulo Saulo, ¿chebee ndreke'a dits'n?” ⁸ Tsa mnaabdiz'n: “¿Cho naka Zha Nabee?” Ne lee bos mne lon: “Na nak Jesús zha Nazaret kuu ngereke'a dits'”.

⁹ Lee re zha kuu nda re nee, mwii zha xni ne mzeb zha, per mbint zha bos kuu mni lon. ¹⁰ Tsa nzhab'n: “¿Kwan nlaaza tsow'n Zha Nabee?” Ne lee Zha Nabee mne lon: “Gwateli ne gwaka yez Damasco, tyu ne zha nna kwan ndoblo'a tsowa”. ¹¹ Ne lee xni'a mtsow mkow lon, tsa lee re zha kuu nda re nee mzhen yaan ne mndeno zha na yez Damasco.

¹² Tya nzo thib mbyi kuu le Ananías kuu ntsow kuu nlaaz Diox, ne nzhon Ananías diiz reta kuu nabee ley chaan Moisés, ne reta zha Israel kuu nzo yez Damasco kwathoz wen ndediz zha Ananías. ¹³ Tsa myaad Ananías lon, ne or mzin Ananías mne Ananías lon: “Wets Saulo, nal bre yeni lo'a tedin welt”. Ne oraaka ngwani lon ne mwii Ananías. ¹⁴ Tsa lee Ananías mne lon, lee Diox re teyaa mli'a, tsa ne'a naa kwan nlaaz Diox tsowa, tsa yelaaza Jesucrist zha kuu nali nak, ne gona xkiiz zha kuu roo roopa zha. ¹⁵ Tak lu taa kwent chaan zha lo reta men dito lo yezlyu, gaba re kuu mwii'a ne re kuu mbina lo re men. ¹⁶ Lee nal, ¿kwan ngebeta? Gwateli ne gokleyy ne bnaab lo Zha Nabee, tsa tembi zha lu lo re falt kuu mtsowa.

Paba mndaa kwent naa xomod ngwa Paba lo re zha kuu nagt zha Israel

¹⁷ Leettsa mren Jerusalén, tsa ngwan lee roo gwodoo naro ngwanaab'n lo Diox, tsa taxal zha kuu ntsaa leettsoo. ¹⁸ Mwiin Jesús ne lee Jesús mne lon: “Lijer broo Jerusalén, tak yelaazt re men kwent'da kuu gaba lo re men”. ¹⁹ Tsa nzhab'n: “Zha Nabee, reta zha mne lee na ngwa reta ta nkaltaa re tawlawz'n zha Israel nteed xkiza, ne mzhen na re zha kuu nyelaaz lu, mlon zha tsib ne mdin na zha. ²⁰ Ne or mbeth re zha Steb, zha kuu mndaa kwent xkiza, noga na ndo tya, ne nzhab'n wenka mbeth zha Steb, ne asta mkenap'n xab re zha kuu mbeth Steb.” ²¹ Per lee Jesús ne lon: “Gwa, na taala tit lo re zha kuu nagt zha Israel”.

Mloo zha Paba tsib

²² Konata mkenza re zha, ne mndelo re zha mrez zha ne nzhab zha:

—iNdoblot raa ban mbyi baa! ¡Beth goo zha!

²³ Ne or ngebezt re zha nkezhyan zha ntsib zha xab zha ne nchoon zha yu lo mbi, ²⁴ tsa lee soldad kuu nabee lo thib mil soldad, mnabee ko re soldad Paba ta nzo re soldad, ne mnabee zha kin zha Paba, tsa koo roo Paba naa chebee tata mbetsiyath re men kwent chaan Paba. ²⁵ Per or ngeliib zha Paba tsa kin zha Paba, lee Paba nzhab lo soldad kuu nabee lo thib gayoo soldad kuu ndo tya:

—¿Chu tak kin goo thib zha Roma, leettsa ter naab goo kwent lo zha?

²⁶ Ne or mbin soldad kuu nabee lo thib gayoo soldad koree, tsa ngwalo zha diiz lo soldad kuu nabee lo thib mil soldad, ne nzhab zha lo zha:

—¿Kwan tsowa? Tak lee mbyi ree nak zha Roma.

²⁷ Tsa lee soldad kuu nabee lo thib mil soldad mbig lo Paba ne mnaabdiz lo Paba nzhab:

—Chu wli zha Roma naka.

Paba mkab ne nzhab:

—Wliy.

²⁸ Lee soldad kuu nabee lo thib mil soldad nzhab lo Paba:

—Na mdix naroob temi tsa mrebee ngok'n zha Roma.

Per lee Paba mkab ne nzhab:

—Per lee na desde ngol'n nak'n zha Roma.

²⁹ Or mbin re soldad kuu nda keey yek Paba lee Paba nak zha Roma, ora mbeche re zha, noga soldad kuu nabee lo thib mil soldad kwathoz mzeb, or mne zha lee Paba nak zha Roma, tak lee zha mnabee mliib zha Paba.

Mndeno zha Paba lo re zha kuu nak tsiin zha Israel

³⁰ Ne tedib wiza lee soldad kuu nabee lo thib mil soldad, nlaaz wen ne naa chebee nayii re zha Israel ne Paba, mxak zha Paba ne mnabee mkaltaa re ngwleyy kuu nabee lo re ngwleyy ne reta zha kuu nak tsiin. Tsaraa mloo zha Paba ne mto zha Paba delant lo re men.

23

¹ Paba mwii lo reta zha nak tsiin, tsa nzhab Paba lo re zha:

—Re goo wets zha Israel, reta diiz kuu mnabee Diox wen netgsow nay asta wiz naltserree.

² Tsa lee Ananías ngwleyy kuu nabee lo reta ngwleyy, mnabee lo re zha kuu nzi gax lo Paba, tsa gaat ya zha roo Paba. ³ Per lee Paba mkab lo ngwleyya, ne nzhab:

—Tabaaka tsow Diox lo'a, zha nkedi! Lundob baa tsa naaba kwent lon taxal nabee ley. ¿Chebee nzhorta diiz taxal nabee ley, leel nabee'a kee zhay yek'n?

⁴Tsa lee re zha kuu nzi ty a nzhab lo Paba:

—¿Chebee tabaa nkaba lo ngwleyy Diox kuu nabee lo reta ngwleyy?

⁵Tsa nzhab Paba:

—Wets'n, net'n lee zha nak ngwleyy kuu nabee lo reta ngwleyy. Tak lo xkeets Diox mbez: "Loozta re zha kuu nabee laza". [Ex. 22:28]

⁶ Tsa myeen Paba chop net zha nzi ty a, zha saduceo ne zha Fariseo, ora nex nzhab Paba:

—Wets, na nak zha fariseo, xgann thib zha fariseo, tak nyelaz'n lee re zha nguth roban, kona myaadno zha na nzhee.

⁷ Or tata nzhab Paba, tsa mndelo re saduceo kon re fariseo mbyo diiz, ne ngok chop net zha. ⁸ Tak lee re zha Saduceo nyelaatz lee re zha nguth roban, neeka nyelaatz zha nzo mandad chaan Diox neeka choraa mbi, per lee re fariseo nyelaatz reta koree. ⁹Tsa kwathoz ngoo bi ty a ne lee chop tson maestr kuu nloo xkiiz Diox, kuu ndroo fabor chaan re fariseo nzhab:

—Mtsowt mbyi ree neeka thib kuu went, ser nzo cho thib mbi o thib mandad chaan Diox mni lo zha.

¹⁰ Or lee soldad kuu nabee lo thib mil soldad mne masraa ngeyodiz re men, tsa mzeb zha tsow byu re zha Paba, tsa mnabee zhalo choptson soldad, tsa koo zha Paba xid re men, ne teno zha Paba ta nzo re soldad tedib welt.

¹¹ Ne or ngoo yaal lee Jesús Zha Nabee mloo lo Paba ne nzhab lo Paba:

—Paba tsebta, tak leeka taxal mndaa'a kwent xkiz'n nzhee Jerusalén, tabaaka taa'a kwente Roma.

Re zha kuu myaan diiz kuth Paba

¹² Ne leettsa ngwani yezlyu, lee thib net re zha Israel myaan diiz kuth Paba, ne nzhab zha: "Wutaa neeka gutaa neeka thib kwaaw, asta tsowaa gan kuthaa Paba". ¹³ Masraa chop gal mbyi myaan diiz tsow koree. ¹⁴ Ne lee re zha ree ngwa lo re ngwleyy kuu nabee lo re ngwleyy ne lo re zha kuu nabee lo re zha Israel, ne nzhab zha:

—Lee re nee myaan nee diiz wut nee neeka thib kwaaw, asta kuth nee Paba. ¹⁵ Lee hal goo kon reta zha kuu nak tsiin, bnaab goo lo soldad kuu nabee lo thib mil soldad, tsa yaadno zha Paba lo re goo yee, to goo thib kuu gab goo, lee goo nlaaz raa ne naa xomod nak kwent chaan Paba, ne lee re nee list yetsin nee, tsa kuth nee Paba net, or bee ter tsin Paba.

¹⁶ Per lee xgann btan Paba mbin koree, tsa ngwa nya ta nzo re soldad ngwaloo nya diize lo Paba. ¹⁷ Tsa mrez Paba thib re soldad kuu nabee lo thib gayoo soldad ne nzhab Paba lo zha:

—Tsow yalwen bteno nya ree lo soldad kuu nabee lo thib mil soldad, tak nap nya thib kuu gab nya lo zha.

¹⁸ Lee soldada mndeno nya lo zha kuu nabee lo reta soldad ne nzhab lo zha:

—Lee Paba kuu nzo tsib mrez'n ne mnaab lon, tsa yaadnon nya ree lo'a, tak nap nya thib kuu ne nya lo'a.

¹⁹ Lee zha kuu nabee lo thib mil soldad mzenh yaa nya, ne mloo zha nya thib lad, ora mnaabdiz zha lo nya:

—¿Kwan nlaaza ne'a lon?

²⁰ Lee nya nzhab lo zha:

—Lee re zha Israel myaana zha diiz naab zha lo'a, tsa yee teno'a Paba lo re zha kuu nak tsiin, ne to zha diiz lee re zha masraa nlaaz ne naa xomod nak kwent Paba.

²¹ Yelaazta kuu ne zha, tak masraa chop gal zha, yo wan zha net tow zha lo Paba, ne nzhaba zha wut zha neeka gut zha, asta yelo kuth zha Paba, ne nal lista nzi re zha ngebet zha naa kwan gaba.

²² Tsa lee soldad kuu nabee lo thib mil soldad mtaal nya ndya ne nzhab zha lo nya;

tsa yent cho lo taa nyo kwent kuu nzhab nyo lo zha.

Mndeno zha Paba yez Cesarea

²³ Tsa lee zha kuu nabee lo thib mil soldad, mrez chop soldad kuu nabee lo thib gayoo soldad ne mnabee zha to list zha chop gayoo soldad kuu teni, ne tson galbtii soldad kuu ke kabay ne chop gayoo zha kuu gwe lans, tsa teno re zha Paba yez Cesarea yaala. ²⁴ Ne noga mnabee zha ko xab zha thib kabay kuu ke Paba, ne mnabee zha kenap zha Paba, tsa wen tsin Paba lo Bech kuu nak gobyern yez Cesarea. ²⁵ Ne mtaal zha thib yeets lo re soldad par Bech kuu nzhab:

²⁶ “Gobyern Bech, lu kuu nak thib zha kuu kwathoz nataak. Na Claudio Lisias nin “diox” lo’ a. ²⁷ Lee re zha Israel mzhenn mybi ree ne mer aguth zha zha, per mnen lee zha nak thib zha Roma, tsa ngwanon re soldad da par mtelaan zha. ²⁸ Ne tak nlaz’ n nen naa chebee nayii re zha ne zha zha, tsa mndenon zha lo re zha kuu nak tsin zha Israel, ²⁹ tsa mnen lee re zha nayii ne zha kwent chaan ley chaan re zha, per yent kwan mtsow zha par ndoblo zha gath zha neeka par yo zha tsib. ³⁰ Per myeen na lee re zha Israel myaan diiz kuth zha, kona mtaal’ n zha lo’ a, ne nzhapa na lo re zha kuu nayii ne zha, yaad zha lo’ a, tsa ne zha naa chebee nayii zha ne zha zha.”

³¹ Ne lee re soldad mtsow taxal mnabee zha lo re zha, tsa yaal mndeno zha Paba yez Antípatris. ³² Ne lee tedib wiz lee re soldad kuu nda ni mretab ta nzo re soldad, ne lee re zha kuu ndob kabay mndenoka Paba. ³³ Or mzin re zha yez Cesarea, tsa mnadaa zha yeets lo gobyern ne mndaaka zha Paba. ³⁴ Or ngwalo mlab gobyern yeetsa, tsa mnabdz zha lo Paba naa cho men nak Paba, or myeen zha lee Paba nak zha yezlyu Cilicia, ³⁵ tsa nzhab zha lo Paba:

—Or yaad re zha kuu nayii ne’ a, ora gon na re kuu ne’ a.

Tsa mnabee zha kenap zha Paba leen yuu naro chaan rey Herodes.

24

Paba mstab lo Bech

¹ Or nda’ a gaay wiz, tsa lee Ananías ngwleyy kuu nabee lo reta ngwleyy mzin Cesarea, kon chop tson zha kuu nabee lo re zha Israel, ne kon thib licenciad kuu le Tértulo. Re zha ree ngwa lo gobyern, tsa keki zha Paba. ² Or ngwaxii zha Paba, tsa le licenciad Tértulo mndelo mkeki Paba, ne nzhab lo Bech:

—Texkixa gobyern Bech, por lu wen nzo nee ne por yalnzaak chaana kwaro kuu wen ngeyak laz nee. ³ Ne reta ta naley nzo leettsa re men por re kuu ngetsowa ne

ndaa zha texkix lo’ a. ⁴ Per nlazt nee kib nee naroob tyemp lo’ a, kona naab’ n lo’ a, tsa kenza’ a chop lanta xkiiz nee. ⁵ Lee mbyi ree ngogaa lo nee ngetekii re zha Israel, ne nda zha dita lo yezlyu ntsow rol zha re zha Israel, ne lee zha nabee lo re zha kuu nak zha Nazareno. ⁶ Noga ngwalaaz zha gateyu zha gwodoo chaan nee, kona mzhenn nee zha ne ngwalaaz nee ganaab nee kwent lo zha taxal nzhab lo ley chaan nee. ⁷ Per or mzin Lisias kon re soldad Lisias, tsa lafwers mkiib Lisias zha lo nee no mne Lisias: “Ndoblo yaad re zha kuu nlaaz keki Paba lo’ a”. ⁸ Leeka lu ndoblo naabdiz lo zha, tsa ne’ a wli re kuu nkeki nee zha.

⁹ Ne reta zha Israel kuu nzi ty, nzhab wli reta koree. ¹⁰ Tsa lee gobyern mtsow seny lo Paba, tsa kab Paba, ne lee Paba mstab ne nzhab:

—Tak ne’ a na kwathoz tyen liin nda naka gobyern yezlyu ree, kona kon dib ndroo leettsa kab’ n re kuu nkeki zha na.

¹¹ Leeka lu tak naabdiza naa chu wli koree, nal nda tsuibchop wiz mzin na yez Jerusalén, ne ngwan roo gwodoo naro tsa gol’ n lo Diox.

¹² Ne mwiit zha lee na ngeyodiz kon thib men, neeka mtsowt’ n zhoo lee roo gwodoo naro, neeka re ta nkaltaa re zha nted zha xkiiz Diox ne neeka thib ta leen yez mtsowt’ n tata. ¹³ Re zha ree gagg loo zha wli re kuu nkeki zha na lo’ a. ¹⁴ Per kuu nin nak, ntsow’ n kuu nlaaz Diox kuu nak Xutaa, taxal ndaa Net Kub chaan Jesús kwent, kuu ni re men went nak, tak nyelaz’ n reta kuu nke lo libr chaan Ley ne re kuu mkee re profet chaan Diox. ¹⁵ Leeka taxal nyelaz re zha ree Diox, tataka nyelaz’ n lee re men nguth roban, re zha kuu mtsow kuu wen ne re zha kuu mtsow kuu went.

¹⁶ Kona thibka nkwaan na, tsa nali ton lo Diox ne lo re men.

¹⁷ Bluz leettsa nda’ a tyen liin nda ndiy’ n, tsaraa mren laz’ n, ngwatan na re gon kuu mtaal re zha lo re zha prob, ne noga ngwatan na gon da lo Diox. ¹⁸ Kona ngetsow leettsa mwii re zha Israel na lee roo gwodoo naro Jerusalén, re zha kuu ndyaad Asia, leen ngetsow taxal nabee ley, tsa gak nambin lo Diox. Ne neeka ndot’ n kon naroob men neeka nkeet nee bi. ¹⁹ Kona nzhee ndoblo to re zha kuu mzhenn na, tsa ne zha naa kwan mtsow’ n ne chebee nayii zha ne zha na. ²⁰ Ne os leey nagte tabaa, leeka re zha kuu nzi nzhee ndoblo ne zha naa kwan mwii zha mtsow’ n, leettsa mndon lo re zha kuu nak tsin ne lo re ngwleyy kuu nabee lo re zha Israel. ²¹ O chu tak nex nzhap’ n, leettsa mndon xid re zha, or nzhap’ n: “Tak nyelaz’ n yalndroban tabaa mod tabaa ngetsowno goo na”.

²² Or tata mbin Bech, ne tak ne’ a Bech naa xa nak kwent chaan Jesucrist kuu ndaa

Paba kwent, tsa mlaa Bech kona par tedib wiz, ne nzhab Bech lo re zha:

—Or yaad soldad Lisisas kuu nabee lo thib mil soldad, tsa ne wen nen naa xomod nak kwent goo.

²³ Tsa mnabee Bech, lo soldad kuu nabee lo thib gayoo soldad, tsa kenapka zha Paba, per laa zha tsow Paba kuu nlaaz Paba, ne zha diiz yatwii re amig Paba lo Paba.

²⁴ Leetsa mriida chop tson wiz, tsa mzin Bech kon Drusila kuu nak tsaal Bech, lee Drusila nak zha Israel, tsa mnabee Bech yaadno zha Paba, tsa mbin rop zha kuu nzhab Paba, kuu nak yelaaz men Jesucrist. ²⁵ Per leetsa mndelo Paba mndaa Paba kwent, lee re zha ndoblo nali ban zha, ne taat zha diiz tsow kwerp zha re kuu went, tak tetsin thib wiz kuu naab Diox kwent lo reta zha, ne or mbin Bech re koree, mzeb Bech ne nzhab Bech lo Paba:

—Tyee ne or teyobe lon, tsa bez'n lu tedib welt.

²⁶ Per lee Bech ngebet taa Paba temi lo Bech, tsa telaa Bech Paba, kona kwathoz welt mrez Bech Paba par tediz zha kon Paba. ²⁷ Tbaa mriid chop liin ne lee Bech mroo lo yalgobyern, tsa mla Porcio Festo lugar Bech. Ne nlaaz Bech wen yaan Bech kon re zha Israel, tsa mlaaka Bech Paba tsib.

25

Paba mni lo gobyern Festo

¹ Or nda'a tson wiz mzin gobyern Festo Cesarea, tsa ngwa Festo Jerusalén. ² Tya lee re ngwleyy kuu nabee lo re ngwleyy ne re zha kuu nataak lo re zha Israel, ngwa keki Paba lo Festo. ³ Tsa mnaab zha lo Festo taal Festo Paba Jerusalén. Tak lee xgab re zha nak kuth zha Paba net. ⁴ Per lee Festo mkab ne nzhab:

—Lee Paba nzo tsib Cesarea, ne lee xgab da nak techopta wiz bretab'n tya. ⁵ Ne os cho goo, tak ya kon na Cesarea, ne os lee mbyi'a mtsow thib kuu went, tya tak keki goo zha.

⁶ Lee Festo mletka Jerusalén teeka xon wiz o tsii wiz, tsaraa mre Festo Cesarea, ne tedib wiza mndob Festo ta nabee Festo, ne mnabee Festo yaadno zha Paba. ⁷ Ne or mtsino zha Paba, tsa lee re zha Israel kuu ndyaad Jerusalén, mbig zha ne mkeki zha Paba kon kwaro kuu nathoz, per gagt loo re zha wli kuu mbeze re zha. ⁸ Tsa lee Paba mkab ne nzhab:

—Neeka thib kuu went mtsowt'n lo ley chaan re zha Israel, neeka lo gwodoo naro Jerusalén ne neeka lo César.

⁹ Per lee Festo nlaaz wen yaan lo re zha Israel.

Tsa mnaabdiz Festo lo Paba:

—¿Chu nlaaza ya'a Jerusalén, tsa tya naab'n kwent lo'a lo re koree?

¹⁰ Paba mkab ne nzhab:

—Leen ndo lo zha kuu mto César zha kuu nabee Roma, ta ndoblo naaba kwent lon por re kuu mtsow'n, ne wen ne'a yent kwan kuu went mtsow'n lo re zha Israel. ¹¹ Os leen mtsow'n thib kuu went kuu ndoblon gath'n, ne nit'n kuth goo na, per os wlit re kuu nkeki re zha na, yent cho ndoblo taan lo re zha kuu nayii nen, mas wen btaal'n lo César, tsa naab César kwent lon.

¹² Tsa or ngwalo mnaabdiz Festo lo re zha nzaak kuu nteni Festo, tsa nzhab Festo lo Paba:

—Lu mnaab ya'a lo rey César, mbay nal ya'a lo César tsa.

Paba mndo lo rey Agripa

¹³ Or mriida chop tson wiz, tsa lee rey Agripa rop Berenice mzin Cesarea ne ngwanii rop zha "diox" lo gobyern Festo. ¹⁴ Né tak tyen wiz mlet rop zha tya, tsa lee Festo mndaa kwent chaan Paba lo rey, ne nzhab:

—Nzhee nzo thib mbyi kuu mtaan Bech tsib. ¹⁵ Ne leetsa ngwan Jerusalén, lee re ngwleyy kuu nabee lo re ngwleyy kon re zha kuu nabee xid re zha Israel mkeki re zha zha ne mnaab zha lon, tsa nabeen gath zha. ¹⁶ Per lee na nzhab lo re zha: "Lee re nee zha Roma napt nee costumr nabee nee kuth zha thib zha, leetsa ter to nee zha lo re zha kuu nkeki zha, tsa ne nee naa chu wli o wlit kuu nkeki zha zha". ¹⁷ Per or myaad re zha'a nzhee, mtsant'n sinke tedib wiza mndob'n lo asi da ta nabeen, ne mnabeeen myaadno zha mbyi'a. ¹⁸ Per lee re zha kuu myaad mkeki mbyi'a, mteth zha neeka thib kuu nathoz taxal mtsow'n xgab. ¹⁹ Beeta kuu mbeze re zha nak kwent chaan kostumr re zha, ne kwent chaan Jesús thib zha kuu ngutha, per lee Paba mbeze naban Jesús. ²⁰ Ne net'n naa xomod texnet'n kwenta, tsa mnaabdiz'n lo zha naa chu nlaaz zha ya zha Jerusalén, tsa tya naab zha kwent lo zha. ²¹ Per lee zha mnaab taal'n zha lo César, tsa tya naab César kwent lo zha, kona mnabeeen yoka zha tsib, asta leetsa tak taal'n zha lo César.

²² Tsa nzhab rey Agripa lo Festo:

—Os take noga na nlaz'n gon na kuu ni mbyi'a.

Ne lee Festo mkab ne nzhab:

—Yee tsa gona kuu ne zha.

²³ Ne lee tedib wiza lee rey Agripa rop Berenice mdok lar kuu mas wen na ne mzin zha kon re soldad kuu nabee lo thib gayoo soldad, ne kon re zha kuu nataak yez, ne mzin zha leen yuu ta gon zha kuu gab Paba, ora mnabee Festo ngwaxii zha Paba. ²⁴ Tsa nzhab Festo:

—Rey Agripa, ne reta goo kuu nzi nzhee. Lee mbyi kuu ngwii goo nzhee. Reta zha Israel zha Jerusalén ne re zha nzhee, naab zha lon ne mbez zha ndoblot ban mbyi baa.²⁵ Per leen ndak mtsowt zha neeka thib kuu went par ndoblo zha gath zha, per leeka lee zha mnaab zha ya zha lo César. Ne mlloo'a na yek'n taal'n zha lo César.²⁶ Per net'n naa kwan keen lo yeets kuu taal'n lo César, kwent chaan zha ree, kona mton zha lo re goo, ne lo'a rey Agripa, tsa naabdiza lo zha, tsa tak gon lut kuu keen lo César, or yelo naabdiza lo zha.²⁷ Tak ndak'n went taal'n thib zha kuu nzo tsib lo César ne gabt'n naa kwan mtsow zha.

26

Kuu nzhab Paba lo rey Agripa

¹ Tsa lee rey Agripa nzhab lo Paba:

—Tak kaba kwent chaana nal.

Tsa lee Paba mlit yaa ne mndelo tenzhee nzhab:

—Kwathoz laz'n tak ndon lo'a naltserree rey Agripa, tsa nin ne kab'n por reta kuu nkeki re zha Israel'n,³ tak wen ne'a naa xomod nak costumr chaan re nee zha Israel, re kuu ntsow ngyodiz nee, kona naab'n lo'a xek leettsoo'a kenza kuu nin.

Xomod mban Paba ndala

⁴ 'Reta zha Israel ne naa xomod ngoon laz'n ne yez Jerusalén leettsa mndyeen na.⁵ Noga asta ndala nlebee re zha na, ne nzo mod ne zha koree os nlaaz zha, thibka nak'n fariseo, re zha kuu kwathoz nlaaz tsow kuu mbez lo ley chaan re zha Israel.⁶ Ne lee nal ndon nzhee, tak nyelaz'n lee Diox teroban re zha nguth taxal nzhab Diox lo re teyaa zha ndala.⁷ Ne reta tsuibchop raz zha Israel ngebet wiz kuu tsow Diox kuu mne Diox, ta mod tse ne yaal nzhool zha lo Diox. Kona lee nal rey Agripa, tak nyelaz'n kona, kona nkeki re zha Israel'n.⁸ ¿Chebee kwathoz nagan yelaaz goo lee Diox tak teroban re zha nguth?

*Paba mndaa kwent naa xomod mreke
Paba dits re zha kuu nyelaaz Jesús*

⁹ 'Ndala mtsow'n xgab ndoblo luuuzh'n re zha kuu nyelaaz Jesús, zha Nazaret,¹⁰ ne tabaa mtsow'n yez Jerusalén. Ne kon yeets kuu mndaa re ngwleyy kuu nabee lo re ngwleyy lon, kwaro zha kuu nyelaaz Jesús mloon tsib, ne or nzhuth zha zha mbez'n kwathoz wene.¹¹ Tyen welt mtetin re zha ta nkaltaa re zha nteed zha xkiiz Diox, tsa gab zha nyelaazt zha Jesús. Ne tak kwathoz mnayiin mnen re zha, asta noga mreken dits re zha tedib yez.

*Paba mndaa kwent xomod ngwalaaz
Paba Jesús*
(Hch. 9:1-19; 22:6-16)

¹² 'Ne par kona ndan Damasco mben yeets kuu mndaa re ngwleyy kuu nabee lo re ngwleyy lon.¹³ Per kenza rey Agripa, teeka ndrol wiz, leettsa ndon net ndan, tsa mwiiin thib xni kuu mroo lobee kuu mas ney nake xni wiz, kuu mteni dita ta ndon kon re zha kuu nda kon na.¹⁴ Reta nee ngob lo yu, tsa mbin na thib bos kuu mni lon diiz Hebreo: "Saulo Saulo, ¿chebee ndreke'a dits'n? Leeka lu nkwaana yalti'a, taxal thib maa kuu leeka lee nkee patad yek ya kuu ntsib zha cho maa."¹⁵ Tsa nzhap'n: "¿Cho naka Zha Nabee?" Tsa lee zha ne lon: "Na naka Jesús zha kuu ngereke'a dits."¹⁶ Gwateli tak ngwanin lo'a, tsa tsowa rtsin na, ne tediza re kuu mwii'a naltserree ne re kuu nalraa tsow'n wii'a.¹⁷ Na taala lo re tawlaza zha Israel ne lo re zha kuu nagt zha Israel, ne tsow'n ayuda, tsa yent kwaan tsow re zha lo'a.¹⁸ Na taala lo re zha, tsa xaala lo re zha, tsa laa zha net went ne teke zha dits net wen, ne tsa laat zha nabee Maxuuy lo zha, ne teke zha xnet'n ne yelaaz zha na, tsa tuuy'n re falt zha, tsa diinn zha re kuu diinn re zha kuu nambi nak lo Diox."

Mtsow Paba kuu mwii Paba

¹⁹ Tbaa ngoke rey Agripa, mbin na diiz lo Jesús leettsa ngwani Jesús lon.²⁰ Ne ner yez Damasco mndan kwent xkiiz Jesús, tsaraa Jerusalén ne dita yezlyu Judea ne lo re zha kuu nagt zha Israel. Nzhapa na lo re zha laa zha re falt chaan zha, ne tsow zha kuu wen kuu loo lee zha mtsee'a mod went kuu nak zha.²¹ Ne por kona mzhen re tawlaz'n na lee roo gwodo naro Jerusalén, ne ngwalaaz zha gaguth zha na.²² Per Diox mtsow ayud'n kona ndoka na nzhee asta wiz naltserree, ne ngetaka na kwent xkiiz zha, lo re zha kuu nataak ne lo re zha kuu nataagt, ne kuu mbez'n lo re zha nak re kuu mkee re profet ne re kuu mkee Moisés.²³ Tak lee re zha nzhab: "Lee Crist Kuu Taal Diox Nabee ndoblo rid naroob yalti ne gath; ne lee zha nak kuu ner roban xid re zha nguth, ne taa zha kwent chaan Diiz Chul kuu ndaa yalnaban lo re zha Israel ne lo re zha kuu nagt zha Israel".

*Paba ngwalaaz lee rey Agripa gayelaaz
Jesús*

²⁴ Or tata nzhab Paba: Tsa lee Festo nex mkab ne nzhab:

—¡Naxen nzhak yeka Paba! Tak kwathoz ngeteeda kona ngok bxen yeka.

²⁵ Per lee Paba mkab ne nzhab:

—Nzhak naxent yek'n gobeyn Festo, kuu ngenin nak kuu wli ne kuu nali.²⁶ Lee rey Agripa ndo nzhee, lee zha ne re koree, kona nzebt'n ngetediz'n, tak wen nen lee zha ne reta kuu ngetan kwent, tak ngetediz't'n thib kuu ngok xlaan, kuu yent cho ne.²⁷ Rey

Agripa ¿Chu nyelaaza kuu nzhab re profet?
Na ne nyelaaz luy.

²⁸Tsa lee rey Agripa nzhab lo Paba:
—Telutta gatsowa gan gayelaz' n Jesús.
²⁹Ne lee Paba nzhab:

—Tegal teluttay o ploraay, os nlaaz
Diox nagte beeta lu, sinke noga reta zha
kuu ngeyon kuu ngenin naltserree, ndoblo
yelaaz Jesús taxal na, tegal gagte kon kaden.

³⁰Leettsa ngwalo nzhab Paba re koree,
tsa ngwateli rey Agripa kon gobyern Festo
ne kon Berenice ne kon re zha kuu ndoblo tya,
³¹ne mroo re zha tya ne zhaata mnidedz re
altaa zha kwenta, ne nzhab zha:

—Yent kwan mtsow mbyi ree, tsa ndoblo
gath zha, neeka tsib ndoblot yo zha.

³²Ne lee rey Agripa nzhab lo Festo:

—Ngok gatela'a mbyi ree, os lee zha
ganaabt zha ya zha lo rey César, tsa naab
César kwent lo zha.

27

Mtaal zha Paba Roma

¹Leettsa mloo yek zha taal zha nee Italia,
tsa mndaa zha Paba kon tedib net re zha
kuu nzo tsib lo soldad Jul, kuu nabee lo thib
gayoo soldad, grup Jul le Augusto. ²Ne mke
nee thib bark pwert kuu le Adramitio kuu
mer thoz bi par Asia. Noga Aristarco ndo
kon nee, zha kuu nak zha yez Tesalónica,
yez kuu nzi yezlyu Macedonia. ³Ne lee
tedib wiza mzin nee yez Sidón, tya kwathoz
wen ngok Jul lo Paba ne mzhyl Jul ng-
watwi Paba lo re amig Paba yeza, ne lee re
zha'a mndaa kuu ndow Paba ne kuu ndeche
Paba. ⁴Leettsa mroo nee Sidón, tsa mriid
nee cho yezlyu Chipre kuu nzi leen nitdoo,
tsa tak nee lo mbi, tak kwathoz nax mbi nali
ta nda nee ora. ⁵Ne mrendab nee lo nitdoo
gax yezlyu Cilicia ne Panfilia, tsa mzin nee
yez Mira kuu nzi yezlyu Licia.

⁶Tya lee soldad kuu nabee lo thib gayoo
soldad mzial thib bark chaan yez Alejandría
kuu bi par Italia, ne mtsow zha ngoo nee
leen barka. ⁷Ne tyen wiz kwathoz xlaaz
ndya nee, ne kwathoz nagan mzin nee thib
ta le Gnido. Ne tak naxka mbi lad ta nda
nee, kona ndya nee par Salmón, ne mndaa
nee welt cho yezlyu Creta kuu nzi leen nit-
doo. ⁸Ne kwathoz nagan mriid nee dita
roo nitdoo, asta mzin nee thib ta le Buenos
Puertos, gax ta nzi thib yez kuu le Lasea.

⁹Ne tak mtsana nee tyen wiz lo nit, ne
nathoza yaka nee lo nitdoo, tak ndetsina
tyemp nal, tsa mni Paba lo re zha, ¹⁰ne
nzhab Paba:

—Re goo amig, ndak'n kwathoz nagan ya
re'aa welt ree, tak nzo ryez lux bark ne re
kuu ne bark, asta nzo ryez gathaa.

¹¹Per lee soldad kuu nabee lo thib gayoo
soldad, mas ngwalaaz zha kuu nzhab
bzhaan bark ne kuu nzhab zha kuu ntetee

bark, nake kuu nzhab Paba. ¹²Ne tak nagt
tya ta wen par kwet nee tyemp nal, kona
mer reta zha mtsow xgab wen roo nee tya,
ne tsow nee par tsin nee Fenice, kuu nak
pwert chaan yezlyu Creta, ta nzhaxt xa mbi
ne tsa tya rid nee tyemp nal.

Kwathoz nathoz ngoth mbi lo nitdoo

¹³Tsa mnndelo ngoth lutta mbi lad sur, tsa
mtsow re zha xgab mtsowa zha gan kuu
mtsow zha xgab, ne ndya re nee gax gax roo
yezlyu Creta kuu nzi leen nitdoo. ¹⁴Per lutta
nda mroo nee, leettsa lee thib mbi thoz kuu
le Euroclidón mnndelo ngoth, ¹⁵ne mnndelo
mbi mchop mbi bark, tak par ta nda nee
ndyaad mbi, ngogt raa gatetee nee bark par
ta nlaaz nee, kona mlaa nee mbe mbi bark.
¹⁶Tsa mriid nee cho yezlyu Clauda, thib
yezlyu lut kuu nzi leen nitdoo, tya naxtxa
mbi, tya mxak nee kano lut kuu naliib xann
bark ne mxap neey leen bark. ¹⁷Or ngwalo
mxap nee kano'a leen bark, tsa mliib re zha
bark tsa luxte. Ne tak nzeb zha yetob bark
lo gux kuu le Sirte, tsa mla zha re lon chaan
bark, ne mlaa zha nda bark net ta nchoop
mbi bark. ¹⁸Ne lee tedib wiz tataka nathoz
nax mbi lo nitdoo, tsa mnndelo re zha mni
zha re kuu nzo leen bark leen nitdoo, ¹⁹Ne
lee myon wiz mlobi nee re kwaa nlortsin
leen bark leen nitdoo. ²⁰Ne tyen wiz mwiit
raa nee lo wiz neeka lo re mbel kuu nzib
lobee, ne tak kwathoz nathoz ngoth mbi lo
nitdoo, tsa mtsow re nee xgab laat raa nee.

²¹Ne tak nda'a tyen wiz ndow nee, tsa
mnndeli Paba xid re nee ne mne Paba:

—Re goo amig, mas wen os gagon goo
diiz lon ne garootaa Creta, tsa gariidtaa yalti
ree, ne neeka galuuxtaa neeka thib kwaas.
²²Per lee nal yat leettsoo goo ne neeka
tsebt goo, tak neeka thibaa gath, beeta bark
lux. ²³Tak lee Diox kuu nabee lon, Diox
kuu ngetsow'n tsiiin lo, mtaal thib mandad
chaan mloo lon naabtsi'a, ²⁴ne, mne lon:
“Tsebta Paba, tak ndoblo ya'a lo rey César,
ne kwent chaana laat Diox gath re zha kuu
ndyaad re goo leen bark”. ²⁵Ta mod bloney
goo leettsoo goo, tsebt goo, tak nyelaaz'n
Diox, ne wen nen lee reta kuu mne mandad
chaan Diox lon tak. ²⁶Per lee bark ree
teyetob roo thib yezlyu kuu nzi leen nitdoo.

²⁷Leettsa nda'a tsiiin wiz nda nee lo nit-
doo, yaala mzin nee nitdoo kuu le Adriático,
ne thib lad tedib lad mnndeno mbi bark lo
nitdoo, ne teeka ngulal yaal lee re zha kuu
nke tsiiin leen bark myeen zha mera ndetsin
nee lo yezlyu. ²⁸Tsa mchiix re zha naa plo
naats nit tya, ne galbtsii xoop metr naatse.
Ne mas delant mre zha mchiix zhay, ne
naatslay galbgazka metr. ²⁹Ne mzeb re zha
cha diinn bark cho re ke, tsa mlobi zha thap
ganch yiib par xann bark, tsa yetob bark.

Ne lee re men ndak: "Malaay ngwani'a yezlyu".³⁰ Ne lee re zha kuu nke tsuin leen bark mtsow zha xgab zhonn zha. Ne mndelo zha mla zha kano lut lo nit, mtsow re zha taxal zha kuu ngegobi yiib par yek bark leen nit, beeta par zhonn zha leen kano'a.³¹ Per lee Paba mloo diz lo soldad kuu nabee lo thib gayoo soldad ne lo re soldad, ne nzhab Paba:

—Os lee re zha ree yaant leen bark, laat re goo.

³² Tsa lee re soldad mga doo kuu naliib kano'a ne mlaa zha mlowgwe lo nitdoo.

³³ Leettsa ndeyeni'a yezlyu, lee Paba nzhab lo re zha:

—Ndroblo dowaa lut kwaa, tak nda'a tsuin wiz nzhatta goo ne neeka lut kwaa ter wu goo.³⁴ Na ni lo goo dow goo lut kwaa, tsa gatht goo, tak neeka thib goo luxt neeka thib itsek.

³⁵ Leettsa ngwalo tata nzhab Paba, mzhen Paba tsa pan ne mndaa Paba texkix lo Diox lo re zha, ne mtsow rol Paba pan ne mndelo Paba ndow.³⁶ Tsa reta zha ngoo ney leettsoo ne mdow re zha.³⁷ Chop gayoo tson galbtssi xoop nak re nee kuu nzo leen bark.³⁸ Ne leettsa ngwalo ndow re nee plotha kuu mze leettsoo nee, tsa mni re zha nzob xtil leen nitdoo, tsa xax bark.

Mlux bark lo nitdoo

³⁹ Leettsa ngwani yezlyu, lee re zha kuu nke tsuin leen bark mlebeet zha yezlyu'a, per mwii zha thib yaa nitdoo' ta nzi gux re ladta, ne mtsow re zha xgab tsig zha bark par tya.⁴⁰ Tsa mga zha re doo kuu naliib re yiib ganch kuu nlortsin tsa yetob bark, ne mlaa zha mlay leen nitdoo, ne mxak zha ya kuu ntetee zha bark, tsa telo bark te bark. Ne mmap re zha lon kuu now yek bark, tsa tene mbi, tsa lee bark mndelo mbig lo gux roo nitdoo.⁴¹ Ne mndaab bark ta kwathoz nzi gux ne tya myaan bark. Ne ngwatob yek bark lo gux ne gagt raa wine, ne lee xanne mndelo mlux, tak kwathoz mdinke nitdoo.

⁴² Tsa lee re soldad ngwalaaz aguth re pres, tsa zhonnt re zha lii zha nadar lo nitdoo.⁴³ Per lee soldad kuu nabee lo thib gayoo soldad mzhalyt gagake tata, tak nlaatz zha gath Paba, tsa mnabee zha lo re zha kuu nzhaak nlili nadar, tsa ner re zha'a tab lo nit par roo zha leen nitdoo.⁴⁴ Tsaraa teke re zha kuu ten tabl o re ya byu kuu mroo cho bark. Ne tata mla reta nee mzin nee lo yu.

28

Paba mzin yezlyu Malta

¹ Leettsa ngwalo mroo reta nee leen nitdoo, tsa myeen nee lee yezlyu ta mzin nee le Malta, thib yezlyu kuu nzi leen nitdoo.

² Lee re zha kuu nzo yezlyu'a kwathoz wen

ngok zha lo nee. Ne mtee zha thib bel thoz mbiz nee, tak kwathoz nal ne ndo yi.³ Tsa lee Paba ngwakwaan thib zhuk ya, ne or ngego Paba ya lo ki, ora lee thib mbeel kuu mroo xid ya'a por xlee ki, mkee maay ne mkenginka maa yaa Paba.⁴ Or mwii re zha Malta lee mbeel nkegaa yaa Paba, tsa nzhab zha lo altaa zha:

—Zha mbeth men nak zha ree, ne tegal mlaa zha lo nitdoo, per tathka zha por re kuu mtsow zha.

⁵ Per lee Paba mtsib yaa, tsa ngob mbeela lo bel, ne yent kwan mzhaak Paba.⁶ Reta men ngebet la ki yaa Paba o cha gab Paba ne gath Paba. Per leettsa nda'a or ngewi re men yentka kwan mzhaak Paba, tsa mtsee re men xgab men, ne mndelo re men nzhab Lee Paba nak thib re dio.

⁷ Gax ta mrin nee nax re yu chaan thib mbyi kuu nataak yezlyu Malta, zha ree le Publio, ne mne zha ya nee liz zha, kwathoz wen mkayaa zha re nee, ne mlet nee liz zha tson wiz.⁸ Ne lee xut Publio nax ndak xlee ne yiz bren. Tsa mbig Paba ta naz zha, ne or ngwalo mnaab Paba lo Diox tsa mxoob Paba yaa Paba yek zha, ne lee zha mgwe.⁹ Ne or mbin re mbyiz kuu nzo tya kona, tsa myaad re zha lo Paba ne mtegwe Paba re zha.¹⁰ Kwaro kwaa mndelaaz re zha lo nee. Ne leettsa mndaab nee leen bark par roo nee tya, mndaa zha reta kuu ndeche nee net.

Paba mzin Roma

¹¹ Tson mbee ngoo nee Malta yezlyu kuu nzi leen nitdoo, tsaraa ngoo nee leen thib bark kuu mlet tya tyemp nal, kuu nak chaan yez Alejandría. Ne lad loy nke chop diox kuu nak Cástor ne Pólux.¹² Tsa mzin nee pwert kuu le Siracusa, tya mlet nee tson wiz,¹³ ne tya mroo nee ndya nee dita roo nitdoo, asta mzin nee thib yez kuu le Regio. Ne lee tedib wiz kuu mroo nee tya, ngoth thib mbi kuu ndyaad lad sur, ne asta wiz mrop tsaraa mzin nee yez Puteoli.¹⁴ Ne tya mzaal nee chop tson zha kuu nyelaaz Jesús, re zha ree mnaab lo nee kwet nee lo re zha thib sman, tsa mlet nee lo re zha. Bluz tsaraa ndya nee par Roma.¹⁵ Ne lee re wets zha Roma mne zha lee re nee tsin, ngoo cho zha myaadzii net zha nee, asta yez kuu le Foro chaan Apio ne cho zha myaad asta yez kuu le Tres Tabernas. Or mwii Paba re zha kwaro naley ngoo leettsoo Paba ne mndaa Paba texkix lo Diox ne ngoo ney leettsoo Paba.¹⁶ Leettsa mzin nee Roma, tsa lee soldad kuu nabee lo thib gayoo soldad, mndaa re zha kuu ndyaad yo tsib tya, lo zha kuu nabee roo tsib tya, per lee Paba mlaa zha yo thib yuu zhaata, ta thibka soldad mkenap Paba.

Paba mndaa kwent xkiiz Jesucrist yez Roma

¹⁷ Leettsa nda'a tson wiz mzin nee Roma, tsa mrez Paba re zha Israel kuu nabee xid re zha Israel kuu nzo tya. Leettsa mkaltaa re zha, tsa nzhab Paba lo re zha:

—Re goo wets, tegal yent kwan mtsow'n lo re zha Israel neeka lo re costumre teyaa zha ndala, per mzen re zha na Jerusalén, ne mndaa zha na lo re zha kuu nak tsuin zha Roma. ¹⁸ Ne leettsa mnaabdziz re zha lon, ngwalaaz zha gatelaaz zha na, tak mne re zha yent kwan mtsow par ndoblon gath'n. ¹⁹ Per lee re zha Israel ngok bi, kona mnaab'n mteriid zha na lo César, tsa texnet César kwent da, per nagte tak nlaz'n kekin re tawlazaa. ²⁰ Ta mod mrez'n goo yaadtwii goo lon tsa tedizaa, ne tak nyelaz'n lee re zha nguth roban, leeka taxal nyelaaz re tawlazaa zha Israel, kona naliib'n kon kaden ree.

²¹ Tsa lee re zha nzhab lo Paba:

—Neeka thib yeets kuu mtaal re zha Judea ter kayaa nee kwent chaana, ne neeka thib re tawlazaa kuu mroo Judea, yent kwan kuu went ne zha lo nee kwent chaana. ²² Per nlaaz nee gon nee kuu ne'a, tak nee reta ta went ndediz re men kwent Net Kub chaan Jesús kuu ndyaad lo'a.

²³ Tsa mto re zha thib wiz kuu kaltaa re zha. Ne leettsa mzin wiza kwathoz zha mkaltaa ta nzo Paba. Asta til ne asta mziy yezlyu mndaa Paba kwent lo re zha naa xomod nak yalnabee chaan Diox. Ne tata mtsow Paba tsa yelaaz re zha Jesús, ne mteteed Paba re zha kon re kuu nzhab lo ley chaan Moisés ne kuu mkee re profet ta mbez kwent chaan Jesús. ²⁴ Thib net zha ngwalaaz kuu nzhab Paba, per lee tedib net zha ngwalaazte. ²⁵ Ne tak mbyodiz re zha, mndelo re zha mbi zha. Tsa lee Paba nzhab lo re zha:

—Wli kuu nzhab Mbi Nayon por profet Isaí lo re teyaa zha ndala, or kuu nzhab profet:

²⁶ Gwa ne guz lo re zha yez ree:

Tegal gon gooy ne yent gooy,
tegal wii gooy ne loote lo goo.

²⁷ Tak kwathoz mtsow nad goo leettsoo goo, nzhab zha kuu now nza nzhab goo, ne taxal zha kuu nyenit lo nzhab goo, kona nyenite lo goo, neeka nhont gooy, ne neeka gagt yen gooy, re koree ntsow tsa bretabt goo lon, par tegwen goo. [Is. 6:9-10]

²⁸ Kona byen goo desde nalar, lee yalnaban kuu ndaa Diox, kuu ndan kwent, leey taa zha kwent lo re zha kuu nagt zha Israel ne re zha ree si teyelaaze.

²⁹ Leettsa tata nzhab Paba, lee re zha Israel ndya ne kwathoz mbyodiz re altaa zha.

³⁰ Chopliin nter ngoo Paba yuu kuu ngozh ngoo Paba, ne tyaa nkayaa Paba re zha kuu nyatwii lo Paba. ³¹ Ne mzebt Paba mndaa Paba kwent chaan ta nabee Diox ne kwent chaan Jesucrist Zha Nabee lo re'aa lo re men, ne yent cho gatow lo Paba par gatsowt Paba.

Yeets kuu mkee Paba lo re zha yez Roma

Paba mni "diox" lo re zha yez Roma

¹ Na nak Paba ne ngetsow'n rtsin Jesucrist. Ngekeen yeets ree lo re goo, tak Diox mlin ne mrez'n par nak'n apóstl chaan Jesucrist, ne mtaal Diox'n tsa tan kwent Diiz Chul chaan Diox.

² Ndala nzhab Diox re diiz ree lo re men por roo re profet chaan Diox, ne mkee re profet re diiz ree lo xkeets Diox. ³ Diiz ree ndaa kwent chaan Xgann Diox kuu myaad ngok men, ne lo raz chaan David ngol Xgann Diox, ⁴ lee Mbi Nayon chaan Diox mteroban Jesucrist lo yalguth kon yalney, koree mloo lee Jesucrist nak Xgann Diox, ne lee Jesucrist nak Zha Nabee lo'aa.

⁵ Ne por lee Jesucrist mloo Diox yalnkealaaz chaan Diox lo'aa. Ne por lee Jesucrist mkayaa nee yalnabee lo Diox par nak nee apóstl, tsa taa nee kwent xkiiz Diox lo re zha kuu nagt zha Israel, tsa yelaaz re zhay ne gon zha diize. ⁶ Ne xid re zha'a nzo re goo, zha kuu nak zha yez Roma, kona mrez Jesucrist goo, tsa gak goo zha Jesucrist. ⁷ Lo reta goo zha yez Roma nin, kwathoz nke leettsou Diox goo, kona mli Diox goo, tsa gak goo zha nali lo Diox. Nlaz'n lee Xutaa Diox ne Jesucrist Zha Nabee lo'aa, loo yalnkelaaz chaan lo re goo ne tsow wen kwin goo.

Paba nlaaz ya yez Roma

⁸ Kuu ner ntsow'n nak, ndan texkix lo Diox kon yalnabee chaan Jesucrist, ne naab'n lo Diox por reta goo, tak reta ta ndediz wen re men xa nyelaaz goo Jesucrist. ⁹ Ne kon dib ndroo leettsou nkeen tsuin lo Diox, ndan kwent Diiz Chul chaan Xgann Diox, ne lee Diox ne, gadata wiz naab'n lo Diox, tsow Diox ayud goo. ¹⁰ Ne thibka naab'n lo Diox yal'n lo goo, os lee Diox nlaaz Diox tsa yal'n lo goo. ¹¹ Kwathoz nlaz'n yal'n lo goo, tsa tsow'n ayud goo, tsa masraa ney to goo lo Diox. ¹² Ne tsa thibka yo ney leettsou'aa, tak nyelaazaa Jesucrist.

¹³ Re goo wets'n ne btan na, nlaz'n ne goo tyen welt ngwalaz'n gayal'n lo goo, tak nlaz'n wiin re kuu wen kuu ngetsow goo, taxal ntsow tedib net re zha kuu nagt zha Israel. Per kwathoz kuu ntow lon ta mod terka yatwiin naa ma goo. ¹⁴ Ne kwathoz nda leettsou, tak ter tan kwent xkiiz Jesucrist lo re zha kuu ndediz diiz gryeg ne lo re zha kuu ndedizte, lo re zha nzhaak ne lo re zha kuu gagt. ¹⁵ Kona kwathoz nlaz'n yal'n lo re goo zha yez Roma, tsa tediz'n Diiz Chul chaan Diox lo re goo.

Yalney chaan Diiz Chul

¹⁶ Nthoyt'n ndan kwent Diiz Chul, tak leey nak yalney chaan Diox, ne por Diiz Chul koo Diox reta zha kuu nyelaaz Jesucrist lo yalguth, ner ner re tawlaw'z'n zha Israel, tsaraa re zha kuu nagt zha Israel. ¹⁷ Ne Diiz Chul ree nloo naa xomod ntsow Diox nzhab nali'aa lo Diox, tak nyelaazaa Jesucrist, taxal nzhab lo xkeets Diox: "Lee zha kuu nali ndo lo Diox, tak nyelaaz zha Diox, kona taban zha". [Hab. 2:4]

Re kuu went kuu ntsow re men

¹⁸ Desde yibaa ndyaadla yalnayii chaan Diox, dits reta zha kuu ntsow kuu went, re zha kuu nalit ndo lo Diox, por re kuu went kuu ntsow zha, tak nlaazt zha yelaaz tedib net re zha kuu wli. ¹⁹ Tak reta zha ne zha ne nelebee zha naa cho nak Diox, tak leeka lee Diox mloo Diox naa cho nak Diox lo zha, tak leeka Diox mloo Diox lo re zha. ²⁰ Nloot Diox, per kwathoz wen nloo naa cho nak Diox lo reta men, por reta kwaaw mdexkwaa Diox. Tak desde leettsa mdexkwaa Diox yezlyu, mloo Diox naa cho nak Diox, mloo Diox kwathoz ney Diox ne mloo Diox nambi nak Diox. ²¹ Kona lee re zha kuu ntsow kuu went, yent kwan kuu kelo zha lo Diox, leettsa naab Diox kwent lo zha! ²² Tegal ne'a zha naa cho nak Diox per ngwalaazt zha Diox, mtsow nataagt zha Diox ne neeka mndaat zha texkix lo Diox, leel ngok naxen yek re zha, ngok nad leettsou zha ne titanaz mkow yek zha. ²³ Tegal mbezz zha kwathoz nzhaak zha, per leel ngok bxen zha, ²⁴ tak mtsee zha Diox kuu kwathoz wen nak, Diox kuu thitanax nzhatht, por re diox kuu nyelaaz re men kuu na taxal thib men, taxal maa kuu ndob xiil, taxal re maa kuu ndob thap nii, ne taxal re maa kuu ndedoob lo yu, ne reta koree nzhatht.

²⁵ Kona mlaa Diox zha, tsa tsow zha re kuu went ne re kuu yu kuu nlaaz kwerp zha, re kuu ndoblo thoy zha tsow zha. ²⁶ Tak mtsee zha re kuu wli chaan Diox por re kuu wli, ne mtsow nataak zha re kuu mdexkwaa Diox ne nzhoor zha loy, per mtsow nataagt zha Diox ne neeka mbilt zha lo Diox kuu wen nak, Diox kuu mdexkwaa reta kwaaw, Diox kuu ndoblo gol men lo thitanax. ²⁷ Tata gake!

²⁸ Kona thitanax mlaa Diox zha, tsa mtsow zha reta kuu nlaaz kwerp zha, re kuu ndoblo thoy zha tsow zha. Asta re ngot mlaa ngot nzhab ropt raa ngot kon tsaal ngot, leel nzhab ropt ngot leeka rop tagot ngot. ²⁹ Ne leeka tata ntsow re mbyi, nzhab ropt raa zha kon tsaal zha. Sinke ngoo yek zha ntsow zha reta kuu went kuu nlaaz kwerp zha, nzhab ropt zha kon leeka tabyi zha, thib kuu thitanax went. Ne re koree ntsow kwathoz

ndriid zha yalti ne ndroo yalnathoy zha, por re kuu went kuu ntsow zha.

²⁸ Ne tak nlaazt zha lebee zha Diox, kona thitanax mlaayaa Diox zha, tsa tsow zha loka kuu nlaaz zha, re kuu ndoblot zha tsow zha. ²⁹ Ne ngok zha:

zha kuu naliit nak,
ngok zha zha went,
ndablaaz zha reta kwaa,
ntsin leettsoo zha kuu went,

ndablaaz zha chaan taben zha,
nzhuth zha taben zha,

nkwaan zha zhoo,

nkedi zha,

nakap nak zha,

ndediz zha diiz yizh.

³⁰ Nlooz zha taben,
nayii zha ne zha Diox,
ndak zha nataagt tedib men lo zha,
ntsow nataak zha leeka lee zha,
ndrub zha,

ngab re kuu went yek zha,

nzhont zha diiz lo xut zha ne lo xnaa zha.

³¹ Yent kwan nyen zha,

legalt zha,

nket leettsoo zha ne nlatta leettsoo zha ne
zha taben zha.

³² Ne tegal wen ne zha lee Diox nzhab:
“Loka zha kuu ntsow re koree ndoblo zha
gath zha”. Ne leel masraa ntsow zhay, ne
wen nyoo leettsoo zha ngwii zha re zha kuu
ntsow re kuu went ree.

2

Nali naab Diox kwent

¹ Leettsa nkeki'aa tabenaa, nkeki'aa
leeka lee'aa, tak nye leettsoo'aa nloozaa
ne nkeki'aa tabenaa, ne si leeka kuu ntsow
tabenaa ntsowaa; kona yent kwan kelo'aa
kabaa lo Diox, leettsa naab Diox kwent
lo'aa. ² Per ne'a nali naab Diox kwent lo re
zha kuu tata ntsow. ³Kona, ¿kwan ntsow goo
xgab? Leettsa nkeki'aa tabenaa ne ntsowaa
leeka kuu ntsow tabenaa, ¿chu ntsow goo
xgab, tak laa'aa lo yalnayii chaan Diox?
⁴ ¿Chu ndak goo nataagt ya'wen chaan Diox
lo'aa ne chu ndak goo nataagt xa nxek
leettsoo Diox ne Diox re'aa? Ndoblo yen
goo lee yalnkelaaaz chaan Diox nak kuu
ntsow, nlaa'aa re kuu went ne nyelaazzaa
Diox. ⁵ Ne tak nayez yek goo, kona nlaazt
goo yelaaz goo Diox, kona masraa ngetsib
goo yalnayii chaan Diox dits goo, leettsa
tsin wiz kuu nali naab Diox kwent lo reta
men, ⁶ ne tsya kix Diox lo reta men taxalta
kuu mtsow men. ⁷ Re zha kuu thibka ntsow
kuu wen, nkwaan zha tsa wen ne Diox zha,
nkwaan zha xni chaan Diox ne nkwaan zha
taa Diox yalnaban kuu thitanax lo zha. ⁸ Per
lee re zha kuu nkwaan byo ne kuu went, re
zha kuu ndaat yek gon kuu wli, re zha kuu
ndeke dits kuu wlit, Diox naab kwent lo re

zha'a ne teteti Diox re zha'a. ⁹ Lee yalnayii
chaan Diox la dits reta zha kuu ntsow kuu
went, ne kwathoz nalatt rid re zha'a. Ne ner
ner re tawlaz'n zha Israel ne noga re zha
kuu nagt zha Israel. ¹⁰ Per lee re zha kuu
ntsow kuu wen, wen wii Diox lo zha, tsow
nataak Diox zha ne tsow Diox wen kwin zha
kon Diox. Ner ner lo re tawlaz'n zha Israel
tsow Dioxhe ne noga lo re zha kuu nagt zha
Israel.

¹¹ Yegwal naab Diox kwent lo reta men,
tak yegwal nak reta men lo Diox. ¹² Lo reta
zha kuu napt ley kuu mndaa Diox lo re nee
zha Israel, teteti Diox re zha'a por re kuu
went kuu mtsow zha. Ne reta nee zha Israel
kuu nap ley kuu mndaa Diox lo nee, Diox
naab kwent lo nee taxal nzhab lo ley kuu
mndaa Diox lo nee. ¹³ Ne nagt tak nzhon
zha kuu nzhab lo ley kona kayaa Diox zha
taxal zha nali, sinke re zha kuu nzhon diiz
re kuu nzhab lo ley, re zha'a kayaa Diox
taxal zha nali. ¹⁴ Ne leettsa lee re zha kuu
nagt zha Israel, ntsow zha taxal nzhab lo ley
kuu mndaa Diox lo nee, tegal napt zha leya,
per kona nak taxal nap zha ley chaan Diox
leen leettsoo zha. ¹⁵ Tak lo re kuu ntsow zha
nloo nap zha ley leen leettsoo zha. Ne leeka
leettsoo zha ne xgab zha nloo lo zha, tsa ne
zha naa chu ngetsow zha kuu wen o kuu
went. ¹⁶ Asta wiz kuu to Diox Jesucrist tsa
naab Jesucrist kwent reta kuu xgaats kuu
ntsow reta men, taxal nak Diiz Chul kuu
ndan kwent.

Re zha kuu wlipaa nak zha Israel

¹⁷ Os lee goo mbez goo nak goo zha Israel,
ne nyelaaz goo kuu nzhab lo ley kuu mndaa
Diox lo Moisés, ne ndrub goo mbez goo zha
Diox nak goo. ¹⁸ Ne wen ne goo naa kwan
nak kuu nlaaz Diox tsow goo, tak ntede goo
ley, tsa ne goo naa kwan nak re kuu wen
kuu ndoblo goo tsow goo. ¹⁹ Ndak goo tak
loo goo xnet Diox lo re zha kuu nak taxal
syeg, ne ndak goo tak goo teni goo lo re zha
kuu nzi lo yalkow. ²⁰ Ne ndak goo tak loo
goo kuu wen lo re zha kuu nayez yek lo xkiiz
Diox, noga ndak goo tak loo goo xkiiz Diox
lo re zha kuu gagt xkiiz Diox, tak nap goo
ley kuu mndaa Diox lo goo, ne tak lo xkiiz
Diox nke re yalnzaak ne re kuu wli. ²¹ Os
lee goo nteteedt goo tedib net men. ¿Chebee
nteteedt goo leeka goo? Mbez goo ndoblot
lowann men, ne ¿chebee nlowann goo tsa?
²² Mbez goo ndoblot gak rop men kon tedib
zha kuu nagt tsaal men. Ne ¿chebee ntsow
gooy? Ne mbez goo nayii goo ne goo re diox
kuu nagt Diox, ne ¿chebee nlowann goo re
kuu nzo leen gwodoo? ²³ Kwathoz ndrub
goo, tak goo nak kuu mkayaa ley lo Diox,
per tak nzhont goo kuu nzhab lo ley, kona
ntsow ntsow nataagt goo Diox. ²⁴ Taxal
nzhab lo xkiiz Diox: “Re zha kuu nagt zha

Israel ntsow nataagt zha Diox por re goo".
[Is. 52:5]

²⁵ Nataak seny chaan re zha Israel lo goo, os nzhon goo diiz kuu nzhab lo ley kuu mndaa Diox lo Moisés, per os nzhont goo diize, nak goo taxal zha kuu nket seny. ²⁶ Ne os lee zha kuu nket seny chaan re zha Israel, nzhon zha diiz re kuu nabee ley; zha'a naab taxal zha kuu nke seny, tegal nkete zha. ²⁷ Kona lee zha kuu nket seny, per nzhon zha diiz kuu nzhab lo ley, zha'a naab kwent lo zha kuu nzhont diiz kuu nzhab lo ley, tegal nap zha ley ne tegal nke seny chaan re nee zha Israel. ²⁸ Tak lee re zha kuu wlipaa nak zha raz Israel, nagte re zha kuu ngol lo re zha Israel, ne re zha kuu wlipaa nke seny nagte re zha kuu nke seny. ²⁹ Sinke lee re zha kuu wlipaa nak zha Israel, re zha'a naab re zha kuu wlipaa nke seny, re zha'a nak re zha kuu nke seny chaan Diox leettsoo; ne Mbi Nayon chaan Diox nak kuu ntsow kona nagte ley, kona nataagt kuu ntsow re men xgab, kuu nataak nak wen nzo leettsoo Diox ne Diox re zha.

3

1 ¿Kwan ntsow nee gan tak nak nee zha Israel? Ne ¿pa nataak nke seny nee? ² Nataake tak lo re nee mndaa Diox xkiiz Diox. ³ Wene, ¿per kwan gak os lee thib re tawlaz nee yelaazt raa Diox? ¿Chu kona tsow laa Diox ne gagt raa Diox nali lo nee? ⁴ ¡Nagte tata! Thibka ntsow Diox kuu ni Diox, tegal reta men nak zha kuu nkedi; tak lo xkeets Diox nzhab:

Diox reta men ne, nali naka lo re kuu ni'a, ne os cho naab kwent lo'a, lu tsow gan. [Sal. 52:4]

⁵ Per os por re kuu went kuu ntsowaa, nloo lee Diox nali nak, ¿kwan gabaa? ¿Chu went nak Diox kona nayii Diox leettsa ntsowaa kuu went, ne nteti Diox re'aa? (Per tak men na kona tabaa mbez'n.) ⁶ ¡Nagte tata! Tak os lee Diox nalit nak Diox, ¿Xomod naab Diox kwent lo reta men yezlyu ree?

⁷ Per os por nkedin, kona ntsow nloo kuu wli chaan Diox, ne os por nkedin ntsow nataak zha Diox ¿Chebee bee naab Diox kwent lon taxal lo zha kuu ndab falt? ⁸ Os tatay, tak gabaa. "Tsowaa kuu went tsa loo kuu wen", taxal nlooz zha nee ni zha lee nee tabaa nloo nee, per wlipaa teteti Diox re zha kuu tata nak.

Retalee nakaaz zha kuu ndab falt

⁹ ¿Kwan ntsow goo xgab? ¿Chu ndak goo mas nataak nee nake tedib net re men? ¡Nagte tata! Taxal mkeea'a na, lee Diox naab kwent lo reta men, lo re zha Israel ne lo re zha kuu nagt zha Israel, tak reta zha zha ndab falt nak zha. ¹⁰ Taxal nke lo xkeets Diox:

¡Thitanax neeka thib zha nali yent!

¡Neeka thib zha!

¹¹ Neeka thib zha nyente, neeka thib zha nkwaant Diox.

¹² Reta zha mlaa zha Diox, reta zha mzhen net went, lalka ngok re zha myaan bxen zha.

¡Yent neeka thib zha kuu ntsow kuu wen! ¡Neeka mase thib zha! [Sal. 14:1-3]

¹³ Lee yeer yen zha nak taxal roo baa kuu ndezhaal,

Kon loz zha nkedi zha. [Sal. 5:9]

Lee re diiz kuu ndediz zha, nak taxal nit kwaan kuu ndroo xann keley mbeel. [Sal. 140:3]

¹⁴ Ne kon roo zha ngode zha re men, ne leeka kon roo zha ni zha re diiz nayan lo re men. [Sal. 10:7]

¹⁵ Ne kon rop nii zha nda zha lijer par kuth zha taben zha.

¹⁶ Reta ta nda zha ntsow zha ngyo re men ne ntsow zha ndriid re men yalti.

¹⁷ Net zha kuu wen kwin re men. [Is. 59:7-8]

¹⁸ Ne thitanax nzebt zha ne zha Diox. [Sal. 36:1]

¹⁹ Ne ne'a lee, lee reta kuu nzhab lo ley chaan Diox, lo re zha kuu nyelaaz ley lo re zha'a ni ley. Kona neeka thib re zha'a gagt gab zha, net zha naa kwan nak falt, leettsa naab Diox kwent lo reta men. ²⁰ Gagt gakaa zha wen lo Diox, anta por nyelaazaa ley. Tak por lee ley ne'aakaa zha kuu ndab falt.

Tsow zha gan yalnaban tak nyelaaz zha Jesucrist

²¹ Per lee nal laa'aa ley thiblad, tak mloo'a Diox naa xomod nali to'aa lo Diox, ne leeka ley ne re profet kuu ngoo ndala mndaa kwent naa xomod ndoblo nali to'aa lo Diox.

²² Nakaa zha nali lo Diox, tak nyelaazaa Jesucrist ne por Jesucrist reta men tak gag zha nali lo Diox, tak lalta nak reta men lo Diox. ²³ Reta men mtsow kuu went, ne ndoblot zha ndya zha lo Diox. ²⁴ Per por yalwen chaan Diox kayaa Diox re'aa, taxal zha nali ne mtelaa Diox re'aa, por kuu mtsow Jesucrist. ²⁵ Mlaa Diox nguth Jesucrist delant lo re men por retalee, leettsa mxo Jesucrist ren por lee, tsa wen kwinaa kon Diox tak nyelaazaa nguth Jesucrist; ne mloo Diox wlipaa nke leettsoo Diox re'aa, kona mxek leettsoo Diox mne Diox re'aa lo reta kuu went kuu mtsowaa ndala, ²⁶ tsa ne re men nal tyemp ree lee Diox wlipaa nali nak, ne tsa ne re men lee Diox kayaa men, taxal zha nali tak nyelaaz men Jesucrist.

²⁷ Kona, ¿plo nyaan yalbruh chaan re men lo Diox? ¡Mluzhe! Tak gagt gak zha zha nali lo Diox, tak nzhon zha kuu nzhab lo ley chaan Moisés; sinke tak nyelaaz zha Jesucrist, kona nak zha zha nali lo Diox.

28 Kuu yelo nin lo goo nak, nkib Diox falt zha, tsa gak zha zha nali lo Diox, tak nyelaaz zha Jesucrist, ne nagte, tak nhon zha diiz kuu nhhab lo ley. ²⁹ ¿Chu anta Diox re zha Israel nak Diox? ¿Chu nagt Diox, Diox reta zha kuu nagt zha Israel? Wlipaa lee Diox nak Diox chaan reta men kuu nzi dita lo yezlyu, ³⁰ tak thibka Diox nzo; ne lee Diox kayaa re zha taxal zha nali tak nyelaaz zha Jesús, tegal nke seny re zha Israel zha o nkete zha. ³¹ Kona, ¿kwan ntsow goo xgab? ¿Chu ntsow nataagtaa ley tak nyelaazaa Jesucrist? ¡Nagte tata! Sinke tata mod nlloo'aa nataaka ley.

4

¹ Kona, ¿kwan mtsow Abraham gan ley lo'aa? ² Os nali mndo Abraham lo Diox, tak mbin Abraham diiz taxal nhhab lo ley, ngok galey Abraham, per ndoblot galey Abraham lo Diox. ³ Tak lo xkiiz Diox nhhab: "Tak ngwalaaz Abraham Diox, kona mkayaa Diox Abraham taxal thib zha nali". [Gn. 15:6] ⁴ Tak os lee thib zha kuu nke tsiiin, lee temi kuu ntsow zha gan nagte thib kuu tabataa ndelaaz patron zha lo zha, leey nak thib kuu mtsow zha gan, tak mke zha tsiiin. ⁵ Ne lee zha kuu mtsowt neeka thib kuu, per nyelaaz zha lee Diox ntsow nali re zha kuu ndab falt, tekayaa Diox zha taxal zha nali, tak nyelaaz zha Diox. ⁶ Kona noga rey David nhhab, kwathoz wen nda re zha kuu kayaa Diox zha taxal zha nali tegal kwan mtsow zha. ⁷ Nzhab David:

Kwathoz wen nda re zha kuu mtuyy Diox re falte;
kwathoz wen nda re zha kuu thitanax mte-
laatz raa Diox re kuu went kuu mtsow zha.

⁸ ¡Kwathoz wen nda re zha kuu naabt Diox kwent lo! [Sal. 32:1-2]

⁹ ¿Kwan ntsow goo xgab? ¿Chu beeta re nee kuu nke seny, ndoble nee kayaa nee yalwen ree o chu noga re zha kuu nagt zha Israel kuu nket seny? Tak ni'a na: "Tak ngwalaaz Abraham Diox, kona mkayaa Diox Abraham taxal zha nali". [Gn. 15:6] ¹⁰ Per, ¿pol mkayaa Diox Abraham taxal zha nali? ¿Chu leettsa nke'a Abraham seny o leettsa terka ke seny Abraham? Wli leettsa terka ke seny Abraham mkayaa Diox Abraham taxal zha nali, ne nagte leettsa mke Abraham seny. ¹¹ Diox mndaa seny lo Abraham, tak senya mloo lee Abraham nali ngok lo Diox, tak ngwalaaz Abraham Diox. Ne lee Abraham ngwalaaz Diox, leettsa terka ke seny Abraham, kona lee Abraham nak xut reta zha kuu nyelaaz Diox, tegal nket seny zha. Ne nkayaa Diox re zha taxal zha nali, tak nyelaaz zha Diox, taxal ngwalaaz Abraham Diox. ¹² Ne noga nak Abraham xut reta zha kuu nke seny, os lee zha nyelaaz zha Diox

taxal ngwalaaz Abraham Diox, leettsa terka ke seny Abraham.

Kuu nataak nak yelaazaa Diox taxal ngwalaaz Abraham Diox

¹³ Lee Diox nhhab lo Abraham ne lo re zha kuu nak raz Abraham, lee Diox taa yezlyu lo re zha. Per nhhabit Diox taa Diox yezlyu lo re zha, tak mbin Abraham diiz lo ley, sinke tata nhhab Diox, tak ngwalaaz Abraham Diox; ne mkayaa Diox Abraham taxal zha nali. ¹⁴ Per os beeta re zha kuu nhon diiz kuu nhhab Diox, nlortsint nyelaazaa Diox tsa, ne lee xkiiz Diox nataagt raa tsa. ¹⁵ Tak lee ley ndyaadno yalnayii chaan Diox, tak gagt gon men diize; per ta yent ley gagt keki zha thib men, ne gab zha lee men nhont diiz.

¹⁶ Kona lee diiz kuu nhhab Diox lo Abraham ne lo re zha raz Abraham, noga mndaa Diozhe lo'aa, zha kuu nyelaaz Jesús. Ne nagte beeta lo re zha kuu nhon diiz lo ley, sinke noga lo retalee mndaa Diozhe, tak nyelaazaa Diox taxal ngwalaaz Abraham Diox. Ne tata mod lee Abraham nak xutaa. ¹⁷ Taxal nhhab lo xkeets Diox: "Mton lu tsa gaka xut kwathoz men re yez kuu nzi lo yezlyu". [Gn. 17:5] Diox kuu ngwalaaz Abraham nhhab koree lo Abraham, Diox kuu ndaa yalnabon lo re zha nguth, Diox kuu ndexkwaa re kuu yent, ne beeta kon xkiiz Diox ntsow Diozhe. ¹⁸ Tak kona nhhab Diox lo Abraham: "Kwathoz men gak raz chaana". [Gn. 15:5] Per tegal ngogt gagak diiz kuu nhhab Diox lo Abraham tsyaka, tak ngooxa Abraham tsya, per thib ngwalaaz Abraham Diox ne mlet Abraham mkayaa Abraham kuu nhhab Diox lo Abraham, ne kona ngok Abraham: "Xut kwathoz men re yez". ¹⁹ Neeka lut ngogt chop xgab Abraham, tegal napa Abraham teeka thib gayoo liin tsya; ne tegal mera gath rop tsaalta Abraham tsya ne tegal gagt gap tsaal Abraham mbet. ²⁰ Tegal tatay, thib ngoo yek Abraham, lee Diox tsow kuu nhhab Diox lo Abraham. Ney mndo Abraham ngwalaaz Abraham Diox ne mbil Abraham lo Diox. ²¹ Ne wen wen ne Abraham lee Diox nap yalney, par tsow Diox kuu nhhab Diox. ²² Kona mkayaa Diox Abraham taxal zha nali, tak ngwalaaz Abraham Diox.

²³ Ne leettsa ndaa xkeets Diox kwent, lee Diox mkayaa Abraham taxal zha nali, nkete beeta por Abraham; ²⁴ noga mkey por re zha kuu nyelaaz Diox kuu mteroban Jesucrist, Zha Nabee lo'aa, kona no'aa tekayaa Diox re'aa taxal zha nali, ²⁵ tak lee Jesucrist nguth por reta faltaa, ne mroban Jesucrist tsa kayaa Diox re'aa taxal zha nali.

5

Tak nyelaazaa Jesucrist kona ngok nambi'aa lo re faltaa

¹ Lee nal, tekayaa Diox re'aa taxal zha nali tak nyelaazaa Jesucrist, ne wen nzi'aa kon Diox por kuu mtsow Jesucrist. ² Ne tak nyelaazaa Jesucrist kona mndaa Diox yalwen ree lo'aa, ne nali nzi'aa lo yalwen ree, ne lazaa ngebetaa yo'aa kon Diox lo xni chaan Diox. ³ Ne nagte beeta koree, noga lazaa leettsa ndriidaa yalti; tak ne'aa leettsa ndriidaa yalti masraa nxekaa. ⁴ Ne leettsa nxekaa masraa ney ndo'aa lo Diox, ne leettsa ney ndo'aa nyelaazaa Diox, thib nzo yekaa ngebetaa kuu taa Diox. ⁵ Ne leettsa ngebetaa kuu taa Diox, wlipaa tekayaa re leey. Tak nzo yalnkelaaz chaan Diox leettsoo'aa; yalnkelaaz kuu mndaa Diox lo'aa por Mbi Nayon chaan Diox kuu mndaa Diox lo'aa.

⁶ Tak leettsa ngogt gato'aa nali leeka lee'aa lo Diox, tsa myaad Crist Kuu Mtaal Diox Nabee nguth por reta men kuu nalit ndo lo Diox, ne mer wiz kuu mli Diox myaad Jesucrist. ⁷ Wlipaa na nin, kwathoz nagan taa thib zha diiz gath zha por tedib zha, tegal por thib zha kuu kwathoz wen nake. Per ser nzo cho zha teye leettsoo zha, taa zha zha gath zha por thib zha kuu kwathoz wen nak. ⁸ Per mloo Diox yalnkelaaz chaan Diox lo'aa, ne tegal zha ndab falt nakaa lo Diox, lee Jesucrist nguth por reta lee. ⁹ Ne lee nal nambi re'aa lo re faltaa, tak lee Jesucrist nguth por lee ne mtelaa Jesucrist re'aa lo yalnayii chaan Diox. ¹⁰ Ndala mtsowaa kuu went kuu nlaazt Diox; ne mtsow Diox wen mrinaa kon Diox leettsa nguth Xgann Diox; ne os mtsow Diox wen mrinaa kon Diox por Xgann Diox tegal mtsowaa re kuu went, wlipaa tekeno'aa yalnaban kuu thitanax. ¹¹ Ne nagte beeta koree, noga kwathoz naley nzo leettsoo'aa, tak wen nzi'aa kon Diox, por kuu mtsow Jesucrist Zha Nabee lo'aa.

Kuu mtsow Adán ne kuu mtsow Jesucrist

¹² Por thibka zha mndaab falt lo yezlyu ree, ne por falta mndaab yalguth lo yezlyu, kona reta men nhzath, tak reta men ndaa falt. ¹³ Leettsa terka taa Diox ley lo Moisés, nzo'a falt lo yezlyu; per gagt keki zha thib zha leettsa yent ley. ¹⁴ Ne tegal tatay, desde wiz kuu mban Adán ne asta wiz kuu mban Moisés, reta men nguth, tegal mndaaat zha falt taxal mndaa Adán falt, per reta men mdiinne ne lo reta men mriid kuu mtsow Adán, leeka tata lo reta men mriid kuu mtsow Jesucrist kuu myaad bluz.

¹⁵ Per lee falt chaan Adán nagte taxal kuu nataak kuu ndelaaz Diox lo'aa. Tak os por falt chaan thibka mbyi mtsow kwathoz zha nguth. Masraa nataak yalnaban kuu tabaata ndelaaz Diox lo'aa, por thibka mbyi kuu le Jesucrist, ne ndaa Diozhe lo kwathoz

men. ¹⁶ Yegwalt nak falt kuu mtsow thibka mbyi, kon kuu nataak kuu ndelaaz Diox lo'aa, tak beeta por falt chaan thibka mbyi nhzath reta men, per lee kuu ndelaaz Diox lo'aa, ntsow kwathoz falt chaan re men yuyy, tsa kayaa Diox zha taxal zha nali. ¹⁷ Tak os por falt chaan thibka mbyi mzin yalguth lo reta men, leeka tata wlipaa taban re zha kuu nyelaaz Jesucrist, re zha kuu mtsow nali Diox por yalwen chaan Diox.

¹⁸ Kona por falt Adán nhzath reta men; leeka tata por kuu wen kuu mtsow Jesucrist, tekayaa Diox re zha taxal zha nali, tsa keno zha yalnaban. ¹⁹ Leeka taxal mbint thibka mbyi diiz lo Diox, kona reta men ndaa falt, leeka tata por thibka mbyi kuu mbin diiz lo Diox, kona retalee tekayaa Diox taxal zha nali.

²⁰ Diox mndaa ley par mloo ley naa xomod nak re falt; per leettsa mloo naa xomod nak re falt, masraa mloo Diox yalwen chaan Diox lo reta men. ²¹ Leeka taxal por falt ngoo yalguth, tataka por yalwen chaan Diox mtsow Diox nakaa zha nali lo Diox, tsa keno'aa yalnaban por Jesucrist Zha Nabee lo'aa.

6

Lo falt nakaa taxal zha nguth per kon Jesucrist nabanaa

¹ Kona, ¿kwan ntsw goo xgab? ¿Chu bee tataaka lee falt, tsa masraa loo Diox yalwen chaan Diox? ² ¡Thitanax ndoblot gake tata! Tak lee'aa nakaa taxal zha kuu nguth lo re falt; kona ndoblot raa taa'aa falt tedib welt. ³ ¿Chu net goo, leettsa ngokleyyaa, thibka ngokaa kon Jesucrist leettsa nguth Jesucrist? ⁴ Tak leettsa ngokleyyaa, leey nak mod nguthaa ne mgaatsaa, tsa banaa lo thib yalnaban kub; leeka taxal mgaats Jesucrist leettsa nguth Jesucrist ne mteroban Diox Jesucrist kon yalney chaan Diox.

⁵ Os lee'aa thibka nguthaa kon Jesucrist, leeka tata robanna taxal mroban Jesucrist. ⁶ Ne ne'a re'aa lee zha went kuu ngokaa ndala, mke'a lo kruz kon Jesucrist, par mluux zha kuu went kuu ngokaa, kona nabeet raa falt lo'aa nal. ⁷ Tak lee zha kuu ngutha gagt raa taa zha falt. ⁸ Ne os lee'aa ngutha lee kon Jesucrist, noga ne'a lee tabanaa kon Jesucrist, ⁹ ne ne'a re'aa lee Jesucrist mroban, ne thitanax gath raa Jesucrist; ne thitanax nabeet raa yalguth lo Jesucrist. ¹⁰ Thibka welt nguth Jesucrist por re falt chaan re men, ne nabani Jesucrist ne ntsw Jesucrist kuu nlaaz Diox. ¹¹ Leeka tata no'aa ndoblo gakaa taxal zha nguth lo re faltaa, per ndoblo gakaa zha kuu naban lo Diox, tak thibka nakaa kon Jesucrist.

¹² Taat raa lee diiz nabee falt lo kwerpaa, par tsowaa kuu went kuu nlaaz kwerp. ¹³ Ne neeka taataa kwerpaa par tsowaa kuu

went. Mas wen taa'aa ditalee lo Diox, tsa tsow lee kuu nlaaz Diox, tak lee Diox mterobanaa. ¹⁴ Ne ndoblot raa nabee falt lo'aa par tsowaa re kuu went, tak nzhontaa diiz lo ley sinke lee'aa nzhon diiz lo Diox, tak mloo Diox yalwen chaan Diox lo'aa.

Lee nal nakaa zha kuu nke tsuin lo Diox

¹⁵ Mbay, ¿kwan ntsow goo xgab? ¿Chu tak tsowaa kuu went, tak nabheet raa ley chaan Moisé's lo'aa, ne tak mloo Diox yalwen chaan Diox lo'aa? ¡Ndoblot! ¹⁶ Ne wen ne goo, tak kwii'aa zha kuu nabee lo'aa, tsa gonaa diiz lo zha'a, ne tsa ke'aa tsuin lo zha. Os lee'aa kwii'aa ke'aa tsuin lo kuu went tsa gathaa, o kwii'aa ke'aa tsuin lo Diox ne gonaa diiz lo Diox, tsa gakaa zha nali lo Diox. ¹⁷ Lee nal texkix Diox tak kon dib ndroo leettsaa'aa ngetswaa re kuu wen kuu mteedaa lo Diox, tegal ndala ngokaa mos lo kuu went. ¹⁸ Nal nagt raa lee mos lo kuu went. Lee nal nakaa zha kuu ntsow kuu nali nak. ¹⁹ Taxal men ndediz'n, tsa wen yen goo koree, tak men yezlyu ree nakaa. Leeka taxal mke goo tsuin lo kuu went ndala ne mtsow goo kuu went, leeka tata btaa goo dita goo par tsow goo kuu nali, tsa nambi to goo lo Diox.

²⁰ Leettsa mke'aa tsuin lo kuu went, neeka lut mtsowtaa xgab tsowaa kuu nali nak. ²¹ Per, ¿kwan mtsowaa gan lo re kuu wenta? ¡Yentka kwan! Anta nthoyaa ne'aa re kona nal. Tak kona ndano'aa lo yalguth. ²² Per lee nal, tak nabheet raa re kuu went lo'aa; lee nal nke'aa tsuin lo Diox, ne mtembi'aa Diox re'aa ne kuu mtsowaa gan nak yalnaban kuu taa Diox lo'aa. ²³ Lee kuu tsowaa gan lo kuu went nak yalguth, per lee kuu mndelaaz Diox lo'aa nak yalnaban kuu thitanax, por Jesucrist Zha Nabee lo'aa.

7

Nabeet raa ley lo'aa nal

¹ Re goo wets'n ne btan na, reta goo nlebee goo ley. Ne noga ne goo lee ley nabee lo men, beeta leettsa naban men lo yezlyu ree. ² Leey nak taxal leettsa lee thib ngot mtseyaa, lo ley ndoblo ngot gon ngot diiz lo tsaal ngot lo dita naban tsaal ngot. Per os gath tsaal ngot, tsaraa tak tseyaa ngot kon tedib mbyi. ³ Per os lee ngot gak rop ngot kon tedib mbyi leettsa bee nabanka tsaal ngot, ndaa ngot thib falt. Per os lee tsaal ngot ngutha, tak tseyaa ngot kon tedib mbyi ne nagt kona kuu went.

⁴ Tataka nake re goo wets'n ne btan na, ndala lee ley chaan Diox mnabee lo'aa; per leettsa nguth Jesucrist noga re'aa nguthaa; tsa nabheet raa ley lo'aa. Lee nal tak nakaa zha Jesucrist kuu mroban, tak tsowaa kuu wen kuu nlaaz Diox. ⁵ Tak leettsa mbanaa taxal nlaaz kwerpaa, lee ley mtsow masraa

ngoo yekaa mtsowaa kuu went kuu nlaaz kwerpaa, ne mndenoy lee lo yalguth. ⁶ Per lee nal, ngutha lee lo ley kuu mnabee lo'aa ndala, ley kuu mkee zha lo yeets; lee nal ndoblo tsowaa rtsin Diox, kon thib yalnaban kuu kub, ne Mbi Nayon chaan Diox ntsow koree leettsaa'aa.

Falt kuu nzo leen kwerp da

⁷ Kona, ¿kwan ntsow goo xgab? ¿Chu ley ntsow mtsowaa kuu went? ¡Nagte tata! Per net'n naa kwan nak falt os yent ley. Ne thitanax ganet'n naa kwan nak yaltableaz, os gakete lo ley: "Tablaaza chaan tabena". [Ex. 20:17; Dt. 5:21] ⁸ Per lee falt mtsow masraa ngoo yaltableaz leettsoon, tak lo ley nzhab wente. Tak os lee zha net zha naa kwan nabee ley, gagt nabee falt lo zha. ⁹ Ne leettsa ter nen naa kwan nabee ley, ndak'n wen nak'n, per leettsa mlebeen ley, tsa myeen na leen nak'n zha kuu masraa ndab falt, ¹⁰ ne ndoblon gath'n. Diox mndaa ley, tsa por re kuu nabee ley tsow'n gan yalnaban, per lee ley mloo lon ndoblo gath'n. ¹¹ Kona lee falt mkwaan mod mkedin lo re kuu nabee ley, kona ndoblo gath'n.

¹² Wen nak ley chaan Diox; ne nali nak re diiz kuu nabee Diox kuu nke lo ley. ¹³ Per nit'n lee kuu wen mtsow ndoblo gath'n. ¡Nagte tata! Sinke lee falt mtsow ngok went re kuu wen, ne mkedi falt'n, kona ndoblon gath'n por re falt da. ¡Kona thitanax went nak falt!

¹⁴ Ne'a lee Diox nak kuu mndaa ley, per lee na nak'n thib men yezlyu ree, kona thibka nabee falt lon par tsow'n kuu went. ¹⁵ Net'n kwan ntsow'n, tak ntsow'tn kuu wen kuu nlaz'n, leel re kuu went kuu nayiin nen, kona ntsow'n. ¹⁶ Ne leettsa ntsow'n re kuu went kuu nlazt'n tsow'n, tsa nyeen na lee ley nak kuu wen. ¹⁷ Kona nin nagt na kuu ntsow re kuu went, sinke falt kuu nzo lo kwerp da nak kuu ntsow. ¹⁸ Ne nen neeka thib kuu wen yent leen kwerp da, tak kuu lo yezlyu ree nake; nlaz'n tsow'n kuu wen per gagt tsow nay. ¹⁹ Ntsowt'n kuu wen kuu nlaz'n tsow'n, leel kuu went kuu nlazt'n tsow'n, kona ntsow'n. ²⁰ Per os leen ntsow'n re kuu nlazt'n tsow'n, nagt na cho ntsow, sinke re falt kuu nzo lo kwerp da ntsow.

²¹ Kona, leettsa nlaz'n tsow'n kuu wen, leel kuu went ntsow'n. ²² Leen leettsoon nyow leettsoon ley chaan Diox, ²³ per nyeen na, lee leen kwerp da nzo thib kuu ngyo kon re xgab da kuu wen. Ne naliib'n lo kuu nzo leen kwerp da, taxal thib zha kuu nzo tsib.

²⁴ ¡Prob'n! ¿Cho tak telaan lo re kuu went kuu ntsow kwerp da? Tak koree ntsow ndoblon gath'n. ²⁵ Kona ndan texkix lo Diox por Jesucrist Zha Nabee lo'aa, tak beeta lee Jesucrist tak telaan lo re kuu went; kona kon

xgab da ntsow'n kuu nabee ley chaan Diox,
per lee kwerp da ntsow kuu went.

8

Mbi Nayon ndaa yalnaban

¹ Per lee nal, tetit Diox re zha kuu thibka nak kon Jesucrist, re zha kuu ntsowt kuu nlaaz kwerp, re zha kuu nabat taxal nlaaz Mbi Nayon. ² Lee Mbi Nayon chaan Diox kuu ndaa yalnaban kuu kub lo'aa, mloo'aa lo re faltaa ne lo yalguth por Jesucrist. ³ Tak ngogt ley kuu mnidaa Diox lo Moisés gatelaa re men lo re kuu went, tak xegt zha tsow zha re kuu nabee ley. Kona mtaal Diox Xgann Diox, taxal thib men kuu ndaa falt, par nguth Xgann Diox por retalee, ne tabaa mod mluux Diox yalnabee chaan falt. ⁴ Mtsow Diox koree, tsa tak tsowaa re kuu wen kuu nabee ley, tak nabant raa lee taxal nlaaz kwerp, tak lee'aa nabat taxal nlaaz Mbi Nayon.

⁵ Tak lee re zha kuu ntsow kuu nlaaz kwerp, beeta re kuu yezlyu ree ntsow zha xgab; per lee re zha kuu ntsow kuu nlaaz Mbi Nayon, beeta re kuu nak chaan Mbi Nayon ntsow zha xgab. ⁶ Lee re zha kuu ntsow xgab beeta re kuu yezlyu ree, lo yalguth ndano re kona zha, per lee re zha kuu ntsow kuu nlaaz Mbi Nayon, lo yalnaban ndanoy zha, ne wen yo zha. ⁷ Lee re zha kuu ngwii beeta lo re kuu yezlyu ree nayii zha'a ne Diox, tak nlaatz zha ne neeka gagt tsow zha kuu nabee Diox. ⁸ Kona lee re zha kuu ntsow re kuu nlaaz kwerp, went nzo leettsoo Diox ne Diox re zha'a.

⁹ Per lee'aa nabant raa lee taxal nlaaz kwerpaa, lee'aa nabat taxal nlaaz Mbi Nayon, os lee'aa wlipaa napaa Mbi Nayon chaan Diox leettsoo'aa. Per lee zha kuu napt Mbi Nayon chaan Jesucrist leettsoo, nagt zha'a zha Jesucrist. ¹⁰ Per os nzo Jesucrist leettsoo'aa, tegal nguth kwerpaa por re faltaa, per lee xbi'aa nabanka, tak lee Diox mtsowa nakaa zha nali. ¹¹ Ne os lee Mbi Nayon chaan Diox kuu mteroban Jesucrist nzo leettsoo'aa, leeka Diox taa yalnaban kuu kub lo kwerpaa, beeta kon Mbi Nayon chaan Diox kuu nzo leettsoo'aa.

¹² Kona, re goo wets'n ne btan na, nzo thib kuu ndoblo tsowaa, per nagte par tsowaa kuu nlaaz kwerpaa. ¹³ Tak os lee'aa tsowaa re kuu nlaaz kwerpaa tathaa, per os por Mbi Nayon chaan Diox kuu nzo leen leettsoo'aa, tsowaa par tsowt lee kuu nlaaz kwerpaa, tekeno'aa yalnaban kuu thitanax.

¹⁴ Tak lee Mbi Nayon nloo xnet Diox lo re zha kuu nzo zhiinn Diox. ¹⁵ Ne lee Mbi Nayon kuu mkayaa'aa, nagte kuu ntsow tsa tsebaa tedib welt, sinke lee Mbi Nayon ntsow, nakaa zhiinn Diox ne kona "Pa" ni'aa lo Diox. ¹⁶ Ne lee Mbi Nayon chaan Diox

mbez lo xbi'aa, lee'aa nak zhiinn Diox. ¹⁷ Ne tak zhiinn Diox nakaa, ndoblo kayaa'aa re chaan Diox kuu ne Diox taa Diox lo'aa, ne kon Xgann Diox Jesucrist kayaa leey; os lee'aa ndriidaa yalti kon Jesucrist, tsa bluz kwinaa lo xni chaan Jesucrist.

Kuu yaad bluz

¹⁸ Kuu nin nak lee yalti kuu ndriidaa nal, neeka lut yewalte naake kon kuu thoz kuu loo Diox lo'aa bluz. ¹⁹ Tak reta kuu mdexkwaa Diox ngebet, naa polor loo Diox re zha kuu nak zhiinn Diox. ²⁰ Reta kuu mdexkwaa Diox ndaktiy ne ngeluzhe. Per ngogt rey tata, tak tata ngwalaaz rey, sinke Diox nzhab tata gake. Kona noga re kuu mdexkwaa Diox ngebet, ²¹ naa pol ridt raay yalti ne luxt raay, ne gake kuu nataak taxal re zhiinn Diox. ²² Ne ne'aa, lee re kuu mdexkwaa Diox kwathoz ndriide yalti asta nal, ne lee yalne chaane nak taxal yalnalaaz chaan thib ngot kuu ngeyal zhiinn. ²³ Ne nagt beeta re kuu mdexkwaa Diox ngeriid yalti, noga lee, zha kuu nap Mbi Nayon chaan Diox leettsoo, Mbi Nayon kuu mbez lo'aa naa kwan kayaa'aa lo Diox. Ne noga lee ngeriidaa yalti leettsoo'aa ne ngebetaa wiz kuu thitanax gakaa zhiinn Diox, ne tsee Diox kwerpaa, tsa gake thib kuu thitanax luxt raa ne ridt raay yalti. ²⁴ Mtsowaa gan yalnaban, tak ngebetaa kuu taa Diox lo'aa. Per os lee'aa ngebetaa kuu nloo'aa, nagt kona kuu ngebetaa, tak nloo leey lo'aa ne ndechet kwettaay. ²⁵ Per os lee kuu ngebetaa nloote lo'aa, ndoblo xekaa kwettaay. ²⁶ Ne lee Mbi Nayon ntsow ayudaa par naabaa lo Diox, tak gagtaa naabaa lo Diox taxal ndobloy. Ne leeka Mbi Nayon naab lo Diox kwent chaanaa kon diiz kuu gagt ni men. ²⁷ Per Diox kuu nlebee leettsoo reta men, ne'a naa kwan nlaaz Mbi Nayon naab, tak lee Mbi Nayon naab lo Diox taxal nlaaz Diox por re zha kuu nali ne nambi ndo lo Diox.

Thitanax layaat Diox re'aa

²⁸ Ne ne'a re'aa lee Diox ntsow, tsa reta kwaa wen ndroo lo re zha kuu nke leettsoo Diox, re zha kuu mrez Diox taxal nlaaz Diox. ²⁹ Ne ndala mlebee Diox re'aa, ne mli Diox re'aa, tsa gakaa taxal Xgann Diox, tsa Lee Xgann Diox gak zha kuu mas nataak lo re'aa, ne gak zha wetsaa ne btanaa. ³⁰ Ne lee re zha kuu mli Diox ndala, noga mrez Diox zha, ne lee re zha kuu mrez Diox, mtsow nali Diox zha ne taa Diox diiz kwin zha lo xni chaan Diox.

³¹ ¿Kwan ntsow goo xgab lo re koree? ¡Os lee Diox nzo faboraa, neeka thib zha gagt tsow gan lo'aa! ³² Ne mkat Diox Xgann Diox, kona mnidaa Diox Xgann Diox nguth por reta faltaa, kona wlipaa thibka taa Diox reta kwaa lo'aa ne lo Xgann Diox. ³³ ¡Neeka thib

zha gagt keki re zha kuu mli Diox! Tak lee Diox mtsow nali zha. ³⁴ Ne neeka thib zha gagt keki re zha kuu mli Diox, tak lee Jesucrist nguth por re faltaa, ne mroban Jesucrist ne lee nal ndob Jesucrist lad ban lo Diox, ne ngenaab Jesucrist lo Diox por lee. ³⁵ Neeka thib kuu gagt tsow, tsa ket raa leettsoo Jesucrist re'aa. Neeka re yalti, neeka re yalne kuu ndriidaa, neeka tegal nkwaan zha lee par kuth zha lee, neeka win, ne tegal yentlar gokaa, ne tegal tak kuth zha lee. ³⁶ Taxal nzhab lo xkeets Diox:

Diox, por lu gadata wiz nzo ryez gath nee, ne ntsowno zha nee,
taxal mbak zhiil kuu ndano zha par kuth zha. [Sal. 44:22]

³⁷ Per yent kwan takaa lo reta koree, tet-sowaa gan por Jesucrist, tak nke leettsoo Jesucrist re'aa. ³⁸ Ne wen nen, neeka thib kuu gagt tsow, tsa ket raa leettsoo Diox re'aa:
neeka yalguth,
neeka yalnaban,
neeka re mandad chaan Diox,
neeka yalney chaan re mbi fyer,
neeka re kuu nzo nal,
neeka re kuu yaad bluz,
³⁹ neeka ta kwathoz ya ndab,
neeka ta mas naats,
ne neeka thib re kuu mdexkwaa Diox.
Neeka thib re koree gagt tsow, tsa ket raa leettsoo Diox re'aa, tak mloo Diox mke leettsoo Diox re'aa, leettsa mtaal Diox Jesucrist, Zha Nabee lo re'aa.

9

Diox mli re zha Israel

¹ Ne wlín kuu nin nkedit'n tak zha Jesús nak'n, ne lee Mbi Nayon chaan Jesús kuu nzo leettsoon ndaa kwent wli kuu nin. ² Kwathoz nabil nzo leettsoon, ne asta nzhogwe leettsoon, leettsa ntelaz'n re tawlaz'n zha Israel. ³ Nlaz'n, os tak lan Jesucrist ne ndyan gabil por re tawlaz'n, tsa tsow zha gan yalnaban kuu thitanax. ⁴ Diox mli nee tsa gak nee zhiinn Diox, mndo Diox lo nee kon xni thoz chaan Diox, lo re nee ne Diox re diz kuu ndoblo gon nee diiz, lo nee mndaa Diox ley, ne noga mndaa Diox diiz gol nee lo Diox, ne ne Diox taa Diox naroob kwaa lo nee. ⁵ Lo re tey nee zha ndala, mndelo raz chaan nee, ne lo raz nee ngol Jesucrist, leettsa myaad Jesucrist ngok men, ne lee Jesucrist nak Diox kuu nabee lo reta kwaa. ¡Texkix Diox, kwathoz wen nak Diox! ¡Tata gake!

⁶ Ne nagt lee xkiiz Diox mrolot, tak ret zha kuu nak zha raz Israel, nak zha kuu wlipaa nak zha Israel. ⁷ Ne ret zha kuu nak zha raz chaan Abraham, nak zha kuu wlipaa nak zha raz Abraham, tak Diox nzhab lo Abraham: "Lee re zha kuu gak zha raza,

asta lo Isaac telo tsow men kwent zha". [Gn. 21:12] ⁸ Ne koree nak, ret zha kuu nak raz chaan Abraham nak zhiinn Diox. Sinke re zha kuu wlipaa nak zhiinn Diox, nak re zha kuu mndaa Diox xkiiz Diox lo. ⁹ Tak koree nak kuu nzhab Diox lo Abraham: "Tedib liin bretab'n, tsa lee tsaala Sara gap thib mbet". [Gn. 18:10]

¹⁰ Per nagte beeta koree. Sinke noga leettsa ngop Rebeca mbet, kwach ngop Rebeca ne Isaac ngok xut rop mbet. ¹¹⁻¹³ Ne leettsa terka gal rop mbet, ne leettsa terka tsow rop zha neeka thib kwaa, neeka kuu wene ne neeka kuu wente, lee Diox nzhab lo Rebeca: "Lee zha kuu gal ner gak mos lo zha kuu gal bluz". [Gn. 25:23] Ne koree ngok taxal nzhab lo xkeets Diox: "Kwathoz mke leettsoon Kob ne kwathoz mnayiin mnen Esaú". [Mal. 1:2-3] Tata ngoke, tsa ne'aa lee Diox mbi Diox zha taxal nlaaz Diox. Ne re zha kuu mbi Diox, mbez Diox zha ne ngwiit Diox naa kwan mtsow zha.

¹⁴ ¿Chu ntsow goo xgab? ¿Chu ntsow goo xgab nalit nak Diox? ¡Nagte tata! ¹⁵ Tak lee Diox nzhab lo Moisés: "Kwathoz nke leettsoon re zha kuu nlaz'n ke leettsoon, ne nlat leettsoon nen re zha kuu nlaz'n lat leettsoon nen". [Ex. 33:19] ¹⁶ Kona nagt men zhiinn Diox tak nlaaz men, ne neeka nagt men zhiinn Diox por re kuu ntsow men, lee men nak zhiinn Diox tak nlat leettsoo Diox ne Diox men. ¹⁷ Tak lo xkeets Diox nzhab lee Diox nzhab lo rey Egipto: "Mton lu par gaka rey, tsa por lu ne re men kuu nzo dita lo yezlyu, leen tak tsow reta kwaa, ne tsa yath len dita lo yezlyu". [Ex. 9:16] ¹⁸ Kona nlat leettsoo Diox ne Diox re zha kuu nlaaz Diox, ne noga ntsow nad Diox leettsoo re zha kuu nlaaz Diox.

¹⁹ Per lee re goo cha ne goo: "Os leey tatay, ¿chebee nkeki Diox re men? ¿Chu nzo cho nkez ntsowt kuu nlaaz Diox?" ²⁰ Per lee goo men yezlyu ree nak goo, ne ¿cho nak goo par kab roo goo lo Diox? ¿Chu tak gab yet lo zha kuu mdexkwaa yet? ¿Chebee tenzhee mdexkwaa'a na?" ²¹ Lee zha kuu ndexkwaa yet, tak tsow zha loka kuu nlaaz zha kon bema; kon leeka bema, tak tsow zha thib yet chul kuu kwathoz wen, ne kon leeka bema tak texkwaa zha tedib kuu plotta nak.

²² Diox nak taxal zha kuu ndexkwaa yet. Kwathoz nxek leettsoo Diox ne Diox re zha kuu nyelaazt Diox, re zha kuu ndo'a lux, tsa loo Diox yalnayii chaan Diox, ne tsa loo Diox lee Diox tak tsow reta kwaa. ²³ Ne noga ngwalaaz Diox loo Diox re yalnaro chaan xni thoz chaan Diox, lo re zha kuu mlat leettsoo Diox mne Diox, re zha kuu mli Diox desde ndala. ²⁴ Ne Diox mrez re nee, zha kuu nak zha Israel ne noga re goo zha kuu nagt zha Israel. ²⁵ Taxal nzhab lo yeets kuu mkee profet Oseas:

Re zha kuu nagt zha da, gak zha da,
ne re zha kuu mket leettsoon, ke leettsoon.
[Os. 2:23]

²⁶ Ne ta nzhab Diox lo re zha: "Nagt goo zha da".

Tya gab Diox lo re zha: "Goo nak zhiinn Diox kuu naban". [Os. 1:10]

²⁷ Noga Isaí mndaa kwent chaan Israel ne mkee Isaí: "Tegal kwathoz re zha raz Israel taxal gux kuu nzi roo nitdoo, per lutta zha tsow gan laa lo yalguth." ²⁸ Tak mera naab Diox kwent lo re men kuu nzi dita lo yezlyu." [Is. 10:22-23] ²⁹ Ne leeka Isaí mkee, ne nzhab:

Os lee Diox kuu nak Zha Nabee gatantrazaa, wlipaa lee'aa gayaan taxal rop yez kuu nak Sodoma ne Gomorra. [Is. 1:9]

Xomod nali to men lo Diox

³⁰ ¿Kwan ntsow goo xgab? Lee re zha kuu nagt zha Israel nkwaant zha nali to zha lo Diox, per tegal tatay tekayaa Diox zha taxal zha nali tak nyelaaz zha Diox. ³¹ Per lee re zha kuu nak zha Israel, ngwalaaz zha gatsow zha reta kuu nzhab lo ley, tsa nali to zha lo Diox, per mtsowt zha gan gagon zha diiz kuu nzhab lo ley. ³² ¿Chebee, mtsowt zha game? Mtsowt zha game, tak ngwalaazt zha Diox par nali to zha lo Diox, sinke nda leettsoo zha, gakayaa Diox zha taxal zha nali por re kuu ntsow zha. Kona mral "ke kuu ndral nii re men ni zha". ³³ Taxal nzhab lo xkeets Diox:

Nal tob'n thib ke yek yii Sión,
lee ke'a nak taxal thib ke naro kuu ral nii re men.

Ne loka zha kuu yelaaz ke'a,
neeka mas thoyt zha. [Is. 28:16]

10

¹ Re goo wets'n ne btan na, lee kuu kwathoz nlaz'n ne naab'n lo Diox nak, tsow re tawlaz'n zha Israel gan yalnaban kuu thitanax. ² Ne nzon fabor zha, tak nen kwathoz nlaaz zha tsow zha tsiiñ lo Diox, per ntsowt zhay taxal ndobloy, tak nlebeet zha kuu wlipaa. ³ Ne net zha naa xomod ntsow nali Diox men lo Diox; leel mtsow zha re kuu nlaaz zha par nali to zha lo Diox, ne tak tata mtsow zha kona mbint zha diiz nali gato zha lo Diox, ⁴ tak Jesucrist mtsow reta kuu mbezz lo ley, tsa loka zha kuu yelaaz Jesucrist tsow zha gan gak zha, zha nali lo Diox.

⁵ Loka zha kuu nlaaz nali to lo Diox, tak nlaaz zha tsow zha kuu nzhab lo ley kuu mndaa Diox lo Moisés, ndoblo tsow zha re kuu nzhab, tak tenzhee mkee Moisés: "Loka zha kuu gon diiz reta kuu nzhab lo ley, taban zha". [Lv. 18:5] ⁶ Per lee zha kuu nali ndo lo Diox, nyelaaz zha Diox. Kona ndoblot ta leettsoo zha gab zha: "¿Cho tsow

gan kendab yibaa? Koree nak nlache zha Crist lo yezlyu; ⁷ o ¿cho la leen yeerdo? Koree nak teroban zha Jesucrist xid re zha nguth." ⁸ Kona lee xkeets Diox nzhab: "Gax lo'a ndo Diiz Chul chaan Diox, gax roo'a ne gax leettsoo'a ndoy". [Dt. 30:12-14] Koree nak Diiz Chul kuu ndaa nee kwent. ⁹ Tak os lee'a kon roo'a gaba lee Jesucrist nak Zha Nabee, ne kon leettsoo'a nyelaaza lee Jesús mroban xid re zha nguth, tetsowa gan yalnaban kuu thitanax. ¹⁰ Tak kon leettsoo men nyelaaz men lee Diox mteroban Jesucrist, kona nak men zha nali lo Diox, ne kon roo men ndoblo ni men lee Jesucrist nak Zha Nabee, tsa tsow men gan yalnaban kuu thitanax.

¹¹ Tak lo xkeets Diox nzhab: "Reta zha kuu yelaaz Jesucrist, thoyt zha ne zha Diox". [Is. 28:16] ¹² Tak lo Diox lalka nak re zha Israel kon re zha kuu nagt zha Israel. Tak lee Diox nak Zha Nabee lo reta zha, ne wen nak Diox lo reta zha kuu naabe lo Diox. ¹³ Tak tenzhee nzhab lo xkeets Diox: "Reta zha kuu mbezz Zha Nabee, tetsow zha gan yalnaban kuu thitanax". [Joél 2:32] ¹⁴ Ne ¿xomod tak tediz zha lo Diox, os lee zha nyelaazt zha Diox? ¿Ne xomod yelaaz zha Diox os ter gon zha xkiiz Diox? ¿Ne xomod gon zha xkiiz Diox, os yent cho taa kwente lo zha? ¹⁵ ¿Ne xomod taa zha kwent Diiz Chul lo tedib zha, os yent cho taal zha? Taxal nzhab lo xkeets Diox: "¡Kwathoz wen nak leettsa ndyaad thib zha kuu ndaa kwent Diiz Chul chaan Zha Nabee!" [Is. 52:7]

¹⁶ Per ret men ndaa yek gon Diiz Chul. Taxal mkee Isaí lo xkeets Diox: "Zha Nabee, ¿neeka thib zha ngwalaazt xkiza kuu mndaa nee kwent?" [Is. 53:1] ¹⁷ Kona neeka thib men gagt yelaaz Jesucrist, os yent cho taa kwent chaan Jesucrist lo zha.

¹⁸ Ne ¿kwan ntsow goo xgab? ¿Chu mbint re men xkiiz Diox? ¡Wlipaa mbin zhay! Tak lo xkeets Diox nzhab Diox:
Reta zha kuu nzi lo yezlyu mbin xkiiz Diox
kuu mndaa re zha kwent,
asta ta mas tithe lo yezlyu mbin zhay. [Sal. 19:4]

¹⁹ Noga naabdiz'n lo goo, ¿kwan ntsow goo xgab? ¿Chu myent re tawlaz'n zha Israel koree? ¡Wlipaa myen zhay, tak ner Moisés mndaa kwent xkiiz Diox, ta nzhab Diox:
Na tsow gak celos goo, leettsa wii goo naa
xa nkenap'n tedib net re zha kuu nagt
zha yez ree;

ne tsow'n tsai yii goo ne goo tedib net re zha,
kuu nlaazt yene. [Dt. 32:21]

²⁰ Noga mkee Isaí kuu nzhab Diox:
Lee re zha kuu nkwaant'n, mzal'n lo zha;
ne lee re zha kuu mnaabdizt na, mlebee
zha'a na. [Is. 65:1]

²¹ Ne Isaí mndaa kwent chaan re zha Israel ne nzhab Isaí: "Dita wiz mtab'n yaan ne

mrez'n goo, per mndaat goo yek goo gagon goo diiz xkiz'n ne mlaa goo na". [Is. 65:2]

11

Mlayaat Diox re zha Israel

¹ Kona naabdiz'n: ¿Chu thitanax mlaa Diox re tawlaz'n zha Israel? ¡Wlipaa mlaayaat Diox zha! Tak non zha Israel nak'n, raz chaan Abraham nak'n, ne lo raz chaan Benjamín ngol'n. ² Ne desde ndala, mli Diox re tawlaz'n tsa gak zha, zha Diox; ne mlaayaat Diox zha. ¿Chu net goo xa nzhab lo xkiiz Diox kuu mkeek profet Lí? Leettsa mkeek Lí re zha Israel lo Diox, ne nzhab Lí: ³ "Zha Nabee, mbeth zha re profeta, ne mluux zha re bkoog kuu nak chaana, ta ndaa re men maa gon lo'a. Ne beeta na myaan, per noga na nlaaz zha kuth zha." [1 Rey. 19:10,14] ⁴ Per lee Diox mkaab lo zha, ne nzhab: "Myaant thita lu, noga nap'n gaz mil mbyi kuu mtobxubt lo diox Baal, kuu nagt Diox". [1 Rey. 19:18] ⁵ Ne leeka tata nake nal, nzo tyen tawlaz'n kuu nak zha Diox, kuu mli Diox por yalnkelaaaz chaan Diox. ⁶ Ne os por yalnkelaaaz Diox mtsow Diox koree, nagtraay por kuu wen kuu ntsow men; ne os gagake por kuu wen kuu ntsow men, nagtraay kuu mndelaaz Diox tabataa.

⁷ Kuu nlaz'n nin nak, mzalt re tawlaz'n kuu mkwaan re tawlaz'n. Per tegal tatay lee tedib net re zha kuu mli Diox, mzale lo zha; per lee tedib net re tawlaz'n, ngok nad leettsoo. ⁸ Taxal nzhab lo xkeets Diox: "Diox mtsow ngok nad leettsoo zha, ne tataka nak zha asta wiz naltserree. Tegal ngwii zha ne nzhon zha re kuu mtsow Diox, per myent zha re kuu nzhab Diox." [Dt. 29:4; Is. 29:10]

⁹ Ne noga David nzhab:
Leeka re ani kuu ntsow zha gak kwa ne yex ta la zha,
ne gake ke kuu ral nii zha tsa rid zha yalti.
¹⁰ Nlaz'n kow lo re zha tsa gagt raa wii zha, ne thitanax leng dits zha reta wiz kuu naban zha. [Sal. 69:22-23]

Lee yalnaban noga nake par re zha kuu nagt zha Israel

¹¹ Lee nal nin: ¿Chu mral nii re zha Israel ne ngob zha, tsa yechet raa zha thitanax? ¡Nagte tata! Tak mbint re zha Israel diiz lo Diox, kona mkayaa tedib net re zha kuu nagt zha Israel yalnaban kuu thitatax, ne kona mtsow nzhab celos re zha Israel. ¹² Ne tak mbint re tawlaz'n zha Israel diiz lo Diox, tak mlaa zha Diox, kona ngok tsa mkayaa re zha kuu nagt zha Israel re kuu wen thozi kuu ndelaaz Diox; ne masraa kuu kayaa re zha kuu nagt zha Israel, leettsa lee re tawlaz'n gon diiz lo Diox.

¹³ Ne lee nal nin lo re goo zha kuu nagt zha Israel, tak lo re goo mtaal Diox'n ne kwathoz

ntsow nataak na rtsin na, ¹⁴ tak nlaz'n gak celos re tawlaz'n, leettsa ne zha xa nkayaa Diox goo, tabaa nlaz'n tsow'n tsa tsow thib net re tawlaz'n gan yalnaban kuu thitanax. ¹⁵ Ne os por mlaa re tawlaz'n Diox, kona wen mrin re men kuu nzi dita lo yezly kon Diox. ¿Kwan ntsow goo xgab? ¿Kwanpaa gak leettsa kayaa Diox re tawlaz'n tedit welt? ¡Wlipaa lee zha gak taxal zha kuu mroban xid re zha nguth! ¹⁶ Ne os chaan Diox nak pan kuu ner mdexkwaa, noga dita koob kuu texkwaa reta pan nak chaan Diox. Ne os chaan Diox nak lozh ya, noga re zhit ya nak chaan Diox.

Kwent nanzee chaan ya olib

¹⁷ Nal tan thib kwent nanzee lo goo. Diox mxeen thib ya olib kuu wen, ne bluz mga Diox re zhite. Tsaraa mga Diox thib zhit ya olib wan, ne mkengiin Diox re zhit ya olib wana lo ya olib Diox. Reta nee zha Israel, nak taxal re zhit ya olib kuu wena, ne reta goo nak taxal re zhit ya olib kuu mkengiin Diox lo ya olib Diox. Koree nloo lee re goo nap goo re kuu wen chaan Diox kuu ndelaaz Diox lo nnee. ¹⁸ Per leyt goo ne gab goo masraa wen goo nake re zhit kuu mng Diox. Btelaaaz goo nagt goo kuu ntsow naban lozh ya, sinke lozh ya ntsow naban goo.

¹⁹ Ser nda leettsoo goo: "Mga Diox re zhitia par mkengiin Diox nee lo ya olib kuu mxeen Diox". ²⁰ Wliy; per btelaaaz goo lee re zhit kuu mga Diox, nak re zha Israel kuu ngwalaazt Diox; ne lee re goo tak ngwalaaz goo Diox kona mkengiin Diox goo lo ya olib Diox. Kona ndoblot rub goo, mas wen ndoblo tseb goo. ²¹ Tak taxal mlatta leettsoo Diox mne Diox re zhit ya olib kuu mxeen Diox, leeka tata latta leettsoo Diox ne Diox goo. ²² Wi goo, xa wen nak Diox kwathoz nlat leettsoo Diox ne Diox re zha kuu nzhon diiz lo Diox. Per no Diox nayii Diox ne nlatta leettsoo Diox ne Diox re zha kuu nzhont diiz lo Diox. Kona ndoblo tsow goo kuu nlaaz Diox, tak os lee goo tsowt gooy no goo tegaa Diox goo taxal mga Diox re zhit ya Diox. ²³ Per tegal tatay, os lee re tawlaz'n bre zha yelaaz zha Diox, tebre Diox kengiin Diox zha tedib welt; tak nap Diox yahabee ne tak kengiin Diox zha tedib welt lo ya olib Diox. ²⁴ Tak os mga Diox goo lo ya olib wan ne mkengiin Diox goo lo ya olib kuu mxeen Diox, jkona mas nagant kengiin Diox re tawlaz'n tedib welt lo ya olib kuu mxeen Diox, tak re zhitia nak re zhit chaanpaa ya olib Diox!

Xomod tsow re zha Israel gan yalnaban kuu thitanax

²⁵ Re goo wets'n ne btan na, nlaz'n ne goo kuu xgaats kuu tsow Diox, tsa leyt goo lee goo nzhaak; Diox mtsow ngok nad re

tawlaz'n, asta leettsa yelo gak re zha kuu nagt zha Israel, zha Diox. ²⁶ Ne leettsa yelo gak re zha kuu nagt zha Israel zha Diox, tsa lee re tawlaz'n zha Israel, tsow gan yalnaban kuu thitanax, taxal nzhab lo xkeets Diox:

Yez Sión roo zha kuu telaa'aa,
ne koo zha re zha raz Kob lo kuu went. [Is. 59:20]

²⁷ Ne trat ree nak kuu tsow'n kon re zha, leettsa kib'n re falt zha. [Jer. 31:33-34]

²⁸ Tak mkayaat re tawlaz'n Diiz Chul chaan Diox, kona ngok zha, zha kuu nayii ne Diox. Tbaa mtsow Diox tsa lee re zha kuu nagt zha Israel, ngok mtsow gan yalnaban kuu thitanax. Per bee neeka leettsou Diox re tawlaz'n, tak lee Diox mli re tey nee zha ndala. ²⁹ Tak lee re kuu nataak kuu ndelaaz Diox, neeka mas kibt Diazhe lo re zha kuu mrez Diox, par gak zha, zha Diox. ³⁰ Ne noga goo mbint goo diiz lo Diox ndala, per lee nal mlatta leettsou Diox ne Diox goo, tak lee re tawlaz'n zha Israel, mbint zha diiz lo Diox. ³¹ Lee re tawlaz'n mbint zha diiz lo Diox, per koree ngok tsa mlat leettsou Diox mne Diox re goo zha kuu nagt zha Israel; per tetzin wiz kuu lat leettsou Diox ne Diox re tawlaz'n, zha Israel, taxal mlat leettsou Diox mne Diox goo. ³² Ne mlaa Diox mbint reta men diiz lo Diox, tsa tak loo Diox nlat leettsou Diox ne Diox reta men.

³³ ¡Kwathoz wen nak Diox! ¡Kwathoz naro nak yalnzaak chaan Diox, lee Diox nlebee reta kwaas! Yent cho tak ne naa kwan tsow Diox, tak beeta lee Diox nzhaak reta kwaas, ne neeka gagt yelo yen men naa xomod nak xnet Diox. ³⁴ Tak yent neeka thib zha kuu nlebee xgab chaan Diox ne neeka yent cho mteni Diox. ³⁵ Yent cho zha mndaa thib kwaa lo Diox, par kwet zha kix Diox lo zha. ³⁶ Tak lee Diox nap reta kwaas, lee Diox mdexkwaay ne chaan Diox nak retay. ¡Kona thibka ndoblo golaa lo Diox reta wiz! ¡Tata gake!

12

Diox nlaaz nali banaa

¹ Kona nin lo re goo wets'n ne btan na, mlat leettsou Diox mne Diox re'aa, kona ndoblo taa'aa dita lee lo Diox; taxal thib maa kuu nzhuth zha ne ndaa zha gon lo Diox. Koree nak thib gon kuu naban ne nambi kuu ndoblo taa'aa lo Diox, ne ndoblo golaa lo Diox kon kuu taa'aa lo Diox; tak koree nak kuu nyow leettsou Diox. ² Ne ndoblot tsowaa re kuu ntsow re men ye-zlyu ree, sinke ndoblo laa'aa tsee Diox re xgabaa, tsa ne'aa naa kwan re kuu nlaaz Diox tsowaa, re kuu wen, re kuu nyow leettsou Diox ne re kuu nali nak.

³ Ne lo yalinkelaaz chaan Diox mtaal Diox'n par tsow tsii ree, kona nin ne naab'n lo goo, neeka thib goo ndoblot tsow xgab, lee goo kwathoz nataak, sinke mas wen ndoblo kobee'aa re kuu tsowaa tak nyelaazaa Diox. ⁴ Leeka taxal nap kwerp men tyen ta, ne kadta thibe nape thib tsii kuu ntsow, ⁵ leeka tata kwathozaa, per thibka kwerp chaan Jesucrist nakaa, ne ndeche'aa thibaa ne tedibaa.

⁶ Ne lo yalwen chaan Diox, zhaa zhaa kuu nataak mndelaaz Diox lo thiba ne thibaa par tsowaa. Os lee Diox mndaa Diox diiz lo'aa gakaa profet re men, ndoblo tsowaay taxal nyelaazaa Diox. ⁷ Ne os lee Diox mndaa Diox lo'aa tsowaa ayud tedib net zha, ndoblo wen tsowaay. Ne os mndaa Diox lo'aa loo'aa xkiiz Diox lo tedib net zha, ndoblo tsowaay. ⁸ Loka cho zha mkayaa teni re wetsaa ne re btanaa, ndoblo tsow zhay thib mod wen, loka cho zha mkayaa talaaaz thib kuu lo tedib zha, ndoblo tsow zhay kon dib ndroo leettsou zha. Loka cho zha mkayaa lo Diox nabee zha lo re zha Jesú, ndoblo nali tsow zhay, loka cho zha mkayaa lat leettsou ne re zha kuu ndeche kwaas, ndoblo tsow zha ayud zha kuu ndeche kwaas, kon dib ndroo leettsou zha.

Kuu ndoblo tsow re zha kuu nyelaaz Diox

⁹ Ndoblo ke leettsou'aa thibaa ne tedibaa. Ndoblo laa'aa re kuu went, ndoblo teke'aa dits kuu wen. ¹⁰ Ndoblo tataka ke leettsou'aa thibaa ne tedibaa re wetsaa ne re btanaa, ne ndoblo tsowaa xgab mas wen tedibaa nake lee'aa.

¹¹ Ndoblo ko'aa gan ke'aa tsii lo Zha Nabee, ne ndoblot gakaa zha tsaab.

¹² Ndoblo naley yo leettsou'aa, tak ndobke leettsou'aa kuu ngebetaa; ndoblo xekaa leettsou ndriidaa yalti ne thibka ndoblo tedi-zaa ne naabaa lo Diox.

¹³ Ndoblo tsowaa ayud re wetsaa ne re btanaa, leettsa ndeche zha thib kwaas. Ne ndoblo'aa kaya'a re zha kuu tsin lizaa.

¹⁴ Ndoblo naabaa lo Diox por re zha kuu ndralno'aa; ne ndoblo naabaa kuu wen par lee zha, naabtaa tsa kode Diox zha.

¹⁵ Ndoblo naley yo leettsou'aa kon re zha kuu naley nzo leettsou, ndoblo gonnaa kon re zha kuu nzhonn.

¹⁶ Ndoblo wen yo'aa thibaa ne tedibaa. Ndoblot naro tsowaa, sinke ndoblo tsaal leettsou'aa ne'aa re zha prob, ne ndoblot rubaa lee'aa nzaak.

¹⁷ Os cho zha mtsow kuu went lo'aa, ndoblot leeka tata tsowaa lo zha. Ndoblo thibka yo yekaa tsowaa kuu wen lo reta men. ¹⁸ Ndoblo tsowaa tsa wen kwinaa kon reta men, asta plo take lo'aa. ¹⁹ Reta goo wets'n ne btan na kuu kwathoz nke

leettsoon, ndoblot tsowaa leeka kuu went lo zha kuu mtsow kuu went lo'aa, ndoblo laa'aa tsa lee Diox naab kwent lo zha'a; taxal nzhab lo xkeets Diox: "Na naab kwent lo zha, na yizh lo zha'a ne Zha Nabee". [Dt. 32:35] ²⁰ Por kona. "Os lee zha kuu nayii ne'a nlann, taa kuu wu zha, ne os nzheek leettsou zha, taa kuu gu zha; tak leettsa ntsowa koree tsowa thoy zha ne tsowa kwib masraa ki dits zha". [Pr. 25:21-22] ²¹ Taataa diiz tsow kuu went gan lo'aa, sinke ndoblo tsowaa kuu wen, tsa tsowaa gan lo kuu went.

13

¹ Ndoblo gonaan diiz lo re zha kuu nak tsiin. Tak Diox mto zha ne mndaa Diox yahnabee lo zha, ne reta zha kuu nak tsiin, Diox mtsow ngok zha zha nak tsiin. ² Kona reta zha kuu nzhont diiz lo re zha kuu nak tsiin, lo Diox nzhont zha diiz, tak lee Diox mto re zha kuu nak tsiin; os nzhont zha diiz lo re zha kuu nak tsiin kuu mto Diox, ndaa zha falt ne kona teti Diox zha. ³ Tak mtot Diox re zha kuu nak tsiin, tsa tsed zha re zha kuu ntsow kuu wen, sinke mto Diox zha tsa tsed zha re zha kuu ntsow kuu went. Kona os lee'aa nlaazaa tsedttaa ne'aa re zha kuu nak tsiin, ndoblo tsowaa kuu wen, tsa ne zha wen nakaa, ⁴ tak mos Diox nak re zha kuu nak tsiin, tsa tsow zha ayudaa. Per os lee'aa ntsowtaa kuu wen, ndoblo tsedbaa ne'aa re zha kuu nak tsiin, tak nap zha yahnabee tabaataa, sinke nap zhay tsa tetai zha re zha kuu ntsow kuu went, tak rtsin Diox ntsow zha. ⁵ Kona, ndoblo gonaan diiz lo re zha kuu nak tsiin, tsa tetit zha lee, sinke ndoblo tsowaa tak ngobee'aa, ne ne'a lee naa kwan ndoblo tsowaa. ⁶ Kona ndoblo kizhaha kwent chaan yezlyu lo re zha kuu nak tsiin; tak mto Diox par tsow zha rtsin Diox.

⁷ Ne ndoblo taa'aa lo kadta zha kuu ndoblo zha. Ndoblo kizhaha reta kuu ndoblo'aa kizhaha lo re zha kuu nak tsiin; ne tataga ndoblo gabaa re diiz nataak lo re zha kuu ndobloy; ne ndoblo gonaan diiz lo re zha kuu ndobloy.

⁸ Neeka thib kuu ndoblot taabaa lo tedib zha. Sinke ndoblo ke leettsoo'aa thibaa ne tedibaa; tak loka zha kuu nke leettsoo taben, nzhon zha diiz reta kuu nzhab lo ley. ⁹ Tak lo ley kuu mndaa Diox lo Moisés nzhab:

Gakt rop goo kon zha kuu nagt tsaal goo, kutht goo taben goo, lowannt goo, tablaazt goo chaan taben goo. [Ex. 20:13-17; Dt. 5:17-21]

Reta koree ne tedib net re kuu mnabbee Diox lo ley, nak thibka koree: "Bke leettsoo goo taben goo leeka taxal nke leettsoo goo goo".

[Lv. 19:18] ¹⁰ Loka zha kuu nke leettsoo taben tsowt zha neeka thib kuu went lo taben zha; kona os nke leettsoo zha taben zha mtsowa zha reta kuu nzhab lo ley.

¹¹ Ne re koree ndoblo tsowaa, tak ne'a lee xomod nak re wiz kuu nabanaa nal; ne mzina or kuu roo mkaal lo'aa, tak masraa ndetsin gaxa wiz kuu taa Diox yahnaban lo'aa; naked wiz kuu ngwalaaza Diiz Chul chaan Diox. ¹² Tak kwathoz yaal, ne mera ndeyeni yezlyu; kona ndoblot raa tsowaa re kuu mtsowaa, leettsa mndo'aa lo yalkow, sinke ndoblo gokaa xabaa kuu nla xni, taxal thib soldad kuu lista ndo. ¹³ Kona ndoblo tsowaa re kuu wen kuu ntsow re zha kuu ndiy tse:

Gagtaa zha gwiy,
ndoblot ya re'aa lo ani ta kwathoz nzhow
zha ne ntsow zha re kuu nlaaz kwerp
zha,

ta nzhak rop zha kon ndota zha,
ta ngyodiz zha,
ta nkwaan zha zhoo,
ta went nzhak leettsoo zha ne zha tedib zha.
¹⁴ Sinke ndoblo banaa taxal nlaaz Jesucrist,
ne taataa diiz tsowaa re kuu nlaaz kwerpaa.

14

Re zha kuu neyt ndo nyelaaz Diox

¹ Ndoblo wen kayaa goo, re zha kuu neyt ndo nyelaaz Diox, ne yodizt goo kon lee zha por re kuu ntsow zha xgab ne por re kuu ntsow goo xgab. ² Tak nzo thib net zha ndak, tak wu men reta kwaa, lee tedib net zha kuu neyt ndo nyelaaz Diox, nzhownt zha beel, beeta re yaat nzhow zha. ³ Kona lee re zha kuu nzhow reta kwaa, ndoblot gab zha mas wen zha nake zha kuu nzhownt reta kwaa. Noga re zha kuu nzhownt reta kwaa, ndoblot looz zha re zha kuu nzhow reta kwaa, tak lee Diox mkayaa'a thib net zha ne tedib net zha. ⁴ ¿Cho naka, chebee nlooza mos tedib zha? Os lee mos nali ndo mos o nali ndo mos, kwent patron mos kona; per teyeto nali mos tak ney patron mos ne layaat patron mos.

⁵ Ne tedib kuu nak: Nzo thib net zha ndak mas nataak thib wiz, nake tedib wiz, lee tedib net zha ndak lalka nak reta wiz. Kadta thibaa ndoblo wen ne'aa naa kwan kuu ndoblo tsowaa xgab. ⁶ Loka zha kuu ngotsow thib wiz, ngotsow zhay tsa gol zha lo Zha Nabee. Ne lee zha kuu nzhow reta kwaa, nzhow zhay ne ndaa zha texkix lo Zha Nabee, ne nzhon zha diiz lo Zha Nabee; ne noga zha kuu nzhownt reta kwaa, nzhownt zhay, per ndaa zha texkix lo Zha Nabee ne nzhon zha diiz lo Zha Nabee.

⁷ Tak neeka thibaa nabantaa par leeka lee'aa, ne neeka thibaa gadtaa tak nlaazaa.

⁸ Os lee'aa nabanaa, nabanaa par tsowaa

rtsin Zha Nabee, ne os lee'aa gathaa, zha Zha Nabee nakaa. Kona os lee'aa nabanaa o gathaa zha Zha Nabee nakaa.⁹ Tak par kona nguth Jesucrist ne mroban Jesucrist, tsa gak Jesucrist Zha Nabee lo re zha kuu naban ne lo re zha kuu ngutha.

¹⁰ Kona, ¿chebee nlooza wetsa ne btana? ne ¿chebee ndaka mas wena nake wetsa ne btana? tak retalee tetsinaa lo Diox, tsa naab Diox kwent lo'aa. ¹¹ Tak lo xkeets Diox nzhab:

Naban na, ne Zha Nabee,
ne lon tobxub reta men,
ne reta men ne leen nak Diox. [Is. 45:23]

¹² Kona kadta thibaa taa'aa kwent chaanaa lo Diox.

Tsowtaa par la re zha kuu nyelaaz Jesús lo kuu went

¹³ Kona ndoblot loozaa thibaa ne tedibaa. Sinke mas wen ndoblo'aa wii'aa naa kwan tsowaa, tsa tsowtaa la thib wetsaa o btanaa lo kuu went ne laa zha Diox. ¹⁴ Kwathoz wen mloo Jesucrist lon, neeka thib kwaag nagaat kuu nambit, per os cho zha ndak nzo thib kuu nambit, lo zha nambit nake ne ndoblot zha wu zhay. ¹⁵ Per os kuu nzhawaa ntsow went nyoo leettsou wet-saa o btanaa, lee kuu ngetswaa nloo nket leettsou'aa zha. Kona ndoblo wii'aa naa kwan re kuu dowaa, tsa tsowtaa par laa thib zha Jesús, tak noga por lee zha nguth Jesús. ¹⁶ Ne taata diiz looz zha lee, os nget-sowaa kuu wen. ¹⁷ Tak leettsa nabee Diox leettsou'aa, nataagt kuu nzhawaa neeka kuu nzhuu'aa, kuu nataak nak nali to'aa lo Diox, wen kwinaa ne naley yo leettsou'aa, tak lee Mbi Nayon chaan Diox ndo kon lee. ¹⁸ Re zha kuu tenzhee ntsow tsin ree lo Jesucrist, wen nzo leettsou Diox ne Diox re zha'a, ne noga re men wen nzo leettsou ne zha'a.

¹⁹ Kona ndoblo kwaanaa wen kwinaa; tsa tsowaa ayud thibaa ne tedibaa, tsa masraa ney to'aa lo Diox. ²⁰ Ndoblot luuzhaa rtsin Diox por kuu nzhawaa, reta kuu nzhaw men nambiy, kuu went nak dowaa thib kuu tsow laa thibaa Diox. ²¹ Mas wen dowtaw beel, neeka gutaa xit ub, neeka tsowtaa thib kuu tsow par laa thibaa Diox. ²² Re kuu nyelaaza lo kwent ree, ndoblo gake thib kuu lo'aa ne lo Diox. ¡Kwathoz wen nda re zha kuu ne ngetswaa kuu wen! ²³ Per lee zha kuu nzhaw thib kwaag kuu ndak zha went wu zha, ndaa zha falt, tak ndak zha went wu zhay ne nzhaw zhay, ne noga reta kuu ntsowaa, os lee'aa ntsowaa xgab wente ne ntsowleey, ndaa'aa falt lo Diox.

15

Ndoblot tsowaa beeta kuu nyow leettsou'aa

¹ Re'aa kuu ney ndo nyelaaz Diox, ndoblo'aa xekaa ne'aa re zha kuu neyt ndo nyelaaz Diox; ndoblot tsowaa beeta kuu ndakaa wen lo'aa. ² Ndoblo'aa tsowaa kuu wen kuu nyow leettsou tabenaa, re kuu wen kuu tsow to ney zha lo Diox. ³ Tak neeka Jesucrist, mtsowt Jesucrist kuu myow leettsou Jesucrist; sinke mtsow Jesucrist taxal nzhab lo xkiiz Diox: "Reta diiz went kuu mni zha lo'aa, lon mni zhay". [Sal. 69:9]

⁴ Tak re kuu mke lo xkeets Diox ndala, mkey tsa teedaa; tsa xekaa ridaa re yalti, ne leekay tetsey leettsou'aa, tsa kwettaa gak re kuu ne Diox gak lo'aa. ⁵ Ne nlaz'n lee Xutaa Diox kuu ntsow nxek leettsou'aa ne ntetsey leettsou'aa tsow ayud goo, tsa wen kwin goo kon re taben goo, taxal mloo Jesucrist, ⁶ tsa retalee kon thibka bos golaa lo Diox kuu nak Xut Jesucrist, Zha Nabee lo'aa.

Paba mndaa kwent Diiz Chul lo re zha kuu nagt zha Israel

⁷ Kona ndoblo wen kayaa'aa altaa'aa, leeka taxal mkyayaa Jesucrist re'aa, tsa kwathoz men gol lo Diox. ⁸ Ne noga nin lo goo, lee Jesucrist myaad mlortsin lo re rawlaz'n, zha Israel, tsa ngok reta kuu nzhab Diox lo re tey nee zha ndala, ne myaad Jesucrist par mloo Jesucrist lee Diox ntsow Diox kuu ni Diox. ⁹ Noga myaad Jesucrist, tsa gol re zha kuu nagt zha Israel lo Diox, tak mat leettsou Diox mne Diox re zha, taxal nke lo xkeets Diox:

Kona teth'n lu lo re zha kuu nzo dita lo yezyu,

ne gol'n lo'a. [2 Sam. 22:50; Sal. 18:49]

¹⁰ Noga nzhab lo xkeets Diox:

Naley bloo goo leettsou goo, goo kuu nagt zha Israel ne thibka bil goo kon re zha Israel lo Diox. [Dt. 32:43]

¹¹ Ne lee tedib ta nzhab:

Reta goo, zha kuu nagt zha Israel bil goo lo Diox,

ne reta men ndoblo taa kwent yalnzaak chaan Diox. [Sal. 117:1]

¹² Ne noga Isaí mkee:

Lo raz chaan Isaí, xut David,
roo thib zha kuu nabee lo re men kuu nzo

dita lo yezyu,

ne lee re zha kuu nagt zha Israel kwet tsin zha. [Is. 11:10]

¹³ Nlaz'n lee Diox kuu taa kuu ngebetaa lo'aa, tsow tsa naley yo leettsou goo ne tsow wen kwin goo, tak nyelaaz goo Diox, tsa por yalney chaan Mbi Nayon chaan Diox kuu nzo leettsou'aa, kwettaa kayaa'aa kuu ne Diox taa Diox lo'aa.

¹⁴ Reta goo wets'n ne btan na, wen nen kwathoz wen nak goo, ne nap goo yalnzaak nyen goo re kuu, ne tak goo teni goo thib goo ne tedib goo. ¹⁵ Kona nzo ta mzebt'n ne mye leettsou kwathoz nambi

mkeen re kuu ndoblo nin lo goo, tsa thitanax nithlaazt gooy; tata mkeen lo yeets, tak por yalnkelaaz chaan Diox mtaal Diox'n keen tsiin ree. ¹⁶ Diox'n mtaal'n tsa keen tsiin lo Jesucrist, lee tsiin ree nak tan kwent Diiz Chul lo re zha kuu nagt zha Israel. Tsa gak re zha kuu nagt zha Israel taxal thib gon kuu wen ne nambi lo Diox, ne Mbi Nayon ntsow kona.

¹⁷ Kona nley'n tak nyelaz'n Jesucrist ne por re tsiin kuu ngetsow'n lo Diox. ¹⁸ Tak yet leettsoon nin thib kuu mtsowt Jesucrist por na, sinke beeta re kuu mtsowt Jesucrist por na kona nin, tsa lee re zha kuu nagt zha Israel gon zha diiz lo Diox, por re kuu nin ne por re kuu ntsow'n. ¹⁹ Ne por re kuu thoz kuu mtsowt Diox kon yalney chaan Mbi Nayon chaan Diox lo re men. Tbaa mod tsa ngok mndan kwent Diiz Chul lo re men, mndelon desde Jerusalén ne mzin na asta yez Ilírico. ²⁰ Ne thib mlon yek'n tan kwent Diiz Chul, ta ter taa zha kwent chaan Jesucrist. Tak os leen tan kwente ta mbina zhay, tsa nak'n taxal thib zha kuu taa thib yuu ta tedib zha mtob simyent, ²¹ taxal nzhab lo xkeets Diox:

Re zha kuu mnnet naa cho nak Diox,
re zha'a lebee Diox;
ne re zha kuu mbint naa cho nak Diox,
re zha'a yen naa cho nak Diox. [Is. 52:15]

Paba mtsow xgab ya yez Roma

²² Kona tyen welt ngwalaz'n gayal'n lo re goo, per rtsin na mtetsan na kona terka yan. ²³ Lee nal ngwalao'a mtsow'n rtsin na reta yez ree; ne nda'a tyen liin nlaz'n yal'n lo re goo, ²⁴ kona leettsa yan Espany, tsa yal'n lo re goo, tak nlaz'n wiin goo ne nlaz'n tsow goo ayud'n par yan Espany. ²⁵ Per lee nal leen ya Jerusalén yataan thib gon lo re zha kuu nyelaz Jesús kuu nzo tya, ²⁶ tak lee re zha kuu nyelaz Jesús kuu nzo yezlyu Macedonia ne yezlyu Acaya, mroo leettsou zha mndaa zha thib gon lo re zha prob kuu nyelaz Jesús, kuu nzo yez Jerusalén. ²⁷ Ne kon dib ndroo leettsou zha mtsow zhay, tak wlipaa ndab zha lo re tawlaz'n zha Israel, tak nee mndaa kwent Diiz Chul chaan Jesucrist lo re zha kuu nagt zha Israel, kona kon temi, ndoblo tsow zha ayud re zha Israel kuu nyelaz Jesús. ²⁸ Per leettsa yelo tsow'n tsiin ree, leettsa yelo yatan na gon ree lo re tawlaz'n kuu nyelaz Jesús; tsa roon tya ne riid'n lo re goo ne yan Espany. ²⁹ Ne wen nen leettsa yal'n lo re goo, kwaro re kuu wen tsowt Jesucrist lo re'aa.

³⁰ Re goo wets'n ne btan na, por Jesucrist Zha Nabee lo'aa, ne por yalnkelaaz kuu ndaa Mbi Nayon lo'aa, naab'n lo goo tsow goo ayud'n naab goo lo Diox por na. ³¹ Naab goo lo Diox tsa yent kwan kuu went tak'n lo re zha kuu nyelazt Jesús, re zha kuu

nzo yezlyu Judea, tsa wen kayaa re zha Jerusalén kuu nyelaz Jesús gon kuu ndatan na lo re zha. ³² Kona os lee Diox nlaaz, naley yo leettsoon tsin na lo goo, tsa tak roxkwani na lut leettsa yal'n lo re goo. ³³ Nlaz'n lee Diox kuu ntsow wen nzi'aa, kenap reta goo. ¡Tata gake!

16

Paba mni "diox" lo kadta thib zha

¹ Naab'n lo goo tsa wen kayaa goo btanaa Febe, tak lee zha nak zha kuu nke tsiin lo re zha kuu nyelaz Jesucrist yez Cencrea.

² Wen bkayaa goo zha lo yalnkelaaz chaan Zha Nabee, taxal ndoblo kayaa goo re zha Jesucrist. Ne btsow goo ayud zha loka kuu ndeche zha, tak kwathoz zha nda'a ntsow zha ayud, ne noga mtsow zha ayud'n.

³ Bni goo "diox" kwent chaan da lo Priscila ne lo Aquila tsaal priscila, rop zha nke tsiin kon na lo rtsin Jesucrist. ⁴ Ne asta mye leettsoo rop zha gagath zha, leettsa mer gagath'n, kona nagt thita na nda texkix lo rop zha, noga re wetsaa ne re btanaa kuu nagt zha Israel ndaa texkix lo rop zha. ⁵ Ne tataka bni goo "diox" lo reta zha kuu nyelaz Jesucrist kuu nkaltaa liz Priscila rop Aquila. Noga bni goo "diox" lo amig da ne wets'n Epeneto kuu kwathoz nke leettsoon, tak lee zha ner ngwalaaz Jesucrist yezlyu Asia. ⁶ Noga bni goo "diox" kwent chaan da lo Mari kuu kwathozza nda wiz nke tsiin lo re goo. ⁷ Noga bni goo "diox" lo rop zha liz'n kuu nak wetsaa Andrónico ne wetsaa Jannas, thibka ngoo rop zha tsib kon na. Ne wen nlebee re apóstol chaan Jesucrist rop zha, ne ner rop zha ngwalaaz Jesucrist nake na.

⁸ Bni goo "diox" kwent chaan da lo amig da ne wets'n Ampliato kuu kwathoz nke leettsoon lo yalnkelaaz chaan Zha Nabee.

⁹ Bni goo "diox" kwent chaan da lo wetsaa Urbano kuu thibka nke rop nee tsiin lo rtsin Jesucrist, ne noga lo wetsaa Estaquis kuu kwathoz nke leettsoon. ¹⁰ Bni goo "diox" kwent chaan da lo wetsaa Apeles, tak thibka nali ndo zha nyelaz zha Jesucrist; ne noga lo re zha liz wets Aristóbulo. ¹¹ Bni goo "diox" kwent chaan da lo Herodión kuu nak zha liz'n, ne lo re zha Jesús kuu nak zha liz wets Narcis. ¹² Bni goo "diox" kwent chaan da lo btanaa Trifena ne lo btanaa Trifosa, rop zha kuu kwathoz nke tsiin lo Zha Nabee. Noga bni goo "diox" kwent chaan da lo btanaa Pésida, tak kwathoz nke leettsou re zha kuu nyelaz Jesús zha, tak kwathoz mke zha rtsin Zha Nabee. ¹³ Bni goo "diox" kwent chaan da lo wetsaa Rufo kuu mli Diox; noga lo xnaa zha kuu nak taxal xnaan. ¹⁴ Bni goo "diox" kwent chaan da lo re wetsaa, Asincrito, Flegonte, Hermas,

Patrobas, Hermes ne noga lo reta wetsaa kuu nzi kon re zha ree.¹⁵ Noga bni goo "diox" kwent chaan da lo wetsaa Filólogo, lo btanaa Jul, lo wetsaa Nereo ne lo btaan Nereo, lo Olimpas ne lo reta zha kuu nyelaaz Jesucrist kuu nzi kon re zha.

¹⁶ Kadta thib goo bni goo "diox" lo reta wetsaa ne lo re btanaa, ne dow goo thib chut kwat kadta thib zha thib mod nali lo yalnkelaaaz chaan Diox. Ne noga reta zha kuu nyelaaz Jesucrist ni "diox" lo reta goo.

¹⁷ Reta goo wets'n ne btan na, naab'n lo goo beche goo lo re zha kuu ntsownzhak rol re zha kuu nyelaaz Jesús; re zha kuu ntsow nla re zha kuu nyelaaz Jesús lo kuu went, tak nlloot zha taxal mloo Jesucrist. ¹⁸ Tak ntsowt re zha'a rtsin Jesucrist, sinke beeta nkwaan zha kuu nyow leetsoo kwerp zha, ne kon diiz naguuz nkedi zha re zha kuu neyt ndo nyelaaz Jesucrist. ¹⁹ Reta zha ne lee re goo nhzon diiz lo Diox; kona kwathoz laz'n ne konaga nlaz'n teed goo tsow goo reta kuu wen, per tsowt goo kuu went. ²⁰ Tsa lee Diox kuu ntsow wen nzi'aa, tsow tsa tsowaa gan lo Maxuuy. Ne lee Jesucrist, Zha Nabee lo'aa loo yalnkelaaaz chaan lo goo.

²¹ Noga Tim kuu nke rop nee tsiin, ni "diox" lo re goo. Noga Lus, Jasón ne Sosípater ni "diox" lo goo, re zha ree nak zha liz'n. ²² Lee na nak Tercio, na ngekee xkiiz Paba lo yeets ree, noga na nin "diox" lo re goo kon le Zha Nabee.

²³ Noga Gayo ni "diox" lo goo, liz Gayo nzon, ne leeka zha ntseche liz zha par nzhoolee lo Diox. Noga Erast ni "diox" lo re goo, lee zha nak tesorer yez ree, ne noga wetsaa Kwarto ni "diox" lo re goo. ²⁴ Nlaz'n thibka loo Jesucrist yalwen chaan Jesucrist lo reta goo. Tata gake.

Re diiz bluz kuu mbil Paba lo Diox

²⁵ Golaa lo Diox kuu tak tsow tsa ney to'aa lo Diox, taxal nak xkiiz Jesucrist kuu mndan kwent lo goo, kuu ngoo gaats ndala leettsa terka texkwaa Diox yezlyu. ²⁶ Per lee nal mloo Diox re kuu nzo yek Diox tsow Diox lo'aa, lo re yeets kuu mkee re profet Diox taxal mnabee Diox, Diox kuu nabani thitanax, tsa ne reta mene ne tsa yelaaz re men Jesús ne gon zha diiz lo Diox.

²⁷ ¡Nlaz'n tsow nataak reta men Diox kuu nzhaak reta kwaa, ne gol re men lo Diox por kuu wen kuu mtsow Jesucrist!

¡Tbaa gake!

Paba

Yeets ner kuu mkee Paba lo re zha yez Corinto

Paba mni "diox"

¹ Na Paba, Diox mrez'n tsa gak'n apóstol chaan Jesucrist, taxal nlaaz Diox. Ne nogá wets Sóstenes, ² ngekeen yeets ree lo re goo, zha kuu nak zha Jesucrist kuu nzo yez Corinto, nak goo zha Diox tak nyelaaz goo Jesucrist. Diox mrez goo ne mtsow nambi Diox goo, thibka kon reta zha kuu nyelaaz Jesucrist kuu nzo dib nauxta lo yezlyu. Kona lee Jesucrist nak Zha Nabee lo'aa ne lo re zha'a. ³ Nlaz'n lee Diox kuu nak Xutaa, ne Xut Jesucrist Zha Nabee lo'aa, loo yalnkealaaz chaan lo re goo, tsa wen kwin goo.

Diox mloo yalnkelaaaz chaan Diox

⁴ Thibka ndan texkix lo Diox por re goo, por yalwen chaan Diox kuu mndaa Diox lo goo, tak nyelaaz goo Jesucrist. ⁵ Ne tak thibka nak goo kon Jesucrist, kona mndaa Diox reta kuu wen thoz lo goo, re diiz kuu ndediz goo ne reta kuu nzhaak goo. ⁶ Tbaa mod lee kwent chaan Jesucrist kuu mndaa zha kwent lo goo ngok kuu wli lo goo; ne thib ngoo leetsoo goo ngwalaaz gooy. ⁷ Ne kona nhzaght falt neeka thib kuu nataak kuu ndelaaz Diox lo goo, lo ngebet goo bretab Jesucrist Zha Nabee lo'aa. ⁸ Diox tsow tsala to goo lo Diox nal ne asta bluz, leettsa bretab Jesucrist Zha Nabee lo'aa, tsa yent cho keki goo lo Diox tsya. ⁹ Nali nak Diox ne ntsow Diox kuu ni Diox ne lee Diox mrezaa, tsa thibka banaa kon Jesucrist Xgann Diox, Zha Nabee lo'aa.

Thibka nak Jesucrist

¹⁰ Re goo wets'n ne btan na, kon yalnabee chaan Jesucrist Zha Nabee lo'aa, naab'n lo goo yodizt goo ne neeka gak rolt goo. Sinke wen goo goo ne lalka btsov goo xgab. ¹¹ Re goo wets'n ne btan na, nin koree lo goo, tak lee re zha liz Cloé ne lon, lee goo ngyo altaa. ¹² Kuu nlaz'n nin lo goo nak, lee chop tson goo mbez: "Lee nee ndeke dits Paba". Lee teplal goo mbez: "Lee re nee ndeke dits Apolos". Lee teplal goo mbez: "Lee re nee ndeke dits Pey". Ne lee teplal goo mbez: "Lee re nee ndeke dits Jesucrist". ¹³ ¿Chu ndak goo tyen nak Jesucrist? ¿Ne chu Paba mke lo kruz por goo? ¿O chu kon le Paba ngokleyy goo? ¹⁴ jNdan texkix lo Diox, tak mtsowleyy't neeka thib goo, beeta Crispo rop Gayo mtsowleyy'n! ¹⁵ Kona neeka thib goo gagt ne, lee goo ngokleyy goo kon len. ¹⁶ Ne nogá mtsowleyy'n Estéfanas ne re zha liz Estéfanas, ne ndak'n yent raa cho mtsowleyy'n. ¹⁷ Tak mtaalt Jesucrist'n tsowleyy'n

re men, sinke lee Jesucrist mtaal, par tan kwent Diiz Chul chaan Jesucrist lo re men. Ne leettsa ndan kwent Diiz Chul chaan Jesucrist, ndat'n kwente tak nzhaak'n ndediz'n tsa yelaaz zhay. Sinke ndan kwente tsa key tsii leettsaa zha ne tsa gak nataak mke Jesucrist lo kruz.

Jesucrist nak yalnabee ne yalnzaak chaan Diox

¹⁸ Lo re zha kuu ndya gabil, yalbxen nak kuu nguth Jesucrist lo kruz por lee, per lee lo'aa zha kuu tsow gan yalnaban, leey nak yalney chaan Diox. ¹⁹ Taxal nzhab lo xkeets Diox:

Luuu'n yalnzaak chaan re zha nzhaak, ne tsow'n tsa yent raa kwan yen re zha kuu nyen re kwa. [Is. 29:14]

²⁰ ¿Pa nyaan re zha nzhaak, re maestr ne re zha kuu nzhaak ngyodiz re kwent yezlyu ree? ¡Thitanax mtsow bxeen Diox yalnzaak chaan re men yezlyu ree! ²¹ Tak kon yalnzaak chaan Diox, mtsow Diox tsa mleebet re zha yezlyu ree Diox kon yalnzaak yezlyu ree. Ne mndaa Diox yalnaban kuu thitanax lo re zha kuu nyelaaz Diox, por Diiz Chul chaan Jesucrist kuu ndaa nee kwent, tegal lee diiz ree nak yalbxen lo tedib net re men.

²² Lee re tawlaz'n zha Israel nlaaz zha tsow Diox re kuu thoz, ne lee re zha gryeg nkwaan zha yalnzaak, ²³ per lee nee ndaa nee kwent chaan Jesucrist kuu nguth lo kruz. Lee kona nak taxal ke kuu ndral nii re tawlaz'n zha Israel, ne lee lo re zha kuu nagt zha Israel yalbxen naake, ²⁴ per lee re zha kuu mli Diox, tegal zha Israel nak zha o nagt zhay ne zha lee Jesucrist nap yalnzaak ne yalney chaan Diox. ²⁵ Lee nee ndaa kwent, lee Diox mtaal xganne Jesucrist nguth lo kruz, tegal yalbxen nak koree lo re men yezlyu ree, per koree nloo lee Diox wlipaa nzhaak Diox; lee re men yezlyu ree ntsow xgab, lee koree nloo lee Diox neyt, per koree nloo wlipaa ney Diox.

²⁶ Re goo wets'n ne btan na, ndoblo ne goo lee Diox mrez goo, tegal lutta goo nak zha kuu nzhaak taxal nzhaak re men yezlyu ree, lutta goo nak zha kuu mkeno yalnabee ne lutta goo ngok zha kuu nataak. ²⁷ Per Diox mli re zha kuu gagt, tsa tethoy zha re zha kuu nzhaak, ne ndota zha mli Diox, tsa tethoy zha re zha kuu nataak. ²⁸ Diox mli re zha kuu nataagt ne re zha kuu ntsowt re zha yezlyu ree kas, tsa luuz Diox xgab re zha kuu nataak lo yezlyu ree. ²⁹ Tenzhee mtsow Diox, tsa neeka thib zha rubt lo Diox. ³⁰ Ne lee Diox mtsow thibka nakaa kon Jesucrist, kona napaa yalnzaak chaan Diox, ne lee Jesucrist mtsow mrin wenaan kon Diox ne mtsow nambi Jesucrist re'aa lo re faltaa. Ne mloo Jesucrist re'aa lo yalguth. ³¹ Kona

ndoblo tsowaa, taxal nzhab lo xkeets Diox: "Os lee thib goo nlaaz ley, ndoblo ley goo lo re chaan Zha Nabee". [Jer. 9:24]

2

Diiz Chul chaan Jesucrist kuu mke lo kruz

¹ Re goo wets'n ne btan na, leettsa ngwatan kwent xkiiz Diox kuu wli lo re goo, mnit nay kon diz kuu nagan neeka kon yalnzaak chaan re men yezlyu ree. ² Ne leettsa mndon lo re goo, nlazt'n gagon na neeka thib kwent chaan goo, sinke thibka mndan kwent chaan Jesucrist kuu mke lo kruz lo goo. ³ Ne leettsa mzin na lo goo, neyt'n kwathoz nzhii't ne nzeb'n, ⁴ ne leettsa mndan kwent xkiiz Diox lo goo, mnit nay kon yalnzaak chaan re men yezlyu ree, neeka mtsowt'n tsa yelaaz goo xkiiz'n. Sinke lee Mbi Nayon ne yalney chaan Diox mtsow mloo re kuu thoz lo goo. ⁵ Ne yelaaz goo Diox por yalney chaan Diox, yelaazt goo Diox por yalnzaak chaan re men yezlyu ree.

Mbi Nayon chaan Diox nloo naa cho nak Diox

⁶ Kona, kon yalnzaak ndediz nee lo re zha kuu ney ndo yelaaz Diox, per nagte kon yalnzaak chaan men yezlyu ree, ne neeka nagte kon yalnzaak chaan re zha kuu nabee lo yezlyu ree, tak reta koree telux. ⁷ Lee nee ndediz nee kon yalnzaak chaan Diox, kuu ngoo gaats desde leettsa terka texkwaa Diox yezlyu, tsa taa Diox yalnaban kuu thitanax lo'aa. ⁸ Ne neeka thib re zha kuu mnabee lo yezlyu ree myent koree, tak os gayen zhay, gakeet zha Jesús Zha Nabee lo'aa lo kruz. ⁹ Taxal nzhab lo xkeets Diox:

Re kuu neeka thib men ter wii,
ne re kuu neeka thib men ter gon,
ne re kuu neeka ter tsin leettsoo re men,
nak re kuu nap Diox par re zha kuu nke
leettsoo Diox. [Is. 64:4]

¹⁰ Per lee Diox mloo re koree lo'aa por Mbi Nayon chaan Diox, tak lee Mbi Nayon nlebee reta kwaa, asta re xgab chaan Diox nlebee Mbi Nayon.

¹¹ Wlipaa nin lo goo, neeka thib zha nlebeet xgab chaan tedib zha, sinke beeta xbi zha ne naa kwan nzo leettsoo zha. Ne leeka tata yent cho ne naa kwan ntsow Diox xgab, beeta Mbi Nayon chaan Diox ney. ¹² Ne mkayaataa mbi yezlyu ree, lee'a mkayaa Mbi Nayon chaan Diox, tsa lebee'a re kuu mndelaaz Diox lo'aa. ¹³ Kona ni nee re koree lo goo, kon yalnzaak kuu nteed nee lo Mbi Nayon chaan Diox, ne nit neey kon yalnzaak kuu mteed nee lo re men yezlyu ree, kona ndaa nee kwent chaan Diox lo re zha kuu nak zha Diox.

¹⁴ Lee re zha kuu nyelaazt Diox, napt zha Mbi Nayon chaan Diox leettsoo, ne nyent zha re kuu nak chaan Mbi Nayon, tak kuu naxen nake lo zha. Ne gagt yen zhay, tak napt zha Mbi Nayon chaan Diox. ¹⁵ Per lee zha kuu nap Mbi Nayon chaan Diox, nap zha yalnzaak par yen zha reta kuu, ne yent cho tak tediz lee zha went nak. ¹⁶ Tak lo xkeets Diox nzhab: "¿Cho nlebee xgab chaan Diox? ¿Cho zha tak loo lo Diox?" [Is. 40:13] Per lee'a napaa xgab chaan Jesucrist.

3

Re zha kuu nke rtsin Diox

¹ Re goo wets'n ne btan na, ngogt ganin lo goo taxal re zha kuu ney ndo nyelaaz Jesucrist, sinke mnin lo goo taxal lo zha yezlyu ree, taxal zha kuu ndediz lo re ndyeen bzhizh, tata mndan kwent chaan Jesucrist lo goo. ² Kuu nagant mloon lo goo, tak bee ter yen gooy tsya ne neeka nal bee ter yen gooy; taxal zha kuu ndaa nzii nzhuu mbet, tata mtetede'n goo, tak lee mbet gagt wu mbet kuu nzhaw zha gox, ³ tak bee naka goo taxal zha yezlyu ree. Bee nayika nzhak leettsoo goo ne goo tedib goo, ngyodiz goo ne nzhak rol goo. ⁴ Chu nagt zha yezlyu ree nak goo, leettsa ntsow goo xgab taxal re men yezlyu ree? ⁴ Leettsa lee thib goo mbez: "Na ndeke dits Paba", lee tedib goo mbez: "Na ndeke dits Apolos", taxal zha yezlyu ree ndediz goo, leettsa tabaa mbez goo.

⁵ Ne, ¿cho nak Paba? Ne ¿cho nak Apolos? Beeta zha kuu nke rtsin Diox nak nee, ne mtsow nee ngwalaaz goo Zha Nabee. Ne kadta thib nee ntsow nee tsin kuu mndaa Zha Nabee tsow nee. ⁶ Nal nin naa xomod nake; leettsa mndan kwent xkiiz Diox lo re goo, kona nak taxal na mloo mbiz lo yu; ne leettsa mteted Apolos goo, kona nak taxal mlaal Apolos bin, per Diox nak kuu nxeneen. ⁷ Kona, neeka zha kuu ngo bin ne neeka zha kuu nlaale nataagt zha, sinke Diox nataak, tak lee Diox nxeneen reta kwaa. ⁸ Kona lee zha kuu ngo bin ne zha kuu nlaale, lalta nataak zha, ne Diox kix lo kadta thib zha port tsin kuu mtsow zha. ⁹ Ne rtsin Diox nke rop altaa nee, ne lee goo nak taxal yezlyu ta nke Diox tsiiñ.

Noga, nak goo taxal thib yuu kuu ngetaa Diox. ¹⁰ Diox mndaa yalnzaak lon, kona nak'n taxal thib maestr lo re zha kuu nta yuu. Na mtob simyent ne lee tedib zha nak kuu nta yuu. Per kadta thib zha ndoblo wii zha naa xomod ta zhay. ¹¹ Ne yent raa cho ndoblo tob tedib simyent lo simyent kuu ndoba, tak lee simyent kuu ndoba nak Jesucrist. ¹² Ne dits simyent ree, tak ta zha thib yuu or o yuu plat o tak ta zhay kon ke kuu chul na, kon ya, kon yizh o kon yi. ¹³ Per

leetsa tsin wiz kuu naab Diox kwent, tsya yanabee rtsin kadta thib zha, tak wiza lee Diox taal bel, ne kon bel gak preb rtsin kadta thib zha. ¹⁴ Os lee thib zha mdexkwaa thib yuu kuu xek lo ki, tekaya zha kuu kix Diox lo zha. ¹⁵ Ne os lee yuu kuu mdexkwaa zha yek, tsa mluux zha reta chaan zha, per taxal zha kuu nlaa lo ki telaa Diox zha.

¹⁶ Noga ndoblo ne goo, lee'aa nak gwodoo chaan Diox, ne lee Mbi Nayon chaan Diox nzo leettsoo'aa. ¹⁷ Ne os cho luux gwodoo chaan Diox, lee Diox luux zha'a, tak nayon nak gwodoo chaan Diox, ne goo nak gwodoo'a.

¹⁸ Kedit goo leeka goo; os lee thib goo ndak goo nzaak goo re kuu yezlyu ree, ndoblo tsow goo taxal thib zha kuu neeka thib kuu gagg, tsasi lee Diox wlipaa taa yalnzaak lo goo. ¹⁹ Tak lee yalnzaak yezlyu ree nak kuu naxen lo Diox. Taxal nzhab lo xkeets Diox: "Leeka lo yalnzaak chaan zha nden Diox zha". [Job 5:13] ²⁰ Ne noga nzhabee: "Lee Zha Nabee ne'a zha lee xgab re zha kuu nzaak thitanax nataagte". [Sal. 94:11] ²¹ Kona neeka thib goo ndoblot rub goo, tak ngeteed goo lo thib zha kuu nataak, tak reta kuu nak chaan goo: ²² reta kuu mloo Paba lo goo, re kuu mloo Apolos lo goo o re kuu mloo Pey lo goo, yezlyu, yalnaban, yalguth, kuu nzo nal ne kuu yo bluz, reta koree nak chaan goo, ²³ ne reta goo nak zha Jesucrist, ne lee Jesucrist nak zha Diox.

4

Rtsin re apóstl chaan Jesucrist

¹ Kona ndoblo wii goo lo nee beeta taxal thib mos kuu nke rtsin Jesucrist, tak lee Jesucrist mndaa tsin ree tsow nee, ne nloo nee re chaan Diox kuu ngoo gaats ndala lo re men nal. ² Ne loka zha kuu kayaa thib tsin lo Diox, ndoblo loo zha lee zha nak thib zha kuu wen tsowe. ³ Per lee na, neeka lut ndat leettsoon naa xa ntsow goo xgab ngwii goo lon, ne neeka ndat leettsoon, os naab re zha kuu nak tsin kwent lon, ne neeka na naabt kwent lon. ⁴ Ne tegal neeka lut ndat leettsoon por re kuu ntsow'n, nagt por kona nak'n thib zha kuu ndabt falt. Tak lee Zha Nabee nak kuu naab kwent lon. ⁵ Kona ndoblot naab goo kwent, leettsa ter gal or naab goo kwent, blet goo yaad Zha Nabee, tsa koo zha re kuu nzogaats lo yalkow lo xni, ne tsow zha loo re kuu nzo leettsoo kadta thib thib men. Tsa lee Diox taa lo kadta thib zha loka kuu ndoblo zha kayaa zha.

⁶ Re goo wets'n ne btan na, nin koree lo goo, tsa ne goo naa xomod nak rtsin rop nee Apolos. Noga nin koree lo goo, tsa noga goo tsow goo taxal ntsow nee, ne tsa tsowt goo kuu nketa lo xkeets Diox, tsa neeka thib goo, tsow narot goo gab goo lee tedib zha went

nak. ⁷ Ne, ¿cho ntsow mas nataak goo nake tedib net re men? ¿Kwan kuu nkeno goo kuu mndaat Diox lo goo? Ne os Diox mndaay lo goo, ¿chebee ndrub goo taxal gooka mkwaan gooy kwentka goo?

⁸ Ne ndak goo rika goo, ne ndak goo napa goo reta kuu ndablaaz goo, ne ndak goo nak goo taxal rey, ne ndak goo ndechet raa goo nee. ¡Wene os rey nak goo, tsa tak nabee goo thibka kon nee! ⁹ Ne ndak'n lee re nee kuu nak apóstl chaan Jesucrist, nak nee zha kuu thitanax nataagt lo re men yezlyu ree. Nak nee taxal re zha kuu taa zha gath; ne thibka lo nee ngwii re men yezlyu ree kon re mandad chaan Diox. ¹⁰ Lo re men, zha bxen nak nee tak nyelaaz nee Jesucrist, ne lee re goo list goo ndak goo, tak nyelaaz goo Jesucrist. Nee nak zha neyt ne lee re goo nak zha ney. Nayii re men ne nee per lee goo nataak goo lo re men. ¹¹ Asta wiz naltserree, lee nee thibka ndriid nee win, tak napt nee kuu wu nee neeka kuu gu nee, neeka napt nee lar gok nee, ne nteti re men nee, ne neeka napt nee liz nee, ¹² nyekwan nee nke nee tsin. Ne nge re men nee, per lee nee naab kuu wen lo Diox par re zha'a. Ndralno zha nee per nxek nee. ¹³ Nlooz zha nee, per lee nee nkab nee lo zha kon diiz wen. Taxal kuu lortsint raa ntsowno zha nee, ne thitanax nataagt nee lo zha asta wiz naltserree.

¹⁴ Ne ngekeet'n koree lo goo tsa thyo goo, sinke ngekee nay tsa tenin goo, taxal zhiinn na, tak kwathoz nke leettsoon goo. ¹⁵ Ne tegal nap goo tsii mil maestr kuu ndaa kwent chaan Jesucrist lo goo, per napt goo tyen xut goo. Ne na nak taxal xut goo, tak leettsa mndan kwent chaan Diiz Chul lo goo, tsa ngok'n taxal xut goo, tak ngwalaaz goo Jesucrist. ¹⁶ Kona naab'n lo goo, btsow goo taxal ntsow'n.

¹⁷ Ne kona mtaal'n Tim lo goo. Lee zha nak taxal xgann na kuu kwathoz nke leettsoon, ne nali ndo zha nyelaaz zha Diox. Lee zha tsow tsa telaaz goo xa ndon nyelaz'n Jesucrist, leeka taxal nloon lo re zha kuu nyelaaz Jesús reta ta ndan. ¹⁸ Nzo chop tson goo kuu naro nzhak, tak ndak goo yatwiit'n lo goo; ¹⁹ per chatta yal'n yatwiin lo goo, os lee Zha Nabee nlaaz. Tsa nen naa kwan teye leettsoo re zha ruba tsow, o beeta ndrub zha. ²⁰ Tak nagt men zha Diox por kuu ndediz men, sinke nak men zha Diox, os lee men nap men yalney chaan Mbi Nayon chaan Diox leettsoo men. ²¹ ¿Kwan nlaaz goo? ¿Chu nlaaz goo tetin goo, leettsa tsin na lo goo, o chu nlaaz goo naley yo leettsoon, kelaz'n goo ne nadoo tsow'n lo goo, leettsa yal'n lo goo?

5

*Ndoble goo naab goo kwent lo zha kuu
nzhak rop kon ndota zha*

¹ Kwathoz nyath lee thib re goo nzhak rop kon tsaal xut. ¡Ne koree nak thib kuu thitanax went, neeka re zha kuu nyelaazt Jesucrist ntsowt kona! ² ¡Ne bee naro nzhak goo! ¡Mas wen ndoble nabil yo leettsou goo, ne ndoble koo goo zha kuu mtsow kona xid goo! ³ Tegal ndot'n lo goo per lee xgab da ndo lo goo, ne mlobee'a na kwan gak kon zha kuu tata mtsowa. ⁴ Leettsa kaltaa goo par texnet goo kwent ree, lee xgab da to kon re goo ne kon yalnabee chaan Jesucrist, ⁵ btaa goo zha'a lo yalnabee chaan Maxuuy, tsa lux re kuu nlaaz kwerp zha, tsa lee xbi zha tsow gan ndya yibaa wiz kuu bretab Jesucrist.

⁶ Ndoblot naro tsow goo por re kuu went kuu ntsow goo, o ¿chu net goo lut lebadur ntsow nyezhoob dita koob? ⁷ Kona bloo goo lebadur kuu nap goo lee, tak lee lebadura ntsow nyezhoob koob, bloo gooy tsa gak goo taxal pan kuu mdexkwaa kon koob kub kuu nyoot lebadur, kuu nzhaw zha lo ani Paskw. Tak Jesucrist mke lo kruz, ne lee Jesucrist ngok mbak zhiil lo ani Paskw. ⁸ Kona ndoble tsowaa ani Paskw, thib mod wen ne nali, kuu nak taxal pan kuu nyoot lebadur, ne tsowtleey kon re kuu went ne kon re kuu nambit, kuu nak taxal lebadur.

⁹ Lo tedib xkeets'n kuu mkeen lo goo, nin lo goo ndoblot kaltaa goo kon zha kuu nzhak rop kon ndota zha. ¹⁰ Ne leettsa minin koree lo goo, nit'n lo goo lee goo ndoblot kaltaa goo kon reta zha yezlyu ree, re zha kuu nzhak rop kon ndota zha, re zha kuu ndablaaz, zha wann, zha kuu nyelaaz re diox kuu wlit nak Diox, tak os lee goo nlaazt goo kaltaa goo kon re zha'a, tsasi thitanax ndoble roo goo yezlyu ree. ¹¹ Kuu nlaz'n nin lo goo nak: Ndoblot kaltaa goo kon thib zha kuu mbez nyelaazt Jesucrist ne nzhak rop zha kon ndota zha, zha ndablaaz, zha nyelaaz re diox kuu nagt Diox, zha nlooz, zha gwiy, zha wann, neeka ndoblot tob goo wu goo kon re zha kuu tabaa nak. ¹²⁻¹³ Tak ndoblot'n naab'n kwent lo re zha kuu nagt zha Jesucrist, Diox naab kwent lo re zha'a. Per lee re goo ndoble naab goo kwent lo re zha kuu nyelaazt Jesucrist, kona ndoble koo goo zha kuu tata ntsowa xid goo.

6

*Ndoblot keki zha kuu nyelaazt Jesucrist al-
taay lo zha nak tsin*

¹ Leettsa lee thib goo ngyo kon tedib goo, ¿chebee nye leettsou goo nya goo lo re zha kuu nak tsin lo yezlyu ree, re zha kuu nyelaazt Diox, tsa texnet zha kwent goo? ¿Chebee ndaat goo kwente lo re zha kuu nyelaazt Jesucrist, ne naab goo lo re zha texnet

zha kwent goo? ² ¿O chu net goo lee re zha kuu nyelaazt Jesucrist, gak zha kuu naab kwent lo re men kuu nzo lo dib naxta lo yezlyu? Ne os re goo naab kwent lo re men kuu nzo lo dib naxta yezlyu, ¿chebee gagt texnet goo re kwent bzhizh? ³ ¿Chu net goo, asta lo re mandad chaan Diox naabaa kwent? ¡Kona tak texnet goo kuu ntsow re altaa lo goo! ⁴ Os ngyo goo por ndota kwaa yezlyu ree, ¿chebee nya goo lo re zha kuu nak tsin lo yezlyu ree, re zha kuu thitanax nataagt lo re zha kuu nyelaazt Diox? ⁵ ¡Nin koree tsa thou goo! Tak ¿chu yent neeka thib zha nzhak xid goo, thib zha kuu tak texnet re kwent goo? ⁶ ¡Leel, leettsa nkeki goo altaa goo, chebee leel lo re zha nak tsin kuu nyelaazt Diox nda goo!

⁷ Ndaa goo falt leettsa ngyo altaa goo. ¿Chebee nxegt goo? ¡Mas wen laa goo lowann zha kuu nap goo! ⁸ Leel zha'a kuu ntsow goo, went kuu ntsow goo, lowann goo lo altaa goo kuu nyelaazt Diox.

⁹ Laat goo kedi zha goo, ¿chu net goo lee re zha kuu ntsow kuu went, tabt zha ta nabee Diox?

Re zha kuu nzhak rop kon ndota zha, re zha kuu nyelaazt re diox kuu ndexkwaa re men, re zha kuu nzhak rop kon zha kuu nagt tsaal zha,

ne re zha kuu nzhak rop kon leeka tabyi, ¹⁰ zha nlowann, zha ndablaaz, zha gwiy, zha nlooz men, zha nkedti, reta zha kuu ntsow re koree tabt zha ta nabee Diox. ¹¹ Ne noga nzo cho goo tabaa ngok ndala, per nal ngok nambi'a goo lo re falt goo, ne mtsowa Diox nak goo zha Diox, noga mtsowa Diox tsa mriin wen goo kon Diox por Mbi Nayon chaan Diox, tak nyelaazt goo Jesucrist Zha Nabee lo'aa.

Ndoble nambi keno'aa kwerpaa lo Diox

¹² Tak gab men: "Libr'n, tak tsow'n loka kuu nlaz'n". Wli libr men, per ret kwaa ndoblot men tsow men. Libr men, per taat men diizt nabee kwerp men lo men, per tsowe kuu nlaaze. ¹³ Noga tak gab men: "Lee re kuu nzhaw men nak par leettsou men, ne lee leettsou men nak par re kuu nzhaw men". Wliy, per roptay teluux Diox. Ne mnndaat Zha Nabee kwerpaa tsa tsowe kuu went, sinke mnndaat zhay lo'aa, tsa gake chaan zha ne lee zha nabee. ¹⁴ Ne leeka taxal mteroban Diox Jesucrist Zha Nabee lo'aa, tataka teroban Diox re'aa kon yalney chaan Diox.

¹⁵ ¿Chu net goo lee kwerpaa, nak kwerp chaan Jesucrist? Kona ndoblot tsow'n, tsa gak rop kwerp da kon thib ngot kuu ntho

kwerp. ¡Chlipaa tsowt nay! ¹⁶ ¿Chu net goo leettsa lee thib zha nzhak rop kon thib ngot kuu ntho kwerp, thibka nzhak kwerp zha kon ngota? Tak lee lo xkeets Diox nzhab: "Lee rop zha nzhak taxal thibka zha". [Gn. 2:24]¹⁷ Per leettsa lee thib zha nyelaaz Diox, thibka nak lee zha ne Diox.

¹⁸ Kona, ndoblot gak rop goo kon ndota zha. Os lee thib zha ntsothib kuu went kuu nagt koree, yent kwan tak kwerp zha; per lee zha kuu nzhak rop kon ndota zha, ntsothib kuu went leeka lo kwerp zha. ¹⁹ ¿Chu net goo, lee kwerpaa nak gwodoo chaan Mbi Nayon kuu mndaa Diox lo'aa, ne lee Mbi Nayon nzo leettsoo'aa? Kona lee kwerpaa, nagte chaanaa, leey nak chaan Diox,²⁰ tak kwathoz naap mzhii Diox re'aa. Kona kon mbi nabanaa ne kon kwerpaa, ndoblot tsowaa kuu nyow leettsoo Diox, tak roptay nak chaan Diox.

7

Paba mndaa kwent xomod nak yalntseyea

¹ Nal kab'n re kuu mnaabdiz goo lon, lo yeets kuu mkee goo lon. Kuu nin nak: Mas wen tseyat mbyi;² per tak kwathoz nzhak rop zha kon ndota zha, kona kadta mbyi ne kadta ngot ndoblot tseyea.³ Lee mbyi ne ngot kuu nap tsaal, ndoblot taa zha kwerp zha lo altaa zha. ⁴ Tak lee kwerp ngot nagte chaan ngot, leey nak chaan tsaal ngot. Ne leeka tata lee kwerp mbyi nagte chaan mbyi, leey nak chaan tsaal mbyi.⁵ Ndoblot tyalt goo lo tsaal goo. Per tak tsow gooy, os rop goo yaan diuze, leettsa naab goo thib kuu lo Diox. Ne tsaraa tsaal goo tedib welt, tsaa tsowt Maxuuy gan lo goo ne tsow goo kuu went.

⁶ Ne xgab da nin koree lo goo, tsaa ne goo naa kwan ndoblot tsow goo, per nagte kuu mnabee Zha Nabee.⁷ Nlaz'n reta goo gak taxal na, napt'n tsaal'n. Per nen zhaha zhaha kuu ndelaaz Diox lo kadta thibaa, nzo lo zha mndelaaz Diox keno zha tsaal zha, ne nzo lo zha mndelaaz Diox yaan zha thita zha ne wen yo zha.⁸ Per kuu nin lo re zha kuu ter tseyea ne lo re zha byud, mas wen tseyat zha, tsaa gak zha taxal na.⁹ Per os lee goo xegt goo, mas wen btseyaa goo, naake tsow goo kuu went kuu nlaaz kwerp goo.

¹⁰ Ne lo re goo kuu mtseya'a nabeen, ndoblot laa ngot tsaal ngot, nabeet nay Zha Nabee nabeey.¹¹ Ne os lee thib ngot laa tsaal, ndoblot raa tseyaa ngot kon tedib mbyi, per tak bre ngot lo tsaal ngot. Ne leeka tata, ne lee mbyi ndoblot mbyi laa mbyi tsaal mbyi.

¹² Lee lo tedib net zha nin, kuu nak xgab da, nagte kuu ne Zha Nabee: Os lee tsaal thib wets nyelaazt Jesus ne wen nzo rop zha,

ndoblot laa zha tsaal zha.¹³ Ne os lee tsaal thib btanaa nyelaazt Jesus, ne wen nzo rop zha, ndoblot laa ngot tsaal ngot.¹⁴ Tak lee mbyi kuu nyelaazt Jesus, nambi nak zha, tak lee tsaal zha nyelaazt Jesus, ne lee ngot kuu nyelaazt Jesus, nambi nak ngot, tak lee tsaal ngot nyelaazt Jesus. Ne os leey nagte tabaa lee re zhiinn rop zha gak taxal zhiinn zha kuu nyelaazt Diox, per kuu wli nak, nambi zhiinn zha.¹⁵ Per os lee mbyi o ngot kuu nyelaazt Jesus, nlaaz laa tsaal, tak tsow zhay. Ne tabaa mod lee mbyi o ngot kuu nyelaazt Jesus mlaa lo tsaal, tak Diox mrezaa tsaa wen yo'aa.¹⁶ Kona btan na, net'n naa chu tetelaa Diox tsala lo yalguth. Ne noga lu wets'n, net'n naa chu tetelaa Diox tsala lo yalguth.

¹⁷ Per kadta thib goo ndoblo ban taxal mndaa Zha Nabee diiz ban goo, taxal nak goo leettsa mrez Diox goo. Ne koree nabeen lo reta zha kuu nyelaazt Jesus.¹⁸ Os lee Diox mrez thib goo kuu nke seny chaan re nee zha Israel, ndoblot tataka yaan goo; os lee Diox mrez thib goo kuu nket seny chaan re nee zha Israel, ndoblot ke goo seny.¹⁹ Nataagt seny, kuu nataak nak goonaai diiz xkiiz Diox, tegal nke senyaa o nkete lee.²⁰ Kadta thibaa ndoblot yaanaa, taxal nakaa leettsa mrez Diox re'aa.²¹ Kona os lee thib goo nak mos, leettsa mrez Diox goo, yat leettsoo goo, ne os tak laa goo par gagt raa goo mos, tak tsow gooy.²² Tak loka zha kuu nak mos leettsa mrez Diox zha, lee nal nak zha thib zha kuu mtelaa Diox, ne lee nal lee zha nke rtsin Zha Nabee; ne lee zha kuu nagt mos leettsa mrez Diox zha, lee nal lee zha nak mos chaan Jesucrist.²³ Kwathoz naap mzhii Diox re'aa, kona ndoblot laa'aa lee tedib zha tsow gakaa mos tedib welt.²⁴ Kona nin lo re goo wets'n ne btan na, kadta thibaa ndoblot gakaa taxalka nakaa leettsa mrez Diox re'aa.

²⁵ Ne lo re zha kuu ter tseyea, napt'n kuu nabee Diox par re zha, per nin kuu nak xgab da lo re zha, ne ndoblot gon re zha diuze, tak mlat leettsoo Diox mne Diox'n.²⁶ Ndak'n ndoblot tseyaa re zha'a, ndoblot yaan zha tabaata, por re kuu nagan kuu nzo nal.²⁷ Loka cho nap ngot, ndoblot laa zha ngot zha; ne loka cho napt ngot, ndoblot kwaan zha ngot.²⁸ Per os lee zha tseyea zha ndaat zha falt, ne os cho thib nzaa yeen ntseyaa ndaat nzaa falt. Per lee re zha kuu ntseyaa rop tsala zha ndriid yalti, per kuu nlaz'n nak riidt zha yalti kona tabaa nin.

²⁹ Re goo wets'n ne btan na, koree nak kuu nlaz'n nin lo goo: Lee wiz mzin gaxa. Kona lee re zha kuu nap tsaal, ndoblot ke zha tsiai lo Diox taxal zha kuu napt tsaal;³⁰ ne lee re zha kuu nzhonn ndoblot tsow zha taxal zha kuu nzhonnt, ne lee re zha kuu naley nzo leettsoo, ndoblot tsow zha taxal zha kuu

naleyt nzo leettsoo, ne lee re zha kuu ndii ndoblo tsow zha taxal zha kuu nagt chaan zha re kuu mzhii.³¹ Ne lee re zha kuu wen nzo yezlyu ree, ndoblo ke zha tsiin lo Diox taxal zha kuu nataagt re kuu yezlyu ree lo, tak ne'a re'aa lee re kuu yezlyu ree telux.³² Nlaz'n yat leettsoo goo por re kwent ree. Leettsa lee thib mbyi ntseyat, mas ntsow mbyi xgab re chaan Diox, naa xomod wen la mbyi leettsoo Diox;³³ per lee mbyi kuu nap tsaal, mas nzo re kuu yezlyu ree yek mbyi, naa xomod wen yo rop tsaal zha.³⁴ Ne zhaa nak xgab ngot kuu nap tsaal nake ngot kuu napt tsaal. Lee ngot kuu napt tsaal mas ntsow ngot xgab re chaan Diox, ne ndaa ngot dita kwerp ngot ne mbi naban ngot, par gak nayon ngot lo Diox. Per lee ngot kuu nap tsaal nkwaan ngot re kuu yezlyu ree, tsa wen yo ngot rop tsaal ngot.

³⁵ Ne par wen nda goo nin koree lo goo, nlaazt'n tsib'n thib kuu ne dits goo, sinke tsa wen ban goo ne ke goo tsiin lo Zha Nabee kon dib ndroo leettsoo goo.

³⁶ Per os lee thib zha ndak zha mas wen tseyaa rtsaap zha, tak nderiida ngulal rtsaap zha, os ndak zha mas wen kona, ndoblo tsow zha kuu ndak zha wen; wen taa zha rtsaap zha tseyaa, ne nagt koree falt.³⁷ Per os lee tedib zha ndak zha mas wen tseyat rtsaap zha, neeka thib zha ndoblot tsow fwers zha, par tetseyaa zha rtsaap zha. Ne os mtsowa zha xgab ndoblot tseyaa rtsaap zha, wen ntsow zha.³⁸ Kona lee zha kuu ndaa rtsaap tseyaa, wen ntsow zha; ne lee zha kuu ndaat rtsaap tseyaa, mas wen ntsow zha'a.

³⁹ Lee ngot kuu nap tsaal, ndoblo gon ngot diiz lo tsaaal ngot, dita lo naban tsaal ngot; per os lee tsaaal ngot gath, tak tseyaa ngot kon loka zha kuu nlaaz ngot, tak mlaa'a ngot, per ndoblo gake kon thib zha kuu nyelaaz Diox.⁴⁰ Per mas wen os tseyat raa ngot. Koree nak kuu ntsow'n xgab ne nin, tabaa ntsow'n xgab, tak nap'n Mbi Nayon chaan Diox.

8

Re kuu ntsib zha lo re diox re men yezlyu ree

¹ Lee nal tan kwent chaan re kuu ntsib zha lo re diox re men yezlyu ree, wli retalee ne naa xomod nak koree. Per nlaz'n telaaz goo. Lee yalnzhakaaz ntsow ndrub men, per lee yalnkelaaz ntsow mas ney ndo men lo Diox.² Ne os lee thib zha ndak zha nzhaak zha lut, neeka lut ter yen zha re kuu taxal ndoblo yen zhay.³ Ne os lee thib zha nke leettsoo Diox, Diox nlebee zha'a.

⁴ Lee nal tan kwent, naa chu wen wu zha beel kuu ntsib zha lo re diox re men yezlyu ree. Wen ne'aa nataagt re diox re men yezlyu ree, ne wen ne'aa thibka Diox nzo.⁵ Tegal ndak re men kwathoz diox nzo

yibaa ne lo yezlyu ree, ne wlipaa ndak re men nzo kwathoz re diox ne kwathoz re zha kuu nabee,⁶ per lee lo'aa thibka Diox nzo kuu nak Xutaa, ne lee Diox mdexkwaa reta kwaa, ne zha Diox nakaa. Ne noga nzo thibka Zha Nabee lo'aa, zha'a nak Jesucrist, ne por lee Jesucrist mdexkwaa reta kwaa, ne por lee Jesucrist nabanaa.

⁷ Per ret zha ne koree. Nzo cho goo ndala ngwalaaz goo re diox kuu nagt Diox, ne tak myey gooy, kona bee nzhaw goo re beel kuu mbib lo re diazha, ne tak nyent goo xomod nake, kona nzhak chop xgab goo.⁸ Kayaat Diox re'aa por kuu nzhawaa, nagt tak nzhawaa thib kwaa tsa mas wena, neeka nagt tak nzhawtaay tsa mas wentaa.⁹ Per ndoblo wii'aa, tak cha ntsowaa koree, tsa lee re zha kuu neyt ndo nyelaaz Diox tsow thib kuu went.¹⁰ Os lee goo ne goo re koree, ne ndob goo nzhaw goo ta ndaa zha re maa gon lo re diox re men yezlyu ree, ne os lee thib wets goo wii ngeyow goo kona, ne tak neyt ndo zha nyelaaz zha Diox no zha wu zha kuu ngeyow goo, kuu nak gon kuu ndaa zha lo re diazha.¹¹ Ne por re kuu nyen goo, tsow goo tsa lee zha kuu neyt ndo lo Diox taa falt lo Diox, ne btelaaz goo noga por zha'a nguth Jesucrist.¹² Ne leettsa ntsow goo lee wets goo kuu neyt ndo lo Diox, ndaa falt lo Diox, noga goo ndaa goo falt lo Jesucrist.¹³ Kona, os lee kuu nzhaw'n ntsow lee wets'n o btan na tsow kuu went, mas wen wut'n beel, tsa tsow'n par taat zha falt.

9

Paba mndaa kwent chaan kuu ndoblo Paba kayaa Paba

¹ Na nak thib zha kuu mlaa'a. Nak'n apóstol chaan Jesucrist ne mwiin Jesucrist, Zha Nabee lo'aa. Ne goo nak taxal xle chaan tsiin kuu mkeen lo Zha Nabee.² Os cho zha ndak nagt'n apóstol chaan Jesucrist, per lee goo nyelaaz goo leen nake, tak nyelaaz goo Diox, ne koree nabee lee na wlipaa nak'n apóstol chaan Jesucrist.

³ Ne koree nak kuu nkab'n lo re zha kuu nlooz'n:⁴ Ndoblo nee naab nee kuu wu nee ne kuu gu nee lo re goo.⁵ Ne noga ndoblo nee keno nee thib tsaal nee kuu nyelaaz Diox, leeka taxal nap tedib net re apóstol chaan Jesús tsaal, taxal Pey ne re wets Jesús Zha Nabee.⁶ ¿Chu ndak goo beeta rop nee Bernabé ndoblo ke nee tsiin, par tsanaa nee kuu wu nee ne ke nee rtsin Diox?⁷ ¿Chu nzo thib soldad kuu nke tsiin ne leeka temi zha ntob zha par ndi zha kuu ndeche zha?⁸ ¿O chu nzo thib zha kuu nzhan luts ub ne nzhawt zha ub?⁹ ¿O chu nzo zha kuu nap mbak zhiil, ne nzhawt zha nzii maa?¹⁰ Tsowt goo xgab lee koree nak beeta xgab da, tak noga lo ley kuu mndaa Diox lo Moisés nkey.

⁹ Ne lo ley nzhab: "Kota yex roo ngon leettsa yo ngon ye toni ngon nzob xtil". [Dt. 25:4] Per nzhabt Diox koree, tak ntsow Diox xgab re ngon, ¹⁰ Diox nzhab koree, tak ntsow Diox xgab re'aa. Tak lee ley mke tsa tsowe ayudaa, kona lee zha kuu nke gonn yu gon ne zha kuu ntembali nzob xtil, nke zha tsuin tak ne zha tekayaa zha yalgong kuu ndoblo zha kayaa zha. ¹¹ Kona, os lee nee nzhannee mbiz chaan Mbi Nayon leettsou goo, ndak'n naroobt nak kayaa nee lut kuu ndeche nee lo goo. ¹² Ne os lee tedib net zha nkayaa koree lo goo, nee nak kuu mas ndoblo kayaay lo re goo.

Per ter kayaa nee kuu ndoblo nee kayaa nee, sinke ngexek nee reta kuu tsa towt nee lo Diiz Chul chaan Jesucrist kuu mndaa nee kwent lo goo. ¹³ Wen ne goo, lee re zha kuu nke tsuin leen gwodoo chaan Diox, nzhaw zha re kuu nla leen gwodoo. Ne lee re ngwleyy kuu ndaa maa gon lo Diox, nzhaw zha lut re beel chaan re maakuu ntsib zha lo bikoog leen gwodoo Diox. ¹⁴ Leeka tata, lee Zha Nabee mnabee zha, lee re zha kuu ndaa kwent Diiz Chul chaan zha, tya tsow zha gan kuu ndeche zha. ¹⁵ Per lee na neeka thib welt ter tsow'n koree, ne neeka ngakeet'n koree lo goo, tsa taa goo lut kwaan lon. ¡Mas wen gath'n nake tedib zha taa kuu wun! (Tak koree nley'n.)

¹⁶ Ndian kwent Diiz Chul ne nagte kuu ndrub'n, sinke leey nak tsuin kuu mndaa Diox tsow'n. ¡Aka nati riid'n, os leen tat'n kwent Diiz Chul ree! ¹⁷ Kona, os leen kon dib ndroo leettsoum ndan kwent Diiz Chul, wlipaa tekayaa kuu ndoblo kayaan lo Diox. Per os leey nake kuu nabee Diox lon tsow'n, ndoblo tsow nay tak Diox nabee tsow'n. ¹⁸ Mbay. ¿Kwan nak kuu ntsow'n gan tsa? Lee kuu ntsow'n gan nak, ndan kwent chaan Diiz Chul ne nkayaat'n neeka thib kwaan por ntsow nay.

¹⁹ Tegal nagt'n mos lo neeka thib zha, per nak'n zha kuu nke tsuin par reta zha, tsa masraa men yelaaz xkiiz Diox. ²⁰ Leettsa ndon lo re tawlawz'n, ntsow'n leeka taxal ntsow re zha, tsa gon zha xkiiz Diox. Kuu nlaz'n nin nak, ntsow'n taxal thib zha kuu nzhont diiz lo ley chaan Moisés, tsa gon re zha kuu nzhont diiz lo ley Moisés xkiiz'n, tegal nabeet ley lon. ²¹ Ne lee lo re zha kuu nzhont diiz lo ley chaan Moisés, ntsow'n taxal zha kuu nzhont diiz lo ley, tsa gon re zha kuu nzhont diiz lo ley chaan Moisés xkiiz'n; tegal wlipaa lee ley chaan Jesucrist nabee lon. ²² Leettsa ndon lo re zha kuu neyt ndo nyelaaz Diox, ntsow'n taxal zha kuu neyt ndo lo Diox, tsa gon zha xkiiz Diox. Kuu nlaz'n nin nak, taxal nak zha tataka ntsow'n, tsa laa tyen zha ne gon zha diiz xkiiz Diox. ²³ Reta koree ntsow'n, tsa gon re zha Diiz Chul, tsa no na tsow gan.

²⁴ Noga ne'a goo, leettsa nyoo thib karrer, reta zha nkee karrer, per thibka zha ntsow gan. Kona leeka tata bke goo tsuin, tsa tsow goo gan kuu taa Diox. ²⁵ Reta zha kuu nkee karrer, nkenap zha kwerp zha lo re kuu went, pat tak tsow zha gan thib koron kuu natexkwaa kon laurel kuu nlux. Per lee'a ka'a tsuin, tsa tsowaa gan kuu talaaaz Diox lo'aa, kuu xek thitanax. ²⁶ Ne kwent chaanda nkeet'n karrer legal; ne neeka ngoyot'n taxal zha kuu nkee maket lo mbi. ²⁷ Sinke ntetin kwerp da, ne ntsow'n tsa gone diiz lon, tak na ndaa kwent chaan Diiz Chul lo re men, ne ndoblot gak'n thib zha kuu laa xnet Diox.

10

Ndoblot yelaazaa re diox kuu nagt Diox

¹ Re goo wets'n ne btan na, nithlaazt goo lee re teyaa zha ndala mroo Egipto, ne lee xkow chaan Diox mllo net lo re zha, ne nogaa mriid zha nitdoo nane. ² Ne tata zha mriid leen xkow ne leen nitdoo, leettsa mndeke zha dits Moisés, ne ngoke taxal ngokleyy zha, tsa thibka ngok zha kon Moisés. ³ Ne thibka kwaa mndaa Diox ndow reta zha, kuu nak kuu yibaa, ⁴ ne reta zha ngwii nit yibaa. Tak cho ke chaan Diox mroo nitngwii zha. Ne lee ke'a nak Jesucrist ne mndekey dits re zha, leettsa mndo zha net. ⁵ Per kwaro zha mbint diiz lo Diox, kona kwaro zha nguth yubiz.

⁶ Reta koree ngok, tsa yen leey ne tsa tablaaztaa re kuu went, taxal mtstablaaz re zha'ay. ⁷ Kona, ndoblot gol goo lo re diox re men yezlyu ree, taxal mtsow tyen re zha'a, taxal nzhabol xkeets Diox: "Lee re men mn-dob ndow ne ngwii, tsaraa ngwateli re zha ne mkani zha lo diox kuu nagt Diox". [Ex. 32:6] ⁸ Kona ndoblot gak ropaa kon ndota zha taxal mtsow re zha'a. Kona mtsow kona thibka wiz nguth galbtson mil zha. ⁹ Neeka tsowtua kezhyan Zha Nabee, taxal mtsow re zha'a, kona mkeee mbeele yek zha ne nguth zha. ¹⁰ Ne neeka ndoblot loozaa Diox, tak kona mtsow re zha'a, kona mtaal Diox mandad chaan yalguth mbeth re zha'a. ¹¹ Reta koree mzhaak re teyaa zha ndala, ne mkey lo xkeets Diox, tsa lee'a kuu naban tyemp ree ne leey ne tsowtley. ¹² Kona, os lee thibbaa ntsowaa xgab nali ndo'aa nyelaazaa Diox, ndoblo wii'aa tsa tsowtua kuu went. ¹³ Ne ter tsin thib yalti kuu xegt goo rid goo, per lee Diox nali nak Diox ne taat Diox diiz rid goo masraa yalti kuu xegt goo rid goo. Leettsa tsin yalti lo goo, leeka Diox tsow tsa roo goo lo yalti'a, tsa texek goo rid gooy.

¹⁴ Kona nin lo re goo wets'n ne btan na kuu nke leettsou, laa goo yelaazt raa goo re diox re men yezlyu ree. ¹⁵ Nin koree lo goo, tak ndak'n teyen goo koree, ne blobee goo naa chu wli kuu nin lo goo. ¹⁶ Leettsa

nzhuu'aa xit ub leen bas chaan Zha Nabee, ne ndaa'aa texkix lo Diox, ne kona nloo lee'aa thibka nakaa kon Jesucrist kon ren Jesucrist; ne leettsa nzhowaa pan, kona nloo lee'aa nakaa thibka kwerp kon Jesucrist. ¹⁷ Ne tegal naroobaa, thibka pan nzhowaa, tak thibka kwerp nakaa.

¹⁸ Ndoble yen goo naa kwaan mtsow re tawlawz nee zha Israel; leettsa nzhow zha re maa kuu ndaa zha lo Diox, nloo zha thibka nak zha kon Diox. ¹⁹ Kuu nlaz'n nin nak, lee re diox re men yezlyu ree yent pa nataak re kona, ne neeka re beel kuu ntsib zha lo re diozha yent pa nataaka. ²⁰ Kuu nlaz'n nin nak, leettsa lee re zha kuu nyelaazt Diox ndaa thib maa lo re diox zha, nagt lo Diox ndaa zhay, sinke lo re mbi fyer ndaa zhay, ne nlazt'n thibka gak goo kon re mbi fyer. ²¹ Ndlobot gu goo kuu nzo leen bas chaan Zha Nabee, ne gu goo kuu nzo leen bas chaan re mbi fyer, neeka gagt tob goo wu goo roo mes chaan Zha Nabee ne tob goo wu goo roo mes chaan re mbi fyer. ²² ¿Kwan nlaaz goo tsow goo? ¿Chu nlaaz goo tsow goo kezhyan Zha Nabee? ¿Chu mas neyaa nake lee zha?

¿Chu ndoble wu men beel kuu ndaa zha lo re diox zha?

²³ Tak gab men: "Libr'n tak tsow'n reta kuu nlaz'n". Wliy, per ret kwaa ndoble men tsow men. "Libr men par tsow men reta kwaa", per ret kwaa tsow nali to men lo Zha Nabee. ²⁴ Ndlobot kwaanaa wen yo beeta lee'aa, sinke ndoble kwaanaa tsa wen yo tedib net zha.

²⁵ Ndoble dowaa relota beel kuu ntho zha, ne ndoblot naabdizaa naa cho beeble, tsa yat leettsoo'aa. ²⁶ Taxal nke lo xkeets Diox: Lee yezlyu ne reta kuu nzo yezlyu nak chaan Zha Nabee.

²⁷ Os lee thib zha kuu nyelaazt Diox, kwez goo par wu goo liz zha, ne nlaaz goo ya goo, dow goo reta kuu tsib zha lo goo, ne yent kwan naabdiz goo lo zha, tsa yat leettsoo goo. ²⁸ Per os lee thib zha ne lo goo: "Lee beel ree mtsib nee lo re diox nee", wut gooy, tsa tsowt goo par tsow zha xgab kuu went. ²⁹ Xgab zha'a ngeteth'n lo goo, nagte xgab goo.

Per tak gab men: "¿Chebee tedib zha looz'n, si libr'n par tsow'n reta kwaa? ³⁰ Ne os leen ndan texkix lo Diox leettsa nzhownay, ¿chebee nlooz zha na, tak nzhownay?"

³¹ Kona nin: Os lee goo nzhownay, o nzhuu goo, o kwan raa ntsow goo, ndoble tsow gooy tsa wen ni re zha Diox. ³² Tsowt goo par tsow tedib net zha kuu went, neeka re tawlawz'n zha Israel, neeka re zha kuu nagt zha Israel, ne neeka re zha kuu nak zha gwodoo chaan Diozhe. ³³ Sinke taxal ntsow'n, ntsow'n tsa wen nyoo leettsoo re

men nen lo reta kuu ntsow'n; ntsowt beeta kuu nyow leettsoon, sinke lee na ntsow kuu nyow leettsoo tedib net zha, tsa tsow zha gan yalnaban.

11

¹ Btsow goo taxal ntsow'n, tak lee na ntsow'n taxal mtsow Jesucrist.

Xomod ndoble tsow re ngot leettsa nzhoolaa lo Diox

² Re goo wets'n ne btan na texkix goo tak thibka ntelaaz goo na, ne nzhon goo diiz re kuu mnabbeen lo goo. ³ Per nlaz'n yen goo lee Jesucrist nabee lo reta zha byi, ne lee zha byi nabee lo tsaal, taxal nabee Diox lo Jesucrist. ⁴ Os lee thib mbyi tow yek leettsa tediz mbyi lo Diox, o leettsa taa mbyi kwent kuu nzhab Diox lo mbyi lo re men, ngoo mbyi yalnathoy mbyi ne nloo mbyi nzhont mbyi diiz lo Diox. ⁵ Ne os lee thib ngot towt ngot yek leettsa tediz ngot lo Diox, o leettsa taa ngot kwent kuu nzhab Diox lo ngot lo re men, ngoo ngot yalnathoy ngot ne nloo ngot nzhont ngot diiz lo tsaal ngot. Ne nak ngot taxal zha kuu mga yitsek. ⁶ Os lee thib ngot towt yek, mas wen ga ngot yitsek ngot. Per os lee ngot nthoy ngot ga yitsek ngot, mas wen tow ngot yek ngot. ⁷ Lee mbyi ndoblot tow mbyi yek mbyi, tak taxal lee Diox mdexkwaa Diox mbyi. Per lee ngot ndoblot tow ngot yek ngot, tak tata nloo ngot nzhon ngot diiz lo tsaal ngot. ⁸ Tbaa nin, tak nagt cho kosti ngot mroo mbyi, sinke lee ngot kuu ner, cho kosti mbyi mroo ngot.

⁹ Tak mdexkwaat Diox mbyi por ngot, sinke por mbyi mdexkwaa Diox ngot. ¹⁰ Kona lee ngot ndoblot tow yek, par loo ngot lo re mandad chaan Diox lee ngot nzhon diiz lo tsaal. ¹¹ Per lee re'aa kuu nzhon diiz lo Diox, lee mbyi ndeche mbyi ngot, ne tataga lee ngot ndeche ngot mbyi. ¹² Wli lee ngot kuu ner mdexkwaa Diox kon thib kosti mbyi kuu ner, per lee ngot nzhap mbyi, per ropta zha ndyaad lo Diox. ¹³ Per leeka goo blobee goo, naa chu wen tediz ngot lo Diox ne towt ngot yek ngot. ¹⁴ Ne leeka re men yezlyu ree, ne kwathoz nathey nak laa mbyi zhen yitsek mbyi, ¹⁵ per lee ngot, kwathoz chul nak laa ngot zhen yitsek ngot, tak leey nak kuu ntow yek ngot. ¹⁶ Kona, os cho nlaaz yodiz por re kwent ree: ndoble ne zha, neeka re nee ne neeka re zha kuu nyelaaz Jesus neyt nee kuu tata.

Ntsowt zha rtsee chaan Zha Nabee taxal ndobloy

¹⁷ Per kuu nin lo goo nal nak, nyowt leettsoon kuu ntsow goo leettsa nkaltaa goo, tak ntsowt goo kuu wen, sinke zhaa'a kuu ntsow goo. ¹⁸ Ne kuu ner ne zha lon nak, leettsa nkaltaa goo par nzhool goo lo Diox ndroo zhaa goo, ne ndak'n wliy. ¹⁹ Ne

tabaa ndoblo gake xid goo, tsa yanabee naa cho wlipaa nak kuu nzhon diiz lo Jesucrist.²⁰ Leettsa nkaltaa goo par nzhoo goo rtsee chaan Zha Nabee, ntsowt gooy taxal ndoblo tsow gooy.²¹ Tak leettsa nzhoo goo, nzo goo ndelo nzhoo ner, ne nzhoo goo reta kwaas, ne lee tedib net goo nlann, ne lee tedib net goo asta mnduua.²² ¿Chu napt goo liz goo pa wu goo ne gu goo? ¿Chebee ntsow nataagt goo re wetsaa kuu nyelaaz Jesús? ¿Chebee ngoo goo yalnathoy re wetsaa kuu prob kuu yent kwan nap? ¿Kwan nlaaz goo nin lo goo? ¿Chu nlaaz goo nin lo goo kwathoz wen kuu ntsow goo? Per lee na ni lo goo. ¡Thitanax went kuu ntsow goo!

Rtsee chaan Zha Nabee

(Mt. 26:26-29; Mr. 14:22-25; Lc. 22:14-23)

²³ Kuu mteed'n lo Zha Nabee noga mloo nay lo goo: Btsi kuu mnndaaz zha Zha Nabee gath, mzhen Zha Nabee pan,²⁴ ne or ngwalo mnndaaz zha texkix lo Diox, mtsow rol zhay ne nzhab zha: "Bzhen gooy ne dow gooy. Leey nak kwerp da kuu tan por goo. Btsow goo koree par telaaz goo na."²⁵ Ne leeka tata, leettsa ngwalo ndow re zha pan, tsa mzhen zha bas kuu nzo xit ub, ne nzhab zha: "Lee xit ub kuu nzo leen bas ree nak ren da, ne leey nloo wli nak trat kub kuu taan Diox lo re goo. Ne kadta leettsa gu gooy, btsow gooy par telaaz goo na."²⁶ Ne kadta leettsa nzhowaa pan ne nzhuu'aa xit ub, ngetelaazaa naa xomod nguth Zha Nabee. Ne tabaaka tsowaay asta leettsa yaad Zha Nabee.

²⁷ Kona nin, loka zha kuu nzhoo pan ne nzhuu xit ub ree legal, ntsow zha thib kuu thitanax went lo kwerp Zha Nabee, leettsa ntelaazaa kwerp zha ne ren zha.²⁸ Kona kadta thibaa ndoblo wen wen tsowaa xgab, leettsa dowaa pan ne gu'aa xit ub.²⁹ Tak os lee zha legal nzhoo zha pan ne nzhuu zha xit ub, ne neeka net zha na kwan nake, ntsow zha teti Diox zha.³⁰ Tak tabaa ntsow goo, kona tyen goo ne ndak, ne tyen goo neyt ndo nyelaaz Diox, ne noga tyen re goo ngutha.³¹ Per os lee'aa wen wen tsowaa xgab leettsa dowaa rtsee chaan Zha Nabee, tetit Diox re'aa.³² Per os lee Zha Nabee nteti zha lee, ntsow zhay tsa teedaa ne tsa ridtaa yalti kuu thitanax kuu rid re zha kuu nyelaaz Jesus.

³³ Kona nin lo re goo wets'n ne btan na, leettsa kaltaa goo wu goo rtsee chaan Zha Nabee, blet goo thib goo ne tedib goo, tsa thibka wu goo reta goo.³⁴ Ne os lee thib goo nlann, dow goo liz goo, tsa tetit Diox goo, tak ntsow goo kuu went leettsa nkaltaa goo nzhoo goo rtsee chaan Zha Nabee.

Lee tedib net re kwent texnet nay leettsa yal'n lo re goo.

12

Re kuu nataak kuu mn delaaz Diox lo re zha kuu nyelaaz Jesús

¹ Lee nal nin lo re goo wets'n ne btan na, nlaz'n ne goo xomod nak, re kuu nataak kuu ndelaaz Mbi Nayon chaan Diox lo kadta thibaa kuu nyelaaz Jesús.

² Noga ne goo leettsa ter yelaaz goo Diox, mbil goo lo re diox re men yezyu ree, re diox kuu gagt ni kuu yent pa nataak.³ Kona nlaz'n ne goo, neeka thib zha kuu nzo Mbi Nayon chaan Diox leettssoo, gagt kode zha Jesucrist. Ne neeka thib zha gagt gab: "Jesucrist nak Zha Nabee", os lee zha napt zha Mbi Nayon chaan Diox leettssoo zha.

⁴ Zhaapaa zhaapaa kuu nataak ndaa Mbi Nayon chaan Diox lo kadta thibaa, ne thita Mbi Nayon nak kuu ndaay.⁵ Kwaro mod ntswowaa rtsin Diox, per lo thibka Zha Nabee nke'aa tsii.⁶ Zhaa zhaa kuu ndelaaz Diox lo kadta thibaa, tsa tsowaa rtsin Diox, per kon yalney chaan Diox ntsow Diozhe.⁷ Ne lo kadta thibaa mnndaaz Diox Mbi Nayon chaan Diox, tsa tak tsowaa ayud altaa'aa.⁸ Lo thib netaa mn delaaz Mbi Nayon chaan Diox:

ni'aa kon yalnzaak,
lo tedib netaa mnndaaz Mbi Nayon yena ne
ne'aa re kuu nlaaz Diox.

⁹ Lo tedib netaa mnndaaz Mbi Nayon, tsa wen lebee'aa naa cho nak Diox,
tedib netaa mkayaa yalnabee, tsa tegwe'aa
re mbyiz.

¹⁰ Lee tedib netaa mkayaa yalnabee, tsa
tsowaa re kuu thoz,
lee tedib netaa mkayaa, taa'aa kwent xkiiz
Diox kuu ne Diox lo'aa,
lee tedib netaa mkayaa yalnzaak, tsa
lebee'aa re mbi fyer ne Mbi Nayon
chaan Diox,
lee tedib netaa mkayaa tedizaa tedib net
diiz kuu gagtaa,
ne lee tedib netaa mkayaa taa'aa kwent re
diza.

¹¹ Per beeta Mbi Nayon chaan Diox ntsow
reta koree, ne ndaa Mbiy lo kadta thibaa
taxal nlaaz Mbi taa Mbiy.

Retalee nak kwerp chaan Jesucrist

¹² Ne taxalka nap kwerp men tyen ta;
(taxal ni men, yaa men, nza men), per
thibka kwerp nak retay. Leeka tata nak kwerp
chaan Jesucrist.¹³ Tak retalee kuu nak
zha Israel o zha kuu nagt zha Israel, zha kuu
nak mos o zha kuu nagt mos, ngokleyyyaa
kon thibka Mbi Nayon, tsa gakaa thibka
kwerp, ne retalee mkayaa Mbi Nayon leen
leettssoo'aa.

¹⁴ Lee kwerp men nagte thibka kuu, sinke
tyen kuu nake.¹⁵ Os lee nii men gab: "Tak
nagt'n yaa, nagt'n chaan kwerp". Ne tegal
tata gabe, per nake chaan kwerp.¹⁶ Ne os

lee nza men gab: "Tak nagt'n ngutlo, nagt'n chaan kwerp". Tegal tata gabe, per nake chaan kwerp. ¹⁷ Os dita kwerp men gagak ngutlo men, ɿpa nyaan nza men tsa? Ne os dita kwerp men gagak nza men, ɿpa nyaan zhii men par tak xaptsei men tsa? ¹⁸ Lee Diox mtob Diox kadta thib kuu ta ndobloy; ta nlaza Diox mtob Diozhe. ¹⁹ Os thibka ta gagak dih kwerp men, ɿpa nyaan kwerp men tsa? ²⁰ Wli tyen kuu nap kwerp, per thibka kwerp nake.

²¹ Ne gagt gab ngutlo men lo yaa men: "Ndechet'n lu"; neeka yek men gagi gab lo nii men: "Ndechet'n goo". ²² Tak lee ta ndakaa nataagt, tyu nak ta mas ndeche lo'aa. ²³ Ne lee ta ndakaa mas nataagt ntowgwaay. Ne lee ta ndakaa went nloo, mas wen ntowgwaay, ²⁴ lee re ta chul na neeka ntowtaay, tak ndechet yowgwe. Tbaa mdexkwaa Diox kwerpaa, tsa lee ta ndakaa went nloo, mas wen nkenapaay ne mas wen towgwaay, ²⁵ tsa yiit thib ta ne tedib ta, ne tsa retay ya leettsonee thibe por tedibe. ²⁶ Kona os lee thib ta ne ndak, dita kwerp ne; ne leettsa nagwe thib ta, dita kwerp nagwe.

²⁷ Ne leeka tabaa nakaa, lee'aa nak kwerp chaan Jesucrist, tak kadta thibaa nakaa lut kwerp chaan Jesucrist. ²⁸ Kona mli Diox re zha ree, leen gwodoo chaan Diox ne mndelaaz Diox re kuu nataak tsow zha:
cho zha nak apóstl chaan Jesucrist,
cho zha nak profet,
cho zha nloo xkiiz Diox lo tedib net zha,
cho zha ntsow re kuu thoz kuu gagi tsow
ndota men,
cho zha ntegwe re mbyiz,
cho zha ntsow ayud re zha kuu ndeche re
kwwaa,
cho zha nabee lo re zha kuu nyelaaz Jesús,
ne zha kuu ndediz tedib diiz kuu mteedt
zha.

²⁹ Ne, ɿchu reta zha nak apóstl chaan Jesucrist? O ɿchu reta zha nak profet? O ɿchu reta zha nak kuu nloo xkiiz Diox? O ɿchu reta zha ntsow re kuu thoz? ³⁰ O ɿchu reta zha nap yalanabee ntegwe re mbyiz? O ɿchu reta zha nzhak ndediz tedib diiz kuu mteedt zha? O ɿchu reta zha tak taa kwent naa xomod nak re diza? Wlipaa nagte tata. ³¹ Lo reta koree, wii goo re kuu mas nataak kuu ndelaaz Diox.

Per lee na loo thib net kuu mas wen lo re goo.

13

Yalnkelaaz

¹ Os leen ndediz'n xkiiz re men o xkiiz re mandad chaan Diox, per nket leettsoon taben da, nataagt re kuu nin, ne nak'n taxal thib yiib kuu nke bi ne anta ndez. ² Ne os lee Mbi Nayon chaan Diox mndelaaz lon, gak'n

profet, ne os leen nlebeen re kuu nagaats kuu nak chaan Diox, ne os leen nzhaak'n reta kwaa, ne os leen nyelaz'n Diox, ne asta tak nabeen yiib thib yii ta ndobe, per nket leettsoon taben da, neeka lut nataagt'n. ³ Ne os leen kiid'n re chaan da lo re zha kuu ndechey, ne tan na par tey zha na lo ki, tak ndan kwent xkiiz Diox, per nket leettsoon taben da, nlortsint kona.

⁴ Lee zha kuu nke leettsoo:
nxek leettsoo zha reta kuu ntsow tedib net
zha lo zha,
wen nak zha lo tedib net zha,
nagt zha, zha kuu went nzo leettsoo ne tedib
zha, tak ndablaazt zha chaan zha'a,
ndrubit zha ne neeka narot nak zha;
⁵ zha kuu nke leettsoo, nit zha diiz went,
nkwaant zha kuu beeta par lee zha,
nkezhiant zha por ndota kwaa,
nyoot zhyan leettsoo zha,
⁶ zha kuu nke leettsoo, nyowt leettsoo zha
kuu went kuu ntsow tedib zha,
sinke kwathoz naley nzo leettsoo zha ne zha
re kuu wli.

⁷ Nla leettsoo zha ne zha taben zha, reta kuu nyelaaz zha, reta kuu mbet zha ne reta kuu nkez leettsoo zha.

⁸ Lee yalnkelaaz thitanax nxeke. Per lee tedib net re kuu ndelaaz Diox, nagte kuu xek thitanax, taxal re koree: re zha kuu nak profet, tetsin wiz gagi raa zhay, re zha kuu ndediz tedib net diiz, tetsin wiz tedizt raa zhay ne lee re yalnzhak, tetsin wiz kayaat raa zhay. ⁹ Nal lutta nyenaa re kuu ne lutta nzhakkaa ndaa'aa kwente, re kuu nlaaz Diox ne Diox lo'aa, ¹⁰ per leettsa tsin wiz kuu lee Zha Nali yaad, tsasi ndechet raa lee re kuu xegt.

¹¹ Leettsa lut'n mndediz'n ne mtsow'n xgab taxal ndyeen bzhizh, ne mlobreen taxal ndyeen, per leettsa ngok'n zha bye'a, mlan re mod kuu nap ndyeen. ¹² Leeka tata nake nal, nloot re kwwaa lo'aa taxal ndoblo looy lo'aa, beeta nlooy lo'aa taxal nloore re kuu lo'aa lo thib spej kuu yu na; per too thib wiz lee reta kwwaa nambita looy lo'aa taxal nake. Nal lutta kuu nlebeen, per wiza lebee nay taxal nake, leeka taxal nlebee Diox'n nal. ¹³ Nal napaa tson kuu nxek thitanax: nyelaazaa Diox, ngebetaa kuu ne Diox taa Diox lo'aa ne yalnkelaaz; per kuu mas nataak lo rey nak yalnkelaaz.

14

Zha kuu ndediz tedib net diiz

¹ Thibka ndoblo ke leettsoo goo, tak koree nak kuu mas nataak. Ne ndoblo tablaaz goo re kuu nataak kuu ndelaaz Mbi Nayon, ne lo re koree masraa ndoblo tablaaz goo, taa goo kwent re kuu ne Diox lo goo. ² Tak lee zha kuu ndediz kon tedib net diiz, lo Diox

ni zhay, nit zhay lo re men, nyent re mene. Por Mbi Nayon ndediz zha re kuu nagaats re kuu nyentaa.³ Per lee zha kuu ndaa kwent re kuu nzhab Diox lo zha, lo re men ni zhay ne ntsow zha mas ney to re men lo Diox, nteni zha re men ne ntetsey zha leettsoo re men.⁴ Lee zha kuu ndediz tedib net diiz, ntsow zha to ney beeta lee zha lo Diox, per lee zha kuu ndaa kwent kuu nzhab Diox lo zha, ntsow zha mas ney to re zha kuu nyelaaz Jesús lo Diox.⁵ Nlaz'n reta goo tediz tedib net diiz, per mas nlaz'n taa goo kwent kuu ne Diox lo goo, mas wen tsow goo kona, nake tediz goo tedib net diiz. Per noga tak tediz goo tedib net diiz, os nzo thib zha kuu taa kwent naa kwan nak re diza lo re zha kuu nyelaaz Jesús, tsa mas ney to kadta thib zha lo Diox.

⁶ Kona nin lo re goo wets'n ne btan na, os leen yal'n lo re goo ne nin lo goo kon tedib net diiz, lortsinte lo goo, mas wen yan lo goo ne tediz'n kuu nlaaz Diox ne Diox lo re goo, o ndoblo kon yalnzaak nin kuu wli lo goo, o tan kwent kuu ne Diox lon, o lon lo goo tedib net re kuu nak kwent chaan Diox.⁷ Os lee flaut o guitarra kuu nzhol men, os leey napte biy gagt lebee men pa kuu nak thibe ne pa kuu nak tedibe.⁸ Os tezt trumpet taxal ndobloy teze leettsa telo zhoo, neeka thib zha to lista par ya zha lo zhoo.⁹ Leeka tata nake xid re goo, os lee goo ndediz goo tedib net diiz kuu nyent men, nyent re men kuu ndediz goo. Ne nake taxal lo mbi ngeni goo, os lee goo tata ntsow goo.¹⁰ Wli kwathoz tyen re diiz nzo dib lo yezlyu, per reta men nyen men naa kwan ni men.¹¹ Os leen nyent'n kwan ngeni zha lon, taxal zha tith nak'n lo zha'a, ne leeka tata taxal zha tith nak zha'a lon.¹² Ne tak ndablaaz goo keno goo re kuu nataak kuu ndelaaz Mbi Nayon, ndoblo tablaaz goo, keno goo re kuu tsow par mas ney to kadta thib re zha kuu nyelaaz Jesús lo Diox.

¹³ Kona lee zha kuu ndediz tedib net re diiz, ndoblo naab zha lo Diox, tsa tak taa zha kwent naa kwan nak kuu ni zha.¹⁴ Os leen nin lo Diox kon tedib net diiz, lee Mbi Nayon ngenaab lo Diox por na, per lee xgab da net naa kwan ngenin.¹⁵ ¿Kwan ndoblo tsow'n tsa? Ndoblo nin lo Diox taxal nlaaz Mbi Nayon, per noga ndoblo nin kon diiz kuu nyen na. Ndoblo gol'n lo Diox taxal nlaaz Mbi Nayon, per noga ndoblo gol'n kon diiz kuu nyen na.¹⁶ Tak os lee goo ni goo lo Diox ne ndaa goo texkix lo Diox taxal nlaaz Mbi Nayon ne lee thib zha nzhone, gagt tediz zha lo Diox thibka kon re goo, tak nyent zha naa kwan ngeni goo.¹⁷ Wli wen ndaa goo texkix lo Diox, per ntsowt goo ayud tedib zha kuu nzhon kuu ngeni goo, par to ney zha lo Diox.¹⁸ Ndan texkix lo Diox, tak mas nzhaak'n nin tedib net ree diiz nake goo;¹⁹ per leettsa

nkaltaa re zha kuu nyelaaz Jesús, mas wen nin lo zha gaayka lan diiz kuu nyen zha nake nin tsii mil diiz kuu nyent zha.

²⁰ Kona nin lo re goo wets'n ne btan na, ndoblot tsow goo xgab taxal ndyeen, lo re kuu went ndoblo tsow goo taxal ndyeen, per lee taxal tsow goo xgab ndoblo tsow gooy taxal zha gox.²¹ Tak lo xkeets Diox nzhab: "Kon tedib net diiz nin lo re zha yez ree, ne nin lo zha kon roo re zha tith, ne tegal tatay gont re zha diiz lon ne Zha Nabee". [Is. 28:11-12]²² Kona leettsa ni goo kon tedib net diiz, leey nake thib seny lo re zha kuu nyelaaz Jesús, per nagte seny lo re zha kuu nyelaaz Jesús. Ne leettsa ndaa goo kwent kuu ne Diox lo goo, kona nak seny lo re zha kuu nyelaaz Jesús, ne nagte seny lo re zha kuu nyelaaz Jesús.²³ Leettsa nkaltaa goo, zha kuu nak zha Jesús, ne reta goo ni tedib net diiz, ne ora tab thib zha kuu nyelaaz Jesús, tetsov zha xgab nzhab naxen yek goo.²⁴ Per os reta goo ngetaab goo kwent kuu ne Diox lo goo, ne ora tab thib zha kuu nyelaaz Jesús ne gon zha kuu ngeni goo, teyen zha lee zha nak thib zha kuu ndab falt, ne leeka lee zha yen zha went re kuu ntsow zha.²⁵ Ne lee re kuu nagaats kuu nzo leettsoo zha loo, ne tetobxub zha ne gol zha lo Diox, ne teyen zha lee Diox wlipaa ndo kon re goo.

Xomod ndoblo gol men lo Diox

²⁶ Kona nin lo re goo wets'n ne btan na, leettsa kaltaa goo gol goo lo Diox, cho goo gol salm, cho goo tak loo xkiiz Diox, cho goo tak taa kwent kuu ne Diox lo goo, cho goo tak ni tedib net diiz ne cho goo tak taa kwent naa kwan nak re diza, per reta koree ndoblo tsowe ayud, tsa masraa ney to reta goo lo Diox.²⁷ Leettsa lee thib zha tediz tedib net diiz, ndoblo tediz chopka zhay o tsonka zhay, per kadta zha ndoblo tediz zha or diinn zha; ne lee tedib zha ndoblo taa kwent naa kwan nak re diza.²⁸ Ne os yent thib zha kuu tak taa kwent naa kwan nak re diza, mas wen nit zhay lo re zha kuu nyelaaz Jesús, ndoblo ni zhay lo Diox leettsa thita zha ndo kon Diox.²⁹ Leeka tata, lee re zha kuu nlaaz taa kwent kuu nzhab Diox lo zha, ndoblo ni chopka zha o tsonka zha, ne lee tedib net zha kenza kuu ni re zha'a, ne ndoblo kobee zha naa chu chaan Diox nake.³⁰ Per os lee Diox, tsow lee thib zha kuu ndoblo tya yen thib kwaaw, tsa lee zha kuu ngeni'a ndoblo tow roo.³¹ Ne ndoblo thibga thibga zha ni tsa reta zha teed, ne tsa reta zha to ney lo Diox.³² Reta zha kuu nak profet, nabee zha lo xgab zha, tsa ni zha beeta kuu nlaaz Diox,³³ tak lee Diox nak kuu ntsow wen nzi'aa, nagt Diox kuu ntsow ngyodizaa.

Btsow goo taxal ndoblo tsow re zha Jesús kuu nali nak,³⁴ lee re ngot ndoblot kab ngot

leen gwodoo, tak ndoblot ni ngot. Sinke ndoblo ngot gon ngot diiz lo tsaal ngot, taxal nzhab lo ley chaan Diox. ³⁵ Ne os nzo kwan kuu nlazaaz ngot yen ngot, lo tsaal ngot ndoblo naabdz ngot, leettsa tsin zha liz zha; tak went nloo lee thib ngot kab leen gwodoo. ³⁶ Btelaaz goo lee xkiiz Diox mndelote xid goo, ne neeka nagt beeta goo mkayaay.

³⁷ Os lee thib zha ndak zha nak zha profet, o ndak zha nak zha thib zha kuu mkayaay thib kuu lo Mbi Nayon chaan Diox, ndoblo yen zha, lee re kuu ngekeen lo re goo, nak kuu nabee Zha Nabee. ³⁸ Ne loka cho taat yek gon diiz ree, noga goo taat goo yek goo gon goo kuu ni zha.

³⁹ Kona nin lo re goo wets'n ne btan na, btablaaz goo taa goo kwent kuu ne Diox lo goo, ne noga laa goo ni tedib zha tedib net diiz, ⁴⁰ per wen btsow goo reta kuu taxal ndoblo tsow gooy.

15

Yalmroban chaan Jesucrist

¹ Lee nal nin lo re goo wets'n ne btan na, btelaazka goo Diiz Chul kuu ndaa yalnaban kuu mndan kwent lo goo. Diiz Chul kuu mkayaay goo, kuu nali ndo goo nyelaaz goo asta nal. ² Ne por Diiz Chul keno goo yalnaban, os nzhon goo diiz re kuu mndan kwent lo goo; per os lee goo nzhont goo diize, nlortsint ngwalaaz goo Jesucrist.

³ Leeka diiz kuu mteed'n lo Jesucrist, leeka diza mloon lo goo. Mloon lo goo lee Jesucrist nguth por re faltaa, taxal nkey lo xkeets Diox, ⁴ ne mkaats zha Jesucrist, ne leettsa mzaal tson wiz mroban Jesucrist, taxal nkey lo xkeets Diox; ⁵ ne ner lo Pey ngwani Jesucrist, tsaraa lo re apóstl. ⁶ Bluz tsaraa ngwani Jesucrist lo teeka thib gaay gayoo wetsaa ne btanaa, ne kwaro re zha'a bee naban nal, tegal nzo zha ngutha. ⁷ Bluz tsaraa ngwani Jesucrist lo Santiaq ne lo reta apóstl.

⁸ Ne bluz tsaraa ngwani Jesucrist lon, kuu nak'n taxal thib zha kuu mriiid wiz gal. ⁹ Tak thitanax nataagt'n xid re apóstl, neeka ndoblot tob le zha na apóstl, tak mreken dits re zha Jesucrist. ¹⁰ Per mlat leettsoo Diox ne Diox na, kona nak'n kuu nak'n, per lee yalwen kuu mtsow Diox lon nagte kuu nlortsint, tak masraa nkeen tsiiin nake re apóstl, per nat ntsowe Diox ntsowe, tak por yalwen chaan Diox thibka ntsow Diox ayud'n. ¹¹ Kona nataagt os na o tedib apóstl chaan Jesucrist mndaa kwent lo goo, tak thibka kuu ndaa nee kwent ne kuu nataak nak mbin gooy ne ngwalaaz gooy.

Yalroban chaan re zha nguth

¹² Os mndaa nee kwent lo goo lee Jesucrist mroban. ¿Chebee nzo chop tson goo

mbez lee re zha nguth robant? ¹³ Os lee re zha nguth robant, noga Jesucrist mrobant tsa. ¹⁴ Ne os mrobant Jesucrist, nataagt kuu ndaa nee kwent lo goo, ne neeka nataagt nyelaaz goo Jesucrist. ¹⁵ Ne os mrobant Jesucrist zha nkedi nak nee, tak nee lo goo lee Diox mteroban Jesucrist; nkedi nee os wli robant re zha nguth, ne wlit lee Diox mteroban Jesucrist tsa. ¹⁶ Ne os robant re zha nguth, neeka Jesucrist mrobant tsa; ¹⁷ ne os mrobant Jesucrist, nataagt nyelaazaa Jesucrist ne lee re faltaa bee nzibka ditsaa tsa. ¹⁸ Ne os tatay, tsa lee re zha kuu nguth ne ngwalaaz Jesucrist, thitanax mlux zha. ¹⁹ Os nyelaazaa Jesucrist beeta par kayaa'aa re kuu yezlyu ree, thitanax nalatt nak kuu ndakaa tsa.

²⁰ Per kuu wli nak mroban Jesucrist; ne lee Jesucrist nak zha kuu ner ner mroban xid re zha nguth, taxal xle kuu ner ner ndaa ya. ²¹ Tak taxal por faltaa chaan thibka mbyi kuu le Adán, ngoo yalguth lo yezlyu ree; leeka tata beeta por kuu wen kuu mtsow thibka mbyi kuu le Jesucrist, roban re zha nguth. ²² Ne taxal retalee nzhattha tak nakaa taxal Adán, leeka tata retalee robanaa tak nakaa taxal Jesucrist. ²³ Per kadta lee robanaa leettsa ndoblo robanaa; ner Jesucrist mroban, ne leettsa bretab Jesucrist lo yezlyu ree, tsa roban re zha kuu nak zha Jesucrist. ²⁴ Tsa lee yezlyu ree lux, ne lee Jesucrist kib yalnabee lo reta men yezlyu ree, lo re mbi fyer ne lo Maxuuy, ne taa Jesucrist yalnabee lo Diox kuu nak Xutaa. ²⁵ Tak ndoblo nabee Jesucrist, asta leettsa yelo tsig Diox re zha kuu nayii ne Jesucrist xann nii Jesucrist; ²⁶ ne bluz kib Jesucrist yalnabee lo yalguth. ²⁷ Tak lo xkeets Diox nzhab: "Lee Diox mndaa reta yalnabee lo zha tsa nabee zha lo reta kwa". [Sal. 8:6] Ne leettsa nzhaba lo zha mndaa Diox reta yalnabee, nzhaba lee Jesucrist nabee lo Diox, tak lee Diox mndaa reta yalnabee lo Jesucrist. ²⁸ Ne leettsa nabee'a Jesucrist reta kwa, tsa nabee Diox lo Jesucrist. Tak lee Diox mndaa yalnabee lo Jesucrist, ne Diox gak Zha Nabee lo reta zha ne reta kwa.

²⁹ Ne nzo zha nhakleyy por re zha nguth. ¿Chebee ntsow zhay? Os robant re zha nguth. ³⁰ Os leey tata naake, ¿chebee nye leettsa nee gath nee gadata wiz? ³¹ Nin lo re goo wets'n ne btan na, wlipaap gadata wiz tak gath'n. Per tegal tatay, kwathoz wen nzo leettsoon, tak ney ndo goo nyelaaz goo Jesucrist, Zha Nabee lo'a. ³² Ne tak men nak'n, kona mbyon kon re zha blaaz taxal maa yez Éfeso, ¿kwan mtsow'n gan? Os wli lee re zha nguth robant, mas wen tsowaa taxal ni re men: "Dowaa ne gu'aa tak yee gathaa".

³³ Laat goo kedi zha goo. Tak re zha kuu

went nak, re zha'a ntetsaa re zha kuu wen nak.³⁴ Nali bloo goo yek goo ne blobee goo, ne tsowt raa goo re kuu went, tak nzo chop tson goo kuu nlebeet Diox. Nin koree lo goo tsa thouy goo.

Xomod gak kwerp chaan re zha kuu roban

³⁵ Per nzo cho goo nda leettsoo gab: “¿Xomod roban re zha nguth? ¿Cho klas kwerp keno zha?”³⁶ Aka naxen zha kuu tata nda leettsoo, tak wen ne’aa leettsa ngo’aa thib mbiz lo yu, ner nzhaabe ne lee kuu nlen nzhene ne nzhake thib ya.³⁷ Ne ntotaa ya lo yu, sinke mbiz nak kuu ngo’aa lo yu, tegal mbiz nzob xtile o ndota tedib mbize.³⁸ Per Diox ntsow nzhake thib ya taxal nlaaz Diox, ne kadta mbiz ntsow Diox nzhake thib ya kuu ndobloy gake.³⁹ Leeka tata, nagt thibka klas beel re beel, thibe nak beel chaan men, tedibe nak beel chaan re maa, tedibe nak beel chaan re min ne tedibe nak beel chaan re mbel.⁴⁰ Ne leeka tata, nzo re kuu nak kuu lobee, ne noga nzo re kuu nak kuu yezlyu ree. Kwathoz nzhol na re kuu nzib lobee ne zhaa na kuu nzi yezlyu ree lalt naake rey.⁴¹ Zhaa na xni wiz ne zhaa na xni mbee; ne zhaa na xni chaan re mbel kuu nzib lobee, zhaa na xni thib mbel ne zhaa na xni tedib mbel.

⁴² Ne leeka tata gak leettsa roban re zha nguth. Lee kuu nkaats zha lux, per lee kuu roban thitanax luxt raay.⁴³ Lee kwerp kuu nkaats zha nak kuu rax, per lee kwerp kuu roban gak thib kuu kwathoz wen. Lee kwerp kuu nkaats zha nak thib kuu neyt, per lee kuu roban gak thib kuu kwathoz ney.⁴⁴ Lee kwerp kuu nkaats zha nak kuu yezlyu ree, lee kwerp kuu roban nak kuu yibaa. Leeka taxal nzo kwerp yezlyu ree, tataka nzo kwerp yibaa.

⁴⁵ Kona nzhab lo xkeets Diox: “Lee mbyi kuu ner ngok Adán, ngok thib zha kuu mban”; [Gn. 2:7] per lee Jesucrist nak taxal tedib Adán kuu nak mbi kuu ndaa yalnaban.⁴⁶ Per leet kwerp yibaa nak kuu ner, sinke kwerp yezlyu ree nak kuu ner; tsaraa kuu yibaa.⁴⁷ Lee mbyi kuu ner mdexkwaa Diox mbyi kon yu yezlyu ree, kona kuu yezlyu ree nak mbyi, per lee tedib mbyi kuu nak Jesucrist kuu yibaa nak Jesucrist.⁴⁸ Taxal kwerp mbyi kuu mdexkwaa Diox kon yu, tata nak kwerp re zha yezlyu ree; ne taxal nak kwerp zha kuu mroo yibaa, tata gak kwerp re zha kuu nak zha yibaa.⁴⁹ Leeka taxal na re’aa taxal mbyi kuu mdexkwaa kon yu, leeka tata gakaa taxal mbyi kuu mroo yibaa.

⁵⁰ Kuu nlaz’n nin lo goo wets’n ne btan na nak, lee kwerp kuu nak beel ne tsidth, gagt tabe yibaa ta nabee Diox, ne lee kwerp kuu nlux gagt tsaaale kon kuu nluxt.⁵¹ Per

nlaz’n nin thib kuu nagaats lo goo: Gathth retalee per retalee tsee mod na re’aa,⁵² gatilta gak koree, taxalta tow men lo men ne xaal mene, tata gak leettsa tez trompet kuu lultm bluz, tsa lee re zha nguth roban zha, tsa ban zha thitanax, ne gak zha thib kwerp kuu luxt raa, ne lee re’aa xaasta tsee’aa.⁵³ Tak ndoblo lee kwerp kuu nlux gak thib kwerp kuu luxt; ne lee kwerp kuu nzhatndoblo gak thib kwerp kuu thitanax gathth raa.⁵⁴ Ne leettsa lee kwerp kuu nlux ree gak thib kwerp kuu luxt raa, ne lee kwerp kuu nzhatndoblo gak thib kuu thitanax gathth raa, tsya gak kuu nzhab lo xkeets Diox: “Lee yalguth mlux ne lee yalnaban yo thitanax”. [Is. 25:8]⁵⁵ Yalguth, “¿ma yalney kuu napa? Yalguth neeka tedib kuu gagt raa tsowa lo nee.” [Os. 13:14]⁵⁶ Nabee yalguth lo men tak ndaa men falt, ne ndaa men falt tak gagt gon men diz, reta kuu nabee ley kuu mnada Diox lo Moisés.⁵⁷ jPer texkix Diox, tak mtelaa Diox re’aa lo yalguth por Jesucrist!

⁵⁸ Kona nin lo re goo wets’n ne btan na kuu kwathoz nke leettsoon, thibka nali ne ney bto goo lo Diox, thibka bke goo rtsin Zha Nabee; tak ne’aa goo lee tsin kuu ngetsow goo nagte kuu tabaata.

16

Xomod ndoblo taa men gon

¹ Nal nin lo goo kwent chaan gon kuu mndaa goo lo re zha kuu nali ndo nyelaaz Diox, btaa gooy taxal nzhap’n lo re zha kuu nyelaaz Jesús yez Galacia.² Gandata domin, kadta thib goo ndoblo kozhaa goo lut temi lo kuu ntsanaa goo, ne blotsow gooy, tsa ndoblot thop gooy leettsa tsin na.³ Ne leettsa tsin na, tsa kwii goo chop tson zha kuu taal’n yataan gon ree yez Jerusalén, ne tsa taal’n thib yeets lo re wetsaa kuu nzo Jerusalén.⁴ Ne os ndeche yan, tsa ya re nee zha.

Re kuu ngoo yek Paba tsow Paba

⁵ Leettsa yan yezlyu Macedonia, tsa tsin na yez Corinto yatiwiin lo goo, tak tan yezlyu Macedonia.⁶ Ne ntsow’n xgab bet’n lo goo lut, ne os leey take tsa bet’n lo goo re mbee kuu nla yig, tsa tsow goo ayud’n lo re kuu ndechen, leettsa yan ta ndoblo yan.⁷ Tak nlazt’n beeta riid’n lo goo, sinke nlaz’n bet’n chop tson mbee, os lee Zha Nabee taa diize.⁸ Per bet’n yez Éfeso, asta yelo rid ani Pentecostés,⁹ tak ndak’n tak tsow’n rtsin Zha Nabee, ne ndak’n tak tsow’n thib kuu thoz yita, tegal kwaro zha nayii nen.

¹⁰ Ne os tsin Tim lo goo, btsow goo tsa wen yo leettsoo zha lo goo, tak lee zha nke rtsin Zha Nabee, leeka taxal na.¹¹ Bin goo diiz lo zha; ne btsow goo ayud zha, tsa wen tsin zha yaadtwii zha lon, tak ngebet’n kon tedib net re wetsaa tsin zha.

¹² Ne lee wetsaa Apolos, tegal kwathoz mnaab'n lo zha yatwi zha lo goo kon tedib net re wets, per nlaazt zha ya zha lo goo nal, per leettsa take lo zha, tsa ya zha lo goo.

Re diiz bluz kuu nzhab Paba

¹³ Thibka list brin goo ne ney bto goo gwalaaz goo Zha Nabee. Thib bloo goo leettsoo goo ne nali bto goo lo Diox. ¹⁴ Ne reta kuu tsow goo, btsow gooy kon yalnkelaaaz.

¹⁵ Re goo wets'n ne btan na, wen ne goo re lizta Estéfanas nak re zha kuu ner ngwalaaz Jesucrist yezlyu Acaya, ne re zha nak kuu thibka ntsow ayud re zha Jesús kuu nzo yezlyu baa. ¹⁶ Nlaz'n gon goo diiz lo re zha kuu nak taxal re zha ree, noga bin goo diiz lo reta zha kuu ntsow ayud re zha Jesús ne lo reta zha kuu nke rtsin Jesús.

¹⁷ Ne kwathoz laz'n tak myaad Estéfanas, Fortunato ne Acaico nzhee, par mtsow re zha ayud'n lo re kuu ngogt gatsow goo ayud'n. ¹⁸ Kwathoz mtetsey re zha leettsoon, leeka taxal ntetsey zha leettsoo goo. Ndoblo gol tsow goo lo re zha kuu nak taxal re zha ree.

¹⁹ Lee re zha Jesús kuu nzo re yez chaan Asia ni "diox" lo re goo. Noga Aquila ne tsaal Aquila Priscila, ne re zha kuu nkaltaa liz zha, ni "diox" lo goo, tak reta goo nak zha Zha Nabee. ²⁰ Bkayaah goo "diox" kuu ni reta wetsaa ne reta btanaa kuu nzo nzhee, ne bni goo "diox" lo re wetsaa ne lo re btanaa kuu nzo baa, ne dow goo thib chut kwat kadta thib thib zha thib mod nali.

²¹ Na Paba nin "diox" lo reta goo, beeta koree nak letr da kuu mkeen kon yaan.

²² Os nzo cho nket leettsoo Jesús Zha Nabee, tagode Diox zha'a.

¡De lo nee, Zha Nabee!

²³ Nlaz'n lee Jesús Zha Nabee lo'aa, kenap reta goo kon yalnkelaaaz chaan zha.

²⁴ Kwathoz nke leettsoon reta goo, tak nke leettsoo Jesucrist retalee.

¡Tbaa gake!

Paba

Yeets mrop kuu mkee Paba lo re zha yez Corinto

Paba mni "diox"

¹Na Paba, nak'n apóstl chaan Jesucrist tak tabaa nlaaz Diox. Kon wets Tim ngekeen yeets ree, lo re goo zha kuu nak zha Jesucrist kuu nzo yez Corinto, ne lo reta zha Jesucrist kuu nzo dita yezlyu Acaya. ²Nlaz'n lee Diox kuu nak Xutaa, ne Jesucrist Zha Nabee lo'aa, loo yalnkelaaz chaan lo re goo ne tsow wen kwin goo.

Re yalty kuu mriid Paba

³Texkix Diox kuu nak Xutaa ne Xut Jesucrist, Zha Nabee lo'aa, tak nlat leettsou Diox ne Diox re'aa, ne lee Diox thibka ngo ney leettsou'aa. ⁴Lee Diox ntetsey leettsou'aa lo re yalty kuu ndriidaa, tsa no'aa tetseyaa leettsou re zha kuu ndriid yalty; ne tsa tetseyaa leettsou re zha, leeka taxal mtetsey Diox leettsou'aa. ⁵Ne tak ndriidaa yalty taxal mriid Jesucrist yalty, tataka tetsey Diox leettsou'aa por Jesucrist. ⁶Kona os lee nee ndriid nee yalty, leey nak tsa tsey leettsou goo, ne tsa tsow goo gan yalnaban kuu thitanax; ne os ntetsey Diox leettsou nee, leey nak tsa xek goo rid goo yalty, taxal nxek nee. ⁷Kuu ne nee nak; taxal ney ndo goo tegal ndriid goo yalty, tabaaka ndriid neey, ne nee tetetsey Diox leettsou goo, taxal ntetsey Diox leettsou nee.

⁸Re goo wets'n ne btan na, nlaaz nee nithlaazt goo xa kwathoz mriid nee yalty yezlyu Asia. Kwathoz yalty mriid nee, yalty kuu mera gaxegt nee gariid nee, ne asta mtsow nee xgab galaat nee ne neeka garoot nee naban nee. ⁹Mtsow nee xgab nak nee taxal thib zha kuu ndo'a par kuth zha. Koree ngok, tsa teed nee, yelaazt nee kuu ntsow nee xgab, sinke ndoblo yelaaz nee Diox kuu nteroban re zha nguth. ¹⁰Diox mkenap nee lo re kuu thoz kuu mriid nee lo yalguth, ne ngekenapka Diox nee, ne nee tekenapka Diox nee lo reta kuu went. ¹¹Naab nee lo goo, tsow goo ayud nee naab goo lo Diox por nee, ne wlipaa tekenap Diox nee. Ne os kwathoz men naab lo Diox por nee, leeka tata kwathoz zha taa texkix lo Diox, por re kuu nataak kuu ndelaaz Diox lo nee.

Chebee ngwat Paba yez Corinto

¹²Kwathoz wen nzo leettsou nee; tak nyen nee lee reta kuu mtsow nee lo re men yezlyu ree, mtsow neey thib mod nali ne nambi, kon dib ndroo leettsou nee mtsow neey; ne mtsowt neey kon yalnzaak chaan re men yezlyu ree, sinke lee Diox mtsow

ayud nee par mtsow neey ne mas wen mtsow neey lo goo. ¹³Lo yeets kuu nkee nee lo goo, beeta nkee nee kuu tak lab goo ne kuu tak yen goo. Ne nlaz'n wen wen yen gooy. ¹⁴Ne tegal lutta nyen gooy, per wiz kuu bretab Jesucrist Zha Nabee lo'aa, tsa lee re goo ley goo por nee, leeka taxal ley nee por goo.

¹⁵Ne tak tata gake, kona ngwalaz'n gayal'n ner lo re goo, tsa gatsaalaa chop welt par gagoo naley nee leettsou goo. ¹⁶Nda leettsou gariid'n gatwiin lo goo, leettsa gayan Macedonia, ne leettsa gabren gayan Macedonia gariid'n lo goo tedib welt. Tsa gatsow goo ayud'n lo re kuu ndechen par gatsin na yezlyu Judea. ¹⁷Leettsa mnda leettsou gatsow'n koree, wen wen mtsow'n xgabe. O ?cho ndak goo ntsow'n taxal re men yezlyu ree, re zha kuu mbez tsow thib kuu ne ntsow tedib kuu? ¹⁸Per nali nak Diox, ne tataka nali nak nee lo re kuu ni nee lo goo. ¹⁹Tak leettsa lee re yon nee Silvano ne Tim mndaa nee kwent chaan Jesucrist Xgann Diox lo goo, mtsow neey thib mod nali tak nali nak Jesucrist. ²⁰Ne tak por Jesucrist ntsow Diox reta kuu ne Diox taa Diox lo'aa, kona leettsa nhoolaa lo Diox mbezaa: "Tata gake" por le Jesucrist. ²¹Ne Diox nak kuu ntsow ney ndo'aa nyelaazaa Jesucrist. Ne lee Diox mli'aa tsa gakaa zha Diox. ²²Ne mndaa Diox Mbi Nayon chaan Diox leettsou'aa, tsa ne'aa wlipaa naka zha Diox ne tsa ne'aa wlipaa tetaa Diox kuu ne Diox taa Diox lo'aa.

²³Ne os leen terka yal'n yez Corinto taxal nda leettsou, Diox ney, ngwat'n lo goo tak nlaz'n kox goo lon. ²⁴Ne nlaazt nee nabee nee lo goo ne nee xa ndoblo yelaaz goo Diox, tak neya ndo goo nyelaaz goo Diox, beeta nlaaz nee tsow nee ayud goo, tsa naley yo leettsou goo.

2

¹Kona mtsow'n xgab yat'n lo goo tedib welt, tsa tsow'n yo nabil leettsou goo.

²Ne os leen tsow'n yo nabil leettsou goo, ?cho tsow yo naley leettsou, os nagte goo?

³Kona mkeen yeets ree lo goo, tak ngwalazt'n gayan lo goo, ne gatsow'n gagoo nabil leettsou goo, tak goo ndoblo tsow naley yo leettsou. Ne leettsa naley nzo leettsou, noga goo naley nzo leettsou goo.

⁴Ne leettsa mkeen yeetsa lo goo, kwathoz nda leettsou ne nabil ngoo leettsou, ne asta mbinn na. Ne mkeet nay tsa yo nabil leettsou goo, sinke mkee nay tsa ne goo wlipaa kwathoz nke leettsou goo.

Mlat leettsou Paba mne zha kuu mndaa falt

⁵Ne os lee thib zha mtsow ngoo nabil leettsou, nagt thita na mtsow zha ngoo

nabil leettsoo, noga mtsow zha ngoo nabil leettsoo reta goo. Nin koree, per nlazt'n gak'n thib zha nakap lo zha'a.⁶ Wen mtsow goo mkox zha'a lo goo, lee nal laa goo zha naa kwan tsow zha. ⁷ Ndoblo lat leettsoo goo ne goo zha, ne btetsey goo leettsoo zha, tsa luxt zha lo yalnab. ⁸ Naab'n lo goo, bloo goo lo zha lee goo nke leettsoo goo zha. ⁹ Tak par kona mkeen yeets ner lo goo, tsa nen naa chu ton goo diiz kuu mnabeen lo goo. ¹⁰ Lee zha kuu nlat leettsoo goo ne goo, noga naa nlat leettsoon nen zha. Ne os leen mlat leettsoon nen zha, por goo mtsow nay, ne Jesucrist ney. ¹¹ Ne mlat leettsoon nen zha'a, tsa tsowt Maxuuy gan lo'aa; tak wen ne'aa naa kwan nzo yek Maxuuy tsow Maxuuy.

Nda leettsoo Paba por Tito

¹² Leettsa mzin na yez Troas, par tan kwent Diiz Chul chaan Jesucrist, lee Zha Nabee mndaa diiz tan kwente tya. ¹³ Per kwathoz ntsow'n xgab, tak mzalt wets Tito lon; kona mroon tya ne ndyan yezlyu Macedonia.

Paba mndaa texkix lo Diox

¹⁴ Texkix Diox tak ngoo ney Diox leettsoo'aa, kona ntsowaa gan lo re kuu went por Jesucrist. Lee Diox nloo net wen lo'aa ne por nee ntsow Diox nraats diiz chaan Jesucrist lo re men reta ta; ne leey nak taxal thib tsi kuu chul ndetsi lo re men kuu nhzone. ¹⁵ Tak lo Diox nakaa taxal tsi straak, kuu chul ndetsi kuu ndaa Jesucrist lo Diox, ne leey ndraats lo re zha kuu tsow gan yalnaban ne lo re zha kuu lux. ¹⁶ Per lee lo re zha kuu lux, lee tsi ree nak taxal tsi kuu nakap nlaa kuu ndano zha lo yalguth; per lee lo re zha kuu tsow gan yalnaban, naake thib tsi kuu chul ndetsi, ne ndaa yalnaban kuu thitanax. Ne os anta nee gagt tsow nee tsuin ree. ¹⁷ Ne lee nee ntsowt nee negos kon xkiiz Diox, taxal ntsow kwathoz zha; sinke kon dib ndroo leettsoo nee ngetsw neey ne lee Diox neey, tak lee Diox mtaal nee, tsa taa nee kwent chaan Jesucrist.

3

Trat kub kuu mtaan Diox

¹ Leettsa ni nee re koree, ndak goo ndrubb nee, tak lee Diox mtaal nee lo goo. Ne ser ndak goo ndoblo nee loo nee thib yeets goo, kuu nke naa cho mtaal nee lo goo, o ndak goo ndoblo naab nee lo goo, tsa taa goo thib yeets lo nee, taxal ntsow tedib net zha. ² Goo nak taxal yeets kuu nke leettsoo nee kuu ndaa kwent, lee nee nak apóstol chaan Jesucrist; yeets kuu reta men nlebee ne nlab. ³ Ne goo nak taxal yeets kuu mkees Jesucrist, tak mkayaa goo xkiiz Diox kuu mndaa nee kwent lo goo ne nzhon goo diize. Goo nak taxal thib yeets kuu mket kon tint

laps, sinke leey mke kon Mbi Nayon chaan Diox kuu naban; ne nagte diiz kuu mke lo ke, taxal kuu mndaa Diox lo Moisés, sinke leey mke leettsoo'aa.

⁴ Ne por Jesucrist ne nee wli koree, kona ne neey lo goo. ⁵ Gagt gab nee anta nee ntsow thib kwaa, tak gagt kwan tsow nee anta nee; reta kuu ntsow nee, Diox ntsow ayud nee kona ntsow neey. ⁶ Ne lee Diox mteteed nee, kona nke nee tsuin lo trat kub kuu mtaan Diox. Ne nagte diiz kuu mke lo ke, taxal ley kuu mndaa Diox lo Moisés; leey nak diiz kuu mkees Mbi Nayon leen leettsoo men. Lee ley kuu mke lo ke ntsow nhzath men, per lee Mbi Nayon chaan Diox ndaa yalnaban lo men.

⁷ Lee ley kuu mke lo ke kuu mndaa Diox lo Moisés, kon xni thoz mndaa Dioxhe, kona lee re tey nee zha Israel zha ndala, ngogt raa gawii zha lo Moisés, tak kwathoz nla xni lo Moisés, per lee xni'a zhega zhega myuye. Lee ley kuu ntsow nhzath re men mndaa Dioxhe kon kwathoz xni, ⁸ iper masraa wen thoz nak xni chaan trat kub kuu mndaa Diox kon Mbi Nayon chaan Diox! ⁹ Ne os lee ley kuu mtsow nhzath men mndaa Dioxhe kon xni thoz, iper masraa kwathoz nataak trat kub kuu mndaa Diox lo'aa, tsa nali to'aa lo Diox! ¹⁰ Tak lee xni chaan ley kuu mndaa Diox lo Moisés, neeka lut yewalt naka kon xni thoz chaan trat kub. ¹¹ Os lee ley chaan Moisés kuu nlux nake, ne ngoke thib kuu nataak, kona masraa nataak trat kub kuu luxt thitanax.

¹² Ne tak nee wli koree, kona kon dib ndroo leettsoo nee ndaa nee kwente lo goo. ¹³ Ne ntsowt nee taxal mtsow Moisés, leettsa mtow Moisés lo Moisés kon thib le lar, tsa wiit re tey nee zha Israel naa xa yuyy xni kuu zhega zhega myuyya. ¹⁴ Per lee re tey nee zha ndala mkow yek zha. Ne asta nal leettsa nlab zha trat gol, lee lara ndata diiz yen zha naa kwan nhzabe, tak ter yiib lara lo zha; ne lee lara ngiib leettsa nyelaaz zha Jesucrist. ¹⁵ Per asta nal, leettsa nlab zha ley kuu mndaa Diox lo Moisés, lee lara ntowka yek zha kona nyent zha xkiiz Diox. ¹⁶ Per leettsa lee thib zha nyelaaz Jesucrist Zha Nabee lo'aa, ora lee lara ngiib lo zha. ¹⁷ Tak Mbi Nayon nak Zha Nabee; ne leettsa nabee Mbi Nayon chaan Zha Nabee leettsoo thib zha, mlaa zha lo ley. ¹⁸ Ne nowt raa lara lo'aa nal, ne nakaa taxal thib spej ta nloo xni chaan Zha Nabee, ne lee Mbi Nayon chaan Zha Nabee, ngetsee modaa thib wiz ne tedib wiz, tsa gakaa taxal lee zha.

4

¹ Ne tak mlat leettsoo Diox ne Diox nee, kona mndaa Diox tsuin ree ntsow nee, ne thib nzo yek nee tsow neey. ² Mlaa nee re kuu went kuu ntsow zha xgaats, re kuu

nathoy, ne ndiyt nee nkedi nee, ne neeka ntseet nee kuu nzhab xkiiz Diox. Sinke pur kuu wli ni nee lo re men, tsa yen zha kuu wli; ne lee Diox ney. ³ Per os nyent zha Diiz Chul kuu ndaa nee kwent, re zha kuu lux nak re zha kuu nyente. ⁴ Tak nyelaazt zhay, kona lee Maxuuy kuu nabee lo yezlyu ree, mtekow yek re zha, tsa gagt wii zha xni thoz chaan Diiz Chul chaan Jesucrist, zha kuu nak taxal lee Diox. ⁵ Ne ndaat nee leeka kwent nee, sinke ndaa nee kwent chaan Jesucrist Zha Nabee lo'aa. Ne beeta zha kuu nke tsii xid goonak nee, tak nzhon nee diiz lo Jesucrist. ⁶ Tak leeka Diox kuu mnabee tsa yo xni lo yalkow, leeka Diox mtsow mla xni leettsoo'aa, tsa kon xni'a lebee'aa xni thoz chaan Diox, kuu nak Jesucrist.

Tegal ndakti men nyelaaz men Diox

⁷ Lee xni ree nzo leettsoo'aa. Ne Nakaa taxal thib yet yu, tsa loo lee yalney ree nak chaan Diox ne nagte chaananaa. ⁸ Tegal ndota re yalti ndriidaa, per nzot nabil leettsoo'aa, ne tegal ntsowaa xgabe per nyobt leettsoo'aa. ⁹ Tegal ndralno zha lee, per ndot anta lee'aa, ne tegal ngin zha lee'aa per nzhutht zha lee. ¹⁰ Loka pa ta nda re lee tak kuth zha lee, tsa loo yalnaban chaan Jesucrist lo kwerpaa. ¹¹ Dita lo nabanaa tak kuth zha lee tak nyelaazzaa Jesucrist, tsa loo yalnaban chaan Jesucrist lo kwerpaa kuu nzhath. ¹² Kona nin, leeka taxal ndo yalguth lo nee, leeka tata ndo yalnaban lo goo.

¹³ Tak lo xkeets Diox nzhab: "Ngwalaiz'n Diox, kona ndan kwent chaan Diox", [Sal. 116:10] ne leeka tata nyelaazzaa Jesucrist, kona ndaa'aa kwent chaan Jesucrist. ¹⁴ Tak ne'aa lee Diox mteroban Jesucrist, Zha Nabee lo'aa lo yalguth, kona ne'aa teroban Diox re'aa kon Jesucrist, tsa teno Diox re'aa lo Diox. ¹⁵ Reta koree ngok tsa wen yo goo, ne tsa kwathoz zha kayaa kuu wen lo Diox; ne tsa kwathoz zha taa texkix lo Diox por kuu wen kuu ndaa Diox lo zha.

¹⁶ Kona ndoblot yetsayaa. Tegal ganda wiz lee kwerpaa ndeyaax, per lee leettsoo'aa gandata wiz mas ngeyak kub ne masraa ney ndo'aa nyelaazzaa Diox. ¹⁷ Reta yalti kuu ndriidaa lo yezlyu ree gatilta ndriidaay, ne lijerta ndriide, per ntsowe kayaa'aa re kuu thoz ne re kuu ro kuu xek thitanax kuu masraa nataak nake re yalti. ¹⁸ Tak ngwiitaa lo re kuu nloo, sinke lee'aa ngwii lo re kuu nloo; tak lee re kuu nloo talux, per lee re kuu nloo luxt thitanax.

5

Lee kwerpaa tetsee

¹ Lee kwerpaa nak taxal thib yuu; per leettsa luzhe ne'aa lee Diox taa thib kuu thitanax luxt lo'aa yibaa, kuu nak taxal thib yuu kuu mdexkwaat kon yaa men. ² Kona

nal ndi leettsoo'aa, tak nlaaza lee tegok Diox re'aa kwerp kub kuu thitanax luxt, ³ kwerp kuu gokaa taxal thib lar tsa cheeytaa. ⁴ Ne nal kuu bee nabanaa leen kwerp ree, kwathoz ndi leettsoo'aa ne nabil nzo leettsoo'aa, tak nlaaztaa laa'aa kwerp ree, sinke nlaazzaa keno'aa kwerpaa kuu kub yibaa, tsa lee kwerpaa kuu nzhath ree, gak thib kwerp kub kuu gaath raa. ⁵ Ne lee Diox mtsow koree par lee ne mndaa Diox Mbi Nayon chaan Diox lo'aa, tsa ne'aa wlipaa tetaa Diox kuu ne Diox taa Diox lo'aa.

⁶ Ne tak ne'aa koree kona ndat leettsoo'aa, ne ne'aa nal kuu nabanaa leen kwerp yezlyu ree, nzitzaa yibaa kon Zha Nabee. ⁷ Ne nyelaazzaa Jesuus tegal ngwiitaa Jesuus. ⁸ Ne wen ne'aa lee'aa ndya yibaa lo Diox, kona nlaazzaa lee laa'aa kwerp ree, tsa ndya'aa yo'aa tya. ⁹ Kona thibka ndoblo tsowaa kuu nlaaza Zha Nabee, tegal nabanaa o ngutha lee. ¹⁰ Tak retalee ndoblo tsinaa lo Jesucrist, tsa naab Jesucrist kwent lo'aa re kuu mtsowaa, leettsa mbanaa leen kwerpaa yezlyu ree, tegal kuu wene o kuu wente, ne tsa kayaa'aa kuu ndoblo kayaa'aa lo Diox.

Diiz kuu ntsow wen kwin re men kon Diox

¹¹ Ne tak ne nee ndoblo tseb men lo Zha Nabee, kona nteteed nee re zha tsa tseb zha lo Diox ne yelaaz zha Jesucrist. Wen nlebee Diox nee ne nlaz'n no goo wen lebee goo nee. ¹² Ngenit nee koree lo goo par tsow goo xgab kwathoz nataak nee, sinke ngeni neey lo goo, tsa ley goo por nee, ne tsa tak kab goo lo re zha brub kuu mbez nzaaka, ndrub zha per ngwiit zha naa kwan nzo leettsoo' zha. ¹³ Kona os cho zha ndak nzhak bxen yek nee, nzhak bxen yek nee tak nyelaaz nee Diox; ne os ndak goo ngobee nee por goo ngobee nee. ¹⁴ Lee yalnkelaaaz chaan Jesucrist nabee leettsoo'aa, kona ne'aa lee Jesucrist nguth por retalee, kona nak taxal retalee nguth. ¹⁵ Lee Jesucrist nguth por retalee, tsa tsowt raa lee kuu nlaazzaa ne tsowaa kuu nlaaz Jesucrist, kuu nguth ne mroban por retalee. ¹⁶ Kona ndoblot raa wii'aa lo re zha Jesuus taxal zha yezlyu ree; tegal ndala mtsowaa xgab lee Jesuus ngok thib zha yezlyu ree, per lee nal ntsowt raa lee xgab tata. ¹⁷ Kona lee zha kuu nyelaaz Jesucrist, zha kub nak zha; reta kuu went kuu ngok zha ndala mriidle, lee nal nak zha thib zha alli kub.

¹⁸ Diox mtsow koree. Por Jesucrist mtsow Diox wen nzi'aa kon Diox. Ne mndaa Diox tsii ree tsow nee, tsa reta men wen kwin kon Diox. ¹⁹ Kuu nin nak, leeka Diox ntsow wen kwin re men kon Diox por Jesucrist, tegal mndaa zha falt per mlot Diox kwente; ne mndaa Diox tsii ree lo nee, tsa taa nee kwent re koree lo re men. ²⁰ Kona lee nee

nak zha kuu mkayaa yalnabee, tsa taa nee kwent chaan Jesucrist, kona naab nee lo goo wen brin goo kon Diox por Jesucrist. ²¹ Neeka thib kuu went mtsowt Jesucrist, per Diox mxoob reta faltaa dits Jesucrist, ne mdix Jesucrist re faltaa, tsa ngokaa zha nali lo Diox.

6

¹ Ne tak nke nee rtsin Diox, kona naab nee lo goo kon dib ndroo leettsou nee, bkayaa goo re kuu wen kuu ndelaaz Diox, per kayaat gooy taxal thib kuu nataagt. ² Tak lo xkeets Diox nzhab:

Wen or mbin na xkiza,
ne mtsow'n ayuda,

wiz kuu mlaa re men. [Is. 49:8]

Ne nal nak wiz kuu nzhon Diox xkizaa. Nal nak wiz kuu mlaa re'aa.

³ Neeka thib welt mtsowt nee neeka thib kuu went lo neeka thib zha, tsa yent cho looz rtsin nee. ⁴ Sinke nloo nee, lee nee nak zha kuu nke rtsin Diox, asta nxek nee ndriid nee yalti por re kuu ndeche nee ne por ndota re kuu went, ⁵ mdin zha nee, mloo zha nee tsib, mrezno zha nee, mke zha nee tsii kuu kwathoz nati; nzo welt mdatta nee ne noga mriid nee win. ⁶ Ne lo reta kuu mriid nee, mloo nee nali nak nee, tak nlebee nee kuu wli, mxek nee reta yalti kuu mriid nee, wen ngok nee, tak nap nee Mbi Nayon chaan Diox, ne wlipaap nke leettsou nee taben nee. ⁷ Noga mloo nee, lee nee nak zha kuu nke rtsin Diox, tak pur kuu wli ni nee, ne nap nee yalney chaan Diox, ne nlortsin nee xkiiz Diox kuu wli, par ntak nee ne par ngyo nee. ⁸ Nzo leettsa ntsow nataak zha nee ne nzo leettsa ngoo zha yalnathoy nee, nzo leettsa wen ni zha nee ne nzo leettsa nlooz zha nee. Mbez zha lee nee nkedi, per wlipaap kuu wli ndediz nee. ⁹ Nzo leettsa ntsowno zha nee taxal zha kuu nlebeet zha, tegal wen wen nlebee zha nee. Mera aguth zha nee, per bee nabaaka nee; nteti zha nee, per nzhuth zha nee. ¹⁰ Tegal nabil nzhak nee, per thibka naley nzo leettsou nee; tegal prob nee, per kwathoz zha mtsow nee ngok rik; ne tegal yent kwan nap nee, per reta kwaan nkeno nee.

¹¹ Re goo wets'n ne btan na, zha yez Corinto, mnadaa nee kwent pur kuu wli lo goo, kon dib ndroo leettsou nee. ¹² Nke leettsou nee goo, nabizt ngok nee lo goo, per goo nketa leettsou goo nee, nabizt ngok goo lo nee. ¹³ Kona naab'n lo goo, taxal naab thib zha lo zhiinn zha, bke leettsou goo nee taxal nke leettsou nee goo.

Re'aa nak gwodoo chaan Diox kuu naban

¹⁴ Ndoblot tseyaa goo kon zha kuu nyelaazt Diox, tak gagt yo kuu wen kon kuu went,

ne gagt tsaal xni kon yalkow. ¹⁵ Nzaalt leettsou Jesucrist kon Maxuyy, kona gagt yo thib zha kuu nyelaazt Jesucrist kon thib zha kuu nyelaazt Jesucrist. ¹⁶ Neeka thib kuu yewalt nak kon gwodoo Diox ne kon gwodoo re diox re men yezlyu ree. Tak re'aa nak gwodoo chaan Diox kuu naban. Taxal nzhab Diox:

Yon ne tiy'n xid zha;
gak'n Diox zha;

ne lee re zha gak zha yez da. [Lv. 26:12; Ez. 37:27]

¹⁷ Kona noga ne Diox:

Broo goo xid re zha kuu went nak, beche
goo lo re zha;

diinnt goo kuu nambit,
tsa kayaan goo, [Is. 52:11]

¹⁸ ne tsa gak'n Xut goo,

ne re goo gak xgann na ne rtsaap na,
tenzhee ne Zha Nabee kuu nzhak ntsow
reta kwaan. [2 Sam. 7:14; 1 Cr. 17:13;
Is. 43:6; Jer. 31:9]

7

¹ Kona nin lo re goo wets'n ne btan na, kuu kwathoz nke leettsoon, tak ne'a lee Diox taa Diox re koree lo'aa, kona ndoblo nambia yetsinaa xid re zha nambit, ndoblot tsowaa re kuu went kuu nlaaz kwerpa, neeka ndoblot tsowaa xgabe. Sinke ndoblo tsebaa ne'aa Diox ne gonaa diiz lo Diox, tsa thib wiz ne tedib wiz thitanax gakaa zha nali lo Diox.

Laz Paba tak mtsee re zha yez Corinto mod went kuu ngok zha

² jBkayaa goo nee leen leettsou goo! Tak neeka lo thib men ter tsow nee thib kuu went, mtetsaat nee neeka thib zha, neeka mkiibt nee chaan neeka thib zha. ³ Nit'n koree par kekin goo, sinke taxal mni'a na lo goo ner, nke leettsou nee goo, kona nlaaz nee thibka mod ban re'aa ne thib ko'aa yekaa gathaa os ndechey. ⁴ Ne nen ngetsov goo kuu wen ne kwathoz nley'n goo; ne tegal kwathoz ndriid'n yalti, per nzo gan leettsoon ne naley nzo leettsoon.

⁵ Leettsa mzin nee yezlyu Macedonia, neeka lut mneytt nee, reta ta nzin nee ne ta nda nee ntsalzhoo zha nee ne nteti zha nee, reta ta nda nee nzeb nee. ⁶ Per lee Diox kuu ngo ney leettsou re zha kuu neyt, mloo ney leettsou nee, leettsa mzin Tito lo nee. ⁷ Ne kwathoz wen ngoo leettsou nee, leettsa mzin Tito lo nee, tak mtsow goo naley ngoo leettsou Tito. Ne lee Tito mnadaa kwent lo nee, lee goo kwathoz nlaaz goo wii goo nee, ne ndobke leettsou goo na ma nee, ne kwathoz nabil nzo leettsou goo, tak ntsow goo xgab na, ne koree mtsow masraa naley ngoo leettsoon.

⁸Tegal lee yeets kuu mkeen lo goo ner, mtsow ngoo nabil leettsou goo, ndat leettsoon. Tegal nabil ngoo leettsoon, leettsa mnen lee yeetsa mtsow nabil ngoo leettsou goo lut. ⁹ Lee nal laz'n, ne nagte tak nabil ngoo leettsou goo, sinke laz'n tak lee yeetsa mtsow nabil ngoo leettsou goo, par mlaa goo re kuu went kuu mtsow goo. Ne lee Diox mndaa diiz ngoo nabil leettsou goo, kona lee nee, neeka thib kuu went mtsowt nee lo goo. ¹⁰Tak leettsa nabil nzo leettsou thib zha, taxal nyow leettsou Diox, ntsee zha mod went kuu nak zha, tsa tsow zha gan yalnaban, ne ndoblot gab leettsou zha. Per leettsa nalatt nzo leettsou zha por re kuu yezlyu ree, kona ndano zha lo yalguth. ¹¹Mxek goo nabil ngoo leettsou goo taxal nlaaz Diox. ¹²Ne wii goo re kuu wen kuu mtsowe lo goo! Tak mbin goo diiz kuu mkeen lo goo ner, kona thib mloo goo yek goo texnet goo kwenta, ngok nayii goo ne mzeb goo ne goo Diox. Ne tsaraa ngwalaaz goo gawii goo na, ne mkezhyan goo ne mteeti goo zha kuu mtsow kuu wenta; por reta kuu mtsow goo mloo goo napt goo falt lo kwenta. ¹²Leettsa mkeen yeetsa lo goo, mkeet nay tak ntsow'n xgab zha kuu mtsow kuu wenta, ne zha kuu mzhakti por zha'a; sinke mkee nay tak ntsow'n xgab re goo, ne tsa nabee naa xa ntsow goo xgab nee, ne xa nke leettsou goo nee lo Diox. ¹³Reta koree mtsow ngoo naley leettsou nee, per mas wen ngoo leettsou nee, leettsa mne nee lee goo mtsow ngoo ney leettsou Tito. ¹⁴Os mley'n lo Tito por goo, nthoyt'n por kuu nzhab'n, sinke kuu wli nee lo goo, leeka tata kuu wli nzhab nee lo Tito, leettsa mley nee goo lo Tito. ¹⁵Ne kwathoz nke leettsou Tito goo, leettsa ntelaaz Tito naa xomod mbin goo diiz xkiiz nee, ne xa wen mkayaa goo Tito kon dib ndroo leettsou goo, tak nzeb goo ne goo Diox. ¹⁶¹⁷Ne kwathoz wen nzo leettsoon, tak nen lee re goo tetsow goo re kuu ndoblo goo tsow goo!

8

Kon dib ndroo leettsou men ndoblo taa men gon

¹Lee nal re goo wets'n ne btan na, nlaz'n ne goo, naa xomod nke yalwen chaan Diox tsii leettsou re zha kuu nyelaaz Jesus kuu nzo yezlyu Macedonia. ²Tegal kwathoz mzhakti re zha, per naley nzo leettsou zha; ne tegal prob zha, per kon dib ndroo leettsou zha mndaa zha gon, taxal zha kuu nden naroob temi mtsow zha. ³Ne nen kon dib ndroo leettsou zha mndaa zha gon, mndaa zha asta kuu mgaa lo zha, ne asta masraa mndaa zhay. ⁴Kwathoz mnaab zha lo nee, tsa taa nee diiz tsow zha ayud re zha prob kuu nyelaaz Jesus. ⁵Ne mtsow zha asta

kuu ndat leettsou nee, ner mndaa zha zha lo Zha Nabee, tsa thibka ngok zha kon nee, ne mtsow zha ayud nee; taxal nlaaz Diox. ⁶Kona mnaab nee lo Tito, tsa naab Tito gon kuu mndelo Tito mthop lo re goo. ⁷Goo nak kuu masraa ntsow re kuu: masraa nyelaaz goo Diox, masraa ndaa goo kwent xkiiz Diox lo re zha, masraa nzhaak goo ne kwathoz ntsow goo ayud re zha, ne nke leettsou goo nee taxal mloo nee lo goo; kona leeka tata ndoblo masraa taa goo gon, tak koree nak thib kuu wen.

⁸Ne nabheet'n lo goo taa goo gon, beeta kuu nlaz'n nak, loo goo wlipaaz nke leettsou goo re zha kuu nyelaaz Jesus, taxal ntsow tedib net re zha kuu nyelaaz Jesus kuu nzo yezlyu Macedonia. ⁹Tak ne'a goo xa mloo Jesucrist yalwen chaan Jesucrist lo'aa, rik zha ne ngok zha prob tak nke leettsou zha lee, tsa lee re'aa gakaa zha rik tak lee zha ngok prob.

¹⁰Kona koree nak kuu nin lo goo. Ndak'n mas wen yelo tsow goo kuu mndelo goo deblina, tak goo ngok zha kuu ner ngwalaaz gataa gon ree. ¹¹Kona lee nal ndoblo yelo thop goo gon, tak leeka taxal ngoo gan leettsou goo par taa gooy tsya, leeka tata ndoblo taa gooy nal, loka plo tegaa lo goo. ¹²Tak os lee thib zha wlipaaz nlaaz zha taa zha gon, takayaa Diox kuu takta taa zha, ne naabt Diox kuu napt men.

¹³Ne nit'n taa goo gon, tsa lee thib net zha keno masraa kwaa, ne lee lo goo gak falte, sinke ndoblo lalkay keno goo; ¹⁴lee nal lee re goo nap goo kuu napt re zha'a, per lee tedib welt lee re zha'a keno zha kuu napt goo, ne tabaa mod lalka yo re goo zha. ¹⁵Taxal nzhab lo xkeets Diox: "Zha kuu mkeno narroobe mrozhoochte lo zha, ne lee zha mkeno lutte, ngogt falte lo zha". [Ex. 16:18]

Tito ne re zha kuu nda kon Tito

¹⁶Texkix Diox tak mloo Diox leettsou Tito tsow Tito xgab goo, taxal ntsow'n xgab goo. ¹⁷Tak mbin Tito diiz kuu nzhab'n lo Tito, ne leeka lee Tito kwathoz ntsow Tito xgab por goo, kona ndatwii Tito naa ma goo.

¹⁸Ne noga mtaal'n thib wetsaa kon Tito, ne reta zha kuu nyelaaz Jesus reta ta, wen ndediz zha zha, tak wen nke zha rtsin Diox. ¹⁹Ne leeka re zha kuu nyelaaz Jesus mli zha, tsa ya zha kon re nee, ne tsow zha ayud nee yataan nee gon lo re zha kuu nyelaaz Jesus, ne ngetsow nee koree, tak nzhon nee diiz lo Zha Nabee, ne tak nlaaz nee tsow neey. ²⁰Tbaa ngetsow nee tak nlaazt nee lee re men looz nee, kwent chaan temi kuu ngethop nee. ²¹Kona thibka ntsow nee re kuu taxal ndobloy, ne nagt beeta lo Zha Nabee nali ntsow nee re kuu, sinke noga lo re men tata ntsow nee.

22 Ne noga mtaal nee tedib wets kon rop zha, thib wets kuu tyen welt mloo zha wen nak zha lo re kuu ntsow zha; ne kwathoz nlaaz zha yaa zha lo re goo nal, tak wen ne zha wen nak goo lo zha. 23 Ne os cho naabdiz lo goo, cho nak Tito, gab goo lee Tito nak thib zha kuu nke tsiiin kon na, tsa tsow nee ayud goo. Ne os cho naabdiz naa cho nak techop wetsaa kuu nda kon Tito, gab goo lee rop zha nak zha kuu mtaal re zha kuu nyelaaz Jesùs, ne nzhon zha diiz lo Jesùs. 24 Kona bloo goo nke leettsoo goo re zha kuu nda lo goo, lo reta zha kuu nyelaaz Jesùs, tsa ne re zha kuu nda lo goo, wlipaa nke leettsoo goo zha, tsa noga ne zha wli kuu nzhab nee lo zha, leettsa mley nee goo lo zha.

9

Gon kuu mtaal re zha kuu nyelaaz Jesùs

¹ Lee gon kuu ntaalaao lo re zha prob kuu nyelaaz Jesùs, ndechet raa keen lo goo naa xomod ndoblo thop gooy, ² tak wen nen tetaa gooy. Ne thibka nley'n goo lo re zha kuu nyelaaz Jesùs kuu nzo yezlyu Macedonia, tak lee re goo kuu nzo yezlyu Acaya asta deblinna lista nzi goo taa goo gon goo; kona mtsow kwathoz zha kuu nzo yezlyu Macedonia, no zha nlaaza zha taa zhay. ³ Kona mtaal'n re wets ree lo goo, tsa list yetsin goo kon gon goo, taxal mley'n goo lo re zha kuu nzo yezlyu Macedonia, ⁴tak cha yal'n kon chop tson wetsaa kuu nzo Macedonia lo goo, ne leettsa tsin nee, cha ndot goo list kon gon goo, ne kona tsow thouy nee ne noga goo thouy goo lo nee, tak kwathoz nzaal leettsoo'aa re'aa. ⁵ Kona mnaab'n lo re wetsaa, tsa yaatwii zha lo goo ner, ne tsow zha ayud goo thop goo gon kuu nzhaba goo taa goo. Tsa leettsa tsin na lee goo lista ndo, tsa gake thib gon kuu ndaa goo kon dib ndroo leettsoo goo, ne gagte thib gon kuu taa goo lafwers.

⁶ Btelaaz goo koree: "Zha kuu lutta nzhann, tataka lut kuu thop zha; ne lee zha kuu nzhann naroob, naroob kuu thop zha". ⁷ Kadta thib goo ndoblo taa goo kuu ndroo leettsoo goo, ne ndoblot taa goo thib kuu ndroot leettsoo goo, tak nke leettsoo Diox zha, kuu ndaa thib kwwa kon dib ndroo leettsoo. ⁸ Por yalwen chaan Diox ndaa Diox naroob kwwa lo'aa, tsa thibka keno'aa kuu ndeche'aa, ne tsa keno'aa kuu taa'aa lo re zha kuu ndecheley. ⁹ Taxal nzhab lo xkeets Diox: Naroob kwwa mndaa Diox lo re zha prob, ne thibka nali nak Diox. [Sal. 112:9]

¹⁰ Lee Diox ndaa bin kuu nzhann men, ne lee Diox ndaa kuu nzhown men, ne leeka Diox taa reta kuu ndeche goo par gan goo; ne lee Diox tsow gak naroob kuu nzhann goo, tsa masraa tsow goo ayud re men kuu

ndeche re kwa. ¹¹ Ne tsa taa Diox naroob kwwa lo goo, tsa tak taa gooy kon dib ndroo leettsoo goo lo re men kuu ndecheley. Ne lee re gon kuu taal goo gwe neey, kona tsow tsa naroob wetsaa taa texkix lo Diox. ¹²Tak leettsa taa nee gon ree lo re wetsaa kuu prob, nagt beeta kuu ndeche zha taa nee lo zha, sinke lee gon ree tsow kwathoz taa zha texkix lo Diox. ¹³Ne gol zha lo Diox kon dib ndroo leettsoo zha, tak lee gon ree loo lo re zha lee goo wlipaa nzhon goo diiz lo Diiz Chul chaan Jesucrist; ne taa zha texkix lo Diox por gon kuu mndaa goo lo re zha kon dib ndroo leettsoo goo, ne taa zha texkix lo Diox, tak wlipaa nloo goo thibka nak goo kon re zha ne nloo goo thibka nak retalee. ¹⁴Ne ke leettsoo zha goo ne naab zha lo Diox por goo, tak mloo goo lo re zha nzo yalwen chaan Diox leettsoo goo. ¹⁵ ¡Texkix thoz Diox, tak mndelaaz Diox thib kuu kwathoz nataak lo'aa, thib kuu gagt ni'aa kon diiz!

10

Yalnabee kuu mndaa Jesucrist lo Paba

¹ Tegal ni goo, leettsa ndon lo goo yet leettsoon nin lo goo, ne leettsa ndon tit lo goo kwathoz ney leettsoon nin lo goo lo yeets kuu mtaal'n. Kona kon yalnadoo ne kon yalnkelaaz kuu ndaa Jesucrist naab'n lo goo wen tsow goo. ² Tsa leettsa yatiwi lo goo tedib welt, tsowt goo kezhyan na, tak nzo chop tson goo ntsow xgab, re kuu went kuu nzo yezlyu ree ntsow nee; kona thib nzo leettsoon nin lo re zha'a. ³ Wli lo yezlyu ree nabanaa ne nzi'aa, per ngyotaa taxal ngyo re men yezlyu ree. ⁴Ngyotaa kon yiib taxal re men yezlyu ree, sinke lee'aa ngyo kon yalney kuu ndaa Diox lo'aa, tsa tak luuzaa yalney chaan Maxuuy, ⁵ne kon yalney kuu ndaa Diox lo'aa nluxoo reta xgab rub kuu ntow ne ndaat diiz lebee re men Diox. Ne nluzhaa reta xgab kuu ndaat diiz gonaa diiz lo Diox, tsa thib ko'aa yekaa gonaa diiz lo Diox. ⁶Ne lista nzi nee, par teti nee reta zha kuu nzhont diiz xkiiz Jesucrist, leettsa lee goo thib ko goo leettsoo goo gon goo diiz xkiiz Jesucrist.

⁷ Goo ngwii goo beeta kuu nloo lo goo. Os lee thib zha wlipaa nyeeen zha nak zha zha Jesucrist, ndoblo ne zha, no nee nak nee zha Jesucrist. ⁸ Ne os nley'n yalnabee kuu mkayaan lo Jesucrist nthoyt'n, tak lee Zha Nabee mndaa yalnabee ree lon, tsa tsow'n ney to goo lo Diox, ne mndaat zhay par tsow'n lux goo. ⁹ Ne nlazt'n tsow goo xgab, leen nlaz'n tseb'n goo, kon re yeets kuu mkeen lo goo. ¹⁰ Ne os wli kuu mbez chop tson goo, kwathoz ney leettsoon par nin lo goo lo yeets kuu mtaal'n lo goo, ne or ndon lo goo nadoo nak'n ne nataagt xkiz'n. ¹¹ Per lee zha kuu tata mbez, ndoblo ne zha leeka

taxal nkee nee lo yeets, leettsa tith nzi nee lo goo, leeka tata ni nee ne tsow nee, leettsa to nee lo goo.

¹² Thitanax yet leettsou nee yewal gak nee kon re zha brub kuu tata ndediza. Thitanax went kuu ntsow re zha'a ley lo zha, ngobee zha re kuu ntsow zha, per thitanax naxen zha ne ngobee zha, tak mas wen zha nake tedib zha ley lo zha. ¹³ Per lee nee ndruba nee kuu ndoblot nee rub nee. Tak Diox nak cho mndaa diiz tsow nee tsii ree, Diox mndaa diize ne mzine asta lo re goo zha yez Corinto. ¹⁴ Kona neeka mas ntsowt nee nee neeka nit nee, thib kuu ndoblot nee tsow nee ne i nee leettsa nley nee goo, tak ner nee mndaa kwent Diiz Chul chaan Jesucrist lo re goo. ¹⁵ Ne ndruba nee tsii kuu ntsow tedib net zha. Sinke nlaaz nee ke nee rtsin Diox xid goo, taxal masraa nyelaaz goo Diox ne taxal masraa nali ndo goo lo Diox; per ngobee nee kuu ntsow nee taxal nlaaz Diox, nage tabaata. ¹⁶ Ne tsaraa nlaaz nee chaats nee Diiz Chul chaan Jesucrist re yez kuu nzi mas tith nake laz goo, tsa rubt nee tsii kuu ntsow tedib net zha.

¹⁷ Ne os cho nlaaz ley, ndoblo ley zha lo re kwent chaan Zha Nabee. ¹⁸ Tak wen nzo leettsou Diox ne Diox re zha kuu lee Diox mli, ne went nzo leettsou Diox ne Diox re zha kuu ndrub leeka lee.

11

Re zha kuu nagt apóstl chaan Jesucrist

¹ jNlaz'n xek goo gon goo lut kuu nin, tegal taxal zha bxn ndediz'n! Bxek goo lon. ² Tak kwathoz nhzhak selos'n goo, ne Diox ntsow nhzhak selos'n goo. Tak nlaz'n tan goo lo Jesucrist taxal ndaa zha thib nzaa kuu tseya, ne nlaz'n tan goo lo Jesucrist taxal thib nzaa yeen kuu ter lebee mbyi. ³ Per nzeb'n, tak cha ngekedi Maxuuy goo taxal mkedi Maxuuy Ev, ne laa goo kuu wli ne gagt raa goo zha nadoo ne zha nambi taxal nlaaz Jesucrist. ⁴ Tak wen nkayaa goo re zha kuu nagt apóstl chaan Jesucrist, re zha kuu ndaa kwent tedib diiz kuu nagt chaan Jesucrist. Ne wen nkayaa goo tedib mbi kuu nagt Mbi Nayon chaan Diox, ne nkayaa goo tedib diiz kuu mndaa nee kwent lo goo. ⁵ Neeka lut ndagt'n mas nataak re zha'a nake na, re zha kuu ndak goo mas nataak nake na, re zha kuu ndak goo nak apóstl chaan Jesucrist. ⁶ Ne tegal gagt'n tediz'n wen, per nen ne nyen naa kwan ndediz'n, ne re kuu ni nee ne re kuu ntsow nee, mloo nee lo goo naa xa nake nee.

⁷ ¿Kwan ntsow goo xgab? ¿Chu kuu went mtsow'n, tak mndan kwent Diiz Chul lo goo, ne mnaabt'n neeka thib kwaa lo goo par gatseey? O ¿chu kuu went mtsow'n, tak mxek'n mriid'n yalti par ngok goo zha nataak lo Diox? ⁸ Chu nake taxal mki'b'n

temi tedib net re zha kuu nyelaaz Jesú, leettsa mkayaan temi lo zha, tsa mndan kwent xkiiz Diox lo goo. ⁹ Ne leettsa mndon lo goo ne mndechen re kwaa, per yent kwan mnaab'n lo goo, tsa mtowt'n lo goo. Tak lee re wetsaa zha yezlyu Macedonia mndaa kuu mndechen. Tata mtsow'n par mtowt'n lo goo, ne tataka tsow'n nal. ¹⁰ Ne wen nen nlebeen kuu wli chaan Jesucrist, kona yent cho kib kuu nley'n lo goo, kuu nak, nda taka na kwent Diiz Chul dita yezlyu Acaya. ¹¹ ¿Chebee tabaa ndediz'n? ¿Chu ndak goo nketa leettsou goo? jDiox ne nke leettsou goo!

¹² Per tetsowka na kuu ngetswon, tsa tat'n diiz rub re zha kuu ndiy ndruba mbeze ntsow rtsin Diox, re zha kuu nlaaz gak taxal nee. ¹³ Per wlit nak re zha'a apóstl chaan Jesucrist, zha nkedi nak zha, ne ntsow zha taxal apóstl chaan Jesucrist. ¹⁴ Ne nagt koree thib kuu ter rid, tak leeka Maxuuy mtsow Maxuuy taxal thib mandad chaan Diox kuu ndo lo xni, ¹⁵ kona lee re zha kuu nke tsii lo Maxuuy, ntsow zha taxal zha kuu nke tsii lo kuu wli kuu nak chaan Diox. jPer lee re zha'a telux zha, taxal ndoblo zha lux zha, por re kuu ntsow zha!

Re yalti kuu mriid Paba kwent chaan Jesucrist

¹⁶ Bere nin lo goo, neeka thib goo ndoblot tsow xgab, lee na nhzhak bxn na, per os lee goo tata ntsow goo xgab, laa goo nin lo goo taxal thib zha bxn, tsa noga na tak ley'n lut. ¹⁷ Tbaa nley'n, per nagte kuu mnabee Zha Nabee, sinke taxal thib zha bxn nin. ¹⁸ jTak kwathoz zha ndrub zha re kuu yezlyu ree, kona noga na ley'n lut! ¹⁹ Tak zha nyen diiz nak goo, kona nxek goo nkayaa goo re zha bxn, ²⁰ ne nkez leettsou goo ne goo re zha kuu ntsow kuu went lo goo; ntsow zha nke goo tsii lo zha, nteti zha goo, nkib zha re chaan goo, naro ntsow zha lo goo ne asta nkaan yaa zha kwat goo. ²¹ Ne tegal nathoy nin koree lo goo, tak lee nee, kwathoz nadoo mtsow nee lo goo.

Ne os lee tedib net zha ney leettsou zha, noga na ney leettsou, tegal taxal thib zha bxn ngenin. ²² ¿Os zha Israel nak zha? Noga na nake. ¿Os raz Abraham nak zha? Noga na nak zha raz Abraham. ²³ ¿Os lo Jesucrist nke zha tsii? Masraa nkeen tsii nake re zha'a, tegal taxal zha bxn nin koree, masraa mkeen tsii nake re zha'a. Masraa mdinke zha na nake re zha'a, kwathoz tyen welt mloo zha na tsib nake re zha'a, ne tyen welt mer agath'n kwent chaan Jesucrist. ²⁴ Gaay welt mdin re tawlaz'n zha Israel na, ne kadta leettsa mdin zha na, galbtsiiyee yaa bins mkeen zha yek'n. ²⁵ Tson welt mdin zha na kon ya, ne tedib welt mdin zha na kon ke. Ne tson welt mloww bark kuu

ngoon leen nitdoo, ne thib welt dita thib wiz ne dita thib yaal ndano mbi bark kuu ngoon lo nitdoo.²⁶ Kwathoz mndiy'n, tyen welt mer galoww'n yoo, tyen welt mlowann zha na, re tawlaz'n ne re zha tith kwathoz mreke zha dits'n. Noga mriid'n yalti re yez naro, mriid'n yalti wan ne lo nitdoo, ne mriid'n yalti xid re zha kuu nkedi kuu wlit nyelaaz Jesú. ²⁷ Kwathoz mkeen tsuin ne kwathoz ngwatsay'n; kwathoz tyen welt mdatta na, kwathoz mriid'n win yath ne win nit, nzo wiz ndowt'n; kwathoz tyen welt mriid'n yop, ne nzo leettsa mkenot'n xab'n.

²⁸ Ne zhaa ndriid'n re koree ne nagte beeta koree, sinke zhaaga, gandata wiz ntsow'n xgab re zha kuu nyelaaz Jesú. ²⁹ Os lee thib zha ne ndak noga na ne ndak'n, ne leettsa ntsow zha lee thib zha kuu nyelaaz Diox ntsow kuu went, kwathoz ntsow'n xgab zha ne nda leettsoon zha. ³⁰ Ne os leen ney'n, nley'n tak ney'tn, per lee yalney chaan Diox ndo kon na. ³¹ Diox kuu nak Xut Jesucrist, Zha Nabee lo'aa, Diox kuu ndoblo gol reta men lo thitanax, lee Diox ne wli kuu nin. ³² Leettsa ngwan yez Damasco, lee zha kuu ngok gobvern, kuu ntsow reta kuu nabee rey Aretas, mnabee zha lo re soldad, tsa kenap re soldad roo pwert roo yez, tsa ten re zha na, ³³ per ngoo chop tson zha kuu mtsow ayud'n, ne leen thib chekwit mla zha na roo ventan kuu ndob chu bla kuu now yez, tata mod mlan lo re zha'a.

12

Kuu mloo Diox lo Paba

¹ Yent kwan tsow men gan rub men, per ndoblo nin re kuu mwiin ne re kuu mloo Zha Nabee lon. ² Nlebeen thib mbyi kuu nyelaaz Jesú kuu nda'a tsida liin ngwa yibaa, ne net'n chu xbi zha ngwa o beeta kwerp zha ngwa, Diox ney. ³ Per nlebeen mbyi'a, tegal xbi zha ngwa o kwerp zha ngwa, beeta Diox ney, ⁴ ngwa zha yibaa lo Diox. Tya mbin zha re diiz kuu nagaats kuu neeka thib mbyi mndaat Diox diiz ni. ⁵ Ne tak ley'n por mbyi'a, per ndoblot ley'n leeka na, beeta nley'n tak nak'n thib zha neyt. ⁶ Ne os leen nlaz'n ley'n, wene, ne nagte tak naxen na, tak kuu wli nin. Per ntsowt nay, tsa neeka thib zha tsowt xgab mas wen na nake re kuu nloon nak'n ne re kuu nzhon zha nak'n. ⁷ Ne par rubt'n por re kuu thoz kuu mloo Diox lon, kona mndob thib yalti taxal thib yits kwerp da, kuu mtaal Maxuyu tsa tetiy na tsa rubt'n. ⁸ Nda'a tson welt mnaab'n lo Zha Nabee, kib zha koree kwerp da, ⁹ per lee Zha Nabee ne lon: "Wen bloo leettsoo'a, tak mlat leettsoon mnen lu, tak leettsa neyt zha tsa nloo yalney da". Kona kwathoz naley nzo leettsoon ne nley'n

tak neyt'n, tsa loo yalney chaan Jesucrist lo kwerp da. ¹⁰ Kona kwathoz naley nzo leettsoon leettsa neyt'n, leettsa ntsalzhoo zha na, leettsa napt'n kuu ndechen, leettsa ndralno re men na, leettsa ndriid'n yalti kwent chaan Jesucrist. Tak leettsa neyt'n, tsaraa mas nloo yalney chaan Jesucrist lo kwerp da.

Nda leettsoo Paba por rezha kuu nyelaaz Jesú, kuu nzo yez Corinto

¹¹ Taxal zha bxen ntsow'n, tak mley'n leeka na lo goo, per gooka mtsow mley'n lo goo, tak tata nyow leettsoo goo tsow zha lo goo, ne goo ndoblo ley'n. Ne tegal yent kwan nak'n per nagt'n thib zha kuu nataagt lo re zha kuu mbez goo nak apóstl chaan Jesucrist, re zha kuu ndak goo kwathoz nataak. ¹² Mxek'n mriid'n reta yalti; ne leettsa mndon xid goo, tsa mtsow Diox re kuu thoz ne re kuu gagt tsow re men delant lo goo por na, par ngobee lee na wlipaa nak'n apóstl chaan Jesucrist. ¹³ Tsow goo perdon na, os mtethoy'n goo por kuu nin lo goo; tak thibka kuu mtsowt goo, mtsowt goo ayud'n lo re kuu mndechen; ne lee re zha kuu nyelaaz Jesú kuu nzo tedib net re yez mtsow'e.

¹⁴ Ne lee nal lista ndon par yal'n lo goo, ne welt ree gak tson welt yal'n lo goo, ne neeka welt ree yent kwan naab'n lo goo. Tak nkwant'n re kuu nap goo, sinke nlaz'n nali to goo lo Diox; tak xut mndyeen ndoblo kwaan temi kuu ndeche mndyeen, nagt mndyeen kuu ndoblo kwaan kuu ndeche xut mndyeen. ¹⁵ Kona kon dib ndroo leettsoon ntsow'n gast kuu nap'n, ne xek'n ndrid'n yalti kwent chaan goo. Ne os masraa ke leettsoon goo, ¿chu mas lutte ke leettsoo goo na?

¹⁶ Wli yent kwan mnaab'n lo goo, per nzo chop tson goo mbez, lee na nalatts yek'n kona mtsow'n mla goo lo kwa. ¹⁷ ¿Chu ndak goo mkedin goo, leettsa mtaal'n re zha kuu ngwa ngwatwii lo goo? ¹⁸ Mnaab'n lo Tito yatwii zha lo goo, ne mtaal'n tedib wetsaa kon lee Tito. ¿Chu mkedi Tito goo? ¿Chu nagt lalta mtsow nee rop nee Tito lo goo ne lalta ntsow nee xgab?

¹⁹ Ser ntsow goo xgab ngenaab nee perdon lo goo, nagte tata. Delant lo Diox ne lo Jesucrist ni nee lo goo, ne reta kuu ni nee lo goo, tsa masraa nali to goo lo Diox.

²⁰ Tak ntsow'n xgab leettsa yatwiin lo goo, cha tsaal't goo taxal nlaz'n, ne neeka goo tsaal't goo na taxal nlaaz goo. Cha nzi yo goo, o ndablaaz goo chaan tedib goo, o nayii goo, o went nzhat leettsoo goo ne goo tedib goo, o nlooza altaa goo, o naro nzhat goo, o ntsow goo ndota re kuu went. ²¹ Noga nda leettsoon, tak cha leettsa yal'n lo goo tedib welt, cha tsow Diox thoy'n nen goo ne gonn

na, tak tyen zha kuu mtsow kuu went ndala, nlaat zha re kuu yu kuu ntsow zha nzhab ropka zha kon ndota zha, ne nlaat zha re kuu went kuu nlaaz zha.

¡Tbaa gake!

Paba

13

Paba nzhab ndoblo ney to re zha lo Diox

¹ Koree gak myon welt yal'n lo goo. Ne kuu gab chop o tson testig tata texnet reta kuu. ² Lo re goo kuu mtsow kuu went ndala, ne lo reta goo mni'a na leettsa ngwan lo goo mrop welt, ne lee nal kuu ndon tith bren nin lo goo tedib welt, os leen yal'n lo goo, latta leettsoon nen goo. ³ Tak lee re goo nkwaan goo thib kuu wlipaa loo lee na ni kwent Jesucrist lo goo. Lee Jesucrist nagt Jesucrist thib zha neyt lo goo, sinke wlipaa nloo Jesucrist lo goo lee Jesucrist ney. ⁴ Wli taxal thib zha neyt mke Jesucrist lo kruz, per naban Jesucrist kon yalney chaan Diox. Ne leeka tata, lee nee nak nee taxal zha neyt por Jesucrist, per kon yalney chaan Diox wlipaa tabanaa kon Jesucrist.

⁵ Leeka goo wii goo naa xomod nak goo ne bloo goo mod kuu nak goo, tsa ne goo naa chu wli nali ndo goo nyelaaz goo Diox. O ¿chu net goo lee Jesucrist nzo leettsoo goo? ¡Per nzot Jesucrist leettsoo goo, os lee goo mlaa goo Jesucrist! ⁶ Per nlaz'n yen goo, lee nee nagt nee zha kuu rzhont diiz lo Diox nali nzi nee lo Diox. ⁷ Ne thibka naab nee lo Diox, tsa tsowt goo neeka thib kuu went, ne nagte tak nlaaz nee loo nee wen nak nee, sinke nlaaz nee tsow goo kuu wen, tegal lee nee, nak nee taxal zha kuu nataagt lo goo. ⁸ Tak ndoblot ni nee kuu wlit, sinke beeta kuu wli ni nee. ⁹ Kona naley nzo leettsoo nee, leettsa nak nee taxal zha neyt, tsa lee goo to ney goo lo Diox, ne thibka tenaabka nee lo Diox tsa thib wiz ne tedib wiz nali to goo lo Diox. ¹⁰ Kona ngekeen yeets ree lo goo nal kuu bee ter yal'n lo goo, tsa leettsa yal'n lo goo, yiit'n lo goo kon yalnabee kuu mndaa Zha Nabee lon, mndaa zha yalnabee ree lon, per nagte par luuzh'n goo, sinke leey nak par ney to goo lo Diox.

Lee Paba mni "diox" bluz

¹¹ Kuu yelo nin lo re goo wets'n ne btan na nak, naley bloo goo leettsoo goo, nali gwatsin goo lo Diox, bteni goo altaa goo, thibka kuu btsow re goo xgab, wen brin goo ne lee Diox kuu nke leettsoo lee, ne ntsow wen nzi'aa, to kon reta goo. ¹² Bni goo "diox" lo altaa goo, ne dow goo thib chut kwat altaa goo, thib mod nali. ¹³ Reta zha kuu nyelaaz Jesucrist, zha kuu nzi nzhee, ni "diox" lo re goo.

¹⁴ Nlaz'n thibka taa Jesucrist yalwen chaan Jesucrist lo goo, noga nlaz'n thibka ke leettsoo Diox goo ne lee Mbi Nayon chaan Diox nzo leettsoo goo.

Yeets kuu mkee Paba lo re zha yez Gálacia

Paba mni "diox"

¹ Na Paba, nak'n apóstl chaan Jesucrist ne nagt thib men yezlyu ree mtaal'n o mlin. Sinke Jesucrist ne Diox kuu nak Xutaa mlin, Diox kuu mteroban Jesucrist. ² Na ne reta wetsaa kuu nzi kon na nzhee ni "diox" lo goo, zha kuu nak zha Jesucrist kuu nzo yezlyu Galacia. ³ Nlaz'n lee Diox kuu nak Xutaa ne Jesucrist Zha Nabee lo'aa, loo yalwen chaan lo goo ne tsow wen kwin goo. ⁴ Tak leeka lee Jesucrist mndaa Jesucrist Jesucrist nguth por re faltaa, par mtelaa Jesucrist re'aa lo re kuu went kuu nzo lo yezlyu ree re wiz kuu nabanaa, tak tabaa nlaaz Diox kuu nak Xufaa. ⁵ Kona lo Diox ndoblo gol reta men reta wiz! ¡Tata gake!

Yent raa tedib Diiz Chul kuu ndaa yalnaban

⁶ Kwathoz nzegey leettsoon, leettsa mbin na lee re goo ngwalaaz goo tedib net diiz kuu ndak goo ndaa yalnaban ne mkayaa gooy, ne chatta mlaa goo Diox kuu mrez goo por yalnkelaaz chaan Jesucrist. ⁷ Per kuu wli nak, yent raa tedib Diiz Chul kuu ndyaadno yalnaban. Lee kuu nzhak nak, nzo chop tson zha kuu ntsow nzhak chop xgab goo, ne nlaaz zha tsee zha Diiz Chul chaan Jesucrist. ⁸ Per os lee thib nee o thib mandad chaan Diox, taa kwent tedib diiz Diiz Chul lo goo, lee yalnayii chaan Diox la dits zha'a ne kode Diox zha. ⁹ Ne lee kuu ni'a na lo goo ner, nal bren ni nay lo goo tedib welt: Os cho taa kwent tedib Diiz Chul lo goo ne nagte kuu mndaa nee kwent lo goo, lee yalnayii chaan Diox la dits zha'a ne kode Diox zha.

¹⁰ Tak leettsa nin koree, nkwant'n tsa wen yo leettsoo re men nen, sinke lee na nkwaan tsa wen yo leettsoo Diox ne Diox na. ¹¹ Ne osleen nkwaan na wen yo leettsoo re men nen, nagt raa na mos chaan Jesucrist tsa!

Xomod ngok Paba apóstl chaan Jesucrist

¹¹ Re goo wets'n ne btan na, nlaz'n ne goo koree: Lee Diiz Chul kuu ndan kwent, nagte kuu mgab yek men yezlyu ree. ¹² Tak neeka mkayaat nay ne neeka mteedt nay lo men yezlyu ree, sinke Jesucrist nak cho mloo yon.

¹³ Ne ndak'n mbin goo naa xa ngok'n ndala, leettsa ngwalaaz'n re kuu nyelaaz re tawlaaz'n zha Israel, mreken dits re zha Jesucrist, ne thibka mtsow'n xgab galuuzz'h'n re zha. ¹⁴ Ne lo re kuu mloo re tey nee zha ndala, na ngok thib zha kuu mas mtsow reta

kuu mloo zha, nake reta zha kuu ndezhen kon na, tak na masraa ngwalaaz gatsow reta kuu mtsow re tey nee, zha ndala. ¹⁵ Per Diox mlin leettsa terka gal'n, ne leettsa ngwalaaz Diox mree Diox'n por yalwen chaan Diox, ¹⁶ ne mtsow Diox mlebeen Xgann Diox, tsa tan kwent chaan zha lo re zha kuu nagt zha Israel. Ne ngwat'n mnaabdz'n lo neeka thib men yezlyu ree; ¹⁷ ne neeka ngwat'n mnaabdz'n lo re apóstl chaan Jesucrist kuu ner ngok apóstl nake na, kuu nzo yez Jerusalén. Sinke kuu mtsow'n nak ngwan yezlyu Arabia, ne tsaraa mren yez Damasco.

¹⁸ Tson liin bluz tsaraa ngwan yez Jerusalén, tsa mlebeen Pey, ne mlet'n tsuin wiz lo Pey. ¹⁹ Per mwii't'n neeka tedib re apóstl chaan Jesucrist, beeta Santiag wets Zha Nabee mwin. ²⁰ Reta kuu ngekeen lo goo wliy ne Diox ndewii ngekedit'n goo.

²¹ Tsaraa ndyan yezlyu Siria ne yezlyu Cilicia. ²² Ne lee re zha kuu nyelaaz Jesucrist kuu nzo yezlyu Judea, nlebeet zha na tsya. ²³ Beeta kuu nzhon re zha nak: "Lee zha kuu mreke ditsaa ndala, lee nal lee zha ndaa kwent Diiz Chul chaan Jesucrist, kuu ngwalaaz zha galuux zha ndala". ²⁴ Ne nzhol re zha lo Diox, tak mtsee Diox mod went kuu ngok'n.

2

Re apóstl chaan Jesucrist mkayaa Paba

¹ Tseda liin bluz, tsaraa ngwan yez Jerusalén tedib welt kon Bernabé ne mndeno nee Tito. ² Ngwan tak lee Diox mloo lon ndoblo yan. Ne leettsa ndo'a na Jerusalén, na ne beeta re zha kuu nabee lo re zha kuu nyelaaz Jesús ngoo nee thib junt, tsa mndan kwent lo re zha, naa xomod nak Diiz Chul kuu ndan kwent lo re zha kuu nagt zha Israel. Mtsow'n koree, tak nlazt'n lee re kuu mloo'a na ne lee re kuu ngetsw'n lux tabataa. ³ Ne neeka Tito kuu mndo kon na, mtsowt re zha kuu nabee fwers lo zha, par gake zha seny chaan nee zha Israel, tegal nagt zha zha Israel. ⁴ Re koree ngok, tak mndaab chop tson re zha kuu wlit nyelaaz Jesús xidaa, xgaatsta mndaa zha par wii zha naa kwan ntsowaa, tak lee'a naa nak zha kuu mtelaa'a Jesucrist; ne nkwaan zha mod tsa gonaa diiz re kuu mloo re tey nee, tsa gakaa taxal mos lo re kuu mloo re tey nee. ⁵ Per thitanax mndaat nee yek nee gagon nee diiz lo zha, tak nlaazt nee laa goo Diiz Chul, kuu nak kuu wli.

⁶ Ne lee re zha kuu nak zha kuu nabee, neeka thib kuu net zha lon. (Ne lo na nataagt naa kwan re kuu ngok zha ndala, tak reta men lalka nak men lo Diox.) ⁷ Ne myeen re zha lee Diox mlin, tsa tan kwent Diiz Chul chaan Diox lo re zha kuu nagt zha

Israel, taxal mli Diox Pey, par taa Pey kwent lo re zha Israel. ⁸ Leeka Diox kuu mtaal Pey par gak Pey apóstol lo re zha Israel, leeka lee Diox mtaal'n, par gak'n apóstol chaan Jesucrist lo re zha kuu nagt zha Israel.

⁹ Kona, lee Santiag, Pey ne Juan, re zha kuu nak zha kuu nabee ne kuu nataak xid re zha kuu nyelaaz Jesús, myeen zha lee Diox mlin por yalwen chaan Diox par tsow'n rtsin Diox. Ne mndaa re zha yaa zha lo rop nee Bernabé, tsa mloo zha mkayaa zha nee; ne tsa ke nee rtsin Diox lo re zha kuu nagt zha Israel, ne lee re zha nda ke tsuin lo re zha Israel. ¹⁰ Beeta mnaab re zha lo nee telaaz nee re zha prob, ne konaka nzo leettsoon tsow'n.

Pey mkok lo Paba yez Antioquia

¹¹ Per leettsa mzin Pey yez Antioquia, mkok Pey lon tyo lo re men, tak mtsow Pey thib kuu thitanax went. ¹² Tak leettsa mzin Pey, mndelo Pey ndow Pey kon re zha Jesús kuu nagt zha Israel. Per leettsa mzin thib net zha kuu mtaal Santiag, re zha kuu nak zha Israel, ndowt raa Pey kon re zha Jesús kuu nagt zha Israel; ne tee mlaa Pey zha, tak mzeb Pey ne Pey re zha kuu mbez, ndoblo ke re zha Jesús seny chaan re zha Israel. ¹³ Ne noga tedib net zha Israel kuu nyelaaz Jesús thibka ngok zha kon Pey, ne asta no Bernabé mkedí zha ngok kon re zha, re zha kuu mbez tsow thib kuu ne ntsow tedib kuu.

¹⁴ Kona leettsa mnen nalit nda zha taxal nak Diiz Chul, tsu nzhapn' lo Pey tyo delant lo re men: "Zha Israel naka, ne ntsowa taxal thib zha kuu nagt zha Israel. Ne, ¿chebee nabee'a lo re zha kuu nagt zha Israel, tsa ban zha taxal zha Israel?"

Re zha Israel ne re zha kuu nagt zha Israel, tsow zha gan yalnaban

¹⁵ Lee re'aa desde ngolaa nakaa zha Israel, ne nagtaa zha kuu ndab falt taxal re zha kuu nyelaaz Diox. ¹⁶ Per ne'a lee, neeka thib zha kayaat Diox zha taxal zha nali, tak nzhon zha diiz lo ley chaan Moisés; sinke kayaa Diox zha taxal zha nali, tak nyelaaz zha Jesucrist. Kona noga lee nyelaazaa Jesucrist, tsa kayaa Diox re'aa taxal zha nali. Ne nagte tak nzhonaa diiz lo ley kuu mndaa Diox lo Moisés, tak neeka thib zha kayaat Diox zha taxal zha nali, tak nzhon zha diiz kuu nzhab lo ley chaan Moisés. ¹⁷ Ne os lee'aa nlaazaa kayaa Diox re'aa, taxal zha nali tak nyelaazaa Jesucrist, ne tsa lee chop tson gab, lee aa nak zha ndab falt. ¡Os leey tabaay, lee Jesucrist ntsow ntsowaa kuu went, per thitanax wlit kona!

¹⁸ Os lee'aa mlaa'a lee re kuu nabee ley ne os mre'aa ntsowaay tedib welt, leeka lee'aa napaa falt. ¹⁹ Tak lo ley ne lo re kuu nabee ley, nak'n taxal zha nguth, tsa ban na taxal nlaaz Diox. ²⁰ Tak thibka mkeen lo kruz

kon Jesucrist, ne nagta na zha kuu naban, sinke lee Jesucrist naban leen leettsoon nal. Kona lee yalnaban kuu naban na nal, naban nay tak nyelaz'n Xgann Diox kuu nke leettsoo na ne nguth kwent da. ²¹ Nlazt'n tsow nataagt'n yalwen chaan Diox; per os por gon men diiz lo ley, tak gak men zha nali lo Diox, nlortsint nguth Jesucrist tsa.

3

Kwan mas nataak ley o yelaaz men Diox

¹ ¡Zha Gálatia, zha b xen! ¿Xomod mlaa goo mtsow b xen zha goo? Kwathoz nambi mndaa nee kwent lo goo, naa xomod nguth Jesucrist, leettsa mkeen zha Jesucrist lo kruz. ² Beeta koree nlaz'n kab goo lon: ¿Chu mkayaa goo Mbi Nayon chaan Diox, tak mbin goo diiz kuu nzhab lo ley chaan Moisés, o tak ngwalaaz goo Diiz Chul kuu mbin goo? ³ ¿Chebee kwathoz navez yek goo? Mndelo goo mndiy goo xnet Diox kon Mbi Nayon, ne lee nal nlaaz goo tsin goo lo Diox kon kuu nabee men yezlyu ree. ⁴ ¿Chu mlortsint re yalti kuu mriid goo kwent Diiz Chul? ¡Wene, os leey mlortsine lo goo! ⁵ Leettsa mndaa Diox Mbi Nayon ne mtsow Diox re kuu thoz lo goo, ¿chebee mtsow Diazhe? Mtsow Diazhe, tak ngwalaaz goo Diiz Chul kuu mbin goo, ne mtsowt Diazhe tak nzhon goo diiz kuu nabee ley.

⁶ Ngwalaaz Abraham Diox, ne tak ngwalaaz zha Diox kona mkayaa Diox zha taxal thib zha nali. [Gn. 15:6] ⁷ Kona ndoblo ne goo, lee re zha kuu nyelaaz Diox, re zha'a nak zha kuu wlipaak nak zha raz chaan Abraham. ⁸ Ne lo xkeets Diox nzhab, lee Diox kayaa re zha kuu nagt zha Israel taxal zha nali, tak nyelaaz zha Diox, kona desde ndala nzhab Diox diiz chul ree lo Abraham: "Por lu tsow'n kuu kwathoz wen lo re men kuu nzo dib naxta lo yezlyu". [Gn. 12:3] ⁹ Ne kona lee re zha kuu nyelaaz Diox, thibka nkayaa zha re kuu wen kon Abraham, zha kuu ngwalaaz Diox.

¹⁰ Reta zha kuu nyelaaz ley chaan Moisés nzob de dits zha, tak lo xkeets Diox nzhab: "Ngo de zha reta zha kuu ntsowt kuu nzhab lo ley". [Dt. 27:26] ¹¹ Ne noga nzhab lo xkeets Diox, neeka thib zha kayaat Diox zha taxal zha nali, tak nzhon zha diiz kuu nzhab lo ley chaan Moisés, taxal nzhab lo xkeets Diox: "Zha kuu nyelaaz Diox zha'a nak zha nali lo Diox". [Hab. 2:4] ¹² Per lee re zha kuu nyelaaz ley chaan Moisés nyelaaz zha Diox, tak lo xkeets Diox nzhab: "Lee zha kuu nzhon diiz lo ley chaan Moisés, ndoblo tsow zha reta kuu nzhab lo ley, tsa ban zha". [Lv. 18:5]

¹³ Jesucrist mtelaa'aa lo de chaan ley, tak mlode Diox Jesucrist por lee, tak lo xkeets Diox nzhab: "Zha de nak reta zha kuu

nkegaa nzhath lo thib ya". [Dt. 21:23]
¹⁴Koree ngok, tsa lee re kuu wen kuu nzhab Diox taa Diox lo Abraham, leey taa Diox lo reta zha kuu nyelaaz Jesucrist re zha kuu nagt zha Israel. Ne tabaa lee re'aa kuu nyelaaz Jesucrist, kayaa'aa Mbi Nayon kuu ne Diox taa Diox.

Ley ne kuu nzhab Diox taa Diox

¹⁵Re goo wets'n ne btan na, taxal lo men yezlyu ree nin lo goo: Leettsa lee thib zha ntsov thib trat ne mkee zha firm zha lo yeets, neeka thib zha gagt tuyye o kee tedib kwaa lo yeets. ¹⁶Leeka tata mtsow Diox trat kon Abraham ne lo raz chaan Abraham. Ne nzhabit lo xkeets Diox: "reta raz chaan Abraham". Sinke leey nzhab: "thibka raz", [Gn. 17:8] kuu nak Jesucrist. ¹⁷Lee kuu nin nak koree: Mtsowa Diox trat kon Abraham, ne nzhab Diox tetsov Diox kuu nzhab Diox, kona lee ley chaan Moisés, kuu myaad thap gayoo galbtsii liin bluz, gagt luzhe trata, ne neeka gagt tsow nataagte kuu nzhab Diox lo Abraham. ¹⁸Tak os lee kuu taa Diox lo'aa, gataa Dioxhe tak nzhonaa diiz lo ley, nagtraay thib kuu mne Diox taa Diox tabataa. Per tabataa taa Dioxhe tak tata nzhab Diox lo Abraham.

Chebee mndaa Diox ley

¹⁹Mbay, ¿par kwan nlortsin ley chaan Moisés tsa? Bluz mndaa Diox ley kuu mbyaal por falt re men. Ne mxeke asta leettsa mzin zha kuu nak "raz" kuu nzhab Diox yaad. Ne re mandad chaan Diox mndaa ley lo Moisés, ne lee Moisés ngok thib zha kuu mto Diox ndrol lo re men ne lo Diox. ²⁰Per leettsa nzhab Diox lo Abraham tsow Diox kuu wen lo Abraham, leeka Diox nzhabe lo Abraham, ne mndechet Diox thib zha kuu to ndrol, tak lee Diox thibka zha nak Diox.

²¹Mbay, ¿chu nin lee ley nzo kontr re kuu nzhab Diox tsow Diox? ¡Nagte tata! Sinke os lee ley gataa yalnaban, wlipaa gakayaa Diox re'aa taxal zha nali lo Diox, beeta por nzhonaa diiz kuu nabee ley. ²²Ne lee lo xkeets Diox nzhab, reta men taxal re zha kuu nzo tsib nak men por re falt men. Ne tabaa lee re zha kuu nyelaaz Jesucrist, kayaa zha kuu nzhab Diox taa Diox.

²³Per leettsa ter yaad Jesucrist, leettsa gagt yelaazaa Jesucrist, lee ley mkeno'aa taxal zha kuu nzo tsib, ne mlettaa mzin Crist, tsa yelaazaa Crist. ²⁴Kona nin, lee ley chaan Moisés mteteedaa taxal thib ndy-een lut, asta leettsa mzin Crist, tsa yelaazaa Crist ne tsa kayaa Diox re'aa taxal zha nali. ²⁵Per lee nal myadaa Jesucrist ne nyelaazaa lee Jesucrist, kona ndoblot raa teke'aa dits ley, ²⁶ne tak nyelaazaa Jesucrist, kona reta lee nakaa zhiinn Diox. ²⁷Ne leettsa ngokleyyaa, thibka ngokaa kon Jesucrist, ne

thibka noka Jesucrist taxal thib lar. ²⁸Ne nataagt raa naa chu zha Israel nak zha o nagt zha, zha Israel, naa chu mos nak zha o nagt zhay, naa chu mbyi zha o ngot zha; tak leettsa thibka ngokaa kon Jesucrist, thibka nakaa retalee. ²⁹Ne os lee'aa nakaa zha Jesucrist, noga nakaa zha raz chaan Abraham, ne re'aa nak kuu kayaa re kuu wen thoz kuu ne Diox taa Diox.

4

¹Kuu nlaz'n nin nak koree: Leettsa lee zha kuu kayaa herens bee lut zha, yewal nak zha kon mos zha, tegal lee zha nak bzhaan reta kwaa. ²Ne nap zha, zha kuu nkenap zha, zha kuu nabee reta chaan zha, asta tsaal zha liin kuu nzhab xut zha, tsaraa tak kayaa zha re chaan xut zha. ³Leeka tata ngokaa, leettsa bzhizhaa, mtsowaa reta kuu mloo re teyaa lo'aa. ⁴Per leettsa ngozhoob wiz kuu mli Diox, tsa mtaal Diox Xgann Diox, ne thib ngot ngop Xgann Diox; ne ngol zha taxal zha Israel, tsa gon zha diiz lo ley chaan Moisés. ⁵Ne kon ren Jesucrist mzhib Jesucrist re'aa kuu mtsow re kuu nabee ley, tsa gakaa zhiinn Diox. ⁶Ne tak naka lee zhiinn Diox, mtaal Diox Mbi Nayon chaan Xgann Diox leettsoo'aa; ne lee Mbi Nayon mbeze: "¡Pa!" lo Diox. ⁷Kona nal nakaa zhiinn Diox ne nagt raa lee mos. Ne tak nakaa zhiinn Diox, noga lee ndoblo'aa kayaa'aa re kuu wen kuu nzhab Diox taa Diox.

Paba nzhab ndoblot raa yelaaz men ley tedib welt

⁸Ndala, leettsa nlebeet goo Diox, ngok goo mos lo re diox kuu nagt Diox. ⁹Ne lee nal kuu nlebee'a goo Diox o mas wen nlebee'a Diox goo, ¿chebee nlaaz goo bre goo lo re kuu mloo re tey nee zha ndala, re kuu nataagt ne nlortsint, tsa gak goo mos lo re kona tedib welt? ¹⁰Tak ngotsowka goo re wiz, re mbee, re tyemp ne re liin kuu ndak goo nataak. ¹¹Ne nzeb'n, tak cha lee tsuin kuu mtsow'n lo goo lux.

¹²Lo re goo wets'n ne btan na, naab'n lo goo, gok goo taxal na, tak ngok'n taxal goo. Neeka thib kuu went mtsowt goo lon, ¹³ne ne'a goo ner, leettsa mndan kwent Diiz Chul lo goo, mtsow nay tak mlen liz'n. ¹⁴Ne lee yiz kuu mzhak'n ngok thib kuu nagan lo goo, ne tegal tatay mkayaa goo na. Ne taxal thib mandad chaan Diox ne taxal leeka Jesucrist mkayaa goo na. ¹⁵¿Ma re kuu naley ngoo leettsoo goo tsya? Ne nzon fabor goo kona nin, os garobey lo goo, asta ngutlo goo gagoo goo ne gataa gooy lon. ¹⁶Lee nal, ¿chu nak'n zha kuu nayii ne goo, tak'n niin kuu wli lo goo?

¹⁷Re zha kuu mbeze ndoblo ke goo seny chaan nee zha Israel, kwathoz ntsow zha xgab goo, per nagt xgab zha wen, tak lee kuu nlaaz zha nak kozhaa zha lee, tsa

thibka gak goo kon re zha. ¹⁸ Wli, wen ndoblo ya leettsoo men por tedib net zha, per ndoblo kuu wen tsow men xgab; ne gagee beeta leettsa ndon lo re goo. ¹⁹ Re goo kuu nak taxal zhiinn na, kwathoz ne leettsoon por re goo tedib welt, taxal thib ngot kuu mer gal zhiinn ne thibka gak ne leettsoon, asta leettsa lee Jesucrist thitanax nabee leettsoo goo. ²⁰ iWene os ndon lo goo nalar, tsa tak nin lo goo tedib mod, tak thitanax net'n naa kwan tsow'n xgab por goo!

Kuu nloo Sara ne Agar

²¹ Re goo kuu nlaaz gon diiz lo ley chaan Moisés, nlaz'n ne goo lon; ¿chu ter ne goo naa kwan nzhab lo ley? ²² Tenzhee nzhabe, lee Abraham mkeno chop xgann; thib xgann zha ngop mos zha lee tedib xgann zha ngop tsaal zha kuu nagt mos. ²³ Lee xgann zha kuu ngop mos, ngol zha taxal men yezlyu ree, per lee xgann zha kuu ngop tsaal zha kuu nagt mos, ngol tsa mrolo kuu nzhab Diox lo Abraham. ²⁴ Rop ngota nloo naa xomod nak rop trat kuu mtsow Diox lo re men: Reta zhiinn Agar nak mos, tak lee Agar ngok mos, taxal re zha kuu nyelaaz ley kuu mndaa Diox lo Moisés yek yií Sinaí. Ne reta zha'a, desde leettsa nzhal zha nak zha taxal mos. ²⁵ Ne lee Agar nak taxal yii Sinaí kuu nzi yezlyu Arabia, yi'a nak taxal Jerusalén nal, tak re zhiinnta re zha kuu nzo yez Jerusalén nak mos lo ley. ²⁶ Per lee yez Jerusalén kuu nzi yibaa, nak taxal xnaa retalee, zha kuu nagt mos lo ley. ²⁷ Tak lo xkeets Diox nzhab:

Naley bloo leettsoo'a ngot kuu mndaat Diox
mbet lo;
naley bloo leettsoo'a ne bzhiz, lu kuu nle-
beet yalne chaan thib ngot kuu nzhap
mbet.

Tak mas tyen zhiinn ngot thib nake ngot
kuu nap tsaa. [Is. 54:1]

²⁸ Re goo wets'n ne btan na, lee'aa nakaa taxal Isaac; zha kuu nzhab Diox taa Diox. ²⁹ Ne taxal ngoke tsya, tataka nake nal, lee zha kuu ngol taxal men yezlyu ree, mreke dits zha kuu ngol taxal nlaaz Mbi Nayon chaan Diox. ³⁰ Per, ¿kwan nzhab lo xkeets Diox? Leey nzhab: "Bloo mos ne zhiinn mos, tak gagt kiida chaana lo zhiinn tsaaala ne lo zhiinn mosa". [Gn. 21:10] ³¹ Kona nin lo re goo wets'n ne btan na, nagtaa zhiinn mos, lee'aa nak zhiinn zha kuu nagt mos.

5

Ndablo nali to'aa tak nagt raa lee mos

¹ Jesucrist mtelaa'aa lo ley, tsa gagt raa lee mos lo ley. Kona ndoblo nali to'aa lo re kuu nabee Jesucrist, ne ndoblot raa tsowaa re kuu nabee ley, tak lee ley nak taxal thib yug

kuu ne kuu nzob dits yenaa, kona ndoblot raa yelaaz releey tedib welt.

² Kenza goo. Na Paba, nin lo goo, os lee goo ke goo seny chaan nee zha Israel, nataagt Jesucrist lo goo tsa. ³ Ne tedib welt bren nin lo re zha kuu nlaaz ke seny chaan re nee, ndoblo zha tsow zha reta kuu nabee ley chaan Moisés. ⁴ Re goo kuu nlaaz goo kayaa Diox goo taxal zha nali, tak nzhon goo diiz kuu nzhab lo ley chaan Moisés, thitanax mbeche goo lo Jesucrist ne mlaa goo yalwen chaan Diox. ⁵ Per lee'aa nyelaazzaa Diox por Mbi Nayon chaan Diox, ne ngebetaa kayaa Diox re'aa taxal zha nali lo Diox. ⁶ Ne os thibka nakaa kon Jesucrist, nataagt ke'a seny o ketaa seny. Kuu nataak nak nyelaazzaa Jesucrist kona nke leettsoo'aa tabenaa.

⁷ Kwathoza wen nda goo. Ne, ¿cho mtsow mlaa goo mbint raa goo diiz lo Diiz Chul kuu wli? ⁸ Ne leet Diox kuu mrez goo, mtsow mbint raa goo diiz. ⁹ Tak, "lут lebadur ntsow nyezhoob dita koob". ¹⁰ Per lee na nen lee Zha Nabee tsow tseet goo xgab goo, per lee re zha kuu ntsow nzhak chop xgab goo, loka cho zhay, wlipaa teteti Diox zha.

¹¹ Re goo wets'n ne btan na, osleen bee ndan kwent ne mbezz'n, ndoblo ke re men seny chaan nee zha Israel, osleen tata nget-sow'n nal, ndoblot reke re zha Israel dits'n, ne lee kwent kuu mke Jesucrist lo kruz gatowte lo re zha'a. ¹² Re zha kuu ndiy ntsee xgab goo, imalaay thitanax gatsow kapon zha re zha'a!

¹³ Kuu nin lo re goo wets'n ne btan na nak, Diox mrez goo tsa yelaazt raa goo ley ne tsa gagt raa goo mos. Ne nagt tak nagt raa goo mos, tsa tak tsow goo reta kuu nlaaz kwerp goo, nagte tata. Sinke mas wen bke leettsoo goo thib goo ne tedib goo ne btsow goo ayud altaa goo. ¹⁴ Tak dita ley tak tsowaa kuu nabee yon diiz ree: "Bke leettsoo'a tabena taxal nke leettsoo'a leeka lu". [Lv. 19:18] ¹⁵ Per os lee goo nkwaan goo diiz ne nlooz altaa goo, wii goo cha leeka re goo ngeliuux goo goo.

Kuu ntsow kwerp yezlyu ree ne kuu ntsow Mbi Nayon

¹⁶ Kuu nin lo goo nak: Tsowaa kuu nlaaz Mbi Nayon chaan Diox ne tsowtaa re kuu went kuu nlaaz kwerpaa. ¹⁷ Tak lee re kuu went kuu nlaaz kwerp nayii ne re kuu wen kuu nlaaz Mbi Nayon, ne lee re kuu nlaaz Mbi Nayon nayii ne re kuu nlaaz kwerp. Ne nayii thibe ne tedibe, kona gagt tsowaa kuu wen kuu nlaazzaa. ¹⁸ Ne os lee Mbi Nayon Nabee leettsoo'aa, nabeet raa ley lo'aa.

¹⁹ Ne nlo re kuu went, kuu ntsow re zha kuu ntsow kuu nlaaz kwerp:
nzhak rop zha kon ndota zha,
nzhak rop zha kon tyen zha,

ntsow zha re kuu yu kuu nlaaz kwerp zha,
²⁰ nyelaaz zha re diox re men yezlyu ree,
 nya zha lo wez,
 nayii zha ne zha taben zha,
 nkwaan zha zhoo,
 ndablaaz zha keno zha chaan taben zha,
 por ndota kwaa nkezhyan zha,
 ntsalzhoor zha men,
 ntsow zha nzhak rol re men,
 nloo zha re leyv kuu wlit,
²¹ went nzhak leettsoo zha ne zha tedib net
 zha,
 zha gwiy zha,
 nya zha lo ani ta nzhowcho zha ta ntsow zha
 reta kuu nlaaz kwerp zha,
 ne ntsow zha tedib net re kuu went taxal re
 koree.

Ne bren nin lo goo tedib welt, taxal mni'a na
 lo goo ner, lee re zha kuu ntsow re koree,
 tabt zha yibaa ta nabee Diox.

²² Per lee re kuu ntsow Mbi Nayon
 leettsoo zha nak:
 nke leettsoo zha taben zha,
 naley nzo leettsoo zha,
 wen nzi zha kon Diox,
 nxek leettsoo zha reta kwaa,
 nabitz zha,
 wen nak zha,
 thib nyelaaz zha Diox,
²³ nadoo nak zha,
 ne nabee zha lo kwerp zha, tsa tsowt zha
 kuu nlaaz kwerp zha.

Neeka thib ley gagt ne lee re koree went
 nak.²⁴ Ne lee re zha kuu nak zha Jesucrist,
 ntsowt raa zha re kuu nlaaz kwerp zha,
 tak mke'a zhay lo kruz kon Jesucrist, ne
 leey nak mod nguth zha lo re kuu yezlyu
 ree.²⁵ Ne os lee'aa nabanaa por Mbi Nayon
 chaan Diox, ndoblo laa'aa nabee Mbi Nayon
 leettsoo'aa.

²⁶ Ndoblot rubaa, neeka keetaa zhyan
 leettsoo altaa'aa, ne neeka ndoblot went yo
 leettsoo'aa ne'aa altaa'aa.

6

Ndoblo tsow goo ayud altaa goo

¹ Re goo wets'n ne btan na, os lee goo
 ne goo lee thib goo mtsow thib kuu went,
 tsa lee re goo kuu naban taxal nlaaz Mbi
 Nayon, ndoblo tsow goo ayud zha'a, par
 tsow zha kuu wen; per ndoblo tsow gooy
 thib mod nadoo. Ne bkenap goo goo, tak
 cha no goo ngetsov kuu went kuu mtsow
 zha.² Btsow goo ayud altaa goo, leettsa
 ndriid goo yalti, ne tata mod ngetsov goo
 kuu nabee Jesucrist.

³ Tak leettsa lee thib zha ndak zha
 kwathoz nataak zha, leettsa yent kwan nak
 zha, leeka lee zha nkedi zha zha.⁴ Kadta
 thib zha ndoblo wii zha naa kwan ntsow
 zha, ne wen ley zha leettsa ne zha ngetsov
 zha kuu wen, ne ndoblot wii zha kuu ntsow

tedib net zha.⁵ Tak kadta thib zha ndoblo
 tsow zha kuu mndaan Diox tsow zha.

⁶ Lee re zha kuu ngeteed xkiiz Diox,
 ndoblo tsow zha ayud maestr zha.

⁷ Kedit goo leeka goo, neeka thib zha gagt
 kithno Diox. Tak kuu nzhann men leeka
 kona thop men.⁸ Lee zha kuu ntsow kuu
 went kuu nlaaz kwerp, lo kona tsow zha'a
 gan yalguth. Per lee zha kuu ntsow kuu
 nlaaz Mbi Nayon, tetsow zha'a gan yalna-
 ban kuu thitanax.⁹ Kona ndoblot yetsayaa
 tsowaa kuu wen, tak os lee'aa yetsayaa,
 tsa thopaa yalgonnaa, leettsa tsin wiz kuu
 dope.¹⁰ Kona, kadta leettsa take lo'aa,
 ndoblo wen tsowaa lo reta men, per ner lo
 re wetsaa ne lo re btanaa kuu nyelaaz Jesús
 ndoblo tsowaa kuu wen.

Nley Paba kwent mke Jesucrist lo kruz

¹¹ ¡Wii goo naa xa na re letr nabii ree
 ngekeen loo goo kon mer yaan!¹² Lee re
 zha kuu nlaaz ke goo seny chaan nee zha
 Israel, ntsow zhay, tak nlaaz zha wen yaan
 zha kon re men ne tsa reket re men dits
 zha, kwent mke Jesucrist lo kruz.¹³ Ne
 neeka re zha kuu mke seny chaan re nee
 ntsowt zha re kuu nabee ley. Per nlaaz zha
 ke re goo seny, tsa tak rub zha tak mtsow
 zha mke goo seny.¹⁴ Per lee na nlazt'n
 ley'n por neeka thib kwaa, beeta kuu
 nley'n nak mke Jesucrist Zha Nabee lo'aa lo
 kruz. Ne tak mke Jesucrist lo kruz, kona
 nguth re kuu yezlyu ree lon ne lee na
 nguth'n lo re kuu yezlyu ree.¹⁵ Tak nataagt
 ke zha seny o ket zha seny chaan nee zha
 Israel, kuu nataak nak gak zha thib zha
 kub lo Jesucrist.¹⁶ Ne reta goo kuu nzhon
 diiz koree, nlaz'n wen kwin goo, ne nlaz'n
 lat leettsoo Diox ne Diox goo, tak re goo nak
 zha kuu wlipaa nak zha Israel kuu nak yez
 chaan Diox.

¹⁷ Desde naltserree nlazt raa na lee tedib
 goo kee zhyan leettsoon, tak nkeka re btig
 kwerp da, kuu nloo lee na nak'n mos chaan
 Jesucrist.

¹⁸ Re goo wets'n ne btan na, nlaz'n lee
 Jesucrist Zha Nabee lo'aa, taa reta yalwen
 chaan lo goo.
 ¡Tbaa gake!
 Paba

Yeets kuu mkee Paba lo re zha yez

Éfeso

Paba mni "diox"

¹ Na Paba, nak'n apóstl chaan Jesucrist, tak tabaa nlaaz Diox. Ngekeen yeets ree lo re goo zha yez Éfeso, kuu nak zha Diox ne nyelaaz Jesucrist. ² Nlaz'n lee Diox kuu nak Xutaa ne Jesucrist Zha Nabee lo'aa, taa yalwen chaan lo re goo ne tsow wen kwin goo.

Re kuu wen kuu nkayaa'aa tak nyelaazzaa Jesucrist

³ Texkix Diox kuu nak Xutaa ne Xut Jesucrist, Zha Nabee lo'aa, tak mndaa Diox re chaan Diox kuu kwathoz wen lo'aa, re kuu yibaa, tsa gakaa zha Diox, por kuu mtsow Jesucrist. ⁴ Diox mli'aa leettsa terka texkwaa Diox yezlyu, tsa gakaa zha Diox ne tsa gakaa zha nambi lo Diox. ⁵ Ne tak nke leettsoo Diox re'aa, kona mli Diox re'aa, tsa gakaa zhiinn Diox, por kuu mtsow Jesucrist taxal nlaaz Diox. ⁶ Kona thibka ndoblo golaa lo Diox, tak kwathoz wen nak Diox ne nke leettsoo Diox re'aa; kona mndaa Diox re kuu kwathoz wen lo'aa ne por Xgann Diox Jesucrist mndaa Diox re koree lo'aa. ⁷ Leettsa nguth Jesucrist mzhii Jesucrist re'aa, tsa gakaa zha Jesucrist, ne mtuyy Jesucrist re faltaa, tak nke leettsoo Jesucrist re'aa. ⁸ Ne mloo Jesucrist nke leettsoo Jesucrist re'aa, kona mndaa Jesucrist yalnzaak lo'aa, tsa yena re kuu nlaaz Diox, ⁹ ne mloo Diox re kuu nlaaz Diox lo'aa, re kuu ngoo gaats ndala, ne por yalwen chaan Diox mtsow Diox xgab mtaal Diox Jesucrist lo yezlyu ree. ¹⁰ Leettsa tsin wiz kuu mtsowa Diox xgab tsa kaltaa Diox reta kwa, ne lee Jesucrist nabee lo reta kwa kuu nzi lo yezlyu ree ne lo reta kwa kuu nzi yibaa.

¹¹ Desde ndala mli Diox re'aa, tsa kayaa'aa re kuu kwathoz wen lo Diox, por kuu mtsow Jesucrist, taxal mtsowa Diox xgab tsow Diozhe; ne reta kuu ntsow Diox taxal nlaaz Diox, ¹² ne lee re nee kuu ngwalaaz Jesucrist ner, ndoblo ban nee taxal nlaaz Diox, tsa gol reta men lo Diox. ¹³ Ne leettsa mbin goo Diiz Chul chaan Jesucrist, kuu nak kuu wli ne ndaa yalnaban, ne leettsa ngwalaaz goo Jesucrist, tsa mkayaa goo Mbi Nayon leen leettsoo, Mbi Nayon kuu nzhab Diox taal Diox. ¹⁴ Ne mndaa Diox Mbi nayon lo'aa, tsa ne'aa wli tetaa Diox kuu ne Diox taa Diox lo'aa, asta leettsa yelo koo Diox re'aa lo yezlyu ree; ne golaa lo Diox tak kwathoz wen nak Diox.

Paba mnaab lo Diox por re zha kuu nyelaaz Jesucrist

¹⁵ Ne tak nen nyelaaz goo Jesucrist, ne nke leettsoo goo re zha Jesú kuu nali nak lo Diox, ¹⁶ kona kwathoz ndan texkix lo Diox por re goo or nteth'n goo, leettsa nedidz'n lo Diox. ¹⁷ Tsa lee Diox kuu nak Xutaa ne Xut Jesucrist, taa yalnzaak kuu ndyaad yibaa lo re goo, tsa tak yen goo re kwaan ne tsa masraa lebee goo Diox. ¹⁸ Naab'n lo Diox tsa yaxni yek goo, tsa yen goo naa kwan ngebet goo kayaa goo, ne chebee mrez Diox goo, ne tsa ne goo naa kwan nak re kuu kwathoz wen, kuu taa Diox lo re zha kuu nali nak lo Diox. ¹⁹ Ne tsa yen goo beeta lee Diox kwathoz ney ne naro nak Diox, kona ntsow Diox re kuu kwathoz wen lo'aa, zha kuu nyelaaz Jesucrist. Ne mloo Diox yalney ree, ²⁰ leettsa mteroban Diox Jesucrist, ne mtsow Diox mndob Jesucrist lad ban lo Diox yibaa. ²¹ Ne mto Diox Jesucrist, tsa nabee Jesucrist lo reta yalney, lo reta yalnabee, lo reta zha kuu nabee, lo reta zha nataak, ne lo reta kuu nyath nzo nal ne kuu yo bluz. ²² Ne Diox mloo reta kwa lazya Jesucrist, tsa nabee Jesucrist lo reta kwa, noga mto Diox Jesucrist, tsa nabee Jesucrist lo reta zha kuu nyelaaz Jesucrist. ²³ Tak reta zha kuu nyelaaz Jesucrist nak taxal kwerp chaan Jesucrist, ne lee Jesucrist nabee lo re zha kuu nak zha Jesucrist, ne leeka tata, lee Jesucrist thitanax nabee lo reta kwa. Lee Jesucrist ntsow wen nzo leettsoo re zha kuu nyelaaz Jesucrist.

2

Diox mndaaya lnanban kuu thitanax lo'aa

¹ Diox mndaa yalnaban lo'aa, leettsa ngokaa taxal zha nguth, tak mtsowaa re kuu went, ² kuu mtsow re men yezlyu ree, mtsowaa kuu nlaaz Maxuu kuu nabee lo reta mbi fyer, kuu ngoo ney leettsoo re zha kuu nzhort diiz lo Diox. ³ Ne leeka tata mbanaa ndala, mtsowaa ndota kuu went, mtsowaa reta kuu nlaaz kwerpaa ne re kuu mtsowaa xgab. Kona ndoblo gateti Diox re'aa, taxal tedib net re zha'a. ⁴ Per lee Diox kwathoz wen nak Diox, mlat leettsoo Diox mne Diox re'aa ne kwathoz nke leettsoo Diox re'aa, ⁵ kona thibka mndaa Diox yalnaban lo'aa kon Jesucrist, leettsa bee nakaa lee taxal zha nguth, tak mtsowaa re kuu went. Por yalwen chaan Diox mtelaa Diox re'aa gabil ne mndaa Diox yalnaban lo'aa. ⁶ Ne leettsa mteroban Diox Jesucrist noga lee mteroban Diox tsya, ne thibka mto Diox re'aa yibaa kon Jesucrist. ⁷ Mtsow Diox koree, tsa loo Diox nke leettsoo Diox re'aa ne loo Diox yalwen chaan Diox lo'aa, re wiz bluz ree, tak nyelaazzaa Jesucrist. ⁸ Ne tak nke leettsoo Diox re'aa, kona mndaa Diox

yalnaban kuu thitanax lo'aa, tak nyelaazaa Jesucrist. Ne nagte thib kuu lee'aa mtsow gan, sinke leey nak thib kuu nataak kuu tabaata mndelaaz Diox lo'aa. ⁹ Nagte kuu mtsowaa gan por re kuu wen kuu ntsowaa, kona neeka thibaa ndoblot rubaa por kuu ntsowaa. ¹⁰ Tak Diox nak kuu mdexkwaa'aa, ne mndaa Diox yahnaban kub lo'aa por Jesucrist, tsa tsowaa kuu wen, taxal mtsowa Diox xgab.

Jesucrist mtsow thibka nakaa

¹¹ Ne nithlaazt goo kuu ngok goo ndala, re goo kuu nagt zha Israel. Lee re nee zha kuu nak zha Israel nke nee seny kuu nak chaan nee ne mbezz nee: "Nee nak zha kuu nke seny", ne mbezzga nee: "Lee goo nak zha kuu nketa seny". ¹² Btelaazt goo, ndala ndot goo kon Jesucrist ne titi nzi goo lo re nee kuu nak zha Israel, ne neeka mlebeet goo ne neeka mnet goo naa xomod nak trat kuu mtsow Diox lo re nee zha kuu nak zha Israel, tabaata mrin goo lo yezlyu ree, neeka thib kuu ngebeta goo kayaa goo lo Diox tsya, tak neeka mlebeet goo Diox tsya. ¹³ Per lee nal, lee re goo kuu mrin titi lo Diox ndala, gax nzi goo lo Diox nal, por ren kuu mxo Jesucrist. ¹⁴ Jesucrist nak kuu ntsow wen nzi'aa ne mtsow Jesucrist lee re nee zha kuu nak zha Israel ne re goo kuu nagt zha Israel, gak thibka yez, leettsa mluux Jesucrist bla kuu mtsow chop net re men, bla kuu mtow lo'aa ne mtsow nayii'aa ne'aa altaa'aa. ¹⁵ Ne leettsa nguth Jesucrist, tsa mtsow Diox nabeet raa ley kuu mndaa Diox lo Moisés lo'aa, ley kuu mnabee lo re nee zha Israel; ne mtsow Diox tsa lee rop netaa ngok thibka yez lo Diox, tata mtsow Diox tsa wen kwinaa. ¹⁶ Ne tak mke Jesucrist lo kruz, mtsow Jesucrist wen mriinnaa kon Diox ne mluux Jesucrist zhoo kuu ngoo lo re'aa, tsa ngokaa thibka kwerp lo Diox.

¹⁷ Ne leettsa myaad Jesucrist mndaa Jesucrist kwent chaan Diiz Chul, tsa wen kwin re goo kuu titi mndo lo Diox ne re nee zha Israel kuu gax mndo lo Diox. ¹⁸ Ne por Jesucrist, thibaa ne tedibaa tak bigaa lo Xutaa Diox por thibka Mbi Nayon. ¹⁹ Kona nagt raa goo zha titi, ne nzit raa goo ta nagt laz goo, sinke thibka nak goo kon reta zha Diox, ne nak goo zhiinn Diox. ²⁰ Ne lee re'aa nak taxal thib gwodoo kuu ngetekwaa, dits simyent kuu mtob re apóstol chaan Jesucrist ne re profet, ne lee Jesucrist nak taxal ke kuu ndob skin gwodoo. ²¹ Ne dits ke simyent kuu nak Jesucrist, ngeya dita gwodoo taxal nlaaz Diox, tsa gake thib gwodoo nambi ne nayon lo Zha Nabee. ²² Taxal thib gwodoo nakaa, tak thibka nakaa kon Jesucrist, tsa gakaa taxal thib yuu ta yo Mbi Nayon chaan Diox.

Diox mtaal Paba tsa taa Paba kwent lo re zha kuu nagt zha Israel

¹ Lee na Paba, nzon tsib tak mndan kwent chaan Jesucrist lo goo, zha kuu nagt zha Israel. ² Ne ne'a goo lee Diox por yalwen chaan Diox, mndaa Diox tsin ree tsow'n lo re goo, taxal mtsowa Diox xgab. ³ Diox mlloo lon ne mtsow Diox myen na re xgab chaan Diox kuu ngoo gaats, taxal mnda'a na kwente lo goo ner. ⁴ Leettsa lab goo koree, tsa yen goo lee na nlebeen re chaan Jesucrist kuu ngoo gaats, ⁵ leey nak thib kuu mndaat Diox diiz galebee neeka thib mene ndala, per lee nal mlloo Diozhe kon Mbi Nayon chaan Diox, lo reta nee kuu nak apóstol chaan Jesucrist ne lo re profet. ⁶ Lee kuu ngoo gaats ndala nak koree: Lee Diiz Chul ntsow tsa lee re zha kuu nagt zha Israel, no zha kayaa re kuu kwathoz wen kuu kayaa re nee zha Israel ne nal thibka kwerp nakaa, ne retalee kayaa kuu ne Diox taa Diox por Jesucrist.

⁷ Ne por yalwen chaan Diox mndaa Diox tsin ree tsow'n, kuu nak tan kwent Diiz Chul chaan Jesucrist, ndoblot nay; per kon yalney chaan Diox mtsow Diozhe. ⁸ Ne na nak thib zha kuu mas nataagt lo re zha kuu nak zha yez chaan Diox; per por yalwen chaan Diox mndaa Diox tsin ree tsow'n, kuu nak tan kwent Diiz Chul chaan Jesucrist lo re zha kuu nagt zha Israel. ⁹ Ne Diox kuu mdexkwaa reta kwaaw mtaal'n, tsa lon naa xomod nak re kuu ngoo gaats ndala. ¹⁰ Tata ngoke, tsa por re zha kuu nyelaaz Jesucrist loo yalnzaak chaan Diox lo re mbi kuu ney ne lo re mbi kuu nabee kuu nzo lobe. ¹¹ Ne desde ndala mtsowa Diox xgab naa kwan tsow Diox kon Jesucrist Zha Nabee lo re'aa. ¹² Ne tak nakaa zha Jesucrist, tak bigaa lo Diox kon dib ndroo leettsoo'aa, tak nyelaazaa Jesucrist. ¹³ Kona naab'n lo goo, yat leettsoo goo, tak ndaktin nzon tsib, sinke ndoblo ley goo por koree.

Paba mnaab lo Diox por re zha yez Éfeso

¹⁴ Ne kwent ree ntobxub'n ne ndediz'n lo Xutaa Diox ne Xut Jesucrist, ¹⁵ zha kuu napaa le lo yezlyu ree ne noga re zha kuu nzo yibaa nap le zha. ¹⁶ Naab'n lo Xutaa Diox, tsa loo Diox re kuu kwathoz wen lo goo re kuu nap Diox, ne naab'n lo Diox tsa koney Diox leettsoo goo, tsa ney to goo lo Diox por Mbi Nayon chaan Diox, ¹⁷ tsa lee Jesucrist ban leen leettsoo goo tak nyelaaz goo Jesucrist. Noga naab'n ke leettsoo goo altaa goo tsa ney to goo, taxal thib ya kuu naats nzo lozh. ¹⁸ Tsa tak yen goo kon reta zha kuu nyelaaz Jesús kuu nali ndo lo Diox, xa kwathoz nke leettsoo Jesucrist re'aa. ¹⁹ Ne naab'n lo Diox, tsa lebee goo yalnkelaaz chaan Jesucrist, yalnkelaaz thoz

kuu gагt ni men kon diiz ne kuu gагt yen re men, ne naab'n lo Diox tsa thitanax gak goo zha Diox ne thitanax lebee goo Diox.

²⁰ Ne lee nal, taa'aa texkix lo Diox, tak lee Diox nzhaak ntsow reta kwaa, ne tak tsow Diox masraa kuu naabaa lo Diox, ne tak tsow Diox masraa kuu ntsowaa xgab naabaa lo Diox, kon yalney chaan Diox kuu nke tsii leettsoo'a. ²¹ Reta zha kuu nyelaaz Jesu Crist ndoblo gol zha lo Diox, nal ne reta wiz, por kuu mtsow Jesu Crist! Tata gake.

4

Mbi Nayon ntsow thibka nakaa

¹ Nzon tsib tak ntsow'n rtsin Zha Nabee, kona naab'n lo goo; ban goo taxal ndoblo ban re zha kuu mrez Diox, ne re goo nak zha'a.

² Rubt goo,
nadoo goo goo,
gok goo zha legal,
ne bxek leettsoo goo ne goo thib goo ne tedib
goo kon yalnkelaaz.

³ Thibka gok goo re goo, laa goo nabee
Mbi Nayon leettsoo goo, tsa wen kwin
goo.

⁴ Taxal nzo thibka kwerp, ne thibka Mbi Nayon, leeka tata thibka kuu ngebet re'aa kuu mrez Diox. ⁵ Nzo thibka Zha Nabee, ne thibka zha kuu nyelaazza, ne thibka welt nzhab leyayaa kon le zha, ⁶ ne thibka Diox kuu nak Xut retalee nzo; lee Diox nabee reta kwaa, nabee Diox lo retalee ne reta ta ndo Diox.

⁷ Lo kadta thibaa mndaa Diox yalwen chaan Diox, ne mkayaa'aa kuu nataak kuu mndelaaz Jesu Crist lo'aa taxal nlaaz Jesu Crist. ⁸ Taxal nzhab lo xkeets Diox:
Leettsa mretab zha yibaa,
mloo zha lee zha mtsow gan lo re zha kuu
nayii ne zha,
ne mndelaaz zha kuu nataak lo re men. [Sal.
68:18]

⁹ ¿Ne kwan nak kuu nzhabee: "Nguxoob zha yibaa"? Lee koree nak, mla Jesu Crist ta mas naats leen yezlyu. ¹⁰ Ne leeka zha kuu mla leen yezlyu, leeka lee zha nguxoob ta mas ya yibaa, tsa nabee zha lo reta kwaa. ¹¹ Ne leeka lee zha mndelaaz re kuu nataak lo re zha zha.

Lo thib net zha mndelaaz zha gak zha apóstl, lo tedib net zha mndelaaz zha gak zha profet,
lo tedib net zha mndelaaz zha taa zha kwent
Diiz Chul,
lo tedib net zha mndelaaz zha gak zha, zha
kuu kenap re zha kuu nyelaaz Jesu Crist,
ne lee lo tedib net zha mndelaaz zha gak zha
maestr kuu loo xkiiz Diox.

¹² Tbaa mtetede Jesu Crist re zha Jesu Crist, tsa tsow zha kuu nabee Jesu Crist, tsa masraa gak tyen re zha Jesu Crist, ¹³ ne tsa thibka gakaa re'aa tak nyelaazza Jesu Crist ne tsa yelo lebee'aa Xgann Diox, tsa gakaa zha ngobee ne thitanax nabee Jesu Crist leettsoo'a. ¹⁴ Mtetede Diox re'aa, tsa gagg raa lee taxal ndyeeen bzhizh kuu neyt. Ndoblots yelaazza xkiiz re zha kuu ndyaaad nked, re zha kuu nlaaz luuzhaz; tsa teno zha lee net went. ¹⁵ Sinke ndoblo tsowaa kuu wli ne ke leettsoo altaa'aa, ne ndoblo kobe'aa lo reta kuu tsowaa taxal nlaaz Jesu Crist Zha Nabee lo'aa. ¹⁶ Lee re'aa Jesu Crist Zha Nabee lo'aa, nakaa taxal thib kwerp kuu wen nayaal reta ta. Ne leettsa retalee wen nke'aa tsii ne tsowaa ayud altaa'aa, masraa nteeda, tsa masraa nali to'aa lo Diox ne ke leettsoo'a thibaa ne tedibaa taxal nlaaz Diox.

Yalnaban kub kuu nap re zha kuu nyelaaz Jesu Crist

¹⁷ Koree nin lo goo kon yalnabee chaan Zha Nabee: Ndoblots raa ban goo taxal re zha kuu nyelaazt Diox, re zha kuu ntsow re kuu naxen kuu nzo yek zha, ¹⁸ thitanax mckow yek re zha, ne napt zha yalnaban kuu ndaa Diox, tak ngobet zha ne tak nad leettsoo zha, kona nlebeet zha naa xomod nak Diox. ¹⁹ Thitanax nthoyt raa zha, kona ntsow zha reta kuu yu kuu nlaaz kwerp zha, thitanax ndablaaz zha ntsow zha reta kuu went. ²⁰ Per leettsa mteed goo re kuu mloo Jesu Crist, mteed goo kuu tata. ²¹ Os lee goo wli mbin goo kwent chaan Jesu Crist ne mteed goo kuu wli kuu nak chaan Jesu Crist, ndoblots ban goo tata. ²² Sinke blaagoo mod went kuu mban goo ndala, re xgab kuu thitanax went kuu ntetsaa men ne nked men. ²³ Ndoblots see'aa mod kuu ntsowaa xgab, ²⁴ tsa gakaa zha kub taxal nlaaz Diox, ne tsa gakaa zha nali ne zha nambi lo Jesu Crist taxal nak kuu wli.

²⁵ Kona ndoblots raa kedi'aa, ndoblo ni'aa kuu wli lo tabenaa, tak retalee nakaa taxal thibka kwerp.

²⁶ Os lee goo yii goo, per tsowt goo kuu went, ndoblots yii goo dita wiz, ²⁷ ne taat goo diiz lo Maxuy.

²⁸ Lee zha kuu nlowann, ndoblots raa lowann zha, sinke ndoblots ke zha tsii kon yaa zha, tsa keno zha kuu talaaz zha lo re zha kuu wlipaa ndeche kwaa.

²⁹ Ne niitaa re diiz went, beeta diiz wen ndoblo ni'aa, re diiz kuu tsow ayud re zha kuu gone, tsa masraa ney to zha lo Diox. ³⁰ Ndoblots tsowaa yo nabil leettsoo Mbi Nayon chaan Diox, tak mndaa Diox Mbi Nayon lo'aa, tsa ne'aa wlipaa nakaa zha Diox, asta wiz kuu taa Diox yalnaban kuu thitanax lo re'aa.

³¹ Kona bla goo:
re kuu went,
re zhyan,
re yalnayii,
kwezt goo,
tsalzhoott goo men
ne neeka kot goo zhyan leettsoo goo.
³² Sinke ndoblo gak goo:
zha wen,
zha nlat leettsoo ne taben,
ndoblo tsow goo perdon lo taben goo, taxal
mtuuuy Diox reta kuu went kuu mtsow
goo lo Diox, por kuu mtsow Jesu-
crist.

5

Xomod ndoblo ban re zha kuu nak zhiinn Diox

¹ Tak nakaa zhiinn Diox ne tak nke
leettsoo Diox re'aa, kona ndoblo banaa
taxal nlaaz Diox. ² Ndoblo ke leettsoo'aa
tabenaa, taxal mke leettsoo Jesucrist re'aa,
tak leeka lee Jesucrist mndaa Jesucrist lo
Diox, taxal thib maa gon kuu ndaa zha lo
Diox, ne nak Jesucrist thib tsi kuu nyow
leettsoo Diox.

³ Kona retalee kuu nak zha yez chaan
Diox, zha kuu nali ndo nyelaaz Diox, neeka
ndoblot tethaa:
kuu nzhak rop zha kon ndota zha,
neeka tethtaa tedib net re kuu went,
neeka re yaltablaaz.

⁴ Neeka ndoblot tedizaa re diiz kuu went,
neeka ndoblot tedizaa re diiz bxn,
neeka ndoblot tedizaa re diiz rax; mas wen
ndoblo taa'aa texkix lo Diox.

⁵ Tak ne'a lee loka zha kuu:
nzhak rop kon ndota zha,
o zha kuu ntsow re kuu nambit,
o zha kuu ndablazz,
ne zha kuu nyelaaz re diox kuu nagt Diox,
tabt zha Ta Nabee Jesucrist ne Diox. ⁶ Ne
laataa kedi zha lee kon diiz bxn, tak dits
reta zha kuu ntsow re koree la yalnayii
chaan Diox, tak nzhont zha diiz lo Diox.
⁷ Kona ndoblot tsaal leettsoo goo kon re zha
kuu ntsow re kuu wenta.

⁸ Tak ndala ngoo'aa lo yalkow, ne lee nal
nzi'aa lee lo xni chaan Zha Nabee, kona
ndoblo tsowaa taxal ntsow re zha kuu nzi lo
xni, ⁹ ne tak nzi'aa lo xni kona:
ndoblo gakaa zha wen,
ndoblo nali to'aa lo Diox,
ne ndoblo tedizaa kuu wli.

¹⁰ Ne thibka ndoblo tsow goo kuu nyow
leettsoo Zha Nabee. ¹¹ Ne tsowt goo re
kuu nlortsint, kuu ntsow re zha kuu nzi
lo yalkow na; mas wen btaa goo kwente,
tsa yen re men naa xomod nake. ¹² Tak
kwathoz nathoy tediz men re kuu ntsow
zha xgaatsta;¹³ per leettsa lee reta kuu went
roo lo xni, retay nambita nlooy, tak xni

ntsow nloo retay. ¹⁴ Kona nzhab lo xkeets
Diox:
Bloo mkaal lo'a, tak lu nak taxal thib zha
kuu naxat;
gwache xid re zha nguth,
ne lee Jesucrist tsow yaxni yeka.

¹⁵ Kona ndoblo wii'aa naa kwan tsowaa,
ndoblot banaa taxal re zha kuu nayez
yek, sinke ndoblo banaa taxal zha kuu
nzhak. ¹⁶ Reta wiz ndoblo tsowaa kuu
wen, tak thitanax went nak re wiz ree.

¹⁷ Kona ndoblot gakaa zha nayez yek, sinke
ndoblo yena naa kwan nlaaz Zha Nabee
tsowaa. ¹⁸ Natuztaa, tak koree ntsow nlu-
uzhaha leeka lee'aa, mas wen ndoblo laa'aa
nabee Mbi Nayon leettsoo'aa. ¹⁹ Ne mas
wen tedizaa lo thibaa ne lo tedibaa, naa
xa xom leettsoo'aa lo thibaa ne lo tedibaa,

*Kuu ndoblo tsow re zha kuu nyelaaz
Jesu's lize*

²¹ Retalee ndoblo ten'aa thibaa ne ted-
ibaa, tak nzhonaa diiz lo Jesucrist.

²² Re ngot ndoblo gon ngot diiz lo tsaal
ngot, taxal lo Zha Nabee. ²³ Tak lee mbyi
nak kuu nabee lo ngot, leeka taxal nabee
Jesucrist lo re zha Jesucrist. Tak lee Jesucrist
mtelaa'aa lo yalguth, ne lee re'aa nak taxal
kwerp chaan Jesucrist. ²⁴ Taxal nzhon re
zha Jesus diiz lo Jesus, leeka tata ndoblo gon
re ngot diiz lo tsaal ngot lo reta kwaaw.

²⁵ Lee re mbyi ndoblo ke leettsoo mbyi
tsaal mbyi, leeka taxal mke leettsoo Jesu-
crist re zha Jesucrist, tak leeka lee Jesucrist
mndaa Jesucrist nguth por re zha Jesucrist,

²⁶ mtsow Jesucrist koree par mloo zhaa Je-
sucrist re zha Jesucrist, ne mtsow nambi
Jesucrist re zha leen nit por xkiiz Diox.

²⁷ Tata mtsow Jesucrist, tsa lee re zha kuu
nyelaaz Jesucrist, re zha kuu nak gwodoor
chaan Jesucrist, gak zha, zha nambi, zha
nayon ne zha nali lo Jesucrist. ²⁸ Ndoblo ke
leettsoo mbyi tsaal mbyi, taxal nke leettsoo
mbyi kwerp mbyi. Tak lee zha kuu nke
leettsoo tsaal leeka lee zha nke leettsoo zha
zha. ²⁹ Tak neeka thib zha nayiit zha ne zha
leeka kwerp zha, sinke nke leettsoo zhay
ne nkenap zhay, leeka taxal nke leettsoo
Jesucrist re zha Jesucrist, ³⁰ tak lee re'aa
nak kwerp chaan Jesucrist. ³¹ "Kona lee
mbyi ndoblo roo zhaa lo xut ne lo xnaa, tsa
tseyai mbyi kon ngot mbyi, ne lee rop zha
gak taxal thibka zha". [Gn. 2:24] ³² Kwent
chaan thib kuu thoz kuu ngoo gaats ndala,
kuu nagan yen men mndan kwent lo goo,
koree nak kwent chaan Jesucrist ne kwent
chaan re zha kuu nyelaaz Jesucrist, kuu nak

gwodoo chaan Jesucrist. ³³ Ndoble kadta thib goo ke leetsoo goo tsaal goo, taxal nke leetsoo goo leeka goo, ne leeka tata lee tsaal goo ndoble gon diiz lo goo.

6

¹ Lee re goo ndyeen bzhizh ndoble gon goo diiz lo xut goo ne lo xnaa goo, tak tabaa nlaaz Zha Nabee, ne koree nak kuu wen. ²⁻³Tak tata nzhab lo ley chaan Moisés: "Bke leetsoo'a xuta ne xnaa'a, tsa wen yo'a ne tsa naroob bana lo yezlyu ree". [Ex. 20:12; Dt. 5:16] Koree nak kuu ner kuu nataak kuu mnabee Diox, tsa wen rid re zha kuu gon diize.

⁴ Ne lee re goo kuu nak xut ndyeen, ndoblot tsow goo kezhyan zhiinn goo, mas wen bteni goo ndyeen ne bteli goo ndyeen taxal nlaaz Zha Nabee.

⁵ Reta goo kuu nak mos, ndoble gon goo diiz lo zha kuu nabee lo goo lo yezlyu ree, nadoo gok goo ne naguuz gok goo lo zha, taxal leeka lo Jesucrist ngeyon goo diiz.

⁶ Btsow goo rtsin zha ne tsowt gooy beeta leetsa ndewii zha lo goo, tsa wen yaan goo lo zha, sinke ndoble tsow goo rtsin zha kon dib ndroo leetsoo goo, taxal nlaaz Diox tak mos Jesucrist nak goo. ⁷Ndoble tsow goo rtsin zha kuu nabee lo goo kon dib ndroo leetsoo goo, taxal zha kuu nke tsuin lo Zha Nabee, ne tsowt gooy taxal zha kuu nke tsuin lo men. ⁸Tak kadta thib zha, tegal mos nak zha o nagt zha mos, kadta thib zha kayaa zha lo Zha Nabee taxalta kuu wen kuu mtsow zha.

⁹ Ne reta goo kuu nak zha kuu nabee, ndoblot yii goo lo mos goo, btelaaz goo lo ropta goo nabee Zha Nabee kuu ndob yibaa; tak lalka nataa re men lo Diox.

Re kuu mndaa Diox par tak re zha kuu nyelaaz Diox

¹⁰ Lee nal nin lo re goo wets'n ne btan na, ney gok goo kon yalney chaan Zha Nabee. ¹¹ Blortsin goo re kuu mndaa Diox lo goo par tak goo, tsa tak kenap goo goo ne tsa ney to goo lo re yalkedi chaan Maxuuy. ¹²Tak ngeyotaa kon men, sinke lee'a ngeyo kon re mbi fyer kuu nzo lobee kuu nabee lo yezlyu ree, re mbi fyer kuu ney kuu nabee lo yalkow ne ntsow kuu went. ¹³Kona ndoble lortsinaa re kuu mndaa Diox lo'aa par takaa, tsa xekaa ridaa re wiz went, ne leettsa ngwalo mriide nalika to'aa lo Diox.

¹⁴Kona ndoble thib ko'aa yekaa nali to'aa lo Diox ne thib yelaazaa kuu wli; tsa nakaa taxal thib soldad kuu nya lo zhoo kuu nzo sinch leeyy ne now pech kon yiib.

¹⁵ Ne ndoble list yetsinaa par taa'aa kwent Diiz Chul chaan Jesucrist, diiz kuu ntsow wen kwin re men, tsa nakaa taxal soldad kuu list ndo nke labyid ni.

¹⁶ Ne kuu mas ndoble tsowaa nak thib yelaazaa Jesú, tak leey nak taxal yiib kuu ntow dib soldad ne kon leey tak tuyyaa re btson kuu ndob bel yek kuu nkee Maxuuy yekaa.

¹⁷ Thibka ndoble telaazaa lee'aa wlipaa nap yalnaban kuu thitanax, tsa nakaa taxal soldad kuu now bchuyib yek. Noga ndoble thibka yelaazaa xkiiz Diox, ne lee xkiiz Diox nak taxal espad kuu ndaa Mbi Nayon chaan Diox. ¹⁸Reta wiz ndoble tediz goo lo Diox, ne thibka bnaab goo re kwaa lo Diox taxal nlaaz Mbi Nayon, bnaab goo lo Diox por goo ne bnaab goo lo Diox por reta zha kuu nyelaaz Jesucrist, re zha kuu nali ndo nyelaaz Diox. ¹⁹ Ne noga bnaab goo lo Diox por na, tsa taa Diox re diiz kuu ndoble nin, ne tsa tsow Diox yoney leettsoon, tsa tak tan kwent Diiz Chul kuu ngoo gaats ndala. ²⁰Diox mtaal'n tsa tan kwent Diiz Chul, kona nal naliib'n ne nzon tsib. Bnaab goo lo Diox tsa tsow Diox yoney leettsoon, par tan kwent chaan Diiz Chul, taxal ndoble tan kwente.

Paba mni "diox" bluz

²¹ Lee wets Tíquico, zha kuu nali nak ne thibka ntsow ayud'n lo rtsin Zha Nabee, lee zha ya lo goo, tsa taa zha kwent chaan na ne kwent re kuu ngetsov'n lo goo. ²²Kona mtaal'n zha lo goo, tsa lee zha ne lo goo naa xa nzi nee nzhee, ne koney zha leettsoo goo ne tetsey zha leettsoo goo.

²³ Nlaz'n lee Diox kuu nak Xutaa, ne Jesucrist Zha Nabee lo'aa tsow wen kwin goo, ne nlaz'n ke leettsoo goo thib goo ne tedib goo ne thib yelaaz goo Diox. ²⁴Naab'n lo Diox tsa lat leettsoo Diox ne Diox reta goo, zha kuu nke leettsoo Jesucrist Zha Nabee lo'aa kon yalnkelaaz kuu nzeet.

¡Tbaa gake!

Paba

Yeets kuu mkee Paba lo re zha yez Filipo

Paba mni "diox" lo re zha yez Filipo

¹ Na Paba, rop nee Tim, nee nak mos Jesucrist, ne ngekeen yeets ree lo re goo zha kuu nyelaaz Jesús kuu nzo yez Filipo; ne lo re zha gol kuu nabee lo re zha Jesús; ne lo re zha kuu ntsow ayud re zha Jesucrist.
² Nlaz'n lee Diox kuu nak Xut Jesucrist, Zha Nabee lo'aa, taa re kuu wen lo goo ne tsow wen kwin goo.

Paba mnaab lo Diox por re zha kuu nyelaaz Jesús

³ Kadta leettsa ntelaaz'n goo ndan texkix lo Diox por goo. ⁴ Ne leettsa naab'n lo Diox, naley nzo leettsoon naab'n lo Diox por goo; ⁵ tak thibka nke goo tsin lo Diiz Chul chaan Jesucrist, deside wiz kuu ngwalaaz goo Jesucrist ne asta naltserree. ⁶ Ne wen nen lee Diox mndelo mtsow kuu wen lo goo ne tetsowka Diozhe, asta wiz kuu lee Jesucrist yaad tedib welt. ⁷ Ne wen tabaa ntsow'n xgab, tak kwathoz nke leettsoon goo, tak lo retalee mloo Diox yalnkelaaz chaan Diox. Lee Diox mtaal'n tsa tsow'n rtsin Diox, kona tegal nzon tsib per thibka ndo re goo kon na, ne leettsa ndon lo re zha kuu nak tsiiin ndan kwent Diiz Chul chaan Jesucrist lo re zha, tataka ndo re goo kon na. ⁸ Ne Diox ne naa xa kwathoz nke leettsoon goo taxal nke leettsoo Jesucrist goo, ⁹ ne naab'n lo Diox, tsa masraa ke leettsoo altaa goo goo ne keno goo yalnzaak tsa yen goo re kwaa. ¹⁰ Tsa ne goo naa xomod kwii goo kuu wen. Tsa nali ne nambi ban goo asta wiz kuu bretab Jesucrist. ¹¹ Ne lee Jesucrist tsow gak goo zha nali lo Diox. Tsa reta men tsow nataak Diox ne gol lo Diox.

Nabanaa par tsowaa rtsin Jesucrist

¹² Re goo wets'n ne btan na, nlaz'n ne goo lee re yalti kuu mriid'n, leey mtsow tsa masraa men mkayaa Diiz Chul chaan Jesucrist. ¹³ Ne asta reta soldad zha yuulow, ne reta zha kuu nzi nzhee, ne leen nzo tsib, tak ndan kwent Diiz Chul chaan Jesucrist. ¹⁴ Ne leettsa ne re wets leen nzoo tsib, tyen re wets ngoo ney leettsoo, ne mzebt mndaa zha kwent Diiz Chul chaan Jesucrist, sinke kon dib ndroo leettsoo zha mndaa zha kwente lo re men.

¹⁵ Wli nzo zha kuu ndaa kwent Diiz Chul chaan Jesucrist, tak nayii zha ne zha na, ne nzo zha ndaa kwente, tak nlaaz zha masraa gak nataak zha nake na, per nzo zha ndaa kwente kon dib ndroo leettsoo zha. ¹⁶ Ne lee re zha kuu nda kwente kon dib ndroo

leettsoo, ntsow zhay, tak ne zha lee Diox mtaal'n tan kwent Diiz Chul chaan Jesucrist lo re men, ¹⁷ per lee tedib net zha ndaa kwente, tak nlaaz zha masraa gak nataak zha nake na, ne tak nayii zha ne zha na, ne nlaaz zha masraa keki zha na nal kuu nzon tsib. ¹⁸ Per tegal kwan mbez zha na neeka lut ndat leettsoon, os lee zha ndroo leettsoo zha ndaa zha kwente o kon dib ndroo leettsoo zha ndaa zha kwente, kuu nataak nak ndaa zha kwent chaan Jesucrist ne kona ntsow naley nzo leettsoon.

Ne masraa naley yo leettsoon, ¹⁹ tak nen tegoo zha na tsib, tak ngenaab gooy lo Diox ne lee Mbi Nayon chaan Jesucrist ntsow ayud'n. ²⁰ Tak kuu nlaz'n nak, nlaaz'n thoy'n lo neeka thib kwaa, sinke nlaz'n yoney leettsoon, tsa tan kwent chaan Jesucrist kon dib ndroo leettsoon, tsa tsow nataak re zha Jesucrist por kuu nin, tegal naban na o gath'n. ²¹ Os leen naban na por Jesucrist naban na, ne os leen gath'n mas wene, tak tsow'n gan yalnaban kuu thitanax. ²² Ne os leen bee naban na lo yezlyu ree, tataka na kwent Diiz Chul chaan Jesucrist lo re men; kona net'n pa kuu bin. ²³ Par na kwathoz nagan bin thib kuu lo rop koree: Nlaz'n gath'n, tak nlaza na ton lo Jesucrist yiba, tak par na kona nak kuu mas wen. ²⁴ Per ndoblo banka na lo yezlyu ree, tak ndeche goo na. ²⁵ Ne wen nen taban raa na, tsa toka na lo re goo, tsa tsow'n ayud goo, tsa masraa yen goo naa xomod nak re chaan Diox ne tsa masraa naley yo leettsoo goo, tak nyelaaz goo Jesucrist. ²⁶ Ne leettsa yatwiin lo goo tedib welt, kwathoz naley yo leettsoo goo lo Jesucrist por na.

²⁷ Thibka ndoblo ban goo, taxal nzhab Diiz Chul chaan Jesucrist. Tegal yatwiin lo goo o yatwiit'n lo goo, per nlaz'n gon na lee re goo thibka nak goo, ne ney ndo goo nyelaaz goo Diox. ²⁸ Ne ndoblot tseb goo ne goo re zha kuu nayii ne goo. Tak koree nak thib seny kuu nloo lee re zha'a lux, ne nlooy lee re goo keno goo yalnaban kuu taa Diox. ²⁹ Tak por kuu mtsow Jesucrist mtelaa Diox re'aa kona nagt anta yelaazaa Jesucrist, sinke noga ndoblo ridaa yalti, tak nyelaazaa Jesucrist. ³⁰ Leeka re yalti kuu ngeriid goo nal, leeka yalti'a mriid'n ndala ne leeka leey nzhon goo ngeriid'n nal.

2

Nadoo nak Jesucrist

¹ Os lee Jesucrist ntsow naley nzo leettsoo goo ne nketsey leettsoo goo, ne os nke leettsoo goo altaa goo, ne thibka nak goo tak nap goo Mbi Nayon, ne os wlipaap nlat leettsoo goo ne goo taben goo, ² btsow goo tsa masraa naley yo leettsoon, thibka gok goo, nawiitxa bke leettsoo goo altaa goo,

btswogoo purkuu wenne thibka kuu btswogoo xgab.³ Neeka thib kuu tsowt goo kon byo o tak nlaaz goo rub goo, sinke leettsa tsow goo thib kwaa, btswogoy kon dib ndroo leettssoo goo ne btswogoo xgab mas nataak tedib zha nake goo.⁴ Neeka thib goo ndoblot ya leettssoo goo beeta por goo, sinke nogandoblo ya leettssoo goo por taben goo.⁵ Ndoblo tsowaa xgab taxal mtsow Jesucrist xgab.

⁶ Ne tegal yewal nak Jesucrist kon Diox, per mleyt Jesucrist yewal Jesucrist kon Diox.

⁷ Sinke mlaa zha reta chaan zha, mlaa zha yalmabee chaan zha, ne ngol zha taxal thib men ne ngok zha taxal thib mos.

⁸ Ne leettsa ngulala zha, nadoo ngok zha ne mbin zha diiz lo Xut zha Diox,

asta nguth zha,
ne lo kruz nguth zha.

⁹ Kona mtsow nataak Diox zha lo reta kwaa. Ne mndaa Diox thib le zha kuu kwathoz nataak nake reta le kuu nzo.

¹⁰ Kona leettsa gon, re zha kuu nzo yibaa ne re zha kuu nzo lo yezlyu ree, ne re zha kuu nzi xann yezlyu lo Jesus.

¹¹ Ne reta zha gab lee Jesucrist nak Zha Nabee, ne gol zha lo Diox kuu nak Xut retalee.

Re zha kuu nyelaaz Jesucrist nak taxal xni lo yezlyu ree

¹² Kona nin lo re goo wets'n ne btan na, leeka taxal mbin goo diiz lon leettsa mndon lo re goo, leeka tata bin goo diiz lon nal kuu ndon tit. Neeka mas laat goo xnet Diox, sinke ndoblo zhiit goo ne tseb goo lo Zha Nabee.¹³ Tak Diox ntsow ntsin re kuu wen leettsoo'aa ne leeka Diox ntsow ayudaa, tsantsowaa re kuu wen taxal nlaaz Diox.

¹⁴ Lo reta kuu tsowaa ndoblot yodizaa leettsa tsowaay, sinke ndoblo tsowaay kon dib ndroo leettsoo'aa,¹⁵ tsa tsalt neeka thib kuu keki re menaa. Ndoblo nadoo ne nambigakaa xid re men kuu nakap nak ne ndaa falt, tak zhiinn Diox nakaan ne nakaan taxal xni mbel kuu nzib lobee lo re men kuu nzi lo yalkow.¹⁶ Kona thibka ndoblo taa goo kwent xkiiz Diox kuu ndaa yalnaban kuu thitanax, tsa leettsa yaad Jesucrist tedib welt, tak ley'n goo ne ley'n gap'n, mzhonnt'n ne mkeet'n tsim legal.¹⁷ Ne tegal tan na par gath'n, tsa tak kaltaa goo gon goo lo Diox kuu nak nyelaaz goo Jesucrist, ndat leettsoon sinke naley nzo leettsoon ne laz'n kon re goo.¹⁸ Noga goo naley bloo goo leettsoo goo kon na.

Paba mndaa kwent chaan Tim rop Epafrodit

¹⁹ Os lee Zha Nabee nlaaz, chatta taal'n Tim lo re goo, tsa leettsa bretab Tim, wen yo leettssoon, or taa Tim kwent lon naa xa nzi goo.²⁰ Tak napt'n neeka tedib zha kuu ntsow xgab goo taxal na, beeta Tim nak kuu ntsow xgab goo taxal na.²¹ Tak reta zha ntsow zha xgab beeta par lee zha, ne ntsow zha xgab kuu nak chaan Jesucrist.²² Per ne'a goo naa xa nak Tim, mtsow Tim ayud'n mndaa nee kwent chaan Diiz Chul, taxal thib mndyeen kuu ntsow ayud xut.²³ Kona taal'n Tim lo goo, leettsa yelo nen naa xa nda kwent da.²⁴ Noga ntsow'n xgab lee Zha Nabee tsow ayud'n, tsa tsant raa na yal'n lo goo.

²⁵ Per ndak'n ndoblo taal'n wets Epafrodit lo goo, zha kuu mxek mtsow ayud'n mke rop nee rtsin Zha Nabee, zha kuu mtaal goo lon mtsow ayud'n lo re kuu ndechen,²⁶ tak kwathoz nlaaz zha wii zha goo, ne nabil ngoo leettsoo zha, tak mbin goo lee zha mlen liz.²⁷ Wli mzhak ne zha ne mer gagath zha; per mlat leettsoo Diox mne Diox zha, ne nagt beeta lee zha mlat leettsoo Diox mne Diox, sinke noga mlat leettsoo Diox mne Diox'n, tak os lee zha agath zha lo yiza, masraa nabil gagoo leettssoon tsya.²⁸ Kona taal'n zha lo goo nal, tsa naley yo leettsoo goo or wii goo zha tedib welt, ne tsa noga na yot raa nabil leettssoon.²⁹ Ne naley bloo goo leettsoo goo or tsin zha lo goo, ne bkayaa goo zha taxal ndoblo kayaa goo wets goo kuu nyelaaz Zha Nabee, ne bin goo diiz lo re zha kuu nak taxal lee zha,³⁰ tak mer thoz gagath zha tak mtsow zha rtsin Jesucrist. Ne asta mer gagath zha tak mtsow zha tsiiin lon, re kuu ngogt goo gatsow goo lon.

3

Kuu nataak nak lebee men Jesucrist

¹ Ne lee nal, kuu nin lo re goo wets'n ne btan na nak, naley bloo goo leettsoo goo tak zha Jesucrist nak goo. Ne nyechet leettssoon nkeen leeka re kuu mkee'a na lo goo ner, tak talortsine lo goo.² Bkenap goo goo lo re zha kuu nak taxal mbak kuu kwathoz nayii, re zha kuu ntsow kuu went, re zha kuu mbez ndoblo ke re men seny chaan re nee, zha Israel.³ Ne re'aa nak zha kuu wlipaa nke seny, tak napaa Mbi Nayon chaan Diox leen leettsoo'aa, ne nzhoolaa lo Diox ne kwathoz naley nzo leettsoo'aa, tak nakaan zha Jesucrist, ne nyelaaztaa seny chaan re zha Israel,⁴ ne tegal ndoblon yelaaz'n re kona. Ne os nzo cho nyelaaz kona, jyent raa tedib zha ngwalaaze taxal na!⁵ Xonka wiz nda ngol'n leettsa mkee zha seny'n; zha Israel nak'n, zha raz chaan Benjamín, ne

4

Thibka naley bloo goo leettsoo goo tak nyelaaz goo Zha Nabee

xgann zha Hebreo nak'n. Ne ngok'n fariseo, re zha kuu kwathoz ntsow kuu nzhab lo ley chaan Moisés. ⁶ Ne tak ngwalaz'n gatsow'n kuu nzhab lo ley, kona mreken dits re zha kuu nyelaaz Jesucrist, ne neeka thib zha ngogt gakekin lo neeka thib kwa, tak mtsow'n reta kuu nzhab lo ley chaan Moisés. ⁷ Per reta kuu nataak lon ndala, lee nal thitanax nataagte lon, tak nyelaz'n Jesucrist. ⁸ Ne wlipaa reta kona nlortsint raay lon, tak kuu mas nataak nak nlebeen Jesucrist Zha Nabee lon. Ne tak nke leettsoon Jesucrist, kona mlan reta kuu nlortsint ne nataagt, tsa tsow'n kuu nabee Jesucrist, ⁹ tsa gak'n zha Jesucrist thitanax. Ne kayaat Diox'n taxal thib zha nali tak mbin na diiz lo ley chaan Moisés, sinke lee Diox kayaan taxal thib zha nali, tak nyelaz'n Jesucrist. ¹⁰ Kuu nlaz'n nak masraa lebeen Jesucrist, ne yen naa xa mteroban Diox Jesucrist. Ne lista ndon riid'n yalti taxal mriid Jesucrist, ne asta lista ndon gath'n taxal nguth Jesucrist, ¹¹ tsa noga na roban xid re zha nguth.

Zhayibaa nakaa

¹² Ne nit'n leen mtsowa na gan koree ne neeka nit'n leen naka na zha nali, per thib ngon yek'n gak'n taxal nlaaz Jesucrist, tak lee Jesucrist mlin tsa gak'n zha Jesucrist. ¹³ Re goo wets'n ne btan na, nit'n leen mtsowa na gane; per kuu ntsow'n nak nithlaz'n re kuu mtsow'n ndala, ne thib ngon yek'n tsow'n gan kuu nzo par par delant. ¹⁴ Thib ngon yek'n tsow'n gan kuu ndoblon tsow'n gan yibaa, kuu mrez Diox'n kayaan tak nyelaz'n Jesucrist. ¹⁵ Kona retalee kuu ney ndo nyelaaz Diox, lalka ndoblo tsowaa xgab; ne os lee goo ndak goo zhaa kuu ntsow goo xgab, Diox tsow ayud goo tsa yen goo kuu ntsow goo xgab. ¹⁶ Koree nak kuu ndoblo tsowaa. ^jNdoblo banaa taxal mteedaa!

¹⁷ Reta goo wets'n ne btan na, thibka btsow goo taxal ntsow'n, ne wii goo lo re zha kuu ntsow taxal mloo nee lo goo. ¹⁸ Ne kwathoz tyen welt nda nin lo goo, ne lee nal asta nhonn na ni nay tedib welt: Kwathoz re zha kuu ntsowt kuu wen, mayii zha ne zha re zha kuu nyelaaz Jesucrist kuu nguth lo kruz. ¹⁹ Per kuu tsow re zha'a gan nak lux zha. Lee diox chaan re zha'a nak re kuu ndablaaz zha, ndoblo thoy zha re kuu ndruba zha, tak beeta re kuu yezlyu ree ntsow zha xgab. ²⁰ Per lee'aa zha yibaa nakaa, ne ngebetaa yaad Jesucrist lobee Zha Nabee lo'aa, zha kuu mtelaa'ao lo yalguth. ²¹ Lee Jesucrist tsee kwerpaa kuu nlux ree, tsa gake taxal kwerp Jesucrist kuu nla xni. Ne koree tsow Jesucrist kon yalney kuu nabee Jesucrist lo reta kwa.

¹ Reta goo wets'n ne btan na, kuu kwathoz nke leettsoon ne nlaz'n wiin, re goo ntsow naley nzo leettsoon, ne re goo nak kuu mtsow'n gan, naab'n lo goo thibka nali to goo lo Zha Nabee. ² Naab'n lo Evodia ne lo Síntique wen brin goo taxal nlaaz Zha Nabee. ³ Noga naab'n lo'a, lu kuu kwathoz mtsow ayud'n mke ropaa rtsin Diox, btsow ayud rop ngot baa, tsa wen kwin rop zha, tak rop zha ne noga Ment mtsow ayud'n, leettsa mndan kwent Diiz Chul, ne noga tedib net re zha mke tsuin kon na. Ne lee le re zha'a nke'a lo libr kuu nak chaan yalnaban kuu thitanax. ⁴ Naley bloo goo leettsoo goo, thibka gwalaaz goo Zha Nabee, ne bren nin: ^jNaley bloo goo leettsoo goo! ⁵ Noga wen btsow goo, tsa lee reta men ne lee goo wen nak goo, tak lee Zha Nabee gaxa ndo yaad. ⁶ Per yat leettsoo goo por neeka thib kwa, sinke ndoblo gab goo re kuu lo Diox, ne ndoblo naab goo re kuu ndeche goo lo Diox, ne btaa goo texkix lo Diox por reta kwa. ⁷Tsa lee Diox tsow wen kwin goo, koree nak thib kuu kwathoz nagan yen men. Ne lee yalwen chaan Diox kenap leettsoo goo ne re xgab goo, tak zha Jesucrist nak goo.

Btsow goo xgab beeta kuu wen

⁸ Kuu yelo nin lo re goo wets'n ne btan na nak, ndoblo tsowaa xgab:
beeta re kuu wli,
beeta re kuu gwataak,
beeta re kuu nali,
beeta re kuu nambi,
beeta re kuu legal,
beeta re kuu wen nyath,
beeta re kuu wen thoz,
ne beeta re kuu ndoblo taa men texkix lo Diox.

⁹ Btsow goo re kuu mloon lo goo, re kuu mkyaaa goo lon, re kuu mbin goo mnin ne re kuu mwii goo mtsow'n. Btsow gooy, tsa lee Diox kuu ntsow wen nzi'aa to kon reta goo.

Gon kuu mndaa re zha yez Filipo lo Paba

¹⁰ Kwathoz naley nzo leettsoon, ne ndan texkix lo Zha Nabee, tak mtsow goo ayud'n tedib welt, ne nen thibka ngwalaaz goo gatsow goo ayud'n, per ngogt gatsow gooy. ¹¹ Ne ngenit'n koree tak ndechen kwa; tak mteeda na naley nzo leettsoon kon kuu nap'n. ¹² Myeya na yent kwan nap'n ne myeya na leettsa naroob kwaan nap'n. Ney'n ndriid'n reta kwa, nyey'n tse leettsoon, nyey'n leettsa nlann na, nyey'n nap'n naroob kwa ne nyey'n leettsa neeka thib kwaap'tn. ¹³ Reta kwa tak tsow'n, tak lee Jesucrist ndaa yalney lon. ¹⁴ Per

wen mtsow goo, mtsow goo ayud'n lo re yalty kuu mriid'n. ¹⁵ Ne goo zha yez Filipo kuu nyelaaz Jesucrist, leettsa mnadelon mndan kwent chaan Diiz Chul, leettsa mroon yezlyu Macedonia, neeka thib re zha kuu nyelaaz Jesús kuu nzo tedib net re yez mtsowt ayud'n, sinke beeta re goo mtsowt ayud'n. ¹⁶ Ne leettsa mndon yez Tesalónica, masraa thib welt mtaal goo gon lon par re kuu ndechen. ¹⁷ Ne ntsowt'n xgab beeta kayaank kuu ndaa goo lon, sinke nlaz'n kayaaa goo re kuu wen lo Diox, taxal zha kuu nkayaa zhiinn temi, tak mtsow goo ayud'n. ¹⁸ Mkayaa'a na reta kuu mtaal goo lon lo Epafrodito, ne asta narooib kuu ndechen mkayaan. Leey nak taxal thib gon kuu chul ndetsi, taxal thib maa gon kuu ndaa zha lo Diox, kuu nkayaa Diox kon dib ndroo leettssoo Diox. ¹⁹ Ne lee Diox taa reta kuu ndeche goo lo goo. Lee Diox taa re kuu yibaa lo goo, tak lee Diox nap reta kwaa, ne tetaa Diox re kwaa lo goo tak nyelaaz goo Jesucrist. ²⁰ Ne thibka ndoblo golaa lo Diox kuu nak Xutaa. ¡Tata gake!

Paba mni “diox” bluz lo re zha

²¹ Bni goo “diox” kwent nee lo reta zha kuu nyelaaz Jesucrist kuu nzi baa. Ne nogar re wetsaa kuu nzi kon na nzhee ni “diox” lo goo. ²² Reta zha kuu nak zha yez chaan Diox kuu nzi nzhee ne re zha kuu nke tsin liz César, ni “diox” lo goo.

²³ Nlaz'n lee Jesucrist, Zha Nabee lo'aa, loo yalnkelaaaz chaan lo goo.

¡Tbaa gake!

Paba

Yeets kuu mkee Paba lo re zha yez Colosas

Paba mni "diox" lo rezhayez colosas kuu nyelaaz Jesús

¹ Na Paba, nak'n apóstol chaan Jesucrist, tak tabaa nlaaz Diox. ² Kon wets Tim nge-keen yeets ree lo re goo zha yez Colosas kuu nyelaaz Jesucrist, zha kuu thibka nali ndo nyelaaz Diox kuu nak Xutaa. Nlaz'n loo Diox yalnkelaaz chaan Diox lo goo, ne tsow Diox wen kwin goo.

Paba mnaab lo Diox por re zha kuu nyelaaz Jesús

³ Kadta leettsa ndediz nee lo Diox kuu nak Xutaa ne Xut Jesucrist Zha Nabee lo'aa, thibka naab nee tsa tsow Diox ayud goo, ne ndaa nee texkix lo Diox, ⁴ tak mbin nee naa xa nyelaaz goo Jesucrist, ne xa kwathoz nke leettsoo goo reta zha kuu nak zha Jesucrist. ⁵ Ne noga ndaa nee texkix lo Diox, tak ngebet goo re kuu naka diiz kayaa goo yibaa. Ne ngebet gooy, tak mbin goo diiz lo Diiz Chul kuu nak kuu wli. ⁶ Leeka Diiz Chul kuu mbin goo, nak Diiz kuu ngeraats dita lo yezlyu, ne kwathozha zha ngwalaaze, leeka taxal ngwalaaz gooy, leettsa mbin gooy ne leettsa mlebee goo kwent chaan yalnkelaaz chaan Diox kuu nak kuu wli. ⁷ Lee Epafras mndaa kwent chaan Diiz Chul lo goo, lee zha nak mos chaan Jesucrist taxal nee ne noga ne goo lee zha nak thib zha kuu nali ntsow rtsin Jesucrist. ⁸ Lee zha mndaa kwent chaan goo lo nee, ne lee zha ne naa xa kwathoz nke leettsoo goo re zha Jesús, kon yalnkelaaz kuu ndaa Mbi Nayon chaan Diox.

⁹ Kona lee nee desde wiz kuu mbin nee kwent chaan goo, thibka naab nee lo Diox tsa loo Diox reta kuu nlaaz Diox lo goo, ne taa Diox yalnzhaak lo goo ne tsow Diox yen goo naa xomod nak re kwent chaan Diox. ¹⁰ Tsa ban goo ne tsow goo, taxal ndoblo ban re zha kuu nak zha Jesucrist ne tsa thibka tsow goo kuu wen, tsa wen nzo leettsoo Diox ne Diox goo, ne tsa masraa wen lebee goo Diox. ¹¹ Ne naab nee lo Diox, tsa tsow Diox yoney leettsoo goo kon yalney chaan Diox, tsa xek goo rid goo reta kuu, ne tsa gak goo zha nadoo, ne naley yo leettsoo goo, ¹² ne thibka taa goo texkix lo Xutaa Diox kon dib ndroo leettsoo goo, tak lee Diox mndaa diiz tab goo lo xni ta nabee Diox, ne kayaa goo re kuu ndoblo kayaa re zha Diox kuu nali nak lo Diox. ¹³ Diox intelaa'aa lo Maxuuy kuu nap yalnabee lo yalkow, ne mndeno Diox re'aa ta nabee Xgann Diox kuu kwathoz nke leettsoo Diox. ¹⁴ Ne por yalguth chaan

Jesucrist mzhii Jesucrist re'aa, tsa gakaa zha Jesucrist, ne mtuyu Jesucrist re faltaa.

Por yalguth chaan Jesucrist mtsow Diox wen mrinaa kon Diox

¹⁵ Lalka nak Jesucrist kon Diox kuu nloot ne Xgann Diox nak Jesucrist, per nzo'a Jesucrist leettsa terka texkwaa yezlyu ne leettsa terka texkwaa reta kuu nzo lo yezlyu. ¹⁶ Ne kon Jesucrist mdexkwaa Diox reta kwaan nzo yibaa ne reta kwaan nzo lo yezlyu ree, re kuu nloot ne kuu nloot. Mdexkwaa Diox re yalnabee ne re yalney kuu nzo, retay mdexkwaa Jesucrist tsa gake chaan Jesucrist. ¹⁷ Jesucrist nak ner lo reta kwaan, ne por lee Jesucrist nzo reta kwaan. ¹⁸ Jesucrist nak Zha Nabee lo re zha kuu nyelaaz Jesucrist, taxal nabee yek men lo kwerp men. Jesucrist nak ner lo reta kwaan, ne lee Jesucrist nak zha ner mroban lo yalguth, par nak Jesucrist Zha Nabee lo reta kwaan. ¹⁹ Tak lee Diox ngwalaaz lee Jesucrist gak taxalpaal lee Diox, ²⁰ ne por Jesucrist, mtsow Diox wen kwin re men kon Diox; reta zha nzo lo yezlyu ree ne reta zha nzo yibaa, mtsow Diox mrin wen zha kon Diox por ren kuu mxo Jesucrist lo kruz.

²¹ Ndala ngok goo zha tithe ne zha kuu nayii Diox ne Diox, por re kuu went kuu mtsow goo; ²² per lee nal mtsow Jesucrist mrin wenaan kon Diox, tak lee Jesucrist nguth. Ne mtsow Jesucrist gak goo zha nambi ne zha nali lo Jesucrist. ²³ Thibka nali ndoblo to goo yelaaz goo Jesucrist, ne laat goo kuu ngebet goo, kuu tsow goo gan por Diiz Chul kuu mbin goo. Diiz kuu ndaa zha kwent dib naxta lo yezlyu, ne noga na Paba ntsow'n ayud ndan kwente.

Tsiin kuu mndaa Diox tsow Paba lo re zha kuu nyelaaz Jesús

²⁴ Ne lee nal naley nzo leettsoon ndriid'n yalti por goo, tak tabaa mod ngeriid'n leeka re yalti kuu mriid Jesucrist por re zha Jesucrist, re zha kuu nak taxal kwerp Jesucrist. ²⁵ Diox mtsow nak'n thib zha kuu nke tsiin par re zha Jesús, tsa nali tan kwent xkiiz Diox. ²⁶ Xkiiz Diox kuu ngoo gaats ndala, per lee nal mloo'a Diozhe lo re zha kuu nak zha yez chaan Diox. ²⁷ Ne lo'aa mloo Diox reta kuu wen kuu ngoo gaats ndala, ne noga nloo Diozhe lo re zha kuu nagt zha Israel. Ne lee kuu ngoo gaats nak: Jesucrist nzo leettsoo'aa, kona ngebetaa tsinaa ta nap Diox par lee.

²⁸ Kona ndaa nee kwent chaan Jesucrist reta ta nda nee, ne nteni nee ne nloo nee lo reta men kon yalnzhaak tsa yen zhay, ne tsa nali to kadta thib zha lo Jesucrist. ²⁹ Kona ntsow'n tsiin ree kon dib ndroo leettsoon, tak lee yalney chaan Jesucrist nzo leettsoon.

2

¹ Nlaz'n ne goo naa xa kwathoz ngyon por goo, ne por re zha yez Laodicea, ne por reta zha kuu ter lebeen. ² Nlaz'n yo ney leetsoo goo ne thibka gak goo ke leetsoo goo altaa goo taxal nlaaz Diox, tsa masraa keno goo yalnzaak ne yen goo naa xomod nak kuu mloo gaats Diox ndala, kuu nak leeka Jesucrist; ³ lee Jesucrist nap reta yalnzaak par tak yen men reta kuu. ⁴ Nin koree lo goo, tsa yent cho kedi goo kon diiz naguuz kuu wlit. ⁵ Ne tegal ndot'n lo re goo, per kon xgab da ndon lo goo ne naley nzo leettsoon, tak wen ne nali nzi goo nyelaaz goo Jesucrist.

Yalnaban kuu ndaa Jesucrist

⁶ Ne taxal mkayaa goo Jesucrist, Zha Nabee lo'aa, ndoblo ban goo ne tsow goo taxal nlaaz Jesucrist, tak zha Jesucrist nak goo, ⁷ ne ndoblo ney ne nali to goo yelaaz goo Jesucrist, taxal mloo nee lo goo ne thibka btaa goo texkix lo Diox.

⁸ Kenap goo goo, ne taat goo diiz kedi neeka thib men goo kon re xgab ne kon yalnzaak chaan re men kuu wlit, tak lee re zha'a ndaat zha kwent chaan Jesucrist, sinke lee zha ndaa kwent re kuu mloo re tey zha lo zha, kuu nak xgab re men yezlyu ree. ⁹ Tak leeka taxal nak Diox, tataga nak Jesucrist. ¹⁰ Ne lee nal tak nlebee goo re kuu nak kwent chaan Diox, kona yent kwan nzhak falt lo goo, tak lee Jesucrist nak Zha Nabee lo reta yalney ne lo reta yalnabee. ¹¹ Ne tak thibka nak goo kon Jesucrist, nap goo thib seny, per nagte seny kuu mkee men, sinke leettsa mtelaa Diox goo lo re falt goo, kona nak seny chaan Jesucrist, ¹² tak leettsa ngokleyyyaa, kona nak taxal thibka mgaatsaa kon Jesucrist, ne mrobanaa kon Jesucrist, tak ngwalaazaa ney Diox, kona mteroban Diox Jesucrist. ¹³ Ndala ngok goo taxal zha nguth, por re kuu went kuu mtsow goo ne tak mket seny goo; per lee nal mndaa Diox yalnaban kuu kub lo goo, ne mtuuy Diox reta falt goo, por kuu mtsow Jesucrist. ¹⁴ Ne mtuuy Diox re faltaa kuu mkeki ley chaan Moisés re'aa; ne mluux Diox he leettsa nguth Jesucrist lo kruz. ¹⁵ Ne leettsa nguth Jesucrist lo kruz, mtsow Jesucrist gan lo reta yalnabee ne lo reta yalney kuu nzo, ne mloo Jesucrist yalnathoy re yalnabee ne re yalney kuu nzo.

Ndoblo kwaanaa re kuu yibaa

¹⁶ Kona neeka thib zha ndoblot looz zha goo por re kuu nzhaw goo o por kuu nzhuu goo, o tak ngotsowt goo re ani, o re mbee yeen, ne wiz kuu ndroxkwani re zha Israel. ¹⁷ Reta koree nak beeta xinn chaan re kuu yaad, per kuu wli nak Jesucrist. ¹⁸ Ne ndoblot laa'aa kib zha kuu ndoblo'aa kayaa'aa. Lee re zha kuu mbezz ndoblo gol men lo re mandad chaan Diox. Ne ntsow

zha taxal zha kuu mloo Diox thib kwa lo, ndrub zha re xgab zha. ¹⁹ Nagt re zha'a zha Jesucrist. Btelaaaz goo lee Jesucrist nak yek kwerp kuu nak lee, ne ntsow Jesucrist nzhen dita kwerp Jesucrist, ndaa Jesucrist kuu ndechey ne nkyel Jesucrist re yibe ne re tsithe tsa nhene taxal nlaaz Diox.

²⁰ Os ngutha goo kon Jesucrist ne mluuzha goo re xgab yezlyu ree kuu mnabee lo goo. ¿Chebee bee naban goo ne ntsow goo taxal zha yezlyu ree, ne nzhon goo diiz re kuu mbezz re zha lo goo, ²¹ re kuu taxal re koree: "Tenta kobaa, wuta kona, neeka ndoblot diinna kona"? ²² Reta leyy ree kuu yezlyu ree nake, ne retay teluzhe, tak kuu mloo men yezlyu ree nake. ²³ Ne wli lee re zha ndak nataak teke men dits re leyya, tak kwathoz nabee lo kwerp men par gak nali men, per thitanax nataagte, tak lortsinte, par towgwe lo re kuu nlaaz kwerp men.

3

¹ Ne tak mrobanaa lee kon Jesucrist, kona ndoblo kwaanaa re kuu yibaa, ta ndob Jesucrist lad ban lo Diox, ta nabee Diox.

² Ndoblo tsowaa xgab re kuu yibaa, ne ndoblot tsowaa xgab re kuu yezlyu ree, ³ tak ngutha lee kon Jesucrist, kona lee Diox nkenap yalnabanaa. ⁴ ¡Lee Jesucrist ndaa yalnaban lo'aa! Ne leettsa yaad Jesucrist tedib welt, no'aa bi kon Jesucrist lo xni thoz chaan Jesucrist ta nabee Jesucrist.

Xomod ngokaa ndala ne xomod nakaa nal

⁵ Ndoblo tsowaa tsa lux re xgab yezlyu ree lo'aa:

Ne ndoblot gak ropaa kon ndota zha, tsowtaa re kuu nambit, neeka ndoblot tsowaa re kuu rax, kuu nlortsint kuu nlaaz kwerpaa, neeka ndoblot tablaazaa re kuu yezlyu ree kuu lalka nak,

taxal nyelaaz zha re diox kuu wlit nak Diox.

⁶ Kona lee yalnayii chaan Diox la dits re zha kuu nzhont diiz ne ntsow re koree, ⁷ ne retalee mtsowaa re koree ndala. ⁸ Per lee nal ndoblo laa'aa re:

yalnayii,
zhyan,
tsowtaa kuu went kuu tak tedib men, ne kweztaa ndota kuu lo re men, noga ndoblo laa re'aa re diiz went kuu ndedizaa.

⁹ Keditaa thibaa ne tedibaa.

Tak mlaa'a lee mod kuu ngokaa ndala ne re kuu mtsow lee ndala, ¹⁰ lee nal nabanaa lo yalnaban kub, ne gandata wiz ngetsow kub Diox yalnaban ree, tsa mas wen lebee'aa Diox. ¹¹ Ne lo yalnaban kub ree, nataagt naa chu zha Israel nak zha o nagt zha zha Israel, ne chu nke seny zha o nkete zha, chu zha

tith nak zha o nagt zhay, chu mos nak zha o nagt zha mos. Kuu nataak nak Jesucrist, tak lee Jesucrist nabee leettsoo retalee.

¹² Nke leettsoo Diox retalee, ne mli Diox re'aa tsa gakaa zha Diox. Kona tenzhee ndoblo banaa lo yalnaban kub ree: ndoblo lat leettsoo'aa ne'aa tabenaa, ndoblo gakaa zha kuu wen nak, ndoblo gakaa zha nadoo, ndoblo gakaa zha naguuz, ndoblo xek leettsoo'aa,

¹³ ne ndoblo xek leettsoo'aa ne'aa thibaa ne tedibaa, ndoblo la leettsoo'aa lo re kuu went kuu ntsow tabenaa lo'aa, leeka taxal mla leettsoo Jesucrist lo re fal-taa.

¹⁴ Ne kuu masraa nataak lo re koree nak: Ndoblo ke leettsoo'aa tabenaa, tak koree ntsow thibka nzhakaa ne tsowe nzhak nali'aa. ¹⁵ Ne lee yalwen chaan Diox nabee leen leettsoo'aa, tak par kona mrez Diox re'aa, tsa gakaa thibka kwerp, ne ndoblo taa'aa texkix lo Diox.

¹⁶ Ndoblo thibka yo yekaa xkiiz Jesucrist, ne ndoblo teedaa teni'aa thibaa ne tedibaa kon yalnzaak kuu ndaa Diox lo'aa. Ne ndoblo golaa salm ne kant, tak nlaazaa taa'aa texkix lo Diox. ¹⁷ Ne reta kuu ntsowaa o kuu ni'aa, ndoblo tsow leey kon yalnabee kuu ndaa Jesucrist Zha Nabee lo'aa, ne ndoblo taa'aa texkix lo Diox kuu nak Xutaa por Jesucrist.

Xomod ndoblo yo'aa lizaa

¹⁸ Lee re ngot ndoblo gon diiz lo tsaal, tak koree ndoblo tsow re zha kuu nyelaaz Jesucrist Zha Nabee lo'aa. ¹⁹ Ne lee re goo mbyindoblo kelaz goo tsaal goo, ne yiit goo lo zha.

²⁰ Lee re goo mndyeen ndoblo gon diiz lo xut lo reta kwwa, tak koree nyow leettsoo Zha Nabee. ²¹ Ne lee re goo xut mndyeen ndoblot tsow goo kezhyan zhiinn goo, tsa yet nabil leettsoo zhiinn goo.

²² Lee re goo kuu nak mos ndoblo gon goo diiz lo zha kuu nabee lo goo lo yezlyu ree, lo reta kuu yezlyu ree. Ne tsowt gooy beeta leettsa ndewii zha lo goo par wen yaan goo lo zha, sinke kon dib ndroo leettsoo goo bke goo tsiiin lo zha, tak nzeb goo lo Zha Nabee kuu ndob yibaa. ²³ Reta kuu tsow goo, bt-sow gooy kon dib ndroo leettsoo goo, taxal zha kuu ntsow rtsin Zha Nabee, tsowt gooy taxal lo men. ²⁴ Tak ne'a goo lo Zha Nabee kayaa'aa kuu tsowwa gan, tak lo Jesucrist nke'aa tsiiin ne lee zha nak Zha Nabee lo'aa. ²⁵ Tak lee zha kuu ntsow kuu went, leeka kuu went kuu mtsow zha gax lo zha, tak lo Diox lalka nak re men.

4

¹ Ne lee re goo zha kuu nak zha kuu nabee lo re mos, ndoblo wen ne nali tsow goo lo re mos goo. Btelaaz goo noga goo nap goo Zha Nabee lo goo kuu ndob yibaa.

² Thibka list gwatsin goo ne btediz goo lo Diox ne btaa goo texkix lo Diox. ³ Ne noga bnaab goo lo Diox por nee, tsa xaal Diox net, tsa tak taa nee kwent chaan Jesucrist kuu ngoo gaats ndala, tak kona nzon tsib. ⁴ Ne bnaab goo lo Diox, tsa tak nambita tan kwente taxal ndobloy.

⁵ Kon yalnzaak ndoblo banaa xid re zha kuu nyelaaz Diox, ne ndoblo taa'aa kwent chaan Jesucrist lo zha leettsa take. ⁶ Leettsa tedizaa lo re men, ndoblo kon dib ndroo leettsoo'aa tedizaa ne wen tedizaa ne ndoblo ne'aa naa xomod kabaa lo zha.

Paba mni "diox" bluz

⁷ Lee wets Tíquico kuu kwathoz nke leettsoon, taa kwent chaan da ne re kuu ngetson' lo goo. Lee zha nak thib zha nali kuu ntsow ayud'n nke nee rtsin Zha Nabee. ⁸ Kona mtaal'n zha lo goo, tsa taa zha kwent naa xa nzo nee ne tsow zha yoney leettsoo goo. ⁹ Ne kon lee zha taal'n wets Onésimo kuu kwathoz nke leettsoon ne nali ndo zha lo Diox, zha kuu nak tawlaz goo. Lee rop zha taa kwent lo goo naa kwan nzhak nzhee.

¹⁰ Lee wets Aristarco kuu nzo rop nee tsib ni "diox" lo goo. Ne noga wets Mark sobrin Bernabé ni "diox" lo goo. Ne ne'a goo naa kwan tsow goo kon Mark, os yatwii Mark lo goo, wen bkayaa goo Mark, tak lee Mark mloo lo goo kuu ndoblo goo tsow goo. ¹¹ Ne noga Jesús kuu tedib le nak Justo ni "diox" lo goo. Beeta rop zha ree nak zha Israel kuu mke tsin kon na lo rtsin Zha Nabee, ne kwathoz mtetsey zha leettsoon. ¹² Noga Epafras zha tawlaz goo ni "diox" lo goo. Lee zha nak thib mos chaan Jesucrist ne thibka naab zha lo Diox por goo, tsa ney ne nali to goo lo Diox par tsow goo kuu nlaaz Diox. ¹³ Ne nen xa kwathoz ntsow zha xgab goo ne re zha kuu nzo yez Laodicea, ne por re zha kuu nzo yez Hierápolis. ¹⁴ Noga Luk kuu nak doctor kuu kwathoz nke leettsoon, ni "diox" lo goo, ne noga Demas ni "diox" lo goo.

¹⁵ Bni goo "diox" kwent nee lo re wetsaa ne lo re btanaa kuu nzo yez Laodicea. Ne noga bni goo "diox" lo Ninfas, ne lo reta zha kuu nkaltaa liz Ninfas nteed xkiiz Diox.

¹⁶ Ne leettsa yelo lab goo yeets ree, btaal gooy lo re zha kuu nyelaaz Jesús kuu nzo yez Laodicea, tsa lab zhay; ne tsa noga zha taa zha yeets kuu mtaal'n lo zha lab goo. ¹⁷ Ne guz goo koree lo Arquipo: "Wen wii tsa wen tsowa tsiiin kuu mnadaa Zha Nabee tsowa".

¹⁸ Na Paba, ngekeen chop tson lan diiz ree lo goo kon yaan ne kon letr da, noga na nin

“diox” lo goo. Btelaaz goo leen nzo tsib.
Nlaz’n loo Diox yalnkelaaz chaan Diox lo
goo.
;Tbaa gake!
Paba

Yeets ner kuu mkee Paba lo re zha yez Tosalónica

*Paba mni “diox” lo re zha yez Tesalónica
kuu nyelaaz Jesús*

¹ Na Paba, Silvano ne Tim, ngekee nee yeets ree tsa taal neey lo re goo wets'n ne btan na, zha yez Tesalónica, re goo kuu nak zha Diox kuu nak Xutaa ne zha Jesucrist Zha Nabee lo'aa. Nlaaz nee loo Diox yalnkelaaz Diox lo goo tsa wen kwin goo.

Paba mndaa texkix lo Diox, tak wen nyelaaz re zha Tesalónica Diox

² Leettsa naab nee lo Diox thibka ndaa nee texkix lo Diox por goo, tak ney ndo goo nyelaaz goo Diox. ³ Thibka ndaa nee texkix lo Diox kuu nak Xutaa, or nteth nee goo lo Diox, tak nyelaaz goo Diox ne kon dib ndroo leettsou goo nke goo rtsin Diox, ne ney ndo goo nyelaaz goo Jesucrist Zha Nabee lo'aa, ne thib nzo yek goo ngebet goo bretab Jesucrist. ⁴ Kona reta goo wets'n ne btan na, ne'a re'aa lee Diox mli goo tak kwathoz nke leettsou Diox goo. ⁵ Ne leettsa mndaa nee kwent Diiz Chul chaan Jesucrist lo goo, mndaat nee kwente kon anta diiz, sinke noga Mbi Nayon chaan Diox mtsow re kuu thoz lo re goo kon yalney ne kona wen ne goo wlyi. Ne noga ne goo naa xa nali mtsow nee, leettsa ngwa nee lo re goo, tak ne leettsou nee goo.

⁶ Ne lee re goo wlipaa ngetsow goo taxal mloo nee ne taxal mloo Zha Nabee lo goo. Tegal kwathoz mriid goo yalti, per lee Mbi Nayon mtsow kwathoz naley ngoo leettsou goo mkayaa goo Diiz Chul. ⁷ Ne tenzhee mloo goo lo re zha kuu nyelaaz Jesús kuu nzo re yez kuu nzi yezlyu Macedonia ne re yez kuu nzi yezlyu Acaya, mloo goo lo re zha naa xa nali ndoblo ban zha lo Diox. ⁸ Ne por goo kwathoz men kuu nzo re yez ngeyon Diiz Chul chaan Zha Nabee, ne nagte beeta re yez chaan Macedonia ne Acaya sinke reta, ne tabaa lee re men ne naa xa nyelaaz goo Diox, kona ndechet raa taa nee kwent lo re zha, naa xomod mkayaa goo xkiiz Diox. ⁹ Tak reta zha kuu nzo tyaa ndaa kwent lo nee naa xomod kwathoz wen mkayaa goo nee, leettsa ngwa nee lo goo, ne xomod mlaa goo re diox kuu ntagt Diox ne ngwalaaz goo Diox kuu naban, Diox kuu wlipaa nak Diox ne mndelo goo mke goo rtsin Diox. ¹⁰ Noga ndaa re zha'a kwent naa xa ngebet goo bretab Jesucrist Xgann Diox lobee, Xgann Diox kuu lee Diox mteroban. Ne beeta Jesucrist nak kuu tak telaa'aa lo yalti kuu taal Diox.

Tsiin kuu mtsow Paba yez Tesalónica

¹ Reta goo wets'n ne btan na, ne goo lee tsiin kuu mtsow nee lo re goo mrekey, nagte kuu tabaata mtsow nee ² noga ne goo xa mteti re zha yez Filipos nee, mdin zha nee, per tegal kwathoz mnayii zha mne zha nee, Diox mloney leettsou nee par mndaa nee kwent Diiz Chul chaan Diox lo goo. ³ Tak wli kuu mndaa nee kwent lo goo, mtsowt nee xgab kedi nee goo, sinke nambi ne nali nak re kuu mndaa nee kwent lo goo. ⁴ Tak Diox mli nee tsa tsow nee tsiin ree ne nabee Diox lo nee tsow neey, leey nak taa nee kwent Diiz Chul chaan Diox lo goo. Ne nkwaant nee tsa wen yo leettsou re men ne nee, sinke nkwaan nee wen yo leettsou Diox ne Diox nee, tak lee Diox nlebee leettsou retalee. ⁵ Ne noga ne'a goo, neeka thib welt mnti nee diiz naguuz lo goo tsa yey goo nee ne gataa goo temi lo nee, Diox ne koree. ⁶ Neeka thib welt mkwaant nee tsa tsow nataak re men nee, neeka mkwaant nee tsa tsow nataak goo nee o choraa zha, ne tegal ngok ganaab nee kuu ndeche nee lo goo, tsa gataa gooy, tak apóstl chaan Jesucrist nak nee. ⁷ Per lee nee kwathoz nadoo mtsow nee lo goo, taxal thib ngt kuu nkelaaz mbet. ⁸ Ne tak kwathoz nke leettsou nee goo, kona nagt beeta Diiz Chul chaan Jesucrist ngwalaaz nee gataa nee lo goo, sinke noga ngwalaaz nee gataa nee leeka nee lo goo, tak kwathoz nke leettsou nee goo.

⁹ Reta goo wets'n ne btan na, wen ntelaaz goo naa xa mke nee btsanaa, tsa mtsanaa nee kuu ndow nee. Tse ne yaal mke nee tsiin mtsanaa nee kuu ndow nee, tsa mndedoot nee lo goo, leettsa mndaa nee kwent Diiz Chul chaan Diox lo goo. ¹⁰ Re goo ne Diox ne xa nali mtsow nee lo goo, neeka thib falt mndaat nee lo re goo, sinke wen ngok nee lo goo lo re kuu mtsow nee, tsa neeka thib zha kekit nee lo goo. ¹¹ Ne noga wen ne goo naa xa mteni nee goo ne xa mtetsey nee leettsou kadta thib goo, taxal ntsow thib zha lo zhuiinn zha. ¹² Kona mnabee nee lo goo ndoblo ban goo taxal zha kuu mli Diox, tsa kayaya'aa ta nabee Diox ta nke xni thoz.

¹³ Kona thibka ndaa nee texkix lo Diox, tak leettsa mndaa nee kwent Diiz Chul chaan Diox lo goo, mkayaa gooy taxal ndoblo kayaa goo xkiiz Diox ne mkayaat gooy taxal xkiiz men. Ne wlipaa xkiiz Diox nake, ne nkey tsiin leettsou reta goo zha kuu nyelaaze. ¹⁴ Re goo wets'n ne btan na, reta goo ne leettsa mreke leeka re tawlaz goo dits goo, mkez leettsou goo, leeka taxal mkez leettsou re zha Jesús kuu nzo yezlyu Judea, leettsa mreke re tawlaz nee zha Israel dits zha. ¹⁵ Ne leeka re zha Israel mbeth Jesús Zha Nabee lo'aa, taxalka mbeth zha

re profet kuu ngoo ndala, ne leeka lee re zha mloo nee laz nee. Thitanax nlat re zha'a leettsoo Diox, tak kwathoz nayii zha ne zha reta zha kuu nagt zha Israel,¹⁶ ne leettsoa nlaaz nee taa nee kwent Diiz Chul chaan Jesus lo re zha kuu nagt zha Israel, tsa no zha tsow gan yalnaban kuu thitanax, nlat re zha'a tsow neey. Per tenzhee mod masraa ntsib zha falt dits zha. Per lee nallee yalnayii chaan Diox ngela'a dits re zha'a.

Paba nlaaz ya yez Tesalónica tedib welt

¹⁷ Re goo wets'n ne btan na, tegal ngwiit nee goo por lutta tyemp ne tegal yent nee lo goo, per thibka nzo goo yek nee, ne ntelaaz nee goo ne kwathoz nlaaz nee ya nee lo goo tedib welt.¹⁸ Na Paba, tyen welt ng-walaz'n gayal'n lo goo, ne noga re zha kuu ndeke dits'n, per lee Maxuuy mlaat gaya nee.¹⁹ Tak goo nak kuu ndobke leettsoo nee, yalnaley chaan nee ne kuu ley nee, or kuu kaltaa'aa lo Jesucrist Zha Nabee, leettsa bretab Jesucrist tedib welt.²⁰ Wlipaa na, goo nak kuu nley nee ne kuu tsow naley nzo leettsoo nee.

3

Paba mtaal Tim lo re zha yez Tesalónica

¹⁻² Ne tak xegt raa leettsoo nee, tak net nee naa xa nzi goo nyelaaz goo Jesus, kona mtaal nee wets Tim lo goo, ne lee nee myaanka yez Atenas. Lee Tim nak thib zha kuu nke rtsin Diox, ne ndaa kwent Diiz Chul chaan Jesucrist thibka kon nee, mtaal nee zha, tsa koney zha leettsoo goo ne tsaa teni zha goo, tsa masraa ney to goo yelaaz goo Jesus,³ tsa neeka thib goo laat yelaaz raa Diox por re yalti kuu ngeriid goo. Tak ne'a goo lee'aa ndoblo ridaa yalti.⁴ Ne leettsa bee nzi nee lo goo ne'a nee lo goo, lee'aa ndoblo ridaa yalti ne reta goo ne tata ngoke.⁵ Kona mkezt raa leettsoon, tak net'n naa xa nzi goo nyelaaz goo Diox, kona mtaal'n Tim lo goo, tsa tak nen xa nzi goo nyelaaz goo Jesus, tak kwathoz ntsow'n xgab, lee Maxuuy cha ngekedi goo ne ngego Maxuuy goo net went ne lee tsin kuu mtsow nee lortsint.

⁶ Per lee nal lee Tim mretaba ndyaad ngwa lo goo, ne mndaa Tim kwent naa xa nzi goo nyelaaz goo Jesus ne xa nke leettsoo goo thib goo ne tedib goo. Noga ne Tim naa xa ntelaaz goo nee, ne kwathoz nlaaz goo wii goo nee tedib welt, leeka taxal nlaaz nee wii nee goo.⁷ Kona re goo wets'n ne btan na, tegal kwathoz ngeriid nee yalti, per or mbin nee lee re goo thib nyelaaz goo Zha Nabee, kwathoz naley ne ney ngoo leettsoo nee.⁸ Tak thibka nali nzi goo nyelaaz goo Zha Nabee, kona ntsow kwathoz wen nzo leettsoo nee.⁹ Kona, neeka napt nee diiz par taa nee texkix lo Diox por goo, tak ntsow goo kwathoz laz nee ne naley nzo leettsoo

nee lo Diox re'aa.¹⁰ Kona tse ne yaal thibka ngenaab nee lo Diox, tsa ya nee lo goo tedib welt, tsa loo nee re kuu ter yen goo tak nyelaaz goo Diox.

Paba mndaa texkix lo Diox

¹¹ Thibka ngenaab nee lo Xutaa Diox, ne lo Jesucrist Zha Nabee, tsa tsow zha ayud nee tsa yatwii nee lo goo.¹² Noga naab nee tsa lee Zha Nabee tsow masraa ke leettsoo goo thib goo ne tedib goo, kon dib ndroo leettsoo goo ne naab nee lo Diox tsa ke leettsoo goo reta men, taxalka nke leettsoo nee goo.¹³ Ne tsa thib ko goo yek goo nali ne nambi gwatsin goo lo Diox, tsa yent kwan keki zha goo lo Diox, leettsa bretab Jesus Zha Nabee lo'aa, kon re zha Jesus kuu nambi ne nali nak.

4

Xomod nlaaz Diox banaa

¹ Kona reta goo wets'n ne btan na, naab nee ne nabee nee lo goo kon yalnabee chaan Jesus Zha Nabee lo'aa: Btsow goo kuu nlaaz Diox, taxal mloo nee lo goo, ne wlipaa nget-sowa gooy per masraa btsow gooy tsa gak naroob raa goo.

² Tak ne'a goo kwan re kuu mnabee nee tsow goo kon yalnabee chaan Jesus, Zha Nabee lo'aa.³ Kuu nlaaz Diox nak gakaa zha nambi lo Diox, ne nlaazt Diox gak rop goo kon ndota zha,⁴ kona kadta thibaa ndoblo kenapaa kwerpaa, tsa nambi keno leey, tsa gak nataake lo Diox ne tsowe beeta kuu nlaaz Diox.⁵ Ndoblot gakaa taxal re zha kuu nyelaazt Jesus, re zha kuu ntsow reta kuu yu kuu nlaaz kwerp.⁶ Kona neeka thib goo ndoblot tsow goo kuu went lo altaa goo, tak teteti Zha Nabee reta zha kuu tata ntsow, taxal ne'a nee lo goo ne lee nal mre nee ni neey.⁷ Tak mlt Diox re'aa tsa tsowaa kuu went, sinke mli Diox re'aa tsa gakaa zha nambi lo Diox.⁸ Kona loka cho taat yek gon diiz re koree, nagt lo men ngeyont zha diiz, sinke lo Diox kuu mndaa Mbi Nayon chaan lo'aa ngeyont zha diiz.

⁹ Ne ndechet raa keen lo goo naa xomod ndoblo ke leettsoo goo thib goo ne tedib goo, tak leeka Diox mloo lo goo naa xomod ndoblo ke leettsoo goo thib goo ne tedib goo.¹⁰ Ne leeka tata nke leettsoo goo re wetsaa ne re btanaa kuu nyelaaz Jesus kuu nzo yezlyu Macedonia. Per lee nee naab nee lo goo thib wiz ne tedib wiz masraa ndoblo bke leettsoo altaa goo.¹¹ Ndoblo wen kwin goo kon reta men, ne btsow goo kuu ndoblo goo tsow goo, ne bke goo tsii tsa tsanaa goo kuu ndeche goo taxal mloo nee lo goo.¹² Tsa neeka thib kwaa gagt falt lo goo, tsa ndechet naab gooy lo tedib zha ne tsa loozi zha goo sinke wen tediz zha goo.

Xomod bretab Jesucrist tedib welt

¹³ Reta goo wets'n ne btan na, nlaaz nee yen goo naa kwan gak kon re zha kuu ngutha ne ngwalaaz Jesús, tsa yot nalatt leettsoo goo, taxal nzo leettsoo re zha kuu laat lo yalti. ¹⁴ Tak os lee'aa nyelaazaa lee Jesús nguth ne mroban, tataka lee Diox teroban re zha nguth kuu ngwalaaz Jesús.

¹⁵ Kona ni nee lo goo leeka re diiz kuu ne Zha Nabee lo nee, lee re'aa kuu bee nabanka leettsa yaad Jesús Zha Nabee, nagtaa zha kuu ner ner tsaal kon Zha Nabee, sinke ner re zha kuu ngutha tsaal kon lee zha. ¹⁶ Tak leettsa bretab Jesús Zha Nabee lo yezlyuree, kwathoz ney ne kon yalnabee ni Jesús, noga thib mandad chaan Diox kuu ney, dib gan nzo zha kwez zha, ne noga trumpet chaan Diox tez, tsa lee Jesús yaad lobee, ne ner re zha kuu ngutha ne ngwalaaz Jesús roban. ¹⁷ Tsaraa lee re'aa kuu bee nzika lo yezlyu ree lit zha lee tsa tsaalaa kon re zha'a ne kon Zha Nabee lobee, ne tsya lee re'aa thitanax yetsinaa lo Zha Nabee. ¹⁸ Kona bloney goo leettsoo thib goo ne tedib goo kon re diiz ree.

5

¹ Kona re goo wets'n ne btan na, lee wiz ne or kuu gak re koree ndechet raa kee nay lo goo,² tak wen ne goo lee wiz kuu bretab Zha Nabee, taxal thib wann kuu nla yaal tsine, or kuu neeka ndate leettsoo goo. ³ Leettsa lee re men gab: "Wen nzi'aa ndechet raa ya leettsoo'aa por neeka thib kwaaw", ora lee wiz kuu rid zha yalti tsin, taxal nlaaz leettsoo thib ngot kuu gal zhiinn, ne gagt laa zha lo yalti. ⁴ Per lee re'aa wets'n ne btan na, nxitaa lo yalkow par tsin wiz kuu bretab Zha Nabee lo'aa taxal nla wann kuu ngebeta lee. ⁵ Tak retalee zha tse nakaa ne lo xni chaan Diox nzi'aa, nagtaa zha yaal ne neeka nzitaa lo yalkow. ⁶ Kona ndoblo list yetsinaa ne ndoblot gataa taxal tedib net re zha kuu naxat, sinke ndoblo gakaa taxal thib zha kuu ngobee ne nke-nap. ⁷ Tak lee re zha kuu nzhat, yaal nzhat zha, ne lee re zha kuu nzhuu yaal nke zha yalgwi. ⁸ Per lee'aa zha tse nakaa; kona ndoblo thibka kobee'aa ne thib nali to'aa yelaazaa Jesucrist ne ke leettsoo altaa'aa, tak tsa nakaa taxal soldad kuu nzo yiib pech ne list ndo. Ne ndoblo thibka telaazaa lee'aa ngebetaa taa Jesucrist yalnaban lo'aa, tak tsa nakaa taxal soldad kuu now yek kon bchuyip. ⁹ Tak mlit Diox re'aa tsa teti Diox re'aa, sinke mli Diox re'aa tsa por Jesucrist Zha Nabee lo'aa taa Diox yalnaban lo'aa. ¹⁰ Lee Jesucrist nguth kwentaa tsa thibka yo'aa kon Jesucrist, tegal ngutha lee o bee nabanka lee. ¹¹ Kona bloney goo leettsoo thib goo ne tedib goo, tsa zhen goo lo kwent chaan Diox, taxal ngetsowa gooy nal.

Paba mteni re zha kuu nyelaaz Jesús

¹² Re goo wets'n ne btan na, kon dib ndroo leettsoo nee naab nee lo goo, bin goo diiz lo re zha kuu nke rtsin Zha Nabee lo goo, tak re zha'a nak zha kuu ntsow xgab goo ne re zha'a nteni goo. ¹³ Ndoblo wen wii goo lo zha ne bke leettsoo goo zha kon dib ndroo leettsoo goo, por tsin kuu ntsow zha lo goo. Ne noga ndoblo wen kwin goo thib goo ne tedib goo.

¹⁴ Ne noga nabee nee lo goo, kox re zha tsaab kuu nlaazt ke tsin lo goo, bloney goo leettsoo re zha kuu yent gan leettsoo nyelaaz Diox, btsow goo ayud re zha kuu neyt ndo nyelaaz Diox, ne bxek leettsoo goo bne goo reta men.

¹⁵ Ne wen wii goo naa kwan tsow goo, tak went tsow goo kuu went lo thib taben goo kuu mtsow kuu went lo goo, sinke ndoblo thibka wen tsow thib goo lo tedib goo ne lo reta men.

¹⁶ Thibka naley bloo goo leettsoo goo.

¹⁷ Ne thibka btediz goo lo Diox. ¹⁸ Taa goo texkix lo Diox por reta kwaa, tak koree nak kuu nlaaz Diox tsow retalee kuu nyelaaz Jesús.

¹⁹ Ne bin goo diiz kuu nlaaz Mbi Nayon ne Mbi Nayon lo goo. ²⁰ Ne ndoblot gab goo nataagt re kuu mni re profet,²¹ per ndoblo wen wen tsow goo xgab re kuu mni zha, ne ndoblo kayaa goo reta kuu wli ne re kuu wen,²² ne blaa goo tsowt goo reta kuu went.

²³ Nlaz'n lee Diox kuu ntsow wen nzi'aa, tsow thitanax nambi yaan goo lo Diox ne tsow Diox thitanax gak goo zha Diox, tsa kenap Diox kwerp goo, xbi goo ne yalnaban chaan goo ne dib goo, tsa yent cho keki goo, leettsa bretab Jesucrist, Zha Nabee lo'aa. ²⁴ Tak nali nak zha kuu mrezaa ne wlipaa takenap zha goo.

Re diiz bluz kuu nzhab Paba

²⁵ Re goo wets'n ne btan na, noga naab'n lo goo bnaab goo lo Diox por nee.

²⁶ Bni goo "diox" lo reta wetsaa ne lo re btanaa kwent chaan nee; ne kon dib ndroo leettsoo goo dow goo thib chut cho kwat re zha thib mod nali. ²⁷ Ne kon yalnabee chaan Zha Nabee naab'n lo goo, blab goo yeets ree lo reta zha kuu nak zha Jesús.

²⁸ Nlaz'n lee Jesús Zha Nabee lo'aa loo yalnkelaaz chaan lo reta goo.

jTbaa gake!

Paba

Yeets mrop kuu mkee Paba lo re zha yez Tosalónica

*Paba mni "diox" lo re zha yez Tosalónica
kuu nyelaaz Jesus*

¹ Na Paba, Silvano ne Tim, ngekee nee yeets ree lo re goo kuu nyelaaz Jesús kuu nzo yez Tosalónica, re goo kuu nak zha Diox kuu nak Xutaa, ne zha Jesucrist Zha Nabee lo'aa. ² Nlaz'n lee Diox kuu nak Xutaa ne Jesucrist Zha Nabee lo'aa, loo yalnkelaaz chaan lo goo tsa wen kwin goo.

*Diox naab kwent lo re zha kuu ndab falt
leettsa bretab Jesucrist*

³ Reta goo wets'n ne btan na, ndoblo thibka taa nee texkix lo Diox por goo taxal ndoblo tsow nee, tak thib wiz ne tedib wiz masraa nali nzi goo nyelaaz goo Jesús ne masraa nke leettsoo goo thib goo ne tedib goo. ⁴ Ne or nteth nee goo lo re wetsaa ne lo re btanaa kuu nzo tedib yez, kwathoz wen nyoo leettsoo nee, tak ney nzi goo nyelaaz goo Diox ne tak nxek leettsoo goo, leettsa ndreke zha dits goo ne leettsa ndakti goo. ⁵ Ne reta koree nloo lee Diox nali naab Diox kwent lo reta men, ne ndoblo'aa tabaa ta nabee Diox tak kona ngeriidaa yalti nal.

⁶ Ne wenka teti Diox re zha kuu nteti goo nal, ⁷ ne lee re goo kuu ngeriid yalti nal, Diox tsow thibka neyy goo kon nee, per lee koree gak, or kuu lee Jesús Zha Nabee lo'aa yaad xid loz bel lobee kon re mandad Jesús kuu kwathoz ney. ⁸ Yaad Jesús tsa teti Jesús re zha kuu ndaat yek yelaaz Diox, ne re zha kuu nhont diiz lo Diiz Chul chaan Jesucrist, Zha Nabee lo'aa. ⁹ Lee re zha'a rid yalti thitanax, ne yot zha lo Diox ne lo xni thoz chaan Diox. ¹⁰ Ne lee wiz kuu bre Zha Nabee, tsa lee re zha zha gol lo zha, re zha kuu nali nak lo zha ne lee re zha kuu ngwalaaz zha tsegey leettsoo wii zha. Tak mkayaa goo xkiiz Diox kuu mndaa nee kwent lo goo.

¹¹ Kona thibka naab nee lo Diox tsa tsow Diox ban goo ne tsow goo taxal ndoblo ban re zhiinn Diox. Noga naab nee lo Diox tsa tsow Diox ayud goo kon yalney chaan Diox, tsa tsow goo re kuu wen kuu nzo yek goo tsow goo ne re kuu ntsow goo tak nyelaaz goo Diox. ¹² Tsa lee le Jesucrist Zha Nabee lo'aa gak nataak lo'aa, ne tataka gak nataakaa lo Jesucrist, por yalnkelaaz chaan Xutaa Diox ne yalnkelaaz chaan Jesucrist Zha Nabee lo'aa.

¹ Lee nal keen lo re goo wets'n ne btan na, kwent chaan pol bre Jesucrist Zha Nabee, ne leettsa tsaalaa kon lee zha. Kona naab nee lo goo, ² gagt chop xgab goo ne neeka yat leettsoo goo por ndota kwa, leettsa gon goo lee wiz kuu bretab Zha Nabee mzina. Os lee thib zha gab: "Mbi Nayon chaan Diox mlooy lon", o gab zha: "Tata mbin na nzhab tedib zha", o os lee zha gab zha: "Na mkayaa thib yeets kuu mkee Paba ta ndaa Paba kwent lee wiz kuu bre Zha Nabee mzina", yelaazt gooy. ³ Taat goo diiz kedi neeka thib zha goo lo re koree. Tak leettsa bee ter tsin wiz kuu lee Zha Nabee bre, ndoblo tsin wiz kuu leettsa lee kwathoz zha laa Diox. Ne re wiza loo thib zha kuu thitanax nataagt Diox lo, zha kuu naka diiz lux. ⁴ Zha'a gak zha kuu yii ne Diox, ne yii zha ne zha re diox kuu wlit nak Diox. Ne asta ya zha ne tob zha leen gwodoo chaan Diox ne gab zha lee zha nak Diox.

⁵ ¿Chu ntelaazt goo leettsa bee ndon lo goo mnin koree lo goo? ⁶ Ne nal ne'a goo nzo thib yalnabee kuu nlaat tsin zha kuu thitanax nataagt Diox lo, lee zha'a yaad asta wiz kuu ndoblo yaad zha. ⁷ Per lee re kuu went kuu nzogaats, kuu nzo yek Maxuuy ngeyakle. Beeta nzhak falt kib Diox zha kuu ngetow par ngeyagt re kuu thitanax went. ⁸ Tsaraa lee zha kuu thitanax nataagt Diox lo, loo lo re men. Ne lee Jesús, Zha Nabee lo'aa kuth zha'a kon beeta xkiiz ne luux Jesús zha kon xni thoz chaan Jesús wiz kuu yaad Jesús. ⁹ Per leettsa yaad zha kuu thitanax nataagt Diox lo, yaad zha kon yalney chaan Maxuuy, ne tsow zha re kuu thoz kuu wlit kuu tetsegey leettsoo re men wii. ¹⁰ Ne lortsin zha reta kuu went, tsa kedi zha re zha kuu naka diiz ndya gabil, tak re zha'a mzhylt zha gagon zha diiz lo kuu wli, kuu nak xkiiz Diox ne mzhylt zha gake leettsoo Diox zha, tsa galaa zha lo gabil. ¹¹ Ne tak mzhylt re zha'a gayelaaz kuu wli, ta mod nlaa Diox nkedi zha zha, tsa yelaaz zha kuu wlit. ¹² Ne lee Diox teti reta men nada ne taal Diox zha gabil, tak mndaa zha yek zha gayelaaz zha kuu wli leel mas wen ngoo leettsoo zha mtsow zha kuu went.

Re zha kuu mli Diox par tsow gan yalnaban

¹³ Re goo wets'n ne btan na, thibka ndoblo nee taa nee texkix lo Diox por goo, tak kwathoz nke leettsoo Zha Nabee goo, ne desde ndala mli Diox goo, par gag goo re zha kuu ner ner tsow gan yalnaban kuu thitanax, tak lee Mbi Nayon nke tsin leen leettsoo goo ne mtsow Mbi Nayon ngok nambi goo lo Diox, tak nyelaaz goo kuu wli. ¹⁴ Ne mrez Diox goo por Diiz Chul chaan Diox kuu mndaa nee kwent lo goo, tsa no

goo keno goo xni thoz chaan Jesucrist, Zha Nabee lo'aa.

¹⁵ Kona nin lo re goo wets'n ne btan na, thib ney bto goo lo Diox ne nithlaazt goo re kuu mloo nee lo goo, ne re kuu mkee nee lo goo lo yeets. ¹⁶ Lee Jesucrist, Zha Nabee lo'aa ne Xutaa Diox kuu nkelaazaa ne mtesey leettsoo'a thitanax, mtsow ngabetaa re kuu wen thoz kuu taa Diox lo'aa por yalwen chaan Diox, ¹⁷ lee Diox koney leettsoo goo, tsa thibka nali to goo lo Diox ne tsa reta kuu ni goo ne kuu tsow goo gak kuu wen.

3

*Paba mnaab lo re zha naab zha lo Diox
tsa gon re men xkiiz Diox*

¹ Ne kuu bluz nin lo goo nak: Bnaab goo lo Diox por nee, tsa lijer gon re men xkiiz Zha Nabee reta ta, ne tsow nataak zhay leeka taxal mtsow nataak gooy leettsa mkayaa gooy. ² Noga bnaab goo tsa kenap Diox nee tsa yatsibt nee lo re zha went, ne lo re zha kuu nayii, tak ret men nyelaaaz Diox. ³ Per nali nak Zha Nabee ne lee zha tsow ney to goo ne kenap zha goo lo re kuu went kuu nlaaz Maxuuuy tsow lo goo. ⁴ Ne lee Zha Nabee ntsow, wen ne nee lee goo ngetsow goo ne tetsowka goo re kuu mloo nee lo goo. ⁵ Ne lee Zha Nabee tsow ayud goo, tsa ke leettsoo goo taben goo taxal nke leettsoo Diox goo, noga tsow Diox ayud goo, tsa xek goo taxal mxek Jesucrist.

Ndablo ke men tsuin

⁶ Reta goo wets'n ne btan na, kon yalnabee chaan Jesucrist Zha Nabee, nabee nee lo goo, beche goo lo re wetsaa kuu nlaazt ke tsuin, re wetsaa kuu tsaab, re zha kuu nzhont diiz taxal mloo nee lo goo. ⁷ Noga ne'a goo naa xomod ndablo yo goo, ndablo tsow goo taxal mtsow nee, tak thibka mke nee tsuin leettsa mrin nee lo goo ne ngogt nee zha tsaab. ⁸ Tak neeka thib welt ndowt nee loww goo tabaata. Sinke tse ne yaal mke nee tsuin tsa mnodedoot nee lo neeka thib goo. ⁹ Ne tegal ndablo nee ganaab nee kuu mndeche nee lo goo, per mtsowt neey, tak nlaazt nee teed goo tsow goo goo kuu wen taxal mtsow nee. ¹⁰ Ne leettsa bee nzi nee lo goo ne nee lo goo: Loka cho nlaazt ke tsuin neeka ndoblot zha'a wu zha. ¹¹ Tak mbin nee lee chop tson goo nket tsuin ne ndaab goo thib liz zha ne tedib liz zha ta ngebezt zha goo. ¹² Kon yalnabee chaan Zha Nabee, nabee nee lo re zha'a ke zha tsuin, tsa tsanaa zha kuu wu zha ne tabt zha ta ndoblot zha tab zha.

¹³ Nin lo re goo wets'n ne btan na, thibka btsow goo kuu wen, ne yechet leettsoo goo tsow gooy. ¹⁴ Os lee thib zha nlaazt gon diiz kuu mkee nee lo yeets ree, wii goo naa cho zha'a ne tsaalt leettsoo goo kon lee zha tsa

thoy zha. ¹⁵ Ne wiit goo zha taxal thib zha kuu nayii goo ne goo, sinke bteni goo zha taxal wets goo ne btan goo lo yalnkelaaaz chaan Zha Nabee.

Re diiz bluz kuu nzhab Paba

¹⁶ Ne lee Zha Nabee kuu ntsow wen nzi'aa, tsow wen kwin goo loka pa ta ndo goo ne kenap zha goo lo reta kuu tsow goo.

¹⁷ Na Paba, ngekeen chop tson lan diiz ree lo goo kon yaan. Tenzhee ndan firm xann re yeets kuu nkeen, tsa ne goo wlipaa na mkeey. ¹⁸ Noga nlaz'n lee Jesús Zha Nabee lo'aa, thibka loo yalnkelaaaz chaan lo reta goo.

¡Tbaa gake!
Paba

Yeets ner kuu mkee Paba lo Tim

Paba mni "diox" lo Tim

¹ Na Paba, nak'n apóstl chaan Jesucrist, Diox kuu mtelaa'aa mtaal'n ne Jesucrist Zha Nabee'aa, tak lee zha mnadaa yalney lon, tak ne zha nali nak'n ne tetsow nay, kona mto zha na tsow'n rtsin zha. ¹³ Mtsow Diox koree lon, tegal went re kuu mtsow'n lo Diox ner, mreken dits re zha Diox ne mtsalzhoon zha. Per mlat leettsoo Diox mne Diox na, tak ter yelaz'n Diox tsya ne neeka net'n naa kwan mtsow'n. ¹⁴ Per lee Zha Nabee lo re'aa kwathoz mnadaa yalwen chaan lon, ne ngwalaz'n zha, tsa mlebeen yahnkelaaz chaan zha. ¹⁵ Kwathoz wli koree ne reta men ndoblo yelaaze: Lee Jesucrist myaad lo yezlyu ree, tsa telaa zha re zha ndaa falt. Ne na nak thib zha kuu masraa mnadaa falt nake re men. ¹⁶ Per mlat leettsoo Diox mne Diox'n ne mloo Diox naa xa mkez leettsoo Diox mne Diox'n, kona tataga lon lo re zha kuu yelaaz Jesucrist, re zha kuu tsow gan yahnaban kuu thitanax. ¹⁷ Kona retalee ndoblo golaa lo Diox ne gabaa kwathoz wen nak Diox, tak anta lee zha nak rey kuu thitanax gathn ne nloot, tak beeta lee zha nak Diox. Tata ndoblo gake nal ne thitanax. iTata gake!

³ Taxal mnaab'n lo'a yaana yez Éfeso, leettsa ndo'a na net par yan yezlyu Macedonia, par nabee'a lo chop tson zha kuu nloo tedib net leyy, tsa loot raa zhay, ⁴ neeka taat zha yek zha gon zha re kwent gox kuu mtsin yek re zha ndala. Tak re koree beeta ntsow ngyodiz zha ne ntsowte ayud zha yelaaz zha Jesucrist taxal mtaan Diox diiz tsow zha, koree nak kuu naab'n lo'a nal.

⁵ Kuu nin nak: Ndoblo kelaaz men altaa men kon dib ndroo leettsoo men, kon thib xgab nali, tak nyelaaz men Jesucrist. ⁶ Nzo cho zha mlaa zha nyelaazt raa zha Jesucrist, ne ndeke zha dits tedib net re diiz kuu nlortsint. ⁷ Nlaaz zha gak zha maestr kuu loo ley chaan Diox, ne neeka nyent zha naa kwan nloo zha ne mbez zhay kon dib ndroo leettsoo zha.

⁸ Ne'aa lee ley wen nak, os lee zha nloo zhay taxal nake. ⁹ Ndoblo ne'aa koree, neeka thib ley nkekit re zha kuu ntsow kuu wen, sinke lee ley naab kwent:

lo re zha kuu ne kuu nzhab lo ley, ne ntsowte,
lo re zha kuu nzhont diize,
lo re zha kuu nyelaazt Diox,
lo re zha kuu ndaa falt,
lo re zha kuu nataagt Diox lo,
lo re zha kuu nzebt ne Diox,
lo re zha kuu nzhuth xut ne xnaa,
lo re zha kuu nzhuth men,
10 lo re zha kuu nzhak rop kon ndota zha,
lo re zha kuu nzhak rop kon tabyi,
lo re zha kuu nlowann men par tho zha men,
lo re zha kuu nkedi,
lo re zha kuu ntselo kruz par nkedi,
ne lo reta zha kuu ndaat yek gon kuu wli kuu nloo nee.

¹¹ Re koree nloo Diiz Chul. Ne Diiz Chul ree nak kuu kwathoz nataak, ne texkix Diox mtaal Diox'n tan kwente.

Paba thibka ndaa texkix lo Jesucrist

¹² Thibka ndan texkix lo Jesucrist Zha Nabee'aa, tak lee zha mnadaa yalney lon, tak ne zha nali nak'n ne tetsow nay, kona mto zha na tsow'n rtsin zha. ¹³ Mtsow Diox koree lon, tegal went re kuu mtsow'n lo Diox ner, mreken dits re zha Diox ne mtsalzhoon zha. Per mlat leettsoo Diox mne Diox na, tak ter yelaz'n Diox tsya ne neeka net'n naa kwan mtsow'n. ¹⁴ Per lee Zha Nabee lo re'aa kwathoz mnadaa yalwen chaan lon, ne ngwalaz'n zha, tsa mlebeen yahnkelaaz chaan zha. ¹⁵ Kwathoz wli koree ne reta men ndoblo yelaaze: Lee Jesucrist myaad lo yezlyu ree, tsa telaa zha re zha ndaa falt. Ne na nak thib zha kuu masraa mnadaa falt nake re men. ¹⁶ Per mlat leettsoo Diox mne Diox'n ne mloo Diox naa xa mkez leettsoo Diox mne Diox'n, kona tataga lon lo re zha kuu yelaaz Jesucrist, re zha kuu tsow gan yahnaban kuu thitanax. ¹⁷ Kona retalee ndoblo golaa lo Diox ne gabaa kwathoz wen nak Diox, tak anta lee zha nak rey kuu thitanax gathn ne nloot, tak beeta lee zha nak Diox. Tata ndoblo gake nal ne thitanax. iTata gake!

¹⁸ Tim, lu nak taxal xgann na ne kwathoz nke leettsoon lu. Koree nak kuu nin lo'a, wen btsow rtsin Zha Nabee taxal thib soldad kuu wen ngyo. Koree nak taxal nzhab re zha kuu ndaa kwent xkiiz Diox, leettsa mnadaa zha kwent chaanaa kuu nzhab Diox lo zha. ¹⁹ Kona thib bloney leettsoo'a gwalaaz Jesucrist ne thibka btsow kuu ne'a wen nak. Tak nzo chop tson zha kuu mtsowt kuu wen kuu nda leettsoo zha, ngwatsaa zha tak mlaa zha Diox. ²⁰ Tbaa mzhaak Himeneo ne Alejandr, kona mndan rop zha lo Maxuuy, tsa teed zha loozt zha Diox kon re kuu ndediz zha.

2

Paba mteni re zha tsa ne zha naa xomod ndoblo tediz zha lo Diox

¹ Tim, ndoblo gaba lo re zha kuu nyelaazt Jesú thibka ndoblo tediz zha lo Diox, ne naab zha lo Diox kwent chaan reta men, ne taa zha texkix lo Diox. ² Ndoblo naab zha lo Diox kwent chaan re rey ne reta zha kuu nak tsin, tsa wen kwinaa ne tak golaa lo Diox, ne nali bana taxal nlaaz Diox, ne ndoblo gakaa zha wen lo re men. ³ Tak koree nak kuu wen, kuu nyow leettsoo Diox kuu mtelaa re'aa. ⁴ Tak lee Diox nlaaz lee reta men keno yahnaban kuu thitanax, ne lebee zha kuu wli. ⁵ Yent raa tedib Diox thibka Diox nzo, ne thibka zha ni kwent chaanaa lo Diox nzo, zha ree nak Jesucrist. ⁶ Tak lee Jesucrist mnadaa yahnaban chaan, tsa mtuuy zha falt chaan reta men, ne Diox mtsow koree wiz kuu mli Diox tsow Diox. ⁷ Diox mlin ne mtaal'n, tsa gak'n apóstl chaan Jesucrist, tsa tan kwent kuu wli lo

re zha kuu nagt zha Israel, tsa yelaaz zha Jesucrist. Wlin kuu nin nkedit'n.

⁸ Kona nlaz'n lee re mbyi, loka ta ndo zha ndoblo tediz zha lo Diox, ne xap zha yaa zha. Ndoblo tsow zhay thib mod nali, ndoblot yii zha neeka ndoblot yodiz zha tsow zhay.

⁹ Ne lee re ngot ndoblo zha gok zha lar taxal ndobloy; ndoblot gok zha lar kuu kwathoz naap neeka ndoblot tee zha bow yek zha kwathoz narub. Neeka ndoblot lortsin zha re kuu or ne neeka re ke perla kuu kwathoz nataak. ¹⁰ Lee kuu nlaz'n nak: Lee re ngot kuu nyelaaz Diox, ndoblo tsow zha kuu wen, taxal ndoblo ban re ngot kuu nali ne ntsow kuu nlaz Diox. ¹¹ Lee re ngot ndoblo zheta tsow zha leen gwodoo, ne gon zha diiz kuu nzhon zha. ¹² Ne kuu nin nak, ndoblot loo ngot lo re mbyi ne neeka ndoblot nabee ngot lo mbyi, sinke zheta ndoblo tsow ngot. ¹³ Tak ner Adán mdexkwaa Diox, tsaraa Ev; ¹⁴ ne nagt Adán ngwalaaz kuu nzhab Maxuuy, sinke ngot ngwalaaz kuu nzhab Maxuuy, kona mndaa ngot falt. ¹⁵ Per lee ngot telaa ngot, leettsa gap ngot mbet, os lee zha thibka yelaaz zha Jesucrist, ne nkeno zha yalkelaaz, ne gak zha, zha nambi lo Diox taxal ndobloy.

3

Xomod ndoblo gak re zha gol lo re zha kuu yelaaz Jesús

¹ Wlipaa na koree, os lee thib zha nlaaz gak zha gol kuu nabee lo re zha kuu nyelaaz Jesús, kwathoz wen kuu ntsow zha xgab tsow zha. ² Kona lee re zha kuu nak zha gol kuu nabee lo re zha kuu nyelaaz Jesús, ndoblo gak zha: zha nali, tsa neeka thib men gabt lee zha ntsow kuu went, ndoblo gak zha, zha mkaa thibka ngot, ndoblo gak zha, zha nali lo reta kuu ntsow zha,

ndoblo gak zha, thib zha kuu ngobee, kuu nali ntsow xgab taxal ndobloy, ndoblo gak zha, zha nzhon men diiz lo, ndoblo gak zha, zha taa liz kwet re men, ndoblo gak zha, thib zha kuu tak taa kwent xkiiz Diox lo re men.

³ Ndoblot gak zha, zha gwiy, ndoblot gak zha, zha nkwaan zhoo, ndoblot gak zha, zha ndablaaz temi, sinke ndoblo gak zha, zha wen, ndoblo gak zha, zha kwaan kwin wen re men.

⁴ Ndoblo gak zha thib zha kuu nzhaak nabee lize,

ne tsow zha gon re zhiinn zha diiz lo zha, noga zhiinn zha ndoblo wen gak lo re men.

⁵ Tak os lee zha gagt zha nabee zha liz zha, xomod nabee zha lo re zha kuu nyelaaz

Jesús? ⁶ Kona lee zha kuu nabee lo re zha kuu nyelaaz Jesús, ndoblot gak zha thib zha kuu penta ngwalaaz Jesús, tak cha tsow yalrub gan lo zha, ne la zha lo kuu went ta mla Maxuuy, ne naab Diox kwent lo zha, taxal mtsow Diox lo Maxuuy. ⁷ Noga ndoblo gak zha thib zha kuu ndediz wen re zha kuu nyelaaz Jesús, tsa thoyt zha lo re men, ne lat zha lo kwa chaan Maxuuy.

Xomod ndoblo gak re zha kuu ntsow ayud re zha kuu nyelaaz Jesús

⁸ Leeka tata, ndoblo gak re zha kuu ntsow ayud re zha kuu nyelaaz Jesús: ndoblo gak zha, zha wen lo re men, ndoblo tsow zha kuu ni zha, ndoblot gak zha, zha gwiy, neeka gagt zha, zha ndablaaz temi.

⁹ Ndoblo yelaaz zha Jesucrist taxal mloo Diox lo re'aa, ne thibka nambi keno zha xgab zha lo re kuu tsow zha.

¹⁰ Ner ner ndoblo tsow zha thib tsiin, os lee zha wen tsow zhay, os neeka thib men gabt lee zha went mtsowe, tsaraa ndoblo gak zha thib zha kuu tsow ayud re zha kuu nyelaaz Jesús.

¹¹ Ne leeka tata ndoblo gak re ngot: ndoblo gak zha, zha wen, gagt zha, zha ndediz diiz yizh, ndoblo gol gak zha, ndoblo nali gak zha lo re kuu tsow zha.

¹² Ne reta zha kuu ntsow ayud re zha kuu nyelaaz Jesús ndoblo tenzhee gak zha: ndoblo gak zha, zha mkaa thibka ngot, ne ndoblo wen nabee zha lo re zhiinn zha ne lo re zha kuu nzo liz zha.

¹³ Tak lee re zha kuu ntsow ayud re zha kuu nyelaaz Jesús kuu wen ntsow rtsin, ntsow zha gan wen ndediz re men zha, ne tabaa tak taa zha kwent chaan Jesucrist kon dib ndroo leettsoo zha lo re men, tsa yelaaz re men Jesucrist.

Kuu wli kuu nyelaazaa

¹⁴ Ngekeen re koree lo'a; tegal ndak'n mera yatiwiin lo'a, ¹⁵ tsa os leen tsan na, ndoblo ne'a naa xomod tsowa lo re zha kuu nyelaaz Jesús, re zha kuu nak zhiinn Diox kuu naban. Lee re zha Jesús nak taxal thib yato kuu nden yuu tsa ney nay, ne ntsow re zha tsa tseet re men kuu wli chaan Jesús. ¹⁶ ¡Kona kwathoz naro nak kuu ngogaats, kuu mloo Diox lo re'aa zha kuu nyelaaz Jesucrist! Kona tenzhee ni'aa:

Jesucrist myaad ngok men lo yezlyu ree, ne lee Mbi Nayon chaan Diox mloo nali nak zha, ne lee re mandad Diox mwii zha, ne lee reta men kuu nzi dib naxta lo yezlyu mbin kwent chaan zha, ne naroob men kuu nzi dib naxta lo yezlyu ngwalaaz zha,

ne mkayaa Diox zha yibaa ta kwathoz nke xni.

4

Re zha kuu nlaa nyelaazt raa Diox

¹ Per lee Mbi Nayon chaan Diox kwathoz nambi ne: Lee re wiz bluz, nzo zha laa yelaazt raa zha Diox. Ne gon zha re kuu nlloo re mbi kuu nkedi, ne teke zha dits re yalkedi kuu nlloo Maxuuy. ² Ne yo re zha kuu kedi kuu ntsowt kuu ni. Re zha kuu ngok nad xgab ne nloot raa kuu wli lo xgab zha. ³ Re zha ree tyalt zha tseyea re men, ne neeka tyalt zha wu re men re kuu mtaan Diox par wu re men. Per lee re zha kuu nyelaazt Jesús, re zha kuu nlebee kuu wli, ndoblo zha wu zhay ne taa zha texkix lo Diox leettsa wu zhay. ⁴ Tak reta kuu mdexkwaa Diox wen nak, ne reta kuu mndaa Diox ndoblot gab men went nake, os ndaa re'aa texkix lo Diox or nkayaa re leey, ⁵ tak lee xkiiz Diox ne kuu ndedizaa lo Diox ntsow nzhak nambiy.

Thib mos chaan Jesucrist ndoblo gak zha, zha nali

⁶ Os lee'a teteeda re zha kuu nyelaazt Jesús re koree, tsasi gaka thib mos wen chaan Jesucrist. Tsa gak neya lo Diox tak nyelaaza xkiiz Jesucrist, ne teke'a dits re diiz wen kuu wli kuu mlloo zha lo'a. ⁷ Ne yelaazt re kwent gox kuu nyelaazt re men yezlyu ree, kuu ntegan yek re men. Ne thib bloo yeka bteke dits kuu wli, kuu nak ban men taxal nlaaz Diox. ⁸ Tak lutta ntsow rtsin jersis chaan kwerp yezlyu ree, per lee thib ko men yek men ban men taxal nlaaz Diox, konasi nataak lo yahnaban ree ne lo tedib yahnabana. ⁹ Diiz ree si wli, ne reta men ndoblo yelaaze. ¹⁰ Kona nke'aa tsii n ne ndridaa yalti, tak nyelaazaa Diox kuu naban ne ngebetaa zha, tak lee zha telaa retalee kuu nyelaaz zha.

¹¹ Re koree ndoblo nabee'a ne loo'a. ¹² Taata diiz gab neeka thib men lee'a nataagta, tak ndyeena; sinke ndoblo loo'a lo re zha kuu nyelaazt Jesús, lee'a nali naka lo re kuu ndediza, ne lo re kuu ntsowa, ne xa nke leettsaa tabena, ne xa nyelaaza Jesucrist ne xa nambi ndo'a lo Diox. ¹³ Thibka bloo yeka laba xkiiz Diox, bteni re zha, ne bteteed re zha kwent chaan Jesucrist asta leettsa tsin na. ¹⁴ Thibka bloo yeka blortsin re kuu nataak kuu mndelaaz Diox lo'a, leettsa mxoob re zha gol yaa zha yeka, ne mndaa zha kwent kuu nzhak Diox lo zha kwent chaana.

¹⁵ Thib bloo yeka ne btsow re koree, tsaa reta zha ne naa xa ndezhena lo kwent chaan Diox. ¹⁶ Bkenapa leeka lu, ne ndoblo ne'a naa kwan loo'a, ne thib bloo yeka bana taxal nake. Os lee'a tsowa koree, tsowa

gan yahnaban kuu thitanax ne noga reta zha kuu gon diiz re kuu ni'a.

5

Xomod ndoblo gak re zha kuu nyelaazt Jesús lo re men

¹ Ndoblo kox re zha gol lo'a, sinke bteni zha taxal xuta; lo re mndyeen bni lo zha taxal lo re wetsa, ² lo re ngot gol tsow taxal lo xnaa'a, lee lo re mndyeen got tsow taxal lo btana, ndoblo nambi to'a lo re zha.

³ Btsow ayud re ngot byud, kuu napt cho tsow ayud. ⁴ Per os lee thib ngot byud nap zhiinn o zhot, re zha'a ndoblo tsow ayud zha, tak lee zha nak zha liz ngota ne tak lee ngot byuda mkenap zha ner. Tak koree nak kuu wen kuu nyow leettsoo Diox. ⁵ Per lee ngot kuu wlipaaya myaan byud, ne myaan zha thita zha, thibka ngebet zha lee Diox tsow ayud zha, ne thibka ndediz zha lo Diox ne nzhollo zha lo Diox tse ne yaal. ⁶ Per os lee thib ngot byud ntsow loka kuu nlaaz, tegal naban per taxal zha nguth nak zha. ⁷ Bnabee re koree lo re zha kuu nyelaazt Jesús, tsa yent kwan keki re men zha. ⁸ Os nzo cho zha ndat leettsoo zha por re zha liz zha, ne re zha kuu nzo liz zha, tabaa mod nlloo zha nyelaazt zha Diox, ne mas went nak zha nake thib zha kuu nyelaazt Diox.

⁹ Lo yeets ta ke lee re ngot byud, beeta ndoblo ke le re ngot kuu nap masraa tson gal liin, ne ndoblo gake ngot kuu mkeno thibka tsaae.

¹⁰ Ndoblo nlebee re men zha por re kuu wen kuu mtsow zha:
os wen mxeen zha re zhiinn zha,
os mndaa zha liz zha mlet re zha kuu mzin liz zha,
os mteech zha nii re zha kuu nyelaazt Jesús,
os mtsow zha ayud re zha kuu mzhakti
ne os thibka ngoo yek zha mtsow zha kuu wen.

¹¹ Per keeta le re ngot byud kuu yeen lo yeets, tak lee kwerp zha cha tsow gan lo zha, ne laa zha Jesucrist, ne nlaaz zha tseyaa zha tedib welt, ¹² ne taa zha falt tak mtsowt zha kuu nzhak zha lo Diox, leettsa ngwalaaz zha Jesucrist. ¹³ Noga nyey zha nzhak tsaa zha, ne nda zha liz thib men ne tedib men; ne nagt beeta nyaan tsaa zha, noga nzhak zha, zha ndediz diiz yizh, ne ndaab zha ndediz zha re kuu ndoblot tediz zha. ¹⁴ Kona nlaz'n lee re ngot byud kuu yeen, mas wen tseyaa zha, tsaa gap zha zhiinn zha, ne nabee zha liz zha; ne taat zha diiz lo Maxuuy par tsow zha kuu went. ¹⁵ Tak nzo chop tson ngot byud, mlaa zha Jesucrist ne mnndeke zha dits Maxuuy.

¹⁶ Ne os cho thib zha kuu nyelaazt Jesús, nap zha thib ngot byud liz zha, ndoblo tsow

zha ayud zha, tsa nagt tedib net re zha kuu nyelaaz Jesús tsow ayud zha, tak lee re zha kuu nyelaaz Jesús, ndoblo tsow ayud re ngot byud kuu wlipaa ndecheay.

¹⁷ Lee re zha gol kuu wlipaa wen nabee lo re zha kuu nyelaaz Jesús, re zha kuu nloo ne ndaa kwent xkiiz Diox, ndoblo gon re men diiz lo zha. ¹⁸ Tak lo xkeets Diox nzhab: "Kota yex roo ngon leettsa nyoo ngon leen ye tsa toni maa nzob xtil". [Dt. 25:4] Noga nzhab lo xkeets Diox: "Lee zha kuu nke tsiiñ ndoblo gax kaa zha". [Lc. 10:7]

¹⁹ Yelaazta kuu nkeki zha thib zha gol kuu nabee lo re zha kuu nyelaaz Jesús, os thibka zha nkeki zha. ²⁰ Per lee re zha kuu ngetswoka kuu went, ndoblo kox zha lo'a lo re men, tsa noga tedib net zha tseb zha ne tsowt zha kuu tata. ²¹ Nabeen lo'a Tim ne ngenin diz ree lo'a delant lo Diox, lo Jesucrist ne lo re mandad kuu mli Diox, thibka btsow re koree; ne yota fabor thib zha ne tedib zha, sinke lalka btsow lo reta men.

²² Wen wen btsow xgab, leettsa xooba yaa'a yek thib zha kuu gak zha gol, kuu nabee lo re zha kuu nyelaaz Jesús, ne nayoblaazt leettsoo'a xooba yaa'a yek zha, tsa gagta zha kuu nap falt lo falt chaan tedib zha, ne nambi bto lo Diox.

²³ Ne tak nlaaz leettsoo'a kona guta beeta nit, noga gwii lut xit ub kuu myal.

²⁴ Nzo cho zha kwathoz nambi nloo falt chaan zha, leettsa terka naab Diox kwent lo zha, per nzo zha nloot falte nal, asta bluz tsaraa loy. ²⁵ Leeka tata kwathoz nambi nloo re kuu wen kuu ntsow re men; ne tegal nzo kuu went kuu nloot nal, tetsin wiz leey loo.

6

¹ Re zha kuu nyelaaz Jesús kuu nak mos, ndoblo gon zha diz lo zha kuu nabee lo zha, tsa loozt re men Diox, ne neeka loozt re men leyy kuu nloo'aa. ² Ne os lee zha kuu nabee lo mos nyelaaz Diox, ndoblot tsow nataagt mos zha, tak zha nyelaaz Jesús nak zha ne tak thibka Diox nyelaaz rop zha. Sinke lee mos ndoblo mas wen ndoblo tsow mos tsiiñ lo zha, tak wets zha rop zha ne lee Diox nkelaaz ropta zha. Koree bloo ne guz lo re men.

Paba mndaa kwent chaan re maestr kuu ndablaaz temi

³ Os lee thib zha nloo tedib leyy kuu nagt taxal kuu mloo Jesucrist Zha Nabee lo re 'aa, kuu nagt taxal leyy kuu nloo naa xomod ban men taxal nlaaz Diox.

⁴ Zha'a nak thib zha rub, ne yent kwan nyen zha, nkwaan zha ngyodiz re men. Ne lo re koree ndroo ndablaaz zha kuu nkeno tedib zha, noga nkezhyan zha, nge zha taben zha, ne nzhak chop xgab zha lo

re altaa zha, ⁵ re zha kuu nyow leettsoo yodiz, tak went nak xgab zha, mkow yek zha ne gagt lebee zha kuu wli. Ne ntsow zha xgab lo kwent chaan Diox, kuu nak ban men nali taxal nlaaz Diox, tsow zha gan temi. ⁶ Per wlipaa koree, lee re zha kuu thib ngoo yek nali ban taxal nlaaz Diox, tetsow re zha'a gan kwaro kuu taa Diox lo zha, os wen nzo leettsoo zha kon kuu nap zha. ⁷ Tak neeka thib kuu ndyaadnotaa lo yezlyu ree, ne leeka tata neeka thib kuu gwetaa leettsa gathaa. ⁸ Per os lee'aa napaa kuu dowaa ne kuu gokaa; kon kona ndoblo wen yo leettsoo'aa. ⁹ Per lee re zha kuu nlaaz gak rik, nla zha lo re kuu went; lo re yalndablaaz kuu rax, kuu ndano zha lo re yalti asta pa lux zha thitanax. ¹⁰ Tak yalndablaaz temi nak ta ndelo reta kuu went. Ne ngoo chop tson zha kuu mndablaaz temi, ne mlaa zha Jesucrist kona kwathoz mriid zha yalti.

Paba mteni Tim

¹¹ Per lee lu Tim, kuu nak zhiinn Diox. Bzhonn lo re koree, thibka bloo yeka teke'a dits re kuu nali, nali ban lo Diox, taxal ndoblo ban re zha kuu nyelaaz Diox, bkeelaaz re tabena, bkez leettsoo'a ne'a re men, ne nadoo gok lo re men. ¹² Kon dib ndroo leettsoo'a ney bto gwalaaz Diox, ne bloo gan leettsoo'a, tsa tsowa gan yalnaban kuu thitanax, tak par kona mrez Diox lu, tak asta ner mloo'a naa xomod nyelaaza Jesucrist lo kwathoz men. ¹³ Ne lee nal delant lo Diox kuu ntsow mban reta kuu nzo lo yezlyu, ne delant lo Jesucrist kuu wen mkab lo Poncio Pilat nabeen lo'a, ¹⁴ gona diz ne wen kenaapa kuu mteeda lo Diox, tsa yent cho tseey, ne neeka lu tseete, tsa yent cho gab lee lu ngetswokku went. Ne btsowe asta leettsa bretab Jesucrist Zha Nabee lo re'aa. ¹⁵ Ne lee zha bretab mer wiz kuu mli Diox. Tak beeta lee zha nak Diox kuu nhool re men lo, ne thita zha nak rey, ne nak Zha Nabee lo reta rey, ¹⁶ ne beeta lee zha naban thitanax, ne nzo zha lo xni ta neeka thib men gagt big. Neeka thib men ter wii naa xa na zha, ne neeka gagt wii zha zha. ¡Beeta lee zha nak zha ndoblo kayaa re diiz wen kuu ni re men lo zha, ne chaan zha nak yalnabee thitanax! ¡Tata gake!

¹⁷ Bnabee lo re rik, kuu nap naroob kwaa lo yezlyu ree, tsa tsow narot zha, ne kwetta zha kayaa zha kuu wen lo re kuu yezlyu ree kuu lux. Mas wen ko zha yek zha re kuu nak chaan Diox kuu nabaa, tak lee Diox ndaa naroob kuu ndeche'aa, tsa naley nzo leettsoo'aa. ¹⁸ Bnabee lo zha tsow zha re kuu wen, tsa gak zha thib zha rik lo re kuu wen kuu ntsow zha, ne thibka ko yek zha talaaz zha ne taa zha kuu nap zha lo tedib net zha kuu ndecheay. ¹⁹ Ne tabaa mod ngegotswokku naroob kwaa yibaa,

kuu gak taxal simyent kuu ney ndob lo re
kuu ngebet zha kayaa zha yibaa, ne keno
zha yalnaban kuu thitanax.

Re kuu bluz kuu mnabee Paba tsow Tim

²⁰ Wets Tim, wen btsow re kuu mkayaa'a
tsowa. Kenzata re diiz kuu nak kwent
yezlyu ree, ne neeka kenzata xkiiz re zha
kuu ntsw taxal zha kuu kwathoz nzhaak,
tak neeka lut nyent zha re kuu ndediz zha.
²¹ Nin koree, tak nzo chop tson zha kuu
mndeke dits yalnzhaak ree, kona mlaa zha
nyelaazt raa zha Jesucrist.

Nlaz'n lee Zha Nabee taa yalnkelaaz
chaan lo'a.

¡Tbaa gake!

Paba

Yeets mrop kuu mkee Paba lo Tim

Paba mni “diox” lo Tim

¹ Na Paba, nak'n apóstl chaan Jesucrist tak tabaa nlaaz Diox, ndan kwent chaan Diiz Chul kuu ndaa yalnaban, kuu mne Diox taa Diox lo re zha kuu nyelaaz Jesucrist. ² Tim ngekeen yeets ree lo'a, tak lu nak taxal xgann na, ne kwathoz nke leettsoon lu. Nlaz'n lee Diox kuu nak Xutaa ne Jesucrist Zha Nabee lo re'aa, taa yalwen chaan lo'a, ne lat leettsoo ne lu, tsa wen bana ne wen yo leettsoo a.

Thibka ndoblo taa'a kwent chaan Jesucrist

³ Tse ne yaal ndan texkix lo Diox kwent chaana ne naab'n lo zha kenap zha lu. Ne kon dib ndroo leettsoon ne kon thib xgab nambi ntsow'n rtsin zha, leeka taxal mtsow re tey'n zha ndala. ⁴ Leettsa ntelaz'n xa mbinna ne nlaz'n wiin lu, tsa naley yo leettsoon. ⁵ Tak ntelaz'n xa nyelaaza Jesucrist kon dib ndroo leettsoo'a, leeka taxal ngwalaaz zhota Loida ne xnaa'a Eunice. Ne wen nen leeka tata nyelaaza Jesucrist.

⁶ Kona ntenin lu, thibka bloo yeka tsowa re kuu nataak kuu mndelaaz Diox lo'a, leettsa mxoob'n yaan yeka ne mnaab'n lo Diox kwent chaana. ⁷ Tak mndaat Diox thib mbi chaan tseb lo'aa, sinke lee Diox mndaa Mbi Nayon kuu nkeno yalney ne yalnkelaaaz lo'aa, tsa tak nabee'aa lo kwerpaa. ⁸ Kona ndoblot thoya taa'a kwent chaan Zha Kuu Nabee lo'aa, ne neeka thoyta ne'a na tak nzon tsib, tak ndan kwent chaan zha. Bkez leettsoo'a rida yalti kuu ndyaad kwent chaan Diiz Chul chaan Zha Nabee, ne Diox taa yalney lo'a tsa xeka rida re yalti. ⁹ Tak Diox mtelaa re'aa lo yalguth, ne mrez Diox re'aa tsa keno'aa thib yalnaban nali lo Diox. Ne mtsowt Diozhe por re kuu wen kuu mtsowaa, sinke mtsow Diozhe tak tata ngwalaaz Diox, ne tak mke leettsoo Diox re'aa, ne mtsowa Diox xgab koree desde ner leettsa terka texkwaa yezlyu, kona mtaal Diox Jesucrist nguth kwent chaanaa, ¹⁰ lee nal mloo zha yalnkelaaaz chaan zha lo re'aa, tak mtaal zha Jesucrist myaad lo yezlyu ree, ne mtuyy zha re faltaa. Ne kwathoz nambi nloo Diiz Chul chaan zha, naa xomod mluux zha yalnabee chaan yalguth, ne xomod mndaa zha yalnaban kuu thitanax lo re'aa.

¹¹ Ne Diox mlin tsa gak'n apóstl chaan Jesucrist, ne mtaal zha na gak'n maestr, par tan kwent chaan Diiz Chul lo re zha kuu nagt zha Israel. ¹² Kona ngeriid'n re yalti ree nal. Per nthoyt'n, tak nen naa cho nyelaz'n,

ne wen nen lee zha nap yalney par kenap zha na, tsa tsow'n re kuu mndaa zha tsow'n, asta wiz kuu bretab zha.

¹³ Thibka bteke dits kuu wli taxal mloon lo'a; thibka gwalaaz Jesucrist, ne thibka bkeno yalnkelaaaz kuu napaa, tak nyelaazaaz Jesucrist. ¹⁴ Ne Mbi Nayon kuu nzo leen leettsoo'a tsow ayuda, tsa tak kenapa kuu mteeda lo Diox.

¹⁵ Ne ne'a lu lee reta zha kuu nzo yezlyu Asia mlaa zha na, ne xid re zha'a nzo Figelo ne Hermógenos. ¹⁶ Nlaz'n lat leettsoo Zha Nabee ne re lizta Onésiforo, tak tegal nzon tsib mthoyt zha mne zha na. Sinke kwathoz tyen welt myaad zha mtetsey zha leettsoon. ¹⁷ Ne leettsa myaad zha yez Roma, kwathoz mndiy zha mkwaan zha na, asta mza'l n lo zha. ¹⁸ Ne wen ne'a naa xa mtsow zha ayuda leettsa ngoo'aa yez Éfeso. Kona naab'n lo Diox lat leettsoo Diox ne Diox Onésiforo, wiz kuu bretab Jesucrist tedib welt.

2

Thib soldad kuu nali ndo nyelaaz Jesucrist

¹ Xgann na Tim, thib ney bto lo yalwen kuu mndaa Jesucrist lo'a. ² Re kuu mbina mndan kwent lo kwathoz men, bnabee koree lo re zha kuu ne'a tetsowe, tsa loo zhay lo tedib net zha.

³ Noga bxek rida yalti taxal thib soldad wen chaan Jesucrist. ⁴ Tak neeka thib soldad gagt tsow tedib tsiiin, tak ndoblo zha tsow zha re kuu nabee zha kuu nabee lo zha. ⁵ Leeka tata, lee re zha kuu ngith gagt tsow zha gan koron, os lee zha kith zha taxal ndoblo kith zha. ⁶ Ne noga re zha kuu nzhan, ndoblo zha ner zha kayaa xle chaan yalgonn zha. ⁷ Blobee re kuu nin lo'a, ne lee Zha Nabee tsow ayuda tsa yena retay.

⁸ Btelaaaz lee Jesucrist mroban lo yalguth, ne zha raz rey David nak zha. Koree nak Diiz Chul kuu ndan kwent. ⁹ Ne kwent chaan Diiz Chul ree kwathoz ngeriid'n yalti, ne nzon tsib taxal thib zha kuu mbeth men; per lee xkiiz Diox nzot tsib. ¹⁰ Kona nxek'n ndriid'n yalti, tsaa lee re zha kuu mli Diox, tak tsow zha gan yalnaban kuu ndaa Jesucrist, ne ndya zha yibaa thitanax ta kwathoz chul nla xni.

¹¹ Kuu wlipaak nak koree:
Os lee'aa nguthaa kon Jesucrist, noga tabanaa kon lee zha;

¹² os lee'aa xekaa ridaa yalti kwent chaan zha,

noga lee nabee'aa kon lee zha yibaa.

Os lee'aa gabaa nlebeetaa zha,

noga zha gab zha nlebeet zha lee.

¹³ Os lee'aa nagtaa zha nali lo zha, per lee zha thibka nali nak zha,
tak gagt kedi Diox leeka lee Diox.

Xomod ndoblo gak thib zha kuu wen nke tsiiñ lo Diox

¹⁴ Thibka btelaaz koree lo re zha, kon yalnabee chaan Zha Nabee, tsa yodizt zha, kon kuu ntsowt ayud neeka thib zha, beeta ntsowe nlux re zha kuu nzhone. ¹⁵ Thibka bke tsiiñ asta plo take lo'a, ne nali bto lo Diox; tsa wen tsowa rtsin zha, ne yent kwan ndoblo thoya. Nali taa kwent diiz wli chaan Zha Nabee. ¹⁶ Kenzata re kwent yezlyu ree re kuu wlit, kuu tsowt ayuda. Tak lee re diza, beeta ntsowe masraa ntsow zha kuu went kuu nlortsint. ¹⁷ Ne lee re kuu wlit kuu nloo zha nzhonn taxal yiz kangren. Ne koree mtsow Himeneo ne Fileto. ¹⁸ Lee rop zha ree mlaa kuu wli, ne mbez zha lee yal-roban mriida, ne tabaa mod nluux zha chop tson re zha kuu nyelaaz Jesucrist ne ntsow zha nzhak chop xgab zha. ¹⁹ Per lee Diox mtob thib simyent kuu ney ndob thitanax, kuu ndob thib seny kuu nzhab: "Lee Zha Nabee nlebee zha re zha zha". [Num. 16:5] Ne noga nzhabe: "Reta zha kuu nyelaaz Zha Nabee, ndoblo laa zha re kuu went".

²⁰ Leen thib yuu naro, nagt beeta kuu or ne kuu plat nzo leene, noga nzo re kuu natexkwaan kon ya ne noga re kuu natexkwaan kon ben. Lee re kuu kwathoz wen nlortsin zhay leettsa nyoo thib ani, lee tedib nete nlortsin zha gandata wiz. ²¹ Os lee'aan nambí ndo'a lo Diox, lee Zha Nabee tsow re'aa taxal thib kuu or kuu nzo liz zha, tsa lista ndo'aal lortsinaa par reta kuu wen.

²² Beche lo re kuu went kuu nlaaz re zha mnidyean, nali ban ne thibka gwalaaz Jesucrist, bke leettsoo'a re men ne wen brin kon reta men; thibka tata ndoblo tsowa, kon reta zha kuu nali kuu nzhool lo Zha Nabee kon dib ndroo leettsoso. ²³ Per kenzata re kwent naxen chaan re men nad, re men kuu nlaaz yodiz por thib kuu nlortsint, kuu beeta ntsow ngyodiz re men. ²⁴ Tak thib zha kuu nak mos chaan Zha Nabee ndoblot zha yo zha lo zhoo, sinke ndoblo wen gak zha lo reta men, ne ndoblo gak zha thib zha wen loo lo re men, noga ndoblo xek leettsoo zha lo re men. ²⁵ Ne kon yahnadoo teteeda zha re zha kuu nayii ne kuu wli, tsa neeka cha tsee Diox xgab re zha'a, tsa lebee zha kuu wli, ²⁶ ne roo mkaal lo zha ne laa zha lo kwa ta nkeno Maxuuy zha taxal zha nzo tsib, par tsow zha kuu nlaaz Maxuuy.

3

Xomod gak re men re wiz bluz

¹ Noga ndoblo ne'a koree: Lee re wiz bluz kwathoz nagan gak, ² tak tabaa gak re men: leeka lee zha rub zha zha, tablaaz zha temi, rub zha, naro gak zha,

kode zha Diox,
gont zha diiz lo xut zha ne lo xnaa zha,
taat zha texkix lo Diox,
neeka tsow nataagt zha Diox.
³ Ket leettsoo zha taben zha,
latta leettsoo zha ne zha taben zha,
looz zha taben zha,
ne tsow zha re kuu nlaaz kwerp zha,
kwathoz nakap gak zha,
ne yii zha ne zha reta kuu wen,
⁴ kedi zha re zha kuu nzaal leettsoo zha,
tsebt zha tsow zha kuu went,
legal ndrub zha,
ne kwaan zha re kuu nlaaz zha kuu nak kuu
yezlyu ree,
per kwaant zha Diox.

⁵ Ne tsow zha taxal zha kuu nali naban lo
kuu wli,
kuu nak ban men taxal nlaaz Diox,
per kon re kuu ntsow zha nloo nyelaaz zha
Diox.

Beche lo re zha'a.

⁶ Tak xid re zha'a nzo re zha kuu ndiy thib yuu tedib yuu, ne nkedi zha re ngot kuu nagant kedi zha, re ngot kuu kwathoz ndaa falt, ne thibka ntsow zha xgab tsow re kuu went. ⁷ Re ngota ntsow taxal zha kuu ngeeted, per gagt yen zha kuu wli. ⁸ Ne leeka taxal ngok bi Janes rop Jambres lo Moisés, leeka tata nzhak bi re zha'a lo kuu wli. Ne nak zha mbiyi kuu went xgab, ne ngwatsaa xgab re zha, tak mlaa zha ngwalaazt raa zha Jesucrist. ⁹ Per tsint zha tit, tak reta men ne lee zha nak zha b xen, leeka taxal mzhaak rop zha kuu ngok bi lo Moisés.

Kuu mnabee Paba lo Tim

¹⁰ Tim, per lee lu wen ndeke'a dits re kuu mloon lo'a taxal naban na, taxal tsow'n ne ne'a lu naa kwan nlaz'n tsow'n. Noga ne'a lu naa xomod nyelaz'in Jesucrist, xomod nxek leettsoon nen re men, ne xomod nke leettsoon re men. ¹¹ Noga ne'a lu xa mxek'n mriiid'n yalti, leettsa mreke re men dits'n yez Antioquia, yez Icomio ne yez Listra, ne lo reta yalti kuu mriid'n ty, lee Zha Nabee mteleaan. ¹² Ne reta zha kuu nlaaz nali ban lo Jesucrist, teriid zha yalti tereke re men dits zha. ¹³ Per lee re zha kuu went nak, ne re zha kuu nkedi, masraa thibka ntsow zha kuu went ne nkedi zha re men ne lee re men nkediga zha.

¹⁴ Per lee lu, thibka nali bto lo re kuu mteeda, kuu wen ne'a naa xomod nak. Ne wen ne'a naa cho mlooy lo'a. ¹⁵ Ne desde lutta, ne'a lu naa kwan nak xkiiz Diox. Ne leey tak loo lo'a, ne tenoy lu lo yalnaban kuu thitanax, tak nyelaaza Jesucrist. ¹⁶ Reta diiz kuu nke lo xkeets Diox, yek Diox imbrooy ne nake taxal leeka lee Diox nzhabe lo re zha kuu mkeey, ne nlortsine:
tsa nteteede re men,

tsa nkox re men loy,
 tsa nteliy re men,
 tsa nteniy re men,
 tsa nlooy lo re men naa xomod nali ndoblo
 ban re men lo Diox.

¹⁷ Tsa lee re zha kuu nak zha Diox, thitanax gak zha, zha nali lo Diox, zha ngobee ne ndoblo wen ne zha naa xomod tsow zha, reta kuu wen kuu nlaaz Diox.

4

¹ Lo Diox ne lo Jesucrist Zha Nabee, zha yaad taxal rey naab kwent lo re zha naban ne lo re zha nguth, naab'n lo'a; ² taa kwent xkiiz Diox, ne list bto taa'a kwente, leettsa tak taa'a kwente ne leettsa gagg taa'a kwente. Btsow tsa yen re zhay, ndoblo kox re zha lo'a, thibka bteni re zha, ne thibka bxek leettsoo'a ne bloo kuu wli lo re zha. ³ Tak tetsin wiz, leettsa lee re men teyeche leettsoo gon Diiz Chul kuu wli, ne kwaan zha kwathoz maest, kuu loo beeta re kuu nlaaz zha gon zha, ⁴ tsa laa zha yelaazt raa zha kuu wli, ne kenza zha re kwent gox yezlyu ree kuu nataagt. ⁵ Per lee lu thibka blobee lo reta kuu tsowa, bxek briid yalti, ne thibka btaa kwent chaan Diiz Chul, wen tsow tsin kuu mndaa Diox tsowa.

⁶ Tak lee yalnabanaan da nak taxal thib gon lo Diox, tak mera tsin wiz gath'n. ⁷ Ne kon dib ndroo leettsoon wen mbyon taxal ndobloy, mtsow'n gan lo re kuu went, tak nyelaz'n Jesucrist, mtezhooba na karrer da, ne thibka nyelaz'n Jesucrist. ⁸ Lee nal ngebet'n kayaan koron, kuu taa Zha Nabee lo re zha kuu mban nali lo zha, wiz kuu bretab zha yaad zha, leettsa nali naab zha kwent lo re men. Ne nagt beeta lon taa zha koron, sinke noga lo re zha kuu nke leettsoo Diox ne ngebet zha lee Jesucrist yaad.

Kuu nzhab Paba lo Tim

⁹ Btsow tsa tak lijer yaada yaadtwii'a lon. ¹⁰ Tak mlaa Demas na, tak kwathoz nke leettsoo zha re kuu yezlyu ree, ne ndya zha yez Tesalónica. Lee Crescente ndya yezlyu Galacia, ne lee Tito ndya yezlyu Dalmacia. ¹¹ Beeta Luk ndo lon nzhee. Bkwaan Mark tsa yaadno'a zha nzhee, tak lee zha tak tsow ayud'n lo rtsin na. ¹² Ne lee Tíquico mtaal'n nda yez Éfeso. ¹³ Leettsa yaada nzhee nlaz'n yaadno'a kapot kuu mtan na yez Troas liz Carpo, ne noga yaadno'a re yeets, per mas telaaza yaadno'a re xkeets'n kuu mas nataak.

¹⁴ Tak lee Alejandr kuu nak rrer, kwathoz kuu went mtsow zha lon; ne lee Zha Nabee kix lo zha por kuu mtsow zha lon. ¹⁵ Noga kenapa lu lo zha, tak kwathoz nayii zha ne zha kuu nda re'aa kwent.

¹⁶ Leettsa lee re zha kuu nak tsin mnaab kwent lon welt ner, yent cho mtsow ayud'n,

reta zha mlaa zha na. Nlaz'n lee Diox tsowt kas re kuu went kuu mtsow zha lon. ¹⁷ Per lee Zha Nabee mtsow ayud'n ne mloo ney leettsoon, ta mod ngok mndan kwent Diiz Chul chaan zha, tsa mbin reta zha kuu nagt zha Israel Diiz Chul. Ne tabaa mod mtelaa Zha Nabean lo re zha kuu nayii taxal mbeez. ¹⁸ Ne leeka Zha Nabee telaan lo re kuu went, ne teno zha na yibaa ta nabee zha. ¡Beeta lo zha ndoblo gol reta men nal ne thitanax! ¡Tata gake!

"Diox" bluz kuu mni Paba lo Tim

¹⁹ Bni "diox" kwent chaan da lo Prisca ne lo Aquila, ne lo re liza Onesiforo. ²⁰ Lee Erast myaan yez Corinto, ne lee Trófimo ne ndak mtan na yez Milet. ²¹ Btsow tsa yaada, leettsa terka gak mbee kuu la yig. Ne lee re zha ree ni "diox" lo'a, Eubulo, Pudente, Lino, Claudia ne reta zha kuu nye-laaz Jesús.

²² Nlaz'n lee Jesucrist Zha Nabee to kon lu, ne taa re yalwen chaan lo re goo.

¡Tbaa gake!

Paba

Yeets kuu mkee Paba lo Tito

Paba mni “diox” lo Tito

¹ Na Paba, nak'n thib zha kuu nke rtsin Diox, ne nak'n apóstl chaan Jesucrist, ne mtaal zha na tsa tan kwenti chaan zha lo re zha kuu mli zha, tsa yelaaz re zha zha ne lebee zha kuu wli, kuu nak ban men taxal nlaaz Diox, ² tak ngebetaa kon dib ndroo leettsoo'aa tsowaa gan yahnaban kuu thitanax, yahnaban ree nzhab Diox taa Diox leettsa terka texkwaa yezlyu, ne nkedit Diox; ³ ne lee Diox kuu mtelaa'aa, leettsa mzin wiz kuu mli Diox, mloo Diox naa xomod nak xkiiz Diox, leettsa mtaal Diox na tan kwente lo re men. ⁴ Tito ngekeen yeets ree lo'a, tak wlipaax taxal xgann na naka, tak noga lu nyelaaza Jesús taxal na. Ne nlaz'n lee Diox kuu nak Xutaa ne Jesucrist zha kuu mtelaa'aa, loo yalwen chaan lo'a, lat leettsoo ne'a ne tsow wen kwina kon re men.

Tsiin kuu mtsow Tito yezlyu Creta

⁵ Leettsa mtan na lu yezlyu Creta, mtsow nay tsa texnata re kuu ngok falt gatexnet'n. Ndoblo kwii'a re zha gol kuu gak nabee lo re zha kuu nyelaaz Jesús kadta yez, taxal mnabeen lo'a. ⁶ Lee re zha gol kuu nabee lo re zha kuu nyelaaz Jesús ndoblo gak zha. Zha kuu yetsalt zha neeka thib kuu keki zha zha. Ndoblo gak zha, zha kuu mkaa thibka ngot, reta zhiiññ zha ndoblo nyelaaz Jesús, tsa ndoblot keki re men zhiinn zha lee re zhiinn zha wentnak ne nhont diiz. ⁷ Tak ndeche lee thib zha gol kuu nabee lo re zha kuu nyelaaz Jesús, ndoblo gak zha, zha kuu yetsalt re men neeka thib kuu keki men zha, tak rtsin Diox ntsow zha. Ndoblot gak zha: zha ntsow naro leeka lee, zha nzhab nayii, ndoblot gak zha, zha gwiyl, ndoblot gak zha, zha nkwaan zhoo, ndoblot gak zha, zha kuu ndablaaz tsow gan temi thib mod kuu went.

⁸ Sinke ndoblo gak zha: zha taa liz kwet re men, ndoblo gak zha, zha nyow leettsoo tsow kuu wen,

ndoblo gak zha, zha ngobee, ndoblo gak zha, zha nali, ndoblo gak zha, zha nambi lo Diox, ne noga ndoblo gak zha, zha nabee lo kweerp, tsa nali ne nambi keno zhay.

⁹ Ndoblo gak zha, zha kuu thitanax laat kuu mteed, kuu nak kuu wli, tsa tak loo zhay lo tedib net men, ne tak loo zha wli kuu ndaa zha kwent lo re zha kuu mbezz wli.

¹⁰ Tak kwathoz men nad nzo xid re zha Israel, re zha kuu ndota kuu ndediz ne nkedi re men. ¹¹ Taata diiz lo re zha'a sinke ndoblo towgwa roo re zha'a, tak re lizta re men ntegan zha yek lo xkiiz Diox kon kuu nloo zha, tsa tsow zha gan temi taxal ndoblo.

¹² Ne leeka thib re profet zha yezlyu Creta kuu nak leeka thib tawlaz re zha'a, nzhab lo re zha yezlyu'a: "Lee re zha yezlyu Creta, nak zha kuu kwathoz nkedi, nak zha taxal re maa kuu nayii, nzhowcho zha ne natsaab zha kee zha tsiin". ¹³ Ne wli kuu nzhab zha'a; kona kwathoz ndoblo kox re zha'a lo'a, tsa gwe zha ne nali to zha yelaaz zha Diox, ¹⁴ tsa yelaazt zha re kwent gox kuu ntsin yek re tawlaz'n zha Israel, ne neeka yelaazt zha re kuu nabee re zha kuu nlaa kuu wli.

¹⁵ Reta kwaa nambi nak lo re men kuu nambi nak xgab, per lo re zha kuu nyelaazt Diox kuu nambit nak xgab, neeka thib kuu nambit ndak zha, tak asta re xgab zha nambit nak ne net zha na kwaan nak kuu wen par tsow zhay. ¹⁶ Mbez zha nyelaaz zha Diox, per lo re kuu ntsow zha nloo nyelaazt zha Diox. Nzo zhyan leettsoo zha, nzhont zha diiz, ne thitanax gagt tsow zha kuu wen.

2

Xkiiz Diox nak kuu wli

¹ Reta kuu loo'a ndoblo gake taxal nak kuu wli kuu nyelaazaa. ² Lee re zha byi gol kuu nyelaaz Jesús, ndoblo teteeda zha:

ndoblo nali gak zha lo re kuu ntsow zha, ndoblo gon re men diiz lo zha, ndoblo gak zha, zha ngobee kuu nali ntsow xgab,

ndoblo gak zha, zha ney ndo nyelaaz Diox, ndoblo gak zha, zha nkeno yahnkelaaaz, ndoblo gak zha, zha nxek leettsoo.

³ Leeka tenzhee ndoblo teteeda re ngot gol kuu nyelaaz Jesús:

ndoblo gol tsow zha lo kwent chaan Diox, ndoblo gak zha, zha ndedizt diiz yizh, ndoblot gak zha, zha gwiyl, ndoblo loo zha kuu wen,

⁴ ne ndoblo loo zha lo re ngot mndyeen, kelaaz ngot tsaal ngot ne re zhiinn ngot,

⁵ tsa kobee re ngot re kuu tsow ngot, ndoblo nambi gak ngot,

ndoblo wen kenap ngot liz ngot, ndoblo wen gak ngot,

ndoblo gon ngot diiz lo tsaal ngot. Tsa neeka thib men looxt xkiiz Diox.

⁶ Leeka tata ndoblo kox re zha mndyeen lo'a, tsa kobee zha naa kwan ntsow zha.

⁷ Ne lo reta kuu ntsowa ndoblo loo'a wen naka, tsa ne re zha naa xomod ndoblo ban zha. Ne leettsa ngeloo'a lo re zha, btsowe taxal ndoblo tsow luy, ne nali btsowe tsa gon re zha diiz lo'a. ⁸ Ne ndoblo tediza taxal

ndobloy, tsa yent cho keki'a, ne tsa thoy re zha kuu nayii ne'aa ne yent kwan keki zha lee.

⁹ Bteni re zha kuu nak mos, tsa gon zha diiz lo reta kuu nabee patron zha lo zha, ndoblo gon zha diiz kon dib ndroo leettsoo zha, ne ndoblot kab roo zha lo patron zha.
¹⁰ Ndlobot lowann zha lo zha kuu nke zha tsiin, sinke ndoblo nali gak zha lo patron zha lo reta kuu ntsow zha, tsa kon kuu ntsow zha reta men ne kwathoz wen nak xkiu Diox kuu nlloo'aa; Diox kuu mtelaa'aa.

¹¹ Ne nal mloo'a Diox yalwen chaan Diox lo reta men lo yezlyu ree, tak mndaa Diox yalnaban kuu thitanax par re men. ¹² Lo yalwen chaan Diox, mloo Diox lo'aa ndoblo laa'aa re kuu went, re kuu ndablaaz kwerp yezlyu ree; ne ndoblo kobee'aa re kuu tsowaa lo yezlyu ree, tsa nali ne wen banaa taxal nlaaz Diox. ¹³ Ne ngebetaa gak kuu wen kuu ne Diox gak, leettsa yaad Jesucrist kuu mtelaa re'aa kon kwathoz yalney chaan zha lo xni thoz chaan zha, ne lee zha nak Diox re'aa Zha Nabee. ¹⁴ Mndaa zha leeka lee zha nguth zha kwentaa, mtelaa zha lee lo re kuu went kuu mtsowaa ne mtembi zha lee thitanax, tsa gakaa zha zha, kuu thibka kon dib ndroo leettsoo ntsow re kuu wen.

¹⁵ Koree nak kuu ndoblo loo'a, bteni re zha ne ndoblo kox re zha lo'a kon yalnabee. Ne taata diiz gont zha diiz lo'a.

3

Kuu ndoblo tsow re zha kuu nyelaaz Jesús

¹ Btsow tsa telaaz re zha gon zha diiz lo re gobyern ne lo re zha nak tsiin, ne thibka to list zha par tsow zha reta kuu wen,² ne loozt zha neeka thib men, neeka ndoblot kwaan zha zhoo, sinke ndoblo wen ne nadoo gak zha lo reta men kon dib ndroo leettsoo zha.

³ Tak noga lee ndala ngokaa zha nad mbintaa diiz lo Diox, mndabaa ne ngokaa mos lo re kuu went kuu mndablaaz kwerpaa, lo re kuu wenta mbanaa ne went ngok leettsoo'aa mne'aa chaan tedib net men; mnayii re men mne'aa, ne mnayii'aa mne'aa re men. ⁴ Per leettsa lee Diox kuu mtelaa re'aa, mloo yalwen ne yalnkelaaz chaan lo reta men yezlyu ree,⁵ tsa mtelaa Diox re'aa lo yalguth, ne nagte tak mtsowaa kuu wen, sinke mtsow zhay tak mlat leettsoo zha mne zha lee. Mtembi zha lee ne mtsow zha ngolaa tedib welt, leettsa mndaa zha Mbi Nayon lo re'aa, tsa keno'aa yalnaban kub,⁶ ne mkat leettsoo Diox mndaa Diox Mbi Nayon lo re'aa kwent chaan Jesucrist kuu mtelaa re'aa,⁷ tsa por yalwen chaan zha, tsinaa gakaa zha nali lo zha, ne kayaa re'aa yalnaban kuu thitanax kuu ngebetaa.

⁸ Ne kwathoz wli re koree, kona nlaz'n thibka ko yeka taa'a kwent re koree, tsa lee re zha kuu nyelaaz Diox thibka tsow zha xgab tsow zha re kuu wen. Re koree nak kuu wen ne nlortsine lo re men. ⁹ Per taata diiz yo re men lo re kwent kuu naxen, kuu nak chaan re teyaa zha ndala, neeka taata diiz yo re altaa re men, neeka taata diiz yodiz re men kwent re kuu nzhab lo ley chaan Moisés. Tak lo re koree ngyodiz re men ne nlortsinte neeka nataagte.

¹⁰ Os nzo cho ntsow nzhab chop net re zha kuu nyelaaz Jesús, bni lo zha thib welt o chop welt; per os lee zha gont zha diiz, bloo zha xid re zha kuu nyelaaz Jesús. ¹¹ Ne ndoblo ne'a lee mbyi'a mndab, ne leeka re kuu went kuu ntsow zha, tsow lux zha.

Kuu mnabee Paba lo Tito

¹² Leettsa taal'n Artemas o Tíquico lo'a, btsow tsa tak yaada lon yez Nicópolis, tak mtsowa na xgab tya bet'n re mbee kuu nla yig. ¹³ Btsow ayud Lisenciad Zenas ne Apolos, ne btaa re kuu ndeche zha, tsa ndaka zha xnet zha ne gagt falt neeka thib kwaaw lo zha. ¹⁴ Ne ndoblo teed re zha kuu nyelaaz Jesús, tsow zha re kuu wen ne tsow zha ayud re zha kuu wlipaan ndeche, tsa gak zha taxal thib ya kuu ndaa xle.

"Diox" bluz kuu mni Paba lo Tito

¹⁵ Reta zha kuu ndo kon na ni "diox" lo'a. Ne bni "diox" kwent chaan da lo re zha kuu nyelaaz Jesús kuu nke leettsoo lee. Nlaz'n lee Diox thibka taa yalwen chaan lo re goo.

¡Tbaa gake!

Paba

Yeets kuu mkee Paba lo Mung

Paba mni “diox” lo Mung

¹ Wets Mung kwathoz nke leettsoon lu. Na Paba, nzon tsib kwent chaan Jesucrist, ngekeen yeets ree lo'a, ne rop nee wets Tim ni nee “diox” lo'a tak thibka tsiin ntsowaa. ² Noga ngekeen yeets ree lo re zha kuu nyelaaz Jesúus zha nkaltaa liza, lo btanaa Apia, ne lo wets Arquipo, zha kuu thibka tsiin ntsow kon lee. ³ Nlaz'n lee Diox kuu nak Xutaa ne Xut Jesucrist, Zha Nabee lo'aa, taa yalwen chaan lo goo ne tsow wen kwin goo.

Xomod ney ndo Mung nyelaaz Mung Diox

⁴ Thibka ndediz'n lo Diox ne leettsa nte-laz'n lu ndan texkix lo Diox por lu. ⁵ Tak mbin na xomod nke leettsoo'a Jesucrist ne xomod nyelaaza zha, ne leeka tata naka lo reta zha kuu nyelaaz Jesucrist. ⁶ Ne naab'n lo Diox tsa lee re zha kuu ngwalaaz Diox, tak nyelaaza Diox masraa yen zha re kuu wen kuu napaa tak nyelaazza Jesucrist. ⁷ Ne kwathoz naley ngoo leettsoon ne mtsey yalnkelaaz chaana leettsoon, tak mbin na mloo neya leettsoo re zha kuu nyelaaz Jesúus.

Paba mnaab kwent chaan Onésimo lo Mung

⁸ Kona lo kwent chaan Jesucrist, kwathoz ndoblon nabeen tsowa kuu ndobloy, ⁹ kona na Paba naab'n lo'a kon yalnkelaaz. Tak zha gola na, ne nal nzon tsib kwent chaan Jesucrist, ¹⁰ nlaz'n tsowa thib yalwen lo Onésimo kuu nak taxal xgann na. Tak nzhee, ta nzon tsib nak'n taxal xut zha, leettsa mbin zha xkíz Diox kuu mndan kwent lo zha.

¹¹ Tak ndala, lee Onésimo ngok thib mos rax lo'a, per lee nal talortsin zha lo'a ne lon. ¹² Kona taal'n zha lo'a ne bkayaa zha taxal na. ¹³ Ngwalaz'n gabet Onésimo lon nzhee, tsa tsow zha tsiin kuu mtsow lu, tak kwent Diiz Chul chaan Jesucrist nzon tsib. ¹⁴ Per nlazt'n tsow'n neeka thib kuu os lee'a nlaazta, kona lee yalwen kuu tsowa lon btsowe tak nlaaza tsow luy, ne tsowt luy lafwers. ¹⁵ Ndala mlaa Onésimo lu lutta tyemp, per lee nal kayaa'a zha thitanax; ¹⁶ ne gagt raa zha taxal thib mos lo'a, lee zha nak thib wetsaa kuu kwathoz nke leettsoon. Per masraa ndoblo'a kelaaza zha nal, tak nagt raa zha beeta mos, sinke nal nak zha wetsa tak ropta goo nyelaaz Zha Nabee.

¹⁷ Kona nin lo'a Mung, os wlipaa amig da naka bkayaa zha taxal na. ¹⁸ Os lee zha kwan kuu went mtsow zha lo'a o os lee zha ndab zha thib kwa lo'a, lon naab luy.

¹⁹ Na Paba, ngekeen yeets ree lo'a Mung kon letr yaan. Na yizh kuu ndab Onésimo

lo'a; tegal tak tsow'n telaaza ndaba yalnaban chaana lon, tak na mnida kwent chaan Jesucrist lo'a. ²⁰ Wets, btsow yalwen ree lon, tak nyelaaza Zha Nabee, btsowe tsa naley yo leettsoon, tak wets ropaa tak nyelaazaa Jesucrist.

²¹ Ngekeen yeets ree lo'a, tak ntsow'n xgab tona diiz lon, ne masraa naroob yalwen tsowaa nake kuu ngenaab'n lo'a. ²² Ne noga naab'n tedib kuu lo'a, nlaz'n texneta thib yuu ta bet'n; tak ntsow'n xgab ton Diox re kuu ngenaab goo lo Diox kwent da, tsa yal'n lo goo.

Re diiz bluz kuu mni Paba lo Mung

²³ Lee wets Epafras, zha kuu nzo rop nee tsib kwent chaan Jesucrist ni “diox” lo'a. ²⁴ Noga Mark, Aristarco, Demas ne Luk, ni “diox” lo'a. Re zha ree ntsow ayud'n lo rtsin Jesucrist.

²⁵ Nlaz'n lee Jesucrist, Zha Nabee lo re'aa, taa yalwen chaan lo goo.

¡Tbaa gake!

Paba

Yeets kuu mke lo re zha Israel

Por Xgann Diox, mni Diox lo re men

¹ Ndala, kwathoz tyen welt mni Diox lo re teyaa zha ndala, ne kwathoz tyen mod mni Diox lo re zha, kon kuu nzhab re profet zha nak zha Diox; ² ne lee nal, re wiz bluz ree, mni Diox lo'aa por Xgann Diox kuu kayaa reta chaan Diox, ne kon Xgann Diox mdexkwaa Diox yezlyu ne yibaa, ne reta kuu nzo yibaa ne reta kuu nzo lo yezlyu. ³ Lee zha nak xni chaan Diox, ne leeka lee zha nak Diox; ne lee zha nden reta kwaaw kon xkiiz zha kuu ney. Ne leettsa ngwalo mtsow nambi zha lee lo re faltaa, tsa ndya zha mndob zha lad ban lo Diox yibaa.

Masraa nataak Xgann Diox nake re mandad chaan Diox

⁴ Masraa nataak Xgann Diox nake re mandad chaan Diox, tak ne'aa lee zha mkayaa thib le kuu mas nataak nake re mandad chaan Diox. ⁵ Tak neeka thib welt nzhabt Diox lo thib mandad chaan Diox:

Lu nak xgann na;
na mnda yalnaban lo'a naltserree. [Sal. 2:7]
Ne tedib ta leeka tata nzhab:

Na gak Xut zha,
ne lee zha gak xgann na. [2 Sam. 7:14]

⁶ Per leettsa mtaal Diox zha kuu nak thibka Xgann Diox lo yezlyu ree, nzhab Diox tedib ta lo xkeets Diox:

Reta mandad chaan Diox gol lo zha. [Dt. 32:43]

⁷ Ne leettsa mteth Diox re mandad, nzhab Diox:

Lee re mandad da nak taxal mbi, ne taxal loz bel.

[Sal. 104:4]

⁸ Per leettsa ndaa Diox kwent chaan Xgann Diox, nzhab Diox:

Lu nak Diox ne lee yalnabee chaana nak thitanax,

ne lee yalnabee chaana nak kuu nali.

⁹ Ne nke leettsoo'a re kuu nali ne nayii'a ne'a re kuu went;

kona lee Diox mtoba tsa nabee'a,
ne mtsow Diox mas naley nzo leettsoo'a
nake re altaa'a. [Sal. 45:6-7]

¹⁰ Noga nzhab Diox lo Xgann Diox:

Lu, nak Zha Nabee, lu mdexkwaa yezlyu ne yibaa kon yaa'a desde ndala.

¹¹ Too thib wiz ropta koree lux,
per lee lu thitanax luxta.

Ropta koree gak gox taxal lar,
¹² ne kiits luy taxal nkiits zha lar,
ne tsee luy taxal ntsee zha lar,
per lu nak Diox ne nzeeta;

ne lee yalnaban chaana thitanax luxt. [Sal. 102:25-27]

¹³ Neeka thib welt nzhabt Diox lo thib mandad chaan Diox:
Btob lad ban lon,
asta yelo tsin re zha kuu nayii ne'a xann
nii'a,

tsa tobxbub zha lo'a. [Sal. 110:1]

¹⁴ Kuu nin nak: Lee re mandad chaan Diox kuu ntsow rtsin Diox, nak taxal mbi, ne ntaal Diox zha ntsow zha ayud re zha kuu naka kwent kayaa yalnaban kuu thitanax.

2

Ndoble gonaa diiz lo Diiz Chul

¹ Kona ndoble gonaa diiz lo Diiz Chul kuu mbinaa, tsa tabtaa net. ² Tak os lee diiz kuu mndaa re mandad chaan Diox lo Moisés, mlooy lee re zha mndaa zha falt ne mbint zha diize, kona mriid zha yalti taxal ndobloy. ³ ¿Kona xomod laa'aa, os lee'aa kenaptaa yalnaban naro ree? Tak leeka Zha Nabee lo'aa mndaa kwent yalnaban ree ndala, ne tsaraa lee re zha kuu mbine mndaa kwente lo nee. ⁴ Ne Diox nak kuu mloo lo'aa lee Diiz Chul ree nak kuu wli, tak kwathoz re seny thoz mloo Diox lo'aa, kuu mzegey leettsoo'a mwii'aa, ne Mbi Nayon chaan Diox mtsow re koree taxal nlaaz Diox.

Jesucrist nak kuu mndaa yalnaban kuu thitanax

⁵ Kona mndaaat Diox yalnabee lo re mandad, tsa nabee re mandad yezlyu kub kuu ngetaa'a kwent. ⁶ Tak nzo thib ta lo xkeets Diox ta nzhab:

¿Kwan nak mbyi lo'a par ntelaaza mbyi?

¿Kwan nak re men yezlyu ree, par ntsowa xgab zha?

⁷ Lutta tyemp mtsow nataagta zha nake re mandad chaana,
per tsaraa kwathoz mtsow nataaka zha,
ne mndaa'a yalnabee lo zha, lo reta kuu mdexkwaa'a.

⁸ Lo reta kwaa mndaa'a yalnabee lo zha.
[Sal. 8:4-6]

Ne leettsa mndaa'a diiz nabee zha lo reta kwaaw, neeka thib kwaaw mlaata nabeeet zha, ne tegal ter loo lee zha nabee reta kwaaw. ⁹ Per lee nal ne'aa lee Jesús nguth por falt chaan re men, tak nke leettsoo Diox re men. Ne tegal lutta tyemp mtsow nataagt Diox zha nake re mandad chaan Diox, lee nal kwathoz mtsow nataak Diox zha, tak lee zha nguth por re men.

¹⁰ Diox mtsow Jesús thib zha kuu kwathoz nali, tak lee Jesús mdexkwaa reta kwaaw ne por lee Jesús nzo reta kwaaw, ne lee Jesús teno kwathoz men yibaa ta kwathoz chul, kona mtsow Diox nak Jesús thib zha kuu nali por re yalti kuu mriid Jesús, tak lee Jesús nak

kuu ndaa yalnaban lo'aa. ¹¹ Tak lee zha kuu ntsow nzhak nambi men lo Diox, ne lee re zha kuu nzhak nambi, thibka Xut re zha. Kona nthoyt Jesucrist ni lo'aa: "wets'n ne btan na", ¹² tak lo xkeets Diox nzhab zha: Tan kwent chaan lu lo re wets'n ne lo re btan na,
ne gol'n lo'a xid re zha kuu nyelaaz lu. [Sal. 22:22]

¹³ Noga nzhab lo xkeets Diox:

Nyelaz'n Diox. [Is. 8:17]

Ne noga nzhabe tedib welt:

Nzhee ndon kon re wets'n ne re btan na kuu mndaa Diox lon. [Is. 8:18]

¹⁴ Leeka taxal nak re zhiinnta zha kuu nzo thib yuu, thibka beel ne thibka ren nak re zha; leeka tata ngok Jesucrist beel ne ren, ne nguth zha tsa mtsow zha gan lo zha kuu nap yalnabee lo yalguth, zha'a nak Maxuuy. ¹⁵ Ne tenzhee mod mtelaa zha re zha kuu nabee yalguth lo, re zha kuu reta wiz kuu naban zha ne nzeb zha gath zha. ¹⁶ Kuu wli nak: Myaadit zha par mtsow zha ayud re mandad chaan Diox, sinke lee zha myaad par mtsow zha ayud re'aa, kuu nak raz Abraham. ¹⁷ Ne kona ngok zha men, taxal thib re wets zha, par mzin zha nak zha thib ngwleyy kuu nali kuu mtsow rtsin Diox, ne mlat leettsoo zha mne zha re men, ne leettso nguth zha, mtuyu zha re falt chaan re zha kuu nak zha yez chaan Diox. ¹⁸ Mbiidi zha yalti leettsa ngwalaaz Maxuuy gakedi zha, tsa gatsow zha kuu went, kona lee nal, tak tsow zha ayud re zha kuu nlaaz Maxuuy kedi Maxuuy.

3

Mas nataak Jesús nake Moisés

¹ Kona re goo wets'n ne btan na kuu nali nak lo Diox, lee Diox mrez goo tsa gak goo zha Diox, thibka ndoblo yelaaz goo Jesucrist, tak lee Jesucrist nak apóstl ne ngwleyy kuu kwathoz nataak lo'aa. ² Ne nali nak Jesús lo Diox, leeka taxal nali ngok Moisés lo re zha Diox, dita leettsa mtsow Moisés rtsin Diox lo re zha Diox. ³ Per masraa mtsow nataak Diox Jesús nake Moisés, leeka taxal nak thib zha kuu nta thib yuu, mas nataak zha nake yuu. ⁴ Ne reta yuu kuu nyaa, men nak kuu ndexkwaay; per Diox nak cho kuu mdexkwaa reta kwaa nzo lo yezlyu ree. ⁵ Kona nali ngok Moisés lo re zha Diox, ne ngok zha mos ne mndaa zha kwent re kuu nzhab Diox tsow Diox bluz. ⁶ Per lee Jesucrist nak Xgann Diox, ne nali nak Jesucrist lo'aa zha kuu nak zha Diox, os lee'aa thib nali nyelaazaa zha asta bluz, ne naley nzo leettsoo'aa por kuu ngebetaa taa zha lo'aa.

Tsow nadtaa leettsoo'aa, tsa tabaa roxkwanaa kon re zha Diox

⁷ Kona taxal nzhab Mbi Nayon chaan Diox lo xkeets Diox:

Os lee goo, gon goo kuu ne Diox naltsee, ⁸ tsowt nadt goo leettsoo goo, taxal mtsow re tey goo zha ndala, leettsa mtsow zha mnayiin, tak mbint zha diiz lon yubiz.

⁹ Ne tegal chop gal liin mwii re tey goo zha ndala re kuu mtsow'n, ne bee mtsowkaa zha kuu went mbint zha diiz lon.

¹⁰ Kona mnayiin mnen re zha, ne nzhap'n:

"Thibka mtsow nad zha leettsoo zha, ne mlebeet zha xnet'n".

¹¹ Kona mnayiin mnen re zha, ne nzhap'n: "Thitanax tabt zha roxkwaa zha ta mdexkwaan par roxkwaa zha". [Sal. 95:7-11]

¹² Kona re goo wets'n ne btan na bkenap goo goo, tak cha gak went leettsoo goo ne gak nad goo, ne laa goo Diox kuu naban.

¹³ Mas wen, bloo goo gan leettsoo altaa goo gandata wiz, anta yelo rid wiz naltsee, tsa neeka thib goo gagt nad leettsoo goo lo yalkedi chaan re kuu went. ¹⁴ Tak os lee'aa thib nali to'aa yelaazaa Jesucrist asta bluz taxal mndelo'aa, tsasi thibka nakaa kon Jesucrist.

¹⁵ Ne kona, nzhab lo xkeets Diox:

Os lee goo gon goo kuu ne Diox naltsee, tsow nadt goo leettsoo goo, taxal mtsow re tey goo zha ndala, leettsa mtsow zha mnayiin. [Sal. 95:7-8]

¹⁶ ¿Ne cho re zha kuu ngwalo mbin bos Diox, ne ngwalo'a mtsow zha mnayiin Diox?

¿Chu nagte re zha kuu mloo Moisés Egipto?

¹⁷ ¿Cho lo mnayiin Diox chop gal liin? ¿Chu nagte lo re zha kuu mndaa falt, re zha kuu nguth yubiz? ¹⁸ ¿Ne cho lo nzhab Diox tabt zha roxkwaa zha, ta mdexkwaa Diox par roxkwaa zha? Lo re zha kuu mbint diiz nzhab Diox kona. ¹⁹ Ne kona ne'aa, ngogt gataab re zha, tak ngok nad leettsoo re zha.

4

¹ Kona ndoblo tsebaa, tak bee ndaa Diox diiz taabaa roxkwanaa ta mdexkwaa Diox par roxkwanaa, tak cha nzo cho tsowt gan tab. ² Tak no lo'aa mndaa zha kwent Diiz Chul, leeka taxal mndaa zha kwente lo re zha'a; per mlortsint mbin re zhay, tak ngwalaazt re zha Diox. ³ Per lee re'aa kuu nyelaaz Jesucrist, nak re zha kuu tab roxkwaa taxal nzhab Diox:

Kona lo zhyan da nzhap'n lo re zha:

"Tabt zha roxkwaa zha ta mdexkwaa roxkwaa zha". [Sal. 95:11]

Ne tegal nzhab Diox koree, per ngwalo'a mdexkwaa Diox reta kwaa, desde leettsa mdexkwaa Diox yezlyu ree; ⁴ tak tedib ta lo

xkeets Diox ndaa kwent chaan wiz gaz, ta
nzhab:

Mroxkwan Diox wiz gaz,
leettsa ngwalo mtsow Diox reta rtsin Diox.
[Gen. 2:2]

⁵ Ne noga tedib ta lo xkeets Diox nzhab:
Tabt zha roxkwanaa zha ta mdexkwaan roxkwanaa
wan zha. [Sal. 95:11]

⁶ Per bee nzhak falt tab tedib net zha roxkwanaa,
ne lee re zha kuu mbin xkiiz Diox

ndala, mndaabt zha tak mbint zha diize;
⁷ kona lee Diox mre mli tedib wiz, kuu nak

naltserree. Kuu mndaa rey David kwent
bluz lo xkeets Diox, ta nzhab:

Os lee goo gon goo kuu ne Diox naltserree,
ndoblot tsow nad goo leettsou goo. [Sal.

95:7-8]

⁸ Tak os lee Josué gataa ta garoxkwan re zha Israel, gateth Diox tedib wiz. ⁹ Kona bee tak neyy re zha kuu nyelaaz Diox; ¹⁰ tak lee zha kuu ndaab ndroxkwanaa lo Diox, taneyy zha lo re rtsin zha, leeka taxal mneyy Diox, leettsa ngwalo mdexkwaan Diox re kwaan.
¹¹ Ndoblo tsow neyaa lee, tsa tabaa tyaa ta roxkwanaa, tsa yent cho gak nad leettsou, taxal ngok nad leettsou re teyaa zha ndala, tak mbint zha diiz lo Diox.

¹² Tak lee xkiiz Diox nabane ne neye, ne masraa naleey nake thib spad kuu nale rop lad, ne ndaabe asta pa mas naatsleen leettsou men, ne ndriide asta mbi nabane men, asta xgab men, noga ndriide ta nayaal re tsidh ne ndriide leen tut men. Ne nambita ney re xgab men ne re kuu nzo leettsou men tsow men. ¹³ Ne neeka thib re kuu mdexkwaan Diox gagti gaatse lo Diox; tak retay nlloo lo Diox, ne lo Diox taa'aa kwent.

Jesucrist nak ngwleyy kuu kwathoz nataak

¹⁴ Jesús nak Xgann Diox ne lee zha nak ngwleyy kuu kwathoz nataak lo'aa, ne lee zha mndaab yibaa lo Diox. Kona thib nali yo yeka yelaazzaa zha. ¹⁵ Tak lee zha nak ngwleyy kuu kwathoz nataak, ne nlat leettsou zha ne zha lee lo re faltaa; tak no zha mrid re yalti leeka taxal ndriidaay nal, per mndaat zha falt. ¹⁶ Kona ndoblo bigaa lo Diox kon dib ndroo leettsou'aa, lo Diox kuu ndob nabee yibaa, tsa ke leettsou Diox re'aa ne lat leettsou Diox ne Diox re'aa por yalwen chaan Diox, ne tsow Diox ayudaa lo re kuu ndeche'aa.

5

¹ Reta ngwleyy kuu kwathoz nataak lo re ngwleyy xid re men, Diox mli zha ne mto Diox zha tsa ni zha kwent re men lo Diox, ne taa zha gon ne re maa kuu nzhuth zha por re falt kuu ndaa re men lo Diox. ² Ne tak noga ngwleyy ndaa falt, kona nxek leettsou zha ne zha re zha kuu net kuu wen ne re zha kuu mndab xnet Diox; ³ kona no zha

ndoblo taa zha thib maa lo Diox por falt zha, ne por falt chaan reta men yez. ⁴ Ne gagt ndota zha gak ngwleyy kuu kwathoz nataak lo re ngwleyy, os lee Diox mlit zha xid re men, leeka taxal mli Diox Aarón. ⁵ Ne leeka tata, mtsow nataagt Jesucrist leeka lee Jesucrist, tsa gak Jesucrist ngwleyy kuu kwathoz nataak, sinke lee Diox mli zha, tak lo zha nzhab Diox:

Lu nak xgann na;
na mnda yalnaban lo'a naltserree. [Sal. 2:7]

⁶ Ne noga tedib ta lo xkeets Diox nzhab:
Lu nak ngwleyy thitanax,

leeka taxal ngok Melquisedec. [Sal. 110:4]

⁷ Ne leettsa mban Jesucrist lo yezlyu ree, mbinn zha, ne mnaab zha lo Diox kon dib ndroo leettsou zha, tak ne'a zha lee Diox nap yalnabee telaa zha lo yalguth, ne mbin Diox kuu nzhab zha, tak nali nak zha lo Diox. ⁸ Ne tegal Xgann Diox nak Jesucrist, per mteed zha mbin zha diiz lo Diox lo re yalti kuu mriid zha, ⁹ ne tak nali ngok zha lo Diox, kona lee zha mzin mndaa yalnaban kuu thitanax lo reta zha kuu nzhon diiz lo zha, ¹⁰ ne lee Diox mtsow ngok zha ngwleyy kuu kwathoz nataak lo'aa, leeka taxal ngok Melquisedec.

Thitanax went nda re zha kuu nyelaazt raa Jesucrist

¹¹ Kwathoz kuu nzo ne nee lo goo kwent chaan re koree, per kwathoz nagan taa nee kwent lo goo naa xomod nake, tak kwathoz xlaaz nyen gooy. ¹² Tak nda'a tyemp ngwalalaaz goo Diox, ndoblo'a gak goo maestr, leel nalraa ndeche goo loo men, re kuu mas nagant lo xkiiz Diox lo goo. Neeka lut neyt goo, nzii ndeche goo, tak gagt wu goo re kuu nzhaw zha gox. ¹³ Tak reta zha kuu nzhuu nzii taxal mbet nak zha, tak ter yen zha naa xomod nak yalnaban kuu nali. ¹⁴ Per lee kuu nzhaw re zha gox, nak par re zha kuu nzhaaka ngobee ne ne zha naa kwan nak kuu wen ne kuu went.

6

¹ Kona ndoblot raa gakaa taxal ndyeen bzhizh lo kuu nteedaa tak nyelaazzaa Jesucrist, sinke thib nda'a teke'aa tsa gakaa zha nali lo Diox. Ne ndoblot raa tethaa: re kuu ntsow ndya men lo yalguth, ne xomod ndoblo yelaaz men Diox, ² ne xomod ndoblo gakleyy men, ne xomod ndoblo xoob zha yaa zha yek re zha kuu nyelaazt Jesucrist, ne xomod roban re zha nguth, ne xomod naab Diox kwent lo re men wiz bluz.

³ Per koree tsowaa, os lee Diox tata nlaza.

⁴ Tak os lee thib zha mkayaa xni chaan Diox, ne mtsowa zha preb kuu nataak kuu mndelaaz Diox, ne mkayaa'a zha Mbi

Nayon chaan Diox,⁵ ne myen zha naa xomod wen nak xkiiz Diox, ne xomod yo yalnabee chaan Diox lo yezlyu kuu yo bluz,⁶ os lee zha tsow zha kuu went ne nyelaazt raa zha Jesucrist, gagt raa tsee zha mod went kuu nak zha, tak leey nak taxal bre zha kee zha Jesucrist Xgann Diox lo kruz tedib welt, ne ngoo zha yalnathoy Xgann Diox lo re men.⁷ Ne nak zha taxal yu kuu nzhuu nit yi kadta leettsa nla yi; ne os lee yu'a wen ndaay yalgonn lo zha kuu nzhanne, nkayaa zha reta yalwen kuu ndaa Diox;⁸ per os lee loyu'a taa yits ne re yizh kuu went, nataagt yu'a, tagode Diox yu'a ne tsaraa tey Diozhe.

Kuu ngebetaa kayaa'aa lo Diox

⁹ Re goo wets'n ne btan na, tegal tabaa nedidiza, per wen ne nee lee re goo kayaa re kuu wen ne yalnaban kuu thitanax.¹⁰ Nali nak Diox ne nthlaazt Diox re kuu wen kuu mtsow goo, leettsa mtsow goo ayud re zha kuu nyelazt Jesús lo yalwen goo, ne nal bee ngetswoka gooy.¹¹ Ne leeka tabaa nlaz nee loo goo nke leettsoo goo taben goo asta bluz, tsa wlipaa ne goo lee goo tekayaa goo kuu ngebet goo kayaa goo wiz bluz.¹² Nlaazt nee gak goo zha tsaab, sinke thib hteke goo btsowka goo kuu mtsow re zha kuu wlipaa ngwalaaz Diox, ne mxek leettsoo zha ngebet zha, tsa kayaa zha kuu nzhab Diox taa Diox lo zha.

¹³ Leettsa nzhab Diox koree lo Abraham, lee Diox nak cho nzhabee, tak yent raa cho mas naro lo Diox par gateth Diox zha;¹⁴ ne nzhab Diox lo Abraham: "Wlipaa na kwathoz kuu tan lo'a ne tsow'n lee razak kwathoz noroob men". [Gn. 22:16-17]¹⁵ Ne mxek leettsoo Abraham mlet Abraham, tsa mkayaa zha kuu nzhab Diox taa Diox lo zha.¹⁶ Ne leettsa lee thib zha ntselo kruz; ntselo zha por thib zha kuu mas naro nake lee zha; ne leettsa mbbez zha thib kwwaa ne ntselo zha kruz, yent raa kwan kuu yodiz zha.¹⁷ Kona leeka tata mtsow Diox kon kuu nzhab Diox taa Diox, tak nambi ngwalaaz zha loo zhay lo re zha kuu kayaa kuu nzhab zha taa zha, ne tetsow zha kuu ne zha ne tseet zha xkiiz zha.¹⁸ Kona nzo chop kuu gagt tsee, ne Diox nkedit Diox lo koree; kona thib naley nzo leettsoo'aa ngekwaanaa kenap Diox re'aa, ne thibka nzo yekaa kuu ngebetaa kayaa'aa, kuu ne Diox taa Diox lo'aa.¹⁹ Ne kuu ngebetaa ntsow thib nali nzo leettsoo'aa ne ney ndo'aa lo Diox, leey nak taxal thib yiib kuu ntekweet bark lo nitdoo. Ne leey ntsow tak tsinaa, asta tedib lad lo lar kuu ntow leen gwodoo chaan Diox, tsa tsinaa lo Diox,²⁰ ta mndaab Jesús kwent chaanaa, par mxaal Jesús net lo'aa, ne tabaa mod thitanax nak Jesús ngwleyy kuu mas nataak lo'aa, leeka taxal, ngok Melquisedec thib ngwleyy kuu kwathoz nataak.

Jesús nak ngwleyy kuu nataak leeka taxal ngok Melquisedec

¹ Lee Melquisedec ngok rey yez Salem, ne ngok zha ngwleyy kuu kwathoz nataak lo Diox kuu ndob yibaa. Leettsa lee Abraham mretab ngwa lo zhoo, leettsa mtsow Abraham gan lo re rey, tsa lee Melquisedec mroo mzaal Abraham net, ne mnaab zha kuu wen lo Diox par Abraham,² tsa lee Abraham mndaa lo Melquisedec thib part lo tsii part, kuu mtsow Abraham gan lo zhoo. Ne lee le Melquisedec nak "rey nali"; ne lee zha ngok rey yez Salem, ne lee le yeza nak, "wen kwin men".³ Ne myaht naa cho ngok xut zha ne xnaa zha, neeka re tey zha; ne neeka yent cho mndaa kwent naa pol ngol zha ne pol nguth zha; tak lee zha ngok taxal Xgann Diox, kona thitanax ngok zha ngwleyy kuu nataak.

⁴ Ne wii goo naa xa ngok nataak Melquisedec, kona lee teyaa Abraham zha ndala mndaa thib part lo tsii part re kuu mtsow Abraham gan lo zhoo lo zha.

⁵ Ne taxal nak ley chaan Moisés, beeta re ngwleyy kuu nak raz chaan Leví, nak zha kuu ndoblo kayaa thib part lo tsii part lo reta kuu nap men, ne tegal zha liz zha re zha, ne reta zha nak zha raz chaan Abraham.

⁶ Per lee Melquisedec tegal nagt zha, zha raz chaan Leví, lee zha mkayaa thib part lo tsii part kuu mtsow Abraham gan lo zhoo, ne tegal lo Abraham mtaan Diox diiz, per lee Melquisedec mnaab lo Diox, tsa taa Diox naroob kuu wen lo Abraham.⁷ Ne yent cho tak gab wlit koree, tak lee zha kuu naab kuu wen par tedib men, zha'a masraa nataak nake zha kuu kayaay.⁸ Ne nzhee xidaa, zha nzhatk kuu nkayaa thib part lo tsii part kuu ntsowaga gan, per lee xkeets Diox ndaa kwent chaan Melquisedec, taxal thib zha kuu nabanka.⁹ Ne tak gabaa, lee Leví ne reta ngwleyy kuu mroo lo raz chaan Leví, re zha kuu mkayaa thib part lo tsii part chaan re teyaa, noga re zha'a mndaa zha thib part chaan zha lo Melquisedec, leettsa lee Abraham mndaay lo Melquisedec;¹⁰ kona lee kuu wli nak, leettsa lee Melquisedec mroo mzaal Abraham, terka keno Abraham re zha kuu gak raz Abraham tsya, tak lee re zha'a bee nzo zha leen kwerp Abraham tsya.

¹¹ Kona os lee re ngwleyy kuu nak raz chaan Leví taxal nabee ley, gatsow zha gan gagakaa zha nali lo Diox, neeka gateth Diox tedib ngwleyy kuu nak taxal Melquisedec, thib zha kuu nagt zha raz chaan Aarón, ne lee Aarón nak zha raz chaan Leví.

¹² Tak leettsa lee yalngwleyy nzee, noga ley ndoblo tsee.¹³ Ne kwent chaan Jesucrist

8

*Jesús nak ngwleyy kuu kwathoz nataak
lo trat kub*

Zha Nabee lo'aa ndaa xkeets Diox kwent, ne nagt Jesucrist, zha raz chaan Leví; tedib raz chaan re teyaa zha Israel nak Jesucrist, ne yent cho ngok ngwleyy lo raza. ¹⁴ Tak wen ne'aa, lee Zha Nabee lo'aa myaad lo raz chaan Judá, ne mtetht Moisés raza, leettsa mndaa Moisés kwent chaan raz kuu gak re ngwleyy.

¹⁵ Ne mas nambi mloo koree, leettsa myaad tedib zha kuu ngok ngwleyy, kuu nak taxal Melquisedec, ¹⁶ ne mzint zha ngok zha ngwleyy lo raz taxal nzhab ley, sinke ngok zha ngwleyy kon yalney chaan thib yalnaban kuu nlux. ¹⁷ Tak tenzhee nzhab lo xkeets Diox, leettsa ndaay kwent chaan zha:

Lu nak thib ngwleyy thitanax,
taxal ngok Melquisedec ngwleyy. [Sal. 110:4]

¹⁸ Kona lee ley nataagt raa ley nal, tak nake thib kuu neyt ne nlortsint raay nal, ¹⁹ tak lee ley kuu mndaa Diox lo Moisés, yent kwan mtsow tsa gagakaa zha nali lo Diox. Per nal napaa ne ngebetaa thib kuu mas wen, ne por leey tak bigaa lo Diox.

²⁰ Ne wlipaa nzhab Diox koree, per lee tedib net re ngwleyy tabaata ngok zha ngwleyy. ²¹ Per lee ngwleyy ree, wlipaa lee Diox nzhab gak zha ngwleyy, tak lo xkeets Diox ndaa kwent chaan zha, ne nzhabee:

Lee Zha Nabee nzhab tsowe ne tseet zha xkiiz zha:

"Lu nak ngwleyy thitanax". [Sal. 110:4]

²² Diox mtaal Jesús lo'aa, tsa ne'aa wli diiz kuu mtaan Diox lo'aa, mas wene nake diiz kuu mtaan Diox ndala. ²³ Ne lee tedib net re ngwleyya kwathoz zha ngoke, tak nzhab re zha kona naroob zha ngok ngwleyy kuu nataak; ²⁴ per lee Jesús nak ngwleyy thitanax, tak thitanax naban Jesús. ²⁵ Kona thitanax tak telaa Jesús re'aa lo yalguth, re'aa kuu mbig lo Diox por Jesús, tak thitanax naban Jesús ne tak naab Jesús lo Diox por lee.

²⁶ Ne lee Jesús nak ngwleyy kuu kwathoz nataak kuu ndeche'aa. Tak lee Jesús nak zha kuu nali lo Diox, ne mtsowt zha neeka thib kuu went, zhaa nak zha nake re ngwleyy kuu mndaa falt, kona mtob Diox zha ta mas ya yibaa. ²⁷ Ne nagt Jesús taxal ngok re ngwleyy kuu ngok nataak lo yezlyu ree, re zha kuu mbeth maa kadta wiz, ne ner kwent falt zha nzhuth zha maa, tsaraa nzhuth zha maa kwent falt re men yez. Per lee Jesús thibka welt mtsow Jesús por reta men, leettsa mndaa zha leeka lee zha nguth.

²⁸ Leettsa ngoo ley chaan Moisés mkwaan zha mbyi kuu naliit nak lo Diox; par ngok ngwleyy kuu nataak, per bluz lo ley kuu wlipaa nzhab Diox, lee Xgann Diox gak ngwleyy kuu nataak thitanax, tak thitanax nali nak Xgann Diox.

¹ Ne koree nak kuu mas nataak lo re kuu ngetedizaa: Napaa thib ngwleyy kuu kwathoz nataak, zha kuu ndob lab ban lo Diox, ta ndob Diox nabee Diox yibaa.

² Ne lee zha nak ngwleyy kuu nke tsiiin leen gwodoo kuu wlipaa nak gwodoo chaan Diox Ta Kwathoz Nayon, kuu mdexkwa Diox ne nagte kuu mdexkwa men. ³ Tak loka cho ngwleyy kuu kwathoz nataak, lee rtsin zha nak, taa zha gon ne kuth zha maa taa zha lo Diox, kona lee ngwleyy kuu kwathoz nataak lo'aa, no zha ndoblo taa zha thib kwaay lo Diox. ⁴ Ne os lo yezlyu ree ndo zha, neeka gagagt zha ngwleyy, tak nzi'a re ngwleyy kuu ndaa gon lo Diox taxal nabee ley chaan Moisés. ⁵ Per lee re zha ree ntsow tsiiin leen gwodoo yezlyu ree, kuu nak beeta xinn chaan gwodoo kuu wlipaa nak kuu yibaa, tak Diox mnabee lo Moisés texkwaa Moisés gwodoo taxal nzhab Diox lo Moisés: "Wii ne btexkwaay taxal kuu mloon lo'a yek yii Sinaí". [Ex. 25:40] ⁶ Per lee ngwleyy kuu kwathoz nataak lo'aa, mkayaa thib tsiiin kuu mas wen, tak por lee zha mtaan Diox tedib trat kuu mas wen lo'aa, nake kuu ner, tak lee Diox ne taa Diox kuu mas wen lo'aa.

⁷ Tak os lee trat kuu myaan Diox kon Moisés ndala, gatsowe gagak men zha nali lo Diox, gataat Diox tedib diiz kuu nak trat kub. ⁸ Per ne Diox naliit nda re mena, kona tenzhee nzhab Diox kwent chaan re zha'a lo xkeets Diox:

Toothib wiz, tsow'n thib trat kub kon re goo, zha Israel ne zha Judá.

⁹ Lee trata nagte taxal kuu mtsow'n kon re tey goo zha ndala, leettsa mzhien na yaa zha ne mloon zha yezlyu Egipo; ne tak mbint re zha diiz gatsow taxal nak trat da,

ta mod mlan zha, ne Zha Nabee.

¹⁰ Lee trat kuu tsow'n kon re zha Israel bluz, tenzhee gake ne Zha Nabee:

Keen ley da leen xgab zha,

ne kee nay leen leettsou zha.

Ne lee na gak Diox zha,

ne lee re zha gak zha yez da.

¹¹ Ne yent raa cho loo lo tedib zha; neeka lo re altaa zha neeka lo wets zha gabt raa zha:

"Ndoblo lebee'a Zha Nabee", tak reta zha lebeen,

asta zha kuu mas nataagt ne asta zha kuu mas nataak lo re zha.

¹² Ne lat leetsoon nen zha lo re kuu went kuu mtsow zha,

ne thitanax nithlaz'n re falt kuu mtsow zha.
[Jer. 31:31-34]

¹³ Ne leettsa nzhab Diox: "Taa Diox tedib trat kub", leey nak, tak mtsow goxa Diox trat kuu ner. Ne lee kuu gox mera lux.

9

Gwodoo yezlyu ree ne gwodoo yibaa

¹ Ne kona lee trat kuu ner, mnabeey naa xomod ndoblo gol men lo Diox, leen thiib gwodoo kuu natexkwaa lo yezlyu ree.
² Ne lee gwodoo'a tenzhee natexkwaa'y; lee leene ta ner le Ta Nayon, ta ndo kandeler kuu nke xni, ne lo bkoog ta ntsib zha pan kuu nayon lo Diox. ³ Ne thib le lar ntow Ta Kwathoz Nayon; ⁴ ne tyaa natexkwaa thiib bkoog or, ta nteyy ngwleyy straak, ne tyaga ndo thiib kaj kuu nzo trat kuu ner leen kuu nayi kon or dita cho. Ne leen kaja nzo thiib jar or kuu nzo manaa ne noga aga Aaroon kuu mla bzhits, ne rop ke kuu nke ley lo. ⁵ Ne dits kaj ndo chop zha kuu na taxal mandad chaan Diox, kuu le kerubin; ne lee xiil zha ntow dits kaj ta nxo re ngwleyy ren tsa tuyy Diox falt re men. Per lee nal ndechet raa tan kwent naa xomod nak re koree.

⁶ Ne, leettsa lista re koree, tsa lee re ngwleyy thiibka ndaab leen ta nayon kuu ner, tsa tsow zha rtsin zha. ⁷ Per lee Ta Kwathoz Nayon, ndaab beeta ngwleyy kuu kwathoz nataak, ne thiibka welt ndaab zha thiib liin; ne leettsa ndaab zha, ndoblo gwe zha ren chaan re maa, tsa taa zhay lo Diox, por re falt zha ne por re falt re men. ⁸ Ne kon koree nlaz Mbi Nayon ne lo'aa: Lee net kuu nzin Ta Kwathoz Nayon ter zhaale, dita leettsa lee gwodoo kuu ner nlortsinka par gol re men lo Diox. ⁹ Ne koree nak diiz nanzee kuu nlloo naa xomod nake nal. Kona nataagt re gon ne re maa kuu ndaa zha lo Diox lee roo gwodoo, tak gagt tsowe gak nambi xgab re zha kuu nhzhol lo Diox. ¹⁰ Re koree ndaa kwent chaan re kuu nzhuu men ne re kuu nzhou men, ne naa xomod ndoblo gak nambi men, re koree nak re ley chaan kwerp ne ngok nataake, asta leettsa lee Diox mndaa trat kub.

¹¹ Per lee nal myaada Jesucrist, ne lee Jesucrist nak ngwleyy kuu kwathoz nataak lo'aa, ne ndyaadno Jesucrist kuu wen lo'aa. Ne mas wen ne nali nak gwodoo ta lee Jesucrist nak ngwleyy, ne nagte kuu natexkwaa kon yaa men; kuu nlaz'n nin nak, nagte kuu yezlyu ree. ¹² Ne thiibka welt mndaaab Jesucrist leen gwodoo Ta Kwathoz Nayon, mndaaab Jesucrist par mndaaab Jesucrist ren re chib te ne ren re beser lo Diox, sinke mndaaab zha par mndaa zha leeka ren zha, tsa mzhii zha lee, ne tenzhee mod mndaa zha yalnaban kuu thitanax lo'aa. ¹³ Ne os wli lee ren chaan re ngon ne ren chaan re

chib te, ne re di chaan re beser gol kuu nteyy zha lo bkoog, kuu nlaal zha dits re zha kuu nambit, tsow nayone ne ntembiy kwerp yezlyu ree. ¹⁴ Os leey tatay, jmasraa yalnabee nap ren Jesucrist! Tak Mbi Nayon mtsow ayud zha, kona mndaa zha leeka lee zha lo Diox, tsa lee ren zha tsow gak nambi xgabaa lo re kuu went, kuu ntsow ndya'aa lo yalguth, lee nal tak ke'aa tsii lo Diox kuu naban thitanax.

¹⁵ Ne lo trat kub lee Jesucrist mtsow wen mrinaa kon Diox: Ne leettsa nguth Jesucrist mtuyy zha re faltaa kuu mtsowaa lo trat gox, tsa gakaa zha Diox ne kayaa lee re kuu ne Diox taa Diox lo re zha Diox. ¹⁶ Ne leettsa ndexkwaai thiib zha thiib trat, ndoblo gath zha kuu mdexkwaay, tsa gak nataake. ¹⁷ Ne os lee zha kuu mdexkwaay trat ngutha, tsa lee trat zha nataak, ne nataagt trat os le zha kuu mdexkwaay nabanka. ¹⁸ Kona noga trat kuu ner mtaan Diozhe kon ren. ¹⁹ Tak leettsa ngwalo mndaa Moisés kwent kuu nzhab lo ley lo re teyaa zha ndala: Tsaraa mzhien zha yits lad mbak zhiil kuu nane na, ne thiib zhit ya kuu le hisopo, ne mloo zhay leen ren chaan re beser ne leen ren chaan re chib te kuu nabexnit kon nit, ne mlaal zhay dits libr chaan ley ne yek reta zha Israel. ²⁰ Tsa nzhab zha lo re men: "Ren ree nlloo lee Diox mtaan thiib trat lo'aa, kona ndoblo gonaa diiz xkiiz Diox kuu nke lo yeets ree". [Ex.24:8] ²¹ Ne oraaka mlaal Moisés ren dits gwodoo chaan Diox, ne dits re kuu nlortsin zha leen gwodoo. ²² Ne lee lo ley nzhab: Reta kuu ndoblo gak nambiy kon ren; ne tuyyt Diox falt os lee ren zhot.

Lee ren Jesucrist ntuyy re faltaa

²³ Ne os lee re kuu nak xinn chaan re kuu nzo yibaa tenzhee ngok nambiy, kona lee re kuu wlipaak nak kuu yibaa ngok nambiy kon ren kuu mas nambi. ²⁴ Tak mndaaab Jesucrist leen gwodoo kuu mdexkwaay re men yezlyu ree, kuu nak beeta xinn chaan gwodoo kuu wlipaak; sinke mndaaab Jesucrist leen yibaa, tsa to Jesús lo Diox, tsa ni Jesús kwentaa. ²⁵ Ne mndaaab Jesús tyen welt leen gwodoo kadta liin, taxal ntsow re ngwleyy kuu kwathoz nataak, leettsa ndaab zha Ta Kwathoz Nayon, tsa ndaa zha ren kuu nagt ren zha. ²⁶ Tak os tenzheey, ndoblo gagat Jesucrist tyen welt desde leettsa mdexkwaay yezlyu. Per lee kuu wli nak, lee Jesucrist myaad thiibka welt re wiz bluz ree, ne mndaa zha leeka lee zha nguth, tsa mtuyy zha re faltaa thitanax. ²⁷ Ne leeka taxal reta men thiibka welt ndoblo gath men, ne bluz tsaraa lee Diox naab kwent lo re men, ²⁸ leeka tata, lee Jesucrist mndaa leeka lee, nguth thiibka welt, tsa mtuyy zha falt kwathoz men. Ne tsaraa yaad zha tedib welt, per welt ree yaadt zha, par tuyyt zha

falt chaan re men, sinke yaad zha telaa zha
re zha kuu ngebet yaad zha.

10

¹Tak lee ley chaan Moisés nak beeta xinn, chaan re kuu wen kuu yaadno Jesucrist kuu nak kuu wlipaa. Kona ngogt gatsow nali ley re men kuu mbig lo Diox kadta liin kon re maa kuu nzihuth zha ndaa lo Diox, taxal nabee ley. ²Ne os lee ley gatsow nambi re men lo re falt men lo Diox, ganet re men lee re men nap falt, ne gataat re men maa lo Diox. ³Per kuu wli nak, lee gon kuu ndaa zha ntsow ntelaaz zha re falt zha kadta liin, ⁴tak lee ren re ngon ne ren re chib te gagt kibe falt men.

⁵Kona leettsa myaad Jesucrist yezlyu ree, nzhab Jesucrist lo Diox:

Nlaazta kuth zha maa taa zha lo'a,
neeka nlaazta taa zha gon lo'a,
sinke mndaa'a thib kwerp lon.

⁶Nyowt leettsoo'a kuth zha maa taa zha lo'a, ne nyowt leettsoo'a teyy zha re maa gon lo'a
por re falt zha.

⁷Tsa nzhab'p'n:

"Leen ndo nzhee,
taxal ndaa xkeets Diox kwent chaan da,
Xut'n Diox, nlaz'n tsow'n kuu nlaaza". [Sal.
40:6-8]

⁸Lee ner nzhab Jesús: "Nlaazta kuth zha maa taa zha lo'a, neeka nlaazta taa zha gon lo'a, neeka nlaazta tey zha maa gon lo'a por re falt zha", ne tegal tata nabee ley. ⁹Tsaraa nzhab Jesús: "Lee na ndyal par tsow'n kuu nlaaza", koree nak, mluux Jesús trat gol, tsa lee trat kub telo. ¹⁰Ne mtsow Jesucrist ngok nambí'aa lo Diox, tak mtsow Jesucrist kuu nlaaz Diox, leettsa mndaa zha leeka lee zha mke lo kruz thibka welt ne thitanax.

¹¹Ne reta ngwleyy, gandata wiz bee ntsow zha rtsin zha, nzihuth zha maa nda zha lo Diox, ne tegal gagt tuyy koree re falt men. ¹²Per lee Jesucrist thibka welt mndaa zha leeka lee zha nguth, tsa mtuyy zha re faltaa thitanax, ne ndya zha ndob zha lad ban lo Diox. ¹³Tya ndob zha ngebet zha, asta leettsa tetsin Diox re zha kuu nayii ne zha xann nii zha, tsa tobxbub re zha'a lo zha. ¹⁴Ne por thibka gon kuu mndaa zha leeka lee zha, mtsow nambi zha re men thitanax lo Diox. ¹⁵Ne noga Mbi Nayon mndaa kwent re koree, leettsa nzhab Diox: ¹⁶"Lee trat kub kuu tsow'n lo re zha, re wiza, nak koree,

ne Zha Nabee:

Leen leettsoo zha keen ley da,
ne kee nay leen xgab zha". [Jer. 31:33]

¹⁷Ne noga ne Diox:

Thitanax nithlaz'n re falt chaan zha ne re
kuu went kuu mtsow zha. [Jer. 31:34]

¹⁸Kona leettsa lee re falt ngwalo'a myuy, ndoblot raa taa zha mas gon por re falt.

Ndoble bigaa lo Diox

¹⁹Kona re goo wets'n ne btan na, lee nal kon dib ndroo leettsoo'aa tak tabaa leen gwodoo, asta Ta Kwathoz Nayon por ren Jesucrist, ²⁰ne teke'aa dits net kub kuu ndaa yalnaban. Tak Jesucrist mxaal net ne mchat zha lar kuu ntow lo'aa Ta Kwathoz Nayon, leettsa nguth Jesucrist. ²¹Ne lee nal napa'a thib ngwleyy kuu kwathoz nataak leen gwodoo chaan Diox; ²²kona ndoble bigaa lo Diox kon dib ndroo leettsoo'aa, tak wen ne'a lee Diox kayaa'aa; ne lee Diox mtembi leettsoo'aa lo re kuu went kuu mtsowaa, ne mteech Diox kwerpa kon nit nambi. ²³Thibka ney to'aa ne gagt chop xgabaa lo kuu ngebetaa, tak nali nak Diox ne tetaa Diox kuu ne Diox lo'aa. ²⁴Noga ndoble koneyaa leettsoo altaa'aa kon yalnkelaaz ne tsowaa kuu wen. ²⁵Ndoblot laa'aa kaltaataa par golaa lo Diox, taxal ntsow te-dib net zha, sinke ndoble ko'aa gan leettsoo altaa'aa, ne masraa ndoble tsow leey nal, tak ndetsin gaxa wiz kuu lee Zha Nabee bretab.

²⁶Tak os ndaaka lee falt taxal nlaazaar, leettsa ne'aa lee kuu wli, yent raa cho kib faaltaa; ²⁷beeta ngebetaa thib yalti thoz leettsa naab Diox kwent lo'aa, ne ko Diox re'aa lo bel ta lux re zha kuu nayii ne Diox.

²⁸Leettsa lee thib zha nzhort diiz lo ley chaan Moisés, ne nzo chop tson zha gab wliy, tsa nabee zha kuth zha zha'a ne latta leettsoo zha ne zha zha'a. ²⁹¿Chu ndagt goo masraa naroob yalti ndoblo rid re zha kuu ngithno Jesucrist Xgann Diox, tak ndak zha nataagt ren Jesucrist, ne tabaa mod ntsow zha kuu went lo Mbi Nayon chaan Diox kuu nke leettsoo lee? Ne lee ren Jesús nak trat kub ne kon leey ngok nambi re'aa. ³⁰Noga ne'aa lee Zha Nabee nzhab: "Na naab kwent lo re men; na yizh lo zha". [Dt. 32:35] Ne noga nzhab zha: "Lee Zha Nabee naab kwent lo re zha zha". [Dt. 32:36] ³¹¡Kwathoz nathoz yalti rid men, os lee men tsow men kuu went lo Diox kuu naban!

³²Per btelaaz goo re wiz, leettsa mxaal Diox yek goo par mkayaa goo xni chaan Diox ne xomod mxek goo mriid goo yalti, ³³nzo chop tson goo mtsalzhoo zha goo ne mnendo zha goo lo re men, ne techop tson goo mkaltaa kon re wets goo, ne no goo mriid goo yalti kon re zha'a. ³⁴Ne mlat leettsoo goo mne goo re zha kuu nzo tsib, ne astalaz goo leettsa mkib zha re kuu nap goo, tak ne'a goo leen yibaa nap goo mas kuu wen kuu xek thitanax. ³⁵Thibka bloo goo yek goo gwalaaz goo Zha Nabee, tak tabaa mod kayaa goo kuu tsow goo gan. ³⁶Ne bxek leettsoo goo rid goo yalti, tsa leettsa mtsowa goo kuu nlaaz Diox, tsa kayaa goo kuu ne Diox taa Diox. ³⁷Tak lo xkeets Diox nzhab: Tak telutta ndo,

yaad zha kuu naka diiz yaad,
ne laket raa zha.

³⁸ Lee zha kuu thibka nali ndo lon,
taban zha tak nyelaaz zha na.

Os lee zha bre zha lo kuu yezlyu,
want yo leettsoon nen zha. [Hab. 2:3-4]

³⁹ Ne lee'a nagtaa zha kuu bre yelaaz
kuu yezlyu ree, tsa ridaa yalti, sinke lee'a
nakaa zha kuu nyelaaz Jesucrist, ne tsowaa
gan yalnaban kuu thitanax.

11

Xomod nak nyelaaz men Diox

¹ Leettsa lee thib zha nyelaaz Diox, ne
wen wen ne zha wli tekayaa zha kuu ngebet
zha, ne wen wen ne zha kon dib ndroo
leettssoo zha kuu nloot lo zha. ² Tak wen
ngoo leettssoo Diox mne Diox re teyaa zha
ndala, tak ngwalaaz zha Diox. ³ Ne tak nyel-
laazaa Diox, kona ne'aa lee Diox mdexkwa
yezlyu kon xkiiz Diox, kona lee re kuu nloo
lo'aa nal, mdexkwaay por re kuu nloot.

⁴ Tak ngwalaaz Abel Diox kona mndaa
Abel thib gon kuu mas wen lo Diox nake kuu
mndaa Caín, ta mod mkayaa Diox zha taxal
zha nali, ne mkayaa Diox gon zha. Ne kona
tegal ngutha Abel, per bee ngelooka zha naa
xomod ngwalaaz zha Diox.

⁵ Ne tak ngwalaaz Enoc Diox, kona naban
zha ndya zha yibaa, ne mkwaan re men zha,
per mzalt zha lo re men, tak lee Diox ndano
zha yibaa. Ne lee xkeets Diox nzhab, leettsa
ter teno Diox zha, wen ngoo leettssoo Diox
mne Diox re kuu mtsow zha. ⁶ Os nyelaazt
men Diox, thitanax went nzo leettssoo Diox
ne Diox men. Tak os lee thib men nlaaz big
gax lo Diox, ndoblo yelaaz men nzo thibka
Diox, ne ndaa Diox kuu wen lo re zha kuu
nkwaan Diox.

⁷ Ne tak ngwalaaz Noé kuu nzhab Diox,
leettsa nzhab Diox lo zha rid re kuu terka
loo, ne mbin zha diiz ne mdexkwaa zha thib
bark, ta ngoo re liza zha par mlaa zha. Ne
tabao mod mloo Noé lee re men yezlyu ree
ndoblo gath zha, tak nyelaazt zha Diox, ne
mtsow Noé gan myaan Noé thib zha nali lo
Diox, tak ngwalaaz Noé Diox.

⁸ Tak ngwalaaz Abraham Diox, kona
mbin zha diiz lo Diox, leettsa mrez Diox zha,
tsa ya zha yo zha tedib yezlyu, ta taa Diox
lo zha ne lo re zhiinn zha. Mroo zha laz
zha ne neeka net zha naa pa nda zha; ⁹ ne
tak ngwalaaz zha Diox, kona ngoo zha taxal
thib zha tith yezlyu kuu nzhab Diox taa Diox
lo zha. Ne leen yuu yid ngoo zha, ne leeka
tata ngoo Isaac ne Kob, ne noga rop zha'a
mkayaa kuu nzhab Diox taa Diox. ¹⁰ Ne
lee Abraham mlet kayaa yez kuu naats nzo
simyent kuu leeka Diox mta.

¹¹ Ne noga Sara ngwalaaz Diox, ne tegal
kwathoz ngoox Sara, per ngoo zhiinn Sara,

ne ngop Sara thib mbet, tak ngwalaaz Sara
kuu nzhab Diox tsow Diox lo Sara. ¹² Kona
tenzhee mod lee Abraham tegal gax ndo
gath zha, per mkeno zha thib xgann zha ne
tata mod mkeno zha naroob raz zha, taxal
re mbel kuu nzib lobee ne taxal re gux kuu
nzi roo nitdoo, kuu gagt lab men.

¹³ Ne reta zha'a nguth zha ne mkayaat
zha kuu nzhab Diox taa Diox lo zha, per
tak ngwalaaz zha Diox; tith mwii zhay ne
mni zha "diox" loy. Per myen zha ne nzhab
zha, taxal zha tith nak zha lo yezlyu ree.
¹⁴ Kona lee re zha kuu mbez nak zha tith lo
yezlyu ree, kuu nlaaz zha ne zha nak, lee
zha ngekwaan ta gak laz zha. ¹⁵ Tak os lee
zha nzo yek zha yez ta mroo zha lo yezlyu
ree, ngok gabretab zha tya tedib welt. ¹⁶ Per
lee xgab re zha nak tsin zha tedib yez kuu
masraa wen, kuu nak yibaa. Kona nthoyt
Diox nak Diox Diox re zha'a, tak napa Diox
thib yez naro ta yo re zha'a.

¹⁷ Tak ngwalaaz Abraham Diox, kona
mtsow Diox thib kuu nagan lo Abraham,
leettsa mzhenn zha xgann zha Isaac gaguth
zha ne gataa zha gon lo Diox, zha kuu nak
thibka xgann zha kuu nzhab Diox taa Diox
lo zha ner. ¹⁸ Leettsa nzhab Diox: "Lo
raz Isaac yazh raza". [Gn. 21:12] ¹⁹ Tak
ne Abraham lee Diox nap yalnabee, tsow
Diox roban zha xid re zha nguth; kona tak
gabaa, lee Abraham mkayaa zhiinn tedib
welt taxal thib zha kuu mroban xid re zha
nguth.

²⁰ Tak ngwalaaz Isaac Diox, kona bluz
mnaab zha taa Diox kuu wen lo Kob ne lo
Esaú.

²¹ Tak ngwalaaz Kob Diox, kona leettsa
mer gath zha, mnaab zha taa Diox re kuu
wen lo rop xgann Che, ne mgaag zha dits
aga zha ne mbil zha lo Diox. ²² Tak ng-
walaaz Che Diox, kona leettsa mer gath zha;
nzhab zha; bluz lee re zha Israel roo yez
Egipto, ne mnabee zha naa kwan tsow re
zha kon tsidh zha.

²³ Tak ngwalaaz xut Moisés ne xnaa
Moisés Diox, kona leettsa ngol Moisés,
mkaats zha Moisés tson mbee; tak kwathoz
chul na mbet, ne mzebt zha mne zha ley kuu
mnabee rey lee re mbet byi ndoblo gath.

²⁴ Tak ngwalaaz Moisés Diox, kona leettsa
naro'a zha, mzhylt zha garole zha zhi-
inn rtsaap rey Egipto; ²⁵ ne mas ngoo yek
zha rid zha yalti, kon re zha kuu nak zha
yez Diox, nake tsow zha re kuu went kuu
nyow leettssoo kwerp yezlyu ree. ²⁶ Ne nda
leettssoo zha mas wen rid zha yalti, kon re
zha kuu nak yez chaan Diox, nake gakeno
zha re kuu nataak yez Egipto; tak thib mwii
zha lo re kuu wen kuu taa Diox lo zha. ²⁷ Ne
tak ngwalaaz Moisés Diox, kona mzebt zha
mne zha yalnayii chaan rey, kona mroo zha
yezlyu Egipto, ne thib mndo zha lo xgab

zha taxal zha kuu ngewii lo Diox kuu nloot.
²⁸ Tak ngwalaaz Moisés Diox, kona mtsow zha ani Paskw, ne mnabee zha lo re men tee re men ren roo pwert men, tsa leettsa rid mandad chaan yalguth, kuth mandad neeka thib zhiinn re zha Israel kuu ner lo zha. ²⁹ Ne tak ngwalaaz re zha Israel Diox, kona mriid zha leen nitdoo nane taxal yubiz; ne leettsa lee re zha Egípto ngwalaaz gariid, mloww zha leen nit.

³⁰ Tak ngwalaaz re teyaa Diox, kona mlux bla yez Jericó, leettsa lee re zha ngwalo mndaa welt dits bla yez gaz wiz. ³¹ Ne tak ngwalaaz Rahab Diox, tegal zha ntho kwerp nak zha, ngutth zha thibka kon re zha kuu mbint diiz, tak wen mkayaa zha re zha Israel kuu ngwatwii laz zha.

³² ¿Ne kwan raa mas nin? Tak yobt raa lon tan kwent chaan re zha ree; Gedeón, Barac, Sansón, Jefté, David, Samuel ne kwent chaan reta profet. ³³ Tak ngwalaaz zha Diox, kona mtsow zha gan lo naroob zhoo, ne nali mnabee zha, ne mkayaa re zha kuu nzhab Diox taa Diox lo re zha, mtow zha roo re mbeez, ³⁴ mtuyy zha bel thoz, ne mla zha leettsa nlaaz re men aguth zha kon espad, ne mndaa Diox yalney lo zha leettsa neyt raa zha, ne kwathoz ngok ney re zha lo re zhoo, par mtsow zha gan lo re zha kuu nayii ne zha. ³⁵ Ngoo ngot kuu nguth xgann, ne tak ngwalaaz zha Diox, kona mroban xgann zha ne nabon zha mkayaa zha zha.

Per nzo zha mriid yalti ne nguth zha, tak ngwalaazt zha Diox ne mzhyalt zha galaa zha, tsa tsow zha gan roban zha ne kayaa zha yalnaban kuu mas wen. ³⁶ Lee tedib net zha, mloo re men yalnathoy zha ne mdin zha zha, ne mliib zha zha kon kaden ne mloo zha zha tsib. ³⁷ Lee tedib net zha mbeth zha kon ke, lee tedib net zha mtsow rol zha kon syer, lee tedib net zha mbeth zha kon spad; ne kwathoz nalatt ngok zha mndiy zha thib ta tedib ta, ne mdok zha yits lad mbak zhiil ne yits lad chib, ne yent temi lo zha, ne kwaro nteti re men zha ne mkee zhay yek zha. ³⁸ Ne went mwii reta men lo re zha'a, leettsa mndiy zha lo yezlyu ree, mndiy zha re net ne re yii ne leen re kelyoo mdat zha.

³⁹ Ne wen ngoo leettsoo Diox mne Diox reta zha'a, tak ngwalaaz zha Diox, per mkayaat zha kuu nzhab Diox taa Diox lo zha; ⁴⁰ tak mtelaaz Diox re'aa, ne noga nlaaz Diox taa Diox kuu wen thoz lo'aa, tsa gakaa zha nali taxal re zha'a.

12

Ntelii Diox re zhiinn Diox

¹ Kona, tak mloo'a re zha'a lo'aa naa xomod ndoblo yelaazaa Diox, ndoblo thib lad taanaa re kuu ntow lo'aa, ne ndoblo laa'aa re falt kuu ntsow ntsowaa kuu went, ne

thiblo nda'aa tsa tsowaa gan kuu ndoblo'aa tsowaa gan,² thibka ndoblo yelaazaa Jesús, tak lee Jesús mloo lo'aa naa xomod ndoblo yelaazaa Diox, ne lee zha ntsow ney ndo'aa lo Diox. Tak lee zha mriid yalti lo kruz, ne mthoyt zha tata nguth zha, tak ne zha leettsa yelo rid zha yalti, kwathoz wen ne naley yo leettsoo zha; ne mndob zha lad ban lo Diox ta ndob Diox nabee Diox.

³ Kona ndoblo telaazaa Jesús, ne xomod mkez zha mriid zha yalti lo re men kuu ndab falt; kona neeka yetsayt goo ne neeka gast gan leettsoo goo. ⁴ Tak lee re goo ter xo goo ren goo, por nxek goo re kuu went;⁵ ne mnithlaaza goo kuu mni Diox lo goo taxal zhiinn Diox lo xkeets Diox, leettsa nzhab Diox:

Xgann na, leettsa lee Zha Nabee tel'i, tsa gaka zha nali lo zha, ndoblo laa'a, ne neeka gast gan leettsoo'a leettsa koxa lo zha.

⁶ Tak lee Zha Nabee nteli zha re zha kuu nke leettsoo zha,
 ne nteti zha re zha kuu nkayaa zha taxal zhiinn zha. [Job 5:17, Pr. 3:11-12]

⁷ Ndoblo xekaa ridaa yalti, tak ngetsow Diox lo'aa taxal lo zhiinn Diox. Reta zha nteli zha zhiinn zha ne nloo zha kuu wen lo zhiinn zha. ⁸ Per os telit Diox goo, taxal nteli Diox zhiinn Diox, nagt goo zhiinnpaa Diox tsa. ⁹ Tak leettsa ngokaa ndyeneen bzihzh, noga xutaa kuu yezlyu ree nteli zha lee, ne mbinaa diiz lo zha. Kona masraa ndoblo gonaa diiz lo Diox kuu nak Xutaa kuu ndob yibaa, tsa tsowaa gan yalnaban kuu thitanax. ¹⁰ Lee xutaa kuu yezlyu ree, nteli zha lee lut wiz kuu ndyaadaa lo yezlyu ree, taxal ndak zha ndobloy; per lee Xutaa Diox nteli Diox re'aa tsaa wen ridaa, tsa gakaa zha nayon lo Diox taxal nayon nak Diox. ¹¹ Kuu wli nak, neeka thib yalti nyownt leettsoo zhay leettsa ndriid zhay, sinke nabil nyoo leettsoo zha ora; per os lee zha nteed zha lo yalti'a, bluz ntsowe nali ne wen ban zha.

Xomod ndoblo to men lo Diox

¹² Kona ndoblo koneyaa yaa ne zhub re zha kuu ngwatsay, ¹³ ne ndoblo kwaanaa net kuu nali tiyya. Tsa lee re zha renk gwe nii ne neeka gabt zha ne neeka rethint nii zha net. ¹⁴ Bkwaanaa goo wen kwin goo kon reta men; ne kwaanaa nayon to'aa lo Diox, tak os lee'aa totaa nali lo Diox, gagt wii'aa Zha Nabee. ¹⁵ Ndoblo kenap goo goo, tsa neeka thib lo goo gagt falt yalwen chaan Diox, tsa neeka thibaa gagtaa taxal thib wan kuu nala, kuu ntetsaa ne nluux kwathoz men. ¹⁶ Ndoblo kenapaa lee, tsa neeka thibaa gagt rop kon zha kuu ndoblote, ne ndoblot tsow nataagtaa re kuu mtsow Diox lo'aa, taxal mtsow Esaú kuu mtho yalner chaan lo wets, por thibka yann komid kuu

ndow. ¹⁷ Ne wen ne'a, mas bluz leettsa lee Esaú ngwalaaz gakayaa re kuu wen, mkayaat raa zhay; ne tegal kwathoz mbinn zha mnaab zhay, per ngogt raa gatsee xut zha kuu nzhab xut zha.

¹⁸ Ne mbigtaa lo thib yii kuu tak diinnaa, taxal yii Sinaí, ta ngwa re teyaa zha ndala, ne mwii zha nde bel yek yii, ta nakow na, ne taa mroo mbi thoz; ¹⁹ ne neeka mbintaa bi chaan trumpet ne neeka mbintaa mni Diox. Lee re zha mbin mni Diox, mnaab zha nit raa Diox lo zha. ²⁰ Tak mxegt zha re diiz kuu mnabee Diox lo zha, kuu nzhab: "Os lee thib maa diinn dits yii ree, ndoblo kuth goo maa'a kon ke o kon thib lee ya kuu nale lo". [Ex. 19:12-13] ²¹ Ne tak kwathoz nathoz nak kuu mwiii re mena. Kona noga Moisés nzhab: "Nzhiit'n ne nzeb'n". [Dt. 9:19]

²² Per lee re goo mbig goo yek yii Sión kuu nak yez chaan Diox kuu nabaa, yez Jerusalén kuu nzi yibaa ne mbig goo lo kwathoz tyen mil mandad chaan Diox, ²³ mbig goo lo reta zha kuu nak zha Diox kuu nke le yibaa. Reta goo mbig goo lo Diox kuu naab kwent lo reta men, ne mbig goo lo reta mbi chaan re zha nali kuu lee Diox mteli. ²⁴ Ne mbig goo lo Jesús zha kuu ndo ndrol lo'aa ne lo Diox lo trat kub, tak lee ren Jesús kuu mxo Jesús mtembi'aa, ne mas nataake nake ren Abel. ²⁵ Kona ndoblo kenapaa lee, tsa gonaa diiz lo Diox kuu ngeni lo'aa. Tak mlat re zha kuu mbint diiz lo Diox, leettsa mkox re zha lo Diox lo yezlyu ree; leeka tata wlipa laataa, os lee'aa tsere'aa ditsaa lo Diox kuu ngeteni'aa desde yibaa. ²⁶ Ne leettsa mni Diox lo re men tsya, beeta kon xkiiz Diox mtsow Diox mzhiit yezlyu; per lee nal ne Diox: "Tedib welt tsow'n zhiit yezlyu per nagte beeta yezlyu sinke noga lobee zhiit". [Hag. 2:6] ²⁷ Ne leettsa ne Diox: "tedib welt", kuu nlaaz Diox ne Diox nak kib Diox reta kuu ngwin kuu mdexkwaa Diox, ne yaan beeta re kuu ngwint. ²⁸ Lee ta nabee Diox, ta taa Diox lo'aa nake thib ta ngwint. Kona ndoblo taa'aa texkix lo Diox por kona ne golaa lo Diox kon dib ndroo leettsoo'aa taxal nlaaz Diox, ²⁹ tak lee Diox re'aa nak taxal bel kuu nteyy reta kwaa.

13

Xomod ndoblo tsow men kuu nlaaz Diox

¹ Ndoblot laa goo ke leettsoo goo thib goo ne tedib goo. ² Ne nithlaazt goo tsow goo kuu wen lo re zha kuu tsin liz goo, tak tabaa ngoo chop tsom zha kuu mndaa liz mlet mandad chaan Diox ne neeka myeent zhay.

³ Thibka btelaaz goo re zha kuu nzo tsib, ne bkee goo kwent no goo nzo tsib kon re zha'a. Noga btelaaz goo re zha kuu ndriid yalti, ne bkee goo kwent no goo ndriid yalti taxal re zha'a.

⁴ Reta goo ndoblo tsow nataak goo yaltseya, ne nambi gok goo lo tsaal goo; tak lee re zha kuu nzhab rop kon ndota zha, ne re zha kuu nzhab rop kon zha kuu nagt tsaal, Diox naab kwent lo re zha'a.

⁵ Ndoblot tablaaz goo temi; wen bloo goo leettsoo goo kon beeta kuu nap goo, tak lee Diox nzhab: "Neeka lat'n lu ne neeka layata'n lu". [Dt. 31:6, 8] ⁶ Kona tak gabaa kon dib ndroo leettsoo'aa:

Zha Nabee nak kuu ntsoy ayud'n; ne tsebt'n neeka thib re kuu tsow re men lon. [Sal. 56:3-4, 8-11, Sal. 118:6]

⁷ Ne thibka btelaaz goo re zha kuu mndaa kwent xkiiz Diox lo goo; ne wii goo naa xomod nali ndo zha nyelaaz zha Jesús ne leeka tata gwalaaz goo Jesús.

⁸ Leeka Jesucrist nak naa'a, nak naltserree ne thitanax. ⁹ Ne taat goo yek goo gon goo tedib net re ley yezlyu ree. ¹⁰ Ne leekaa tata lee Jesús nguth thib lad roo yez. ¹¹ Ne leekaa tata lee Jesús nguth thib lad roo yez, par mtsow nambi Jesús re men kon ren Jesús. ¹² Ne leekaa tata lee Jesús nguth thib lad roo yez, sinke lee'aa nkwaanaa yez kuu yaad bluz kuu xek thitanax. ¹³ Kona thibka ndoblo golaa lo Diox por kuu mtsow Jesucrist, ne kuu nzhoolla lo Diox nak taxal thib gon kuu ndaa'aa lo Diox. Golaa lo Zha Nabee, tak koree nak taxal thib xle kuu ndroo roo'aa. ¹⁴ Ne nithlaazt goo tsow goo kuu wen, ne taa goo kuu nap goo lo zha kuu ndehey, tak koree nak thib gon kuu nyow leettsoo Diox.

¹⁵ Bin goo diiz lo re zha kuu nabee lo goo leen gwodoo, ne laa goo nabee zha lo goo, tak lee zha nkenap yahnaban chaan goo ne no zha taa kwent lo Diox. Bin goo diiz lo zha tsa naley yo leettsoo zha tsow zha rtsin zha, ne yot nabil leettsoo zha, tak lortsint kona lo re goo.

¹⁶ Bnaab goo lo Diox por nee, tsa tak wen tsow nee lo reta zha, kon thib xgab nali.

¹⁷ Ne leettsa naab goo lo Diox por na, naab goo lo Diox tsa lijer taa Diox diiz yal'n lo goo.

Re diiz bluz

20-21 Lee Diox kuu ntsow wen nzi'aa, Diox kuu mteroban Jesucrist Zha Nabee lo'aa lo yalguth, tsow ayud goo ne taa kuu wen kuu ndeche goo, tsa tak tsow goo kuu wen kuu nlaaz Diox. Lee Jesucrist nak kuu nkenapaa ne lee re'aa nak mbak zhil zha, ne mxo zha ren zha par mtaan zha Diiz Kub kuu xek thitanax lo'aa. Kona lo Jesucrist ndoblo golaa thitanax. ¡Tata gake! ²² Re goo wets'n ne btan na, naab'n lo goo xek leettsoo goo ntenin goo kon chop tson lan diiz kuu mkeen lo yeets ree. ²³ Nlaz'n ne goo, lee wetsaa Tim mroo'a tsib, ne os lee zha lijerta tsin zha lon, tsa ya rop nee zha yatwii nee lo goo.

²⁴ Bni goo "diox" kwent da lo re zha kuu nabee lo goo, ne lo reta zha kuu nyelaaz Jesucrist. Noga re wetsaa kuu nzo Italia ni "diox" lo goo.

²⁵ Nlaz'n loo Diox yalwen chaan Diox lo re goo.

Tata gake.

Yeets kuu mkee Santiag

Santiag mni “diox”

¹ Na Santiag nak'n mos chaan Jesucrist ne chaan Diox, nin “diox” lo re tsuibchop raz re zha Israel kuu mraats dita lo yezlyu.

Yalnzhaak kuu ndaa Diox

² Reta goo wets'n ne btan na, naley bloo goo leettsaa rid goo ndota yalti.

³ Tak ne'a goo leettsaa ndriid goo yalti tak nyelaaz goo Jesús, lo re yalti'a nteed goo nxek goo. ⁴ Ne ndoblo nali to goo leettsaa nxek goo, tsa gak goo zha ngabee ne ney to goo yelaaz goo Diox, tsa yent kwan gak falt lo goo.

⁵ Ne os lee lo thib goo nzhak falt yalnzaak, bnaab gooy lo Diox, ne lee Diox taay, tak lee Diox wlipaa ndaa yalnzaak ne nkak Diozhe. ⁶ Ne leettsaa naab gooy ndoblo yelaaz gooy kon dib ndroo leettsaa goo, ne ndoblot gak chop xgab goo. Tak lee zha kuu nzhak chop xgab, nak taxal nitdoo kuu nchoop mbi par tenzhee ne par tabaa. ⁷ Ne lee zha kuu tabaa ntsow xgab, neeka ndoblot tsow zha xgab lee Zha Nabee taa thib kwa lo zha, ⁸ kona lee zha kuu nzhak chop xgab nyelaaz Diox, nalit nak zha lo reta kuu ntsow zha.

⁹ Reta zha kuu nadoo nak, ndoblo ley zha, tak lee Diox tsow gak zha, zha nataak; ¹⁰ ne lee zha rik ndoblot ley zha lo yalrik zha, tak taxal yee wan nak zha. ¹¹ Tak leettsaa nlen wiz ne nla bee, tsa mbiz yizh ne lee yee nzhab. Leeka tata rid re zha rik kon reta kuu nap zha.

¹² Wen nda re zha kuu nxek ndriid yalti; tak leettsaa ngwalo mxek zha mriid zha yalti, tsa kayaa zha koron kuu nak chaan yalnaban, kuu ne Diox taa Diox lo re zha kuu wlipa nke leettsaa zha Diox. ¹³ Kona leettsaa lee thib zha nlaaz tsow kuu went kuu ndoblot zha tsow zha, ndoblot tsow zha xgab lee Diox ntsow, par tsow zhay; tak yent cho tak tsow, par tsow Diox thib kuu went, ne neeka ntsow Diox tsow zha kuu went. ¹⁴ Tak leettsaa lee thib zha nzo yek tsow kuu went, ntsow zhay tak nlaaz zha tsow zhay. ¹⁵ Ne lee re kuu went kuu ntsow zha xgab ndaa zha falt; ne leettsaa ndaa zha falt tath zha.

¹⁶ Kona nin lo goo wets'n ne btan na, kedit goo leeka goo. ¹⁷ Tak reta kuu wen ne kuu nataak, lo Diox kuu ndob yibaa ndrooy, lo Diox kuu mdexkwaa xni, ne lee Diox thiitanax nzeet Diox ne neeka thib xkal yent lo Diox. ¹⁸ Ne por xkiiz Diox kuu nak kuu wli mndaa Diox yalnaban lo'aa, tsa gakaa taxal

yalgonn kuu ner lo re kuu mdexkwaa Diox, tak tabaa nlaaz Diox.

Re zha kuu wlipaa nzhon diiz xkiiz Diox

¹⁹ Kona nin lo goo wets'n ne btan na, list kenza goo ne ndoblo wen wen tsow goo xgab tsaraa kab goo, ne ndoblot yii goo lijer por ndota kwa. ²⁰ Tak leettsaa nayii men, ntsowt men kuu nlaaz Diox. ²¹ Kona nin lo goo: Blaa goo reta kuu nambit ne reta kuu kwathoz went. Ne gok goo thib zha nadoo, laa goo nabee xkiiz Diox leen leettsaa goo, tak lee xkiiz Diox, tak telaa yalnaban chaan goo lo yalghut.

²² Leeka goo nkedi goo goo, os anta nzhon goo xkiiz Diox ne ntsowt goo kuu mbeze. ²³ Tak lee zha kuu beeta nkenza xkiiz Diox ne nzhont zha diize, lee zha'a nak taxal thib zha ngwii lo, lo spej, ²⁴ wen wen ngwii zha naa xa na lo zha lo spej, per or nda zha nteiaazt raa zha naa xa na lo zha. ²⁵ Per lee zha kuu nthilaazt kuu nzhon, sinke wen wen ngwii zha lo ley kuu nali, ley kuu mtelaa re'aa, ne nali ndo zha nzhon zha diize, zha'a nak zha kuu wen nda lo reta kuu ntsow zha.

²⁶ Os lee thib zha ndak zha wlipaa nyelaaz zha Diox, ne nlaat zha bee ndediz zha re kuu ndoblot zha, leeka lee zha nkedi zha zha ne wlit zha nyelaaz zha Diox. ²⁷ Lee zha kuu nambi ndo nyelaaz Diox kuu nak Xutaa: Ndoblo tsow zha ayud re btab ne re ngot byud kuu ndriid yalti, ne kenap zha zha lo re kuu yu kuu nzo lo yezlyu ree.

2

Ndoblot masraa tsow nataak goo thib zha nake tedib zha

¹ Reta goo wets'n ne btan na, ndoblot gab goo masraa nataak thib zha nake tedib zha, tak lee aa nyelaazaa Jesucrist Zha Nabee lo'aa zha kuu ndo lo xni. ² Tak os lee thib zha kuu nzo ani or yaa ne nok lar wen tab ta nkaltaa goo nzhoool goo lo Diox, ne noga tab thib zha prob kuu nok lar gox, ³ ne os lee goo kwathoz wen tsow goo lo zha kuu nok lar wen ne gab goo lo zha: “Tob nzhee ta wenxa”, ne lee lo zha prob gab goo: “Lee lu baaka gwateli, o btob nzhee lo yu”, ⁴ tabaa mod mas ntsow nataak goo thib zha ne ntsow nataagt goo tedib zha, ne ntsow goo nzhak goo zha kuu naab kwent, kon xgab goo kuu went.

⁵ Reta goo wets'n ne btan na, kuu kwathoz nke leettsoon, bin goo koree: Diox mli re zha yezlyu ree zha prob, tsa yelaaz zha Diox, ne kayaa zha ta nabee Diox ta nzhab Diox taa Diox lo re zha kuu nke leettsaa Diox. ⁶ Per lee re goo ngoo goo yalnathoy chaan re zha prob. ¿Chu nyeent goo lee re zha rik nak kuu nteti goo? ¿Chu nyeent goo lee re zha rik nak kuu nkeki goo lo re zha

nak tsii? ⁷ ¿Chu leet re zha rik nak zha kuu nlooz Jesucrist kuu nyelaaza?

⁸ Wen ntsow goo, os lee goo ntsow goo kuu nabee xkeets Diox tsow goo: “Bke leettsoo’ a tabena taxal nke leettsoo’ a lu”. [Lv. 19:18] ⁹ Per os lee goo mas ntsow nataak goo thib zha nake tedib zha, ndaa goo falt, ne ntsowt goo kuu ne Diox, kona naab Diox kwent lo goo. ¹⁰ Tak os lee thib zha mbez nzhon zha diiz lo ley chaan Diox, ne nhont zha diiz lo thib re kuu nhab lo ley, lo reta kuu nhab lo ley mbint zha diiz. ¹¹ Tak leeka Diox nhab lo re men: “Gakt rop goo kon zha kuu nagt tsaal goo ne neeka kuth goo tabena”. Kona os lee thib zha nhagtzop zha kon zha kuu nagt tsaal, per nhuth zha taben zha, mbint zha diiz dita lo ley chaan Diox. ¹² Ndoblo tediz goo ne ndoblo ban goo, taxal ndoblo ban re zha kuu naab Diox kwent lo kon ley chaan yalnkelaaz kuu mtelaa’aa. ¹³ Tak leettsa naab Diox kwent lo reta men, lee re zha kuu mlatta leettsoo mne taben, noga Diox lattaleettsoo Diox ne re zha’ a. Ne lee re zha kuu mlat leettsoo mne taben, noga Diox talat leettsoo Diox ne re zha’ a, leettsa naab Diox kwent lo reta men.

Lo re kuu ntsow zha ndoblo loo zha lee zha nyelaaz Diox

¹⁴ Re goo wets’ n ne btan na, os lee thib zha mbez nyelaaz zha Diox, ne nloot zhay lo re kuu ntsow zha. ¿Chu tetsow zha’ a gan yalnaban os beeta mbez zha nyelaaz zha Diox? ¹⁵ Os lee thib wets goo o thib btan goo napt lar gok, ne neeka kuu wu zha ne kuu ndeche zha gandata wiz, ¹⁶ ne lee thib goo gab lo zha: “Wen nda’ a ne teenta yop ne wen bdow”, ne ndaat goo kuu ndeche zha’ a; thitanax nataagt kuu ntsow goo. ¹⁷ Leeka tata nak zha kuu mbez nyelaaz Jesucrist, ne ntsowt zha kuu nlaaz Diox, taxal zha nguth nak zha’ a, tak nlortsint nyelaaz zha Jesucrist.

¹⁸ Ne os cho gab: “Lu nyelaaza Diox, per lee na ntsow’ n kuu nlaaz Diox”. Gagt loo’ a lee’ a nyelaaz Diox, os ntsowta kuu nlaaz Diox, per lee na, tak lon nyelaz’ n Diox por re kuu ntsow’ n. ¹⁹ Ndaka wen kuu ntsowa, tak nyelaaza nzo thibka Diox; per noga re mbi fyer tataga nyelaaz ne nhiiit re mbi fyer nzeb re mbi fyer ne Diox. ²⁰ ¡Zha bxen! Ndoblo ne’ a, loka cho zha kuu mbez nyelaaz Jesucrist ne ntsowt zha kuu nlaaz Jesucrist, nlortsint mbez zha nyelaaz zha Jesucrist. ²¹ Diox mkayaa teyaa Abraham zha ndala taxal thib zha nali, por kuu mtsow zha, leettsa gaguth zha xgann zha Isaac, par gataa zha Isaac taxal gon lo Diox. ²² ¿Chu neta, por re kuu mtsow Abraham mloo zha lee zha nyelaaz Diox? Tak thibka nke rop koree tsiiin. ²³ Tbaa mrolo kuu nke lo xkeets Diox ta nzhab: “Ngwalaaz Abraham Diox,

kona mkayaa Diox zha taxal thib zha nali”. [Gn. 15:6] Ne tabaa mod mrolo zha amig Diox.

²⁴ Kona nal, ne’ a goo lee Diox tekayaa Diox re’ a por re kuu wen kuu ntsowaa ne nagte tak anta mbezaaz nyelaazaaz Jesucrist. ²⁵ Leeka tata ngok kon Rahab; ngot kuu mtho kwerp chaan; por kuu mtsow ngot mkayaa Diox ngot taxal thib zha nali: Tak mkayaa ngot rop zha kuu mtaal Josué ngwategwé yezlyu ne mtaal ngot rop zha par tedib net. ²⁶ Taxal nak kwerp men kuu mroo xbi, leeka tata nak men, os mbez men nyelaaz men Jesucrist ne ntsowt men kuu nlaaz Jesucrist.

3

Xomod nak loz men

¹ Re goo wets’ n ne btan na, ndoblot tablaaz reta goo gak goo maestr kuu loo xkiiz Diox; tak ne’ a goo mas nathoz naab Diox kwent lo re zha kuu nloo xkiiz Diox.

² Kwathoz ndaa’aa falt, ne os nzo cho ndediz pur kuu wen taxal ndobloy, zha’ a nak thib zha nali, ne tak nabee zha lo dib kwerp zha, tsa gone diiz lo zha. ³ Noga ne goo ngo zha fren roo kabay, tsa gon maa diiz lo zha ne tsa ya maa lad ta ndano zha maa. ⁴ Ne leeka tata nak thib bark: Tegal kwathoz naro bark ne tegal nchoop mbi thoza, per lee zha kuu ntetee bark, kon thib le ya lut ntetee zhay loka ta nlaaz zha. ⁵ Leeka tata nak loz men; kwathoz lutte, per ndake naroob kwaa tak tsowe, leey nak taxal thib bel lut kuu tak teyy dita thib yii naro. ⁶ Lee loz men nak taxal thib bel lut, kuu kwathoz went kuu ntsow ndaa men falt ne ntetsaay men lo dib kuu naban men. Leey nak taxal ki kuu ndyaad gabil. ⁷ Relota maa wan, re min, re mbeel ne re maa kuu nzo leen nitdoo, nye zha lo maa ne ntsow zha gan nzhon maa diiz lo zha; ⁸ per lee loz men, neeka thib men ter ye loy ne neeka ter tsow men gan gone diiz lo men. Leey nak thib kuu kwathoz went, ne ndaaate diiz gone diiz, taxal kwaan kuu nzhuth. ⁹ Kon leey nzhoolaa lo Diox kuu nak Xutaa, ne kon leeka leey nge’aa re men kuu mdexkwaa Diox. ¹⁰ Reta goo wets’ n ne btan na, ndoblot leeka kon roo’aa kuu nzhoolaa lo Diox kode’aa re men, thitanaz ndoblot tsowaa tata. ¹¹ ¿Chu tak tsib nit natsi ne nit nala lo thibka xlen nit? ¹² Re goo wets’ n ne btan na, ¿chu tak taa ya ig aseyfun o chu tak taa luts ub ig? Leeka tata, gaggtsib nit natsig ne nit natsilo thibka xlen nit.

Yalnzaak kuu wlipaa

¹³ Os nzo cho zha nzhaak ne nyen re kwaa xid re goo, kon yalnzaak ne kon yalnadoo ndoblo loo zha nzhak zha por re kuu wen kuu ntsow zha. ¹⁴ Per os lee goo kwathoz

ndablaaz goo re kwaa ne nzo zhyan leetsoo goo ne goo altaa goo, ndoblot ley goo lee goo nzhaak, tak lee kona nak nkedi goo ne mbezt goo kuu wli.¹⁵ Lee yalnzaak ree ndyaadte lo Diox, sinke leey ndyaad lo re men yezlyu ree ne chaan Maxuuy nake.¹⁶ Tak ta nzo zhyan ne yalndablaaz, tyu ngyo zha ne tyu nzo relota kuu went.¹⁷ Per lee zha kuu nap yalnzaak kuu ndyaad lo Diox; tenzhee nak zha:

Nambi nak zha,
ntsow zha wen kwin re men,
nyen zha re kwaa ne nadoo nak zha,
wen nak zha lo reta men,
nlat leetsoo zha ne zha taben zha,
thibka ntsow zha kuu wen,
nkedit zha,
wli kuu ndediz zha.

¹⁸ Kona lee re zha kuu ntsow wen kwin re men, zha'nak taxal thib zha nzhann mbiz wen, par thop zha yalgonn, kuu nak nali ban men.

4

Ndoblot tablaaz men re kuu yezlyu ree

¹ ¿Pa ndroo re zhoo kuu ntsow nayii goo ne goo thib goo ne tedib goo? Lo re xgab went chaan goo ndrooy ne thibka ngoyo leen leetsoo goo.² Ndablaaz goo keno goo re kwaa ne napt gooy, ne tak gagt keno gooy nkezhyan goo ne nzhuth goo. Nkezhyan goo ne ngyo goo, per gagt keno goo re kuu nlaaz goo, tak naabt gooy lo Diox.³ Naab gooy ne nkayaat gooy, tak naabt gooy taxal ndobloy; tak beeta lo re gust goo kuu yezlyu ree nlaaz goo lortsin gooy.⁴ ¡Goo nak men kuu nzhont diiz lo Diox! ¿Chu net goo, leettsa nke leetsoo men re kuu yezlyu ree, nzhak men zha kuu nayii ne Diox?⁵ Loka cho nlaaz ke leetsoo re kwaa yezlyu ree, nzhak zha, zha nayii ne Diox.⁶ ¿Chu ntsow goo xgab tabaata nzhab lo xkeets Diox: "Lee Mbi Nayon kuu mndaa Diox lo'aa, nlaaz Mbi Nayon gakaa beeta zha Diox".⁷ Per lo yalwen chaan Diox mtsow Diox ayudaa: Tak lee lo xkeets Diox nzhab: "Nayii Diox ne Diox re zha kuu naro nak, per lo yalwen chaan Diox mtsow Diox ayud re zha kuu nadoo nak". [Pr. 3:34]⁸ Kona ndoblo laa'aa nabee Diox leetsoo'aa, ne taataa diiz lo Maxuuy, tsa beche Maxuuy lo'aa.⁹ Big goo lo Diox, tsa lee Diox big lo goo. Re goo kuu ndaa falt ne re goo kuu nzhak chop xgab, btembi goo leetsoo goo.¹⁰ Nabil bloo goo leetsoo goo ne binn goo. Ne zhizt goo sinke binn goo, kot goo naley leetsoo goo sinke nabil bloo goo leetsoo goo.¹¹ Nadoo btsow goo lo Zha Nabee, ne lee zha tsow gak goo zha nataak.

Ndoblot loozaa tabenaa

¹¹ Re goo wets'n ne btan na, ndoblot looz goo thib goo ne tedib goo. Tak lee zha kuu nlooz wets o naab kwent lo wets, nlooz zha ley ne naab zha kwent lo ley. Ne os lee'a naaba kwent lo ley, ngetsowta kuu nabee ley, sinke naka zha naab kwent.¹² Ne beeta lee Diox nakuun mndaa ley ne kuu tak naab kwent, ne leeka Diox nakuun tak taela men o luux men. Per lee lu, ¿cho naka par naaba kwent lo tedib zha?

Ndoblot teneraa diiz re kuu tsowaa yee wiz

¹³ Lee nal kenza goo kuu nin lo goo. Re goo kuu mbez: "Naltseree o yee yaa nee thib yez, ne tyu yo nee thib liin tsow nee negos, tsa tsanaa nee naroob temi",¹⁴ ne neeka net goo naa kwan gak yee. ¿Chu net goo leea'aa naka, taxal thib be kuu nloo gatila, ne nap leey mnitha?¹⁵ Kuu ndoblo gab goo nak: "Os lee Zha Nabee nlaaz taban nee ne tetsov nee koree o kobaa".¹⁶ Per lee re goo kwathoz narub ndediz goo lo yalrub chaan goo; ne reta yalrub went nak.¹⁷ Kona lee zha kuu tak tsow kuu wen ne ntsowt zhay ndaa zha falt.

5

Re goo zha rik bin goo koree

¹ Re goo zha rik. Tegonn goo ne tekwetyath goo lo yalti kuu tsin lo goo.² Tak reta kuu nap goo gaab ne lux, ne lee re xab goo ke mbetho.³ Lee re temi goo kuu or ne kuu plat ke yitoy ne leeka yitoy keki goo, ne taxal bel teyye goo. Tak kwathoz mkaltaa goo kuu yezlyu ree par re wiz bluz.⁴ Lee re zha kuu mke tsin lo goo ne mdizht goo lo, ngenaab zha lo Diox; ne lee Diox kuu nabee lo re mandad kuu nzo yibaa mbina re kuu ngenaab re zha kuu mthop yalgonn chaan goo.⁵ Lo yezlyu ree mkeno goo reta kuu nlaaz goo, mtsow goo reta kuu mndablaaz goo ne mtetsi'a goo goo par kuth zha goo.⁶ Re goo mnabee mbeth zha, zha kuu nali nak, zha kuu mtsowt neeka thib kuu went, ne neeka lut mtsow neyt zha lo goo.

Ndoblo xekaa

⁷ Kona re goo wets'n ne btan na ndoblo xek leetsoo'aa, asta leettsa bretab Zha Nabee. ¿Chu net goo lee re zha kuu nzhann nxek zha mbet zha nla yi kuu ner ne kuu bluz? Ne leeka tata mbet zha nkayaa zha yalgonn zha.⁸ Leeka tata xekaa kwetaa ne ney to'aa, tak gaxa ndo bretab Zha Nabee.

⁹ Re goo wets'n ne btan na, kekit goo thib goo lo tedib goo, tsa naabt Diox kwent lo goo, tak mera yaad Zha Nabee ne lee zha naab kwent lo re men.¹⁰ Re goo wets'n ne btan na, bteed goo bxek goo lo re yalti taxal mxek re profet kuu mndaa kwent xkiiz Diox.¹¹ Tak wen ne'aa xa wen nda re zha kuu nxek, taxal Job kuu mxek lo re

yalti, ne wen ne'aa xomod mtsow Diox lo zha bluz; tak nlat leettsoo Diox ne wen nak Diox lo reta men.

¹² Re goo wets'n ne btan na, ndoblot tsow goo koree, tselot goo por yezlyu neeka por yibaa, ne neeka por ndota kwaa. Mas wen gab goo: "Tay" o "Wlite". Per tselot goo, tak nap goo falt os lee goo tselo goo.

Ndoblo tedizaa lo Diox

¹³ Os lee thib goo nabil nzo leettsoo, btediz goo lo Diox. Ne os lee thib goo naley nzo leettsoo, bil goo lo Diox. ¹⁴ Ne os lee thib goo ne ndak, ndoblo kwez goo re zha gol kuu nabee lo re zha kuu nyelaaz Jesucrist, tsa kaab zha aseyt ne naab zha lo Diox kon yalnabee chaan Zha Nabee, tsa tegwe Diox zha. ¹⁵ Ne leettsa naab goo lo Diox kon dib ndroo leettsoo goo, lee Diox tetegwe zha kuu ne ndaka, ne talitche Diox zha, ne os lee zha mndaa zha falt tetuuyy Diox falt zha. ¹⁶ Ndoblo gab goo re falt goo lo re altaa goo, ne ndoblo naab goo lo Diox por thib goo ne tedib goo. Tak kwaro yalney nap xkiiz zha kuu nali nak lo Diox. ¹⁷ Lee Lí kuu ngok profet, ngok thib zha taxalka lee; ne leettsa mnaab zha lo Diox tsa lat yi, mlat yi lo yezlyu tson liin narol. ¹⁸ Ne bluz mre zha mnaab zha lo Diox, ne mre mla yi lo yezlyu, ne mndaa yezlyu yalgonn tedib welt.

¹⁹ Re goo wets'n ne btan na, os lee thib goo laa xnet Diox kuu wli, ne lee tedib goo tsow retab zha'a, ²⁰ ndoblo ne goo lee zha kuu tsow retab thib zha kuu mlaa xnet Diox lo Diox tedib welt, mtsow zha mlaa yalnaban chaan wets zha lo yalguth, noga mtsow zha mtuyy Diox naroob falt.

Santiag

Yeets ner kuu mkee Pey

Pey mni "diox"

¹ Na Pey nak'n apóstl chaan Jesucrist, nge-keen yeets ree lo re goo, zha kuu mli Diox ne nzot laz, re goo kuu nzo yezlyu Ponto, Galacia, Capadocia, Asia ne Bitinia. ² Diox kuu nak Xutaa kuu ntembali'aa por Mbi Nayon mli goo, tsa gon goo diiz lo Jesucrist ne gak nambi goo kon ren Jesucrist. Nlaz'n lee Diox taa yalwen chaan lo re goo ne tsow Diox wen kwin goo.

Yalnaban kuu ngebetaa

³ Texkix Diox kuu nak Xut Jesucrist Zha Nabee lo'aa. Tak mlat leettsoo Diox mne Diox re'aa kona mtsow Diox ngolaa tedib welt, leettsa mroban Jesucrist xid re zha nguth, tsa kwettaa thib yalnaban kuu thitanax luxt, ⁴ ne tsa kayaa'aa kuu taa Diox lo'aa leen yibaa, koree nak thib kuu gak yut neeka luxt ne neeka goolata taxal re yee, ⁵ tak lee Diox nkenap goo, tak nyelaaz goo Diox, tsa tsow goo gan yalnaban kuu thitanax kuu mera loo Diox wiz bluz.

⁶ Koree ntsow naley nzo leettsoo'aa, tegal lutta tyemp ndoblo rid goo ndota yalti. ⁷ Tak lee'aa ndoblo ridaa lo ki, taxal or kuu ndriid lo ki, tsa naa chu ore o nágte or ne tegal kuu nlux nak or. Tataga nak nyelaazaa Diox os lee'aa xekaa ridaa yalti, tsa lee Diox tsow gakaa zha nataak, zha roo ne zha nataak leettsa bretab Jesucrist.

⁸ Nke leettsoo goo Jesucrist tegal mwiiit goo zha, ne ngwalaaz goo zha tegal ngwiit goo zha, per naley nzo leettsoo'aa kon thib yalnaley thoz kuu gagt ni lee kon diiz, ⁹ ne tak ngwalaazaa Diox kona mtsowaa gan yalnaban kuu thitanax.

¹⁰ Ndala lee re profet mkwaan ne mn-naabdz naa xomod nak yalnaban kuu thitanax kuu mndaa re zha kwent, yalnaban kuu mndaa Diox lo'aa por yalwen chaan Diox. ¹¹ Ne leeka Mbi Nayon chaan Crist mtsow tsa mne re profet naa xomod rid Crist yalti ne re kuu wen kuu yaadno re yalti'a bluz; ne mkwaan re zha mod, tsa ne zha naa cho nak zha kuu yaada, ne pol gak re kuu mndaa Mbi Nayon kwent lo re zha. ¹² Per tsaraa mtsow Diox myeen re profet lee re kuu ngetaa re profet kwent, nagte kuu gak lo re profet sinke leey nak par lee. Lee nal lee re koree nak kuu ndaa zha kwent lo goo por yalnabee chaan Mbi Nayon kuu ndyaad yibaa. ¡Ne asta re mandad chaan Diox ngwalaaz gawii re koree!

Diox mrezaa tsa nambi banaa

¹³ Kona wen wen btsow goo xgab naa kwan tsow goo ne blobee goo. Ne kon dib

ndroo leettsoo goo blet goo kuu talaaz Diox lo'aa, leettsa bretab Jesucrist. ¹⁴ Taxal re mnnyeen kuu nzhon diiz lo xut, ne ndoblot ban goo taxal mban goo leettsa terlebee goo Diox. ¹⁵ Sinke thitanax nambi ndoblo ban goo, tak nayon nak Diox kuu mrezaa; ¹⁶ tak lo xkeets Diox nzhab: "Nambi gok goo, tak nayon nak'n". [Lv. 11:44; 19:2]

¹⁷ Ne os lee goo "Pa" mbez goo lo Diox kuu lalta nak re men lo, ne nali naab kwent lo reta men, ndoblo tseb goo ne goo Diox reta wiz kuu naban goo lo yezlyu ree. ¹⁸ Ne wen ne'aa lee Diox mloo aa lo yalnaban kuu nlortsint kuu mloo re teyaa zha ndala lo'aa; nogaa wen ne goo mzhiit Diox re'aa kon or o kon plat kuu nlux, ¹⁹ sinke lee Diox mzhiit re'aa kon ren Jesucrist kuu nambi ne nayon, kuu nak taxal ren chaan thib mbak zhiil kuu yent cho xki. ²⁰ Desde leettsa terka texkwaa Diox yezlyu lee Jesucrist naka diiz rid re koree; per asta re wiz bluz ree myaad Jesucrist, tak nke leettsoo Jesucrist lee. ²¹ Ne por Jesucrist nyelaazaa Diox kuu mteroban Jesucrist lo yalguth ne mtsow nataak Jesucrist; kona nyelaazaa Jesucrist ne ngebetaa kuu ne Diox taa Diox lo'aa.

²² Ne tak nzhonaa diiz lo kuu wli por Mbi Nayon, kona lee nal nambi yalnabanaa, tsa wlipaan nke leettsoo'aa thibaa ne tedibaa kon dib ndroo leettsoo'aa, kon thib xgab nambi. ²³ Ne lee nal ngolaa tedib welt, ne welt ree ngoltaa lo kwerp xutaa ne lo kwerp xnaa'aa kuu nzhath, sinke lee nal ngolaa lo xkiiz Diox kuu naban kuu nluxt ne nxek thitanax. ²⁴ Tak lee lo xkeets Diox nzhab: Reta men kuu nzi lo yezlyu ree nak taxal yizhwan,

ne lee reta kwaa nkeno men nak taxal yee wan.

Lee yizhwan mbiz ne lee yee nzhab.

²⁵ per lee xkiiz Zha Nabee nxek thitanax. [Is. 40:6-8]

Ne lee Diiz Chul ree nak kuu mndaa zha kwent lo goo.

2

¹ Kona, ndoblo laa goo:
reta kuu went
re yalkedi,
gabt goo tsow goo thib kwaa ne zhaa kuu
tsow goo,
laa goo re yalndablaaz,
ne loozt goo men.

² Sinke taxal mbetdoo, bkwaan goo nzii kuu nambi kuu nak xkiiz Diox kuu kwathoz wen, tsa zhen goo lo xkiiz Diox ne keno goo yalnaban kuu thitanax, ³ tak mtsowa goo preb yalwen chaan Zha Nabee.

Jesucrist nak ke naban

⁴ Big goo lo Zha Nabee, tak lee zha nak taxal ke naban. Ke kuu mlobi re zha kuu

ndexkwaa yuu thib lad, per leey nak thib ke kuu mli Diox kuu kwathoz nataak.⁵ Noga goo gok goo taxal ke naban kuu ngeya gwodoo Diox kuu yibaa, ne gok goo ngwleyy nambi lo Diox, tsa lortsin goo lo Diox ne taa goo gon lo Diox por kuu mtsow Jesucrist.

⁶ Koree ngok taxal nzhab lo xkeets Diox:

Wii goo, leen tob thib ke kuu mas wen skin yez Sión,

ke skin kuu mli zha ne kuu kwathoz nataak; ne loka cho zha yelaaz ke ree neeka mas root yalnathoy zha. [Is. 28:16]

⁷ Kwathoz nataak ke ree lo'aa zha kuu nyelaaze; per lo re zha kuu nyelaazte, mrolo kuu nzhab lo xkeets Diox:

Lee ke kuu mlobi re zha kuu ndexkwaa yuu thib lad,

leey ngok ke kuu mas wen kuu mndob skin yuu. [Sal. 118:22]

⁸ Ne noga mrolo kuu nzhab tedib ta:

Thib ke kuu tsow ral nii re men ne tsow gab re men. [Is. 8:14-15]

Tak ngwalaazt zha xkiiz Diox kona nzhab zha; tak naka diiz rid re zha'a yalti.

Re zha kuu nak zha yez Diox

⁹ Per lee re'aa nakaa raz kuu mli Diox, nakaa ngwleyy kuu ntsow rtsin Diox, nakaa yez nayon ne thib yez kuu nak chaan Diox. Tsa taa'aa kwent re kuu wen kuu mtsow Diox, tak lee Diox mrezaa ne mloo'aa lo yalkow ne into Diox re'aa lo xni chaan Diox.

¹⁰ Ndala nagtaa yez chaan Diox, per lee nal nakaa yez chaan Diox; ndala yent cho mlat leettsou gane'aa, per lee nal mlat leettsou Diox mne Diox re'aa.

Ndoble banaa taxal zha kuu nlortsin lo Diox

¹¹ Reta goo wets'n ne btan na kuu kwathoz nke leetsoon, re goo kuu nzot laz kuu nzo re yez tith, naab'n lo goo, taat goo diiz tsow kwerp goo re kuu ndablaaz kwerp goo, re kuu ngyo kon yalnaban chaan goo.

¹² Kona thibka nali ndoble ban goo xid re zha kuu nlebeet Diox, ne tegal taxal zha kuu nzhuth men nlooz zha goo nal, per leettsa tsin wiz kuu naab Diox kwent lo reta men, tsya wii zha re kuu wen kuu mtsow goo ne gol zha lo Diox.

¹³ Tak Jesucrist nak Zha Nabee lo'aa, kona ndoble gonaa diiz lo re zha kuu nak tsii, lo re rey kuu nabee lo yezlyu ree ne lo re zha kuu nabee,¹⁴ ne noga ndoble gonaa diiz lo re zha kuu ntaal rey par teti re zha kuu ntsow kuu went, ne par wen ni zha re zha kuu ntsow kuu wen. ¹⁵ Tak lee Diox nlaaz tsowaa kuu wen, tsa towgwaa roo re zha nad kuu yent kwan nyen.

¹⁶ Ndoble tsowaa taxal zha libr, per lortsintaa koree, tsa tsowaa kuu went. Mas wen ndoble tsowaa taxal ndoble tsow re mos Diox. ¹⁷ Btsow nataak goo reta men,

bke leettsou goo re wetsaa ne re btanaa, btseb goo ne goo Diox ne bin goo diiz lo rey kuu nabee yez.

Jesucrist mloo naa xomod ndoble tsowaa

¹⁸ Re goo kuu nak mos, ndoble gon goo diiz lo re zha kuu nabee lo goo, ne ndoblot gon goo diz beeta lo re zha kuu wen nak lo goo, sinke noga ndoble gon goo diiz lo re zha kuu went nak. ¹⁹ Os lee thibaa ndriid yalti kuu ndoblotaa ridaa, tak ntsowaa kuu wen kuu nlaaz Diox, kwathoz wen nak kona lo Diox. ²⁰ Os lee goo ntsow goo thib kuu went ne por kona teti zha goo, ¿kwan tsow goo gan xek goo yalti'a? Per os lee goo ndriid goo yalti, tak ntsow goo kuu wen ne nxek goo, konasi nyow leettsou Diox. ²¹ Tak par kona mrez Diox re'aa, tak noga Crist mriid yalti kwent chaanaa, tabaa mod mloo Crist naa xomod ndoble tsowaa. ²² Neeka thib falt mndaat Jesucrist, neeka mkedit zha neeka thib men,²³ ne leettsa mtsalzhoo re men zha mkab root zha lo re men; ne leettsa mteti re men zha, mnaijt zha, neeka nzhabt zha leeka tata teti zha re zha'a, sinke lo Diox kuu nali naab kwent nzhab zha re kwa. ²⁴ Ne dits Jesucrist mzhoub reta faltaa, leettsa mkee zha zha lo kruz, tsa lee retalee nguthaa lo re faltaa, ne nabanaa thib mod nali. Ne por re grid Jesucrist mgwe'aa. ²⁵ Tak ndala ngokaa taxal mbak zhiil kuu mndab, per lee nal mre'aa lo Jesucrist kuu nkenap yalnabanaa.

3

Xomod ndoble ban men kon tsaal men

¹⁻² Leeka tata, goo ngot kuu nap tsaal, ndoble gon goo diiz lo tsaal goo. Tak os nzo cho tsaal goo kuu nyelaazt Diiz Chul chaan Diox, per leettsa wii zha wen mod goo ne nali ne nambi ndo goo nyelaaz goo Diox, tala yek zha ne teyelaaz zha Diiz Chul chaan Diox ne neeka ndechet taa goo kwente lo zha kon diiz. ³ Ndechet anta teye goo goo, neeka ndoblot legal tee goo bow yek goo ne narub o lortsin goo re kuu or o gok goo re lar kuu kwathoz naap,⁴ sinke ndoble goo re kuu wen kuu nzo leen leettsou goo, re kuu thitanax nlux, tak re kona nak kuu chul ne kwathoz nataak lo Diox. ⁵ Tak leeka tata mtsow re ngot kuu nali kuu ngoo ndala; thibka ngwalaaz zha Diox ne mbin zha diiz lo tsaal zha. ⁶ Leeka tata mtsow Sara, mbin Sara diiz lo Abraham ne thibka: "Zha Nabee", mni Sara lo Abraham. Ne rtsaap Sara nak goo, os lee goo ntsow goo kuu wen ne yent kwan nzeb goo.

⁷ Ne tataka lee goo mbyi, ndoble taa goo yek goo gon goo xkiiz tsaal goo, ne btsow nataak goo tsaal goo taxal thib kuu nadan, tak no zha nap yalnaban kuu mndaa Diox

lo re goo lo yalwen chaan Diox. Tata btsow goo, tsa leettsa naab goo thib kuu lo Diox, takenza Diox kuu gab goo ne yent kwan tow lo goo.

Koree ndoblo tsow re zha kuu nyelaaz Jesús

⁸ Ne kuu yelo nin lo goo nak, thiibka gok xgab goo, blat leettsoo goo ne goo thib goo ne tedib goo, bke leettsoo goo thib goo ne tedib goo ne naley ne nadoo btsow goo.
⁹ Os cho zha mbezz kuu went lo goo, ndoblot leeka tata kab goo lo zha, ne os cho zha nge goo, ndoblot tataga ke goo zha. Sinke ndoblo gab goo kuu wen lo zha, tak ne'aa lee Diox mrezaa, tsa kayaa'aa re kuu wen.
¹⁰ Tak:

Lee re zha kuu nke leettsoo yalnaban chaan ne nlaaz zha wen rid zha re wiz kuu naban zha,
 ndoblo kenap zha loz zha, tsa tedizt zha re diiz went,
 ne ndoblot kedi zha;
¹¹ ndoblo beche zha lo re kuu went ne tsow zha kuu wen;
 ndoblo kwaan zha wen kwin zha kon re men, kona nak kuu ndoblo tsow zha.
¹² Tak lee Zha Nabee nkenap zha re zha kuu nali nak lo zha, ne nkenza zha xkiiz zha'a, leettsa ndediz zha lo Zha Nabee,
 per nayii Zha Nabee ne re zha kuu ntsow kuu went. [Sal. 34:12-16]

¹³ ¿Cho tak tsow kuu went lo goo, os lee goo thiibka ntsow goo kuu wen? ¹⁴ Per os lee goo ndriid goo yalti, tak ntsow goo kuu wen, wen nda goo. Tsebt goo lo neeka thiib zha ne neeka yat leettsoo goo, ¹⁵ sinke ndoblo tsow nataak goo Zha Nabee leen leettsoo goo. Ndoblo thiibka list yetsin goo, tsa tak kab goo lo re zha kuu naabdiz lo goo, kwent chaan kuu ngebet goo, tak nyelaaz goo Jesucrist. ¹⁶ Ndoblo tsow gooy thiib mod gol ne nadoo, ne wen btsow goo xgab leettsa tsow gooy, tsa lee re zha kuu nlooz goo por re kuu wen kuu ntsow goo, tak nyelaaz goo Diox, thoy zha por re kuu went kuu ndediz zha.

¹⁷ Mas wen rid men yalti tak ntsow men kuu wen, os lee Diox tata nlaaz Diox, nake tsow men kuu went. ¹⁸ Tak leeka tata, lee Jesucrist mriiid yalti por re falt chaan retalee, ne thiibka welt nguth zha. Ne nak zha thiib zha kuu ndabz falt, ne nguth zha kwent chaanaa zha kuu went nak, tsa teno zha lee lo Diox. Nguth zha lo yezlyu ree, per lee Mbi Nayon chaan Diox mteroban zha. ¹⁹ Ne ngwa zha mndaa zha kwent lo re xbi chaan re zha nguth kuu nzo tsib. ²⁰ Re zha'a nak re zha kuu mbint diiz lo Diox ndala, re wiz kuu mban Noé, leettsa mxek leettsoo Diox mlet Diox re men dita lo mdexkwaa Noé bark. Ne beeta xon men nak kuu mlaa ngutht

leen nit. ²¹ Ne lee nita nak taxal nit kuu nzhab leyaa, nit kuu nzhab leyaa nloo naa xomod laa'aa nal. Ne nagt tak nzhab leyaa gak nambi kwerpaa, sinke leey nak tsa nambi keno men xgab men lo Diox; ne telaay lee tak mroban Jesucrist. ²² Ne lee Jesucrist ngwazhoob yibaa ne ndob lad ban lo Diox, ne nabee zha lo re mandad ne lo reta mbi kuu nap yalnabee ne yalney.

4

Xomod nlaaz Diox ban re men

¹ Leeka taxal mriiid Jesucrist yalti lo yezlyu ree, leeka tata thiib bloo goo yek goo rid goo yalti; tak lee zha kuu mriiid yalti lo kwerp chaan, mlaa'za ndaat raa zha falt, ² tsaa dita lo naban zha ndoblo ban zha taxal nlaaz Diox, ne ndoblot raa tsow zha re kuu nlaaz kwerp zha. ³ Kwathoza mtsow goo re kuu ntsow re zha kuu nyelaazt Diox, mndablaaz goo re kuu nlaaz kwerp goo ne mtsow goo kuu narax, lo yalgwi, ngwii goo asta plotha kuu nlaaz goo, mndiy goo lo ani ta kwathoza nzhuucho zha ne nzhochu zha, ne mbil goo lo re diox kuu nagt Diox kuu nkap leettsoo Diox ne Diox. ⁴ Ne nezegey leettsoo re zha, tak nkaltaat raa goo kon re zha par ke goo yalgwi par tsow goo kuu went, ne kona ntsow nlooz zha goo. ⁵ Per reta zha'a ndoblo taa kwent lo Diox, kuu naab kwent lo re zha kuu naban ne lo re zha nguth. ⁶ Kona noga lo re zha nguth mndaa Jesúz kwent Diiz Chul chaan Diox, tsa naab Diox kwent lo re zha'a taxal ntsow re men yezlyu ree xgab, ne lee xbi zha naban taxal nlaaz Diox.

⁷ Per tak mzin gaxa tyemp kuu lee re kuu yezlyu ree lux. Kona list gwatsin goo ne thiibka blobee goo kuu tsow goo ne thiibka bnaab goo lo Diox. ⁸ Ne kuu mas ndoblo tsow goo nak; ke leettsoo goo altaa goo, tak lee yalnkelaaz ntsow nithlaaz zha kwathoza falt. ⁹ Ndoblo kayaa altaa goo goo liz goo, ne ndoblot looz goo altaa goo tak ntsow gooy. ¹⁰ Kadta thiib goo ndoblo wen lortsin goo, kuu nataak kuu mndelaaz Diox lo goo lo re altaa goo, ndoblo tsow gooy taxal zha kuu legal nke tsuin.

¹¹ Ne loka cho taa kwent xkiiz Diox, ndoblo taa zha kwente taxal nlaaz Diox; ne loka cho zha ntsow thiib tsuin, ndoblo tsow zhay kon yalwen ne kon yalney kuu ndaa Diox lo zha. Tsa lee re men tsow nataak Diox por Jesucrist, leettsa wii zha re kuu ntsow goo, tak chaan Diox nak yalney ne yalnabee thitanax. Tata gake.

Re yalti kuu ndriid men tak nyelaaz men Jesucrist

¹² Re goo wets'n ne btan na kuu kwathoza nke leettsoon. Yat leettsoo goo, leettsa tsin thiib yalti kuu kwathoza nati lo goo, taxal

thib zha kuu rid thib kuu kwathoz nathoz.
¹³ Sinke naley bloo goo leettsoo goo, tak ndriid goo yalti kwent chaan Jesucrist, tsa kwathoz naley yo leettsoo goo, leettsa loo xni thoz chaan Jesucrist lo goo leettsa yaad Jesucrist. ¹⁴ Wen nzo leettsoo Diox ne Diox goo, leettsa ntsalzhoo zha goo, tak nyelaaz goo Jesucrist, tak lee Mbi Nayon chaan Jesucrist thibka ndo kon lee. ¹⁵ Os lee goo ndriid goo yalti, tak nzhuth goo men, o tak nlowann goo, o tak nakap nak goo o tak ndaab goo ta ngebezt zha goo, zha ndab falt nak goo lo Diox. ¹⁶ Per os lee thib goo ndriid goo yalti tak nyelaaz goo Jesucrist, ndoblot they goo por kona, sinke ndoblo taa goo texkix lo Diox.

¹⁷ Ne mzina wiz kuu lee Diox naab kwent lo re zha kuu nak zha Diox. Ne os lee Diox mndelo'a naab kwent lo'aa, ¿xomod gak leettsa naab Diox kwent lo re zha kuu nzhont diiz lo Diiz Chul chaan Diox? ¹⁸ Ne os lee re zha kuu nali nak lo Diox, nagan tsow zha gan yalnaban, ¿kwan gak kon re zha kuu nyelaazt Diox ne kon re zha kuu ndab falt? ¹⁹ Kona lee re zha kuu ndriid yalti taxal nlaaz Diox, ndoblo taa zha yalnaban zha lo Diox tsa kenap Diox zha, ne ndoblo thibka tsow zha kuu wen.

5

Mteni Pey re zha gol kuu nabee lo re zha kuu nyelaaz Jesús

¹ Lee nal naab'n lo re zha gol kuu nabee lo re goo, tak noga na nak'n zha gol taxal re zha'a, ne mwiiin re yalti kuu mriid Jesucrist ne noga na ndoblon diinn na ton lo xni thoz chaan Jesucrist kuu loo bluz. ² Ndoblo kenap goo re zha kuu nyelaaz Jesucrist, btsow gooy kon dib ndroo leettsoo goo taxal nlaaz Diox, ndoblot tsow gooy lafwers, neeka tsowt gooy por temi, sinke btsow gooy kon dib ndroo leettsoo goo,³ ne ndoblot tsow goo taxal goo nak bzhaan re zha kuu nkenap goo, sinke ndoblo goo loo goo lo re zha naa xomod ndoblo ban zha. ⁴Tsa leettsa yaad Jesucrist Zha Kuu Nkenap retalee kuu nak zha Diox, tsa lee'aa kayaa thib koron kuu nzhuyy kuu thitanax luxt.

Pey mteni reta zha kuu nyelaaz Jesús

⁵ Ne leeka tata, re goo zha kuu mndyeen, bin goo diiz lo re zha gol kuu nabee lo goo. Ne ndoblo gon goo diiz lo thib goo ne lo tedib goo thib mod nadoo:

Tak nayii Diox ne Diox re zha rub,
 ne por yalwen chaan Diox ntsow Diox ayud
 re zha kuu nadoo nak. [Pr. 3:34]

⁶ Ndoblot tsow nataakaa lee lo Diox kuu kwathoz ney, tsa lee Diox tsow gakaa zha nataak leettsa ndobloy, tak lee Diox nak kuu nabee lo'aa. ⁷ Blaa goo reta kuu ntsow goo

xgab lo Diox, tak lee Diox thibka ntsow xgab re goo.

⁸ List gwatsin goo ne blobee goo lo re kuu tsow goo, tak lee Maxuuy kuu nayii ne'aa, ndiy taxal mbeez kuu nzhax yen nkwaan chu wu. ⁹ Taat goo diiz tsow Maxuuy gan lo goo, thibka ney bto goo gwalaaz goo Jesucrist, tak ne'aa lee re wetsaa ne re btanaa kuu nyelaaz Jesucrist dib naxta lo yezlyu tabaaka ndriid yalti. ¹⁰ Ne lee Diox kuu ndaa reta yalwen lo'aa ne mrezaa por Jesucrist, tsa ndya'aa ta nzo Diox, ta thitanax luxtaa, ne bluz leettsa yelo ridaa yalti, tsa lee Diox tsow gakaa zha nali taxal ndoblo gakaa, ne tsow ney Diox re'aa tsa nali banaa thitanax. ¹¹ Chaan Diox nak yalnabee thitanax. Tata gake.

Re diiz bluz kuu nzhab Pey

¹² Wets Silvano kuu kwathoz nali nak mkee yeets ree, taxal nzhap nay lo zha. Lo yeets ree minin chop tson lan diiz, ta mtenin goo ne mndan kwent lo goo lee re koree, nak wlipaayalwen chaan Diox. Kona thibka nali bto goo lo yalwen chaan Diox. ¹³ Lee re zha kuu nyelaaz Jesús kuu nzo yez Babilonia, re zha kuu mli Diox taxal lee, ni "diox" lo goo, ne noga Mark kuu ndak'n taxal xgann na ni "diox" lo goo. ¹⁴ Noga bni goo "diox" lo thib goo ne lo tedib goo, ne dow goo thib chut kwat thib goo ne tedib goo thib mod nali.

Nlaz'n wen kwin reta goo zha kuu nak zha Jesucrist.

¡Tbaa gake!

Pey

Yeets mrop kuu mkee Pey

Pey mni “diox”

¹ Na Simún Pey, nak'n mos ne apóstl chaan Jesucrist. Negeeken yeets ree lo re goo kuu nyelaaz Diox taxalka ne. Tak lee Diox re'aa ne Jesucrist nali nak zha ne mtelaa zha lee lo yalguth. ² Nlaz'n lee Diox ne Jesucrist Zha Nabee lo re'aa, loo yalnkelaaz chaan lo re goo ne tsow wen kwin goo, tsa yelo lebee goo Diox.

Xomod ndoblo gak re zha kuu nyelaaz Jesucrist

³ Ne kon yalney chaan Diox ndaa Diox reta kuu ndeche'aa lo dib nabanaa lo yezlyu ree, tsa banaa taxal nlaaz Diox, kona mtsow Diox mlebee'aa Jesucrist kuu mrezaa lo xni chaan, por re kuu thoz kuu mtsow Jesucrist. ⁴ Ne por yalwen chaan Diox kwaro re kuu thoz ne kuu nataak ne Diox taa Diox lo'aa, tsa por re kona gakaa taxal nlaaz Diox gakaa, tak mzhonaa lo re kuu went kuu ndablaaz kwerpaa lo yezlyu ree.

⁵ Ne por re kona; ndoblo thib ko'aa yekaa nali banaa, ne ndoblo keno'aa masraa yalnzhaak tak nyelaazaa Diox.

⁶ Ne nagt beeta ndoblo keno'aa yalnzhaak, noga ndoblo nabee'aa lo kwerpaa; ne nagt beeta ndoblo nabee'aa lo kwerpaa; noga ndoblo xekaa lo reta kuu went; ne nagt beeta ndoblo xekaa, noga ndoblo nali banaa taxal nlaaz Diox;

⁷ ne nagt beeta ndoblo nali banaa taxal nlaaz Diox, noga ndoblo kwaanaa tsowaa kuu wen lo re altaa'aa; ne nagt beeta ndoblo kwaanaa tsowaa kuu wen lo re altaa'aa, noga ndoblo ke leettsoo'aa tabenaa.

⁸ Os lee goo nap goo re kuu wen ree ne ntsow gooy, tsa lee yalnaban chaan goo kwathoz nataak, tak nlebee goo Jesucrist ne nagte thib kuu nlortsint. ⁹ Per lee zha kuu ntsowt re koree, zha'a nak taxal thib zha syeg ne taxal thib zha kuu gagt wii tith; tak mnithlaaz zha ngok nambi'a zha lo re falt kuu mtsow zha ndala. ¹⁰ Kona nin lo re goo wets'n ne btan na, thib bloo goo yek goo nali to goo lo Diox, tak lee Diox mrez goo ne mli goo par gak goo zha Diox, ne os lee goo tata ntsow goo, wlipaa tsowt raa goo kuu went. ¹¹ Ne tenzhee mod lee pwert yibaa nzhaal lo'aa, tsa ridaa ta nabee Jesucrist Zha Nabee lo'aa ne mtelaa'aa lo yalguth.

¹² Kona, ntenin goo ne ntsow'n ntelaaz goo re koree, tegal ne'a gooy, ne thibka nali ndo goo lo kuu wli kuu mteed goo. ¹³ Per ndak'n wen ntsow'n ntenin goo, tsa ntelaaz goo re koree, nal kuu bee nabana lo yezlyu

ree. ¹⁴ Tak lee Jesucrist Zha Nabee lo'aa, mtsow nen mera gath'n. ¹⁵ Per nal tsow'n kuu takta lon, tsa leettsa ngutha na, lee re goo thibka telaaz goo ne tsow goo re koree.

Re zha kuu mwii yalnabee chaan Jesucrist

¹⁶ Ne lee re kuu mloo nee lo goo, kuu nak lee Jesucrist bretab tedib welt kon yalnabee chaan Jesucrist, nagte thib kwent o thib kuu mgab yek nee, tak kon rop ngutlo nee mwii nee Zha Nabee lo yalnabee chaan zha. ¹⁷ Ne mne nee lee Diox kuu kwathoz ney kuu nak Xutaa, mtsow nataak Diox Jesucrist ne mndaa Diox xni thoz chaan Diox lo Jesucrist, leettsa mni Diox desde yibaa nzhab Diox: “Zha ree nak xgann na kuu kwathoz nke leettsoon, ne kwathoz wen nzo leettsoon zha”. ¹⁸ Ne leeka nee mbin bos kuu mroo yibaa, leettsa mrin re nee Zha Nabee yek yii kuu nayon.

¹⁹ Ne noga napaa re diiz kuu mas wli kuu nzhab re profet, ne wen ntsow goo nzhon goo diize. Ne lee re diza nak taxal thib kandil kuu nkee xni thib ta nakow, bin goo diize asta yen goo re kuu nzhab re profet, tsa lee re kuu nzhab zha gak taxal xni wiz kuu ntsetab leettsa nyeni yezlyu, ne lee Mbel Gwii, kuu nak Jesús, tsetab teni leettsoo goo. ²⁰ Per ndoblo ne goo koree; neeka thib re diiz kuu nke lo xkeets Diox kuu nzhab re profet, nagte kuu mgab yek re profet, ²¹ tak neeka thib re profet, neeka thib welt mnit zha kuu nlaaz zha. Sinke lee re zha mndaa zha kwent kuu nlaaz Diox, tak lee Mbi Nayon chaan Diox mloo leen leettsoo zha naa kwan ndoblo ni zha.

2

*Re zha kuu nloo kuu wlit
(Judas 3-16)*

¹ Per noga ngoo re profet kuu wlit ngok profet xid re zha Israel; ne leeka tata too re maestr kuu kedi xid re goo. Ne xgaatsta loo zha lo re goo, re xgab zha kuu nlortsint ne went ne asta gab zha: “Wlit kuu lee Zha Nabee mtelaa'aa lo yalguth”, tegal lee Jesús mzhii zha, ne kona tsow lux re zha. ² Ne kwathoz men gon diiz lo re zha'a ne tsow re men re kuu went kuu nlaaz kwerp re men, kuu nloo re zha'a; ne kona tsow went tediz re men xnet Diox kuu wli. ³ Ne lo yaltableaza zha temi, kedi zha goo tsa koo zha temi lo goo lo re kuu wlit kuu loo zha lo goo. Per wlipaa talux re zha'a ne laat zha lo re yalti kuu naka diiz rid zha desde ndala.

⁴ Mtuyyt Diox re falt chaan re mandad chaan Diox kuu mndaa falt lo Diox ndala, sinke mloo Diox re zha leen thib yeerdo, ta nakow, ta ndekedoo zha ne tya nzotsow zha, tsa naab Diox kwent lo zha, asta leettsa naab Diox kwent lo reta men wiz bluz. ⁵ Ne

leeka tata mtuyyt Diox re falt re zha kuu ngoo ndala, sinke mtela Diox thib yizhoo xinn lo yezlyu kuu mluux re men kuu mtsow kuu went; ne mtelaa Diox beeta Noé kuu mndaa kwent kuu wli, ne tedib gaz zha liz Noé.⁶ Leeka tata mluux Diox rop yez kuu ngok Sodoma ne Gomorra, leettsa mteyy Diox rop yeza asta myaan di, kona nak thib seny lo re zha kuu ban bluz, tsa ne zha naa xa rid re zha kuu nzhont diiz lo Diox.⁷ Per mtelaa Diox Lot, kuu ngok thib mbyi nali lo Diox, tak kwathoz nabil ngoo leettsoo Lot mwii Lot re kuu went kuu mtsow re men.⁸ Tak lee Lot ngok thib mbyi kuu nali lo Diox, kuu ngoo xid re mena, ne thib wiz tedib wiz, kwathoz nabil ngoo leettsoo Lot mwii Lot ne nzhon Lot re kuu went kuu ntsow re men yeza.

⁹ Ne lee Diox nzhaak ntelaan re zha kuu nali nak lo Diox lo re kuu went, per lee re zha kuu went nak, kotsow Diox zha tsa rid zha yalti, wiz bluz leettsa naab Diox kwent lo reta men.¹⁰ Ne leeka tata teti Diox reta zha kuu ntsow kuu nlaaz kwerp, re zha kuu nzhont diiz lo Zha Nabee. Kwathoz nad zha ne ndat leettsoo zha; ne neeka nzebt zha went ni zha lo re mbi fyer kuu kwathoz ney,¹¹ per neeka re mandad chaan Diox kuu kwathoz ney ne nap yalnabee, myet leettsoo ganaab lo Zha Nabee, tsa teti Zha Nabee re mbi fyer.

¹² Per lee re zha'a nye leettsoo zha, went ni zha lo re mbi fyer kuu neeka nlebeet zha. Ngobeet zha kuu ni zha taxal re maa kuu ngol par niit zha ne kuth zha, leeka tata lux re zha'a,¹³ ne ndriid re zha yalti por re kuu went kuu ntsow zha. Ne wen nzo leettsoo zha, tak ntsow zha kuu nlaaz kwerp zha gadata wiz; anta yalnathoy ne kuu yu nak zha, leettsa nzi zha nzhaw zha kon goo lo ani goo, ne naley nzo leettsoo zha nkedi zha goo.

¹⁴ Gagt wii zha lo thib ngot ne tablaazt zha ngot; nyechet leettsoo zha ntsow zha kuu went. Ne nagant nkedi zha re zha kuu neyt ndo nyelaaz Diox; ne kwathoz ndablaaz zha tak mlode'a Diox zha.¹⁵ Ngwatsaa yek zha tak mlaa zha xnet Diox kuu nali, ne ndeke zha dits kuu mtsow Balaam xgann Beor, Balaam kuu mtsow kuu went, tak ngwalaaz Balaam gatsow gan temi,¹⁶ per lee burr Balaam mni taxal thib men, ne mkox Balaam lo burr por falt Balaam, ne mlaat maa gatsow zha kuu went kuu nda tsow zha.

¹⁷ Lee re zha'a nak taxal pos kuu yent nit, ne taxal xkow kuu nzhe mbi; re zha'a naka diiz rid yalti ta thitanax nakow na.¹⁸ Kwathoz narub ne naguuz ndediz re zha'a, tsa nagant nkedi zha re men ne ntsow zha lee re zha kuu penta mlaa re kuu went kuu nlaaz kwerp, mre ntsow re kona,¹⁹ ne mbez zha lo re zha, tak tsow zha loka kuu

nlaaz zha, per nyeent re zha nak zha mos lo re kuu went kuu ntsow zha, beeta par lux zha; tak reta zha nak zha mos lo re kuu nabee lo zha.²⁰ Tak reta zha kuu mlebee'a Jesucrist Zha Nabee lo'aa ne mtelaa'aa, wlipaapaa mlaa' zha'a lo re kuu went kuu yezlyu ree, per os tsow kuu went gan lo zha ne bre zha ntsow zha re kuu went tedib welt, masraa nakap gak zha nake taxal ngok zha ner.²¹ Mas wen nda zha, os galebeet zha xnet Diox kuu nali, nake ngwalo mlebee zhay, ne bre zha laa zha re kuu nayon kuu nabee Diox tsow zha.²² Per lee re koree ngok, tsa mrolo kuu wli kuu nzhab lo libr Proverbyo: "Lee mbak mre nzhob kuu mre leettsoo, ne lee nguch kuu ngwalo mkeet got, mre nzhax lo ben tedib welt". [Pr. 26:11]

3

Lee Zha Nabee bre tedib welt

¹ Re goo wets'n ne btan na kuu kwathoz nke leettsoon, koree nak yeets mrop kuu ngekeen lo goo. Ne lo ropta yeets ree, mtenin goo, tsa nali tsow goo xgab.² Ne tsa telaaz goo re kuu nzhab re profet kuu nali ne nayon ngok lo Diox ndala; noga tsa telaaz goo re kuu mloo re nee kuu nak apóstol, ne re kuu mnabee Zha Kuu Nabee lo'aa ne mtelaa'aa.

³ Ndoble ne goo koree: Lee re wiz bluz too re zha kuu zhizno kuu wli, ne tsow zha re kuu nlaaz kwerp zha.⁴ Ne naabdiz zha ne zha: "¿Pol gak kuu nzhab Jesús, lee Jesús bre yaad tedib welt? Tak asta leettsa nguth re teyaa zha ndala, reta kwaal lalka nak, leeka taxal nake asta leettsa mdexkwaa yezlyu."⁵ Tak nlaazt zha yen zha lee lobee ne lee yezlyu nzo'a desde ndala, ne Diox mnabee tsa mroo yezlyu lo nit, ne lo nit nzoob yezlyu.⁶ Ne leeka kon nit mluux Diox re men lo yezlyu, leettsa kwathoz mla yi.⁷ Per lee lobee ne yezlyu kuu nzi nal, mloo zhaa'a Diox rope tsa yeeke wiz kuu naab Diox kwent lo reta men, ne taal Diox re zha kuu mtsow kuu went gabil.

⁸ Re goo wets'n ne btan na kuu kwathoz nke leettsoon, noga ndoble ne goo tedib kuu nin lo goo, lee thib wiz nak taxal thib mil liin ne thib mil liin nak taxal thib wiz lo Zha Nabee.⁹ Ne nagat ngetsan Zha Nabee par tsow zha kuu mne zha tsow zha, taxal ntsow chop tson re zha xgab, sinke ngetsan zha tak nxek leettsoo zha lo'aa, tak nlaazt zha lux neeka thibaa, sinke nlaaz zha laa'aa re kuu went ne yelaazaaz zha.

¹⁰ Per lee wiz kuu bretab Zha Nabee tsin taxal nla wann; tsa lee lobee lux kon thib bi thoz, ne lee re kuu nzb lobee lux kon bel, ne lee yezlyu yek kon reta kuu nzi lo yezlyu.

¹¹ Ne os reta kuu tata lux, jndoblo nambi ne nayon banaa!¹² Ne kwettaa tsin wiz

kuu tsow Diox reta kona ne tsowaa kuu ndoblo'aa tsowaa tsa lee wiza lijerta tsin. Wiz kuu luux Diox lobee kon bel ne lee reta kuu nzo lobee yaal kon ki;¹³ per lee'aa ngebetaa yibaa kub ne yezlyu kub, kuu ne Diox taa Diox lo'aa, ta reta kwaa gak nali ne wen.

¹⁴ Kona, re goo wets'n ne btan na kuu kwathoz nke leettsoon, beet raa ngebetaa re koree, thibka ndoblo tsowaa kuu wen, tsa leettsa yaad Jesús wii Jesús wen nzi'aa, ne neeka thib falt ne neeka thib kuu went yetsalt Jesús lo'aa. ¹⁵ Ne ndoblo ne goo chebee ngetsan Zha Nabee ne chebee nxek leettsou zha ne zha lee, kona terka yaad zha, leey nak tak nlaaz zha taa zha yalnaban kuu thitanax lo re men. Leeka taxal mkee wetsaa Paba lo re goo, kon yalnzhaak kuu mndaa Diox lo Paba, ¹⁶ ne lo kadta thib re yeets kuu mkee Paba lo goo mndaa Paba kwent re koree, ne tegal nzo kuu mkee Paba kwathoz nagan yen re mene, kona lee re zha kuu nyente ne re zha kuu neyt ndo nyelaaz Diox ntsee zhay, ne leeka tata ntsee zha tedib net re kuu nke lo xkeets Diox, ne kona leeka lee zha nluux zha zha.

¹⁷ Kona re goo wets'n ne btan na kuu kwathoz nke leettsoon, ne'a goo re koree, kona bkenap goo goo, tsa lee re zha kuu nkedi ne nakap nak thitanax kedit zha goo, ne tsa laat goo mod nali kuu nyelaaz goo Diox. ¹⁸ Kona mas wen ndoblo masraa lebee goo Jesucrist Zha Nabee lo'aa, kuu mte-laa'aa lo yalguth, ne ndoblo masraa tsow goo yalwen chaan Jesucrist. ¡Tak lo zha ndoblo golaa nal ne thitanax!

¡Tbaa gake!

Pey

Yeets ner kuu mkee Juan

Diiz kuu ndaa yalnaban

¹ Jesús nak diiz kuu ndaa yalnaban; ne desde leettsa mdexkwaa Diox yezlyu nzo'a Jesús, ne re nee kuu nak apóstol Jesús mbin nee re diiz kuu mni Jesús, mwii nee Jesús kon prop lo nee ne mdiinn nee Jesús. ² Jesús nak diiz kuu ndaa yalnaban, re nee mwii Jesús, ne ndaa nee kwent chaan Jesús; ne ndaa nee kwent chaan yalnaban kuu thitanax kuu ndaa Jesús. Ndala mndo Jesús lo Xut Jesús, per lee nal mwii nee Jesús. ³ Ne kuu mwii nee ne kuu mbin nee ndaa nee kwent, tsa thibka gak goo kon nee, ne tsa thibka gakaa kon Diox kuu nak Xutaa ne kon Jesucrist Xgann Diox. ⁴ Kona mkee nee rekoree lo goo tsa thitanax naley yo leettsoo goo.

Lee Diox nak xni

⁵ Ne koree nak Diiz Chul kuu mloo Jesucrist lo nee, ne leeka leey lloo nee lo goo; lee Diox nak xni, ne neeka lut yalkow yent lo Diox. ⁶ Os lee'aa mbezaa thibkanakaa kon Diox, ne ntsowaa kuu went kuu ntsow re zha kuu ndiy lo yalkow, nkedi'aa ne ntsowtaa kuu nzhab xkiiz Diox, kuu nak kuu wli. ⁷ Per os lee'aa ntsowaa kuu wen kuu ndoblo tsow re zha kuu nyelaaz Diox, tsasi ndiyaa lo xni, leeka taxal ndo Diox lo xni, ne wlipaap thibka nakaa thibbaa ne tedibaa, ne lee ren chaan Jesucrist Xgann Diox, ntembali'aa lo reta faltaa.

⁸ Os lee'aa mbezaa naptaa falt, nkedi'aa leeka lee'aa ne nzt kuu wli leettsoo'aa. ⁹ Per os lee'aa xoobdola re faltaa lo Jesús, wlipaap tetuyu Jesús re faltaa ne temebi Jesús re'aa lo reta kuu went kuu ntsowaa, tak nali nak Jesús ne thibka ntsow Jesús kuu ni Jesús. ¹⁰ Per os lee'aa mbezaa naptaa neeka thib falt, tsa nto'aa Diox taxal thib zha kuu nkedi, ne wlit mkayaa'aa xkiiz Jesús leen leettsoo'aa.

2

Jesucrist nak kuu nteriid xkiizaa lo Diox

¹ Reta goo kuu nak taxal zhiinn na, ngekeen re koree lo goo tsa taat goo neeka thib falt. Per os lee thib goo taa falt, napaa thib zha kuu teriid xkiizaa lo Xutaa Diox, ne zha'a nak Jesucrist kuu nali nak. ² Lee zha mdix reta faltaa kon yalnaban chaan zha, tsa tuyy Diox faltaa; ne nagt beeta por faltaa nguth zha, sinke noga por re falt chaan reta men kuu nzi dib naxta lo yezlyu nguth zha.

³ Os lee'aa wlipaap nzhonaa diiz lo reta diiz kuu nabee Diox, wlipaap nlebee'aa Diox. ⁴ Per os lee thib goo mbez: "Nlebeen Diox",

ne nzhont goo diiz xkiiz Diox, nkedi goo; ne wlit goo kuu mbez goo. ⁵ Per os lee goo nzhon goo diiz xkiiz Diox, wlipaap nzo yalnkelaaz chaan Diox leettsoo goo; ne tata ne'a thibka nakaa kon Diox. ⁶ Loka cho kuu mbez: "Thibka nzhon diiz lo Diox", ndoblo ban zha taxal mloo Jesucrist.

Diiz kub kuu mas nataak kuu nak ke leettsoo men altaa men

⁷ Re goo wets'n ne btan na, ngekeen't nedib diiz kub kuu nataak lo goo; leey nak leeka diiz nataak kuu mndaa Diox lo re men desde ndala. Leeka diza nak kuu mbin goo lo nal. ⁸ Ne tegal tatay, lee kuu ngekeen lo goo nak thib diiz kub, leey nak kuu wli kuu mtsow Jesucrist ne kuu ntsowaa, kuu nak ke leettsoo'aa Diox ne tabenaa, tak lee yalkow na nderiida, ne lee xni kuu wlipaap nak xni ngeteni'a.

⁹ Ne lee zha kuu mbez: "Lo xni ndon", ne nayii zha ne zha wets zha, bee ndo zha'a lo yalkow. ¹⁰ Per lee zha kuu nke leettsoo wets, lo xni ndo zha'a; ne lat zha lo kuu went, ne neeka tsowt zha la tedib zha lo kuu went. ¹¹ Per lee zha kuu nayii ne wets lo yalkow ndo zha ne ndiy zha lo yalkow, ne net zha naa pa nda zha, tak lee yalkow ntow lo zha. ¹² Re goo kuu nak taxal zhiinn na, ngekeen koree lo goo, tak mtuyya Diox re falt goo por kuu mtsow Jesucrist.

¹³ Ngekeen re koree lo goo zha kuu nak zha gol kuu nabee lo re zha Jesucrist, tak mlebee'aa goo zha kuu nzo desde ndala. Ngekeen re koree lo goo zha mndyeen, tak mtsow goo gan lo Maxuuy.

¹⁴ Ngekeen re koree lo goo ndyeneen bzhizh, tak mlebee'aa goo zha kuu nak Xutaa. Ngekeen re koree lo goo zha kuu zha gol kuu nabee lo re zha Jesucrist, tak mlebee'aa goo zha kuu nzo desde ndala. Ngekeen re koree lo goo zha mndyeen, tak ney ndo goo ne mkayaa goo xkiiz Diox leen leettsoo goo, ne mtsow goo gan lo Maxuuy.

¹⁵ Tablaazt goo yezlyu ree, neeka re kuu nzo lo yezlyu ree. Tak loka cho kuu ndablaazt re kuu yezlyu ree, nkete leettsoo zha'a Xutaa Diox; ¹⁶ tak reta kuu went kuu nzo lo yezlyu ree, ndyaadte lo Xutaa Diox, sinke leeka lo yezlyu ree ndrooy. Ne re koree nak: Re xgab went kuu ndablaazt zha tsow zha re kuu nlaaz kwerp zha, ndablaaz zha keno zha re kuu ngwii zha, ne ndrub zha re kuu nap zha lo yezlyu ree. ¹⁷ Lee yezlyu ree lux, kon reta kuu went kuu nzo lo yezlyu ree; per lee zha kuu ntsow kuu nlaaz Diox taban zha thitanax.

Yalkedi ne kuu wli

¹⁸ Nin lo re goo kuu nak taxal zhiinn na, re wiz ree nak re wiz bluz. Mbina goo

yaad thib zha kuu yii ne Jesucrist; ne lee nal kwathoza re zha'a mzin, kona ne'aa mera tsin wiz bluz.¹⁹ Leeka xidaa mroo re zha'a, per nagt zha, zha'aa, tak os gagak zha, zha'aa, gayaanka zha lo'aa. Per mroo zha xidaa, tsa loo ret men nak zha'aa.

²⁰ Per lee lo goo mndaa Crist Mbi Nayon chaan Crist ne nlebee goo kuu wli.²¹ Ngekeen re koree lo goo, per ngekeet nay tak nlebeet goo kuu wli, sinke ngekee nay tak nlebee'a goo kuu wli, ne wen ne goo lee yalkedi ndroote lo kuu wli.

²² ¿Cho nak zha kuu nkedi? Lee zha kuu nkedi nak zha kuu mbez, lee Jesús nagt Crist, ne mbezga zha nagt Diox Xut Jesús, ne neeka nagt Jesús Xgann Diox, zha'a nak zha kuu nayii ne Crist.²³ Reta zha kuu mbez lee Jesús nagt Xgann Diox, nagt zha'a zhiinn Diox; per lee zha kuu mbez lee Jesús nak Xgann Diox, zha'a nak zhiinn Diox.

²⁴ Kona, blotsow goo re diiz kuu mbin goo desde ner leen leettsou goo, ne os lee re diiz kuu mbin goo ner myaane leen leettsou goo, no goo thibka nak goo kon Xgann Diox ne kon Diox.²⁵ Ne ne'a Jesucrist taa Jesucrist yalnaban kuu thitanax lo'aa.

²⁶ Ngekeen re koree lo goo, tak nzo zha kuu nlaaz kedi goo.²⁷ Per lee'aa napaa Mbi Nayon kuu mndaa Jesucrist lo'aa, ne ndechet raa goo naa cho loo lo goo, tak Mbi Nayon nak kuu nloo reta kwaa lo goo, ne lee kuu nloo Mbi Nayon nak kuu wli, nagle kuu wlit. Thibka gok goo kon Jesucrist, taxal nloo Mbi Nayon lo goo.

²⁸ Nin lo re goo kuu nak taxal zhiinn na, thibka gok goo kon Jesucrist, tsa leettsa yaad Jesucrist, kon dib ndroo leettsou'a bigaa lo zha ne neeka thoytaa lo zha.²⁹ Ne ne'a goo lee Jesucrist nali nak, kona noga ndoblo ne goo lee re zha kuu nali nak zha lo re kuu ntsow zha, zhiinn Diox nak re zha'a.

3

Zhiinn Diox nakaa

¹ ¡Wii goo, naa xa nke leettsou Xutaa Diox lee'aa, tsa mrole'aa zhiinn Diox! ¡Ne wlipa'a nakaay! Kona lee re men yezlyu ree nlebeet zha lee, tak nlebeet zha Diox.² Re goo wets'n ne btan na kuu kwathoz nke leettsou, naka lee zhiinn Diox; ne terka loo naa xomod gakaa tsya. Per ne'a leettsa yaad Jesucrist, tsa gakaa taxal Jesucrist, tak tsya wii'aa Jesucrist taxal na Jesucrist.³ Ne reta zha kuu ngebet yaad Jesucrist, thibka nambi ndo zha lo Diox, leeka taxal nambi nak Jesucrist.

⁴ Reta zha kuu ndaa falt ntsow zha kuu went, tak reta falt nak kuu went.⁵ Ne wen ne'a, lee Jesucrist myaad lo yezlyu ree par mtuyy reta faltaa, ne neeka thib falt mndaat Jesucrist.⁶ Reta zha kuu thibka nak

kon Jesucrist, ndaat raa zha falt. Per lee re zha kuu ndaa falt, ter wii zha Jesucrist ne neeka nlebeet zha Jesucrist.⁷ Nin lo re goo zha kuu nak taxal zhiinn na, taat goo diiz kedi neeka thib zha goo; tak lee zha kuu ntsow kuu wen, nali nak zha taxal nali nak Jesucrist,⁸ per lee zha kuu ndaa falt, zhiinn Maxuuy nak zha'a, tak lee Maxuuy nak kuu mndaa falt desde ndala. Kona lee Xgann Diox myaad par luux reta kuu ntsow Maxuuy.

⁹ Reta zha kuu nak zhiinn Diox, ntsowt raa zha kuu went, tak napa zha Mbi Nayon chaan Diox leen leettsou zha; kona ndoblot raa taa zha falt, tak zhiinn Diox nak zha.¹⁰ Ne tenzhee mod ne'a naa cho nak zhiinn Diox ne cho nak zhiinn Maxuuy: Reta zha kuu ntsow kuu went, ne re zha kuu nket leettsou wets, nagt zha'a zhiinn Diox.

Ndoble ke leettsou'aa thibaa ne tedibaa

¹¹ Ne diiz ree nak kuu mbin goo desde ndala: Ndoble ke leettsou'aa thibaa ne tedibaa.¹² Ndoblot gakaa taxal Caín kuu ngok zhiinn Maxuuy ne mbeth wetse. ¿Ne chebee mbeth Caín wets Caín? Mbeth zha wets zha, tak went kuu mtsow zha, ne lee wets zha mtsow kuu wen.

¹³ Re goo wets'n ne btan na, yat leettsou goo os lee re zha yezlyu ree yii ne goo.¹⁴ Mbriida lee lo yalguth ne napa lee yalnaban kuu ndaa Diox, ne wen ne'a koree, tak nke leettsou'aa re wetsaa. Per lee zha kuu nket leettsou wets, zha nguth nak zha'a.

¹⁵ Reta zha kuu nayii ne wets, re zha'a nak taxal zha kuu nzhuth men, ne ne'a goo lee re zha kuu nzhuth men napt zha yalnaban kuu thitanax.¹⁶ Ne Jesús mloo lo'aa naa xomod nak yalnkelaaz, leettsa mndaa Jesús yalnaban chaan Jesús por lee. Ne leeka tata ndoblo taa'aa yalnaban chaanaa, par tsowaa ayud thibaa ne tedibaa.¹⁷ Os lee thib goo nap chaan, ne ne goo lee wets goo ndeche thib kwaa, ne nlla leettsou goo ne goo wets goo, ¿xomod loo goo lee yalnkelaaz chaan Diox nzo leettsou goo tsa?¹⁸ Re goo kuu nak taxal zhiinn na, lee yalnkelaaz, ndoblot gake beeta kon diiz kuu ndroo roo'aa; sinke wlipa'a ndoblo looy lo re kuu ntsowaa.

¹⁹ Ne tenzhee mod ne'a lee'aa nabanaa, taxal nzhab lo xkiiz Diox kuu nak kuu wli, ne wen ne'a lee Diox nkenap leettsou'aa;

²⁰ ne os lee leettsou'aa nkeki'aa, ndoblo telaazaa masraa naro Diox nake leettsou'aa, ne lee Diox ne reta kwaa.²¹ Kona nin lo re goo wets'n ne btan kuu kwathoz nke leettsou, os lee leettsou'aa nkekitaa, kon dib ndroo leettsou'aa ne'a tekayaa Diox re'aa;²² ne tetaa Diox reta kuu naabaa lo Diox, tak nzhonaa diiz kuu nabee Diox ne ntsowaa re kuu wen kuu nlaaz Diox.²³ Ne

koree nak diiz kuu nabee Diox lo'aa: Ndoblo yelaazaa Jesucrist Xgann Diox ne ndoblo ke leettsoo'aa thibaa ne tedibaa, taxal mnaabee Jesucrist lo'aa. ²⁴ Ne lee zha kuu nzhon diiz kuu nabee Diox, thibka nak zha'a kon Diox ne lee Diox naban leettsoo'aa. Ne tenzhee mod ne'aa lee Diox naban leettsoo'aa, tak mindaa Diox Mbi Nayon chaan Diox lo'aa.

4

Mbi Nayon chaan Diox ne mbi kuu nagt chaan Diox

¹ Re goo wets'n ne btan na kuu kwathoz nke leettsoon, yelaazt goo reta kuu ne re zha kuu ne: "Na nap Mbi Nayon chaan Diox", tak ret mbi nak chaan Diox. Leettsa tabaa ne thib zha lo goo, ner btsow goo preb zha naa chu wli Mbi Nayon chaan Diox nzo leen leettsoo zha o nagte Mbi Nayon chaan Diox. Tak mze lo yezlyu ree nzo re profet kuu wlit nak profet, re zha kuu mbez ndaa kwent chaan Diox. ² Ne tenzhee tak lebee goo naa cho nap Mbi Nayon chaan Diox: Reta zha kuu mbez lee Jesucrist myaad ngok men lo yezlyu ree, re zha'a nap Mbi Nayon chaan Diox. ³ Per lee re zha kuu mbez lee Jesús myaadtaxal men lo yezlyu ree, napt zha'a Mbi Nayon chaan Diox, sinke lee zha'a nap mbi kuu nayii ne Crist. Ne mbina goo lee mbi wenta yaad; ne lee nal nzole lo yezlyu ree.

⁴ Re goo kuu ndak'n taxal zhiinn na, goo nak zha Diox, ne mtsowa goo gan lo re zha kuu nkedi'a; tak mas ney zha kuu naban leen leettsoo goo, nake zha kuu ndo lo re zha kuu nyelaazt Diox. ⁵ Reta zha'a nak zha yezlyu ree, kona kuu yezlyu ree ndediz zha ne nzhon re zha yezlyu ree kuu ni zha. ⁶ Per lee'aa nakaa zhiinn Diox. Ne reta zha kuu nlebee Diox nzhon zha kuu ni'aa; per lee zha kuu nagt zha Diox, nzhont zha kuu ni'aa. Ne tabaa mod tak ne'aa naa cho nap Mbi Nayon kuu nak kuu wli, ne cho nap mbi chaan yalkedi.

Diox nak yalnkelaaz

⁷ Re goo wets'n ne btan na kuu kwathoz nke leettsoon, ndoblo ke leettsoo'aa thibaa ne tedibaa, tak lo Diox ndyaad yalnkelaaz. Ne reta zha kuu nke leettsoo taben, zhiinn Diox nak zha'a ne nlebee zha'a Diox. ⁸ Per lee zha kuu nket leettsoo taben, nlebeet zha'a Diox, tak Diox nak yalnkelaaz. ⁹ Ne tenzhee mloo Diox yalnkelaaz chaan Diox lo'aa, tak mtaal Diox thibka Xgann Diox lo yezlyu ree, tsa por Xgann Diox keno'aa yalnabany kuu thitanax. ¹⁰ Ne koree nak yalnkelaaz: Nagte tak mke leettsoo'aa Diox, sinke lee Diox mke leettsoo re'aa, kona mtaal Diox Xgann Diox nguth mdix faltaa.

¹¹ Re goo wets'n ne btan na kuu kwathoz nke leettsoon, kwathoz mke leettsoo Diox re'aa, kona noga lee ndoblo ke leettsoo'aa thibaa ne tedibaa. ¹² Neeka thib men ter wii Diox; per os lee'aa nke leettsoo'aa thibaa ne tedibaa, wlipa lee Diox nabee leettsoo'aa ne lee yalnkelaaz chaan Diox ntsow nzhak nali'aa. ¹³ Ne mndaa Diox Mbi Nayon chaan Diox lo'aa, ne lee Mbi Nayon nloo lo'aa thibka ndo'aa kon Diox ne lee Diox thibka ndo kon lee. ¹⁴ Ne mwii nee Jesucrist ne ndaa nee kwent lee Xutaa Diox mtaal xgann Jesucrist, par telaa re men lo yalguth kuu thitanax. ¹⁵ Loka zha kuu gab lee Jesús nak Xgann Diox, zha'a ndo kon Diox ne lee Diox ndo kon lee zha.

¹⁶ Ne'aa ne nyelaazaa nke leettsoo Diox re'aa. Lee Diox nak yalnkelaaz; ne lee zha kuu nke leettsoo taben ndo zha'a kon Diox ne lee Diox ndo kon lee zha. ¹⁷ Ne tenzhee mod masraa nke leettsoo altaa'aa par nzhak nali'aa, tsa leettsa naab Diox kwent lo reta men ne'aa tekaya Diox re'aa; tak lo yezlyu ree nakaa taxal nak Jesucrist. ¹⁸ Ne ta nzo yalnkelaaz yent tseb. Tak lee zha kuu wlipa nke leettsoo nzebt zha'a, tak leettsa nzebt men teriid men yalti. Kona os cho zha nzeb, nzeb zha tak ter ke leettsoo zha Diox ne taben zha kon dib ndroo leettsoo zha.

¹⁹ Ne nke leettsoo'aa Diox, tak lee Diox mke leettsoo Diox re'aa ner. ²⁰ Os lee thib zha mbez: "Nke leettsoon Diox", ne nayii zha ne zha wets zha, zha nkedi nak zha'a. Os lee zha nket leettsoo zha wets zha, kuu ngwii zha, ¿xomod tak ke leettsoo zha Diox kuu ngwiit zha? ²¹ Jesucrist mndaa diiz ree lo'aa; loka zha kuu nke leettsoo Diox, noga ndoblo ke leettsoo zha wets zha.

5

Xomod tsowaa gan lo yezlyu ree

¹ Reta zha kuu nyelaaz lee Jesús nak Crist, zhiinn Diox nak zha'a. Ne reta zha kuu nke leettsoo Xutaa Diox, noga nke leettsoo zha xgann Xutaa Diox. ² Ne leettsa nke leettsoo'aa Diox ne nzhonaa diiz lo Diox, noga ne'aa nke leettsoo'aa re zhiinn Diox, ³ tak lee zha kuu nke leettsoo Diox, nzhon zha diiz xkiiz Diox; ne lee kuu nabee Diox nagte thib kuu nagan gon zha diiz, ⁴ ne reta zha kuu nak zhiinn Diox, ntsow zha gan lo re kuu went kuu nzo lo yezlyu ree; ne ntsow zha gan lo re kuu went, tak nyelaaz zha Jesucrist. ⁵ Loka zha kuu nyelaaz lee Jesús nak Xgann Diox, zha'a ntsow gan lo re kuu went kuu nzo lo yezlyu ree.

Mbi Nayon ndaa kwent chaan Xgann Diox

⁶ Lee Jesucrist myaad lo yezlyu ree kon nit ne kon ren; ne nagte beeta kon nit, sinke myaad Jesucrist kon nit ne kon ren. Ne

Mbi Nayon nak kuu ndaa kwente, tak lee Mbi Nayon nak kuu wli. ⁷ Ne tson kuu nak kuu ndaa kwente: ⁸ Mbi Nayon, nit ne ren; ne thibka kuu ni re yon koree. ⁹ Ne os lee'aa nyelaazaa kuu mbeze re men; masraa ndoblo yelaazaa kuu ni Diox, tak mas nataak kuu ni Diox, ne lee Diox mndaa kwent chaan Xgann Diox. ¹⁰ Ne loka zha kuu nyelaaz Xgann Diox, ndaa Diox kwent chaan Xgann Diox lo zha. Per lee zha kuu nyelaazt Xgann Diox, nto zha Diox taxal zha kuu nkedi, tak nyelaazt zha kuu ndaa Diox kwent chaan Xgann Diox. ¹¹ Ne kuu ndaa Diox kwent nak: Ndaa Diox yalnaban kuu thitanax lo'aa, ne Xgann Diox ndaa yalnabana. ¹² Ne lee zha kuu nyelaazt Xgann Diox, nkeno zha yalnaban kuu thitanax; per lee zha kuu nyelaazt Xgann Diox, nkenot zha yalnaban kuu thitanax.

Kon koree ngwalo mteni Juan re men

¹³ Ngekeen re koree lo goo, zha kuu nyelaaz Xgann Diox, tsa ne goo nap goo yalnaban kuu thitanax.

¹⁴ Ne kon dib ndroo leettsoo'aa ne'aa ton Diox xkiizaa, os lee'aa naabaa thib kuu lo Diox taxal nlaaz Diox, tataa Diozhe. ¹⁵ Ne os ne'aa lee Diox nzhon kuu naabaa lo Diox, noga ne'aa tekayaa'aa re kuu naabaa lo Diox.

¹⁶ Os lee thib goo ne goo lee thib zha kuu nyelaaz Jesús ndaa thib falt, kuu ndanote zha lo yalguth, ndoblo naab goo lo Diox por zha'a, tsa taa Diox yalnaban lo zha, os leey nake thib falt kuu ndanot zha lo yalguth. Tak nzo falt kuu ndano zha lo yalguth, ne nit'n ndoblo naab goo lo Diox por falta. ¹⁷ Reta kuu went nak falt; per nzo falt kuu ndanot zha lo yalguth.

¹⁸ Noga ne'aa reta zha kuu nak zhiinn Diox, ntsowt raa zha kuu went; tak zhiinn Diox nak zha, ne lee Xgann Diox nkenap zha, ne yent kwan tak tsow Maxuuy lo zha. ¹⁹ Ne wen ne'aa nakaa zhiinn Diox, ne reta men kuu nzi dib naxta lo yezlyu kuu nyelaazt Diox, nzo lo yalnabee chaan Maxuuy. ²⁰ Noga wen ne'aa lee Xgann Diox myaad mndaa yalnzhaak lo'aa, tsa yenaa ne lebee'aa, Zha kuu wlipaa nak. Ne thibka nakaa kon Diox por Xgann Diox, kuu nak Jesucrist. Ne lee Jesucrist nak Diox kuu wlipaa, ne ndaa Jesucrist yalnaban kuu thitanax lo'aa. ²¹ Re goo zha kuu ndak'n taxal zhiinn na, kenap goo goo ne yelaazt goo re kuu wlit nak Diox.

¡Tbaa gake!

Juan

Yeets mrop kuu mkee Juan

Kuu wli ne yalnkelaaz

¹ Na Juan, zha gol. Ngekeen koree lo'a btan na kuu mli Diox ne lo re zhiinna, wlipaapaa nke leettssoon goo lo kuu wli, ne nagt beeta na nke leettssoon goo, sinke nogaa reta zha kuu nlebee kuu wli. ² Nke leettssoon goo, tak nabanaa lo kuu wli ne thibka nzoy leettsoo'aa thitanax. ³ Naab'n lo Xutaa Diox ne lo Xgann Diox Jesucrist, tsa taa zha yalnkelaaz chaan zha lo goo, lat leettsoo zha ne zha goo, ne tsow zha wen kwin goo, lo kuu wli kuu mkayaa goo kon yalnkelaaz.

⁴ Kwathoz naley nzo leettsoon, tak mbín na lee chop tson zhiinna naban lo xnet Diox kuu wli, taxal mnabee Xutaa Diox lo'aa. ⁵ Lee nal naab'n lo'a btan, ndoblo ke leettsoo'aa thibaa ne tedibaa. Ne lee kuu ngekeen lo'a nagte tedib diiz kub kuu nataak, leey nak leeka diiz kuu napaa desde ndala. ⁶ Lee yalnkelaaz nak ban men taxal nzhab xkiiz Diox; ne lee diiz nataak ree nak leeka diiz kuu mbín goo ndala: "Ndoblo ke leettsoo'aa thibaa ne tedibaa kon dib ndroo leettsoo'aa".

Re zha kuu nkedi

⁷ Tak kwathoz zha kuu nkedi ndiy dib lo yezlyu, ne re zha'a mbez: "Lee Jesucrist myaadat taxal men lo yezlyu ree". Re zha kuu tata mbez, zha nkedi nak zha ne nayii zha ne zha Jesucrist. ⁸ Kona bkenap goo goo, tsa luuxt goo rtsin nee kuu mtsow nee, tsa kayaa goo kuu ndoblo goo kayaa goo kuu taa Diox lo goo. ⁹ Reta zha kuu ndab xnet Diox ne ntswot zha kuu mloo Jesucrist, ndot zha'a kon Diox; per lee zha kuu thibka ntswot kuu mloo Jesucrist, zha'a ndo kon Xutaa Diox ne kon xgann Xutaa Jesucrist. ¹⁰ Os lee thib zha kuu ntsee kuu mloo Jesucrist yatwii lo goo, kayaat goo zha liz goo ne neeka nit goo "diox" lo zha, ¹¹ tak loka zha kuu ni "diox" lo re zha'a, thibka nzhak zha kon re kuu went kuu ntswot re zha'a.

Re diiz bluz kuu mni Juan

¹² Kwathoz kuu nlaz'n nin lo goo, per nlazt'n kee nay lo yeets; tak nlaz'n yal'n lo goo tsa ni nay lo goo, tsa oraaka retalee naley yo leettsoo.

¹³ Noga re zhiinn bela kuu mli Diox, ni "diox" lo'a.

¡Tbaa gake!

Juan

Yeets myon kuu mkee Juan

Wen mnodediz Juan, zha kuu le Gayo

¹ Na Juan, zha gol. Ngekeen yeets ree lo'a amig Gayo, tak kwathoz nke leettsoon lu lo kuu wli.

² Wets, thibka naab'n lo Diox tsa leeka taxal wen ndo'a lo Diox, leeka tata wen ya'a lo reta kuu ntsowa ne lent liza. ³ Kwathoz naley ngoo leettsoon, leettsa myaad chop tson wets, kuu mndaa kwent naa xomod nali naka, ne xomod wen nabana lo kuu wli. ⁴ Yent raa kwan ntsow naley nyoo leettsoon, leettsa nzhon na lee re zha kuu ndak'n taxal zhiinn na, naban taxal nak kuu wli.

⁵ Wets kuu kwathoz nke leettsoon, kwathoz wen ngetswa, tak nkayaa'a re zha kuu nyelaaz Jesucrist, re zha kuu ndyaad tedib net re yez. ⁶ Ne leettsa nkaltaa re zha kuu nyelaaz Jesús, re zha kuu nzo re yeza, lee re zha'a ndaa kwent naa xomod nke leettsoon'a re zha. Ndoble tsowka lu ayud re zha thib mod nali, taxal nlaaz Diox ne ndoble taa'a kuu ndeche zha net, tsa ndaka zha xnet zha. ⁷ Tak lee re zha'a ndo zha net ngetsw zha rtsin Jesucrist, ne neeka thib kuu nkayaat zha lo re zha kuu nyelaaz Diox. ⁸ Kona ndoble tsowaa ayud re wetsaa. Ne tenzhee mod noga lee ngetswaa rtsin Zha Nabee kuu nak kuu wli.

Diótrefes mtsow kuu went

⁹ Mkeen thib yeets lo re zha kuu nyelaaz Jesús, per lee Diótrefes nlaazt gon diíz kuu nabee nee, tak lee kuu nlaaz zha nak gak zha, zha kuu mas nataak lo re zha kuu nyelaaz Jesús. ¹⁰ Kona, os leen yal'n lo goo, tsa nin lo zha, tak nkedi zha ne nllooz zha nee. Ne nzegeyt zha beeta kona, sinke noga nkayaat zha re wets kuu nzin liz zha, ne lee re zha kuu nlaaz kayaa re wetsaa liz, ndaat zha diíz kayaa zha zha, ne ngoo zha re zha kuu nkaya re wetsaa ta nkaltaa re zha kuu nyelaaz Diox.

Demetrio mtsow kuu wen

¹¹ Wets kuu kwathoz nke leettsoon. Tsowta kuu went kuu ntsow tedib net re zha, sinke btsow kuu wen. Tak lee zha kuu ntsow kuu wen, zha Diox nak zha'a, per lee zha kuu ntsow kuu went, nlebeet zha'a Diox. ¹² Reta men ndediz lee Demetrio wen nak, ne wliy. Ne noga nee ne ngetsw zha kuu wen, ne lee lu ne'a kuu wli ni nee.

Re diíz bluz kuu nzhab Juan

¹³ Kwathoz kuu nlaz'n ganin lo'a, per nlaazt'n kee nay lo yeets, ¹⁴tak nlaz'n chatta yal'n lo'a tsa tedizaa. ¹⁵ Nzaala asta tedib wiz, nlaz'n tsow Diox kuu wen lo'a. Reta

zha kuu nzaal leettsoo'aa kuu nzi nzhee ni "diox" lo'a; ne tsow yalwen ni "diox" lo kadta thib re zha kuu nzaal leettsoo'aa kuu nzo baa.

Juan

Yeets kuu mkee Judas

Judas mkee yeets ree lo re zha kuu nyelaaz Diox

¹ Na nak Judas, wets Santiag ne nak'n mos chaan Jesucrist. Ngekeen yeets ree lo re goo, zha kuu mrez Xutaa Diox, tsa gak goo zha Diox, tak kwathoz nke leettsoo Diox goo. Ne Jesucrist nak kuu thibka nkenap goo.

² Nlaz'n kwathoz lat leettsoo Diox ne Diox goo, ne tsow Diox wen kwin goo, ne loo Diox yalnkelaaz chaan Diox lo goo.

Re zha kuu nloo kuu wlit

³ Re goo wets'n ne btan na kuu kwathoz nke leetsoon, kwathoz ngoo yek'n keen yeets ree lo re goo, tsa tan kwent naa xomod mloo Diox re'aa lo yalguth, tsa taa Diox yalnaban kuu thitanax lo'aa; per lee nal ndoblo keen tedib kwaaw lo goo, tsa ne goo naa xomod ney to goo lo kuu wli chaan Diox, kuu mndelaaz Diox lo'aa, zha kuu nak zha Diox. ⁴ Tak mndaab thib net re zha kuu nkedu xid goo, tak ndala nzhab lo xkeets Diox, lee re zha'a rid yalti kuu ndoblo zha rid zha. Re zha wenta, nlortsin zha yalwen chaan Diox par ntsow zha re kuu went; ne tenzhee mod ntsow nataagt zha Xutaa Diox ne Jesucrist Zha Nabee lo'aa.

⁵ Ne tegal ne'a goo koree, per nlaz'n telaaz gooy tedib welt: Lee Zha Nabee mloo re teyaa zha ndala, zha Israel yez Egipto, ne bluz mluu Diox re teyaa kuu ngwalaazt Diox. ⁶ Ne noga re mandad chaan Diox kuu mkenapt yalnabee kuu mndaa Diox lo zha, leel mlaa zha liz zha, lee nal lee zha nzo tsib thitanax ta nakow na, tya nzo zha asta wiz kuu naab Diox kwent lo reta men. ⁷ Taxal re mandada, leeka tata ngok kon yez Sodoma ne Gomorra ne re yez kuu mrin gaxta tyu kuu mbint diiz, kwathoz ngoo yek zha mtsow zha kuu went, ngok rop zha kon ndota zha, ne asta re mbyi ngok rop kon tabyi. Kona mteyy Diox rop yeza kon ki, ne kona nloo lee reta zha kuu ntsow kuu went, ndya rid yalti lo ki kuu thitanax nyuyyt.

⁸ Ne leeka tata re zha kuu ntsow kuu went, re zha kuu ntsow kuu nlaaz kwerp, taxal zha ntsaa leettsoo nak zha, nteyu zha kwerp zha, ne neeka nyelaazt zha yalnabee chaan Zha Nabee, ne nye leettsoo zha went ni zha lo re yalnabee kuu nzo. ⁹ Ne leeka Miguel kuu nak mandad chaan Diox, kuu nabee lo reta mandad Diox, leettsa mbyodiz zha kon Maxuuy lo kwerp Moisés, myet leettsoo mandad gagab mandad lo Maxuuy na taala gabil, sinke beeta nzhab mandad lo Maxuuy: "Diox teti'a, ne naab kwent lo'aa". ¹⁰ Per lee re zha'a, nye leettsoo zha ngode zha re

kuu nlebeet zha ne kuu net zha xa nak, taxal re maa nlebee zhay, tak ngobeet zha taxal maa, ta mod nlortsin zha re diiz kuu went ne leeka re zha nluux zha zha, ne nak zha taxal re maa kuu ngobeet.

¹¹ iKwathoz nati rid re zha'a! Tak ndeke zha tsow zha kuu mtsow Caín. Ne ndablaaz zha tsow zha gan temi taxal Balaam, kona mlaa zha net nali, ta mod lux re zha leeka taxal mluu Coré, tak mbint Coré diiz lo Moisés. ¹² Anta yalnathoy nak re zha ndob zha lo goo, leettsa nzhaw rtsee goo par nawiitxa kwin goo lo Diox, ndob zha nzhaw zha ne nzhuu zha ne naley nyoo leettsoo zha, ne yent cho lo nzhon zha diiz, ne nkenap zha beeta lee zha. Re zha'a nak taxal xkow kuu ndyaadnot yi, kuu ndano mbi thib lad ne tedib lad. Noga nak zha taxal ya kuu ndaat xle, leettsa ndoblo taay xle, ne nak zha taxal ya kuu mbyiib ne mbiz dib lozh thitanax. ¹³ Ne taxal nitdoo kuu nathoz ngith nak zha, ne lee re falt zha nak taxal re btsiin nitdoo kuu yu. Ne nak zha taxal re mbel kuu nzib lobee kuu mtab xnet; ne naka diiz lee re zha'a rid yalti ta thitanax kwathoz nakow.

¹⁴ Noga Enoc kuu ngok gaz raz bluz lo Adán, mndaa zha kwent kuu nzhab Diox lo zha; leettsa nzhab zha: "Mwiin lee Zha Nabee ndyaad, kon kwathoz tyen mil zha zha kuu nayon lo zha,¹⁵ par naab zha kwent lo reta men, ne teti zha reta men por reta kuu went mtsow men, ne por reta diiz rax kuu nzhab re men lo Diox, tak zha ndab falt nak zha." ¹⁶ Reta kuu went nak lo re zha'a, nlooz zha ne beeta dits re kuu nlaaz kwerp zha ndeke zha, ne kwathoz narub ndediz zha, ne wen ndediz zha lo re men beeta par taa re men kwaaw lo zha.

Judas mteni re zha kuu nyelaaz Jesús

¹⁷ Per lee re goo wets'n ne btan na, btelaaz goo re kuu ne re apóstol chaan Jesucrist Zha Nabee lo'aa, ¹⁸ leettsa ne re zha: "Lee re wiz bluz too re zha kuu zhizno kuu wli, ne tsow zha re kuu went kuu nlaaz kwerp zha". ¹⁹ Re zha'a ntsow nzhab rol goo; ntsow zha kuu nlaaz kwerp zha ne napt zha Mbi Nayon chaan Diox leen leettsoo zha.

²⁰ Per lee re goo wets'n ne btan na, thibka ney bto goo gwalaaz goo Diox. Ne thibka bnaab goo lo Diox taxal nlaaz Mbi Nayon chaan Diox. ²¹ Thibka bke leettsoo goo altaa goo taxal nlaaz Diox, ne blet goo wiz kuu bretab Jesucrist Zha Nabee lo'aa, ne tak nlat leettsoo zha ne zha lee, taa zha yalnaban kuu thitanax lo'aa.

²² Ne blat leettsoo goo bne goo re zha kuu nzhab chop xgab nyelaaz Diox. ²³ Btsow goo ayud choraa zha, btelaaz goo zha lo ki kuu thitanax. Ne blat leettsoo goo bne goo tedib

net zha, per noga kenap goo goo, ne byii goo
bne goo re kuu went kuu ntsow re zha.

Re diiz bluz kuu nzhab Judas

²⁴ Tak lee Diox tak kenapaa tsa tsowtaa
kuu went, ne lee Diox tembi'aa ne tsow Diox
naley yo leetsoo'aa, leetsa to Diox re'aa lo
xni thoz chaan Diox. ²⁵ Beeta lee Diox nak
kuu mtelaa'aa lo yalguth por kuu mtsow
Jesucrist, Zha Nabee lo'aa. Lo Diox ndoblo
golaa, tak naro Diox, ney Diox, ne nap Diox
yalnabee, desde ndala, nal ne thitanax.

¡Tbaa gake!

Judas

Re kuu mloo Jesucrist lo Juan

Re kuu mloo Jesucrist lo Juan

¹ Na nak Juan, ne re koree nak kuu mloo Jesucrist lon. Lee Diox mnidaa diiz lo Jesucrist, tsa loo Jesucrist reta kuu mera gak lo re zha kuu nak mos Diox. Ne leeka lee Jesucrist mtaal thib re mandad chaan mloo re koree lon, ² kona ndan kwent xkiiz Diox ne kwent chaan Jesucrist, ne wli reta kuu mwiin.

³ Wen nda re zha kuu lab re diiz ree ne re zha kuu gon diiz re kuu mkayaan lo Diox, ne re zha kuu nzhon diiz re kuu nke lo yeets ree, tak ndetsin gaxa wiz bluz.

Juan mni "diox" lo re zha Jesucrist, kuu nzo re gaz yez chaan Asia

⁴ Na Juan, ngekeen yeets ree lo re goo, zha kuu nak zha Jesús kuu nzo re gaz yez chaan Asia. Naab'n lo Diox loo Diox yalnkelaaaz chaan Diox lo goo, ne tsow Diox wen kwin goo, ne lee kuu ngekeen lo re goo lo Diox ndyaade, ne lo re gaz Mbi Nayon chaan Diox kuu ndo lo Diox, zha kuu nak, zha kuu ngok ne zha kuu bre yaad, ⁵ ne lo Jesucrist kuu nali nak ndyaad re diiz ree, zha kuu ner mroban xid re zha nguth ne zha kuu nap yalnabee nabee lo re rey kuu nabee lo yezlyu ree. Ne kwathoz nke leettsaa zha lee, kona kon ren zha mtelaa zha lee ne mtuyy zha re faltaa, ⁶ ne mtsow zha gagaka rey ne ngwleyy zha, tsa lortsinaa lo Xutaa Diox. jNlaz'n tsow nataak re men beeta Diox, tak chaan Diox nak yalney titanax! Tata gake.

⁷ jWii goo, lee Jesucrist yaad leen xkow!

Ne reta men wii zha or yaad zha, ne asta re zha kuu mdin zha, tewii re zha'a zha,

ne reta men kuu nzo dib naxta lo yezlyu,

gonn zha leettsa wii zha zha.

jWili, tata gake!

⁸ "Na nak zha ner ne zha bluz, taxal nak A ne Z", ne Zha Nabee, zha kuu kwathoz ney, zha kuu nak, zha kuu ngok ne zha kuu yaad.

Koree mloo Jesucrist lo Juan

⁹ Na nak Juan wets goo, lalka ndriidaa yalti ne lalka nxekaa, tak nyelaazaa Jesucrist ne thibka kayaa re'aa ta nabee Diox. Leettsa mzin na thib yezlyu kuu nzi leen nitdoa ta le Patmos, tak ndan kwent xkiiz Diox ne kwent chaan Jesucrist. ¹⁰ Ne leen mndo lo yalney chaan Mbi Nayon, wiz kuu nak wiz Zha Nabee, tsa mbin na thib bos nex par dits'n, taxal thib bi chaan trompet, ¹¹ kuu ne lon:

—Reta kuu loo lo'a, bkeey lo thib yeets ne btaale lo re zha da kuu nzo re gaz yez

chaan Asia, kuu nak re yez ree: Éfeso, Esmirna, Pérgamo, Tiatira, Sardis, Filadelfia ne Laodicea.

¹² Tsa mtseren lon par dits'n, tsa naa cho chaan bos kuu mni lon; ne or mtseren lon, tsa mwiin gaz kandeler kuu or, ¹³ ne ndrol re gaz kandeler mwiin thib zha kuu na taxal zhiinn thib men, ne nok zha thib lar nol kuu nzin asta dits nii zha, ne naliib thib sinch or pech zha. ¹⁴ Ne lee yitsek zha naguz na, taxal yits lad mbak zhil kuu naguz ne taxal yig, ne lee ngutlo zha na taxal loz bel. ¹⁵ Lee nii zha nla xni taxal yiiben kuu kwathoz mzuu lo ki, ne lee bos zha nyooobi taxal thib ta kwathoz nla nit. ¹⁶ Ne lee yaa ban zha nden zha gaz mbel kuu nzib lobee, ne lee roo zha ndroo thib espad kuu kwathoz naluts kuu rop ladta nale. Lee lo zha na taxal lo wiz leettsa kwathoz nla bee.

¹⁷ Leettsa mwiin lo zha, tsa ngob'n xann nii zha taxal thib zha nguth. Per lee zha mxoob zha yaa ban zha dits'n, tsa ne zha lon:

—Tsebta; tak na nak zha kuu ner ne zha bluz. ¹⁸ Na nak zha kuu naban, wli nguth'n, per lee nal naban na thitanax. Ne nden na yab chaan Hades ne yab chaan yalguth. ¹⁹ Bkee reta kuu mwii'a lo yeets, re kuu nzo nal ne re kuu yo bluz. ²⁰ Koree nak kuu nagaats chaan re gaz mbel kuu nzib lobee, kuu mwii'a nzo yaa ban da ne chaan re gaz kandeler or: Lee re gaz mbel nak; gaz mandad chaan Diox kuu nkenap re zha kuu nyelaaz Jesús, ne lee re gaz kandeler, nak re zha kuu nyelaaz Jesús kuu nzo re gaz yez chaan Asia.

2

Yeets kuu mkee Juan lo re zha kuu nyelaaz Jesús yez Éfeso

¹ 'Bkee koree lo mandad kuu nkenap re zha da kuu nzo yez Éfeso: "Tenzhee ne zha kuu nden re gaz mbel yaa ban ne ndo ndrol lo re gaz kandeler or: ² Na ne reta kuu ntsow goo; noga nen xa nati ndak goo nke goo tsiiin, ne xa nxek goo ndriid goo yalti, noga nen nkezt leettsaa goo ne goo re zha kuu ntsow kuu went. Ne noga nen mtsow goo preb re zha kuu mbez nak apóstol ne nagt zhay, ne myeen goo anta nkedi zha.

³ Ne kwathoz mkez leettsaa goo mriid goo yalti kwent da, ne neeka ngwatsayt goo. ⁴ Per kuu nayiin nen goo nak, napt raa goo yalnkelaaaz taxal ngop gooy ner. ⁵ Kona btelaaaz goo naa kwan kuu went mtsow goo, ne btsee goo mod went kuu nak goo, ne thibka btsow goo re kuu wen kuu mtsow goo ner. Tak os lee goo tsowt gooy, lee na yal ne yiin nen goo ne kib'n kandeler chaan goo ta ndobe, per tsowt nay os lee goo tsee goo mod went kuu nak goo. ⁶ Per nap goo thib

kuu wen kuu ntsow goo, nayii goo ne goo re kuu ntsow re zha nicolaítas, noga na nayiin nen kona. ⁷ Loka cho ndob nza, ndoblo gon kuu ni Mbi Nayon lo re goo, kuu nak zha da: Ne lo re zha kuu tsow gan lo re kuu went, tan diiz wu zha xle chaan ya kuu ndaa yalnaban kuu thitanax, kuu ndo ndrol lo laats Chul chaan Diox.

Yeets kuu mkee Juan lo re zha kuu nyelaaz Jesúz yez Esmirna

⁸'Noga bkee koree lo mandad kuu nkenap re zha da yez Esmirna: "Koree ne zha nak, zha ner ne zha bluz, zha nguth ne mroban: ⁹ Na ne reta kuu ntsow goo; noga nen re yalti kuu ndriid goo ne kwathoz prob goo, tegal wlipaa rik goo. Noga nen xa nlooz zha goo, re zha kuu mbez nak zha Israel per nagt zhay, beeta zha nyelaaz Maxuuy nak zha. ¹⁰ Tsebt goo lo re yalti kuu rid goo; tak lee Maxuuy ko chop tson goo tsib; tsa reta goo gak preb lo yalti; ne ndoblo rid goo yalti tsii wiz. Per nali bto goo asta gath goo, tsa lee na ta koron kuu nak chaan yalnaban lo goo. ¹¹ Loka cho ndob nza, ndoblo gon kuu ni Mbi Nayon lo re goo, zha kuu nyelaaz na: Ne lee re zha kuu tsow gan lo re kuu went, ridt zha yalti lo tedib yalguth kuu yaad bluz."

Yeets kuu mkee Juan lo re zha kuu nyelaaz Jesúz yez Pérgamo

¹²'Noga bkee koree lo mandad kuu nkenap re zha da yez Pérgamo: "Tenzhee ne zha kuu nden espad kuu naluts nak kuu rop ladta nale: ¹³ Na ne reta kuu ntsow goo, nen lee goo nzo ta nabee Maxuuy, ne tegal tatay, bee nali ndo goo lon. Mlaat goo nyelaaz goo na, re wiz kuu mbeth zha Antipas kuu ngok mos da kuu nali lon, zha kuu mbeth zha xid goo, yez ta nzo Maxuuy. ¹⁴ Per nzo chop tson kuu nayiin nen goo: baa yez Pérgamo, nkeno goo re zha kuu nlaazt laa re kuu mloo Balaam kuu mteni Balac, par mtsow Balac mndaa re zha Israel falt, leettsa mdow zha re kuu mndaa zha gon lo re diox kuu nagt Diox, ne noga mtsow Balac ngok rop zha kon ndota zha. ¹⁵ Noga nap goo re zha kuu nlaazt laa re kuu mloo re zha nicolaítas, re zha kuu kwathoz nayiin nen. ¹⁶ Kona, btsee goo mod went kuu nak goo; tak os lee goo tsowt gooy, tsant raa na yal'n lo goo, ne kon espad da kuu ndroo roon yon kon re zha'a. ¹⁷ Loka cho ndob nza, ndoblo gon kuu ni Mbi Nayon lo re zha kuu nak zha da: Loka cho tsow gan lo re kuu went, tan maná yibaa kuu nzogaats wu zha; ne tan thib ke lut kuu naguz na lo zha, ne lo'ke a nke le zha kuu kub kuu yent cho nlebee, sinke beeta zha kuu kayaay nlebeey."

Yeets kuu mkee Juan lo re zha kuu nyelaaz Jesúz yez Tiatira

¹⁸ 'Noga bkee koree lo mandad kuu nkenap re zha da yez Tiatira: "Koree ne Xgann Diox kuu na ngutlo taxal loz bel ne lee nii zha nla xni taxal yiiben kuu kwathoz mzuu lo ki: ¹⁹ Na ne reta kuu ntsow goo; nen xa nke leettsoo goo altaa goo, noga nen xa nyelaaz goo na, xa ntsow goo rtsin na, ne xa nkez goo lo re yalti, noga nen masraa ngetsov gooy nal nake ner. ²⁰ Thibka kuu nayiin nen goo; nkez leettsoo goo ne goo Jezabel, ngot kuu mbez nak profet da, per beeta nkedi zha re zha kuu nak mos da kon re kuu nloo zha, ntsow zha nzhak rop re zha da kon ndota zha, ne ntsow nzhaw re zha kuu nak mos da, re kuu ndaa zha gon lo re diox kuu nagt Diox. ²¹ Kwaro mlet'n, tsa gatsee Jezabel mod nak Jezabel, per mzhylt Jezabel gatsowe; mlaat ngot nzhak rop ngot kon tedib net zha. ²² Ne os lee re zha laat zha re kuu went kuu ntsow ngota, na tsow len liz zha; ne kwathoz yalti rid re zha kuu ngok rop kon ngota, ²³ ne guth'n re zhuii ngot. Tbaa mod lee reta zha kuu nyelaaz na ne, lee na nlebeen ta mas naats leen xgab re men ne leen leettsoo re men; ne lo kadta thib goo tan kuu mtsow goo gan. ²⁴ Neeka tedib kuu taalt'n lo re goo zha yez Tiatira, kuu napt leyv chaan re zha'a, ne neeka nlebeet goo re leyv, kuu nak yalnzaak kuu nzogaats chaan Maxuuy ley lo zha. ²⁵ Per nali bto goo lo kuu ngetsov goo asta leettsa yal'n. ²⁶ Lee re zha kuu tsow gan lo re kuu went, ne tsow zha kuu nlaz'n asta wiz bluz, na ta yalnabee lo zha, leeka taxal mndaa Xut nay lon, tsa nabee zha lo reta yez kuu nzi lo yezlyu. ²⁷ Ne kon thib aga yiib tsow byo zha re yeza taxal thib yet yu. ²⁸ Ne noga tan mbel gwiiy kuu nlen til lo zha. ²⁹ ¡Loka cho ndob nza, ndoblo gon kuu ni Mbi Nayon lo re zha kuu nak zha da!"

3

Yeets kuu mkee Juan lo re zha kuu nyelaaz Jesúz yez Sardis

¹'Noga bkee koree lo mandad kuu nkenap re zha da yez Sardis: "Tenzhee ne zha kuu nap gaz Mbi Nayon chaan Diox ne zha kuu nap gaz mbel kuu nzib lobee: Na ne reta kuu ntsow goo, noga nen lee re goo nak taxal zha nguth, tegal nzib xkiiz goo lee goo naban. ² Bloo goo mkaal lo goo, ne neeky bto goo re kuu myaan lo goo kuu mera gath; tak nen lee re kuu ntsow goo lo Diox da nalit nak. ³ Btelaaz goo re kuu mteed goo ne re kuu mbin goo; bteke goo ditse ne btsee goo mod went kuu nak goo. Os lee goo root mkaal lo goo, taxal thib wann yal'n lo goo, ne neeka net goo polor yal'n. ⁴ Per noga nap goo chop tson zha kuu mteyut xab, ne re zha'a tiy kon na, ne gok zha lar naguz tak ndoblo zha gok zhay. ⁵ Ne loka cho

zha kuu tsow gan lo re kuu went, zha'a gok lar naguz, ne tuyt'n le zha lo libr kuu nak chaan yalnaban, ne gap'n le zha lo Xut'n ne lo re mandad Xut'n.⁶ ¡Loka cho ndob nza, ndoblo gon kuu ni Mbi Nayon lo re zha kuu nak zha da!"

Yeets kuu mkee Juan lo re zha kuu nye-laaz Jesús yez Filadelfia

⁷'Noga bkee koree lo mandad kuu nkenap re zha da yez Filadelfia: "Tenzhee ne zha Nayon ne zha wlipaa nak, zha nkeno yab chaan rey David, zha kuu nxaal roo pwert ne yent cho gak towgwe, ne leettsa ntow zhay yent cho gak xaale: ⁸ Na ne reta kuu ntsow goo. Wii goo lo goo mton thib pwert kuu ndezaal kuu yent cho gak tow. Ne tegal lutta neg goo, per mbin goo diiz xkiz'n ne nzhabit goo nlebeet goo na. ⁹ Wii goo lee na tsow lee re zha kuu nzhoole lo Maxuy yaad lo goo, re zha kuu nkedi mbez zha nak zha, zha Israel ne nagt zhay, ne tsow'n tobxbub zha lo goo, tsa ne zha lee na nke leettsoon goo. ¹⁰ Mbin goo diiz xkiz'n kuu mnin, ne mxek goo lo reta kwaa, kona na kenap goo lo re yalti kuu yaad dita lo yezlyu, leettsa tsow'n preb re men kuu nzi dib naxta lo yezlyu. ¹¹ Mera yal'n. Bkenap goo kuu nkeno goo, tsa yent cho kib koron goo kuu tsow goo gan. ¹² Ne lee re zha kuu tsow gan lo re kuu went, na tsow gak re zha taxal yato leen liz Diox da, ne thitanax root re zha tyaa; ne dits re zha keen le Diox da ne le yez Diox da, kuu nak Jerusalén kuu kub kuu roo yibaa lo Diox da; ne nogaa keen dits re zha, len kuu kub. ¹³ ¡Loka cho ndob nza ndoblo gon kuu ni Mbi Nayon lo re zha da!"

Yeets kuu mkee Juan lo re zha kuu nye-laaz Jesús yez Laodicea

¹⁴'Noga bkee koree lo mandad kuu nkenap re zha da yez Laodicea: "Tenzhee ne zha kuu tak tsow gak reta kwaa, zha kuu nali ndaa kwent ne wli zha kuu ni zha, zha kuu nak zha ner lo reta kwaa mdexkwaa Diox: ¹⁵ Na ne reta kuu ntsow goo. Noga nen nadypopt goo ne neeka natseyt goo. ¡Wene os nadypopt goo o natseey goo! ¹⁶ Per tak natseyt goo, ne neeka nadypopt goo, kona tseren goo roon. ¹⁷ Tak mbez goo rik goo ne kwathoz wen nzo goo, ne neeka thib kwaa ndechet goo; per nyeent goo lee goo nak zha kuu thitanax went ndo nyelaaz Diox, ne thitanax nataagt goo, prob goo, syeg goo ne cheey goo. ¹⁸ Kona tenin goo: Lon bzhii goo or kuu wlipaa nak or, tsa wlipaa gak rik goo; ne lon bkaa goo lar naguz gok goo, tsa loot yalnathoy chaan goo lee goo cheey; ne bzhii goo thib remed lon yo ngutlo goo, tsa tak wii goo. ¹⁹ Tak reta zha kuu nke leettsoon nkok zha lon, ne ntelin zha, kona bloo goo gan leettsoo goo ne btsee goo mod went kuu nak goo. ²⁰ Wii goo lee na ndo roo pwert ne

mbez'n; ne os cho zha nzhon xkiz'n ne xaal zha roo pwert, tsa lee na taab'n leen liz zha ne wu rtsee rop nee zha. ²¹ Ne lee re zha kuu tsow gan lo re kuu went, tan thib ta tob zha kon na ta ndob'n nabeen, taxal mtsow'n gan lo re kuu went ne ndob'n kon Xut'n ta nabee Xut'n. ²² ¡Loka cho ndob nza, ndoblo gon kuu ni Mbi Nayon lo re zha da!"

4

Xomod nzhoole zha lo Diox leen yibaa

¹ Ngulo mriid re koree, tsa mwiin lee thib pwert ndezaal leen yibaa; ne lee bos kuu ndezaal trumpet, kuu mni lon ner, ne lon: —Kendab nzhee, tsa lon lo'a reta kuu gak, leettsa yelo rid re koree.

² Ne ora myaan na lo yalnabee chaan Mbi Nayon, ne mwiin lee Diox ndob, ta ndob Diox nabee Diox leen yibaa. ³ Lee zha na taxal thib ke kuu le jaspe ne cornalina kuu kwathoz nzhuuy na; ne lee ta ndob zha ndo thib bith, kuu nzhuuy na taxal thib ke kuu le esmeralda. ⁴ Ne lee re ladta ta ndob zha, nzi tedib galbthap ta nyetob zha, ne lo re kona ndob thib galbthap zha gol kuu noklar naguz ne ndob koron or yek re zha. ⁵ Ne lee ta ndob Diox tya ndroo bel bti, ndroo tyen bos ne bi ngundii; ne delant lo ta ndob Diox ndo gaz kandil kuu nteni, kona nak gaz Mbi Nayon chaan Diox. ⁶ Ne delant lo ta ndob Diox nzi thib nitdoo kuu nzhol na taxal bidr.

Ne lee re ladta ta ndob Diox, nzi thap maa kuu naban kuu dita maa mzaal ngutlo maa. ⁷ Lee maa kuu ner na taxal thib mbeez; lee maa mrop na taxal thib la ngon; lee maa myon na lo taxal na lo men; ne lee maa thap na taxal thib mti kuu ndabi. ⁸ Ne kadta thib re maa nabana nkeno xoopga xil, ne dita maa nap maa ngutlo maa; tse ne yaal thibka mbez re maa:

¡Nayon, nayon, nayon, nak Zha Nabee,
Diox kuu kwathoz ney,
zha kuu ngok, zha kuu nak ne zha kuu bre
yaad!

⁹ Ne or kuu lee re maa nabana nzhoole lo Diox, ne ntsow nataak maa Diox, ne ndaa maa texkix lo Diox ta ndob Diox nabee Diox, Diox kuu naban thitanax, ¹⁰ ora lee re galbthap zha gola ntobxbub lo Diox, ne nzhoole zha lo Diox kuu naban thitanax, ne ntsi re zha koron zha lo Zha Nabee. Ne mbez re zha lo Zha Nabee:

¹¹ Diox, lu nak Zha Nabee lo nee, lo thita lu ndoblo
gol re men, thita lu ndoblo tsow nataak re
men,
ne thita lu ndoblo kayaa yalney;
tak lu mdexkwaa reta kwaa,
ne tak nlaaza kona nzo reta kwaa ne kona
mdexkwaa retay.

5

Lee Mbak zhiil chaan Diox mxaallo yeets

¹ Tsa mwiin Zha Nabee, lee zha ndob ta nabee zha, ne yaa ban zha nzo thib yeets kuu naduz, ne nke letr loy ne ditse, ne nke gaz sey ditse, tsa yent cho xaale. ² Ne mwiin thib mandad chaan Diox kuu kwathoz ney kuu dib gan nzhab:

—¿Cho ndoblo chat re sey ne xaallo yeets?

³ Per neeka yibaa, neeka lo yezlyu ne neeka xann yezlyu, yent neeka thib zha kuu ndoblo xaal lo yeets, neeka yent cho ndoblo wiiy. ⁴ Tsa lee na kwathoz mbinn na, tak mzalt neeka thib zha kuu ndoblo xaal lo yeets ne wii loy. ⁵ Tsa lee thib re zha gola ne lon:

—Gonntraa lu, taklee mbeez kuu ndyaad lo raz chaan Judá, ne ndyaad lo raz chaan rey David nak kuu mtsow gan. Lee zha nak kuu tak chat re gaz sey ne xaallo yeets.

⁶ Tsa mwiin ndrol ta ndob Zha Nabee, ne ndrol lo re maa nabana ne ndrol lo re zha gola, tyo ndo thib Mbak zhiil kuu na taxal thib maa kuu mbeth zha. Ne ndob gaz kach maa ne gaz ngutlo maa; ne lee re ngutlo maa nak gaz Mbi Nayon chaan Diox, kuu mtaal Diox dib naxta lo yezlyu. ⁷ Ne lee Mbak zhiil ngwa ta ndob Zha Nabee ne mzhens yeets kuu naduza, kuu nzo ya ban Zha Nabee. ⁸ Ne leettsa mzhens maa yeets, ora lee re that maa nabana ne re galbthap zha gola mtobxub lo Mbak zhiil. Ne kadta thib re zha gola nap zha thibga arp zha kuu nzholz zha, noga nap zha thibga btsi zha kuu or kuu tseta nzo straak, re kona nak re kuu mnodediz re zha kuu nali mndo lo Diox. ⁹ Ne nzholz zha kant kub kuu tenzhee nzhab:

Lu nak zha kuu ndoblo ten yeets ne chat re seye;

tak lu nguth lo kruz, ne kon rena mzhii'a re men, tsa gak re men zha Diox, re men reta raz, re men kuu ndediz zhaapaa zhaapaa diiz, re men kuu nzo reta yez bzihiz ne re yez naro.

¹⁰ Ne mtsowa gak re zha rey ne ngwleyy lo Diox,

tsa nabee re zha lo yezlyu.

¹¹ Mwiin ne mbin na bos chaan naroob mandad chaan Diox kuu nzi re ladta lo Diox, ta ndob Diox nabee Diox ne lo re maa nabana ne lo re zha gola. Kwathoz miyon mandad nzi ne yent cho gak tsaal kwent re mandada, ¹² ne dib gan re mandada mbez: Lee Mbak zhiil kuu mbeth re men lo kruz. Lee maa ndoblo kayaa yalnabee ne reta kuu nataak,

yalnzaak ne yalney,

noga ndoblo tsow nataak reta men maa, ne ni wen reta men maa, ne gol reta men lo maa.

¹³ Ne noga mbin na lee reta kuu mdexkwaa Diox, re kuu nzo yibaa, reta kuu nzo lo yezlyu, reta kuu nzo xann yezlyu ne re kuu nzo leen nitdoo, retay nzhab:

—Lee Zha Nabee kuu ndob nabee, ne Mbak zhiil, ndoblo gol reta men lo zha, ne tsow nataak reta men zha, ne wen tediz re men zha,

lee zha ndoblo kayaa xni ne yalney, nal ne thitanax!

¹⁴ Ne lee re thap maa nabana nzhab:

—¡Tata gake!

Ne lee re galbthap zha gola mtobxub ne mbil lo Mbak zhiil.

6

Re sey

¹ Tsa mwiin lee Mbak zhiil mchat thib sey. Ne mbin na lee thib re maa nabana mni taxal nzhatas ngundii ne:

—¡De nzheel!

² Tsa mwiin ne ngwani thib kabay naguz lon; ne lee zha kuu ndob dits maa nzo thib ark yaa zha. Ne mkayaa zha thib koron, ne mroo zha taxal thib soldad kuu nda lo zhoo, kuu mtsow gan ne tsow gan.

³ Leettsa lee Mbak zhiil mchat sey mrop, tsa mbin na lee maa mrop kuu nabana nzhab:

—¡De!

⁴ Tsa mroo thib kabay nane, ne lee zha kuu ndob dits maa mkayaa yalnabee, tsa tsow zha yo zhoo lo yezlyu, tsa kuth altaa re men taben men; ne mkayaa zha thib espad naro.

⁵ Ne leettsa lee Mbak zhiil mchat sey myon, tsa lee myon maa nabana nzhab:

—¡De!

Tsa mwiin thib kabay yaat, ne lee zha kuu ndob dits maa, nzo thib bex yaa. ⁶ Ne ndrol lo thap maa nabana mbin na thib bos kuu nzhab:

—Thibka kil nzob xtil, nak kuu ntsow zha gan ke zha tsiiin thib wiz, ne tson kil cebad nak kuu ntsow zha gan ke zha tsiiin thib wiz; per tetsaata aseyt ne neeka xit ub.

⁷ Or lee Mbak zhiil mchat sey mdap, tsa mbin na lee maa nabana kuu mdapa nzhab:

—¡De!

⁸ Tsa mwiin thib kabay kuu guts na, ne lee zha kuu ndob dits maa le yalguth, ne lee dits zha ndeke Hades. Ne lee zha'a mkayaa yalnabee, tsa luux zha thib part lo thap part lo yezlyu, tsa kuth zha re men kon zhoo, kon win, kon yiz ne kon re maa nayii kuu nzhow men.

⁹ Ne lee Mbak zhiil mchat sey gaay. Tsa mwiin lee re zha kuu nguth kwent chaan xkiiz Diox, nzi xann bkoog chaan Diox, tak mndaa zha kwent chaan Jesucrist. ¹⁰ Ne dib gan re zha'a mbez zha:

—Lu nak Zha Nabee, nayon ne nali naka, Ɂpol naaba kwent lo re men yezlyu, ne teti'a re zha taxal mtsowno zha nee?

¹¹Tsa mnnda Diox lar naguz mdok re zha, ne nzhab Diox lo re zha:

—Bee taneyy raa goo telut, asta yelo kaltaa re wets goo ne re btan goo kuu gath taxal nguth goo, tak reta goo ntsow rtsin na.

¹²Leettsa lee Mbak zhiil mchat sey xoop. Tsa mwiin mwin thib zho thoz. Ne lee lo wiz mkow taxal na lar yaat ne lee lo mbee myaan taxal ren, ¹³ne lee re mbel kuu nzib lobee mrethin mla lo yu, taxal ndrethin re ig yeen lo ya ig, leettsa kwathoz nzhax mbi. ¹⁴Ne lee lobee mnith taxal thib yeets kuu nduz, ne reta yii ne reta yezlyu kuu nzileen nitdoo, mwine ta ndobe. ¹⁵Ne lee re rey yezlyu ree mkaslo leen re kelyoo, ne re leen re kedoo, leen yii, kon re zha kuu nataak lo yezlyu, kon re rik, kon re zha kuu nabee lo re soldad, kon re zha kuu nap yalnabee, kon reta zha kuu nak mos ne kon re zha libr; ¹⁶ne mbez zha lo re yii ne lo re ke:

—Bla goo dits nee, ne bkaatslo goo nee lo Diox, ne bkaatslo goo nee lo yalti kuu taal Mbak zhiil.

¹⁷Tak mzina wiz kuu kwathoz nathoz rid re men yalti; Ɂne cho xek rid re yalti ree?

7

Re zha Israel kuu mli Diox

¹Bluz leettsa ngwalo mriiid re koree, tsa mwiin thap mandad chaan Diox kuu ndeli lo re thapta skin yezlyu, ne ntow zha lo re thap mbi kuu nzhax lo yezlyu, tsa gaxte lo yezlyu, neeka lo nitdoo ne lo neeka thib ya. ²Ne noga mwiin lee tedib mandad chaan Diox ndyaad lad ta nlen wiz; ne nden zha sey chaan Diox kuu naban thitanax. Lee mandada dib gan nzhab lo re thap mandad, kuu mkayaa yalnabee luux re kwaa nzi lo yezlyu ne lo nitdoo:

³—Ɂluuxt goo re kuu nzi lo yezlyu, neeka re kuu nzo leen nitdoo, neeka re ya, asta leettsa yelo kee'a sey chaan Diox yeklo re zha kuu nak mos Diox re'aa!

⁴Ne mbin na naa plal nak re zha kuu mke sey chaan Diox yeklo: thib gayoo chop galbthap mil nak re zha'a, zha kuu nak zha Israel. ⁵Tsiiibchop mil zha nak zha raz chaan Judá, tedib tsiiibchop mil zha nak zha raz chaan Rubén, tedib tsiiibchop mil zha nak zha raz chaan Gad, ⁶tedib tsiiibchop mil zha nak zha raz chaan Aser, tedib tsiiibchop mil zha nak zha raz chaan Neftalí, tedib tsiiibchop mil zha nak zha raz chaan Manasés, ⁷tedib tsiiibchop mil zha nak zha raz chaan Simeón, tedib tsiiibchop mil zha nak zha raz chaan Leví, tedib tsiiibchop mil zha nak zha raz chaan Isacar, ⁸tedib tsiiibchop mil zha nak zha raz chaan Zabulón, tedib

tsiiibchop mil zha nak zha raz chaan Che ne lee tedib tsiiibchop mil zha nak zha raz chaan Benjamín.

Kwathoz zha kuu nok lar naguz

⁹Ngulo mriid koree, tsa mwiin kwathoz men, re men kuu nzo dib naxta lo yezlyu, re men reta raz, re men kuu ndediz zhaapaa zhaapaa diiz, ne re men reta yez ndeli de-lant lo ta ndob Diox nabee Diox ne lo Mbak zhiil; kwathoz re menu ne yent cho gak tsaal kwent re mena, ne reta zha nok lar naguz ne nzo la yin yaa zha. ¹⁰Reta zha dib gan zha mbez zha:

ɁLee Diox re'aa kuu ndob nabee ne Mbak zhiil,
lo zha ndabaa yalnaban, tak chaan zha nake!

¹¹Ne lee reta mandad ndeli re ladta ta ndob Diox nabee Diox ne re ladta lo re zha gol, ne lo re thap maa nabana; ne mkiits yek re mandad lo Diox, ta ndob Diox nabee Diox, ne mbil re mandad lo Diox; ¹²ne nzhab zha:

ɁTbaa gake!
Reta men ndoblo gol lo Diox, ne wen tediz re men Diox,
lee yalnzaak ne texkix nak chaan Diox,
ne ndoblo tsow nataak re men Diox, tak lee Diox nap yalnabee yalney ne chaan Diox nak retay thitanax.

ɁTbaa gake!

¹³Tsa lee thib re zha gola mnaabdiz lon ne ne:

—ɁCho re zha kuu nzi tree kuu nok lar naguz? Ne Ɂpa ndyaad re zha ree?

¹⁴Tsa lee na nzhap lo zha:

—Zha Nabee, lu ney.

Tsa mkab zha, ne ne zha lon:

—Re zha ree nak re zha kuu mriid yalti thoz, ne mteech re zha xab zha ne mtsow nakanits zhay kon ren Mbak zhiil. ¹⁵Kona nal nzi re zha lo Diox, ne tse ne yaal ntsow zha tsiiin lo Diox leen gwodoo chaan Diox; ne leeka Diox nak cho nkenap re zha, tak tyo ndo Diox. ¹⁶Ridt raa re zha yalti lo win ne neeka lo nit, neeka bee teyyt raa zha, ne neeka teent raa zha bee; ¹⁷tak lee Mbak zhiil kuu ndo ndrol lo ta ndob Diox nabee Diox, kenap re zha'a, taxal zha kuu nkenap mbak zhiil, ne teno Mbak zhiil zha roo xlen nit kuu nak chaan yalnaban, ne lee Diox mtembi nit kuu nzhonn re zha lo zha.

8

Lee Mbak zhiil mchat sey gaz

¹Ne leettsa mchat Mbak zhiil sey gaz kuu nke lo yeets kuu naduza, ora lee leen yibaa zheta mgan teeka garol or. ²Tsaraa mwiin lo gaz mandad chaan Diox kuu ndeli lo Diox, ne mkayaa zha gaz trompet. ³Tsaraa myaad tedib mandad chaan Diox kuu nzo

thib btsi or yaa, ne mndeli zha delant lo bkoog; ne mkayaa zha naroob straak, tsa taa zhay lo Diox lo bkoog or, thibka kon reta kuu mndediz re men kuu nali mndo lo Diox.⁴ Ne leen btsi kuu nden mandad ndroo tseen straak, thibka kon re kuu mndediz re men lo Diox, ne mkendabe lo Diox.⁵ Tsa lee mandad mzhen btsi kuu nyoo straak, ne mloo zha ki kuu nzib lo bkoog leene ne mlobi zhay lo yezlyu; ora ngots ngundii ne mke bi, ne mla bel bti ne mwin thib zho thoz.

Re trumpet

⁶ Tsa lee re gaz mandad kuu nden trompet mndo list zha teez zha trumpet zha.

⁷ Tsa lee thib mandad mteez trompet chaan, ora mla yike lo yezlyu ne ki kuu nabexnit kon ren. Ne mteyye thib part lo tson part lo yezlyu, ne mteyye thib part re ya ne re yizhwan kuu nayee na.

⁸ Tsa lee mandad mrrop mteez trompet chaan, ora lee thib kuu na taxal thib yii kuu ngeyeek mla leen nitdo, ne thib part lo tson part nitdo mreyal ren. ⁹ Ne reta maa kuu naban lo thib part lo tson part leen nitdo nguth, ne thib part lo tson part re bark mlux.

¹⁰ Ne lee mandad myon mteez trompet chaan, tsa lee thib mbel kuu kwathoz naro, kuu ngeyeek taxal thib yerbel mrethin lobee. Ne ngobe lo thib part lo tson part lo re yoo ne lo re xlen nit.¹¹ Ne lee le mbel kuu mrethin lobee nak; nalaxin; tsa ngok nala thib part lo tson part reta nit yoo, ne kwathoz men nguth, tak kwathoz ngok nala nit.

¹² Lee mandad thap mteez trompet chaan, tsa mlux thib part lo tson part lo wiz, ne thib part lo tson part lo mbee, ne thib part lo tson part re mbel kuu nzib lobee. Tsa mkow thib part lo tson part re kona, tsa taat raay xni tse ne yaal lo thib part lo tson part lo yezlyu.

¹³ Tsaraa mwiin, ne mbin na mrez thib mti kuu ndab lobee ne dib gan maa nzhab maa:

—jAka nalatt rid re men kuu nzi lo yezlyu ree, leettsa teez tedib tson mandad trompet!

9

¹ Ne lee mandad gaay mteez trompet chaan, tsa mwiin thib mbel kuu mrethin lobee mla lo yu, ne mbela mkayaa yab chaan yeerdo. ² Ne mxaal mbel roo yeerdo, ne tyu mroo kwathoz tsen taxal leen thib orn naro. Ne lee tsen kuu mroo leen yeerdo mtekow lo wiz ne lo mbi. ³ Ne xid tsena mroo kwathoz ngebeez kuu mraats lo yezlyu; ne mkayaa maa ylnabee gaknayii maa taxal mbezhub. ⁴ Ne mndaat zha diiz lo re maa luux maa re yizhwan kuu ndab

lo yezlyu, neeka thib re kuu nayee ne neeka thib re ya, sinke ndoblo kee maay, beeta yek re men kuu nket sey chaan Diox yeklo.⁵ Per mndaat zha diiz lo re maa kuth maa men, sinke beeta teti maa re men thib gaay mbee; ne taxal nayan nkee mbezhube tata nkee maay.

⁶ Ne lee re wiza lee re men malaay tak zha gath zha, per gagt gath zha; ne tak zha gath zha, tak lee yalguth tsinti lo zha.

⁷ Lee re ngebeea na taxal re kabay kuu list ndo ya lo zhoo; ne lee yek re maa ndob thib kuu na taxal thib koron or, ne lee lo maa na taxal lo men. ⁸ Ne lee yitsek maa na taxal yitsek ngot, ne lee keley maa na taxal keley mbeez. ⁹ Ne dita maa now kon yiib, ne lee xiil re maa nkebi taxal kwathoz karret kuu nkende re kabay kuu nya lo zhoo.¹⁰ Lee kol maa nak taxal kol mbezhub, ne nap maa xkoots maa. Ne lo xkoots maa nap maa ylnabee kee maay yek re men dita thib gaay mbee. ¹¹ Ne lee zha kuu nabee lo re ngebeea nak, mandad chaan yeerdo; diiz hebreo le zha Abadón ne lee diiz gryeg le zha Apolión. (Diiz ree nak: “Zha kuu nluux reta kwwa”.)

¹² Ngulo a mriid yalti kuu ner, per bee nzhab falt techope.

¹³ Tsa lee mandad xoop mteez trompet chaan, ne ora mbin na thib bos kuu mroo leen re thap kach chaan bkoog or, kuu ndo delant lo Diox. ¹⁴ Lee bosa nzhab lo mandad xoop, kuu nden trompet:

—Btela re thap mandad kuu ndekedoo roo yoo Eufrates.

¹⁵ Ne mtelaa mandad re thap mandada, tak lista ndo re mandada par ora, par wiza, par mbee'a ne par liina, tsa kuth re mandada thib part lo tson part re men kuu nzo lo yezlyu. ¹⁶ Ne mbin naa plal nak re soldad: Chop gayoo miyon soldad kuu ndob dits kabay.

¹⁷ Tbaa ngwani re kabay lon, ne lee re zha kuu ndob dits re maa, nap zha yiib kuu ntow pech zha kuu nane na taxal yiiben kuu nzo lo ki, ne nla xni azule taxal ke kuu le safiro ne nla xni gutse taxal azufre. Lee yek re kabay na taxal yek mbeez ne lee roo re maa ndroo bel, tsen ne azufre. ¹⁸ Thib part lo tson part re men nguth lo bel, lo tsen ne lo azufre kuu ndroo roo re kabaya. ¹⁹ Tak lee ylnabee chaan re kabay nzo roo kabay ne kol kabay; tak taxal yek mbeel na kol maa, ne kon leey nkee maay yek re men.

²⁰ Per lee re men kuu nguth lo re yalti ree, mlaat zha re kuu went kuu ntow zha, neeka mlaat zha nzhollo zha lo re mbi went, ne lo re diox kuu nagt Diox, kuu natexkwaa kon or, plat, yiiben ke ne ya, re kuu gagt wii, ne gagt gon, neeka gagt te. ²¹ Ne neeka mlaat zha kuu nzhuth zha taben zha, neeka mlaat zha yalwez, neeka mlaat zha

kuu nzhak rop zha kon ndota zha, ne neeka mlaat zha yalwann.

10

Mandad kuu nden thib yeets lut kuu naduz

¹ Tsa ngwani tedib mandad kuu kwathoz ney lon, kuu ndyaadla lobee xid thib xkow, ne ndob thib bith yek zha. Ne lee lo zha nla xni taxal wiz, ne lee nii zha na taxal yato kuu nde bel. ² Ne lee yaa zha nzo thib yeets lut kuu ndezhaal lo, ne mto zha nii ban zha lo nitdoo ne lee nii beg zha mto zha lo yezlyu. ³ Tsa dib gan zha mrez zha, taxal mbezz mbezz kuu nayii, ne leettsa dib gan zha mrez zha, tsa lee gaz ngundii ngots mkbab leeka kuu nzhab zha. ⁴ Ne leettsa ngwalo ngoo bi re gaz bi'a, lee na nda kee kuu nzhab bi lo yeets; per mbin na thib bos kuu mroo yibaa kuu ne lon:

—Yent cho lo gaba kuu nzhab gaz bi, neeka keet luy lo yeets.

⁵ Tsaraa mwii lo mandad kuu ndo nii lo nitdoo ne lo yezlyu, mlap zha yaa ban zha lobee, ⁶ ne nzhab zha:

—Wlipaa tenzhee ne zha kuu naban thitanax, zha kuu mdexkwaa yibaa, yezlyu, nitdoo ne reta kuu nzo leene.

Noga nzhab zha:

—Yent raa kwan kwet re men, ⁷ or kuulee mandad gaz teez trompet chaan, ora gak re diiz chaan Diox kuu ngoo gaats, taxal nzhab re profet kuu ngoo ndala.

⁸ Lee bos kuu mbin na, kuu mroo yibaa, mre mne lon:

—Gwa ne bzhen yeets lut kuu ndezhaal lo, kuu nzo yaa mandad kuu ndeli lo nitdoo ne lo yezlyu.

⁹ Tsa ngwan lo mandada, mnaab'n yeets lutta ne lee zha ne lon:

—Bzhene ne dowe. Roo'a gak natsiy taxal mzin, per lee leettsou'a gak nalay.

¹⁰ Tsa mzhenn na yeets lut kuu nzo yaa mandada ne ndow nay; ne lee roon ngok natsiy taxal mzin, per leettsa ngwalo ndow nay, lee leettsou'n ngok nalay. ¹¹ Tsa ne re mandad lon:

—Ndoblo taa'a kwent tedib welt re kuu mne Diox lo'a, lo re men kuu nzo re yez bzhizh, lo re men kuu nzo re yez naro, lo re zha kuu ndediz zhaapaa zhaapaa diiz dib naxta lo yezlyu ne lo re rey.

11

¹ Tsa mndaa zha thib yi lon kuu nak taxal thib metr kuu nchiix men, ne ne zha lon:

—Gwateli, ne bchiix gwodoo chaan Diox, ne bkoog ne btsow kwent naa plal re zha kuu nzhoole Diox tya. ² Per chiixta lee gwodoo, tak leey mkayaa'a re zha kuu nagt zha Israel, ne chalni re zha yez nayon chop

gal bchop mbee. ³ Ne lee na taal'n chop zha da, kuu taa kwent kuu gap'n lo zha, ne thib mil chop gayoo tson gal wiz taa zha kwent, ne gok zha lar kuu nambaat nak.

⁴ Rop zha'a nak rop ya olib ne rop kandeler kuu ndo lo Zha Nabee lo yezlyu. ⁵ Ne os cho nlaaz tsow kuu went lo rop zha, tsa lee rop zha koo bel roo, kuu thitanax tey re zha kuu nayii ne zha, ne tbaaka gath reta zha kuu nlaaz tsow kuu went lo rop zha. ⁶ Rop zha'a nap yalnabee tow lobee, tsa lat yi dita thib tyemp kuu taa zha kwent chaan Diox; ne noga nap zha yalnabee, tsa tsow zha lee nit reyal ren, ne tsow zha rid yezlyu ree yalti kon relota kuu went, loka plal welt nlaaz zha. ⁷ Ne leettsa yelo taa zha kwent, lee thib maa kuu kwathoz nathoz na roo leen yeerdoo, yo kon rop zha'a, ne tsow maa gan lo rop zha ne kuth maa rop zha. ⁸ Ne lee kwerp rop zha'a gax ndrol yez, leeka leen yez ta mbeth re men Zha Nabee, ne diiz nanzee lee le yeza nak Sodoma ne Egipto. ⁹ Ne tson wiz narol, lee re men reta yez, re men reta raz, ne re men kuu ndediz zhaapaa zhaapaa diiz lo dib naxta lo yezlyu, wii lo kwerp rop zha'a ne taat zha diiz gaats rop zha'a. ¹⁰ Ne lee re zha kuu naban lo yezlyu ree, laz zha wii zha lo rop profeta, ne asta talaaaz zha re kwaal lo altaa zha; tak kwathoz yalti mriid re zha lo rop profeta.

¹¹ Per leettsa mriid tson wiz narol, lee Diox mteroban rop zha ne ngwateli zha tedib welt, ne reta men kuu mwii lo rop zha, kwathoz mzeb zha. ¹² Tsa lee rop zha mbin thib bos nex kuu mroo yibaa kuu nzhab lo rop zha:

—iKendab goo nzhee!

Tsa mkkendab rop zha ndya zha yibaa leen thib xkow, ne reta zha kuu nayii ne zha mwii lo zha. ¹³ Ne leeka ora mwin thib zho thoz, ne thib part lo tsii part yeza mla yiyo ne gaz mil men nguth lo zho'a. Ne lee re zha kuu nabanka kwathoz mzeb zha ne mbil zha lo Diox kuu ndob yibaa.

¹⁴ Ngulo'a mriid re yalti ree; per ndyaada tedibe.

Trompet gaz

¹⁵ Tsa lee mandad gaz mteez trompet chaan, ne mbin na tyen bos kuu kwathoz nex kuu mroo yibaa, kuu nzhab: Lee yalnabee chaan yezlyu ree, nal leey nak chaan Diox, Zha Nabee lo re'aa, ne chaan Jesucrist, Kuu Mtaal Diox Nabee, ne lee zha nabee thitanax.

¹⁶ Tsa lee re galbthap zha gol kuu ndob delant lo Diox, mkiits zha yek zha lo yu ne mbil zha lo Diox, ¹⁷ ne nzhab zha: Ndaa nee texkix lo'a Diox, Zha Nabee, tak lu nzhaak ntsow reta kwaal, lu nak, lu ngok ne lu bre yaad, tak mkayaa'a lu yalney chaana,

ne mndelo'a lu nabee'a lo yezlyu ree kon
yalney chaana.

18 Kwathoz nayii re men re yez kuu nzi lo
yezlyu,

per mzina wiz kuu lee'a teti re men,
leettsa naaba kwent lo re zha nguth.

Ne taa'a lo re mosa kuu ndoblo zha kayaa
zha,

lo re profet, lo re zha kuu nyelaaz lu ne lo re
zha kuu nambi ndo lo'a,

ne noga lo re zha kuu nzhon diiz lo'a,

tegal zha nataake o zha nataagte,

ne luuzha re zha kuu nluux yezlyu.

¹⁹ Tsa mzhaal pwert gwodoo chaan Diox
kuu ndob yibaa, ne lee leen gwodoo mloo
kaj kuu nzo xkiiz Diox. Ne mla bel bti, mke
bi thoz, ngots ngundii, mwin zho thoz ne
mla kwathoz yike.

12

Ngot ne mbeldoo

¹ Tsa mloo thib seny thoz lobee, lee thib
ngot kuu nabix wiz taxal thib bestid, ne lee
mbee nax xann nii ngot, ne lee yek ngot
ndob thib koron kuu nke tsuibchop mbel
kuu nzib lobee choy. ² Lee ngota ndo nak
zhiinn, ne mbetsyath ngot mbez ngot nlaaz
leettsou ngot, tak mera gal zhiinn ngot.
³ Ne mloo tedib seny thoz lobee, lee thib
mbeldoo kuu nane na kuu ndob gaz yek
ne ndob tsii kach, ne thibga koron ndob
kadta yek maa. ⁴ Ne kon kol maa mdobyu
maa thib part lo tson part re mbel kuu nzib
lobee, ne mlobi maa re mbel lo yezlyu. Lee
mbeldoos a'mndo lo ngot kuu mer gal zhiinn,
tsa kuth mbeldoo zhiinn ngot, or kuu gal
zhiinn ngot. ⁵ Ne lee ngot ngop thib mbet bi,
kuu gak zha kuu nabee lo re men kuu nzi
dita lo yezlyu kon thib bar yiib. Ne mbyiib
xgann ngot lo ngot ne ndano zha xgann ngot
mndob lo Diox ta ndob Diox nabee Diox;
⁶ ne lee ngot mzhonn nda par net yubiz, ta
mdexkwaa Diox yo ngot, ne tyaa Diox
kuu wu ngot thib mil chop gayoo tson gal
wiz.

⁷ Tsaraa ngoo thib zhoo yibaa, tsa lee
mandad Miguel kon tedib net mandad
mbyo kon mbeldoo ne kon re mandad mbel-
doo, ⁸ per mtsowt mbeldoo gan lo zhoo;
ne mndaat raa zha diiz gabet mbeldoo kon
re mandad mbeldoo yibaa. ⁹ Ne mloo zha
mbeldoo yibaa, mbeldoo kuu nak mbeel
gol ndala kuu le Mahotsa ne Maxuuy, kuu
nkedi reta men kuu nzi lo yezlyu. Ne mlobi
zha Mahotsa kon re mandad Mahotsa lo
yezlyu.

¹⁰ Tsa mbin na thib bos kuu kwathoz nex
kuu mroo yibaa, kuu nzhab:

Lee nal mzina yalnaban kuu thitanax,
yalney ne tyemp kuu lee Diox nabee,
ne yalnabee chaan Crist,

tak mloo'a zha mbeldoo, kuu tse ne yaal
nkeki re wetsaa ne re btanaa lo Diox.

¹¹ Ne mtsow re zha gan lo mbeldoo kon ren
Mbak zhiil,

ne kon xkiiz Diox kuu ndaa re zha kwent;
tak mzebt re zha gagath zha,

sinkie thib mloo zha yek zha gath zha.

¹² Yibaa ne reta goo kuu nzo leen yibaa,
naley bloo goo leettsou goo.

iPer kwathoz nalatt rid re goo kuu nzi lo
yezlyu ne nzo leen nitdoo!

Tak lee Maxuuy mla'a lo goo lo yezlyu, kon
dib yalnayii chaan Maxuuy, tak ne'a
Maxuuy telutta tyemp nap Maxuuy.

¹³ Ne leettsa mne mbeldoo lee mbeldoo
mla lo yu, tsu mreke mbeldoo dits ngot kuu
ngop mbet bi'a. ¹⁴ Per lee ngota mkayaa
chop xiil mti kuu kwathoz naro, tsa tak lazbi
ngot ya ngot yubiz, tith lo mbeldoo, ne tyaa
zaa zha kuu wu ngot tson liin narol. ¹⁵ Tsa
lee mbeldoo mloo nit roo, tsa gake thib yoo
kuu gwe ngot; ¹⁶ per lee yezlyu mtsow ayud
ngot, ne mzhaal yezlyu ne mdab yezlyu
nit kuu mroo roo mbeldoo. ¹⁷ Ne kona
lee mbeldoo masraa mnayii mne ngot, tsa
ngwa mbeldoo mbyo mbeldoo kon reta zha
kuu nak zha raz ngot, re zha kuu nzhon diiz
lo xkiiz Diox, ne nali ndo ndaa kwent chaan
Jesucrist. ¹⁸ Ne lee mbeldoo mndeli lo gux
roo nitdoo.

13

Chop maa kuu kwathoz nathoz na

¹ Mndon lo gux roo nitdoo, tsa mwiin
mkendab thib maa kuu kwathoz nathoz na
lo nitdoo, ne ndob gaz yek maa ne tsii kach
maa. Ne kadta kach maa ndob thib koron,
ne re yek maa nke diiz kuu ngode maa Diox.

² Lee maa kuu kwathoz nathoz na mwin,
na taxal thib tigr, lee nii maa na taxal nii
os ne lee roo maa na taxal roo mbeez. Tsa
lee mbeldoos mndaa yalney chaan mbeldoo
ne ta ndob mbeldoo lo maa, noga mndaa
mbeldoo kwathoz yalnabee lo maa. ³ Ne lee
thib yek maa mroo grid, ne nzhak maa kuu
mer gath nzhak maa; per lee yek maa kuu
mroo grida mgwe. Ne lee reta men yezlyu
mzegey leettsou ne mndeke dits maa. ⁴ Tsa
mbil re zhalo mbeldoo, tak mndaa mbeldoo
yalnabee lo maa kuu kwathoz nathoz na,
ne noga mbil re men lo maa kuu kwathoz
nathoz na, ne mbez re men:

—Yent raa cho taxal maa ree ne yent cho
tak tsow gan lo maa.

⁵ Noga mkayaa maa yalnabee, tsa ni maa
re diiz de lo Diox, ne noga mkayaa maa
yalnabee thib chop gal bchop mbee. ⁶ Ne
tata mtsow maa mlode maa Diox, le Diox, ta
nzo Diox, ne noga mlode maa reta zha kuu
nzo yibaa. ⁷ Ne mkayaa maa yalnabee par
yo maa kon re zha kuu nyelaaz Diox, asta
tsow maa gan lo re zha; noga mkayaa maa

yalnabee tsa nabee maa lo re men reta raz, lo re men reta yez, lo re men kuu ndediz zhaapaa zhaapaa diiz ne lo reta men kuu nzo dita lo yezlyu. ⁸ Ne lo maa kuu kwathoz nathoz na, mbil reta men kuu nzi lo yezlyu, kuu nket le lo libr kuu nak chaan yalnabee, desde leettsa mdexkwaayezlyu, ne libra nak libr chaan Mbak zhii kuu nguth lo kruz.

⁹ Loka cho ndob nza ndoblo gon koree:
¹⁰ Reta zha kuu ndano tedib net zha tsib, noga re zha'a ta tsib; ne lee re zha kuu nzihth men kon espad, kon espadka gath zha.

Kona lee re zha kuu nyelaaz Diox ndoblo xek zha.

¹¹ Tsaraa mloo tedib maa kuu kwathoz nathoz na lon, maa ree mroo leen yezlyu. Ne ndob chop kach maa, kuu na taxal kach mbak zhii, per taxal mbeldoo ndediz maa. ¹² Ne dita yalnabee chaan maa kuu kwathoz nathoz kuu nera nap maa ree, ne ntsw maa lee yezlyu ne reta men kuu nzi lo yezlyu nzchool lo maa kuu nera, maa kuu mgwe grid ne nguth. ¹³ Ne noga ntsw maa re kuu thoz kuu gagt tsow re men, ne asta mtsow maa mroo bel lobee mla lo yu, ne mwii re mene. ¹⁴ Ne por maa kuu kwathoz nathoz kuu nera, ntsw maa kuu thoz, tsa nked maa reta men kuu nzi lo yezlyu, ne mnabees maa lo re men texkwaa re men thib imaj chaan maa kuu kwathoz nathoz kuu mroo grid lo espad ne mgwe. ¹⁵ Ne lee maa'a mkayaa yalnabee, tsa tsow maa ban imaj chaan maa kuu nera, tsa lee imaj tediz ne kuth reta zha kuu tobxubt ne golt lo imaj. ¹⁶ Ne noga ntsw ke sey yaa bar re men o yeklo re men kuu nataak ne re men kuu nataagt, zha rik, zha prob, zha libr ne zha kuu nak mos. ¹⁷ Ne yent cho gak tho neeka tii, os nket sey o le maa kuu kwathoz nathoz kuu nera o numr kuu nak le maa, yaa zha o yeklo zha.

¹⁸ Koree ndeche yalnzaak; loka cho nyene, tsow kwent numr chaan maa kuu kwathoz nathoz, kuu nak numr chaan men. Ne lee numr nak, xoop gayoo tson gal xoop.

14

*Thib gayoo chop gal thap mil zha nzchool
lo Mbak zhii*

¹ Tsaraa mwiin, ne ngwani thib Mbak zhii kuu ndeli yek yili Sion lon. Ne lo maa nzi thib gayoo chop galbthap mil men, re zha kuu nke le Mbak zhii ne le Xut Mbak zhii yeklo. ² Ne mbin na thib bos kuu mroo yibaa, kuu nyoo bi taxal ta kwathoz nla nit ne taxal bi ngundii; ne lee bos kuu mbin na nataak taxal tyen bos re zha kuu nzchool arp. ³ Ne nzchool re zha thib kant kub lo Diox

delant lo thap maa nabana ne delant lo re zha gola. Ne yent cho ngok gateed kanta, sinke beeta re thib gayoo chop gal thap mil zha kuu nali ngok lo Jesucrist lo yezlyu. ⁴ Re zha'a nak re zha kuu nambi mndo lo Diox, ngogt rop re zha'a kon neeka thib ngot ne kon neeka thib mbyi, re zha'a ndeke dits Mbak zhii loka pa ta nda maa. Diox ne Mbak zhii mtelaa re zha'a lo re men yezlyu ree, tsa lee re zha'a gak taxal gon kuu ner lo Diox ne lo Mbak zhii. ⁵ Nambi nak re zha'a, tak neeka thib lan diiz kuu wlit mroot roo zha.

Kuu nhab tson mandad chaan Diox

⁶ Tsa mwiin lee tedib mandad ndabi ndrol lobee, ne mandada nap Diiz Chul kuu nak thitanax, tsa taa zha kwente lo re men reta yez kuu nzi dib naxta lo yezlyu, lo reta raz ne lo reta zha kuu ndediz zhaapaa zhaapaa diiz lo yezlyu. ⁷ Ne dib gan zha mbez zha:

—Btseb goo ne goo Diox ne bil goo lo Diox, tak mzina wiz kuu lee Diox naab kwent lo reta men. Bil goo lo zha kuu mdexkwaayez lobee ne yezlyu, nitdoo ne re xlen nit.

⁸ Tsaraa mndeke tedib mandad kuu nhab:

—iMluzha Babilonia, yez naro, tak yez Babilonia mtsow lee reta men re yez mtsow thitanax kuu went, ne nake taxal mtetuz yez Babilonia re zha!

⁹ Tsaraa mndeke tedib mandad, kuu mbez dib gan:

—Os lee cho men gol lo maa kuu kwathoz nathoz ne lo imaj chaan maa, ne laa zha ke sey chaan maa yeklo zha o yaa zha, ¹⁰ teriid zha'a yalti thoz kuu yaad lo Diox, ne gu zha xit ub kuu nala, kuu nak yalmayii chaan Diox; ne lo ki ta nyol azufre rid zha yalti delant lo re mandad chaan Diox ne lo Mbak zhii. ¹¹ Ne lee tsen chaan yalti kuu rid re zha'a nkendab thitanax. Ne tse ne yaal neyt re zha kuu gol lo maa kuu kwathoz nathoz na ne lo imaj chaan maa, o re zha kuu ke sey chaan maa. ¹² Kona, lee re zha kuu nak zha yez chaan Diox, nzhon zha diiz xkiiz Diox, ne nali ndo zha nyelaaz Jesùs, ndoblo xek zha.

¹³ Tsa mbin na thib bos kuu mroo yibaa, kuu ne lon:

—Bkee koree: “Wen nda re zha kuu nak zha, Zha Nabee, re zha kuu gath naltsee par delant”.

—Wliy —ne Mbi Nayon—, tak lee re zha roxkwana zha lo re rtsin zha, tak lee re kuu wen kuu mtsow zha ndekey dits zha tsowe ayud zha.

Yalgonn kuu dop lo yezlyu

¹⁴ Tsa mwiin, ne ngwani thib xkow naguz lon; ne dits xkowa ndob thib zha kuu na taxal, Zha Kuu Mzin Ngok Men. Ne ndob thib koron or yek zha, ne nzo thib hoz

kuu nale yaa zha. ¹⁵ Ne lee tedib mandad mroo leen gwodoo chaan Diox, ne dib gan mandad mbez mandad lo zha kuu ndob dits xkowa:

—Bloohoz chaana ne bthop yalgonn kuu nzi lo yezlyu; tak ngoklo lee dope!

¹⁶ Tsa lee zha kuu ndob dits xkow mloo hoz lo yezlyu, ne mthop zha re yalgonn kuu ndab lo yezlyu.

¹⁷ Tsa lee tedib mandad mroo leen gwodoo kuu ndob yibaa, ne noga yaa mandada nzo thib hoz kuu kwathoz nale. ¹⁸ Ne lo bkoog mroo tedib mandad, kuu nap yalnabee lo bel, ne dib gan zha nzhab zha, lo mandad kuu nden hoz kuu kwathoz nale:

—Bloohoz chaana, ne bga re zhit luts ub kuu ndab lo yezlyu, tak ngwiya re ub.

¹⁹ Tsa lee mandad mloo hoz lo yezlyu, ne mthop zha reta ub kuu ndab lo yezlyu, ne mloo zhay ta ndiiy, koree nak yalti thoz kuu taal Diox. ²⁰ Ne thib lad roo yez mtii zha ub, ne lee leen ta ndii ub mroo ren kuu mzin asta xann fren roo kabay, ne mzhoy teeka thib tson kilometro.

15

Re gaz mandad kuu ndyaadno gaz yalti kuu rid bluz

¹ Tsa mwiin tedib seny thoz leen yibaa, kuu kwathoz mzegey leettsoon: Mwiin gaz mandad kuu ndyaadno gaz yalti kuu rid bluz, ne kon re koree yelo yalnayii chaan Diox.

² Noga mwiin thib kuu na taxal thib nit-doo kuu nzholl na taxal bidr ne nabexnite kon bel; ne lee re zha kuu mtsow gan lo maa kwathoz nathoz na ne lo imaj chaan maa, ne lo numu kuu nak le maa, reta zha'a ndeli lo nitdoo kuu nzholl na taxal bidr, ne nden re zha arp kuu mndaa Diox lo re zha. ³ Ne nzhool re zha kant chaan Moisés kuu ngok mos Diox, ne kant chaan Mbak zhiil chaan Diox, kuu mbez:

Kwathoz naro ne kwathoz wen thoz nak re kuu mtsowa,

Zha Nabee, lu nak Diox kuu nkeno reta yalney ne yalnabee;

¡Nali ne wli nak xneta:

Lu nak rey ne nabee'a lo re zha kuu nzo dib naxta lo yezlyu!

⁴ ¿Cho tsebt lo'a, Zha Nabee?

Ne ¿cho golt lo'a?

Tak thita lu nayon nak,

ne reta men kuu nzi dib naxta lo yezlyu, yaad gol lo'a,

tak mwii zha nali nak re kuu mtsowa.

⁵ Ngulo mriid koree, tsaraa mwiin yibaa ne lee roo gwodoo chaan Diox ta nzo xkiiz Diox mzhaal. ⁶ Ne leen gwodoo mroo re gaz mandad kuu ndyaadno re gaz yalti. Ne nok re zha lar naguz kuu nambi ne nzhuuy na, ne nzo sinch or pech zha. ⁷ Tsa lee

thib re maa nabana, mndaa thibga kop or lo kadta thib mandad, kuu tseta nzo yalnayii chaan Diox kuu naban thitanax. ⁸ Ne mze gwodoo ngoo tsen kuu ndyaad lo yalnaro ne lo yalney chaan Diox, ne yent cho tak tab tyu, asta leettsa yelo rid re gaz yalti kuu nzhab re mandada.

16

Re kop or kuu nzo yalnayii chaan Diox

¹ Tsa mbin na thib bos nex, kuu mroo leen gwodoo chaan Diox, kuu nzhab lo re gaz mandada:

—Gwa goo ne bxo goo, kuu nzo leen re gaz kop lo yezlyu, kuu nak yalnayii chaan Diox.

² Tsa lee mandad kuu ner ngwa ne mxo kuu nzo leen kop chaan lo yezlyu, ne lee reta zha kuu nap sey chaan maa kuu kwathoz nathoz na, ne re zha kuu nzhool lo imaj chaan maa, mlen zha yoob went kuu kwathoz ne.

³ Lee mandad mrop ngwa ne mxo kuu nzo leen kop chaan lo nitdoo, tsa lee nitdoo mreyal ren, taxal ren thib zha nguth, ne nguth reta maa naban kuu nzo leen nitdoo.

⁴ Lee mandad myon ngwa ne mxo kuu nzo leen kop chaan lo re yoo ne lo re xlen nit, ne retay mreyal ren. ⁵ Tsa mbin na lee mandad chaan nit nzhab lo Diox:

—Nali naka, lu nak Diox kuu Nayon, zha nak ne zha ngok, tak mnaaba kwent, ⁶ lo re zha kuu mxo ren chaan re zha kuu nali ngok lo'a, ne ren re profeta, lee nal mtsowa ngwii zha ren; tak tata nak kuu nlaaz zha.

⁷ Noga mbin na tedib bos kuu mroo lo bkoog chaan Diox, kuu nzhab:

—Zha Nabee, wlipa lu nak Diox kuu nkeno reta yalney ne yalnabee; tak wli ne nali mnaaba kwent.

⁸ Lee mandad mdap mxo kuu nzo leen kop chaan lo wiz; tsa lee wiz mkayaa yalnabee tey wiz reta men kon bel. ⁹ Ne mteyy bee re zha, per mlaat zha mod went kuu nak zha ne neeka mbilt zha lo Diox, leel mlode zha Diox kuu nap yalnabee lo re yalti ree.

¹⁰ Ne lee mandad gaay mxo kuu nzo leen kop chaan ta ndob maa kuu nathoz na, ne lee dita ta nabee maa mla yalkow. Ne lee reta zha leeka lee zha mndowley zha loz zha, tak kwathoz natii kuu ngeriid zha; ¹¹ ne tegal tatay mlaat zha re kuu went kuu mtsow zha, leel masraa mlode zha Diox kuu ndob yibaa, por re yalti kuu ngeriid zha ne por yoob kuu ndak zha.

¹² Ne lee mandad xoop mxo kuu nzo leen kop chaan leen yoo naro kuu le Eufrates, ne lee nit yoo'a mbiz, tsa mzhaal net mriid re rey kuu ndyaad lad ta nlen wiz.

¹³ Tsa mwiin lee roo mbeldoo, roo maa kuu kwathoz nathoz na ne roo zha kuu wlit nak profet, mroo tson mbi fyer kuu na taxal

mbich. ¹⁴ Ne re mbicha nak mbi chaan mbi fyer, ne ntsow maa re kuu thoz, ne mroo maa mkaltaa maa re rey kuu nzi dita lo yezlyu, tsa ya re rey lo zhoo, wiz kuu gak wiz naro chaan Diox kuu nkeno reta yalney ne yalnabee. ¹⁵ Tsa nzhab Jesús:

—Wii goo lee na yal taxal thib wann. Wenna re zha kuu naxna ne thibka nambi na xab, tsa tiyt zha cheey zha, ne loot yalanthoy chaan zha.

¹⁶ Ne lee re mbi fyera mkaltaa re rey thib ta le Armagedón diiz hebreo.

¹⁷ Ne lee mandad gaz mxo kuu nzoleen kop chaan lo mbi; ne lee leen gwodoo chaan Diox mroo thib bos nex kuu mroo ta ndob Diox, ne nzhab:

—Ngulo'a ngoke!

¹⁸ Tsa ngots ngundii ne mke bi, mla bel ne lee lo yezlyu mwini thib zho thoz, kuu neeka mas ter win desde leetsa mdexkwaa yezlyu. ¹⁹ Ne lee yez naro ngok tson lee ne lee reta yez kuu nzi lo yezlyu mla yiyo. Tsa mtelaaz Diox yez Babilonia, kuu nak thib yez naro, tsa teti Diox yeza kon yalnayii chaan Diox. ²⁰ Reta yezlyu kuu nzi leen nitdoo ne re yii mnith. ²¹ Ne lee lobee mroo yike nabii kuu ne teeka chop gal kil mla dits re men, ne reta men mndelo mlode Diox por re yalti kuu ngeriid zha lo yike, tak leey ngok thib yalti thoz.

17

Yalti kuu rid ngot kuu ntho kwerp

¹Tsa mwiin thib re mandad kuu mzhenn re gaz kopa, myaad lon ne ne:

—De, tsa lon lo'a yalti kuu rid ngot kuu ntho kwerp kuu ndob lo nitdoo. ² Reta rey ne reta men yezlyu ree, ngok rop ngota, ne mtetuz ngot re men, kon re kuu nzhab rop ngot kon re men.

³ Tsa lee Mbi Nayon mtsow lee mandad mndenon thib ta yubiz, ne ty a mwiin lee ngot, ndob dits thib maa kwathoz nathoz na ne nane na, ne mzaalta cho maa nke re diiz kuu ngode maa Diox, ne ndob gaz yek maa ne ndob tsii kach maa. ⁴ Ne lee ngota nok thib lar kuu morad ne nane na, ne nayii ngot kon or ne kon re ke kuu kwathoz chul na, ne kon re ke kuu le perla. Ne lee yaa ngot nzo thib kop or, kuu tseta nzo re kuu yu ne re kuu went kuu mtsow ngot, re kuu ngok rop ngot kon re zha byi; ⁵ ne yeklo ngot nke thib le kuu yent cho tak yen, kuu nak: “Babilonia, yez kuu kwathoz naro, yez ree nak xnaa re ngot kuu ntho kwerp, ne xnaa reta kuu nayii re men yezlyu ree ne”. ⁶ Tsaraa myeen na lee ngota nduz kon ren chaan re zha kuu nak zha yez chaan Diox, ne kon ren re zha kuu nguth, tak mndaa zha kwent chaan Jesucrist. Ne or mwiin

kona, kwathoz mzegey leettsoon. ⁷ Tsa lee mandad ne lon:

—¿Chebee nzegey leettsoo'a? Nal nin lo'a naa xomod nak kuu nzogaats, chaan ngot ree ne chaan maa kuu kwathoz nathoz na kuu ndob ngot dits, maa kuu nap gaz yek ne tsii kach. ⁸ Lee maa kuu kwathoz nathoz na kuu mwii'a, lee maa mban ndala, per lee nal yenta maa; per mer thozza roo maa leen yeerdo, tsaraa ndya maa ta lux maa thitanax. Ne lee re men kuu nzi lo yezlyu kuu nket le lo libr kuu nak chaan yalnaban, desde leetsa terka texkwaa yezlyu, tetsegey leettsoo zha, leetsa wii zha lo maa kuu kwathoz nathoz na, maa kuu ngoo ndala, ne lee nal yenta maa, per lee maa cha yaad.

⁹ 'Nzhee ndeche yalnzhaak: Lee re gaz yek maa ree nak: Re gaz yii ta ndob ngot ree ne nake gaz rey, ¹⁰ lee gaay reya ngutha; ne lee thib rey nabee nal, ne lee tedib rey ter yaad, per leetsa yaade xegte naroob. ¹¹ Lee maa kuu kwathoz nathoz na, kuu ngoo ndala ne lee nal yenta maa, lee maa gak rey xon ne leeka lee maa nak thib re gaz rey, ne bluz lux maa thitanax.

¹² Lee re tsii kach maa kuu mwii'a, nak tsii rey kuu ter nabee; lee re reya kon maa kuu kwathoz nathoz na kayaa yalnabee par nabee, per thibka or nabee re zha maa.

¹³ Lee re tsii reya thibka nak xgab zha re zha, ne taa zha yalney ne yalnabee chaan zha lo maa kuu kwathoz nathoz na. ¹⁴ Tsa yo re zha kon Mbak zhiil chaan Diox, per lee Mbak zhiil tsow gan lo re zha; tak lee Mbak zhiil nak Zha Nabee lo reta zha kuu nabee, ne lee Mbak zhiil nak rey lo reta rey. Ne lee re zha kuu nzi kon Mbak zhiil, nak re zha kuu mli Diox, mrez Diox ne nali nak zha lo Diox.

¹⁵ Noga mne mandada lon:

—Lee nitdoo kuu mwii'a, ta ndob ngot kuu ntho kwerp, nak re yez, ne re men kuu ndediz zhaapaa zhaapaa diiz, re yez naro ne re yez bzhizh kuu nzi dib naxta lo yezlyu. ¹⁶ Ne lee re tsii kach kuu mwii'a, kuu ndob yek maa kuu kwathoz nathoz na, gak nayii ne ngot kuu ntho kwerp, ne cheey ngot layaa zha ngot; ne wu zha kwerp ngot ne tey zha ngot lo ki. ¹⁷ Diox mloo'a leettsoo re zha'a, tsa tsow zha kuu nlaaz Diox, ne leeka Diox mtsow thibka ngok re zha, tsa taa zha yalnabee kuu nak zha rey lo maa kuu kwathoz nathoz na, asta yelo gak reta kuu nzhab Diox. ¹⁸ Lee ngot kuu mwii'a, nak yez kuu kwathoz naro kuu nabee lo reta rey kuu nzi lo yezlyu.

18

¹ Leettsa ngwalo mriid re koree, tsa mwiin lee tedib mandad chaan Diox kuu nla xni ndyaadla lobee, kon kwathoz yalnabee, ne dita lo yezlyu mla xni chaan mandada. ² Ne dib gan mandad mrez mandad ne nzhab mandad:

—jMluzha, mluzha Babilonia, kuu nak yez naro! jNe myaane liz re mbi fyer, ne kelyoo ta nkaso re mbi kuu nambit, ne lyaat chaan re min kuu nambit, kuu nkap leettsoo men ne men! ³ Tak reta zha kuu nzo re yez kuu nzi lo yezlyu, mnduz zha kon re kuu went kuu mtsow ngot, kuu ngok rop ngot kon re zha. Noga re rey kuu nzi lo yezlyu ngok rop kon ngot, ne re zha kuu ntho re kwaa lo yezlyu ree, ngok rik zha kon re kuu mndablaaz ngot.

⁴ Tsaraa mbin na tedib bos kuu mrooyiba, kuu ne:

—Broo goo yez baa, re goo kuu nak zha yez da, tsa tsowt goo re kuu went kuu mtsow ngot baa, tsa diinnt goo re yalti kuu diinn ngot; ⁵ tak lee re falt chaan ngot ngwateyii ne ngwazhoob asta lobee, ne lee Diox mte-laaz re kuu went kuu mtsow ngot. ⁶ Bdix goo lo ngot taxal mtsow ngot lo goo; ne chop lal kuu mtsow ngot lo goo bdix goo lo ngot. Bchuuxnit goo chop lal kuu mndaa ngot ngwii tedib net men, ne btaa gooy lo ngot. ⁷ Ne leeka taxal mtsow nataak ngot leeka lee ngot, ne mtsow ngot reta kuu nlaaz ngot, leeka tata bteti goo ngot ne btegonn goo ngot; tak mtsow ngot xgab ne nzhab ngot: “Lee na ndob’n taxal thib zha kuu nabee, ne nagt’n byud ne neeka gonn’t’n”. ⁸ Kona thibka wiz tsin reta yalti ree lo ngot, yalguth, yalne, win ne yeek ngot lo bel; tak lee Diox nap yalnabee naab kwent lo ngot.

⁹ Ne lee re rey yezlyu ree kuu ngok rop kon ngot, mnduz re zha kon re kuu went kuu mtsow ngot, gonn re zha ne kotse re zha, leettsa wii zha laann kuu ngeyeek ngota. ¹⁰ Ne tit to zha wii zha, tak tseb zha lo yalti kuu ngeriid ngota, ne gab re zha:

—jAka! jKwathoz nalatt ngok yez Babilonia, yez kuu kwathoz ney! Per gatilta mzin yalti lo’aa.

¹¹ Ne noga re zha kuu ntho lo yezlyu gonn zha ne kotse zha por yezza, tak yent raa cho tii re kuu ntho zha; ¹² kuu nak:
or,
plat,
relota ke kuu kwathoz chul na,
re ke kuu le perla,
re lar kuu wen,
re lar nzhuyu kuu nayi morad,
re lar nzhuyu kuu nayi nane,
reta ya kuu chul ndetsi,
reta kuu natexkwaa kon keley dant,
reta kuu natexkwaa kon re ya chul,
reta kuu natexkwaa kon brons,
reta kuu natexkwaa kon yiiben,

reta kuu natexkwaa kon ke kuu le mármol,
¹³ ne kanel,
relota yizh kuu chul ndetsi,
straak,
aseyt chaan ya kuu le mirra,
ne aseyt chaan ya olib,
xit ub,
aseyt,
arin,
nzob xtil,
way kuu nzhee yoo,
mbak zhiil,
kabay,
karret ne asta re mos kuu nak men.
¹⁴ Ne gab zha lo yeza:

—Lee re xle kuu kwathoz mndablaaza napt raa luy, ne lee re kuu nix ne re kuu nataak napt raa luy, ne neeka mas tsalt raa luy.

¹⁵ Lee re zha kuu ntho re koree, kuu ngok rik por yezza, tith to zha, tak nzeb zha lo yalti kuu mriid yezza, gonn zha ne kotse zha, ¹⁶ ne gab zha:

—jAka! jKwathoz nalatt mzhaka yez Babilonia kuu kwathoz naro! Kuu mdok xab kon re lar nzhuyu kuu morad ne nane na, kuu mkeno re or ne re ke kuu kwathoz chul na. ¹⁷ Ne gatilta mlux naroob yalrik!

Ne reta zha kuu ntetee bark, reta zha kuu nyoo bark, reta zha kuu nke tsin leen bark ne reta zha kuu ntsanaa temi lo nitdoo, reta zha tith to zha; ¹⁸ leettsa mwii re zha laann kuu nguk yezza, ora mrezguth zha ne nzhab zha:

—jYent raa tedib yez taxal yez naro baa!

¹⁹ Ne mchoon zha di yek zha, nzhonn zha, mbetse zha ne nzhab zha:

—jAka! jKwathoz nalatt nzhak yez naro baa! Kon yalrik chaan yez baa, ngok rik reta zha kuu mkeno bark. jNe gatilta mlux yez baa!

²⁰ Naley bloo goo leettsoo goo, reta goo kuu nzo yibaa por yez baa, ne naley bloo goo leettsoo goo, re goo kuu nak apóstol, re goo kuu nak profet ne reta goo kuu nak zha Diox; tak lee Diox mnaaba kwent lo yez baa, tak mteti yez baa goo.

²¹ Tsa lee thib mandad chaan Diox kuu kwathoz ney mzhenn thib ke, taxal thib ke molin, ne mlobi zhay lo nitdoo, ne nzhab zha:

—Leeka tabaa lux yez Babilonia kuu naro, ne thitanax wiit raa zhay. ²² Neeka mas gont raa men gol zha arp leen yez baa, neeka flaut, ne neeka trumpet; neeka tedib zha kuu nke tsin yot raa yez baa, neeka bi chaan molin ket raa leen yez baa. ²³ Ne neeka yot raa xni kuu teni yez baa, neeka yot raa yaltseya yez baa, tak lee re zha kuu ntho leen yez baa, re zha’ a ngok zha ney ne zha ro lo yezlyu, ne kon yalwez chaan yez baa, mkedi yez reta yez kuu nzi lo yezlyu.

²⁴ Ne leen yez baa mzaal ren chaan re profet, ren chaan re zha kuu nak zha yez chaan Diox, ne ren reta zha kuu nguth dita lo yezlyu.

19

¹ Leettsa ngwalo mriiid re koree, tsa mbin na bos chaan naroob men leen yibaa, kuu nzhab:

—¡Golaa lo Zha Nabee!

Lee yalnaban kuu thitanax, xni ne yalney
nak chaan Diox re'aa,

² tak wlipaap nali naab Diox kwent;

tak mnaaba Diox kwent lo ngot, kuu
kwathoz nzib xkiiz ngok rop kon re
men,

ngot kuu mtetsaa re men yezlyu kon re kuu
went kuu mtsow ngot;

ne mnaaba Diox kwent lo ngot por ren re
zha kuu ngok mos Diox.

³ Ne tedib welt nzhab zha:

—¡Golaa lo Zha Nabee! Ne lee laann kuu
ngeyeeek ngota thib nkendab.

⁴ Tsa lee re galbthap zha gola ne re thap
maa kuu nabana, mkiits yek lo yu ne mbil
lo Diox, ta ndob Diox nabee Diox, ne nzhab
re zha:

—¡Tata gake! ¡Golaa lo Zha Nabee!

⁵ Tsa lee ta ndob Diox mroo thib bos kuu
nzhab:

¡Bil goo lo Diox re'aa,
reta goo kuu mtsow rtsin Diox ne nzeb ne
Diox,

re zha nataak ne re zha nataagt!

Yaltseyaa chaan Mbak zhiil Diox

⁶ Noga mbin na thib bos kuu taxal bos
naroob men, kuu nke bi taxal thib yoo kuu
kwathoz naro, ne taxal bi ngundii, kuu
mbezz:

¡Golaa lo Diox!

Tak lee Diox re'aa kuu kwathoz ney, mn-
delo'a nabee.

⁷ Naley ne wen yo leettsoo'aa ne golaa lo
Diox,

tak mzina wiz kuu lee Mbak zhiil Diox tseyaa,
ne lee tsaal Mbak zhiil lista ndo.

⁸ Ne mndaa zha diiz,
gok tsaal Mbak zhiil lar kuu wen, nambi ne
nzhuyy.

Tak lee lar wena, nak re kuu wen kuu mtsow
re zha kuu nak zha yez chaan Diox.

⁹ Tsa lee mandad chaan Diox ne lon:

—Bkee koree lo yeets: “Wen nda re zha
kuu mrez zha ya lo fandan chaan Mbak
zhiil”.

Ne nogaa ne mandad lon:

—Wlipaa xkiiz Diox nak re diiz ree.

¹⁰ Ne mtobxub'n xann nii mandad par
gol'n lo mandad, ne lee mandad ne lon:

—Tsowta kobaa, lo Diox bil; tak lee na
nak'n mos chaan Diox taxal lu ne taxal re

wetsa ne re btana, kuu nali ndo ndaa kwent
xkiiz Jesucrist. Tak reta kuu wli chaan Jesus
mtsow lee re profet mndaa kwente taxal
ndobloy.

Zha kuu ndob dits kabay naguz

¹¹ Tsa mwiin lee lobee ndezaahal, ne mloo
thib kabay naguz lon, ne lee zha kuu ndob
dits kabay le Zha Nali ne Zha kuu ni kuu wli,
tak nali naab zha kwent ne nali ngyo zha.

¹² Lee ngutlo zha nla xni taxal loz bel, ne lee
yek zha ndob tyen koron, ne nap zha thib
le zha kuu beeta lee zha nlebee. ¹³ Ne nok
zha thib lar kuu nayi ren, ne lee le zha nak
xkiiz Diox. ¹⁴ Ne lee re soldad yibaa ndeke
dits zha, ne nok xab re soldad kon lar kuu
kwathoz wen, kuu naguz ne nambi na, ne
ndob re soldad dits kabay naguz. ¹⁵ Ne lee
roo zha ndroo thib espad kuu kwathoz nale,
ne kon espada luux zha reta yez kuu nzi lo
yezlyu. Ne nabee zhay kon thib bar yiib. Ne
taxal ntii zha ub, naab zha kwent lo re men,
kon yalnayii chaan Diox kuu kwathoz ney.

¹⁶ Ne lo xab zha ne cho kor zha nke le zha
kuu nzhab: “Rey kuu nabee lo reta rey, ne
Zha Nabee kuu nabee lo reta zha kuu nabee
lo yezlyu”.

¹⁷ Ne mwiin thib mandad kuu ndeli dits
wiz, ne dib gan zha nzhab zha lo re min kuu
ndab lobee:

—¡De goo kaltaa goo lo rtsee naro chaan
Diox, ¹⁸ tsaa wu goo beel chaan re rey, beel
chaan re zha kuu nabee lo re soldad, beel
chaan re zha kuu ney leettsoo, beel chaan
re kabay, beel re zha kuu mndob dits kabay,
beel reta zha kuu ngogt mos ne re zha kuu
ngok mos, re zha nataak ne re zha nataagt!

¹⁹ Tsa mwiin maa kuu kwathoz nathoz na
ne re rey yezlyu kon re soldad re rey, reta
rey mkaltaa, par tsow zhoo lo zha kuu ndob
dits kabaya ne kon re soldad zha'a. ²⁰ Ne
lee zha kuu ndob dits kabay naguza, mniit
maa kuu kwathoz nathoz na ne zha kuu wlit
nak profet, kuu mtsow kwathoz re kuu thoz
kon yalney chaan maa kuu kwathoz nathoz na.
Ne kon re kuu thoza makedi zha kwaro
men, kuu mke sey chaan maa kuu kwathoz
nathoz na, ne re zha kuu mbil lo imaj chaan
maa'a. Tsa lee maa kuu kwathoz nathoz na
ne zha kuu wlit nak profet, naban zha mlobi
zha zha lo bel kuu nzheek kon azufre. ²¹ Ne
lee tedib net zha nguth kon spad, kuu ndroo
roo zha kuu ndob dits kabay naguza, ne lee
re min kuu nzhew beel mze leettsoo maa
ndow maa beel re mena.

20

Thib mil liin

¹ Tsaraa mwiin lee thib mandad chaan
Diox ndyaadla lobee, nden yab chaan yeer-
doo ne nden thib kaden naro. ² Lee man-
dada mniit mbeldoo, kuu nak mbeel gox,

Mahotsa ne Maxuuuy, ne mliib zhay kon kaden thib mil liin.³ Ne mlobi zhay leen yeerdo, ne mtob zha sey roo pwert yeerdo, tsa kedit raay re yez kuu nzi dib lo yezlyu, asta yelo rid thib mil liin. Ne leettsa yelo rid thib mil liin, tsaraa laay tedib welt, per laatte naroob.

⁴Ne mwiin ta nyetob re zha kuu nabee, ne ty a mndob re zha kuu mkayaa yalnabee par naab zha kwent lo re men. Noga mwiin re zha kuu mga zha yek, tak mndaa zha kwent xkiiz Jesúz ne xkiiz Diox. Ne lee re zha'a mbilt zha lo maa kuu kwathoz nathoz na ne neeka lo imaj chaan maa'a, neeka mzhyalt zha gake sey maa'a yeklo zha o yaa zha. Mwiin lee re zha'a mre mban ne mnabee zha kon Jesucrist thib mil liin.⁵ Per lee tedib net re zha kuu nguth, mbant raa zha, asta leettsa mzaal thib mil liin. Koree nak yalroban kuu ner.⁶ ¡Wen nda re zha kuu roban lo yalroban kuu ner! Lee tedib yalguth kenot raa yalnabee lo re zha'a, sinke lee re zha'a gak ngwleyy chaan Diox ne ngwleyy Jesucrist, ne nabee re zha kon Jesucrist thib mil liin.

⁷ Ne leettsa yelo rid thib mil liin, lee Maxuuuy roo tsib,⁸ ne roo Maxuuuy, tsa kedi Maxuuuy re men kuu nzo dib naxta lo yezlyu. Roo Maxuuuy, tsa kedi Maxuuuy Gog ne Magog, tsa kaltaa Maxuuuy re soldad rop yeza par ya zha lo zhoo, ne kwathoz tyen zha, taxal gux kuu nzi roo nitdo.⁹ Ne mkendab re zha dita lo yezlyu, ne mtow zha re ladta yez nayon chaan Diox, kuu kwathoz nke leettsoo Diox. Per lee Diox mtsow mroo bel lobee kuu mteyy reta zha'a thitanax.¹⁰ Ne mlobi zha Mahotsa kuu mkedi reta zha'a, leen yaal taa nzheek azufre, leeka ta mlobi zha maa kuu kwathoz nathoz na ne zha kuu wlit nak profet. Tya rid re zha yalti tse ne yaal thitanax.

Diox naab kwent lo reta men

¹¹ Tsa mwiin thib ta naguz na, ta ndob Diox nabee Diox. Ne lee lobee ne yezlyu mzhonn lo Diox, ne mnithloy.¹² Ne mwiin reta zha nguth, zha nataak ne zha nataagt ndeli lo Diox; ne lee lo re libr mzaala. Ne noga mzhaal lo tedib libr, kuu nak libr kuu nak chaan yalnaban. Ne mnaab zha kwent lo reta men nguth, por re kuu mtsow zha kuu nke lo re libra.¹³ Tsa lee nitdo mndaa re zha kuu nguth leen nitdo, ne lee yalguth ne Hades ta nzo re nguth, mndaa reta zha kuu nzo tya; ne lo reta men mnaab zha kwent taxal kuu mtsow zha.¹⁴ Tsaraa mlobi zha yalguth ne Hades leen yaal bel. Kona gak yalguth kuu mrop,¹⁵ ne leeka tya mlobi zha re zha kuu nket le lo libr kuu nak chaan yalnaban.

21

Yibaa kub ne yezlyu kub

¹ Tsaraa mwiin thib yibaa kub ne thib yezlyu kub, tak lee yibaa ne yezlyu kuu ner mnith ne noga nitdo mnithlo.² Ne lee na Juan, mwiin yez nayon kuu naro, kuu nak Jerusalén kub, kuu ndyaadla lobee mroo lo Diox. Kuu chul na taxal thib nzaa yeen kuu nok xab par tseyea.³ Ne mbin na thib bos kuu nex kuu mroo ta ndob Diox ne nzhab:

—Tree nak ta nzo Diox kon re men. Yo Diox kon re men, ne re men gak yez chaan Diox, ne leeka Diox gak Diox re men.⁴ Lee Diox tsow gonnt raa re zha, ne yot raa yalguth, neeka kotset raa zha, neeka yot raa nabil, neeka yalne, tak reta kuu ngoo ner mriida.

⁵ Tsa ndob Diox ta nabee Diox, ne nzhab Diox:

—Lee na ntsow kub'n reta kwaas.

Noga ne Diox:

—Bkee reta diiz ree, tak retay wlipaas naka ne ndoblo yelaaz re mene.

⁶ Tsaraa ne Diox lon:

—Retay ngwalo'a ngok. Na nak zha ner ne zha bluz, na nak taxal letz kuu ner ne kuu bluz. Loka cho nzheek leettsoo, thaata tan nit kuu nak chaan yalnaban gu zha.⁷ Ne loka zha kuu tsow gan lo re kuu went, kayaa re koree, na gak Diox zha ne lee zha gak zhiinn na.⁸ Per lee re zha kuu neyt leettsoo, re zha kuu nyelaazt Diox, re zha kuu nzo zhyan leettsoo, re zha kuu nzihuth men, re zha kuu nzihak rop kon tyen zha, re zha kuu nak wez, re zha kuu nyelaaz re diox kuu nagt Diox, ne re zha kuu nkedi. Reta zha'a ndya leen yaal bel kuu nzheek kon azufre, ne koree nak yalguth mrop.

Jerusalén kub

⁹ Tsa myaad thib re gaz mandad, kuu nden thib re gaz kop kuu tseta nzo re gaz yalti kuu rid bluz, ne ne mandad lon:

—De nzhee, tsa lon nzaa yeen kuu tseyea lo'a, kuu nak tsaal Mbak zhiil Diox.

¹⁰ Ne lee Mbi Nayon mndenon, asta yek thib yii kuu kwathoz naro, ne mlooy yez nayon kuu naro lon, kuu nak Jerusalén kuu mroo lo Diox ndyaadla lobee.¹¹ Ne kon xni Diox nteni Diox yez naro'a, ne nzhuuy nay taxal thib ke kuu kwathoz chul na, taxal thib ke kuu le jaspe, kuu nke xni taxal bidr.¹² Ne re ladta yeza nke bla kuu nabii ne ya ndab, ne nape tsuibchop pwert, ne thibga mandad ndo roo kadta pwert; ne lee yek kadta pwert nke le thibga re tsuibchop raz zha Israel.¹³ Tson pwert ndoblad ta ntsetab wiz, tetsone lad ta mbix wiz, tetsone lad norte ne tetsone lad sur.¹⁴ Ne lee bla kuu nke re ladta yez, nap tsuibchop ke simyent, ne dits kadta thib ke nke, thibga le re tsuibchop apóstl chaan Mbak zhiil Diox.

¹⁵ Ne lee mandad kuu mni lon nden thib bar or, par chiix mandad yeza, re pwert ne bla chaan yeza. ¹⁶ Ne kwadrad nak yez, yewal nole ne nazhene. Tsa lee mandad mchiix yez kon bara, ne teeka chop mil kon chop gayoo kilometro nole, ne tataga ya ndabe ne nazhene. ¹⁷ Tsaraa mchiix mandad bla, ne thiib gayoo chop galbthap tsidth yaa mbyi nay ne medida mlortsin mandad.

¹⁸ Lee bla natekwaa kon ke kuu le jaspe, ne lee yez natekwaa kon or, kuu na taxal bidr kuu nambi. ¹⁹ Lee simyent bla natekwaa kon relota ke kuu kwathoz nataak ne kuu chuldoon na:

lee ke ner chaan simyent nak ke jaspe,
lee ke chop le safiro,
lee ke tson le ágata,
lee ke thap le esmeralda,
²⁰ lee ke gaay le ónica,
lee ke xoop le kornalina,
lee ke gaz le krisólico,
lee ke xon le berilo,
lee ke yee le topasio,
lee ke tsii le krisopraso,
lee ke tsuibthib le jacinto,
lee ke tsuibchop le amatista.

²¹ Ne lee re tsuibchop pwert natekwaa kon tsuibchop ke, kadta thiib pwert natekwaa kon thiib thiib ke kuu le perla. Ne lee kay yez natekwaa kon or, taxal bidr kuu nderid xni.

²² Mwiit'n neeka thiib gwodoo leen yez, tak lee Diox kuu nak Zha Nabee kuu kwathoz ney ne Mbak zhiil nak gwodoo tya. ²³ Lee yeza ndechet raay xni wiz, neeka xni mbee kuu teniy, tak lee xni chaan Diox nteniy, ne Mbak zhiil nak xni chaane. ²⁴ Ne lee re men kuu mlaa tiy lo xni yeza, ne lee re zha kuu nak rey yaadno re chaan kuu nataak lo yezza. ²⁵ Lee re pwert yeza yowt tse, tak tya yot yaal. ²⁶ Ne lee yeza kayaa reta yalnaro ne yalnataak chaan re yez kuu nzi lo yezlyu. ²⁷ Neeka thiib kuu yu tabt tya, ne neeka thiib re zha kuu ntsow kuu nakap, ne neeka thiib zha kuu nkedi; beeta re zha kuu nke le lo libr kuu nak chaan yalnaban chaan Mbak zhiil tab tya.

22

Yoo ne ychaan yalnaban

¹ Tsaa lee mandad mloo thiib yoo nambil on kuu nzo nit kuu nak chaan yalnaban. Kuu nambi na taxal bidr, ne ta ndob Diox kon Mbak zhiil tya ndrooy. ² Ne ndrol kay chaan yeza ndriiid yoo, ne rop lad roo yoo, ndo thiib ya kuu ndaa yalnaban, kuu ndaa tsuibchop klas xle ne kad mbee ndaay thiibga klas xle. Ne lee la ya nlortsin par gwe reta zha kuu kwin tya. ³ Yot raa yalde tya. Ne lee ta ndob Diox nabee Diox kon Mbak zhiil tob leen yeza, ne reta zha kuu ntsow rtsin Diox gol

lo Diox tya. ⁴ Ne tya wii re zha lo Diox ne ke le Diox yeklo re zha. ⁵ Yot raa yaal tya; ne reta zha kuu yo tya, ya nandechet raa zha xni kandil, neeka xni wiz; tak lee Diox kuu nak Zha Nabee teni lo re zha, ne lee re zha nabee thitanax.

Ndetsin gaxa lee Jesucrist yaad

⁶ Ne lee mandad ne lon:

—Reta diiz ree wliy ne ndoblo yelaaz re mene. Ne Diox kuu nak Zha Nabee, kuu mtaal Mbi Nayon mteni re profet, lee Diox mtaal mandad loo lo re mos Diox re kuu mera gak.

⁷ Jesús ne:

—¡Mera yal'n! ¡Wen nda re zha kuu nzhon diiz, re diiz kuu nke lo libr ree!

⁸ Na Juan, mbin na ne mwin re koree, ne mtobxub'n xann nii mandad kuu mloo re koree lon, par gol'n lo mandad. ⁹ Per lee mandad ne lon:

—Tsowta kobaa. ¡Lo Diox btobxub! Tak lee na nak'n mos Diox taxal lu ne taxal re wetsa, re zha kuu ngok profet ne reta zha kuu nzhon diiz lo re diiz kuu nke lo libr ree.

¹⁰ Noga ne mandad lon:

—Kaatsta re diiz kuu nke lo libr ree, tak ndetsin gaxa wiz kuu lee reta koree gak.

¹¹ Loka zha kuu ntsow kuu went, tatsowka zha kuu went, ne lee re zha kuu ntsow kuu nambit, tsowka zha kuu nambit; ne lee re zha kuu ntsow kuu wen, tatsowka zha kuu wen, ne lee re zha kuu nali nak ne nzhon diiz lo Diox, ndoblo gonka zha diiz lo Diox.

¹² Lee Jesús ne:

—¡Mera yal'n! Ne tan lo re zha taxalta kuu mtsow zha gan, taxalta kuu ndoblo zha por re kuu mtsow zha. ¹³ Na nak taxal letr kuu ner ne letr bluz, na nak kuu ner ne na nak kuu bluz, na nak kuu mndelo ne na nak kuu luux.

¹⁴ 'Wen nda re zha kuu nteech xab, tsa ndoblo zha tab zha wu zha xle chaan ya yalnaban, ne par tak tab zha roo pwert yeza. ¹⁵ Per lee re zha kuu nak taxal mbak yaan lee; re zha kuu nak wez, re zha kuu nzhakrop kon ndota zha, re zha kuu nzhuth men, re zha kuu nyelaaz re diox kuu nagt Diox, ne reta zha kuu nyow leettsoo kedi.

¹⁶ 'Na Jesús mtaal'n mandad da, par mndaa kwent re koree lo re zha da. Na nak kuu mndelo raz chaan David, ne na nak mbel gwiyy kuu nziib zhaaraa na.

¹⁷ Ne lee Mbi Nayon ne tsaal Mbak zhiil Diox mbez:

—De.

Ne loka cho gone ndoblo gab:

—De.

Ne loka cho nzheek leettsoo ne nlaaz yaad gu nit, na gap lo zha:

—De, gu'a nit kuu nak chaan yalnaban tbaata.

¹⁸ Na ni lo reta zha kuu nzhon re diiz kuu
 nke lo libr ree, kuu ndaa kwent re kuu gak:
 Os lee thib zha ntsin leettsoo ne kyaal zha
 thib re diiz kuu nke lo libr ree, leeka tata
 lee Diox taal re yalti kuu nke lo libr ree lo
 zha'a. ¹⁹ Ne os lee thib zha kib thib re kuu
 nke lo libr ree, kuu ndaa kwent re kuu gak,
 lee Diox kib kuu ndoblo zha kayaa zha lo ya
 kuu nak chaan yalnaban, ne taat Diox diiz

tab zha yez kuu nteth libr ree.

²⁰ Lee zha kuu mndaa kwent re koree, ne:

—¡Mer thoza yal'n!

¡Tbaa gake! ¡De Jesús, Zha Nabee!

²¹ Nlaz'n lee Jesús Zha Nabee lo'aa taa
 yalwen chaan lo re goo.

¡Tbaa gake!

Juan